


Jusiñamui uai:
Jusiñamui jito rafue
illa rabenico



New Testament in Huitoto, Murui (PE:hui:Huitoto, Murui)

Jusiñamui uai: Jusiñamui jito rafue illa rabenico
New Testament in Huitoto, Murui (PE:huu:Huitoto, Murui)

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files dated 29 Jan 2022

145a1f66-dca1-5de3-9c00-4e533605e488

Contents

MATEO	1
MARCOS	57
LUCAS	91
JUAN	146
HECHOS	184
ROMANOS	229
1 CORINTIOS	249
2 CORINTIOS	273
GÁLATAS	286
EFESIOS	294
FILIPENSES	302
COLOSENSES	307
1 TESALONICENSES	312
2 TESALONICENSES	316
1 TIMOTEO	318
2 TIMOTEO	324
TITO	328
FILEMÓN	331
HEBREOS	333
SANTIAGO	351
1 PEDRO	356
2 PEDRO	362
1 JUAN	366
2 JUAN	371
3 JUAN	372
JUDAS	373
APOCALIPSIS	376

MATEO JESUCRISTO EN RUEMO ILLA RAFUE CUIAFUE

Jesucristo ie usumatiai

(Lc 3.23-38)

¹ Jesucristo rafuena omoimo cue lloiacana jira, naimie cominina nano lloiticue. Jesucristo usumatiai micoriai mameciaina omoimo lloiticue. Naimie usumadi David micori. Jiaie usuma Abraham micori. ² Abraham micori jitodi Isaac micori. Isaac micori jitodi Jacob micori. Jacob micori jitodi Judá micori. Judá micori amatiai micoriai moo jiai Jacob micori. ³ Judá micori jitodi Fares micori. Jiaie jitodi Zara micori. Iaimaiai micori eidi Tamar micori. Fares micori jitodi Esrom micori. Esrom micori jitodi Aram micori. ⁴ Aram micori jitodi Aminadab micori. Aminadab micori jitodi Naasón micori. Naasón micori jitodi Salmón. ⁵ Salmón micori jitodi Booz micori. Booz micori eidi Rahab micori. Booz micori jitodi Obed micori. Obed micori eidi Rut micori. Obed micori jitodi Isaí micori. ⁶ Isaí micori cai illaima David micori moo. David micori jitodi Salomón micori. Salomón micori eidi Urías micori ai. Naiñaiñaona ollena, David micori Urías micorina jobaimemo orede. Jobaimemo naimie fiodailla mei, naiñaiñaona ote. ⁷ Salomón micori jitodi Roboam micori. Roboam micori jitodi Abías micori. Abías micori jitodi Asa micori. ⁸ Asa micori jitodi Josafat micori. Josafat micori jitodi Joram micori. Joram micori jitodi Uzías micori. ⁹ Uzías micori jitodi Jotam. Jotam micori jitodi Acáz. Acáz micori jitodi Ezequías micori. ¹⁰ Ezequías micori jitodi Manasés. Manasés micori jitodi Amón. Amón micori jitodi Josías. ¹¹ Josías micori jitodi Jeconías micori. Jeconías micori amatiai micoriai jiai itimaci. Naie facaiseconi Babilonia railla nairai dine naie nairai soldaduai cai cominina uitimaci. ¹² Naie meinomo Jeconías micori Salatiel micorina comuitate. Salatiel micori jitodi Zorobabel micori. ¹³ Zorobabel micori jitodi Abiud micori. Abiud micori jitodi Eliaquim micori. Eliaquim micori jitodi Azor micori. ¹⁴ Azor micori jitodi Sadoc micori. Sadoc micori jitodi Aquim micori. Aquim micori jitodi Eliud micori. ¹⁵ Eliud micori jitodi Eleazar micori. Eleazar micori jitodi Matán. Matán micori jitodi Jacob micori. ¹⁶ Jacob micori jitodi José micori. José micoridi María ini. Naiñaiñodi Jesús ei. Naimie mameci jiaicidi Cristo.

¹⁷ Abraham micori illa facaisemona David micori jeicia facaisemo Jesús ie catorce nanoramaci mameci jai ite. David micori facaisemona Babiloniammo ite nairai anamo cai jaiagai illa facaisemo catorce nanoramaci mameci jiai ite. Babiloniammo ite nairai anamo cai jaiagai illa facaisemona Jesús jeicia facaisemo catorce nanoramaci mameci jiai ite.

Jesús jeicia rafue

(Lc 2.1-7)

¹⁸ Jesucristo comuilla rafuena lloiticue. Jesús eidi María. Naiñaiñaona jicanotimiedi José micori. Naimie micori diga naiñaiño nia iñenia, Jesiñamui Joreño ie uaido naiñaiñaona uruesitate. ¹⁹ José micori maremie. María jai uruesillana naimie micori fidianona, naiñaiñaona meidaitañellena jira, naiñaiñaona bainino dotaacade. Jiaimie diga illamona urueside raillanona comecina facajanona, naiñaiñaona dotaacade. ²⁰ Naimie micori comecina iemo facaia, naimie micori nicairillanona, naimie micorimo Jusiñamui jaienici bairiano raite:

—José, David micori jito, Maríana jaciruiñeno ono, o aina illena. Jusiñamui Joreño naiñaiñaona jai uruesitate. ²¹ Himana jocoite. Ie comini naimaci jeacinomona naimie jilloitajabilla jira, Jesúna o jitalle naimie mamecidi —raite. ²² Bie rafue suide, Jusiñamuidi ie lloraíma micori jaiie llotataga uaina suillena. ²³ Jaiie llotatate:

Himana uiñoñediñaiño como comuite uruedi.
Himana jocoite.

Emanuel ie mameci jítalle.

Bie mameci oni dobaiñuamona raite: “Jusiñamui cai diga ite”.

²⁴ José micori casidemo, Jusiñamui jaienici lloga uaina finode. Maríana ote, ie aina illena; ²⁵ iadedi nai jítoma naiñaiño nia jocoñenia, naiñaiño diga naimie micori nia iniñede. Naiñaiño jito jeicia mei, José micori jítade naimie mamecina Jesúsna.

2

Monamo ite ramo comeциаina facauidino rafue

¹ Judea railla eniruemo Jesús jeiciga. Naimie jeicianodi Belén. Naie facaiseconi ite illaimadi Herodes micori. Monamo ite ramo comeциаina facauidino naie facaiseconi Jerusalémo jítoma billafo dinena bitimaci. Jerusalémo itinomo jicanotimaci:

² —¿Ninomo como jeiciga omoi judíuai illaimadi? Jítoma bisoillafomo como bairede ucuduna ciodicai. Naiemona naimie jeicana jai uiñoticaí. Naimiemo iobillacinona fecallena biticaí.

³ Herodes micoridi naicinona cacajanona, ie comeци jarire ite. Jiaimie naimie meifomo illana jítaiñede. Jerusalémo itinodi jiai jarire itimaci. ⁴ Ie facaise Herodes micori judíuai illaicomínina uaiduanona, naimacimo Cristo raillamie jeicana jicanote. ⁵ Uai otimaci:

—Judea railla eniruemo. Belémo. Iena Jusiñamui facaina micoridi jaiie cueda:

⁶ Judea eniruemo Belén nairai ite; ia naie nairai eo janorede.

Naie nairaimona damie jeiciamona, omoi illaimana jaite.

Naimiedi cue Israel railla comínina sedaite.

Iemona Belén nairai Judea illaicomíni baifemo faite

cueda. ⁷ Iena cacaja mei, Herodes micoridi monamo ite ramo comeци facauidino bainino uaidote. Naie ucudu bairia facaise raise uiñollena jicanote. ⁸ Naimacina Belémo orede. Llote:

—Naie uruena raise jeno. Naimiena omoi ciua mei, cuemo lluaibi, naimie dine cue jaillesa. Naimiemo iobillacinona jiai fecaacadicue —llote.

—Jii —fairiotimaci. ⁹⁻¹⁰ Iena naimie micori llua mei, jaidimaci. U cuduna naimaci dane ciuamona, eo iobidimaci. Naimaci ciua ucududi naimacina ifuanona, monamo naie urue afemo ride. ¹¹ Fo jaillano uruena, ie ei María diga, ciodicimaci. Naimiemo iobillacinona fecallena, caiñici ifodo ana rainadatimaci. Naimaci bolsas sebiñuanona, naimiemo rana jamai fecadimaci. Oro fecadimaci. Caimare sorirede rana jiai fecadimaci. ¹² Naimaci inia anamo naimaci nicairillanona, Jusiñamui llote:

—Herodes dine abido jaiñeno —llote. Ie jira Jerusalémo jaiñeno abido naimaci eniruemo jaidimaci.

Egiptomo Jesús jailla rafue

¹³ Naimaci jailla mei, José micori inia anamo nicairite. Nicairillanona, Jusiñamui jaienici di naimiemo bairiano raite:

—Egiptomo nai o urue diga, ie ei diga, mai jai. Omo cue llua dinori nainomo i. O abido billirui lloiticue. Herodedi nai uruena jenoite, naimiena meinellena —raite.

¹⁴ José micori raire casillano, nai urue diga, Jesús ei diga, Egiptomo naiona jaide. ¹⁵ Herodes micori fiodable dinori nainomo ite. Ie muidona Jusiñamui ie facaina lloraima micori llotataga uai jai suide. Jaie lloga: “Egiptomona cue Jítoma jai uaidoticue”.

Mena años itisaiai dierisedena faia rafue

¹⁶ Egiptomo Jesús jaillana Herodes micori fidiñede. Monamo ite ramo comeциina facauidino naimaci eniruemo abido jaillana naimie micori jiai fidiñede. Naimie micori dine naimaci abido biñena jira, naimie micorina naimaci jifua jira, naimie micori eo icirite. Ie jira mena años itisaiai dierisedena faetate. Nana Belémo ite isaiai diese faetate. Belén ecimo itino uruiaina jiai faetate. Naie ucudu mena años jaie nano bairena jira,

mena años itisaia dierisedena faetate. ¹⁷ Raquel micorí jaie eia isoi, Belén itino birui eedimaci. Jeremías micorí iena jaie cueda:

¹⁸ Ramá railla nairaí dinena Raquel micorí eo eiana cacadicue.

Caí usuño Raquel micorí eede.

Naiñaiño micorí uruiaí micoriaí facaina eede.

Jaie cominimona firaduacinona jitaiñede, naiñaiño uruiaí micoriaí jai fiodailla jira.

¹⁹ Digarui illanona, Herodes micorí fiodailla mei, Egiptomo José micorí dane nicairillanona, Jusiñamui jaienici naimiemo bairede. ²⁰ Llote:

—O comini eniruemo na o urue diga, ie ei diga, abido mai jai. Nai o uruena meineiacadimie jai fiodaite.

²¹ Ie jira ie eniruemo naie urue diga, ie ei diga, abido jaide. ²² Herodes micorí jitodi ie moo ifomo jai illana José micorí fidiano, jaciruite. Herodes micorí jito mamecidi Arquelao. Nainomo José jaiacaiñede. José micorí dane nicairillanona, Jusiñamuidi Galilea railla eniruemo naimie jaillena naimiemo llote. ²³ Nazaret railla nairaí dine jaide, nainomo illena. Iemona Jusiñamui facaina lloraini micoriaí jaie cuedafuiaí jai suide. Cristona jaie cuedimaci: “Naimiedi Nazaret imie”.

3

Jofue iñenanomo Juan Bautista micorí illa rafue

(Mr 1.1-8; Lc 3.1-9, 15-17; Jn 1.19-28)

¹ Diga años illanona, Juan Bautista raillamie micorídi jofue iñenanomo illanona, cominina dafaifia, Jusiñamui rafuena naimacina llofueuide. ² Comini naimie micorí dine billanona, naimacimo llote:

—Omoi jeacinona fainonocaida, omoi comeciaí iuailaí meido. Jusiñamui díbeimo omoi i. Naimie anamo omoi illana naimie jitailla jira, omoi iena lloiticue —llote.

³ Isaías micorídi Jusiñamui facaina lloraima. Juan Bautista micorí nia iñenia, Isaías micorídi naimie micorina jaie cuete:

Jofue iñenanomo damie jidai-jidaillana cacadicue.

Naimie llote: “Caí Nama biite,

Naimie naiso atona raise fino” llote.

Iese llote; iadedi naimie uaina naimaci feiñollena, naimaci comeciaí marena finuana ñaite. ⁴ Juan micorídi camello itiraiaí ie nilla iniroina jitade. Igoi iena ie moilligaina jitade. Fioduaina rite. Ciifona mete. Jamai rana guite. ⁵ Diga comini naimie micorí dine jai jaisoidimaci. Jerusalémona, nana Judeamon, nana Jordán fuemon, jai jaisoidimaci.

⁶ Jusiñamui naimaci jeacinona naimaci llua meino, naimacidi Juan micorí bautizaga.

⁷ Bautizallena, diga fariseuai, diga saduceuai, naimie micorí dine bitimaci; iadedi naimaci billana naimie micorí ciuano llote:

—Maraiñede rafuena finocana omoi jailla jira, jaio nairaí isoidomoi. ¿Niese Jusiñamui riicaillifuemona jilloitomoi? Cue dine omoi billena, ¿bu omoi llua? ⁸ Omoi comeciaí iuailaí meido. Omoi jeacinona fainonocai. Iemona Jusiñamui jitaillacinona fino. Mare rafuena finocana jai. Naiemona omoi comeciaí iuailaí meiduana uiñoiticaí. Ie mei omoi bautizallomoi. ⁹ Omoi comeciaina facañeno: “¿Bue ñellena o llua isoi finoiticaí? Jusiñamui Abraham micorina jaie eo raise nabaide. Abraham micorí caí moo illamona, Jusiñamui riicaillifuemona jilloiticaí”.

Ero, omoi llote: Cue llua isoi omoi finoñenia, naimie riicaillifuemona jilloñeitomoi. Abraham micorí uruiaidomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite noficimona naimiedi Abraham micorí facaina uruiaina comuitarede. ¹⁰ Ero, llisiñede riera tiedomoi. Tia mei, maraiñena jira, iena jobaidomoi. Ie isoidomoi. Omoi maraiñena jira, Jusiñamui omoi jai duere finoacade. Ie riicaillafue anamo jai itomoi.

Omoi comeciaí iuai omoi meidoñenia, omoi duere finoite. ¹¹ Jusiñamui díbeimo omoi comeciaí iuai omoi meidoia, jinui diga omoi bautizaiticue. Cue baifemo faitimie

bie facaise biite. Naimie cue ifo meidoite. Jamai bue cue isoilla jira, naimiena cue canuana uiñoñedicue. Naimie bia, naimie dibeimo omoi jaillamona, Jusiñamui Joreño omoimo itataite. Omoi comeciai iuai omoi meidoñenia, omoina duere finoite. ¹² Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isoide. Naimie rafuena lluanona, comeciai iuailai meidotinona ie moo illanomo naimiedi ofitaite; iadedi jiaie cominina duere finoite. Iraimo dotaite. Naie irai jaca duiñede —llote.

Jesús bautizaja rafue
(Mr 1.9-11; Lc 3.21-22)

¹³ Juan micori Jordán dine nia ia, Galileamona Jesús bite. Naimiena bautizallena, Juan micori dine bite. ¹⁴ Juan dinena naimiemo llote:

—Bautizallena cuemo bitio; ia dama ite. Cuen a bautizaia, cuemona mare.

¹⁵ Jesús uai ote:

—Cuen mai o bautiza. Nana Jusiñamui jitailla rafue coco finoia, mare.

Juan:

—Jee —raite. Ie facaise naimiena bautizade. ¹⁶ Jesús bautizaja mei, jinuimona bite. Mona bojodena ciode. Jusiñamui Joreño, ucugi isoi, naimie emodomo ana billana ciode.

¹⁷ Ie facaise monamona Jusiñamui llote:

—Bimie cue eo isiruiga Jito. Naimieri iobidicue.

4

Jesúna Taife ramo faia rafue
(Mr 1.12-13; Lc 4.1-13)

¹ Naie facaise nainomo naimiena ramo Taife faillena, jofue iñenanomo Jusiñamui Joreño Jesúna uite. ² Cuarenta digarui Jesús guiñede. Naie facaise fuilla mei, guiñeno illamona, aimetaite. ³ Ie facaise Taife naimie dine bite. Jesús aimetaillana naimie uiñuamona llote:

—Jusiñamui Jitodiodena, naimiemo llono: “Ore Moo, cue guillesa, bie nofici llomenicon a jaita”. ⁴ Jesús uai ote:

—Dama ite. O lluaña finoñeiticue. Jusiñamui facaina lloraíma micori iena jaie cuega: “Jiaie rafuedi llomenico guilla baifemo faite. Dama guillemo comecina facañeno; iadedi Jusiñamui lloga uaimo cai comeci facajamona, ie uaido cai jailla” cuega.

⁵ Ie mei Jerusalémo Jusiñamui jofo muidomo Taife Jesúna uite. ⁶ Raite:

—Jusiñamui Jitodiodena, eniruemo mai ana uai. David micori ona jaie cuega: Ona eenollena, Jusiñamuidi ie jaienisaímo lloite.

Eniruemo o uaiñellena, o abi bofedaiñellena, ona feiñoitimaci

cuega. Naie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

⁷ Jesús uai ote:

—Dama ite. Ana uaiñeiticue. Ero, ie cominimo Moisés micori jaie cuega: “Cai Nama Jusiñamuina facaciñeno”. Naimie cuena raise eenuana jai uiñoticue. Jamai ebena naimiena facaciñeiticue. O lluaña finoñeiticue.

⁸ Ie mei a ite anedumo Taife naimiena uite, naie anedumona nana nairaiaína cioillena. Naie nairaiaí eo ebire eruaide. ⁹ Naimiemo llote:

—Nana bie nairaiaí cue anamo birui illamona, cuena o sedaia, nana bie nairaiaí omo iiticue. O caiñici ifodo ana rainada, cuemo iobillacino o fecallena.

¹⁰ Jesús uai ote:

—Dama ite. Ona sedañeiticue. Ie cominimo Moisés micori jaie cuega: “Cai Nama Jusiñamuina seda. Dama naimiemo iobillacinona fecá”. Taife, mai cuemona oni jai.

¹¹ —Ie facaise naimiemona Taife jaide. Naimie jailla mei, Jusiñamui jaienisaí Jesús dine bitimaci. Naimiena ecallena bitimaci.

Galileamo Jesús illa rafue

(Mr 1.14-15; Lc 4.14-15)

¹² Naie facaise Juan Bautista micorina Herodes gaitajana naimie fidiano, Galilea railla eniruemo Nazaretmo Jesús jaide. ¹³ Nainomo rilla mei, Capernaumo jaide. Capernaum nairai jorai fuemo ite. Nainomo Zabulón railla enirue ite. Neftalí railla enirue jiai ite.

¹⁴ Nainomo Jesús jailla jira, Isaías micori jaie ciegafuiaí jai suide. ¹⁵ Naimie micori naie cominina jaie cueda:

Bie eniruemo diga nairai ite.

Zabulón ite. Neftalí ite.

Monaillai fuemo nairai ite. Jordán ruicafebeimo nairai ite.

Galileamo nairai jiai ite. Nainomo judíuaiñedino jai itimaci.

¹⁶ Jeacino anamo naimaci illamona, naga naie eniruemo ite comini jitiredinomo itimaci isoidimaci

Jusiñamuina uiñoñoeno fiodaicana jaidimaci; iadedi eo mare rafue birui cacaitimaci.

Naie rafue naimaci comeciaina lligaiñoite. Naie rafuena uitimie bairenite

cueda. Jusiñamuina naimaci uiñoñoena jira, naimacina iese cueda. Jesús nainomo birui llofuia jira, mare rafuena jai cacadimaci. ¹⁷ Galileamo rilla mei, Jesús llocana jaide.

Llofuate:

—Jusiñamui dibeimo illena, omoi jeacinona fainonocaida, omoi comeciái iuaina meido. Ie cominina omoi jaillena birui jitaide.

Ie llofueoicaiganona jaillena, Jesúsdi nagaamagamiena fetua rafue

(Mr 1.16-20; Lc 5.1-11)

¹⁸ Jiairuido Galilea railla jorai fuemo Jesús macaritemo, menamiena ciode. Naga ie ama iaímaiaí. Damie Simón. Jiaici naimie mamecidi Pedro. Ie ama Andrés diga ite. Llojjina fairaíma iaímaiaí. Iese jaca naie iaímaiaídi maijjuidiaímaiaí. ¹⁹ Iaímaiaímo llote:

—Cue diga omico jaiocaillena, cue diga mai bi. Cue llofueganona omico jaillena jitaídícue. Lliciaína birui ocabitomico; iadedi cominina oitomico, cue dibeimo naimaci illena.

²⁰ Iena cacajanona, ieconi iaímaiaí llojjina fainonocaida, naimie diga jaidiaímaiaí. Ie llofueganona jaillena, jaidiaímaiaí. ²¹ Lliaí bai Jesús jaidemo, jiaie menamiena ciode. Naga ie ama iaímaiaí. Damie Jacobo. Jiaímie Juan Iaímaiaí moodi Zebedeo. Naimie diga botemo itiaímaiaí. Llojjina sigaidimaci. Jesús iaímaiaína uaidote, naimie llofueganona jaillena. ²² Ieconi iaímaiaí moon fainonocaida, botemona ari billanona, Jesús diga jaidiaímaiaí.

Jesús ailluena cominina llofuia rafue

(Lc 6.17-19)

²³ Nana Galileamo Jesús jaide. Judíuai ofiracuaimo llofueuide. Naimie anamo comini illana Jusiñamui jitailla jira, Jesúsdi Jusiñamui dibeimo naimaci comeciái iuaina meiduana llofuate. Ie cominina naimaci illena llofuate. Naga isoide duicono duidinona jillotate. ²⁴ Iemona nana Siria railla eniruemo naimie mameci soride. Naie comini naga isoide duicono duidinona naimie dine atidimaci. Abi isiredinona atidimaci. Jananiaí anamo illa cominina atidimaci. Naillidinona atidimaci. Niraidanidinona atidimaci. Nana naimacina jillotate. ²⁵ Ailluena comini naimiena racadimaci. Galileamona, Decápolimona, Jerusalémona, Judeamona, Jordán ruica dibeimona comini bitimaci.

5

Anedumo naimie ia, Jesús lloga rafue

(Lc 6.20-23)

1-2 Ailluena cominina Jesúna racadimaci. Naimacina Jesús cianona, anedu muidomo jaide. Ie llofueoicaigano naimie diga jaidimaci. Nainomo ana raita, Jesús naimacimo llote:

—Omoína Jusiñamui ie cominina sedaacana rafuena ja llofueiticue. Naimie anamo naimaci illena llofueiticue. ³ Ero, Jusiñamui naimiena jitaidinona sedaite. Comeciaina facadimaci: “Naimie jitaillacinona dani finonidicai; ia naimie caina canuanona, iena finoiticaí”. Naimie cominina naie isoidino illamona, naimie naimacina canoite. Iemona caimare iitimaci. ⁴ Jusiñamui sunaitinona sedaite. Ailluena comini jeacino finocana jaidimaci. Iena uñuamona, damierie sunaitimaci. Naimie cominina naie isoidino illamona, Jusiñamui naimaci comeciaina ocuiñotaite. Iemona caimare iitimaci. ⁵ Jusiñamui abina iedoñedinona sedaite. Naimie cominina naie isoidino illamona, Jusiñamui nana enirue naimacimo iite. Eniruemo cominina ico cue sedaia, iese iite. Iemona caimare iitimaci. ⁶ Jusiñamui naimie jitaillacino finodinona sedaite. Jusiñamui mare rafuena naimaci finuana canoite. Iemona caimare iitimaci. ⁷ Jusiñamui cominina duenaitinona sedaite. Naimacina naimie duenailamona, Jusiñamui naimacina ico duere finoñeite. Iemona caimare iitimaci. ⁸ Jusiñamui jeanide comecredinona sedaite. Naimie cominina naie isoidino illamona, naimie diga jaca iitimaci. Iemona caimare iitimaci. ⁹ Jusiñamui naimie diga uri itinona sedaite. Naimie cominina naie isoidino illamona, jiaie cominina uri itaitimaci. Naie isoidino naimie cominina jaca mamecirenitimaci. Iemona caimare iitimaci. ¹⁰ Jusiñamui jitaillacinona finuamona, damierie duere sefuitimaci. Jusiñamui naie isoidinona sedaite. Naimie cominina naimaci illamona, naimie sedajanomo jaca jainaitimaci. Iemona caimare iitimaci. ¹¹ Cuemo omoi duia, duere sefuitomoi. Jiaie comini omoína jeare ñaitimaci. Omoína duere finoitimaci. Omoi joreñona tainona lloitimaci. Duere sefuitomoi; iadedi Jusiñamui omoína caimare itaitaite. ¹² Omoi isoi omoi jaiagamona Jusiñamui facaina lloraini micoriai jaie duere sefuidimaci. Iena omoi uñuamona, monamo Jusiñamuimona ailluena ibana ico omoi feiñua jira, birui omoi duere sefua, iocire omoi jai.

Jesús comini illa rafue
(Mr 9.50; Lc 14.34-35)

¹³ Jesús llote:

—Jusiñamui ie cominina sedaacalle rafue nia llofueiticue. Llicisi rifaia, jai marañede. Iena rifañellena, llicisimo sal joneticai. Sal isoidomoi. Jusiñamui jitailla isoi omoi illamona, jiaie comini marañede rafuena eo finoñedimaci. Sal ie caimano jai iñenia, ¿ñiese dane nibaiamona caimarenite? Jai marañede. Jitaiñena jira, iena oni faiga. Ie isoide. Jusiñamui jitailla isoi omoi iñenia, naimie omoína duere finoite.

¹⁴ Cuemo omoi duilla jira, jiaie cominina Jusiñamuina omoi uñotajamona, lligaiñora isoidomoi. Anedumo ite nairai jaca bairede. Ie illanona jaca uñoticaí. Jusiñamui jitailla isoi omoi illamona, jiaie comini naimiena uñoitimaci. ¹⁵ Lamparín unia mei, cirigai anamo buna rainañega. Jaca ie rainarafomo rainaca, nana jofo jeraina lligaiñollena. ¹⁶ Ie isoide. Cue rafuena jamañeno; iadedi omoi marena illamona, cominina Jusiñamuina uñota. Omoi marena illamona, comini omoi mare finoca rafuena uñoitimaci. Iemona: “Jusiñamui maremiena” raitimaci.

Jesúdi Moisés micorina llofua rafue

¹⁷ Jesús llote:

—Jusiñamui ie cominina sedaacalle rafue nia llofueiticue. Iena cue llofua jira, omoimona damierie comequina facade: “Bimie Moisés micori lloga rafuedo jañede”. Ero: “Moisés micori llogacinuai marañede” raiñedicue. “Jusiñamui facaina lloraini micoriai jaie llogacinuai marañede” jiai raiñedicue; iadedi omoína naie llogacinaina raise uñotaacadicue. ¹⁸ Biemo omoi comeciaina faca. Mona, enirue diga, nia ia, nana naie llogacinuai jaca suite. ¹⁹ Omoi einamací raitimaci: “Dajerie llogacino jiaie llogacino

baifemo faite”. Cue raiticue: Naga llogacino omoi ñnoñenia, naga omoi llofueñenia, nana Jusiñamui jitaillacinona finoñedomoi. ²⁰ Ero, Jusiñamui jitailla rafuedo judíuái illaicomini baifemo omoi jaiñenia, Jusiñamui sedajanomo jaca iñeitomoi. Naimaci naie jaie llogacinuái uiñotimaci; iadedi naimaci comeciaí Jusiñamui díbeimo iñedimaci.

Jesúdi iciriñena llofuia rafue

(Lc 12.57-59)

²¹ Jesús llote:

—Omoi llofuerañimona bie jai cacadomoi. Moisés micori omoi jaiagaimo llote: “Comena meineñeno. Comena bu meineia, jeacino jai finode. Naimie fiodaillena juez llua”. ²² Naie llogacino jai jaicabidomoi. Omoimo birui jiaie rafue lloiticue. Jiaimie diga bu iciria, jeacino jai finode. Naimie duere sefuillena, juez dine naimie uiga. Jiaimiena bu jeare ñaia, jeacino jai finode. Naimie duere sefuillena, illaicomini dine naimie uiga. Jiaimiena bu faidoia, jeacino jai finode. Jusiñamui naimiena duere finoite. Iraimo jaite.

²³⁻²⁴ Jerusalémo Jusiñamui jofomo omoi jeacino facaina naimiemo ra fecallena omoi jaia, omoi comini diga uri nano i. Jiaimie omoi diga icirillana omoi uibiñoia, omoi ra faionocaida, naimie dine nano mai jai. Naie rafue raise finollena, naimie dine jai. Ie mei Jusiñamuimo omoi rana feca.

²⁵ Omoína bu llogidoia, juez dine nia omoi riñenia, omoína llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoína oretaita. ²⁶ Nana raise ibañenia, juez llua isoi, jino jaiñeitomoi. Iese omoimo suiñellena, jiaimie diga rafuena comuitañeno. Jeacino finoñellena, jiaimie diga iciriñeno.

Jesúdi iima ie aiñede riño diga illa llua rafue

²⁷ Jesús llote:

—Omoi llofuerañimona bie jai cacadomoi. Moisés micori jaie llote: “Omoi aiñede riñoiaí diga iñeno. Omoi iniñede iñiaí diga iñeno”. “Iena bu finoia, jeacino jai finode” raitomoi. ²⁸ Jiaie rafue birui lloiticue. Ie aiñede riñoero eruaillamona naiñaiño bu nicidoia, naiñaiño diga jamai iniacananona naimie comeci facajamona, jeacino jai finode. Naiñaiño diga iñede; ia naiñaiño diga jamai iniacananona naimie comeci facajamona, jeacino jai finode. ²⁹⁻³⁰ Biena ñaiticue. Nie isoide rafue omoína jeacino finotaia, iemo eruaiñeno. Iena llinoñeno. Iemo comecina facañeno. Omoi ciua rana jira, omoi jitaillamona jeacino finodomoí. Rana omoi jetaja jira, omoi jitaillamona jeacino finodomoí. Omoi abina omoi namatañenia, omoi uisina juicono. Omoi onolli jaita. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iraimo omoi jaiñellena, jeacino finoñeno.

Jesúdi iima ie aina dotaja llua rafue

(Mt 19.9; Mr 10.11-12; Lc 16.18)

³¹ Jesús llote:

—Omoi llofuerañimona bie jai cacadomoi. Moisés micori jaie llote: “Ie aina bu dotaacania, naiñaiñoero dotajacanabena fecaja”. Iedo jai jaicabidomoi. Iena bu finoia, omoimona mare. ³² Jiaie rafue birui lloiticue. Jiaimie diga naiñaiño iñenia, ie aina bu dotajia, maraiñede. Jiairuido jiaimie diga naiñaiño ia, nanodi ie ini muidona naiñaiño jeacino jai finode. Dotaca riñoia ie aina illena bu ua mei, naimiedi jeacino jai finode. Jeacino finoñellena, aina dotaño.

Jesúdi Jusiñamui mameci jamai ebena llinoñenana llua rafue

³³⁻³⁵ Jesús llote:

—Omoï llofuerainimona bie jai cacadomoi. Moisés micorï omoï jaiagaimo llote: “Taino lloñeno; ia Jusiñamui omoï lloga uaina fino”. Iedo jai jaicabidomoi. Omoï lloga uai omoï finollena jiaie comini uifollena, Jusiñamui mamecina llinotomoi. “Tena cai linoia, cai lloga uaina cai finoñenia, Jusiñamui caina duere finoite” raitomoi. Jusiñamui mameci omoï linoñenia, omoï lloga uai omoï finoñenia, omoïmona mare. “Jusiñamui caina duere finoite” raitomoi. Iemona monamo ite ra mamecina jamai ebena llinotomoi. Eniruemo ite ra mamecina jamai ebena llinotomoi. Jerusalén railla nairai mamecina jamai ebena llinotomoi. Omoï ifogi mamecina jamai ebena jiai llinotomoi. Jusiñamui mamecina jamai ebena linoñedomoi; ia jiaie ra mamecina jamai ebena llinotomoi. Ero, monamo ite ra mamecina omoï linoia, Jusiñamui mamecina jiai llinotomoi, nainomo ie illano illa jira. Eniruemo ite ra mameci omoï linoia, iena Jusiñamui finua jira, iena naimie sedaja jira, naimie mamecina jiai llinotomoi. Jerusalén railla nairai mamecina omoï linoia, Jerusalén naimie nairaina jira, naimie mamecina jiai llinotomoi. ³⁶ Omoï jitrede ifotiraina usere omoï jaitanina jira, omoï userede ifotiraina jitre omoï jaitanina jira, omoï ifogi mameci jiai linoñeno. Dama Jusiñamui iena usere itataja jira, dama naimie iena jitre itataja jira, ifotirai mamecina omoï linoia, Jusiñamui mamecina jiai llinotomoi. ³⁷ Ie jira Jusiñamui mameci jamai ebena linoñeno. Jiaie ra mameci jamai ebena linoñeno; iadedi nie isoide rafuena omoï finoia, omoï lloga uaina taino lloñeno fino. Uanaicinona jaca llono. Uanaicinona omoï lloñenia, Taifemona omoï uaina otomoi.

Jesúdi iba oñenana llofua rafue

(Lc 6.29-30)

³⁸ Jesús llote:

—Omoï llofuerainimona bie jai cacadomoi. Moisés micorï jai llote: “Fuirillamona o uisina jiaimie jino juiconoia, juez naimie uisina juiconuana llua. O isidona jiaimie oni tainoia, juez naimie isidona oni tainuana llua. Jiaimie ona duere finoia, o duere sefuilla isoi, juez naimie duere finua”. Iedo birui jai jaicabidomoi; ³⁹ iadedi birui omoïmo lloticue: Ibana oñeno. Marañede rafue finodimemona omoï abina ridoñeno. Omoï cacaina naimie dutaia, naimie diga iciriñeno. Enefebeimo omoï uieco dobaiño, enefebei omoïna naimie dutallesa. Naimie omoïna duere finoia, ibana oñeno. ⁴⁰ Omoï iniroi bairollena omoïna bu llogidoia, juez nia omoïmo lloñenia, naimie jitailla iniroi baifemo naimiemo feca. ⁴¹ Daje kilómetro naimaci rarui ai omoïna uillana illaicomini ocuia, iena uiño. Nibai omoï comeci jitañede; ia naimacina canollena, iena mena kilómetros uiño. Naimaci ocuilla baifemo uiño. ⁴² Omoïmo ite rana bu jicaia, iena caidiñeno. Omoï rana bu jamai jicuaño uia, abido atillena, iena caidiñeno feca.

Jesúdi omoïna gaiñenano isiruillena llua rafue

(Lc 6.27-28, 32-36)

⁴³ Jesús llote:

—Omoï llofuerainimona bie jai cacadomoi. Llotimaci: “Omoï cominina isirui; iadedi omoï nairañedinona enoi”. Iedo jai jaicabidomoi. ⁴⁴ Omoïmo birui lloticue: Omoï nairañedinona isirui. Omoï gaiñenanona isirui. Omoïna duere finodino facaina Jusiñamui jii. Naimaci comeci ai iuai meiduana naimiemo jicano. ⁴⁵ Jusiñamui cominina omoï illamona, naimaci facaina jii. Ero, Jusiñamui nana cominina daje isoi canode. Nana cominina daje isoi isiruilla jira, naimiedi jitomana marañedinona lligaiñotade. Mareuidinona jiai lligaiñotade. Marañedinone dine noci deitate. Mareuidino dine jiai noci deitate. ⁴⁶ Naimie comini omoï illamona, nana comini daje isoi isirui. Omoïna isiruitinona omoï isirua, mare; iadedi omoïna gaiñenanona omoï isiruiñenia, Jusiñamui omoïna: “Mare” raiñeite. Marañede finoraini naimacina isiruitinona isiruitimaci. Nana cominina omoï isiruiñenia, marañede finoraini baifemo faiñedomoi. Naimaci isoi itomoi. ⁴⁷ Dani omoï cominina omoï uaidoia, mare; ia omoïna gaiñenanona omoï uaidoñenia, naimaci baifemo faiñedomoi. Jusiñamuina inoñedino

baifemo faiñedomoi. Naimaci isoi itomoi. ⁴⁸ Iena omoi uiñuamona, omoi Moo Jusiñamui finua isoi, mare rafuena finocana omoi jai.

6

Jesúdi mare rafue fñuana llua rafue

¹ Jesús llote:

—Omoína nia llofueiticue. Jiaie comini iena cioillena, mare rafuena omoi finoiadedi, omoína: “Mareuidinodimaci” naimaci raillena, Jusiñamuimona ibana feiñoñeitomoi. Ie jira mare rafuena finoñeno, iena jiaie comini jamai cioillena. Iena ja ñaiticue. ² Dueredinomo rana omoi jamai fecaia, iena uainino feca. Jiaie cominimona iobillacinona omoi feiñollena, iena fecañeno. Ofiracomo maredinona abi caitadino isoi omoi iñeno. Naisomo maredino abi caitadino isoi iñeno. Iena comini cioillena, dueredinomo rana marefodo fecacabidimaci. Cominimona naimaci iobillacino birui jai feiñotimaci. Jusiñamuimona ico feiñoñeitimaci. ³ Dueredinomo rana omoi fecaia, jiaie cominimo iena lloñeno. ⁴ Iena bainino feca. Bainino iena omoi fecaia, Jusiñamui iena uiñote. Naimiemona ibana feiñoitomoi. Omoína: “Mare” raite.

Jesús Jusiñamuimo jñia rafue

(Lc 11.2-4)

⁵ Jesús llote:

—Jusiñamuimo omoi jñia, maredinona abi caitadino isoi omoi iñeno. Ofiracomo naimacina comini cioillena, marefodo jñidimaci. Jñicabilla facaiseconi naisomo naimaci ia, naimacina comini cioillena, marefodo jñia jñidimaci. Naimacina: “Jusiñamuina eo sedadimaci” comini raillana jitaidimaci. Cominimona iobillacinona birui jai feiñotimaci. ⁶ Omoi jñiacania, omoi jofomo fo jai. Nainomo Jusiñamuimo anado omoi jñi. Iena Jusiñamui uiñuamona, omoi jicaca rafue naimiemona feiñoitomoi.

⁷ Jusiñamuimo omoi jñia, naimiena ñnoñedino isoi jamaicinona ñaiñeno. Naimaci comecina facadimaci: “Daje jñiracinona diga icaiño cai jñia jira, ja muidomo cai Moo caina raise cacaite”. ⁸ Naimaci isoi iñeno. Nia omoi jicañenia, naimie omoi jitaile rafuena uiñote. ⁹ Naimiemo omoi jñiacania, iese jñi:

Ore Moo, monamo itio.

Comini ori iobidesa.

¹⁰ O illaimana jira, nana cominina o anamo raire itata.

O jaienisai o jitaillacinona finua isoi, cominina o jitaillacinona finota.

¹¹ Nagarui guille caimo itata.

¹² Caina jeare jiaño finoia, iena caimona feilla isoi, cai jeacinona omona feilla jira, cai jeacinona oni dota.

¹³ Caimo ramo bu faia, caina cano, iena cai ñnoi raillano. Jeacinona finuamona caina jillota.

Iese omoi jñi. ¹⁴ Omoína jiaie comini jeare finoia, iena omoi feitaia, omoi monamo ite Moo omoi jeacinona iena feitajanona, jñia oni dotaite; ¹⁵ iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

Jesús guiñenaruina llua rafue

¹⁶ Jesús llote:

—Omoína nia llofueiticue. Raitomoi: “Jusiñamuina eo raise cai sedajanona, birui cai guiñeiticai. Iemona naimie caina eo duenaite” raitomoi. Iese Jusiñamuina omoi sedajia, sunaiñeno, mareuidinona abi caitadino isoi. Sunaitimaci. Naimaci uieco finobicabiside. Naimaci guiñenarui facaise illana comini uiñollena, naimacina comini cioillena, iese itimaci. Naimacina: “Mare” comini raillamona, iobillacinona birui jai feiñotimaci. Jusiñamuimona ico iena feiñoñeitimaci. ¹⁷ Ero, naimaci isoi omoi iñeno; iadedi omoi guiñenarui ia, omoi abiaia raise fino. ¹⁸ Iemei cominidi omoi guiñenarui illana

uiñoñeitimaci. Naimacimona iobillacinona feiñoñeitomoi. Dama Jusiñamui iena uiñoite. Bainino omoi finoca rafue naimie uiñua jira, naimiemona iba feiñoitomoi.

Jesúdi Jusiñamuimo comecina facaja rafue

(Lc 12.33-34)

¹⁹ Jesús llote:

—Omoi jofomo ailluena rana eenocana uiñeno. Gireco iena guicabite. Dajerie ra nemuide. Omoi jofomona jiaie comini iena fiacadimaci. Ailluena ra eenuamo omoi comeciaina facaño; ²⁰ iadedi Jusiñamui dine monamo omoi ra illa isoi, iemo omoi comeciaina faca. Naimiemo comeciaina cai facajamona, nainomo cai iobillacino iite. Girecuaimona, nemuillamona, firirainimona, iena nainomo faifiñeitomoi. ²¹ Aillue ra omoimo ia, Jusiñamuimo comeciaina facañedomoi; iadedi naimie jitaillacinona omoi finoa, naimiemo comeciaina facadomoi.

Jesús cai comecina llua rafue

(Lc 11.34-36)

²²⁻²³ Jesús llote:

—Cai uisi diga rana ciodicai. Cai uisi marañenia, rana raise cioñedica. Ie isoide. Cai comeci marañenia, marañedicinona finocana jaidica. Jusiñamuina uiñoñedica. Ie rafuena jiai uiñoñedica. Naimiena nabañedica.

Jesús raruiaina llua rafue

(Lc 16.13)

²⁴ Jesús llote:

—Mena patrones diga daruido buna jaca maijinide. Mena diga bu maijiacania, damiena jiaimie baifemo gaiite. Ie gaiamie ocuica rana finoite. Jiaimie ocuica rana raise finoñeite. Ie isoide. Raruia ollemo comecina omoi eo facaia, Jusiñamui jitaillacinomo comecina raise facañeitomoi.

Jesúdi Jusiñamui cai sedajana llua rafue

(Lc 12.22-31)

²⁵ Jesús llote:

—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillemo jarire comecina facaño. Omoi jtalle iniroimo jarire comecina facaño. Jusiñamui omoina itataja muidona, guille omoimo iite. Naimie omoi abi finua muidona, inroidi omoimo iite. ²⁶ Silliñaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baifemo omoi faia jira, naimie omoina canoite. ²⁷ Omoimona, ¿bu ie comeci jarire facajamona a sairite? Iese jaca buna a sairifede. Dama Jusiñamui omoina a sairitarede. ²⁸ ¿Bue ñellena iniroimo jarire comecina facadomoi? Safiamo omoi comecina faca. ¿Niese sicodimaci? Maiñedimaci. Iniroina tifornedimaci; ²⁹ iadedi Salomón micori naimaci isoi jaie ñede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide. ³⁰ Jusiñamui safiana ebiretabide. Dallu facaise illanona, safiadi duide. Safia baifemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo inroidi jaca iite. Omoi ra omoimo illena, naimiena ñno. ³¹ Omoi comeci jarire finoño. “¿Buena guitica? ¿Buena jtaitica?” rañeno. Iemo comeciaina eo facaño. ³² Jusinamuina ñnoñedino iemo comecina facacabidimaci. Nana omoi jitaillacinona omoi Moodi uiñua jira, naimaci isoi ñeno. ³³ Jusiñamui anamo raise omoi í. Naimie jitaillacinona finocana omoi jai. Naimiemo omoi comeci facaia, omoi illamo omoi comecina jarire facañeitomoi. Iemona guille omoimo iite. Iniroi omoimo iite. ³⁴ Jusiñamui omoi birui jitailla ra omoimo iite. Iena uiñuamona, jairuido suille rafuemo jarire comecina facaño. Ico omoi jitailla ra omoimo jiai iite.

7

Jesúdi jiaie cominina mameriñenana llua rafue
(Lc 6.37-38, 41-42)

¹ Jesús llote:

—Omoína nia llofueiacadicue. Jiaie cominina mameriñeno. Jiaie cominina omoí mameria, omoímo ite maraiñede rafue facaina Jusiñamui omoína duere finoite. ² Jiaie cominina omoí mamerilla diese Jusiñamui omoína duere finoite. ³ Omoí ecimo itimíemo janore maraiñedicino illana omoí uiñoia, iemo comecina facañeno; iadedi omoímo ailluena ite maraiñedicinomo nano omoí comecina faca. ⁴ Omoímo maraiñedicino illamona, ¿niese omoí ecimo itimíena mameritomoí? ⁵ Omoímo ite maraiñedicinomo omoí comecina facaacaiñena jira, maredinona abi caitadinomoi. Omoí comeciaina nano raise fino. Iemei omoí ecimo itimíena canorenitomoí. Naimie comecina raise canorenitomoí.

⁶ Ero, eo mare rana omoí jiconiáimo fecañeno. Eo raifide rana omoí chanchuaiimo fecañeno. Naimacimo omoí fecaiadedi, iena feiñoñeitimaci. Omoína gaiñenamona, jiconiái omoína ainitimaci. Chanchuai iena jamaillamona, iena saítaitimaci. Ie isoide. Damierie Jusiñamui uaina uaitacabitimaci. Iena naimaci jaca feiñoñena jira, naie rafue naimacimo llocabiñeno. Naimacimo omoí llocabia, omoína duere finoitimaci. Omoí rafuena jamaitimaci.

Jesúdi cai jitailla ra jicaja llua rafue
(Lc 6.31; 11.9-13)

⁷⁻⁸ Jesús llote:

—Daje ra omoí faifia, iena jenodomoí. Raise jenoia, iena baitomoí. Damiena omoí jenoia, naimie illanomo jaidomoí. Nainomo naimíena baillamona, omoína feiñoite. Ie isoide. Buena omoí jitaia, Jusiñamuimo jica. Iena omoí jicaja jira, iena naimie cacajamona, omoímo iite. ⁹ Ero, omoímona naimíemo llomenicono ie moomo ie jito jicaia, noficina fecañede. ¹⁰ Lliciaína jicaia, jaiona fecañede. ¹¹ Jeacínona finocabidomoí; iadedi mare ra omoí uruiáimo fecacabillana uiñotomoí. Cai Moo Jusiñamuidi jaca mareuidimie. Cai baífemo naimie faite. Ie muidona naimíemo jicanotonomo mare rana fecaite.

¹² Jusiñamui jitaillacínona omoí finuamona, jiaie cominina marena fino. Jiaie comini omoína finuana omoí jitailla isoi, naimacina fino. Naimaci omoína marena finuana omoí jitaia, naimacina marena fino. Naimaci omoína maraiñeno finuana omoí jitaia, naimacina ie isoi maraiñeno fino. Moisés micorí ie isoidicínona jaie llofujete. Jusiñamui facaina lloraini micoríai ie isoidicínona jaie jiaí llofuetimaci.

Jesúdi Jusiñamui dine rille llua rafue
(Lc 13.24)

¹³⁻¹⁴ Jesús llote:

—Jusiñamui dine omoí rillena, janorede naisodo omoí jailla isoi isoilla. Naisomo ite nasedi janorede isoide. Naimie dine naie rilla jira, naiedo omoí jai. Nainomo jaidino jaca iitimaci. Naimie dine rillena eo sefuirena jira, janore comini naiedo jaidimaci. Jiaie naiso ite. Naie naisodi aillue. Naie naisomo ite nasedi jiaí aillue. Naiedo jaidino faifitimaci. Jusiñamui dine riñeitimaci. Sefuinina jira, ailluena comini naiedo jai jaidimaci.

Jesúdi abi caitadinomona abi rairuillana llua rafue
(Lc 6.43-44)

¹⁵ Jesús llote:

—Jusiñamui facaina llorainina abi caitadinomona abina rairui. Mare lloraini isoi bitimaci; iadedi Jusiñamui rafuedo omoí raise jaiñellena, omoína jifueiacadimaci. Naimaci llofuiacínodo omoí jaia, Jusiñamui rafuedo raise jaiñeitomoí. ¹⁶ Naimaci lloga rafuemono naimaci Jusiñamui llorainiñenana uiñoitomoí. Ero, eecuáimona uvas railla riaro

oñega. Eecuaïmona higos railla riarã jiaï oñega. ¹⁷ Mare riarãmona mare llisilla comuide. Maraiñede riarãmona maraiñede llisilla comuide. ¹⁸ Mare riarãmona maraiñede llisilla comuiñede. Maraiñede riarãmona mare llisilla comuiñede. ¹⁹ Mare llisilla comuitañena jira, naga maraiñede riarã jaitaca, iena jobaillena. ²⁰ Ie isoide. Naimaci finoca rafuemonã nãe isoide lloraini naimacina uïñoitomoi. Jusiñamui llorainidena uïñoitomoi. Jusiñamui lloraiñedinodena uïñoitomoi. Naimaci maraiñena jira, Jusinamui naimacina duere finoite.

Jesúdi ie Moo ie comini sedajanomo ille llua rafue

(Lc 13.25-27)

²¹ Jesús llote:

—Naga cuemo: “Odi cue Namadio” raitimiedi Jusiñamui ie cominina sedajanomo iñeite; iadedi dama cue Moo jitaille rafue finodimiedi nainomo iite. ²² Cominimo juez isoi Jusiñamui ico llua facaiseconi, diga cominidi cuemo lloitimaci: “Nama, caina o oretatio cai raillamonã, o rafuena llocabiticaï. O uaido jananiaina oni oredicaï. O uai diga siño rafuena finodicaï” lloitimaci. ²³ Uai oiticue: “Omoïna uïñoñedicue. Cue cominiñedomoi. Jeacino omoi comecimo nia illã jira, cuemonã oni omoi jai. Cue Moo ie comini sedajanomo jaca iñeitomoi”.

Jesúdi naimiena #nuana ñaia rafue

(Lc 6.47-49; Mr 1.22)

²⁴ Jesús llote:

—Cue lluaña cacadomoi; iadedi omoïmonã nana ñnoñedomoi. Cue lluaña ñnotimiedi abi uïñotimie. Jofona raise finodimie isoide. Jofona raise finodimiedi ie jofona finodemo, jofona goiñellena, nofici illã dinori eo ana raite. ²⁵ Noci deidemo, eo jinuidemo, jofomo ille toia, aifi bitemo, jofo raise finua jira, jofo goiñede. Iena faifiñede. Ie isoide. Cue lluaña ñnotimie faifiñeite. ²⁶ Cue lluaña ñnoñedimiedi abi uïñoñedimie. Jofona raise finoñedimie isoide. Jofona raise finoñedimiedi ie jofona finodemo, conillie emodomo iena finode. Ana rañede. ²⁷ Noci deidemo, eo jinuidemo, jofomo ille toia, aifi bitemo, jofo goillamonã, jai eo judaisite. Iena faifide. Ie isoide. Cue lluaña ñnoñedimie faifite —llote.

²⁸⁻²⁹ Moisés micori rafue uïñoraini isoi naimie llofueñena jira, illaimamo ite uai itimie isoi naimie llofuia jira, nainomo ite cominidi naimie lluari rajjicaidimaci.

8

Jesúdi efonaitimiena jillotaja rafue

(Mr 1.40-45; Lc 5.12-16)

¹ Naimie llofuia mei, anedumona Jesús ie llofueoicaigano diga ana bite. Ailluena comini naimiena racadimaci. ² Efonaitimie naimie ñine billanona, naimiena raise uaiduamonã, caiñici ifodo ana rainadate. Raite:

—Maestro, o jitaïadedi, cuena jillotaredio.

³ Jesús ie onolli naimiemo oni ñuitajanona, naimiena jetade. Raite:

—Onã jillotaiacadie. Mai o jillo. —Ieconã naimie jillode. ⁴ Jesús naimiemo llote:

—O jilluana bumo lloñeno; iadedi Jerusalémo, Jusiñamui jofomo, Jusiñamui diga ñairaimã ñine mai jai. O jilluana comini raise uïñollena, naimiemo o abina acatajai. Moisés micori jaie llogã rana Jusiñamuimo feca. —Iemei Jesús oni jaide.

Jesúdi capitán mullaïmana jillotaja rafue

(Lc 7.1-10)

⁵ Capernaum railla nairaimo Jesús ria, capitán raillamie naimie ñine bite. Naie capitán Roma railla nairaimie. Judíuñedimie. Billanona, duere llote:

⁶ —Maestro, cuena cano. Cue jofomo cue mullaïma ite. Ie abina niraïdanide. Naimie abi eo isirede. Naimiena jillota.

⁷ Jesús uai ote:

—Naimie dine jaiticue, naimiena cue jilloitallena.

⁸ Naie capitán dane llote:

—Jaiño. Jamai bue isoidicue. Iemo, ¿niese cue jofomo biitio? O uaido bene lluanona cue mullaíma jilloite. ⁹ Jiaie illaicomini anamo iticue. Naimaci lloga uaina ñnoticue. Cue anamo jiaie soldaduai illanona, cue uaina ñnotimaci. Cue anamo cue mullaíma illa jira, naimiedi cue uaina ñnote. O anamo naie duico illa jira, o uaina o lloia, cue mullaíma jilloite.

¹⁰ Iena cacajanona, Jesús raijicaide. Naimie diga jaidinomo llote:

—Bie isoi cue uaina ñnotimiena jaca baiñedicue. Cai judíuai cominimona biesedimiena jaca ñede. ¹¹ Ero, Jusiñamui ie cominina sedajanomo naimaci illena, diga judíuaiñedino cue llua uaina ñnotimaci. Naga nairaiaimona ñnoitimaci. Jusiñamui cominina Abraham micori, Isaac micori, Jacob micori illamona, naimaci diga Jusiñamui ie cominina sedajanomo bie judíuaiñedino iitimaci. Nainomo caimare nabaitimaci. ¹² Ailluena judíuaiñedino ñnoitimaci. Jusiñamui ie cominina sedajanomo duillanodi omoi judíuai. Naimiena omoi ñnoñena jira, omoína oni dotaite. Dotaja mei, eo duere sefuillamona eeitomoi.

¹³ Capitámo Jesús llote:

—Mai jai. Cue uai siñonana o ñnua jira, o jitailla rafue omo jai suide. —Ieconí naimie mullaíma jillode.

Jesús Pedro jifaiño jillotaja rafue

(Mr 1.29-31; Lc 4.38-39)

¹⁴ Oni jaillanona, Pedro jofomo Jesús ridemo, Pedro jifaiño duillana ciode. Naiñaiño abi cuaride. ¹⁵ Naiñaiño dine jaillanona, naiñaiño jetade. Jetajamona ieconí naiñaiño jillode. Abi cuariñede. Naiñaiño naidacaillanona, guille finuanona, ie jofomo itinona ecade.

Jesúdi ailluena duidinona jillotaja rafue

(Mr 1.32-34; Lc 4.40-41)

¹⁶ Naie naiona naimie dine comini ailluena jananiai anamo itinona atidimaci. Ie uaido naimiedi jananiaina oni oretate. Nana atica duidinona jiai jillotate. ¹⁷ Naimacina Jesús jillotajamona, Isaías micori jaie ciegafuiaie iese jai suide. Naimie micori jaie cueba: “Caina jilloitajanona, cai duiconona oni oretate”.

Jesús ie llofuegamiena damie jaillana ie rafue

(Lc 9.57-62)

¹⁸ Ailluena comini naimie ecimo illana Jesús ciuanona, ie llofueoicaiganomo ruica dine jaillena llote. ¹⁹ Ieconí Moisés micori rafue llofueraíma naimie dine billanona, llote:

—Maestro, o jaillinomo o diga jaiacadicue. O llofuegamiena jaiacadicue.

²⁰ Jesús uai ote:

—Janorede ocainaiadi joforedimaci. Silliñiai jillainiaredimaci; iadedi jofonidicue. Monamona billanona, imana jaidicue; iadedi buenidicue. Jofonidicue. Cue diga o jaiacania, bue isoidena cuemona oñeitio. Iemo o comecina raise faca.

²¹ Ie facaise jiaie llofuegamie Jesús llote:

—O diga jaiticue; ia cue moo nia fioidañena jira, o diga nia jaiñeiticue.

²² Jesús naimie uai ote:

—Cue diga idai mai bi. Cuena ñnoñedinodi o moona canoredimaci. Naimie fiodaia, naimiena naimaci raille. Cue rafue jiaie rafue baiñefemo faite. Cue diga mai bi.

Jesúdi joraina llucaitaja rafue

(Mr 4.35-41; Lc 8.22-25)

²³ Naie llofuegamie diga Jesús ñaia mei, ruica dine jaillena, botemo jaide. Ie llofueoicaigano jiai jaidimaci. ²⁴ Botemo jailla mei, Jesús inide. Bai jorai motomo

jaidimacimo, eo riire aifi billamona, joraidi eo bagode. Baguamona botemo jinui a uaide. Bote oruiacana jira, ²⁵ jaciruillamona, Jesúna casitatimaci. Raitimaci:

—Maestro, caina cano. Jai buisaidicai. Jai corobaisaidicai.

²⁶ Jesús uai ote:

—¿Bue ñellena jacinaitomoi? Cuen a raise inoñedomoi. Jacinaiño.

Iemei Jesús naidacaillano, aifina lletade. Joraina jiai llucaitade. Ieconí llucacade. Bagoñede. ²⁷ Naimie llofueoicaigano iemona rajicaitimaci. Iemona raitimaci:

—Bimiedi, ¿nie isoidimie? Aifi naimie uaina inote. Jorai naimie uaina jiai inote.

Bai jaillanona, ruica dine ridimaci.

Jesúdi Gadara railla eniruemo illa rafue

(Mr 5.1-20; Lc 8.26-39)

²⁸ Ruica dine naimaci ridemo, Gadara railla eniruemo sijidimaci. Ieconí menamie Jesús dine bitiaimaiaia. Jananiai anamo ite iaimaiaia. Comini raioillanomo nofie moto ifuaimona bitiaimaiaia. Nai iaimaiaia eo riirena jira, jaca bu nainomo jainide. ²⁹ Jesúna iaimaiaia ciua facaise jananiai iaimaiaia cuirioitate:

—Jusiñamui Jitodio. ¿Ñiese cocona nibaiacadio? Coco duere sefuelle facaise nia iñede; iadedi birui cocona duere finuaibidio —cuiroidiaimaiaia.

³⁰ Naie bai iaire ailluena chanchuai guillano itimaci. ³¹ Jananiai Jesúmo duere llotimaci:

—Oni caina o oretajanona, chanchuai abimo caina oreta.

³² Jesús uai ote:

—Mai jai.

Ieconí nai iaimaiaimona jananiai oni jaillanona, chanchuai abimo jaide. Iemona iconaido chanchuai joraimo aisicana jaillanona, corobaiside.

³³ Iena ciuanona, chanchuai sedaraini imaci nairai dine aisicana jaidimaci. Nana naie rafuena llotimaci. Jaive jananiai anamo illa iaimaiaia rafuena llotimaci. ³⁴ Ie jira ailluena comini Jesús dine bitimaci. Naimiena ciuano, naimiemo duere llotimaci, naimaci illanomona naimie jaillena. Naimaci jitailla jira, Jesús oni jaide.

9

Jesús tisitaitimiena jillotaja rafue

(Mr 2.1-12; Lc 5.17-26)

¹ Botemo ie llofueoicaigano diga Jesús jaillano, ruica dine abido jaide. Capernaumo ie illanomo ride. ² Nainomo rilla mei, naimie dine comini ie biramo biide tisitaitimiena atide. Naimiena atidinodi Jesús naimiena jillotajana inote. Iena Jesús uiñuanona, tisitaitimiemo llote:

—Moo, o comecina ocuiño. O jeacino cue feitaja jira, iena jai oni dotadicue. Ie facai ibana jai oñeiticue.

³ Jesús dine ofidinomona dajerie Moisés micori llogacinona llofueraini itimaci. Jesús llua naimaci cacajano, Moisés micori llogacinona llofueraini comecina facadimaci: “Dama Jusiñamui jeacina dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”. ⁴ Naimaci comeciaina facajacinona Jesús uiñuamona, Jesús dinena jicanote:

—¿Bue ñellena omoi comecina jeare facadomoi? ⁵ Bimiemo: “O jeacina jai oni dotadicue” cue lloia, cue uai siñonana uiñoñeitomoi; ia bimiemo: “Mai naidacaillanona macari” cue lloia, cue uai siñonana uiñoitomoi. ⁶ Monamona jaie cue billanona, imana jaidicue. Ie jira jeacino oni dotaja uai cuemo ite. Iena omoi uiñollena, tisitaitimiemo lloiticue: “Mai naidacai. O bira ferianona, o jofomo mai jai”.

⁷ Iese naimie raillamona, tísitaitimie jillode. Naidacaida, ie jofomo jaide. ⁸ Comini iena ciuanona, jacinaitimaci. Bimiemo ie uaina Jusiñamui fecajana naimaci uiñuamona, Jusiñamuimo iobillacinona fecadimaci.

Jesúdi Mateona fetua rafue
(Mr 2.13-17; Lc 5.27-32)

⁹ Jesús bai macaritemo, cuena ucubena oranomo cue raillana ciode. Mateodicue. Gobierno ucube oraímadicue. Jesús cuemo llote:

—Cue llofuegamiena o jaillena, cue diga bi.

Naidacaida, naimie diga jaidicue.

¹⁰ Nailli cue jofomo Jesús ie llofueoicaigano diga guite. Diga gobierno ucube oraini jiai guisaíbitimaci. Diga Moisés micori llogacinodo jaiñedino jiai guisaíbitimaci. ¹¹ Nainomo fariseuai comini jamai bitimaci. Moisés micori llogacinodo eo jaidimaci. Jesúna ciuanona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Moisés micori llogacinodo ucube oraini raise jaiñenamona, naie isoidino diga, fariseuai comini nabairiñena jira, iese jicanoitimaci.

¹² Iena cacajano, Jesús llote:

—Ecairedinodi médicono jitaíñedimaci; ia duidinodi médicono jitaídímaci. Ie isoide. Mareuidino cuena jitaíñedimaci; ia maraiñedino cuena jitaídímaci. ¹³ Jusiñamui facaina lloraima micori jaie cuega rafuemo omoi comeciaina faca: “Jusiñamui llote: ‘Rana cuemo omoi fecajana jitaídícue; ia cominina omoi dueruillana jiai jitaídícue’ llote”. Cominina cue dueruilla jira, Jusiñamui díbeimo naimaci illena, mareuidinona itatajaíbiticue; iadedi Jusiñamui díbeimo naimaci illena, maraiñedinona itatajaíbiticue. Omoimona maraiñedino diga nabairiticue; ia naimacina uaíbiticue.

Jesús dine Juan Bautista llofueoicaigano billa rafue
(Mr 2.18-22; Lc 5.33-39)

¹⁴ Naie facaise Juan Bautista llofueoicaiganodi Jesús dine bite. Naimiemo llote:

—Cai einamaci llua isoi, Jusiñamuina cai raise iobitallena, guiñenaruillai illa facaisecóni guiñedicai. Cai jeacino facaina sunaicabiticai. Fariseuai comini jiai guiñedimaci; iadedi o llofueoicaigano gutimaci. Cai einamaci llogacinodo jaidicai. ¿Bue ñellena o llofueoicaigano iedo jaiñedimaci?

¹⁵ Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiai sunaiñedimaci. Iobillamona gutimaci. Jiaruido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaídi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci. ¹⁶ Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi, jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite. ¹⁷ Jacagomona finoca bolsa como finoca vino joneñega. Jonegadana, mairiñena jira, sirillamona, igoi raire cuararite. Vino faifite. Igoi jiai faifite. Como finoca vino comogomo jonelle. Iemei iena faifíñeite. Ie isoide. Omoi einamaci rafue ifomo jiaie rafue birui ite. Iena omoimo llocabiticue. Iedo jaidicai —llote.

Jesúdi mena duide riñona jillotaja rafue
(Mr 5.21-43; Lc 8.40-56)

¹⁸ Juan Bautista llofueoicaigano diga Jesús llotemo, jiaimie naimie dine bite. Naimiedi judíuai ofiraco sedaraima. Jesúna duere jicanollena, caiñici ifodo rainadacaida llote:

—Cue jisa como fodaite. O onolli naiñaiño o jonellesa, naiñaiño jilloillesa, cue jofomo cue diga mai bi.

¹⁹ Iena cacajano, Jesús naimie diga jaide. Ie llofueoicaigano jiaí jaidimaci. ²⁰ Bai jaillanona, duidiñaiño jinafona jaide. Naimie iniroina jetallena, naimie dine bite. Ie jeraimona doce años jaca diaide. Billanona naimie iniroina jetade. ²¹ “Naimie iniroi cue jetajamona jilloitícue” comecina facajamona, naiñaiño naimie iniroina jetade. ²² Ieconí Jesús dobaidacaida, abido erodatemo, naiñaiño cide. Raite:

—Ñoo, o comecina ocuiño. Cuená o inua jira, jai jillodio.

Ieconí naiñaiño jillode.

²³ Ofiraco sedaraima jofomo Jesús rillano, naie jofo nama jisa jai fodailla jira, comini merire fillana cacade. Ailluena failiñailana cacade. ²⁴ Jesús dinena raite:

—Jofomona nana omoi jino jaillana jitaídícue. Cuemona biñaiño fodaíñedesá. Jamái inide.

Iena cacajano, naiñaiño jai fodaite uiñuamona, Jesúsri jaisitímaci. ²⁵ Comini jino oretaja mei, naiñaiño onollina naimie llinuano, fodaillamona naiñaiño jillode. Jillua mei, naiñaiñodi naidacaide. ²⁶ Naie rafue nana naie enirue itinomo llocana jaide.

Jesúdi uisínide iaímaiaína jillotaja rafue

²⁷ Ofiraco sedaraima jofomona Jesús bai jaidemo, uisínide iaímaiaí naimie jinafona jaidímaiaí. Jesúsna ado uaidotíiaímaiaí:

—Cai illaima David micorí jitodio. Jusiñamuimona o billa jira, cocona duenái.

²⁸ Uai oñeno Jesús Capernaumo jaide. Naimie fo jailla mei, naimie dine bitíiaímaiaí. Iaímaiaímo Jesús jicanote:

—¿Omicóna cue jillotajana inotómico?

Fairiotíiaímaiaí:

—Jii.

²⁹ Iaímaiaí uisína Jesús jetajano raite:

—Cuená omíco inua díese jilloitomíco.

³⁰ Ieconí iaímaiaí uisídi cide. Jesús naie rafuena lluaña eo janotade.

—Bumo lloñeno —llote; ³¹ iadedi iena llocana jaidíiaímaiaí. Iemona Jesús mamecí nana naie eniruemo itinomo soride.

Jesús ñaiñedimiena jillotaja rafue

³² Capernaumona Jesús bai jaidemo, naimie dine Janaba anamo illamíena jiaíe comini atídímaci. Janaba anamo naimie illa jira, naimie ñainide. ³³ Jesús Janabana oni orede. Oretaja mei, naie íima ñaíte. Nainomo ite comini rajicaillanona raitímaci:

—Cai comini dine bie isoide íima jilluana jaca cioíñedícaí.

³⁴ Ie jira fariseuaí comini dinena raitímaci:

—Taife díbeimo Janaba illamona, Jesúsdi Taife uaido Janabana oni orede —raitímaci.

Jesúdi comínina duenailla rafue

³⁵ Diga nairaíaimo ie llofueoicaigano diga Jesús llocana jaide. Nainomo judíuaí ofiracuaimo llofueuide. Naimie anamo comini illana Jusiñamui jitailla jira, Jesúsdi Jusiñamui díbeimo naimaci comeciaí iuaina meiduana llofueite. Ailluena duidinona jillotate. Naga isoide duicomona jillotate. ³⁶ Naimacina duenaite. Naimaci comeciaí itícino oni duiñoitímie íñena jira, naimacina duenaite. Ailluena comínina cide. Toíca llaudaíai isoi ebe isoi jaidímaci. Naimaci comeciaí ocuiñonidímaci. Jusiñamui naimacina sedaacana uiñoñedímaci. ³⁷ Naimacina duenaillamona, ie llofueoicaiganomo llote:

—Illímo ailluena trigo ía, iena ollena, ailluena maíjirainína jitailla. Ie isoide. Ailluena comini ite naimacimo Jusiñamui rafuena cai llollena; iadedi naie rafuena lloraini eo íñedímaci. ³⁸ Ie rafue naimaci llollena, ailluena comínina raíre naimie oretallena Jusiñamuimo jicano.

10

Jesúdi ie doce llofueoicaiganona fetua rafue (Mr 3.13-19; Lc 6.12-16)

¹ Ie doce llofueoicaiganona Jesús uaiduanona, naimacimo ie uai iñonocaide, jananiai anamona cominina jilloitallena. Duicono oni oretallena, iena jiai iñonocaide. ² Ie llofueoicaiganodi iese mameciredimaci: Simón. Naimie mameci jiaicidi Pedro. Andrés. Naimiedi Simón ama. Jacobo. Juan. Iaimaii Zebedeo jito iaimaii. ³ Felipe. Bartolomé. Tomás. Cueno jiai uaidote. Mateodicue. Gobierno ucubena oraimadicue. Jiaie Jacobo. Naimiedi Alfeo jito. Tadeo. ⁴ Jiaie Simón. Naimiedi cananista comini facaisemo duide. Judas Iscariote micori. Naimiedi Jesúna gaitatate.

Jesúdi ie llofueoicaiganona oretaja rafue (Mr 6.7-13; Lc 9.1-6)

⁵ Jesús ie llofueoicaiganona oni oretajanona, raite:

—Judúuaiñedino dine jaiñeno. Samaritano railla comini dine jaiñeno; ⁶ ia cai judúuai comini dine jai. Naimacimona ailluena comini Jusiñamui rafuena nia ñnoñedimaci. Faificana nia jaidimaci. ⁷ Omoi jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoi illana Jusiñamui jitailla jira, naimie dibeimo omoi comeciaini iuaina meido”. ⁸ Duidinona jillota. Fiodaitinona jillota. Efonaitinona jillota. Jananiaina oni oreta. Cue uaina jamai omoi feiñua jira, cominina jilloitajana ibatañeno. ⁹ Ucubena uiñeno. Guille ifo meidollena, rana uiñeno. ¹⁰ Ailluena rana omoi uiñellena, bolsana uiñeno. Abi meidolle iniroina uiñeno. Meidolle zapatona uiñeno. Omoi abi riidollena, jiguidana uiñeno. Jiaie cominina omoi canua isoi, omoina naimaci canua. Naimacimona omoi jitailla rana omoi ono. Ie jira ailluena rana uiñeno. ¹¹ Nie nairaimo omoi ria, omoi rafuena jitaiddimiena jeno, naimie jofomo omoi illena. Naie jofomo omoi i, naie nairaimo omoi ille dinori. ¹² Naie jofomo omoi rillanona, naie cominina marena uaido. ¹³ Omoina naimaci raise feiñoia, naimaci uri illena, naimacimo marecinona llono; iadedi omoi rafuena naimaci jitañenia: “Jusiñamui omoina canoite” naimacimo lloñeno. ¹⁴ Omoina bu feiñoiacañenia, omoi uaina bu cacarefiacañenia, naie nairaimona omoi jaillanona, omoi eillaimo ite jearacuaina jaidino. Marañede rafuena naimaci finuana naimaci uiñollena, omoi eillaina jaidino. ¹⁵ Omoimo uanaicinona lloticue. Omoina naimaci feiñoñenia, Jusiñamuidi naimacina duere finoite. Sodoma railla nairai jaie jeacinona eo finodimaci. Gomorra railla nairai jaie jeacinona eo finodimaci. Ie jira Jusiñamui naimacina jaie duere finode. Omoina comini birui feiñoñenia, Jusiñamuidi naimacina Sodoma nairai baifemo duere finoite. Gomorra nairai baifemo duere finoite.

Jesús duere sefuillifuea llua rafue

¹⁶ Jesús ie llofueoicaiganomo nia llote:

—Naimacina janallari fañellena, naimaci duere sefuñellena, toica llaudaiaia raise sedajana jitaiddimaci. Ie isoide. Eo marañede comini motomo omoina oretaiticue. Omoina duere finoacanitimaci. Raise sedajana jitaiddimoi. Jaio fioidañellena, aiside. Naimiena bu meineñellena, ie abina eenollena, jaio aiside. Ie isoi omoi abi uiñocana omoi jai. Ucugidi buena jeare finoñede. Ie isoi omoi illa. Jeacino finuamona eneno omoi i. ¹⁷ Abina rairui. Dajerie omoina llogidoitimaci. Omoina gaitaja mei, naimaci ofiracomo omoina faitimaci. ¹⁸ Cue rafue omoi llua muidona, omoina gaitajanona, illaicomini dine omoina uitimaci. Omoina llogidoitino cue rafuena lloitoimoi. Naie illaicominimo iena jiai lloitoimoi. ¹⁹ Naie illaicomini dine omoi ia, omoi riidollicinomo omoi comeciaina jarire facañeno. Naie facaise omoi ñaillicinona uiñoitomo. ²⁰ Dani omoi comeciaini icinodo ñañeitomo; ia Jusiñamui Joreño uaido ñaitomo. ²¹ Cueno ñnotomo; ia ailluena cuena ñnoñeitomaci. Cueno omoi ñnua jira, omoina enoitimaci. Iemona dajerie ie amana meinetallena, naimiena llogidoite. Dajerie moodi ie uruena meinetallena, naimiena

llogidoite. Dajerie uruiaidi naimaci moona, naimaci eina meinetallena, naimacina llogidoitimaci. ²² Cue muidona ailluena comini omoina enoitimaci; iadedi cue uaina fainonocaiñedimie cue Moo diga monamo ja muidomo jaca iite. Naimiena jillotaiticue. ²³ Cue rafue naimaci jitaiñenamona, omoina nie nairai duere finoia, dinomona cue rafuena lollena, jiaie nairaimo raire jai. Cue rafuena omoi lollena, diga judíuai illanuaimo nia jaitomoi. Nana naie comini nia ñnoñenia, Jusiñamui dinena dane abido biiticue. ²⁴ Ero, ie llofueraima duere sefuia, ie llofuegamie daje isoi duere sefuite. Ie eci illamie duere sefuia, ie mullaima daje isoi duere sefuite. ²⁵ Ie isoide. Cue cominina omoi jaillamona, cue duere sefuia, jiai duere sefuitomoi. Taife mameci jiaici llinuanona, “Beelzebúdio” jiaino cuena raitimaci. Iese cuena naimaci jeare ñaia jira, cue cominina omoi illa jira, omoina jiai jeare ñaitimaci.

Jesúdi jaciruiñeno llofuia rafue
(Lc 12.2-9)

²⁶ Jesús nia llote:

—Cuena ñnoñedino omoina jeare ñaitimaci; ia nana cue rafuena llocana omoi jailla jira, naimacina jaciruiñeno. ²⁷ Omoimo rafuena anado jai lloticue. Iena nana cominimo marefodo llono. Ado llono. ²⁸ Omoi abina meineredimaci; ia omoi joreña meinenidimaci. Omoina naimaci meineia, omoi joreño Jusiñamui dine jaite. Iena uiñuamona, omoi meineiacadinona jaciruiñeno. Cue rafuedo omoi raise jaiñenia, Jusiñamuina jacirui. Naimiedi omoi abina, omoi joreño diga, iraimo dotarede. ²⁹ Omoina duere finoacadinona jaciruiñeno. Ero mena janorede sillina fecadomoina, eo janore ibaca; iadedi cai Moo Jusiñamui jitaiñenia, naimacimona daje fioldañede. ³⁰ Ero, niga ifotirai omoimo illana Jusiñamui uiñote. ³¹ Naimiedi omoina sedajana jiai uiñote. Silliñiaí baifemo Jusiñamui isiruigaomoi. Omoi duere finoacadinona jaciruiñeno. Jusiñamui jitaiñenia, omoimo jaca buena suiñeite.

Jesús naimiena janoñenana llofuia rafue
(Lc 12.8-9)

³² Ie llofueoicaiganomo Jesús nia llote:

—Cue rafuena omoi lluamona, jiaino omoina duere finoitimaci. Cuena birui omoi janoñenia, nana comini Jusiñamui uicomo ico ia, nainomo omoina janoñeiticue. “Cue cominidomoi” omoina raiticue. ³³ Cuena birui omoi janoia, nana comini Jusiñamui uicomo ico ia, nainomo omoina janoiticue. “Cue cominiñedomoi” omoina raiticue.

Jesús muidona nana comini uri iñena rafue
(Lc 12.51-53; 14.26-27)

³⁴ Ie llofueoicaiganomo Jesús nia llote:

—Nana cominina uri itatallena eniruemo biñedicue. Cuena ñnoñedinodi cuena ñnotinona enoitimaci. Enoillamona cuena ñnotinona duere finoitimaci. ³⁵ Cue lloga rafuena damerie ñnua muidona, ie moo illa dibeimo ie jito iñeite. Ie ei illa dibeimo naiñaiño jisa iñeite. Ie jifaiño illa dibeimo naiñaiño mio iñeite. Iese cominina uri itatañedicue. ³⁶ Omoi comini coninina enoitomoi. Iemona duere sefuitomoi. ³⁷ Ero, ie moona cue baifemo bu isirua, ie eina cue baifemo bu isirua, cue jitailla ra naimie finoacaiñena jira, cuemo raise duiñede. Ie uruiaí cue baifemo bu isirua, cuemo raise duiñede. ³⁸ Cue facaina bu fioldaiacaiñenia, cuemo raise duiñede. Naimiedi cue comini naimiena lloiacaiñedicue. ³⁹ Cue facaina fioldaiacaiñedimie ja muidomo faifite. Cue diga jaca iñeite; iadedi cue facaina fioldaitimie monamo cue diga jaca iite.

Jesús Jusiñamuimona ibana feiñua llua rafue
(Mr 9.41)

⁴⁰ Jesús llote:

—Cue rafuena omoi llocana jaia, diga jofuemo riitomoí. Cue cominina omoi illamona, omoína feiñotino cuena jiaí feiñotimaci. Omoína bu feiñoia, cuane jiaí feiñote. Cuena feiñotimiedi cuena oretatimiena jiaí feiñote. ⁴¹ Naimie cue comini illamona, damierie Jusiñamui facaina lloraimana feiñotimaci. Jusiñamui facaina lloraimana bu feiñoia, Jusiñamuimona ibana feiñoite, naie lloraima Jusiñamuimona feiñua isoi. Cue jitaillacinona finodinona bu feiñoia, naimaci Jusiñamuimona feiñua isoi, Jusiñamuimona ibana feiñoite. ⁴² Cue dibeimo itinona bu janore canoia, Jusiñamuimona ibana feiñoite. Naimacimo nibai jamai jinuina fecade; iadedi naimacina canuamona, Jusiñamuimona ibana feiñoite — llote. Iemei Jesús ie llofueoicaiganona, ie rafuena lollena, orede.

11

Jesús dine Juan Bautista micorí ie llofueoicaiganona oretaja rafue (Lc 7.18-35)

¹ Ie doce llofueoicaiganona Jesús oretaja mei, iaírei ite comini illanuaímo naimiedi ie rafuena llocana jaide.

² Ie facaiseconi cárcelmo Juan Bautista micorí Jesús finoca rafuena fidiano, iena raise uñollena, Jesús dine ie llofueoicaiganona orede. ³ Jesúmo llotimaci:

—Juan Bautistamona biticai. Jofue iñenanomo navui naimie ia, “Jusiñamuimona damie biite” naimie llofuecabite. Juan llofuegamiena o illana uñoiacadicaí. Imieñedi odena, jiaimie billemo nia ocuridicaí.

⁴ Jesús uai ote:

—Cue llwana cacadomoí. Cue finoca rafuena ciodomoi. Juan dine abido omoi jaillanona, iena naimiemo llono. ⁵ “Uisnidino jai ciodimaci. Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fiodaillamona damierie jai jillodimaci. Dueredino mare rafuena jai cacadimaci” naimiemo llono. ⁶ Jiaí llono: “Nibai nana cue rafuena raise cacaiñedio; ia cuena jaca nia ñnocana o jaia, camare iitio”.

⁷ Juan llofueoicaigano abido jailla mei, naimie ecimo ailluena ite cominimo Jesúsí Juan rafuena llote:

—Jofue iñenanomo naimie navui ia, naimie dine jaidomoí. ¿Nie isoidimiena ciodomoi? Daje uaido rafuena comecina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoíñede. Nie isoide rafue naimiemo ia, cue rafuena llocana jaide. ⁸ ¿Bue ñellena naimie dine jaidomoí? Mare iniroina jitadimiena cioíñedomoi. Mare iniroina jitadinona omoi cioacaniadedi, illaicomini dine jaidomoí. ⁹ Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoímo naimie llua jira.

¹⁰ Malaquías micorí naimiena jaie cueba:

Jusiñamui raite: “Ero, o uicodo cue rafuena lollena, damiena oretaiticue, comini comeciaina marecinona duiñollena”

cuega. Malaquías Juan Bautistana cuete. ¹¹ Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofue; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioíñede. Iemona naimie baifemo faitomoí. ¹² Juan llofua tainiamona ailluena comini cue rafuena ñnuamona, Jusiñamui dibeimo birui duere iacadimaci. ¹³ Nana Jusiñamui facaina lloraini micoriaídi cue billena jaie llotimaci. Moisés micorí iena jiaí jaie llote. Juan facaise naie llogacino jai suide. ¹⁴ Jusiñamui facaina lloraima jaie llote: “Bie rafue suille facaise Elías isoidimie biite”. Naimie rafuena ñnotomoidena, Juandi naimiena uñotomoí. ¹⁵ Omoi jeforena jira, raise fueollena, cue llamo cacarei.

¹⁶ Jesús nia llofue:

—Ero, omoína ñaiticue. Jifanote uruiai isoidomoi. Uruiai jifanoiacania, naimaci nabairiñai na uaiduanona, raitimaci: ¹⁷ “Omoi diga jifanoiacadica; iadedi cai diga jifanoiacaiñedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedica;” raitimaci. ¹⁸ Ie isoidomoi. Juan jirorainide. Caimare guñede; ia naimie diga nabairiñedomoi. Naimiena gaiñedomoi. Ie jira omoimona dajerie naimiena raitimaci: “Janaba anamo naimie illamona, naimie uairico isoi ite” raitimaci. ¹⁹ Monamona billanona, imana jaidicue. Omoi isoi guiticue. Caimataidicue; ia cue diga nabairiñedomoi. Cuenai jiai gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimiedio”. Iese raitomoi; iadedi Jusiñamuina ñnotinodi cue finoca rafuena marenana uiñotimaci.

*Dajerie nairai Jesúsna ñinoñena rafue
(Lc 10.13-15)*

²⁰ Ailluena comini Jesús dina nia ia, naimacimo ie navui jailla nairai na ñaite. Naimie siño finoca rafuena uiñotimaci; iadedi naimaci comeciai iuai meidoñedimaci. Ie jira naimacina ñaite. ²¹ Llote:

—Omoimona damerie Corazín railla illanomona bitomoi. Omoimona damerie Betsaida railla illanomona bitomoi. Cue rafuena omoi ñinoñena jira, duere sefuitomoi. Omoi dine cue navui siño finoca rafuena Tiro railla nairaimo jaie finodicuena, Sidón railla nairaimo jaie finodicuena, naimaci comeciai eo isinotaillamona, naimaci comeciai iuai meidotimaci. Naimaci comeciai iuaina meiduana uiñotallena, ebinide iniroina jitajanona, naimaci ifogiamoi jusefona jonetimaci. ²² Jusiñamui uicomo nana comini ico ia, Tiro nairai baifemo duere sefuitomoi. Sidón nairai baifemo duere sefuitomoi. ²³ Omoimona damerie Capernaum railla illanomona bitomoi. Birui abina iedoiacadomoi; iadedi jiairuido sunaitomoi. Omoi dine navui cue siño finoca rafuena Sodoma railla nairaimo jaie finodicuena, naie nairaidi birui niadedi nia ite. Omoi comeciai iuai omoi meidoñena, monamo cue Moo diga jaca iñeitomoi; iadedi naimie omoína duere finollemona sunaitomoi. ²⁴ Jusiñamui uicomo nana comini ico ia, cue rafuena omoi ñinoñena jira, Sodoma railla nairai baifemo duere sefuitomoi —llote.

*Jesús ie Moo diga ñaia rafue
(Lc 10.21-22)*

²⁵⁻²⁶ Ie facaiseconi Jesús ie Moo diga ñaianona raite:

—Ore Moo, oca mona Namadio. Oca enirue Namadio. Abina uiñotina bie isoide rafuena uiñotañedio; iadedi jamai bue isoidinona iena uiñotadio. O jitailla jira, iese uiñotadio. Ie jira iobillacinona omo feaacadicue. Mai.

²⁷ Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitailla diese omoína naimiena uiñotadicue. Ie muidona naimiena uiñotomoi. ²⁸ Omoi jecinomona omoi jillobillena, duere jaidomoi. Omoi comeciai marena uri illena, cue dibeimo mai omoi i. ²⁹ Cue llucino anamo omoi i. Cue rinina jira, cuemona omoi fueo. Iemei omoi comeciai marena uri iite. ³⁰ Omoína cue canua jira, cue llucino anamo omoi iacanano ia, sefuinide. Omoína cue canolle jira, cue llucino finuana sefuinide.

12

*Sábadoruimo Jesús llofueoicaigano maija rafue
(Mr 2.23-28; Lc 6.1-5)*

¹ Ie rafue lluamona, ie llofueoicaigano jai abido bitimaci. Ie facaiseconi sábadoruimo Jesús ie llofueoicaigano diga, trigo motodo joide naído jaide. Ie llofueoicaigano

aimetailla jira, trigona tijiano, golluano, guicana jaidimaci. ² Dajerie fariseuai iena ciuano, llotimaci:

—Ero, o llofueoicaigano rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijiamona, caimona jai maijidimaci. Iese cai abimo jeacinona jai finodimaci.

³ Ie llofueoicaiganona riiduanu, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide. ⁴ Jusiñamuimo fecaca llomeniconona uanona, guitimaci. Jami bue isoidino naie llomeniconona guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga David micori iena guite; ia Jusiñamui naimacina duere finoñede. ⁵ Moisés micori llogacino jai raise comeciaina facañedomoi. Moisés micori jaie llua isoi, sábadoruimo Jusiñamui jofomo Jusiñamui diga ñairaini maijiuidimaci. Jusiñamuina naimaci sedallena, ocainana fatimaci. Iraina bonodimaci. Iese maijiuidimaci; iadedi Jusiñamuimona jeacino finoñedimaci. Moisés micori jaie ciegafuina raise cacañedomoi. Iena raise facañedomoi. ⁶ Omoimo nia lloiticue. Jusiñamui jofomo finoca rafue baifemo faiticue. ⁷ Jusiñamui facaina lloraima iena jaie cueba: “Cuemo rana omoi fecajana jitaidicue; ia omoi jitaillanona, jaiie cominina omoi duenaillacinodi rana cuemo fecajacino baifemo faite”. Iena omoi uiñotomoidena, cue llofueoicaiganomo: “Maraiñedicinona finodomo” lloñedomoi. Cuemona cue llofueoicaigano jeacino finoñedimaci. ⁸ Monamona billanona, imana jaidicue. Ie muidona sábadoruimo finolle rafuena rairuiredicue. Nairuimo finoñelle rafuena jai rairuiredicue.

Jesúdi onollina idisarodimienajillotajarafue
(Mr 3.1-6; Lc 6.6-11)

⁹ Bai jaillanona, nairai dine rillanona, naimaci ofiracomo Jesús fo jaide. ¹⁰ Nainomo onollina idisarodimie illanona, fariseuai dinena Jesúmo jicanotimaci:

—¿Sábadoruimo bimiena o jilloitajana mare? —jicanotimaci. Sábadoruimo duidimienabu jillotaia, naimacimona naimie jai maijide. Uai uanona: “Mare” Jesús raiadedi, naimacimona naimie jai maijiacana jira, naimiena llogidoiacadimaci. ¹¹ Jesús uai ote:

—Sábadoruimo omoimona damie ie toica llauda ifomo uaidena, nairuido ari iena ote. Naimiemo buena lloñedomoi. ¹² Ero, cominidi llauda baifemo faite. Sábadoruimo mare rafuena finuadi mare. Bimiena cue jillotaia, mare rafuena finodicue.

¹³ Onollina idisarodimiemo llote:

—O onolli mai oni ñuita.

Iena ñuitajamona jillode. ¹⁴ Iena ciuanona, fariseuai jino jaidimaci. Naimiena meinelena, coniniri siadotimaci.

Isaías micori jaie Jesúna ñaia rafue

¹⁵ Naimiena naimaci meineiacanana Jesús uiñuamona, nainomona oni jaide. Diga comini naimie diga jaidimaci. Naimacimona nana duidinona jillotate.

¹⁶ —Cuena llocana jaiñeno —naimacimo llote. Naimie mameci are sorillana jitaiñede. Fariseuai diga ie uai uaitaiacaiñede. ¹⁷ Iemona Isaías micori jaie ciegafuiai jai suide. Jusiñamui Isaías micorina jaie cuetataga:

¹⁸ Ero, cue fetoca mullaima ite.

Naimiedi cue isiruigamie. Naimieri iobidicue.

Cue Joreño naimiemo cue fecajanona, judíuaiñedinomo naimacina cue jilloitaacanana lloite.

¹⁹ Uai uaitañeite. Ie rafuena ado lloñeite.

Nairai illano motomo naimie rafue llocabiñeite.

²⁰ Comeciai ocuinidinona canoite.

Dueredinona canoite. Naimacina duere finoñeite; ia naimacina canoite.

Ie mare rafue lluamona, naimiena ñnotinona canoite.

Nana comini naimie anamo ille dinori iese naimie canoite.

²¹ Naimaci jillobillena, ie rafue cacajanona, ailluena judíuainñedino naimiena ñnoitimaci.

Fariseuai Jesúna jeare ñaia rafue

(Mr 3.19-30; Lc 11.14-23; 12.10)

²² Jesús dine damieriedi Janaba ie anamo illamienna atidimaci. Janaba anamo naimie illa jira, naie aticamiedi cioiñede. Jiai ñaiñede. Jesús Janabana oni oretajanona, naimiena jillotata. Naimie uaina botade. Ñaite. Cíode. ²³ Naiena cíodino rajicaillanona raitimaci: —Ñibai bimiedi David micori jito. Cai illaimana naimie illena, naimie micori jitomo ocuiridicai.

²⁴ Iena damierie fariseuai cacajano, raitimaci:

—Beelzebúdi Janaba comini. Beelzebú anamo naimie illamona, Beelzebú uaido Janaba illa cominimona Jesús Janabana oni oretate —raitimaci.

²⁵ Naimiena naimaci enoillana Jesús uíñuanona, naimacimo llote:

—Daje isoi comeciaina lloillamo daje nairai facañenia, danomo majinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainaiainidimaci. Oni jaidimaci. ²⁶ Ie isoide. Beelzebú uaido jananiaina omoi llua isoi cue oretai, Janaba ie díbeimo itino díga jai nabairiñede. Iemona naimie comini danomo iñeitimaci. ²⁷ Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uíñollena. Iemei cue finoca rafuena uaitañeitomoi. ²⁸⁻²⁹ Ero, mairidimie ie jofomo ite rana ñibai fiacadomoi. Iena fillena, naimiena nano raise omoi maiga. Raise maia mei, ie rana fiiredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui Joreño uaido naimiena anafetitaticue. Iemona Jusiñamui rafuena cue llua jai uíñotomoi. ³⁰ Cue díbeimo iñedimie cuena enoide. Cue díbeimo cominina itatañedimiedi naie cominina cuena ñnotañede. ³¹ Ie jira omoi lloiticue: Jusiñamuidi nana comini jeacinona dotarede. Naimiedi comini maraiñedicinona dotarede; iadedi naimiedi ie Joreña jeare ñaiacinona dotañeite. ³² “Jusiñamui Joreño uaido siño rafuena finoñedio; ia Janaba uaido siño rafuena finodio” cuena raitomoi. Jusiñamui mona biticue. Cuena omoi jeare ñaia, Jusiñamui iena feitarede; iadedi naimie Joreña omoi jeare ñaia, Jusiñamui iena birui feitañeite. Iena íco jaca feitañeite.

Jesúdi riará llisilla llua rafue

(Lc 6.43-45)

³³ Jesús llote:

—Llisillamona nie isoide riará illana uíñoticaí. Amena ie llisilla llillamona, amena marena uíñoga. Llillamona, amena maraiñenana jiai uíñoga. ³⁴ Ie isoide. Omoi ñaiamona omoi uíñoticaí. Cuena omoi maraiñeno ñaia jira, omoi comeciái iticinona uíñoticaí. Omoi maraiñena jira, jai nairaidomoi isoidomoi. ³⁵ Mareuidimie mare ie comecimona ñaite; iadedi maraiñedimie maraiñede ie comecimona ñaite. ³⁶ Jamai ebena birui omoi ñaia, Jusiñamui uicomo nana comini íco illa facaiseconi Jusiñamui íba oite. ³⁷ Omoi jeare ñaiaconi duere sefuitomoi; iadedi omoi mare ñaiaconi duere sefuiñeitomoi. Ie jira Jusiñamui díbeimo omoi comeciái iuai meido.

Dajerie Jesús siño rafuena finuana jitailla rafue

(Mr 8.12; Lc 11.29-32)

³⁸ Naie facaiseconi dajerie Moisés micori llogacinona llofueraíni dajerie fariseuai díga Jesús llotimaci:

—Maestro, o lloga uaina cai ñnollena, siño rafuena o finuana cíocadicaí.

³⁹ Jesús uai ote:

—Maraiñedicinona finocabidomoi. Jusiñamui dibeimo iacaiñedomoi; iadedi siño rafuena cioacadomoi. Iena omoi jamai cioillena, siño rafuena finoñeiticue. Ero, Jonás micorí jaie ite rafuena uiñotomoi. Naiemo omoi comeciaina omoi faca. ⁴⁰ Darui amani aillue lliciai jeraimo naimie illamona jillode. Ie isoite. Cue fiodailla mei, darui amani raiafomo iiticue. Iemei naiemona jilloiticue. ⁴¹ Lliciai jeraimona naimie jillua mei, Nínive railla nairai dine Jonás micorí jaide. Nainomo Jusiñamui rafuena llote. Naie comini iena cacajano, naimaci comeciai icinuaina meidotimaci. Cue rafuena omoi cacajamona, omoi comeciai icinuaina birui omoi meidoñena jira, Jusiñamui uicomoi ico nana comini illa facaiseconi: “Cue cominidomoi” omoína raiñeiticue. Jonás micorí baifemo birui uaidicue; iadedi cuena ñinoñedomoi. ⁴² Ero, Saba railla nairai ie illaiño micorídi Salomón micorí dine jaie aarena jaide. Naimie micorí uiñuacinona naiñaiño micorí cacareillena, aarena jaide. Salomón micorí baifemo birui uaidicue; iadedi cuena ñinoñedomoi. Omoi comeciai icinuaina birui omoi meidoñena jira, Jusiñamui uicomoi nana comini ille facaiseconi naiñaiño micorí omoína ico ñaite: “Naimiedi siño rafue finuana ciodomoi. ¿Bue ñellena naimiena ñinoñedomoi?” omoína ico ñaite.

Janaba anamo illamie rafue

(Lc 11.24-26)

⁴³ Jesús naimacimoi nia llote:

—Birui bene ite maraiñede cominidi Janaba anamo illamie isoidimaci. Naimiemona Janaba oni jaia, jaie illanona baillena, jofue iñenanomoi jaide; iade baiñede. ⁴⁴ Baiñena jira, naimie comecina facade: “Navui cue anamo illamie dine abido jaiticue”. Abido naimie bia, naie ñima comeci namanidena naimie baite. ⁴⁵ Iemei oni jaillanona, jaie siete jananiaina naimie diga atide, naimaci anamo naie ñima illena. Naie siete jananiai naimie baifemo maraiñedimaci. Iemona naie ñima eo fodo jaide. Ie isoide birui ite maraiñede comini. Cue rafue naimaci ñinoñena, eo fodo jaitimaci.

Jesús ie comini

(Mr 3.31-35; Lc 8.19-21)

⁴⁶ Jofomoi comini diga Jesús nia ñaia, naimie ei, ie amatiai diga, bite. Naimie diga ñaiaacanano, jino naidaide. ⁴⁷ Damie Jesúmo llote:

—O ei, o amatiai diga, jino ite. O diga ñaiaacade.

⁴⁸ Naimiemo Jesús dinena jicanote:

—¿Bu cue ei? ¿Bu cue amatiai?

⁴⁹ Ie llofueoicaigano dine ie onolli ñuitajanona, raite:

—Jadi, cue ei, cue amatiai. ⁵⁰ Cue Moo monamo ite. Naimie jitaillacinona finodimiedi cue amana, cue miriñona, cue eina. Imaci ua cue cominina.

13

Trigo judaidimie rafue

(Mr 4.1-9; Lc 8.4-8)

¹ Nai jofomona nairui Jesús jaillanona, jorai fue dine jaide. ² Ailluena comini nainomoi ofilla jira, botemo Jesús jaillano, ana raide; iadedi comini jorai fuedo itimaci. ³ Ailluena rafue naimacimoi llote:

—Jusiñamui omoína sedaacana omoi fueollena, bie rafuena lloiticue. Damie trigona judaiaide. ⁴ Naimie judaiaimona, naisomoi janore iduai juide. Naimie bai jailla mei, silliñiai iena guisaibitimaci. Ie jira sicoñede. ⁵ Nofiemoi jaie iduai juide. Nainomoi enirue raise iñede. Sicode; iadedi enirue raise iñena jira, ⁶ raise jainañena jira, ecasillamona duide. Ie jira llisiñede. ⁷ Eecuai illanomoi jaie iduai juide. Eecuai sicuamona, riarai eecuai ibaica. Ie jira llisiñede. ⁸ Mare eniruemo jaie iduai juide. Sicode. Llisillamona danademo cien diga llisillana ote. Jiaimomona sesenta diga llisillana ote. Jiaimomona treinta diga llisillana ote. ⁹ Omoi jeforena jira, raise fueollena, cue lluamo cacarei. Iena ñino.

*Jesús ie como lloga rafuena llofuia rafue
(Mr 4.10-12; Lc 8.9-10)*

¹⁰ Ie llofueoicaigano Jesúmo jicauaibiside:

—¿Bue ñellena bie isoide rafuedo cominina llofuetio?

¹¹ Uai ote:

—Jusiñamuidi omoína ie sedaacana rafuena jai uiñotade. Jiaie iena uiñoñedomoi. Jiaie cominina iena nia uiñotañede. ¹² Jusiñamuina ñnotimie Jusiñamui rafuena ñnocana jaite. Jusiñamui naimiena uiñotaite; iadedi Jusiñamuina ñnoñedimie Jusiñamui rafuena uiñoñecana jaite. ¹³ Ie jira bie isoidicinodo naimacimo lloticue. Cue siño finoca rafuena cioidimaci; iadedi iena naimaci ñnoñena jira, uiñoñoeno jaitimaci. Cue llofuiana jamai cacadimaci; iadedi naimaci ñnoñena jira, raise cacaiñedimaci. Uiñoñedimaci. ¹⁴ Isaías micori naimacina jaie cuega rafue birui jai suide. Jiaie raite:

Jusiñamui llote: “Cue rafuena cacaitomoi; iadedi iena cacaiñeitomoi.

Rafuena ciotomoi; iadedi iena uiñoñeitomoi.

¹⁵ Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaacaiñedomoi.

Jai uisinidomoi isoidomoi. Siño rafuena jai cioiacaiñedomoi.

Iena jai uiñoiacaiñedomoi.

Cue ñibeimo iacaiñedomoi, omoína cue jilloitai raillanona”.

Isaías micori Jusiñamuina ñnoñedinona iese jaie cuete; ¹⁶ iadedi bie siño rafuena birui omoi jai ciua jira, cue lloga rafue omoi jai cacaja jira, iena birui omoi ñnua jira, ñi ua omoi marena ille jillaci. ¹⁷ Jusiñamui facaina jaie lloraini micoriai omoi siño na ciua rafuena jaie cioacadimaci; iadedi cioiñedimaci. Iena cacaacadimaci; ia cacaiñedimaci. Jusiñamuina jaie ñnotino micoriai iena cioacadimaci; iadedi cioiñedimaci. Iena cacaacadimaci; iadedi cacaiñedimaci.

*Jesúdi trigo judaidimiena llua rafue
(Mr 4.13-20; Lc 8.11-15)*

¹⁸ Jesús llote:

—Ero, omoína trigo iduaina judaidimie rafuena llofueiticue. ¹⁹ Dajerie iduai naisomo juide. Dajerie comini comeciai naie naiso isoidimaci. Jusiñamuidi ie cominina sedaja rafuena cacadimaci; iadedi iena cacaiñedimaci. Ie jira Taifedi naimaci comeciaimo cacaja uaina ñnotañede. ²⁰ Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaia, iena caimare feiñotimaci. ²¹ Nofiemo riga iduai jainaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefuia, abido danomo uaidimaci. ²² Jiaie iduai eecuai illanomo juide. Naie iduai sicua mei, iena eecuai ñbaila jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. ñnotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciaimo itabiñede. Jusiñamui jitaille rafuena finocana jaiñedimaci. ²³ Jiaie iduai mare enirue mo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Eo lliside isoidimaci. Jusiñamui jitaille rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

Raiticiai trigo motomo illa rafue

²⁴ Jesús jiaie rafuena llote:

—Jusiñamui ie cominina sedaacana rafuena lloiticue. Naimie ñibeimo comini jaillena, naimie rafue llocana jaidicue. Jiaie uaido iena omoimo lloiticue. Damie trigona judaiaide. Ie illimo mare iduaina judaide. ²⁵ Naimie ñia mei, ie enoidimie trigona eruaide raiticiaina bainino judaiaide. Iemei oni jaide. ²⁶ Trigo sicuamona lliside. Naie facaise naie raiticiai como raise bairede. ²⁷ Judaidimie maijiraini iena ciuanona,

naimiemo llote: “Mare iduai navui ritio. ¿Niesedeta raiticiai eo sicode?” ²⁸ Uai ote: “Cuen a enoidimie iese finoca”. Naie maijiraini naimiemo jicanotimaci: “¿Birui nai raiticiai cai raitiana jitaideo?” ²⁹ Uai ote: “Dama ite. Raiticiai omoi raitia, trigona jiai jaitaitomoi. Dama iesede. ³⁰ Danomo sicote. Ua facaiseconi cue maijirainimo lloiticue: “Raiticiai nano jaita. Danomo ofita, jobaillesa. Trigo uanona, cue jofomo atianona, eeno”.

Jesúdi mostaza ido llua rafue
(Mr 4.30-34; Lc 13.18-19)

³¹ Jesús jiaie rafue llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Dami mostaza idona rillamona, naiemona eo aillue riará sicode. ³² Mostaza ido eo janorede; iadedi sicua mei, eo aillue riará jaillamona, nainomo sillinai jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

Jesús siritate rana llofuia rafue
(Mr 4.33-34; Lc 13.20-21)

³³ Jesús jiaie rafuena llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

³⁴ Naie isoide rafuedo Jusiñamui ie cominina sedaacana rafuena cominimo Jesús llote. Jiaie rafuedo iena lloñede. ³⁵ Jusiñamui facaina lloraima micori iena jaie cuega: Jusiñamui llote: “Jiaie isoide rafuedo cominimo lloiticue. Comini nia uifonega rafuena lloiticue. Enirue finua facaisemona jaca bu iena uifonega. Birui naimaci uifollena, iena lloiticue”.

Jesús trigo motomo riga raiticiaina llofuia rafue

³⁶ Comini jino faionocaida, Jesús ie risoilla jofomo abido jaide. Ie llofueoicaigano naimiemo llotimaci:

—Iena raise cai uifollena, trigo motomo riga raiticiai rafuena caimo llono.

³⁷ Uai ote:

—Mare iduai judaidimiedi cue. Jusiñamui rafuena lloticue. ³⁸ Naie illidi nana comini. Mare iduaidi Jusiñamui duide comini. Raiticiaidi Taifemo duide comini. ³⁹ Naie marañede iduai judaidimiedi Taife. Ua facaisedi cue abido bille facaise. Trigo otinodi Jusiñamui jaienisai. Trigodi cuena inotino. ⁴⁰ Jobaillena raiticiai ofitaja isoi, ico abido cue bia, daje isoi ite. ⁴¹ Cue jaienisaina oretaiticue, nana jeacinona finoraini diese ofitallena, cue illanomona iraimo dotallena. ⁴² Nainomo eo duere sefuillamona, eetitimaci. Subicaitimaci. ⁴³ Iemei jitoma lligaiñua isoi, Jusiñamui sedajanomo naimiena inotinodi marena bairenitimaci. Omoi jeforena jira, raise fueollena, cue llamo cacarei. Bie isoi omoi duere sefuiñellena, cue llua ino.

Jesúdi eniruemo isiruiga reica rana llofuia rafue

⁴⁴ Jesús llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Eniruemo isiruiga raifide ra bu baia, ie nama jai inena jira, naie eniruena uainino ibaacadé, naie ra ollena. Ucube ollena, naie rari iobilla jira, nana naimiemo ite raruiaina fecaite. Iemei eniruena ibaite. Ie isoide. Jusiñamui illanomo omoi illena, jiaie rafue uanona jaiñeno. Dani Jusiñamui rafuena uanona jai. Dani iemo omoi comeciaina faca.

Perlas railla rafue

⁴⁵ Jesús llote:

—Jusiñamui dibeimo comini jailla rafuena lloiticue. Iena omoi raise uiñollena, perlas railla rana ibaraimana lloiticue. Eo mare perlas iballena jenocabide. ⁴⁶ Eo raifide perla naimie baia, naie perlana iballena, nana ie raruiaina fecaite. Ie isoide. Jusiñamui ie cominina sedaacaja rafuena omoi cacaja jira, iena ocana jai.

Jesús lloijina ñaia rafue

⁴⁷ Jesús llote:

—Jusiñamui dibeimo comini jailla rafuena lloiticue. Iena omoi raise uiñollena, lloijina lloiticue. Joraimo lloijina comini faianona, naga isoide lliciaina otimaci. ⁴⁸ Ari sonua mei, mare lliciai diese fetodimaci. Maraiñede lliciai diese oni faitimaci. ⁴⁹ Ie isoide. Ico abido cue bia, iese iite. Jusiñamuina inotinomona naimiena inoñedinon diese oni fetollena, Jusiñamui jaienisai biitimaci. ⁵⁰ Iemei iraimo Jusiñamuina inoñedinona dotaitimaci. Nainomo eo duere sefuillamona eeditimaci. Subicaitimaci.

Jesús llofueoicaiganodi mare rafuena jai uiñua rafue

⁵¹ Ie llofueoicaiganomo Jesús jicante:

—¿Nana cue lluaana cacadomoi?

Uai otimaci:

—Jii, nana cacadicaí.

⁵² Naimacimo llote:

—Ie jofomo comini bia, naimacina raise nafuellena, naimacina caimare itatallena, jofo nama ie mare raruiaimona naimaci jitailla ra naimacimo fecade. Comini comeciaina lloticue. Jusiñamui facaina lloraíni micoriai llogacinona uiñotomoi. Cuemona Jusiñamui ie cominina sedaja rafuena fueocana jiai jai jaidomoi. Comini comeciaina caimare itatallena, birui llofueredomoi.

Nazaretmo Jesús illa rafue

(Mr 6.1-6; Lc 4.16-30)

⁵³ Naie rafuena Jesús llua mei, nainomona Nazaretmo jaide. ⁵⁴ Ie eniruemo rillanona, Nazaretmo ite ofiracomo llofue. Naiemona cominidi rajicaillamona raitimaci:

—¿Ñiese naimiedi eo abina uiñote? ¿Ñiese siño rafuena naimiedi finode? Naimiedi jamai bue isoidimie. ⁵⁵ Naimie amederaima jito. Naimie eidi María. Naimie amatiaidi Jacobo, José, Simón, Judas. ⁵⁶ Naimie miriñotiaidi cai motomo jiai ite. Naimaci diga nagarui nabairiticaí. Naimieori cai nabairicabilla. Ie jira, ¿ninena ie siño uaina ote?

⁵⁷ “Cai comena naimie ite” raillanona, naimie uaina jamaidimaci. Jesús naimacimo llote:

—Naga illanomo cominidi Jusiñamui facaina lloraíma uaina feiñotimaci; iadedi naimie nairaimo naimie ia, ie risoilla jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina inoñedomoi.

⁵⁸ Naimie uaina naimaci inoñena jira, Jesús ailluena siño rafue finoñede.

14

Juan Bautista micori fiodailla rafue

(Mr 6.14-29; Lc 9.7-9)

¹ Naie facaiseconi Herodes railla gobernador Jesús mamecina cacade. ² Naimie ecimo maijuidinomo llote:

—Fiodaillamona Juan Bautista micori jai jillode. Jesús raillamiedi naimie. Ie jira naimiedi siño rafuena finocabide.

³⁻⁴ Iese raite, Herodes Juan micorina navui meinetaja jira. Juan Bautista micorina nia meinetañenia, Herodedi ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

Herodes Juan micorilluana gaiñenano, naimiena duere finode. Herodes Juan micorina gaitatajanona, cárcelmo jonetade. ⁵ Naimie micorina meinetaacade; iadedi Herodes dinena cominina jaciruite. Juan micoridi Jusiñamui facaina lloraimana naimaci railanona, naimie micorina jaciruite. ⁶ Iemei Herodes cumpleaños ie rafuena finode. Nainomo jiaie cominina uaidote. Rafuemo Herodías jisa naimaci uicomo saillamona, Herodena iobitade. ⁷ Ie jira naiñaiñomo llote:

—Nie isoide rana o jitaiadedi, omo iiticue. Illaïma uai cuemo illa jira, iena ua finoiticue.

⁸ Naiñaiño ei naiñaiñomo lluanona, naiñaiño uai ote:

—Juan Bautista ifogí bandejamo joncaida, cuemo ine.

⁹ Iena cacajano, naimie sunaite; iadedi naimie jino ie llua uaina jira, nainomo naimie uaidogano jiaï jai cacaja jira, Juan micorina meinetajana llote. ¹⁰ Ie lloga uaina finollena, cárcelmo soldadona orede. Nainomo Juan micorí ifogina jaitade. ¹¹ Bandejamo naimie micorí ifogí joncaida, soldado atiano, Herodías jisamo fecade. Ieconí ie eimo fecade. ¹² Iena fidiana, Juan micorí llofueoicaigano naimie micorí abina uaibitimaci. Iena naimaci raia mei, Jesúmo lluidimaci.

Jesús cinco mil iñiaina ecaja rafue

(Mr 6.30-44; Lc 9.10-17; Jn 6.1-14)

¹³ Juan micorí meiniana Jesús fidiano, nainomona comini iñenanomo ie llofueoicaigano diga botedo jaide; iadedi naimie jaillana comini fidiano, naimiena racadimaci. Diga comini illanuaimona eillido bitimaci. ¹⁴ Eniruemo Jesús sijia, ailluena cominina dafaifide. Naimacina cüanona, naimacina duenaillanona, duidinona jillotade. ¹⁵ Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuiacade. Cominina mai abido oreta. Ianori ite nairaimo naimaci guille ollena, naimacina oreta.

¹⁶ Uai ote:

—Naimacina oretañeiticue. Naimacina omoi eca.

¹⁷ Uai onaisite:

—Dani caïmo ite cinco llomenico, mena lliciaï diga.

¹⁸ Uai ote:

—Iena cuemo ati. ¹⁹ Raitie illanomo comini ana raillesa llono —raite.

Naie cinco llomeniconona naie mena lliciaï diga uanona, monamo eruaillanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. ²⁰ Nana guillanona monidimaci. Monillamona, fiebide guillena iraidimaci. Doce cirigaïaimo oruitatimaci. ²¹ Cinco mil iñiaï diese guitimaci. Naimaci aitiaï jiaï guitimaci. Naimaci uruiaï jiaï guitimaci.

Jesús jinui emododo macarilla rafue

(Mr 6.45-52; Jn 6.16-21)

²² Guilla mei, botedo ie llofueoicaigano ruica dine jaillena llote. Naie facaiseconi naimie cominina nia facadote. ²³ Cominina facadua mei, aneduaimo dane jaide, Jusiñamui diga ñaillena. Jitibicaidemo nainomo dama ite. ²⁴ Naie facaiseconi ie llofueoicaigano jorai motomo itimaci. Aifi billamona, eo bagode. Naimacimo riire aifi rilla jira, riire jaitimaci. ²⁵ Nia monañedemo, jinui emododo naimaci dine Jesús bite. ²⁶ Naimiena naimaci cüanona, jacinaillamona, raitimaci:

—¿Bu joreño caïmo billana ciodicaï? —Jacinaillamona cuiridimaci. ²⁷ Naie dacaiño Jesús naimacimo llote:

—Omoi joreñonicaiñeno. Cuesa. Jaciruiñeno.

²⁸ Pedro uai ote:

—Uanai caï Namadio. O dine cue billesa cuemo llono.

²⁹ Jesús uai ote:

—Cue dine bi. —Ie jira botemona jinui emodo Jesús dine Pedro macarite; ³⁰ iadedi aifi billana naimie ciuanona, jacinaite. Jinuimo anabaiacade. Ado cuirioide:

—Nama, cuena cano.

³¹ Jesús ie onolli oni ñuitajanona, naimiena llinuanona, raite:

—Eo janore cue uaina inotio. ¿Bue ñellena eo inoñedio? Cuena inotiodena, jinui emododo cue dine niadedi ridio.

³² Botemo a iaimaiaia jaillamona, ie facaise aifi lliccaide. ³³ Ie jira botemo itino Jesús mo iobillacinona fecadimaci.

—Odi ua Jusiñamui Jitodio —raitimaci.

*Jesúdi duidinona Genesaret eniruemo jillotaja rafue
(Mr 6.53-56)*

³⁴ Ruica dine jaillanona, Genesaret railla eniruemo ridimaci. ³⁵ Jesúsna nainomo itino uinuanona, naimie dine duidinona atillena, nana nairaimo jiaie cominina oredimaci.

³⁶ Naimie dine billanona, dani ie iniroi fuedamo jutadallena naimiemo jicanotimaci. “Naimie iniroimo cai jutadallemona jilloiticaia” raillamo comeciaina facadimaci. Nana jutadate diese jillodimaci.

15

*Jesúdi comini comeciaina ñaia rafue
(Mr 7.1-23)*

¹ Jerusalémona fariseuai comini Jesús dine bitimaci. Moisés micori llogacinona llo fueraini jiai bitimaci. ² Naimiemo jicanotimaci:

—¿Bue ñellena o llofueoicaigano cai einamací rafuedo jaiñedomaci? Naimaci guiacania, naimaci onolli cai einamací lua isoi raise jocoñedomaci. Ie jira cai abimo jeacino finodomoí.

³ Jesús uai ote:

—¿Bue ñellena nana Jusiñamui llogacinodo jaiñedomoí? Omoí einamací llogacinodo jaidomoí; iadedi nana Jusiñamui llogacinodo raise jaiñedomoí. ⁴ Jusiñamui jaiie llote: “O moo uai inuanona, naimiena cano. O ei uai inuanona, naiñaiñona cano. Ie moori jeare ñaitimie, ie eiri jeare ñaitimie meinelle”. ⁵ Iese Jusiñamui llote; iadedi omoí einamací llotimaci: “Jusiñamuimo cai ucubena cai fecajamona, cai moona, cai eina jai canonidicaia”. ⁶ Iese omoí finocabilla jira, omoí einamací llogacinodo omoí jaillamona, Jusiñamui uaina jamaidomoí. ⁷ Mareuidinona abi caitauidinodomoí. Isaías micori omoína jaiie raise llote. Naimiedi Jusiñamui llua cuete:

⁸ Bimaci naimaci uaido marecinona cuemo llote; iadedi cue rafuedo raise jaiacaiñedomaci.

“Ona isiruiticaia” llotimaci. “Ona sedadicaia” llotimaci. Jamai ñaitimaci. Naimaci comeciaina cue dibeimo raise inede.

⁹ Cue uai itena, jamai comini llucacinona naimaci llofuecabilla jira, tainona cuena sedadimaci.

¹⁰ Fariseuai diga iese lua mei, naimie ecimo ailluena comini dane ofillanona, naimacimo llote:

—Iena raise omoí uinollena, cue llua mo cacarei. ¹¹ Omoí einamací isoi omoí guinena, naimaci isoi omoí onollina omoí jocoñenia, omoí comeciaina jearetañedomoí. Omoí guigamona, omoí onollina jocuamona, Jusiñamuina nabaiñedomoí. Omoímo jeacino illa jira, Jusiñamuina nabaiñedomoí. Omoí comeciaina jearena jira, jeacina finocabidomoí.

¹² Ie llofueoicaigano naimiemo lluaibitimaci:

—O llua muidona, fairseuai cominina icidio.

¹³ Naimie dinena uai ote:

—Dama ite. Nana cue Moomona oñega rafuedi jai ieconi duite. Naimaci rafue cue Moomona oñenia, ja muidomo ieconi duite. ¹⁴ Naimacina fañonocai. Uanaicinona naimaci uiñoñena jira, uisnidino isoidimaci. Jiamiena uisnidimie ifoia, dafomo uaidiamaia. Ie isoide. Uanaicinona fariseuai uiñoñena jira, uanaicinona llofuenidimaci. Uanaicinodo jaiñedimaci. Ja muidomo faifitimaci.

¹⁵ Pedro naimiemo llote:

—Aillinano o llua caimo raise llono.

¹⁶ Uai ote:

—¿Ñiese cue llua jai nia cacaiñedomoi? ¹⁷ Ñie isoide ra guitomoina, omoi jebemo jaide. Ie mei omoi abiamona jino bite; ¹⁸ iadedi omoi comeciaino iticinomona jeare-dena ñaitomoi. Omoi comeciai jearena jira, jearede rafuena finocabidomoi. ¹⁹ Omoi comeciai jearena jira, jeare comeciaina facacabidomoi. Comena meinecabitomoi. Omoi aiñede riño diga icabitomoi. Omoi iniñede ima diga icabitomoi. Firicabitomoi. Tainona llogiricabitomoi. Jiae comini joreña jeare ñaicabitomoi. ²⁰ Bie isoidicinuai omoi comeciaino illa jira, jearede rafuena finocabidomoi; iadedi omoi einamac llua isoi, omoi onolli jocoñenamona jeacino comuiñede.

*Jesúdi judío ñaiñoñediñaiño jillotaja rafue
(Mr 7.24-30)*

²¹ Genesaret railla enruemona ie llofueoicaigano diga Jesús jaillanona, Tiro railla enruemo jaide. Sidón railla enruemo jai jaide. ²² Ie facaiseconi naie enruemona judiñediñaiñodi billanona, raite:

—Maestro, David micori jitodio. Jusiñamuimona o billa jira, cuena duenai. Cue jisa Janaba anamo ite. Naiñaiño eo duere sefuicabide.

²³ Jesús uai oñede. Ie jira ie llofueoicaigano naimie dine billanona, duere llote:

—Naiñaiño abido ie jofomo oreta. Caimo duere jicanuaibitesa.

²⁴ Jesús uai ote:

—Faificana jaillana naimaci jai jailla jira, dan cai judíuai cominimo cue Moo cuena oretate. Naimiedi judiñediñaiño cuena oretañede.

²⁵ Ie facaise naimie dine naiñaiño billanona, naimiemo iobillacinona fecallena, caiñici ifodo ana rainada raite:

—Maestro, cuena cano.

²⁶ Judiñediñaiño naimie canoñenana naiñaiño uiñollena, naiñaiño Jesús llote:

—Uruiñai guillamona jiconiaina eadicaidena, marañede.

²⁷ Naiñaiño dinena uai ote:

—Jii, maestro; iadedi jiconiaidi imaci nama guillamona fiebide guillemona guitimaci. —Iese llote; ia jiae rafuemo comecina facade. Uruiñai llote; iadedi judiñaiño comecina facade. Jiconiaina llote; ia judiñaiñedimomo jai comecina facade. Comecina facade: “O cominimo o rafue duide; ia cai Namana o illa jira, niba o rafue caimo janore duide”.

²⁸ Jesús uai ote:

—Cue uaina o inua jira, o jitailla rafuena finoiticue. —Ieconi naiñaiño jisa jillode. Janaba naiñaiñomona oni jaide.

Jesús ailluena duidinona jillotaja rafue

²⁹ Nainomona Jesús bai jaillanona, Galilea railla jorai fuedo jaide. Iemei ane-duaimo jaillanona, nainomo ana raide. Nainomo rilla mei, ³⁰ ailluena comini naimie dine bitimaci. Ailluena duidinona atidimaci. Ñuja-ñujacaida macaritinona, onollina idisaruidinona, uisnidinona, uainidinona atidimaci. Diga duidinona naimie dine atidimaci. Iemei naimacina jillotate. ³¹ Ailli uainidino jai ñaiana cacajamona, ailli onollina idisaruidino onolli jai marenana illana ciuamona, ailli ñuja-ñujacaidino macaritino jai marena macarillana ciuamona, ailli uisnidino jai ciuana ciuamona, nainomo ite comini eo rajicaidimaci. Cai Jusiñamuimo iobillacinona fecadimaci.

*Jesúdi cuatro mil iñiaina ecaja rafue**(Mr 8.1-10)*³² Jesús ie llofueoicaigano naimie dine uaiduanona, raite:

—Bie comini darui amani bene cue diga illa jira, naimacimo guille jai iñede. Naimacina aimeri oretaiacaiñedicue, naisomo naimaci bai raillanona. Naimacina cue duenaila jira, naimacina canoacadiecue.

³³ Jicanotimaci:

—¿Ninomona guille oiticaí, naimacina caí ecallena? Ailluena comini ite; iadedi jofue iñenanomo iticaí.

³⁴ Jesús jicanote:

—¿Niga llomenico omoimo ite?

Uai otimaci:

—Siete. Janorede llicisiriaí caimo jiaí ite.

³⁵ Comini ana raillena Jesús llote. ³⁶ Naie llomenico llicisiriaí diga uanona, Jusiñamuimo iobillacino fecade. Tailluanona, ie llofueoicaiganomo fecade, naie cominimo fecallena.

³⁷ Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci. ³⁸ Nainomo cuatro mil iñiaí guitimaci. Naimaci ainiaí jiaí guitimaci. Naimaci uruiaí jiaí guitimaci. ³⁹ Iemei cominina naimaci jofuemo orede. Naimacina oretaja mei, botedo Magdala railla eniruemo Jesús jaide.

16*Fariseuai comini Jesúmo siño rafuena finuana jicanuano billa rafue**(Mr 8.11-13; Lc 12.54-56)*

¹ Dajerie fariseuai comini Jesús dine bitimaci. Naimiena facacillena, dajerie saduceuai comini jiaí bitimaci. Siño rafuena naimie finuana jicaacadimaci. Iena naimie finoñedena, naimie ie llua isoi iñenana uiñoitimaci. Naimiena duere finoacadimaci. Llotimaci:

—Iena caí cioillena, Jusiñamuina siño rafuena finota.

² Jesús uai ote:

—Jitoma sojicaidemo, mona jiairenia, raitomoi: “Ico are maremonanite”. ³ Jiaí raitomoi: “Jitiramo mona jiairenia, ja noci deite”. Monamo omoi eruaillamona, marena monaillana uiñotomoi; iadedi birui cue finoca rafuena raise uiñoiacaiñedomoi. Omoi motomo birui suide rafuena raise cacaiñedomoi. Abina uiñotinona abi caitadomoi. ⁴ Jeacinona finocabidomoi. Jusiñamui dibeimo raise iacaiñedomoi. Siño rafuena finoñeitiecue. Jonás micorimo jaie suide rafuena uiñotomoi. Jusiñamui naimiemo siño rafuena finode. Naiemo comeciaina omoi faca. Fiodaillamona naimie jillode. Ie isoi cue jiaí jilloitiecue. —Ie llua mei, naimacimona Jesús ie llofueoicaigano diga oni jaide.

*Jesús siritate rana llofua rafue**(Mr 8.14-21)*⁵ Ruica dine naimaci rillanona, ie llofueoicaigano llomeniconona feillana uibiñotimaci.⁶ Iena naimie uiñuamona, naimacimo Jesús llote:

—Fariseuai siritate ramona abina rairui. Saduceuai siritate ramona abina rairui. —Iese Jesús llote; iadedi naimaci llofuiacinomona abi rairuillena ñaite. ⁷ Jesús iese llua jira, iena naimaci raise cacaiñena jira, dani coniniri siadotimaci:

—Llomeniconona caí atiñena jira, caimo iese llote.

⁸ Naimaci siaduana Jesús uiñua jira, naimie llua naimaci nia raise cacaiñena jira, naimacimo llote:

—Cue uaina nia raise iñoñedomoi. Omoína canorediecue. ¿Bue ñellena dani omoi llomenico iñenana siadotomoi? ⁹ ¿Niese iñoñedomoi? ¿Niese cue navui siño finoca rafuemo comeciaina facañedomoi? Navui cinco mil iñiaí cinco diganicodemo guitimaci. Monillamona, guigamona fiebillamona, doce cirigaiaimo iraidomoi. ¹⁰ Jiaicaiño cuatro mil iñiaí siete diganicodemona guitimaci. Monillamona guigamona fiebillamona,

siete cirigaiaimo iraidomoi. ¹¹ Omoina cue ecallena, ¿niese cuena birui inoñedomoi? Llomenicon ailli ñañedícue. Fariseuai siritate ramona abina rairuillena ñaitícue. Saduceuai siritate ramona abina rairuillena ñaitícue.

¹² Ie facaise naimie llua jai cacadimaci. Llomenico siritate rana naimie ñañede; iadedi fariseui llofuacinomona naimaci abina rairuillena ñaite. Saduceuai llofuacinomona naimaci abina rairuillena ñaite.

Pedro Jesúsna llua rafue

(Mr 8.27-30; Lc 9.18-21)

¹³ Cesarea Filipo railla eniruemo Jesús jaidemo, ie llofueoicaiganomo jicanote:

—¿Niese jiaie comini cuena raitimaci?

¹⁴ Uai otimaci:

—Damierie raitimaci: “Odi Juan Bautista micoridio”. Damierie raitimaci: “Odi Elías”. Jiaino raitimaci: “Jeremías micoridio”. Jiaino raitimaci: “Jusiñamui facaina lloaia micoridio”.

¹⁵ Jesús dane jicanote:

—¿Niese omoi cuena raitomoi?

¹⁶ Pedro uai ote:

—Odi cai Jilloitaramadio. Cristodio. Jusiñamui facaina lloaia micoriai o billena jaie llotimaci. Cai cajede Jusiñamui Jitodio.

¹⁷ Jesús dinena uai ote:

—Simón Pedro, Jonás jitodio. Marena llotio. Comini ona iena uiñotañede; iadedi cue Moo Jusiñamui ona iena uiñotade. ¹⁸ Pedro, o comecina uiñotícue. Cuena como o lloga uaina meidoñetio. Bie rafuena jiaie cominimo o llua mona, jiai inoitimaci. Cuena inuamona, cue cominina jaitimaci. Cue dibeimo inedino iena itatanidimaci. ¹⁹ Ailluena cominimo Jusiñamui ie cominina jailla rafuena nano lloaia jaitio. O llucinodo jaitino cue cominina jaitimaci. O llucinodo jaiñeitino cue cominina jaiñeitimaci

²⁰ Iena llua mei, ie llofueoicaiganona rairuide:

—Cue Cristonana bumo nia lloño.

Jesús ie fiodaillena llofui rafue

(Mr 8.31-9.1; Lc 9.22-27)

²¹ Naie facaisemona ie llofueoicaiganomo Jerusalémo naimie jaillena marefodo llote: —Nainomo cai judíuai illaicomini cuena eo duere finoitimaci. Cuena meineitimaci; iadedi darui amani illanona, fiodaillamona jilloitícue.

²² Pedro dinena lletade:

—Nama, ¡Jusiñamui iena jitañede! Bie isoide rafue omo suiñeite.

²³ Jesús jinafo dine naimiemo erodate. Raite:

—Cuemona oni jai. Iese ñañeno, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio. Iese o comecina facañeno.

²⁴ Ie llofueoicaiganomo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibai naiemona fodaite. Bu iese jaiacania, cue dibeimo naimie iite. ²⁵ Duere sefuillana jaciruillamona cue cominina bu jaiacaiñenia, ja muidomo faifite; iadedi duere sefuillana jaciruñenamona cue cominina bu jai, jaca faifñeite. ²⁶ Cue cominina bu jaiñenia, nibai eo duere sefuiñeite. Nibai ailluena ra naimiemo iite; ia, ¿niese cue Moo dine riite? Nainomo naimie riñeno faifite. ²⁷ Cue jaienisai diga cue Moo dinena monamona ico biitícue. Cue Moo uai cuemo illanona, ebirena biitícue. Nagamie imaci finoca rafue diese cue iba ollena biitícue. Cue cominiñedinona duere finoitícue. ²⁸ Uanaicinona omoimo lloitícue. Omoimona dajerie nia fiodañeitomoi, illaia manna cue bairellena cioitomoi.

17

Jesús abi meidocailla rafue
(Mr 9.2-13; Lc 9.28-36)

¹ Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobona jiai uite. Jacobo ama, Juan, jiai uite. Jiaie llofueoicaiganona uiñede. ² Nainomo rilla mei, naimaci uicomo naimie abi meidocaide. Jitoma isoi naimie uieco bairecaide. Naimie iniroi naie dacaiño eo userecaide. ³ Naie facaise naimacimo Moisés micori joreño, Elías diga bairede. Elíadi Jusiñamui facaina jaie lloraima. Jesús diga ñaitiaimaiai. ⁴ Jesúmo Pedro llote:

—Nama, bene cai illana mare. O jitaia, daje amani bisaini finoiticue. Daje oue; jiaie Moisés micori ie; jiaie Elías ie.

⁵ Iena naimie nia lluanona, quenirede uillie billanona, naimacina ibaide. Uillie motomona Jusiñamui naimacimo llote:

—Bimie cue isiruiga Jito. Naimieri iobidicue. Naimie llamo cacareillanona, iena ino —llote. ⁶ Jesús llofueoicaigana iena cacajanona, eo jaciruillanona, naimaci uieco dinena ana bitadatimaci. ⁷ Jesús naimaci dine billano, naimacina jetajanona, raite:

—Mai jaciruiñeno naidacai.

⁸ Naimaci erorillamona, dama Jesúna ciotimaci. ⁹ Anedumona bitimacimo, naimacimo Jesús llote:

—Omoi ailli ciua rafuena bumo lloñoeno, cue fodaillamona cue jillua dinori.

¹⁰ Naimiemo llotimaci:

—Moisés micori llogacinona llofueraini birui raicabitimaci: “Elías raillamie dane biite. Ie mei cai Jilloitaraima biite” raitimaci. Jusiñamuimona o billana inoticaí. Odi cai Jilloitaraimana inoticaí. Odi cai Jilloitaraimadimomo, ¿bue ñelli iese raitimaci?

¹¹ Uai ote:

—Raise inotomoi. Elías isoidimie jai bite, nana Jusiñamui jitailla rafue raise lollena. Jusiñamui dibemo naimaci illena, comini imaci comeciai meiduana llote. ¹² Ero, naimie jai bite; iadedi bie comini naimiena raise uiñoñedimaci. Naimaci jitailla jira, naimiena jai meinetimaci. Ie isoide. Naimacimona duere sefuiticue. Monamona biticue, imana cue jaillena; iadedi duere sefuiticue.

¹³ Ie muidona Jesús llofueoicaigano naimiedi Juan Bautista micorina ñaiana jai uiñotimaci.

Jesúdi Janaba anamo itimiena jillotaja rafue
(Mr 9.14-29; Lc 9.37-43)

¹⁴ Ie jiaie llofueoicaigano dine Jesús abido ria, nainomo ailluena comini itimacimo ride. Jesús dine damie billanona, naimiena raise uaiduanona, caiñici ifodo rainadacaida raite:

¹⁵ —Maestro, cue jitona duenai. Janaba anamo naimie ite. Iemona naillicabide. Duere sefuide. Uai-uaicabide. Jiaicaiñodedi iraimo uaillanona, uside. Jinuimo jiai uaillanona, niadedi corobaite. ¹⁶ Naimiena jilloitallena o llofueoicaigano dine naimiena atidicue; iadedi naimiena jillotanidimaci.

¹⁷ Iena cacajanona, Jesús ie llofueoicaiganomo llote:

—Cue uai siñonana nia inoñedomoi. Cue mare rafuedo nia raise jaiacaiñedomoi. Omoi diga are iticue. Raise omoi inollena, ¿nie dinori omoi diga iiticue?

Naie duidimie moomo llote:

—O jito cue dine mai ati.

¹⁸ Naimiena atiamona, Jesús naimiemo Janaba illana uiñote. Janabana Jesús lletaja jira, naie uruemono Janaba oni jaide. Ieconí naie urue jillode.

¹⁹ Ie mei ie llofueoicaigano Jesúmo anado jicanotimaci:

—¿Bue ñellena Janabana oni oretanidicai?

²⁰ Uai ote:

—Raise nia omoi ñnoñena jira, uanaicinona omoimo lloiticue. Janaba oni oretalena, cue uai navui omoimo iticue. Birui raise cuena omoi ñnoñenia, bie Janaba oni oretanidomoi. Jusiñamuina eo janore ñnotomoidena, diga rana finodomoi. “Oni bai jai” bie anedumo llotomoidena, omoina naimie canuamona, bie anedu oni liai bai jaite. Jusiñamuina omoi ñnoia, naga rana finoredomoi. ²¹ Jusiñamuimo omoi comeciaina facallena omoi guiñenamona, Jusiñamui diga omoi ñaiamona, bie isoide Janabana oni oretaredomoi.

Jesús ie fiodaillena dane llofuia rafue

(Mr 9.30-32; Lc 9.43-45)

²² Galileamo ie llofueoicaigano diga danomo itemo, Jesús naimacimo llote:

—Monamona billanona, ñimana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci. ²³ Naie illaicomini cuena meineitimaci; iadedi darui amani illamona, cue Moo cuena jillotaite. —Iena cacajanona, ie llofueoicaiganodi sunaitimaci.

Jesúmo Jusiñamui jofo facaina damie ibataja rafue

²⁴ Capernaumo naimaci rilla mei, Jusiñamui jofo ucube oraini Pedro dine jicanuaibite:

—Moisés micori llua isoi, ¿o llofueraima Jusiñamui jofomo ucubena fecacabide?

²⁵ Pedro dinena uai ote:

—Jii, fecacabide. —Ucube oraini jailla mei, jofomo Pedro billanona, Jesúmo iena nia lloñedemo, Jesús dinena naimiemo jicanote:

—Simón Pedro, ¿niese o comecina raitio? ¿Bumona illaicominidi imaci ucubena ocabitimaci? Imaci jitoniamona ocabiñedimaci; ia naimacimo duide cominimona otimaci.

²⁶ Uai ote:

—Raise llotio. Naimacimo duide cominimona ocabitimaci.

Ie jira Jesús raite:

—Naimaci jitoniamona ibatañede. Ie isoide. Naie ucube Jusiñamui jofomo comini fecajamona, Jusiñamuimo duide. Jusiñamui Jitona cue illa jira, naimie jofo facaina naimie cuena ibatañede; ²⁷ iadedi Jusiñamui jofo ucube orainina coco iciñellesa, ucubena jenuai. Joraimo aimajaitosa jai. Nano o olle lliciai fuena jibui. Nainomo ucubena baitio. Iena uanona, Jusiñamui jofomo coco facaina feca. —Pedro iena finode.

18

Jesús ie llofueoicaigano moto imiëna ille rafue

(Mr 9.33-37; Lc 9.46-48)

¹ Naie facaiseconi naimie dine ie llofueoicaigano jicanuaibitimaci:

—Jusiñamui ie cominina sedajanomo ico cai ia, ¿bu cai moto imiëna ille?

² Iena cacajanona, Jesús daje urue uaiduanona, naimaci motomo jonete. ³ Uai ote:

—Uanaicinona omoimo lloiticue. Jusiñamui dibeimo omoi illena, jeacinona omoi fainonocaiñenia, bie urue isoi omoi moto imieñedimienana illanona, Jusiñamui sedajanomo iñeitomoi. Cue cominina omoi ia, bie urue isoi iitomoi. ⁴ Bie urue isoi abi ñedoñedimiedi Jusiñamui ie cominina sedajanomo imie moto naimiëna ille. ⁵ Bie isoidimie cuemo duillamona, naimiëna feiñotimiedi cuena jai feiñote; ⁶ iadedi cuena ñnotimienana jeacinona finotaiacadimie iena finoñellena, jeacinona finotaiacadimie cimaimo aillue nofici maianona joraimo corobaillena, naimiëna dotacadena, cuemona mare.

Jesúdi jeacinona finoñenana llofuia rafue

(Mr 9.42-48; Lc 17.1-2)

⁷ Jesús llote:

—Ramo faitino duere sefuillesa. Diga ramo omoi faicana uitinomo riitomo; iadedi Jusiñamui omoi ramo faitimiena duere finoite. ⁸⁻⁹ Biena ñaiticue. Nie isoide rafue omoina jeacino finotaia, iena llinoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacino finodomo. Omoi abina omoi namatañeniadedi, omoi onolli jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomo; ia jeacinona omoi finoia, iraimo jaitomo. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomo. Nana omoi abi diga iraimo jaitomo. Iramo omoi jaiñellena, jeacino finoñeno.

Jesúdi naimiena ñnotinomona damie faifillana jitañena rafue

(Lc 15.3-7)

¹⁰ Jesús llote:

—Urue isoi omoi illena como lloticue. Iena dane lloticue. Cue Moo naimacina uñua jira, bie urue isoidinona jamaiñocaiñeno. Monamo cue Moo ecimo naimaci jaienisai jaca ite, naimacina canollena. ¹¹ Jusiñamuimona cue billanona, naimiena ñnoñedinona naimaci jeacinomona jilloitallena biticue. ¹² Ero, omoimo iena jiaie rafuedo lloticue. Damie mo cien diga toica llauda ite. Naiemona daje feiraite. Iena faifiñellena, jiaie llaudaiana fañonocaida, iena jenuaite. ¹³ Iena baillanona, ieri iobite. Baillari oni jaiñedinori baifemo iobite. ¹⁴ Ie isoide. Jusiñamui naimiena ñnotinomona damie faifillana jitañede. Ie jira naimacina jeacinona finotañeno.

Jesús omoi ecimo itimie omoina jeare fñuana llofua rafue

(Lc 17.3)

¹⁵ Jesús nia llote:

—O ecimo itimie ona jeare finoia, naimie dine iena lluai. Daimaia iena omico llono. O uai naimie fairioia, naimie o dibeimo jai iite. ¹⁶ O uai naimie fairioñenia, jiaie menamiena uñño, o lluomo iaiaiaia cacareillesa. ¹⁷ O uai naimie fairioñenia, omoi ofiracomo bicabitinomo iena llono. Naimaci uai naimie fairioñenia, Jusiñamuina ññoñediniena omoi nabaiñena isoi, Moisés llogacinodo raise jaiñedino omoi nabaiñena isoi, naimiena nabaiñeno. Omoi ofiracomo naimiena feiñoñeno. ¹⁸ Iese omoi finoia, omoi comeciaie daje isoi lloillamona, Jusiñamuimona mare.

¹⁹ Omoimo nia lloticue. Daje isoi comecina cue Moo Jusiñamuimo jicallena menamaiaie facajamona, cue Moomo iaiaiaia jianona, cue Moo iaiaiaia jitaile rafuena finoite. ²⁰ Menamie cue dibeimo illamona, damie amani cue dibeimo illamona, naimaci motomo iticue.

²¹ Pedro naimiemo jicanuaibite:

—Nama, cue ecimo itimie cuena jeare finoia, ¿niga icaiño ibana cue oñeno iena faitaiticue? Nibai siete digacaiño.

²² Jesús dinena uai ote:

—“Nibai siete digacaiño” raitio. Ona jeare finodimie ie finoca rafuena naga icaiño feita. Iena omoi raise uññollena, bie rafuena lloticue.

²³⁻²⁴ Jusiñamui ie dibeimo itinona iese sedaite: Daje nairai illaimadi ie maijirainina uaidote, naimaci cuentas iballena. Damie eo debede. Diez mil ucubena debede. ²⁵ Naimie ucube iñena jira, naie illaimadi ie cuenta iballena, naimie ai, ie uruiaie diga, nana ie raruaie diga, fecallena llote. ²⁶ Iena cacajano, ie illaia uicomo caiñici ifodo raita duere jicade: “Nama, dama ite. Fecuisse omo ibaiticue”. ²⁷ Naimie duenailamona, naie illaia llote: “Fbatañeiticue. Cuemo jai debeñedio. Mai jai”. ²⁸ Ie mei naimie jaide. Bai jaillanona, jiaie maijiraia diga dafaifide. Jai debeñedimie mo janore debede. Cien ucubena debede. Jai debeñedimie dinena ie cimaina llinuana llote: “O debia cuemo mai iba”. ²⁹ Ie jira debedimie caiñici ifodo ana rainadacaida, duere jicade: “Ucube cuemo iñede; iadedi cuena duenai. Fecuisse omo ibaiticue”. ³⁰ Uai ote: “Ja raire

jitaídícue”. Naimiēna duēnaiñēna jira, cárcelmo naimiēna jonetade, ie cuenta íballe dínori. ³¹ Naimiē nabaiñiaí iēna fidianona, sunaitímaci. Iē jira naimaci illaíma dīne nana naie rafuēna lluaídímaci. ³² Naie illaímadi nano debedimēna abído uaiduano, naimiēmo llote: “Maraiñedio. Navui o cuentana íbatañedicue, cuemo o duere jicanua jira. ³³ ¿Bue ñe o nabaina duēnaiñedio, ona cue duēnailla isoi?” ³⁴ Icirillamona, naie illaíma naimiēna cárcelmo jonetade, nainomo duere sefuillēna, nana iē cuenta íballe dínori. ³⁵ Iē isoide. Cue Moo Jusíñamui omoína duere finoite, omoi comēciaí jitaillamona omoi ecímo ítimie iē maraiñede finoca rafuēna omoi feitañēna —llote.

19

Jesús iima iē aína dotaja rafuēna llofuia rafue

(Mr 10.1-12; Lc 16.18)

¹ Iē llofueoicaigano díga Galileamona jaillanona, Jordán railla ille ruica díbeimo Judeamo Jesús jaide. ² Ailluēna comíni naimiēna racadímaci Nainomo duidinona jillotate. ³ Naimiēna facacillēna, dajerie fariseuai naimiē dīne bitímaci. Rafuēna jicanoiacadímaci. Naimaci uai naimiē raise oñēna, naimiēna duere finoacadímaci. Jicanotímaci:

—¿Iima iē aína dotajana rairuidío? ¿Ñie isoide rafue muidona damie iē aína dotarede?

⁴ Jesús dīnēna uai ote:

—Moisés micorí jaie cuete: “Enirue finua facaiseconí Jesíñamuidí come iaímaiaína finode. Himana finode. Riñona jiaí finode”. ⁵ Iē jira Jusíñamuidí jaie llote: “Iē aí díga illēna, iima iē moonā faínonocaite. Iē eina jiaí faínonocaite. Iē aí díga illamona, menade comēdí daamēna jai jaide” llote. ⁶ Menade come jai damēna jai íte. Jusíñamui iēse iaímaiaína ítataja jira, iima iē aína dotañellesa. Riño iē ínina dotañellesa.

⁷ Dane jicanotímaci:

—¿Bue ñe Moisés micorí cuete: “Iima iē aína dotaacania, dotalle rabēna nano cuete. Iē meí naiñaiñona dotaite”?

⁸ Jesús uai ote:

—Jusíñamui uaina raise omoi íñoñēna jira, Moisés micorí iima iē aína dotajana rairuíñede; íadedí nano dofoconí iēse íñede. ⁹ Jiaie riño díga naimiē illēna, iē aína bu dotaia, jiaie iima díga naiñaiño íñēna, naimiēdí jeacínona jai finode. Iē aína dotajana rairuidícue.

¹⁰ Naimiēmo iē llofueoicaigano dīnēna llotímaci:

—Iēse ía, caí jitaillamona aína jamái caí dotanina jira, damameí aínidicái.

¹¹ Naimacímoo Jesús llote:

—Nana comíni omoi como lluacínodo jainidímaci. Daní Jusíñamuína jitaídino íedo jairedímaci. ¹² Dajerie naimaci jeiciamona aireiacaiñēdímací. Dajerie naimaci abína diamona aireiacaiñēdímací. Dajerie Jusíñamuína eo sedaacanano aireiacaiñēdímací.

Jesúdí naimiē dīne uruiaí billana jitailla rafue

(Mr 10.13-16; Lc 18.15-17)

¹³ Jesús dīne comíni naimaci jesanidēna atísíte. Iē onollí naimacímoo naimiē joniamona, naimaci facaina naimiē Moo díga naimiē ñaillēna atísíte. “Naimacína raise cano” iē Moomo llollēna jitaídímaci. Iē llofueoicaigano iēna rairuidímaci; ¹⁴ íadedí Jesús raite:

—Uruiaí cue dīne billēsa. Naimacína rairuíñēno. Cuēna bie isoide ínotínodí Jusíñamui iē comínina sedajanomo jainaiáidímaci.

¹⁵ Iē jira iē onollí naimacímoo jonete. Naimiē facaina Jusíñamui díga ñaite, naimaci marena illēna. Iē meí iē llofueoicaigano díga naimiē oní jaide.

Ucuberedimie Jesús díga ñaía rafue

(Mr 10.17-31; Lc 18.18-30)

¹⁶ Jesús oní jaillanona, conirue Jesús dīne bite. Jicanote:

—Maestro, Jusiñamui diga cue jaca illena, ¿nie isoide mare rafuena finoiticue?

¹⁷ Jesús dinena uai ote:

—¿Bue ñe cuemo mare rafuena finuana jicanotio? Dama damie maremie. Naimiedi Jusiñamui. Naimiemo jicano; ia jaca o illena, Jusiñamui jai llogacinuaina ñnocana jai.

¹⁸ Uai ote:

—¿Nie llogacinuaina ñnoiticue?

Jesús dinena uai ote:

—Comena meineñeno. O aiñede riño diga iñeno. Fiiñeno. Jiaimiena o llogidoia, tainona lloñeno. ¹⁹ O moo uaina ñno. O ei uaina ñno. O abina o isiruilla isoi, nana cominina isirui.

²⁰ Naie conirue uai ote:

—Nana iena jai ñnoticue. ¿Nie isoide rafuena nia finoiticue?

²¹ Jesús dinena uai ote:

—Jusiñamui jitaillacinodo o jaiacania, o raise marebicaiacania, omo ite raruiaina feca. Naie ucubena dueredinomo feca. Cueno o ñnuamona, monamo ico jaca iitio. Cue llofuegamiena o illena, mai cue diga bi.

²² Iena naimie cacajano, sunaite. Naimiemo eo ailluena ra illa jira, iena fecaacaiñede.

²³ Jesús ie llofueoicaiganomo llote:

—Uanaicinona omoimo lloiticue. Ucuberedimiedi Jusiñamui cominina jaillena eo sefuiruite. ²⁴ Iena nia lloiticue. Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiai raise jainide.

²⁵ Iena ie llofueoicaigano cacajano, Jusiñamui cominina ucuberedino raise jainina jira, “¿Niese dueredinodicaidi Jusiñamui cominina jaiticai?” raillamo comeciaina facadimaci. Raijicaillanona, raitimaci:

—Nana comini rana jitailla jira, buca jillobiti.

²⁶ Naimacimo eruaillanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

²⁷ Pedro uai ote:

—Ero, o llua isoi nana cai rana fañonocaida, o diga jaicabidicai. ¿Niese Jusiñamuimona ibana feiñoiticai?

²⁸ Jesús dinena uai ote:

—Illaimana ico cue ia, eo ebirede illanomona cominina sedaiticue. Cue diga omoi jaicabilla jira, nainomo omoi illanuai jiai iite, nainomona omoi judíuai doce nairaiaina omoi sedallena. ²⁹ Cueno naimie isiruillamona, ie jofona bu fañonocaia, ie amatiaina bu fañonocaia, ie miriñuaina bu fañonocaia, ie moona bu fañonocaia, ie eina bu fañonocaia, ie uruiaina bu fañonocaia, ie eniruena bu fañonocaia, Jusiñamuimona ailluena ibana feiñoite. Monamo ico caimare iocire jaca iite. Nainomo benomo baifemo iocire caimare iite. ³⁰ Jamai bue isidomoi. Omoimona jiaño jamai bue isoñedimaci; ia naimie cominina naimaci jaillamona, Jusiñamuimona naimaci diga daje isidomoi. Naimie diga jaca iitomoi.

20

Jesús Jusiñamui ie cominina sedaacana llua rafue

¹ Jesús llote:

—Jusiñamui dibeimo comini jailla rafuena lloiticue. Naimie cominina naimaci jaillamona, Jusiñamuimona nana naimie comini daje isoidimaci. Iena raise omoi uiñollena, bie rafuedo iena lloiticue. Jitiramo daje patrón ie illimo maijillena, maijuidinona jenuaide.

² Dajeriena baillanona, “Omoimo daberie ibaiticue” llote. “Jee” raitimaci. Ieconí ie illimo maijillena, naimacina orede. ³ Jitoma nia oni daidemo, mercadomo naimie jiañona ciode. Jamai itimaci. ⁴ Ie jira naimacimo llote: “Cue illimo maijiai. Raise ibaiticue” llote. ⁵ Ie mei jaidimaci. Jitoma naidai ia, jiañona ciuanona, naimacimo maijillena llote. Jitoma oni caidemo, jiañona ciuanona, naimacimo maijillena jiai llote.

⁶ Jitoma jasici muido itemo, jiañona ciuanona, jicanote: “¿Bue ñellena namonana jamai itomoi?” ⁷ Uai otimaci: “Jaca caimo maijille rana budi lloñede”. Ie jira naimacimo llote: “Mai. Cue illimo maijai” llote. ⁸ Jitoma edaciidemo, naie patrón ie mullaímamo llote: “Maijirainina uido. Jinafona maijiaidinona raire nano iba. Ie mei jitiramo maijiaidinona jinafo iba” llote. ⁹ Ie jira jinafona maijiaidinona nano ibade. Dabe ibade. ¹⁰ “Naimaci baifemo feiñoiticaí” raillamo jitiramo maijiaidino comeciaina facadimaci; iadedi iese feiñoñedimaci. Nana daberie feiñotimaci. ¹¹ Ie jira naie patrón joreña jeare ñaitimaci: ¹² “Jinafona maijiaidino dallu maijidimaci. Ecasilla facaise maijñedimaci; iadedi namonana maijidicaí. Dani cai ibaja isoi ibadio” ñaitimaci. ¹³ Naimacimona damiemo naie patrón llote: “Ero, ona jeare finoñedicue. ‘Omo daberie facaiticue’ omo lloticue. O dinena: ‘Jee’ raitio. ¹⁴ O ucubena jai o feiñua jira, mai jai. Cue jitailla jira, da o ibaja isoi dallu maijidinona ibadicue. ¹⁵ Cue ucubena jira, cue jitaille isoi cue ibaia, ¿niese cuena jeare ñaitomoi? Jiañona cue duenaillanona, ¿bue ñellena uradoidomoi? Mai jai” llote. Jusiñamui ie cominina sedaacana omoi raise uiñollena, bie rafue jai lloticue. ¹⁶ Jamai bue isoidomoi. Omoimona jiaño jamai bue isoiñedimaci; ia naimie cominina naimaci jaillamona, Jusiñamui naimaci diga daje isoidomoi. Naimie diga jaca iitomoi.

Jesúdi ie fiodaillena dane llua rafue

(Mr 10.32-34; Lc 18.31-34)

¹⁷ Jerusalémo ie llofueoicaigano diga Jesús jaidemo, dani naimaci diga ñaillena, naimacina oni uite. ¹⁸ Raite:

—Ero, Jerusalémo jai jaidicaí. Monamona billanona, imana jaidicue; iadedi omoi illaicomini cuena gaitaitimaci. Gaitaja mei, cue meinellena lloitimaci. ¹⁹ Judúuaiñedino illaicominimo cuena fecaitimaci. Cueri jifanoitimaci. Cuena faitimaci. Ie mei cuena coraitimaci; iadedi cue fiodailla mei, darui amani illanona, Jusiñamui cuena jillotaite.

Jesús dine Jacobo Juan iaímaiaí ei billa rafue

(Mr 10.35-45)

²⁰ Naie facaise Jesús dine Jacobo, Juan iaímaiaí ei diga, bitiaímaiaí. Iaímaiaí moodi Zebedeo. Jesús dine iaímaiaí ei rillanona, naimiena raise uaidollena, caiñici ifodo ana rainadacaida llote:

—Omo daje rafue jicanoiacadicue.

²¹ Naiñaiño omoi Jesús dinena jicanote:

—¿Bue ñaíbitio?

Naiñaiño uai ote:

—Illaímana o jailla mei, cue jito iaímaiaí o ecimo illana o llua jitaídicue. Damie o nabeimo. Jiaímie o jarifebeimo. —Jiaño baifemo iaímaiaí illena, naiñaiño iese llote.

²² Naimacimo eruailanona, Jesús dinena uai ote:

—O jitaillacinona raise uiñoñedio. Cue duere sefuiticue.

Naiñaiño jito iaímaiaímo jicanote:

—¿Ie isoi duere sefuicadomico?

Uai otiaímaiaí:

—Jii.

²³ Jesús dinena raite:

—Cue isoi duere sefuitomico; iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

²⁴ Iena jiaie llofueoicaigano cacajano, naie iaímaiaíri iciritimaci. ²⁵ Jesús nana naimacina uaiduanona, raite:

—Nana illaicomini naimaci anamo itinona ocuicabidimaci; ²⁶ iadedi omoi dine iese iñena. Omoimona bu imiena iacania, omoi mullaímana naimie jaisoillasa. ²⁷ Omoimona bu imiena iacania, omoína naimie canocana jaisoillasa. ²⁸ Cuemona fueo. Biñedicue

cominina cue ocuillena; iadedi cominina canuaibidicue. Cue jitailla jira, nana comini facaina fiodaisaibiticue. Naimaci jeacinomona naimaci jillobillena, fiodaisaibiticue. Ailluena comini cuena inuamona jilloitimaci. Coninina omoi canua —llote.

Jesús mena uisnidiaimaiaina jillotaja rafue

(Mr 10.46-52; Lc 18.35-43)

²⁹ Jericó railla nairaimona jaidimacimo, ailluena comini naimaci jinafona racadimaci. ³⁰ Ie facaiseconi mena uisnidiaimaiaia nai fuemo raidiaimaiaia. Jesús naiedo jaillano cacajano, naimiena ado uaidotiaimaiaia:

—David micori Jitona o illamona, Jusiñamuimona o billa jira, cocona duenai. Cocona cano.

³¹ Iaimaiaia llicauillena, Jesús diga jaidino iaimaiaina lletade; iadedi eo cuirioidiaimaiaia:

—Maestro, David micori Jitona o illamona, cocona duenai.

³² Iaimaiaina Jesús cacajano, ieconi naidadajanona, iaimaiaina uaidote. Jicanote:

—¿Niese omicono cue nibaiana jitaidomico?

³³ Uai otiaimaiaia:

—Maestro, coco uisina o cioitajana jitaidicoco.

³⁴ Iaimaiaina duenaillanona, iaimaiaia uisina jetade. Ieconi iaimaiaia uisidi cide. Iaimaiaia jai cianona, ie llofueganona iaimaiaia jaillena, Jesús diga jaidiaimaiaia.

21

Jesús illaïma isoi Jerusalémo jailla rafue

(Mr 11.1-11; Lc 19.28-40; Jn 12.12-19)

¹ Oni jaillanona, Jerusalémo iaieicaidimacimo, Betfagé railla nairaimo Jesús ie llofueoicaigano diga ridimaci. Olivos railla anedumo ite. Ie llofueoicaiganomona Jesús menamiena orede. ² Raite:

—Bie nairai illa uicomo mai omico jai. Nainomo cuinaca burrana baitomico. Ie ecimo ie uruena baitomico. Naie iaimaiaina suiñuano bene ati. ³ Omicomo “¿Bue ñellena bie suiñodomico?” bu jicanoia, llono: “Coco Nama naie iaimaiaina jitaide. Nailli naimie iaimaiaina raie abido oretaite” —raite.

⁴ Jusiñamui facaina lloreama micori jaie llua isoi, bie rafue suide. ⁵ Naimie micori jaie cuete:

Jerusalén itinomo llono:

“Ero, omoi illaïma omoïna sedallena biite.

Abi iedoñeno biite.

Burra urue emododo naimie biite”

cuete. ⁶ Iaimaiaia jaillanona, Jesús llua isoi finodiaimaiaia. ⁷ Burra ie urue diga atidiaimaiaia. Burra urue emodomo naimie llofueoicaigano naimaci iniroina jobianona, ie emodomo Jesús rainadate. ⁸ Naimiena iobitallena, illaïma isoi naimie jaillena, ailluena comini imaci iniroi diga, naiso motomo jobedimaci. Jiaïno raforono uanona, naiso motomo jobedimaci. ⁹ Dajerie Jesús uicomo jaidimaci. Dajerie naimie jinafona jaidimaci. Ado cuiriisite:

—¡Cai Jilloitaraïma billa! ¡Naimiedi David micori Jito! ¡Jusiñamui mamecido bitimie eo mare! ¡Jusiñamui caïna jilloitajasa!

¹⁰ Jerusalémo naimie ridemo, nana nainomo itino naie rafuena uiñoiacadimaci.

—¿Buta bite? —jicanotimaci. ¹¹ Jesús diga bitino dinena uai otimaci:

—Jesús bite. Naimiedi Jusiñamui facaina lloreama. Galileamo ite Nazaret imie.

Jesúdi Jusiñamui jofomona damieriena dotaja rafue

(Mr 11.15-19; Lc 19.45-48; Jn 2.13-22)

¹² Jerusalémo Jesús rilla mei, Jusiñamui jofomo naimie jaide. Naie jofu eo aillue. Diga cuartos nainomo ite. Jusiñamuïmo ofomaiaïna fecallena, naimiemo toïca llaudaiaïna fecallena, nainomo comini jaisoidimaci. Naie cominina ibatajanona, ofomaiaïna, toïca

llaudaiaa diga, damierie fecauidimaci. Iena Jesús ciuanona, naimaci mesaiaia oni caicode. Ucugina fecauidino rairacuai jiaa oni caicode. ¹³ Naimacimo llote:

—Ie facaina lloraima Jusiñamui llogacino jaie cueba: “Cue jofo ite, nainomo cuemo comini jillena” cueba. Ero, ailluena omoi ibataja jira, naimie jofona firiruidino jofona omoi finoca.

¹⁴ Ie facaise uisnidino Jusiñamui jofomo naimie dine bitimaci. Ñuja-ñujacaida macaritano jiaa bitimaci. Naimaci billanona, Jesús naimacina jillotate. ¹⁵ Nainomo Jesúdi diga mare rafuena finode. Diga cominina jillotate. Iena ciuanona, nainomo ite uruiaa ado cuiriisite:

—David micori Jitori iobidicai. Jusiñamui lloraini micoriaa jaie lua isoi, cai jilloitaraima jai ite.

Iena ciuanona, iena cacajanona, judíuaa illaicomini iciritimaci. ¹⁶ Naimiemo jicanotimaci:

—¿Bie uruiaa cuiriillana cacadio?

Jesús dinena uai ote:

—Jii, cacadicue. David micori iena jaie cuete. ¿Niese iena cacaiñedomoi? Naimie cuete: Naimiemo Jusiñamuidi uruiaa mare iobillacinona fecataite.

¹⁷ Naimacina faionocaida, Betaniamo Jesús jaide, nainomo inillena.

Jesús higuera railla riarana faidua rafue

(Mr 11.12-14, 20-26)

¹⁸ Ie areruido Jerusalémo abido ie llofueoicaigano diga Jesús bia, aimetaite. ¹⁹ Nai fuemo higuera railla riarana ciuanona, iena jibuide. Naiemo naie llisilladi inede. Dama ie ibena cide. Ie jira naie amenana llote:

—Biemona jaca llisiñeite. —Iese railla dacaiño naie riaradi duide. ²⁰ Ie llofueoicaigano iena ciuanona, rajicaillamona raitimaci:

—¿Niese naie riarara raire duide?

²¹ Jesús dinena uai ote:

—Uanaicinona omoimo lloiticue. Cue Moona raise omoi inoia, bie isoide rafuena finoitomoi. Raise omoi inoia, omoi comeci igireñenia, bene ite anedumo omoi lloia: “Monailaimo o illena, benomona mai jai”, Jusiñamui o jitaile rana finoite. ²² Naimie iena finuana omoi inuamona, nie isoide rafue cue Moomo omoi jicajia, iena naimie finoite.

Jesúdi ie siño uaina lua rafue

(Mr 11.27-33; Lc 20.1-8)

²³ Jerusalémo rillanona, Jusiñamui jofomo Jesús fo jailla mei, nainomo ite cominina llofue. Judíuaa illaicomini naimie dine billanona, jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

²⁴ Jesús dinena uai ote:

—Omoimo daje rafuena nano jicanoiticue. Raise omoi fairioia, omoimo cue uaido cue finoca rafuena lloiticue. ²⁵ Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

Dani coninari iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori lluaa inoñedomoi?” ²⁶ “Comini” cai fairioia, bene itino caina nibai meineitimaci, Juan micoridi Jusiñamui facaina lloraima naimaci railla jira.

²⁷ Ie jira fairiotimaci:

—Uiñoñedicai.

Jesús dinena raite:

—Ie muidona cuemo nie isoide uai illana omoimo lloñeiticue.

Jesúdi mena jito iaímaiaí illa llua rafue

²⁸ Judíuai illaicomínimo Jesús llote:

—Bie rafuemo omoí comeciaina faca. Damiemo mena jito ite. Nano doforamiemo llote: “Moo, cue illimo birui maijiaí”. ²⁹ Uai ote: “Jaiacaiñedicue” llote. Dally illanona, ie comecina dane facajano, maijiaide. ³⁰ Jiaie jitomo daje isoi llote. Naimie uai ote: “Jii, maijiaiticue” llote. Iese llote; iadedi maijiaíñede. ³¹ ¿Nie jitoca ie moo jitailla rana finode? —jicanote.

Uai otimaci:

—Nano doforamie.

Jesús dinena naimacimo llote:

—Uanaicinona omoímo lloiticue. Omoína ñaiticue. Omoímona maraiñedimaci; iadedi Jusiñamui comínina naimaci jaillanona, gobierno ucube oraini Jusiñamui illanomo iitimaci. Callirediñaiñuaidi nainomo jiaí iitimaci; iadedi nainomo jaca iñeitomoi. ³² Marena omoí comeciaina itatallena, Juan micorí navui bite; iadedi naimie micorína ñnoñedomoi. Ucube oraini naimie micorí rafuena ñnotimaci. Callirediñaiñuaidi naimie micorí rafuena ñnotimaci. Iena uiñotomoi; iadedi omoí comeciái iuailaina meidoñedomoi. ñnoñedomoi.

Jesúdi maraiñede maijiraini rafuena llua rafue

(Mr 12.1-12; Lc 20.9-19)

³³ Judíuai illaicomínimo Jesús llote:

—Jiaie rafuena omoímo lloiticue. Iemo cacarei. Daje patrón uvas railla riaraiaina rite. Naie abi llaite. Jiairuido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona jiaínomo fecade. Ie mei jiaie eniruemo jaide. ³⁴ Uvas jai einaila facaise riaraiaina sedaraini dine naie patrón janore mullaiaína orede, naimie facaise iedinona naimie feiñollena; ³⁵ iadedi naie sedarainidi ie mullaiaína duere finosite. Daje mullaimana fatimaci. Jiaimiena meinetimaci. Jiaimiena noficina fairinotimaci. ³⁶ Ie mei patrón jiaie mullaiaína orede. Naimacina jiaí duere finodimaci. ³⁷ Ja muidomo ie jitona orede. “Cue jitona jaciruitimaci. Naimie uaina ñnoitimaci” comecina facade. ³⁸ Riaraiaina sedaraini naimiena ciuanona, coniniri raitimaci: “Bimiemo bie illi fiebiite, naimie moo fodailla mei. Naimiena cai meinelli, bie illi caimo fiebillesa” raitimaci. ³⁹ Naimiena jino dotajanona, naimiena meinetimaci. ⁴⁰ Naie illi nama ico abido bille mei, ¿nie isoide rafuena naimie naie illina sedarainina finoite? Cuemo llono —llote.

⁴¹ Judíuai illaicomíni uai otimaci:

—Naie maraiñedinona dueruiñeno meineite. Ie mei jiaie comínimo naie illi fecate, iena sedallena, naiemona riarana feiñollena.

⁴² Naimacimo Jesús llote:

—Naie illi sedaraini isoidomoi. Jusiñamui facaina lloraíma micorí omoína jaie cuete. Ie ciegafuena raise facañedomoi. Naimie micorí cueda:

Jofo finoraini jitaíñena noficidi nana naie jofomo ite nofici baifemo jai uaide.

Jusiñamui iena finotate.

Iena cai uiñuamona, “Eo mare” raiticai

cueda. Jusiñamui comínina damierie jaillana naimie micorí cuete. Jusiñamui ore-tagamiéna damierie jitaíñenamona, naimie comínina jaiñeitimaci; iadedi Jusiñamui ore-tagamiéna ailluena ñnuamona, naimie comínina jaitimaci. Ero, naimie micorí caina cuete. Naie jofona finoraini isoidomoi. Naie nofici isoidicue. Cue rafuena omoí jitaíñena jira, naimie comínina jaiñeitomoi. ⁴³ Jusiñamuidi ie comínina sedajanomo omoína itatañeite; iadedi jiaie comínina nainomo itataite, naimie jitailla rafuena naimaci finua jira.

⁴⁴ Jesús llote:

—Naie noficina dane ñaiticue. Noficimo bu eicaitaia, bofedaite; ia naie nofici bumo ana uai, naimiena saitaite. Ie isoide. Cue llwana omoi jamaia, duere sefuitomoi. Iena omoi ñinoñenia, ja muidomo faifitomoi.

⁴⁵ Jesús llwana naie judíuai illaicomini cacajanona, naimiedi naimacina ñaiana jai uiñotimaci. ⁴⁶ Icirillamona, naimiena gaitacadimaci; iadedi cominina jaciruitimaci, cominidi naimie Jusiñamui facaina lloraimana raillanona.

22

Jesúdi illaíma ie jito aína ua llua rafue

¹ Jusiñamui jofomo Jesús nia illanona, nainomo itinona llofuede:

²—Jusiñamui ñibeimo comini jailla rafuena omoimo lloiticue. Iena omoi uiñollena, bie rafuedo iena lloiticue. Illaimadi ie jito ai ua rafue finode. ³ Naimie ie mullaini orede, rafuemo llogano uaidollena; iadedi nai llogano biacaiñedimaci. ⁴ Dane jiaie mullaini oretajano llote: “Nai lloganomo llono: ‘Rafue guille jai finocasa. firetaiai, farediretaiai diga, jai faga. Jai nana fuite. Rafuemo mai bi’ ”. ⁵ Naimaci cacarefiacaiñede. Damie ie illimo jaide. Jiaimie ie chinganamo jaide. ⁶ Jiaíno mullainina gaitadimaci. Gaitajanona naimaciri jifanotimaci. Ja muidomo naimacina meinetimaci. ⁷ Ie jira naie illaíma eo icirite. Naimie soldadaui oretate, naimie mullaini meinetinona meinellena. Naimie naimaci illano jobaitate. ⁸ Ie meinoconi ie fiebide mullainimo llote: “Rafue guille jai nana finoca; ia llogano marañedimaci. ⁹ Naiso bojicaillanomo jai. Nana o ciolle diese llono: ‘Rafuemo bi’ llono”. ¹⁰ Ie jira ie mullaini jai naisona jaide. Marañedino baillanona diese ofitatimaci. Jiai maredino diese ofitatimaci. Rafue finua jofo naie llogano diga oruide. Illaíma nainomo fecaca iniroina jitadimaci. ¹¹ Illaíma fo bia, mesamo itino jibuillena, ñinomo daje íma rafue ie mare iniroina jitañenana ciode. ¹² Naimiemo jicanote: “Nabai, ¿ñiese bene rafue ie mare iniroina jitañeno bitio?” jicanote. Naimie uainicaide. ¹³ Ie jira naie illaíma ie mullaíaimo llote: “Naimie cuena ñinoñena jira, naimie onolli dajemo nitaicaida maino. Ie eillina daje isoi maino. Cuemona naimie jino dota. Nainomo itino diga duere sefuite. Jiai sunaite” llote. ¹⁴ Ero, naie rafuemono omoi fueo. Illaíma ailluena uaidote; ia nana biñedimaci. Ie isoide. Jusiñamui ailluena cominina uaidote; iadedi naimacimona janore fetode.

Jesúmo gobiernomo ucubena fecajana jicanua rafue (Mr 12.13-17; Lc 20.20-26)

¹⁵ Naimacimo Jesús llua mei, fariseuai comini abido jaillanona, coniniri siadotimaci. Naimie raise uai oñedena, naimiena duere finollena, Jesúsna facaciacadimaci. ¹⁶ Ie jira naimie ñine naimaci cominimona dajerie oredimaci. Herodianuai railla cominina jiai jaidimaci. Jesús ñine rillanona, raitimaci:

—Maestro, uanaicinona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio. ¹⁷ Omo rafuena jicanoiacadicaí. Dani Jusiñamuina sedadicaí; iadedi romanos railla nairaí anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono —llotimaci.

¹⁸ Naimaci comeciaina marañedicinona facajana Jesús uiñuamona, uai ote:

—¿Bue ñellena cuena facacitomoi? Maredinona abi caitadomoi. ¹⁹ Ucube cuemo acata —llote. Ie jira acatatimaci.

²⁰ Jesús ñinena jicanote:

—¿Bu ie joreño nainomo ite? ¿Bumo jainaiáide bie cuega radi?

²¹ Uai otimaci:

—César.

Jesús ñinena raite:

—César iena itedi Césarmo ille. Jusiñamui iena itedi Jusiñamuimo ille —raite.

²² Naimie lluana cacajano, rajjicaidimaci. Naimie jeare uai oñena jira, naimie dinomona oni jaidimaci.

Jesús dine saduceuai railla comini billa rafue
(Mr 12.18-27; Lc 20.27-40)

²³ Naie facaise saduceuai railla comini naimie dine bitimaci. Fiodaillamona jaca buna jilloñellena inotimaci. Jesúmo llotimaci:

²⁴—Maestro, Moisés micori jaie cuela: “Iima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuela. ²⁵ Ero, cai motomo siete amatiai ite. Nano doforamie ie aina ote. Naimie nia uruiainide fiodailla. Ie emodo imie ie ama feciño ote. Uruiainide jiai fiodailla. ²⁶ Naie siete digamiedemona iese sefuide. ²⁷ Ja muidomo naie riño jiai fiodaite. ²⁸ Fiodaillamona, ico naimaci jilloiadedi, ¿bu naie riño ienite? Naiñaño siete digamiēna inirede —llotimaci.

²⁹ Jesús uai ote:

—Moisés micori cuela fuaiaina raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi. ³⁰ Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaiēnisi ainitimaci. Ininitimaci. Ie isoi iitimaci. ³¹ Fiodaitino jilluana omoi mo lloticue. Jusiñamui omoi jaiagaimo jaie llogacinona inoñedomoi. Naimie llote: ³² “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaina jiai jillotaite —llote. ³³ Nainomo ite comini iēna cacajano, naimie llofuiari rajjicaidimaci; ia saduceuai dinena uainicaidimaci.

Jesús nanoca llogacinona llofua rafue
(Mr 12.28-34)

³⁴ Saduceuai comini uainicaillana fariseuidi jai fidiano, Jesús dine ofidimaci. ³⁵ Naimacimona damiedi Moisés micori jaie llogacinona eo uiñote. Jesúsna facacillena, naimiemo jicanote:

³⁶—Maestro, Moisés micori jaie llogacinuaimona, ¿nie llogacino ua nanoca llogacinona?

³⁷ Jesús dinena uai ote:

—Moisés micori jaie cuela: “Omoi jitailla jira, nana omoi comecimona cai Nama Jusiñamuina isirui. Naimiemo omoi comecina eo faca”. ³⁸ Bie ua nanoca llogacino. ³⁹ Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”. ⁴⁰ Bie mena llogacinomona nana jiaie llogacinuai comuide. Nana Moisés micori llogacinuai naiemona comuide. Nana Jusiñamui facaina lloraini micoriai llogacinuai naiemona comuide —llote.

Jesús dinena fariseuai cominimo jicanua rafue
(Mr 12.35-37; Lc 20.41-44)

⁴¹ Naimie dine nia fariseuai comini ia, Jesús naimacimo llote:

⁴²—Jusiñamui lloraini micoriai jaie raitimaci: “Jusiñamuidi Cristo raillamiēna oretaite, ie cominina sedallena”. ¿Niese naimiēna raitomoi? ¿Bu jito naimiedi?

Uai otimaci:

—David micori jito. David micori isoi Cristo ie cominina sedaite.

⁴³ Jesús dinena jicanote:

—Naimiedi David micori isoidena, ¿bue ñellena David micori “Cristodi cue Nama” llote? Jusiñamui Joreñodi David micori ñaitatajanona, David micori llote:

⁴⁴ Jusiñamuidi cue Namamo llote:

“Illaimana o illamona, cue nabei dine ana rai.

Ona inoñedino o anamo itataitacue”.

⁴⁵ “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi jamai David micori jitoñede; ia jiai ie Nama.

⁴⁶ Uaina onidimaci. Naie facaisemona Jesús ie uaina dane uaitañedimaci.

23

Jesúdi judíuai illaicomínina ñaia rafue

(Mr 12.38-40; Lc 11.37-54; 20.45-47)

¹ Jusiñamui jofomo Jesús nia illanona, naimie dine ailluena comini bitimaci. Ie llofueoicaigano nainomo jiai illanona, nana naimacimo lloste:

²—Moisés micori llogacinuaina llofuerañidi naie rafuedo jai jaicabidimaci. Fariseuai comini iedo jiai jaicabidimaci. ³ Naimaci llofuiacinodo omoi jai. Naimaci llofuiana omoi cacarefi; iadedi naimaci illa isoi omoi iñeno, naimaci llofuiacinodo naimaci jaiñena jira. ⁴ Omoi einamací llogacinuaido raise omoi jaillena, diga rafuena omoi finuana jitaídímaci; iadedi iedo omoi jaillena, omoína jaca canoñedimaci. “Jusiñamuina eo raise sedadicaí” comecina facadimaci. Iemo naimaci comecina facajamona, ⁵ iena omoi cioillena, nana naimaci finua rafuena marefodo finodimaci. Jiaie cominimo ite Jusiñamuimo jirabe baifemo faitibena uiacacabidimaci. Iniroi fuedadi aillofena jonegana gaidimaci. ⁶ Rafue ia, naimaci jamai bue isoiñedinomo comecina facajanona, rafue nama ecimo raicadimaci. Ofiracomo uicomo raicadimaci, comini naimaciri acarillena. ⁷ Níne naimaci jaia, nana comini naimacina uaiduana gaidimaci. Maestrodicinona uaiduana jiai gaidimaci. ⁸ Jusiñamuina eo raise naimaci sedajana omoi uiñuana jitaídímaci. Naimaci isoi iñeno. Omoi damacina jira, omoimona damie omoi baifemo faiamo comecina facañeno. Naimiena maestrona raiñeno. Omoi baifemo cue illanona, omoi maestrodicue. ⁹ Omoi Moo Jusiñamui monamo illanona, dama naimiena seda. Jiaimiena sedaño. Jusiñamui isoi jiaimiena “Moo” raiñeno. ¹⁰ Omoi damacina jira, omoimona damiena “Cai illaima” raiñeno. Omoi illaimana jai iticue. ¹¹ Omoimona bu imiena jaiacania, omoi mullaimana naimie nano jaillamona, omoína naimie canua. ¹² Jusiñamuidi “Jiaíno afemo iticue” raillano comecina facadimiena jamai bue isoidimiena itataite; ia Jusiñamuidi “Jiaíno afemo iñedicue” raillano comecina facadimiena jamai bue isoiñedimiena itataite.

¹³ Naie facaise Moisés micori llogacinona llofuerañidi fariseuai comini diga illanona, Jesús naimacimo lloste:

—Jusiñamui omoína duere finoite. Mareuidinona abi caitadinodomoí. Jusiñamui díbeimo comini illana jitaíñedomoí. Naimie díbeimo omoi illana jiai jitaíñedomoí. Ie muidona Jusiñamuimona duere sefuitomoí. ¹⁴ “Jusiñamuina eo sedadimaci” omoimo comini comeciaina facajana jitaídomoí. Ie jira are jiidomoí; iadedi iese iñedomoí. Maraiñede rafuena finocabidomoí. Jifuianona feciñuai rana bairocabidomoí. Ie jira Jusiñamui omoína eo duere finoite. ¹⁵ Damiena omoi díbeimo itatallena, omoi isoi Jusiñamui rafuedo naimie jaillena, diga rafuena finodomoí. Omoi díbeimo illa mei, omoi baifemo omoi einamací llogacinodo naimie jaillana jitaídomoí. Omoi diga íco naimie ua faífite. Comínina uanaíñedinodo jaitatomoí. Iese omoi illa jira, duere sefuitomoí.

¹⁶ Omoi llofuiacino diga comínina canoñedomoí. Mareuidinona abi caitadinodomoí. Raicabitomoí: “Cai lloga uai cai finollena jiai comini uiñollena, Jusiñamui jofomo ite oro mamecina llinoticaí; iadedi Jusiñamui jofo mamecina cai llinoia, cai lloga uaina cai finoñenia, caimona mare. Jusiñamuimona duere sefuiñeiticaí” raicabitomoí. ¹⁷ Abi uiñoñedomoí. Omoi llofuiacino diga comínina canoñedomoí. Jusiñamui jofomo naie oro jainaiaila jira, naie orodi mare; iadedi naie oro naie jofo baifemo uaiñede. Abina omoi uiñoñena jira, Jusiñamui omoína duere finoite. ¹⁸ Jiai raitomoí: “Jusiñamuimo faga toica ocaina jobaisoillano mamecina cai llinoia, cai lloga uaina cai finoñenia, caimona mare; iadedi Jusiñamuimo fecaca toica ocaina mamecina cai llinoia, cai lloga uaina

jaca finoiticaí”. ¹⁹ Abi uiñoñedomoi. Omoi llofuiacino diga cominina canoñedomoi. Naie jobaisoillanomo naie ocaina illa jira, naie ocaina mare; iadedi naie ocaina naie jobaisoillano baifemo uaiñede. ²⁰ Ero, Jusiñamuimo ocaina jobaisoillano mamecina omoi linoia, nainomo ite ocaina mamecina jiai llinotomoi. ²¹ Jusiñamui jofo mamecina omoi linoia, Jusiñamui nainomo illa jira, naimie mamecina jiai llinotomoi. ²² Monamo ite ra mamecina omoi linoia, Jusiñamui illano nainomo illa jira, nainomona cominina naimie sedaja jira, naimie mamecina jiai llinotomoi. Omoi llua rafuena omoi finoñenia, Jusiñamui omoína duere finoite.

²³ 'Mareuidinona abi caitadinona omoi illamona, omoimo nia lloiticue. Nana omoi illimo ite ramona, nana omoimo ite ucubemona Jusiñamuimo janore jisa fecacabidomoi. Nana comini omoi isoi illena jitaidomoi. Mare; iadedi nanoca rafuena jaca finoñedomoi. Jiaie cominimo omoi comecina facañedomoi. Jiaie cominina duenaiñedomoi. Omoi lloga uaina finoñedomoi. Nana naie isoide rafuena omoi jiai finua. Iena omoi finoñenia, Jusiñamui omoína duere finoite. ²⁴ Abina uiñoñedomoi. Jallecima jiroracomo ia, iena oni faiga; ia aillue ra nainomo ia, iena cioiñeno namo gutadomoi. Ie isoide. Omoi llofuiacino diga cominina canoñedomoi. Jusiñamui ie eo jitailla rafuedo comini jaillana llofueñedomoi. Nanocafueñededo comini jailla rafuena llofuetomoi. Nanoca rafuedo comini jaillana llofueñedomoi.

²⁵ 'Omoimo nia lloiticue. Omoi einamací llogacinodo eo jaidomoi; iadedi omoi comeciaina raise finoñedomoi. Eo fiidomoi. Jifuianona comini rana bairodomoi. Jeacinona finocana jaidomoi. ²⁶ Abina uiñoñedomoi. Da pocillos jinafo, da platos jinafo jocodino isoidomoi. Pocillos jerai, platos jerai jocoñedino isoidomoi. Omoi abina finodomoi; iadedi omoi comeciaina raise finoñedomoi. Nano omoi comecina raise fino. Mare rafue finocana jai. Omoi einamací rafuemo comecina facañeno; ia Jusiñamui rafuemo comecina faca. Iese omoi jaiñenia, Jusiñamui omoína duere finoite.

²⁷ 'Omoimo nia lloiticue. Marena finoca raiafo isoidomoi. Jinofe marena eruaide; iadedi nainomo mare ra iñede. Comini illaici jamai ite. Jai maraiñede. ²⁸ Ie isoidomoi. Marena eruaidomoi; iadedi maredinona abi eo caitadomoi. Omoi comeciái eo maraisiñede. Omoi comecina raise omoi finoñenia, Jusiñamui omoína duere finoite.

²⁹ 'Omoimo nia lloiticue. Naimacimo birui omoi comeciaina raise facallena, Jusiñamui facaina lloraini micoriai raiafona marena eruaillena finodomoi. Mareuidino micoriai raiafo emodo marena eruaillena finodomoi, ³⁰ raillano: “Cai jaiagai Jusiñamui facaina lloraini micoriaina meinetimaci. Naie facaiseconi iticaidena, naimaci isoi finoñedicaí. Cai jaiagai isoi birui iñedicaí” raitomoi; ³¹ iadedi omoi llumona Jusiñamui facaina lloraini micoriai meinetino uruaí omoína uiñoticaí. ³² Omoi jitailla jira, omoi jaiagai isoi jeacinona eo finocana mai jai. Naimaci jai taineca rafuena mai omoi finocana jai. ³³ Omoi maraiñena jira, jaio nairai isoidomoi. Ja muidomo iraimona jillobiñeitomoi. Nainomo duere sefuitomoi. ³⁴ Cue rafuena lollena, cue facaina llorainina omoi dine oretaiticue. Cue rafuena eo uiñotinona omoi dine oretaiticue. Cue rafuena omoi raise uiñollena, llofueraini omoi dine jiai oretaiticue. Dajeriena meineitomoi. Naimacina coraitomoi. Omoi ofiracomo dajeriena faitomoi. Diga nairaimo naimacina duere finoitomoi. ³⁵ Abel micori jaiie ite. Naimie maremie. Ie ama naimiena meinete. Naimie facaisemona omoi jaiagai ailluena mare cominina meinetimaci. Ie mei omoi jaiagai Zacariána meinetimaci. Naimiedi Berequíás jito. Jusiñamui jofomo Jusiñamuimo toica ocaina jobaisoillano ecimo naimiena meinetimaci. ³⁶ Uanaicino omoimo lloiticue. Naimacina omoi jaiagai meinia muidona, omoimona Jusiñamui birui ibana oite. Naimaci isoi maraiñede rafuena finocana jaidomoi. Jusiñamui omoína duere finoite.

*Jesús Jerusalémo itinomo llua rafue
(Lc 13.34-35)*

³⁷ Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoina cue sedallena, atava ie uruia sedaja isoi, diga icaiño cue anamo omoina uaidoiacadie; iadedi omoi dinena cuena jitaiñedomoi. ³⁸ Iemona Jusiñamuidi omoi illanona jai fainonocaide. ³⁹ Cue Moo dine jaiticue. Cue jailla mei, cuena cioiñeitomoi. Ico abido cue bia, omoi comini cuena lloitimaci: “Jusiñamui oretagamie eo mare. Naimiedi cai Nama” lloitimaci

24

Jesúdi Jerusalémo ite Jusiñamui jofo judaiana lua rafue

(Mr 13.3-23; Lc 17.22-24; 21.5-24)

¹ Jusiñamui jofomona ie llofueoicaigano diga Jesús jino jaidemo, Jesúna nai jofona eruaitatimaci. ² Jesús dinena llote:

—Bie jofona ciodomoi. Uanaicinona omoimo lloiticue. Nana bie jofomo ite noficiái ico judaisite —llote. ³ Ie mei Olivos railla anedu dine rillanona, Jesús naie muidomo raidemo, ie llofueoicaigano naimiemo iena anado llotimaci:

—Jusiñamui jofo judaiana omo jicanoiacadicaí. ¿Niruido iena suite? Caímo llono. O abido billirui iaírei ia, ¿nie isoide rafue suite, o abido billiruina cai uiñollena?

⁴ Uai ote:

—Omoina bie rafuena bu jifueñellena, omoi abina rairui. ⁵ Ailluena comini cue mamecido billanona: “Cristodicue” raitimaci. Diga cominina jifueitimaci. Iemona omoi abina rairui. ⁶ Jobaimiaí illena fidiitomoi; iadedi jaciruiñeno. Iese suite; iadedi abido nia biñeiticue. ⁷ Daje nairaí jaíe nairaí diga jobairitimaci. Daje gobierno jaíe gobierno diga jobairite. Diga illanuaímo comini aime guitimaci. Diga illanuaímo ñuisañuaí suite. ⁸ Iese sua, omoi duere sefuillifue omoimo suite.

⁹ Cueno ñoñedino omoina gaitatajanona, omoina meineitimaci. Cue cominina omoi illamona, nana nairaíai omoina enoitimaci. ¹⁰ Naie facaise cue dibeimo itinomona ailluena abido danomo jaitimaci. Iemona duere omoi sefuillena, omoina janoñeitimaci; iadedi omoina enoillamona, omoina llogidoitimaci. ¹¹ Naie facaise diga comini raitimaci: “Jusiñamui facaina llorainidicaí”; iadedi Jusiñamui facaina llorainiñedimaci. Uanaicinona lloñeitimaci. Diga comini naimaci dibeimo itataitimaci. ¹² Jeacino eo comuicana jailla jira, ailluena comini conini isiruiñeitimaci; ¹³ iadedi cuena fainonocaiñedimie ja muidomo monamo jaca iite. Naimiena jillotaiticue. ¹⁴ Diga cominidi Jusiñamui dibeimo comini ille rafuena nana nairaímo lloitimaci, nana nairaíai iena cacallena. Ie mei abido biiticue.

¹⁵ Cue lluomo cacarei. Daniel micori Jusiñamui facaina lloraima. Naimie micoridi jaímie jearede rafue finollena jaie llote. Naie rafue sua, Jusiñamui jofomo Jusiñamuina sedañeitomoi. Nainomo naie jearede rafue finuana omoi ciuanona, ¹⁶ naíemona omoi jillobillena, duere omoi sefuiñellena, Judeamo omoi illamona, aneduaí dine omoi aisi. ¹⁷ Jofo emodomo omoi ia, ana billanona, aneduaí dine raíre rillena, jofomo jaíñeno. Nainomo ite rana omoi diga uiñeno. ¹⁸ Aneduaí dine raíre rillena, illimo omoi ia, abido jofomo biñeno, omoi ñiroi omoi diga uillena. ¹⁹ Naie rafuemona jillobillena, naie facaise urueside riño duere sefuite. Uruena nia jirode riñodi jaí duere sefuite. ²⁰ Eo duere sefuiñellena, Jusiñamuimo omoi jicano, rollime facaiseconi bie rafue suiñellena. Moisés micori sábadomo are jaillana jaie rairuide. Sábadoruimo bie rafue suiñellena, Jusiñamuimo jicano. ²¹ Naie facaise comini eo duere sefuitimaci. Enirue finua facaisemona iese comini nia duere sefuiñedimaci. Ico iese eo duere sefuiñeitimaci. ²² Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

²³ Ie facaise omoimo bu raia: “Jadí, Jusiñamui facaina lloraima benomo birui baírede. Naimiedi Cristo”, iena ñoñeno. Jaímie raia: “Oni batíne Cristo birui baírede”, iena

ññoño. ²⁴ Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. ²⁵ Ero, bie rafue nia suiñenia, iena omoimo jai lloticue. ²⁶ Omoimo naimaci raia: “Ero, batine jofue iñenanomo Cristodi ite”, nainomo jaiñeno. Naimaci raia: “Ero, bene bie jofomo Cristo ite”, iena ññoño. ²⁷ Mona borillamona mona jillacidi usare cide. Nana cominimo bairede. Ie isoide. Cue abido bia, nana comini iena uiñoitimaci. ²⁸ Urujaisai rifaide ramo ofillana uiñua isoi, nana cuena ñnotino cue billena uiñoitimaci.

Jesús abido ie bille rafue

(Mr 13.24-37; Lc 17.26-30, 34-36; 21.25-33)

²⁹ Jesús llote:

—Naie duere sefuilla facaise meinoconi jitoma lligaiñoñeite. Fivui jiai lligaiñoñeite. Monamona ucuai llujite. Nana naie radi jaidisite. ³⁰ Ie mei monamo baireiticue. Ieconi nana nairaijai jarire iitimaci. Jacinaitimaci. Uillie motodo cue billena cioitimaci. Ebire biiticue. Naimacina cue sedallena, illaimana biiticue. ³¹ Cue jaienisaia cue ecimona oretaiticue. Ado trompeta ficiretajano, cue fetocano diese naganomona ofitaitimaci.

³² Higuera railla riaromona omoi fueo. Bie eniruemona naie riaru firuillamona, fiemona raire illana uiñotomoi. ³³ Ie isoide. Bie rafue ico suia, cue billirui iairei illena uiñoitomoi. ³⁴ Uanaicinona omoimo lloiticue. Nana bie rafue suille facaiseconi bie nairai nia iite. ³⁵ Mona enirue diga fuite; iadedi cue lloga uai jaca suite. ³⁶ Cue abido billirui jaca bu uiñoñede. Jusiñamui jaienisaia iena uiñoñedimaci. Jusiñamui Jitodicue; iadedi cue abido billiruina jiai uiñoñedicue. Dama cue Moo iena uiñote. ³⁷ Abido cue billirui iairei ia, Noé micori facaiseconi itino isoi comini iitimaci. Naimaci duere sefuillemo Noé micori facaise itinodi comeciaina facañedimaci. ³⁸ Naie facaiseconi nia eo noci deiñenia. Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori. ³⁹ Nia noci deiñenia, Noé micori lloga uaina ññoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue. ⁴⁰ Naie facaiseconi menamie illimo danomo iitiiaimaiaia. Damie Jusiñamui dine jaite. Jiamie fiebillanona, Jusiñamuimona duere sefuite. ⁴¹ Mena riño danomo doberitiiñuai. Dañaiño Jusiñamui dine jaite. Jaiñaiño fiebillanona, Jusiñamuimona duere sefuite. ⁴² Cue billirui omoi uiñoñena jira, iemo ocuiri. ⁴³ Bie rafuemona omoi comeciaina omoi faca. Jofo namadi firiraia nia naiona billena uiñotena, ie rana faifñellena, ie jofona raise sedade. ⁴⁴ Ie isoi cue billemo ocuiri. Monamona ico abido biiticue. Omoi ocuiriñena facaisemo riiticue. Ie jira cue billemo nagarui ocuiri.

Jesúdi patrón ie mullaimana ie jofona sedataja llua rafue

(Lc 12.41-48)

⁴⁵ Jesús llote:

—Cue billena omoi raise cacaillena, jiaie rafuedo iena lloiticue. Patrón daje mullaimana ie jofona sedatate. Naie mullaima ñnogamie. Abina uiñotimie. Nainomo itinona raise ecacabide. Naie mullaimana ie jofona sedataja mei, naie patrón oni jaide. ⁴⁶ Patrón ico abido bia, ie jofona ie mullaima raise sedaia, mullaimari naimie iobillamona, ie mullaima marena iite. ⁴⁷ Iobillamona, patrón ie mullaimana nana ie raruaiana sedatataite; ⁴⁸ iadedi ie mullaima maraiñenia, ie comeciaina facaite: “Cue patrón are biñeite. Naimie lloga uaina finoñeiticue”. ⁴⁹ Ie comeciaina iese facaja jira, naimie anamo ite mullaiana faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite. ⁵⁰ Ie ocuiriñena facaise ie patrón abido billanona, naimiena duere finoite. ⁵¹ Ie isoide.

Cue abido bia, cuena inotinori iobitue; ia cuena inotinona abi caitadino dine cuena inoñedinona dotaitue. Nainomo duere sefuillano eetimaci.

25

Jesúdi diez jitaiñuaína lua rafue

¹ Jesús lloste:

—Abido cue bia, Jusiñamui ie cominina sedaite. Cue billemo ocuiritinona sedaite. Naie facaise ite cominidi diez jitaiñuaímo ite rafue isoidimaci. Naiñaiñuai lamparíniai llinuanona, ima ie aina ua meinomo finoca rafuemo jaiacadimaci. ²⁻⁴ Lamparíniai unellena, farena naiñaiñuai uilla jira, cinco diga abina uiñotimaci. Farena naiñaiñuai uiñena jira, cinco diga abina uiñoñedimaci. ⁵ Ima diga ie rafue dine jaillemo ocuiridimaci. Ima are biñena jira, inidimaci. ⁶ Daje diberuise damie ado luana cacadimaci. Lloste: “Jadi, naie imadi jai bite. Mai bi, naimie uicomo naimiemo cai dafaiñillesa”. ⁷ Casillanona, naie jitaiñuai lamparíniai unedimaci. ⁸ Abi uiñoñediñaiñuai dinena abi uiñotiñaiñuaímo jicadimaci: “Farena caímo feca. Cai lamparíniai boacaiñedes”. ⁹ Uai otimaci: “Fecacaiñedicai. Omoímo cai fecaiadedi, caímo baiñeite. Omoí jitaia, chinganomo ibajai”. ¹⁰ Naiñaiñuai ibajaila mei, naie ima ride. Naimiemo ocuiridiñaiñuai diese naimie diga nainomo guillena, rafuemo jaidimaci. Naimaci fo jailla mei, nase naie ima ibaide. ¹¹ Ie mei naie farena ibajaidiñaiñuai abido billano, raitimaci: “Nase econo”. ¹² Naie ima uai ote: “Uanaicinona omoímo lloiticue. Omoína uiñoñedicue. Econoñeiticue”. ¹³ Ie isoide. Cue billiruina omoí uiñoñena jira, nagarui cuemo omoí ocuiri.

Jesúdi patrón ie mullaiaímo ucubena fecaja lua rafue

¹⁴ Jesús lloste:

—Abido cue bia, Jesiñamui ie cominina sedaite. Naie facaise ite comini daje patrómo ite rafue isoide. Patrón jiaie enirue jaiacana jira, ie mullaiaína ie ucubena eenotade. ¹⁵ Damiemo cinco diga ucubena fecade. Jiaímiemo menacubena fecade. Jiaímiemo dacubena fecade. Nagamie ie maijille dinori fecade. Ie mei oni jaide. ¹⁶ Cinco diga ucubena feiñotimie jaillanona, iena fecallena, rana ibade. Iemona jiaie cinco diga ucubena ote. ¹⁷ Menacubena feiñotimie iena fecallena, rana ibade. Iemona jiaie menacubena ote. ¹⁸ Daucubena feiñotimie eniruemo naie ucube eenote. Iena fecallena, rana ibañede. Iemona buena oñede. ¹⁹ Digarui illanona, naie patrón abido bite. Naimaci cuentas siadollena, ie mullaiaína uaidote. ²⁰ Cinco diga ucubena feiñotimie bite. Ie ucube atiano raite: “Patrón, cinco diga ucubena cuemo fecadio. Jiaie cincona oticue”. ²¹ Patrón uai ote: “Raise marena maijidio. Eo mare mullaímadio. Janore ucube o raise sedaja jira, ona ailluena rana sedataitue. Cue diga caímare jaca iitio”. ²² Menacubena feiñotimie bite. Raite: “Patrón, cuemo menacubena fecadio. Iemona jiaie menacube oticue”. ²³ Naimie patrón uai ote: “Raise marena maijidio. Eo mare mullaímadio. Janore ucube o raise sedaja jira, ona ailluena rana sedataitue. Cue diga caímare jaca iitio”. ²⁴ Daucubena feiñotimie bite. Raite: “Patrón, o riirenana uiñoticue. O mullaiaí maijiamona ganacabidio. ²⁵ Ucubena cue faíñellena ona jaciruiticue. Ie jira eniruemo o cuemo iga ucubena eenoticue. Jadi, iena jai abido atidicue”. ²⁶ Patrón uai ote: “Maraiñedio. Rairaiedio. Cue mullaiaí maijiamona cue ucube uana uiñotio. ²⁷ Bancomo naie ucubena jonetidena, naie ucubemona jiaie ucube janore uamona, abido cue bia, iena feiñoticue”. ²⁸⁻³⁰ Ie mullaiaímo lloste: “Naimiemo naie ucubena bairo. Diez ucube illamiemo iena feca. Bie maraiñede mullaíma jitiñedinomo cuemona oni dota. Nainomo comini duere sefuillanona eetimaci”. Jusiñamui ie jitailla rafuena finodinona: “Mare” raite; iadedi ie jitailla rafuena finoñedinona duere finoite. Jusiñamui omoína duere finoñellena, cue abido billiruini omoí uiñoñena jira, Jusiñamui jitaillacinona finocana omoí jai.

Jesúdi cominina duere finolle llua rafue

³¹ Jesús llote:

—Omoína nia llofueitícue. Abido cue bia, nana cue jaienisaí díga biitícue. Illaímana íco cue bia, illaíma illa ífomo íitícue. Eo síño uaido biitícue. ³² Cue uicomo nana nairaíai ofítimací. Toíca llaudaíai sedaraíma íe chivos motomona íe llaudaíai oní fetua ísoí, naimacína fetoitícue. ³³ Cue jitaillacínona finodíno díese cue fetuanona, cue nabeimo ítataítícue. Cue jitaillacínona finoñedíno díese cue fetuanona, cue jarifebeimo ítataítícue. ³⁴ Cue illaímana jira, cue nabeimo ítinomo lloítícue: “Cue Moo omoírí íobíllanona, omoína jai caímare ítatate. Cue Moo comínina omoí illa jira, cue sedajanomo maí bí. Nainomo dúidomoí. ³⁵ Cue jitaillacínona omoí finuamona navuí aímataítícuemo, cuena ecadomoí. Jiroacadícuemo, jínuí cuemo fecadomoí. Omoí nairaí díne cue macaría, cuena omoí uíñoñoeno omoí jofomo cuena feíñoíotomoí. ³⁶ Iníroínídícuemo, íniróí cuemo fecadomoí. Dúídícuemo, cuena canollena, cuena jíbúisaíbídomoí. Cárcelmo ítícuemo, cuena canollena, cuena jíbúisaíbídomoí”. ³⁷ Cue jitaillacínona finodíno díne cuemo jícanoítímací: “Nama, ¿nírúido aímataítíomo, ona ecadícaí? ¿Nírúido jiroacadíomo, jínuí omoí fecadícaí? ³⁸ ¿Nírúido ona cíodícaí, caí jofomo ona feíñoíllena? ¿Nírúido íniróína omoí fecadícaí? ³⁹ ¿Nírúido dúídíomo, ona jíbúisaídícaí? ¿Nírúido cárcelmo ítíomo, ona jíbúisaídícaí?” ⁴⁰ Uaí oítícue: “Uanaícínona omoímo lloítícue. Cuena ínotínomona jamáí bue ísoídímíena canodomoímo, cuena jiaí canodomoí” lloítícue.

⁴¹ Temeí cue jarifebeimo ítinomo lloítícue: “Cuemona oní maí jai. Cue comíñoedomoí. Jai faífidomoí. Duere omoí sefuíllena, íraímo maí jai. Naíe íraí jaca dúíñede. Jusiñamuídí naíena Taífe íena jai finode. Jusiñamuídí Taífe comíní íena jiaí jai finode. ⁴² Cue jitaillacínona omoí finoñenamona, navuí aímataítícuemo, cuena ecañedomoí. Jiroacadícuemo, jínuí cuemo fecañedomoí. ⁴³ Omoí nairaí díne cue macaría, omoí jofomo cuena feíñoñedomoí. Iníroínídícuemo, íniróí cuemo fecañedomoí. Dúídícuemo, cuena canollena, cuena jíbúisaíbíñedomoí. Cárcelmo ítícuemo, cue canollena, cuena jíbúisaíbíñedomoí”. ⁴⁴ Cuemo jícanoítímací: “¿Nírúido aímataítíomo, ona ecañedícaí? ¿Nírúido jiroacadíomo, jínuí omoí fecañedícaí? ¿Nírúido ona cíodícaí, caí jofomo ona feíñoíllena? ¿Nírúido íniróínídíomo, omoí fecañedícaí? ¿Nírúido dúídíomo, ona jíbúisaíñedícaí? ¿Nírúido cárcelmo ítíomo, ona jíbúisaíñedícaí?” ⁴⁵ Uaí oítícue: “Uanaícínona omoímo lloítícue. Díga comíní cuena ínotímací. Naimacímona jamáí bue ísoídímíena omoí canoñena jira, cuena canoñedomoí” lloítícue. ⁴⁶ Naimací jaca ísí cacaitímací; íadedí cue jitaillacínona finodíno cue Moo sedajanomo jaca íítímací.

26

Judíuaí illaícomíní Jesúna gaitallena síadua rafue

(Mr 14.1-2; Lc 22.1-2; Jn 11.45-53)

¹ Íe llofueoícaiganona llofúía meí, naimacímoo Jesús llote:

² —Pascua raílla rafue íllena, menaruí fiebide. Íena uíñoíotomoí. Monamona jaíe cue bíllamona, íimana jaídícue. Cue fíodaíllena cue Moo cuena oretate. Illaícomíní cuena coraíllena, bíruí cuena gaitaítímací —llote. ³ Naíe facaíseconí Jusiñamuí díga nanoca ñairaínídí, jaíe illaícomíní díga, nanoca ñairaíma jofomo ofídímací Nanoca ñairaímadí Caífás. ⁴ Jesúna jífúíano gaitallena conínírí síadotímací. Naimíena meínellena jiaí síadotímací. ⁵ Raítímací:

—Pascua raílla facaíse naimíena nía gaitañeítícaí. Naíe facaíse naimíena caí gaitataía, íena gaitañenamona, comíní caí díga fúírítímací. Nía sedaítícaí.

Jesúmo ríño caímare soríde ra totaja rafue

(Mr 14.3-9; Jn 12.1-8)

⁶ Betania railla nairaimo Jesús jaillanona, Simón jofomo jaide. Simódi jaie efonaitimie. ⁷ Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide. ⁸ Jesús llofueoicaigano iena ciuanona, iciritimaci. Coniniri dani ñaitimaci:

—Naie caimare soride ra jamai dotade. Jai faifide. ⁹ Iena fecacadena, eo ailluena raifide. Naie ucube dueredonomo fecadena, caimona mare.

¹⁰ Naimaci ñaiana Jesús uñua jira, naimacimo llote:

—¿Bue ñellena naiñaiñaona jeare ñaitomoi? Mare rafuena cuemo finode. ¹¹ Omoi diga dueredino jaca itimaci; iadedi omoi diga jaca iñeiticue. ¹² Cue abimo bie caimare soride ra naiñaiño totajamona, cue fiodaillirui facaina naiñaiño iese finode. ¹³ Omoimo uanaicinona lloiticue. Ninomo cue mare finoca rafuena bu lloia, naiñaiñaona uibiñollena, nana cominimo naiñaiño finoca rafuena lloite.

*Judas micori raillamie Jesúsna gaitataiacana rafue
(Mr 14.10-11; Lc 22.3-6)*

¹⁴ Ie facaise Jesús llofueoicaiganomona Judas Iscariote micori raillamiedi Jusiñamui diga nanoca ñairaini dine jaide. ¹⁵ Naimacimo jicanote:

—Omoimo Jesúsna cue fecaia, ¿niga ucubena cuemo fecaitomoi? —jicanote. Naimaci siadua mei, treinta ucubena naimiemo fecadimaci. ¹⁶ Naie facaiseconimona Jesúsna gaitatalliruimo naimie ocuiride.

*Jesúdi ie fiodaille rafuena llua rafue
(Mr 14.12-25; Lc 22.7-23; Jn 13.21-30; 1 Co 11.23-26)*

¹⁷ Pascua railla rafue ia, siritaga rana guiñedimaci. Dani llomeniconona guitimaci. Egiptomona cai jaiagai jillobillana começillena, naie rafue ite. Naie rafue tainiaruimo ie llofueoicaigano Jesús dine billano, jicanotimaci:

—¿Ninomo pascua railla rafue ie guille finuana jitaideo?

¹⁸ Uai ote:

—Jerusalémo omoi jaillanona, omoimo cue llogamiena omoi ciuanona, naimiemo llono: “Cai llofueraima fiodaille facaise iairei ite. O jofomo ie llofueoicaigano diga pascua rafuena finoacade” llono.

¹⁹ Ie muidona ie llofueoicaiganodi ie llua finodimaci. Pascua railla rafue guille finodimaci. ²⁰ Nairui jitoma ana itemo, Jesús ie doce llofueoicaigano diga nainomo guisaide. ²¹ Naimaci mesamo guitimacimo, Jesús llote:

—Omoimona damie cuena gaitataite —llote. ²² Iena cacajanona, eo sunaitimaci. Damierie naimiemo jicanoside:

—¿Cuen ñaitio?

²³ Uai ote:

—Omoimona damie bie platomo cue diga llomenico diga mutade. ²⁴ Jusiñamui facaina lloraima cuega isoi, monamona jai billamona fiodaiticue; iadedi cuena gaitataitimie eo duere sefuite. Naimie jeiciñegadena, cuemona mare.

²⁵ Jesúsna gaitataitimiedi Judas micori. Naimie jicanote:

—Maestro, ¿ona iese finotaiticue?

Uai ote:

—Jii, iese finotaitio.

²⁶ Naimaci nia guitimacimo, llomeniconona Jesús llinuanona, Jusiñamuimo iobillacinona fecaja mei, llomeniconona tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi começina facajano, iena guiño.

²⁷ Ie mei naimie jiroracona jiai llinote. Jusiñamuimo iobillacinona llua mei, naie jiroracomo jai totaca vino naimacimo fecajano, raite:

—Biemona nana omoi jiro. ²⁸ Cue fiodaillamona, dama cue diaillamona, naimaci jeacino anamona ailluena biruimona jilloitimaci. Jusiñamuidi omoimo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. Cue llua isoi bie vinona omoi jiruamona, cue fiodaillamo omoi comeci. ²⁹ Omoina bene dane iese caimare nabaiñeiticue. Cue Moo sedajanomo omoi diga cue ia, nainomo omoina dane iese caimare marena nabaiticue. —Iena jirodimaci.

Jesúdi Pedro naimiena januana llua rafue
(Mr 14.26-31; Lc 22.31-34; Jn 13.36-38)

³⁰ Naimaci guilla mei, Jusiñamuimo iobilla ruana rotimaci. Ie mei Olivos railla anedumo jaidimaci. ³¹ Jesús naimacimo llote:

—Cuemo suille rafue muidona, ja naio cuena faionocaitomoi. Jusiñamui facaina lloraima micori iena jaie cuega: “Toica llaudaiai sedaraimana meinetaicue. Naimie toinia uaficaida jaitimaci” cuega. Naimie micori caina cuete. ³² Ero, fiodaillamona cue jillua mei, omoi uicodo Galileamo jaiticue, nainomo omoi diga dafaifillena.

³³ Pedro uai ote:

—O finolle rafue muidona nana jiaino ona faionocaia, ona jaca faionocaiñeiticue.

³⁴ Jesús dinena raite:

—Uanai omo lloiticue. Ja naio itava nia ñaiñenia, dacaiño amani cuena janoitio.

³⁵ Pedro uai ote:

—O diga cue fiodaiadedi, ona janoñeiticue.

Nana ie llofueoicaigano daje uaido jiai raitimaci.

Jesúdi Getsemanímo Jusiñamuimo jia rafue
(Mr 14.32-42; Lc 22.39-46)

³⁶ Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena, jaiticue.

³⁷ Pedrona uite. Zebedeo ie jito iaiaiaia jiai uite. Naimie sunaicaide. Ie comeci uri iñede. ³⁸ Naimacimo llote:

—Cue comeci sunaicaide. Niadi fiodaiticue. Benomo fiebi; ia nia iniñeno cue facaina omoi jii.

³⁹ Naimie janore bai jaillanona, eniruemo bitadate. Jüde:

—Ore Moo, o jitaia, cuena duere finoñeno; iadedi cue comeci jitaillacinona finoñeno. Cuemo o jitaillacino fino —jüde. ⁴⁰ Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—¿Ñiese raire inidio? daje hora nia iñedemo. ⁴¹ Iniñeno. Taife ramo omoina fai raillano, iena omoi inoñellena, Jusiñamuimo jii. Omoi comeci mare rafuena finoacade; iadedi omoi comeci daní ocuiñoñede. Ie muidona Jusiñamuimo jii, omoina naimie ocuiñotallena —llote. ⁴² Ie mei dane jüllena jaide. Raite:

—Ore Moo, o jitaia, cue duere sefuillamona cuena jillota. Cue fiodaillana o jitaia, o jitailla rafuena finoiticue.

⁴³ Ie llofueoicaigano dine dane billanona, naimaci uisi llirioilla jira, naimaci inisitemo ride. ⁴⁴ Abido jaillanona dane jüde. Ailli daje isoidiuidio jüde. ⁴⁵ Ie mei ie llofueoicaiganomo dane billanona, llote:

—Nia inidomoi. Jafaici nia otomoi. Monamona jaie billanona, imana jaidicue; ia ja fiodaiticue. Cuena ja gaitajanona, Jusiñamui jitailla jira, naimiena inoñedino anamo ja iticue. ⁴⁶ A naidacai. Maiña. Cue gaitaitimie jai bite.

Jesúna gaitalle rafue
(Mr 14.43-50; Lc 22.47-53; Jn 18.2-11)

⁴⁷ Jesús nia ñaitemo, ieconi Judas micorí bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Butaralluna jiai atidimaci. Jusiñamui diga nanoca ñairainimona bitimaci. Einamaci dinena jiai bitimaci. ⁴⁸ Jesús dine naimaci nia riñenia, Judas micorí naimie diga bitinomo jai llote:

—Jesúna omoi uiñollena, naimiena llibanoiticue. Ie mei naimiena gaita —llote. ⁴⁹ Jesús dine naimaci rillanona, Judas micorí Jesús dine raire jaide. Naimiena uaidote:

—Maestro, jai biticue. —Ieconi naimiena llibanote. ⁵⁰ Jesús dinena raite:

—¿Bue ñiaibitio?

Ie mei Judas micorí diga bitinodi Jesúna gaitadimaci. ⁵¹ Iena ciuanona, Jesús diga itinomona damie ie lloebi llinuanona, Jusiñamui diga nanoca ñairaíma ie mullaíma jefona jaíbonote. ⁵² Jesús naimiemo llote:

—O fuiriacania, o jiai fiódaitio. O lloebi dane eeno. Cue riiduanona, fuiriñeno. ⁵³ Cuenariidollena, cue Moomo cue jicaia, eo ailluena jaienisai cue dine naimie oretaite; ⁵⁴ iadedi iese cuena riidoia, Jusiñamui facaina lloraini micoríai ciegafuíaí suiñeite. Cue fiódaille rafuena cuetimaci —llote. ⁵⁵ Ieconi naimie dine bitinomo Jesús llote:

—Omoi butaralluna uitomoi. Omoi lloebi diga jiai bitomoi. Fíriraímadicuenta cuena omoi gaitajaíbilla. Jusiñamui jofomo nagarui llofuecabiticue; iadedi cuena gaitañedomoi. ⁵⁶ Nana bie rafue suide, Jusiñamui facaina lloraini micoríai ciegafuíaí suillena —llote. Ie facaise nana naimie llofueoicaigano naimiena faínonocaillano, aisidimaci.

Jesúdi judíuai illaicomini dine illa rafue

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesúna gaitadinodi Caifás jofomo Jesúna uitimaci. Caifás Jusiñamui diga nanoca ñairaíma. Naimie jofomo jiaie illaicomini jai ofidimaci. Moisés micorí llogacinona llofueraíni ofidimaci. Einamaci jiai ofidimaci. ⁵⁸ Jesús jinafona Pedro aarena jaide. Caifás jofo nairaíbiriimo jaide. Naie rafue fuiduana naimie uiñollena, nainomo ite jofomo maijiraini diga raide.

⁵⁹ Naimiena meinellena, nana naie illaicomini Jesúmo nicino illana uiñoiacadimaci. ⁶⁰ Iena coniniri siadotimaci; iadedi naimiemo jaca nie isoide marañede rafue illana uiñoñedimaci. Diga comini Jesúna ñaitimaci; iadedi taino llotimaci. Ie mei menamie bitiaímaiaí. ⁶¹ Raitiaímaiaí:

—Bimie llote: “Jusiñamui jofona judaíredicue. Judaíaí mei, darui amani illanona, iena dane finoredicue” —lloitiaímaiaí.

⁶² Jusiñamui diga nanoca ñairaíma Jesúmo jicanote:

—¿Niese iaímaiaí uai oitio? ¿Nie isoide rafue ona llogidotiaímaiaí?

⁶³ Jesús uai oñede. Naie ñairaíma dinena llote:

—Cai Jusiñamui cajede. Naimie caína uiñua jira, uanaicinona cai lloñenia, caína duere finoite. Uanaicinona caímo llono. “¿Odi Cristodio?” omo jicanoticue. “¿Odi Jusiñamui Jitodio?” omo jicanoticue.

⁶⁴ Jesús dinena uai ote:

—Jii, naimiedicue. Iena raise llotio. Monamona jaie cue billamona, imana jaidicue;; iadedi ico jairuido illaímana cue illena, Jusiñamui ecimo cue raillana omoi nairaí cioitimaci. Mona uillie motodo cue abido billena jiai cioitimaci.

⁶⁵ Iena cacajanona, naimiemona Jusiñamuina Jesús jeare ñaía jira, naie nanoca ñairaíma dama ie iniroina cuaranote. Raite:

—Naimiedi Jusiñamuina jeare ñaite. Jiaie naimiena llogidotinona jai jitaíñedicaí. Ie ñaíamona dama naimie abina llogidote. ⁶⁶ ¿Niese naimiena raitomoi?

Jiai illaicomini dinena uai otimaci:

—Naimie fiódaillesa.

⁶⁷ Ie mei naimie uiecona tuallaitimaci. Naimiena ducoídimaci. Jiai bucoídimaci.

⁶⁸ Raitimaci:

—O Cristodiodena, ¿bu o bucoia? caimo llono.
Jesús uai oñede.

Pedrodí Jesúna janua rafue

(Mr 14.66-72; Lc 22.56-62; Jn 18.15-18, 25-27)

⁶⁹ Naie facaise Pedro naie jofo nairaibirimo ite. Naie jofo nama mullaiño naimie dine billanona raite:

—Galileamona Jesús bite. Odi ie cominidio. Naimie diga jaicabidio —raite. ⁷⁰ Nana nainomo itinomo Pedro llote:

—O lluana uiñoñedicue.

⁷¹ Nase fuemo Pedro jaidemo, naimiena jiaie mullaiño ciuanona, nainomo itinomo llote:

—Bimiedi Nazaret ie Jesús comini imie.

⁷² Pedro uai ote:

—Uanaicinona cue lluana Jusiñamuidi uiñote. O llogamienna uiñoñedicue.

⁷³ Dallu illanona, nainomo itino Pedro dine billano, naimiemo llotimaci:

—Ua Jesús comini imiedio, o uai bairia jira. Naimie isoi ñaitio.

⁷⁴ Uai ote:

—Uanai cue lloñenia, Jusiñamui cuena duere finoite. Uanaicinona cue lluana naimie uiñote. Ero, Jesúna uiñoñedicue. —Ieconí iitava ñaite. ⁷⁵ Iena cacajano, Pedro Jesús lluana uibiñote. Jaive Jesús Pedromo llote: “Itava nia ñaiñenia, dacaiño amani cuena janoitio” llote. Iena uibiñuanona, Pedro jino jaillano, sure eede.

27

Pilato dine Jesús illa rafue

(Mr 15.1; Lc 23.1-2; Jn 18.28-32)

¹ Monaidemo, nana Jusiñamui diga nanoca ñairainidi, nana einamací diga, Jesúna siadotimaci. Naimiena meinellena siadotimaci. ² Siadua mei, Jesúna maianona, Poncio Pilatomo uitimaci. Romanuai railla nairai anamo naimaci illa jira, Pilatodí naimaci gobernador.

Judas micorí fiodailla rafue

³ Judas micorí Jesúna jai gaitatate. Naie illaicomini Jesúna meiniana lluana naimie micoridí uiñuamona, ie comeci iuaina meidote. Illaicominimo ie treinta diga ucubena abido atide. ⁴ Raite:

—Jesús marañede rafuena jaca finoñede. Naimie fiodaiñeite. Naimiena cue gaitatajamona, marañedicinona jai finodicue.

Uai otimaci:

—¿Bue ñe caimo lluaibitio? O rafue caimo duiñede.

⁵ Ie mei Judas micorí Jusiñamui jofo jeraimo naie ucubena fo jamai faite. Jino jailanona, oni jaide. Dama naimie abina meinellena, cimaio llirinote raona. ⁶⁻⁷ Jusiñamui diga nanoca ñairaini naie ucubena iraiá mei, iena siadotimaci. Coniniri raitimaci:

—Naie isoide ucube nainomo joniana Moisés micorí jaie rairuilla jira, Jusiñamui jofomo ite ucube ocabiranomo jonenidicai. Naie ucube diga damie meinellena ibadicai.

—Ie jira naie ucube diga eniruena ibadimaci. Naie illanodí jiñora ouilla enirue. Jiaie nairaímona bu bia, naimie fiodaia, naie eniruemo naimiena raillena, iena ibadimaci.

⁸ Naie ucube muidona damie fiodailla jira, birui naie enirue mamecidí dirue ie enirue.

⁹ Iemona Jeremías micorí jaie cuega rafue jai suide. Naimie micoridí Jusiñamui facaina lloraima. Naimie micorí cuega: “Cai Israel railla cominimona damierie railla jira, naimiena meinellena, treinta ucubena fecaitimaci. ¹⁰ Naie ucube diga jiñora ocabilla eniruena ibaitimaci, cai Nama Jusiñamui llua isoi” cuega.

Pilato dñe Jesús illa rafue
(Mr 15.2-5; Lc 23.3-5; Jn 18.33-38)

¹¹ Pilato railla gobernador uicomo Jesúsna atia mei, Pilato Jesúsno jicanote:

—¿Judíuai comini illaimadio?

Jesús uai ote:

—Jii. Raise llotio.

¹² Ie mei Jusiñamui diga nanoca ñairainidi, einamací diga, naimiena llogídote; iadedi naimie dinena uai oñede. Ie abina riidoñede. ¹³ Ie muidona Pilato naimiemo llote:

—Diga rafuena ona llogídotimaci. ¿Ñiese uai oñedio?

¹⁴ Jesús nia uai oñede. Ie jira Pilato uainicaide.

Pilatodi Jesús fiodaillana llua rafue
(Mr 15.6-20; Lc 23.13-25; Jn 18.38-19.16)

¹⁵ Naga año pascua railla rafue facaiseconi cárcelmo itinomona Pilatodi comini jicacamiena jamai jino orede. ¹⁶ Bie año cárcelmo Barrabás raillamie ite. Naimie mameci eo are soride. ¹⁷ Naie rafue illa jira, ailluena comini naimie dñe ofillano, naimacimo Pilato jicanote:

—Bie año cárcelmona, ¿bumie jino cue oretajana jitaídomoi? Barrabás raillamie ite. Jesús raillamie jiai ite. Naimiedi Cristona jiai mameciredede.

¹⁸ Iese jicanote; iadedi naimiedi Jusiñamui diga nanoca ñairaini Jesúsni uradoillana uiñote. Naimaci Jesúsna meineiacanana jiai uiñote. ¹⁹ Ie maijiracomo naimie nia illanona, naie facaise Pilato ai naimie dñe rabe orede. Cuete: “Bimiedi marañede rafuena jaca finoñede. Naimiena duere finoñeno. Jaive naio cue nicairillano, naimie muidona cue comeci jarire ite”. ²⁰ Ailluena comini Pilato dñe ofillanona, Jusiñamui diga nanoca ñairainidi, einamací diga, cominimo llotimaci:

—Pilato caimo jicanoia, Barrabás jino oretallena jica. Jesús meinellena jica — llotimaci. ²¹ Comini ofilla mei, naimacimo Pilato dane jicanote:

—¿Ñimie cue jino oretajana jitaídomoi?

Uai otimaci:

—Barrabás.

²² Pilato dinena jicanote:

—¿Ñiese Jesúsna cue finuana jitaídomoi? Naimiedi Cristona jiai mameciredede.

Nana uai otimaci:

—Naimiena cruzmo corai.

²³ Pilato dane jicanote:

—¿Ñie isoide marañede rafuena finode?

Naimaci dinena ado ibi llonoidimaci:

—Naimiena corai.

²⁴ Jesúsna jino oretajana jitaíñedimaci. Iena Pilato uiñuamona, comini jai uri iñenana naimie ciuanona, jinui diga ie onollina jocuanona raite:

—Bimie fiodaillana cue muidonañede. Bie rafue cuemo jai duiñede. Naimie fiodaite omoi muidona.

²⁵ Uai otimaci:

—Dama iesede. Naimie fiodaite cai muidona. Jiai cai uruiai muidona.

²⁶ Ie mei Pilatodi Barrabás naimaci jitailla jira, jino orede; iadedi Jesúsna sechedotajanona, naimiena coraillena orede. ²⁷ Dajerie soldaduaídi Pilato jofomo Jesúsna uite. Nana soldaduai nainomo ofidimaci. ²⁸ Naimie iniroi duiñuano, naimiemo jiduirede iniroina jítadimaci. ²⁹ Eecuaímona niga nuiciraina naimie ifogimo jítadimaci. Ie nabeillimo radosina jonete, illaimana naimie illa isoi. Caiñici ifodo raidimaci, illaimana naimie illa isoi. Raitimaci:

—Jadi, judíuai illaima. —Iese raillanona naimiena jifanododimaci. ³⁰ Naimiena tuallaítimaci. Naimie onollimo ite radosina naimaci llinocaida, naiedo naimie

ifogina buta-butadimaci. ³¹ Jesúsna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jítadimaci. Ie mei naimiena coraillena oni uitimaci.

Jesúna coraia rafue

(Mr 15.21-32; Lc 23.26-43; Jn 19.17-27)

³² Jerusalémona naimaci jaillanona, Cirene railla eniruemona bitimiemo dafafidimaci. Naimie mameci Simón. Naimiena Jesús uiga cruzna rocatatimaci. ³³ Gólgota raillanomo jaidimaci. Ifocoraia eruailla jira, iese mameciredede. ³⁴ Nainomorillanona, ie abi isirena cacaiñellena, vinomo eriredede rana faianona, naimiemo fecadimaci; iadedi iena naimie facajano, iena jiroñede. ³⁵ Naimie coraia mei, cruzna naidania mei, naie soldaduai naimie iniroi dani coninimo fecasite. Naie iniroi bu uille raillanona uiñollena, jifanododimaci. ³⁶ Ie mei ana raidimaci, naimiemo eruaillena. ³⁷ Naimie ifogi afebeimo ie llogiduafuena jonetimaci. Iese cuega: “Bimiedi Jesús. Judíuai comini illaíma”. ³⁸ Ie mei mena firiruide iaímaiaia coraidimaci. Damie Jesús nabeimo coraica. Jiaimie Jesús jarifebeimo coraica. ³⁹ Naisodo jamai jaidino Jesúsna mameritimaci. Mamerillamona, ifogiaia jaididimaci. ⁴⁰ Raitimaci:

—Navui raisoidio: “Jusiñamui jofona judaiticue. Darui amani illanona, iena dane finoiticue” raisoidio. Ie muidona dama o abina mai jilloita. Jusiñamui Jitodiodena, cruzmona ana bi.

⁴¹ Ie facaise Jusiñamui diga nanoca ñairaini naimiena mameritimaci. Moisés micori llogacino llofueraíni naimiena jiaí mameritimaci. Einamací naimiena jiaí mameritimaci. Raitimaci:

⁴²—Jiaie cominina jillotate; iadedi dama naimie abina jilloitanide. Naimiedi cai judíuai comini illaíma raillamiedena, cruzmona naimie ana niade billasa. Ie mei naimiena inoíticai. ⁴³ “Jusiñamui Jitodicue” naimie railla jira, naimiedi Jusiñamuina ja inotena, Jusiñamui jitaia, Jusiñamui naimiena jillotaite. —Iese naimiena mameritimaci. ⁴⁴ Naimie diga coraica iaímaiaí daje isoi naimiena mameritiaímaiaí.

Jesús fiodailla rafue

(Mr 15.33-41; Lc 23.44-49; Jn 19.28-30; Heb 9)

⁴⁵ Jitoma naidai itemona, daje amani horas mona jitibicaide. ⁴⁶ Ie meinomo judíuai railla uaido Jesús ado jidaioide:

—Elí, Elí, ¿lama, sabactani? —jidaioide. Iena oni dobaiñuamona raite: “Cue Jusiñamui, cue Jusiñamui, ¿bue ñellena cuena faínonocaidio?” raite.

⁴⁷ Iena cacajano, nainomo jamai itinomona damierie raitimaci:

—Naimie jaie Jusiñamui facaina lloaíma Elíana uaidote —raitimaci. ⁴⁸ Naimacimona damie jarire jaillanona, fibecode ramo vinona faite. Radosimo jillillano jirollena, naimiemo a fecade. ⁴⁹ Ieconí jiaíno raitimaci:

—Ína nai. Dallu seda. Elías naimiena jilloitajaíbillena sedaiticai.

⁵⁰ Ieconí Jesús dane ado cuirioita, fodaite.

⁵¹ Naie facaise Jusiñamui jofomo ie fetaca iniroife ana anaba jillacimo motodo menafe cuararide. Ieconí ñuisaño suide. Iemona nofie oni bojode. ⁵² Diga raíafuai econote. Jesús jillua mei, raíafomona, fiodaillamona, ailluena Jusiñamuina inotinodi jillodimaci. ⁵³ Ie mei Jerusalémo naimaci jaillanona, diga comini naimacina ciodimaci. ⁵⁴ Nainomo ite capitán, ie soldaduai diga, Jesús fiodaillana eruaídímaci. Ñuisaño ñuillana cacadimaci. Nana suide rafuena cianona, eo jacinaillamona, naimie raite:

—Uanai bimiedi Jusiñamui Jito.

⁵⁵ Ailluena riñoniaí naie rafuena aarena ciodimaci. Naimiena canollena, Galileamona Jesús diga navui bitimaci. ⁵⁶ Naimaci motomo María Magdalena ite. Jiaie María jiaí ite. Naiñaíñodi Jacobo ei. Naiñaíño jiaí José ei. Zebedeo uruaí ei jiaí ite.

*Jesús raiafomo jonia rafue**(Mr 15.42-47; Lc 23.50-56; Jn 19.38-42)*

⁵⁷ Jitoma ana itemo, eo ucuberedimie Pilato dine jaide. Naimiedi Arimatea nairai imie. Naimie mameci José. Jesús dibeimo jaidimie. ⁵⁸ Jesús abina jicallena, Pilato dine jaide. Pilato “Jee” raillanona, Jesús abina naimie ollena lote. ⁵⁹ Ie mei Jesús abina cruzmona ana José uanona, jeanide mare userede iniroi diga naimie abina ferinote. ⁶⁰ Nofici ie raiafomo jonete. Naie raiafo dama José jaie finoca, naimie iena. Jesús abi nainomo jonia mei, José naifomo noficina ñuitade. Naifo ibaide. Ie mei oni jaide. ⁶¹ María Magdalena raiafo uico dine jiaie María diga rainadatiiañuai.

Soldaduai Jesús raiafo sedaja rafue

⁶² Ie areruido, pascua railla rafue illarui, dajerie judíuai illaicomini Pilato dine jaidimaci. ⁶³ Raitimaci:

—Ero, naie abi caitadimie nia fiodañenia, navui lote: “Cue fiodaillamona, darui amani illanona, jilloiticue”. ⁶⁴ Ie jira o uai oreta, darui amani raifi naie raiafo raise ibaillena, naimie llofueoicaigano nainomo jaillanona, naimie abi ari oi raillano. Naimie abina naimaci fianona lloitimaci: “Naimie jai jillode”. Iese suia, cominina eo jifueitimaci.

⁶⁵ Pilato uai ote:

—Soldaduai omoïdo oreiticue, naie raiafo raise sedallena.

⁶⁶ Ie jira jaidimaci. Raona nitajano, raiafo raise ibaidimaci. Naiena sedallena, soldaduaïna nainomo faïnonocaidimaci.

28*Jesús fiodaillamona jillua rafue**(Mr 16.1-8; Lc 24.1-12; Jn 20.1-10)*

¹ Sábado fuilla mei, monaiacania, María Magdalena, jiaie María diga, raiafona jibuisaidiañuai. ² Ieconï ñuisaño suide. Monamona billanona, Jusiñamui jaienici raiafomo ibaica noficina oni ñuitade. Naie noficimo raide. ³ Eo queniredena eruaide. Naimie iniroi eo userede. ⁴ Nainomo ite soldaduai naimiena eo jacinaillamona, abi docaidimaci. Iemona fiodaitino isoi dallu itimaci. ⁵ Ie facaise naie jaienici di dinena naie riño iañuai mo lote:

—Jaciruiño. Coraica Jesúna omuiño jenuana uiñoticue. ⁶ Naimie bene iñede. Naimie llua isoi, fiodaillamona naimie jai jillode. Naimie ifo jeraimo billano mai jibuisaibi. ⁷ Ie mei ie llofueoicaigano dine raire omuiño jai. Fiodaillamona naimie jilluana naimacimo llono. “Galileamo omoi uicomo naimie jaite” llono. Bie rafue omuiño jai lloticue —lote. ⁸ Ie jira raiafomona rajicaillanona, eo iobillanona, raire jaidiañuai. Ie llofueoicaigano dine aisidiañuai. ⁹ Ie llofueoicaigano dine iañuai nia riñenia, Jesús iañuai mo dafaiñillano, raite:

—Itomuiño. —Naimie dine iañuai rillanona, naimiena sedallena, naimie eillina llinotiañuai. ¹⁰ Jesús dinena raite:

—Jaciruiño. Cue llofueoicaiganomo llono: “Galileamo jai. Nainomo omoïna cioiticue” llono.

Soldaduai raiafona sedademo suide rafue

¹¹ Jaidiañuai mo, nainomo ite soldaduaïmona dajerie Jerusalémo jaide, nanoca Jusiñamui diga ñairainimo nana naimacimo suide rafue lollena. ¹² Iena cacajano, einamaci diga iena siadotimaci. Ie mei naie soldaduaïmo ucubena fecadimaci. ¹³ Raitimaci:

—Jiaie cominimo llono: “Cai ñia mei, ie llofueoicaigano ie abina fiano uitimaci” llono. ¹⁴ Iena cai gobernador fidia, naimie diga ñaiticai, omoïna naimie duere finoñellena —raitimaci. ¹⁵ Ie jira naie ucubena feiñuanona, cominimo illaicomini llua isoi lloitimaci. Naie rafue uiñocana jaide. Birui nia iena uiñocana jaide.

*Jesús ie llofueoicaiganomo iracaiño lloga rafue
(Mr 16.14-18; Lc 24.36-49; Jn 20.19-23)*

¹⁶ Ie mei Galileamo naie once llofueoicaigano jaidimaci. Jesús lloga anedumo jaidimaci. ¹⁷ Naimiena naimaci cianona, naimiena sedadimaci; iadedi dajerie Jesús jilluana raise nia inoñedimaci. ¹⁸ Jesús dinena raite:

—Cue Moo cue uai cuemo iga, monamo cue jitailla rafue cue finollena, eniruemo cue jitailla rafue cue finollena. ¹⁹ Ie jira naga nairaimo jai, cue dibeimo naie cominina itatallena. Cue dibeimo naimaci jailla mei, cue Moo dibeimo naimacina illamona, naimaci cue dibeimo illamona, ie Joreño anamo naimaci illamona, naimacina bautiza. ²⁰ Nana omoimo cue lloga rafuena naimaci iena inollena, llofue. Nia abido cue biñenia, omoina canollena, omoi diga cue Joreño jaca iite —llote. Mai. Macaibaite. Mateodicue.

MARCOS JESUCRISTO ENIRUEMO ILLA RAFUE CUIAFUE

*Jofue iñenanomo Juan Bautista micori illa rafue
(Mt 3.1-12; Lc 3.1-9, 15-17; Jn 1.19-28)*

¹⁻² Jesucristo rafuena omoimo lloiacadicue. Naimiedi Jusiñamui Jito. Naimie rafue mare. Isaías micori Jusiñamui facaina jaie llumona, Juan Bautista micori llofuellena llote. Iena suillamona, Jesucristo eniruemo ite rafue tainede. Iena nano lloiacadicue. Isaías micori cuete:

“Ero, o uicodo cue rafuena lollena, damiena oretaiticue” Jusiñamui raite.

³ Jofue iñenanomo damie jidai-jidaillana cacadicue.

Naimie llote: “Cai Nama biite. Naimie naiso atona raise fino” llote.

Naisona llote; iadedi naimie uaina naimaci feiñollena, naimaci comeciai marena finuana ñaite.

⁴ Isaías micori llua isoi, Juan Bautista raillamie micoridi Jusiñamui rafuena jofue iñenanomo llofuecana jaide. Cominina dafafia, naimacimo llote:

—Omoi jeacinona fañonocaida, Jusiñamui dibeimo omoi comeciai iuailai meido. Iemona omoi jeacinona feitaite. Omoi comeciai iuailai omoi meidoia, cominina iena uiñotallena, mai omoi bautizallomoi.

⁵ Diga comini naimie micori dine jai jaisoidimaci. Jerusalémona, nana Judeamona, nana Jordán fuemona jai jaisoidimaci. Jusiñamuimo naimaci jeacinona naimaci llua meino, naimacidi Juan micori bautizaga.

⁶ Juan micoridi camello itiraiai ie nilla iniroina jitade. Igoi iena ie moilligaina jitade. Fioduaina rite. Ciifona mete. Jamai rana guite. ⁷ Cominimo llote:

—Cue baifemo faitimie bie facaise biite. Jamai bue cue isoilla jira, naimiena cue canuana uiñoñedicue. ⁸ Jusiñamui dibeimo omoi illamona, jinui diga omoina bautizadicue; ia naimie bia, naimie dibeimo omoi jaillamona, Jusiñamui Joreña omoimo itataite.

*Jesús bautizaja rafue
(Mt 3.13-17; Lc 3.21-22)*

⁹ Jordán dine Juan micori nia ia, Galileamona, Nazaretmona naimie dine Jesús bite. Nainomo Jesúdi Juan bautizaga. ¹⁰ Bautizaja mei, jinui mona billanona, ieconi mona bojodena ciode. Jusiñamui Joreño, ucugi isoi, naimie emodomo ana billana ciode.

¹¹ Monamona Jusiñamui llote:

—Cue isiruiga jitodio. Ori iobidicue.

*Jesúna Taife ramo faia rafue
(Mt 4.1-11; Lc 4.1-13)*

¹² Jesús bautizaja mei, Jusiñamui Joreño jofue iñenanomo naimiena uite. ¹³ Comini nainomo iñede. Difai ocainaijai itimaci. Nainomo cuarenta digarui ite. Ie facaise Taife naimiena ramo faite; ia Jusiñamui jaienisai naimiena sedadimaci.

*Galileamo Jesús illa rafue
(Mt 4.12-17; Lc 4.14-15)*

¹⁴ Naie facaise Juan Bautista micorina Herodes gaitaja mei, Galilea railla eniruemo Jesús jaide. Jusiñamui ie mare rafuena llocana jaide. ¹⁵ Llote:

—Jusiñamui birui omoina sedaacade. Ie cominina omoi jaillena birui jitaide. Jusiñamui dibeimo illena, omoi jeacinona fañonocaida, omoi comeciai iuaina meido. Bie rafuena mai omoi ñno.

*Ie llofueoicaigano jaillena, Jesúsdi nagaamagamiēna fetua rafue
(Mt 4.18-22; Lc 5.1-11)*

¹⁶ Jiairuido Galilea railla jorai fuemo Jesús macaritemo, menamiēna ciode. Naga ie ama iaīmaiaī. Damie Simón. Jiaīmie Andrés. Lloijina fairaīma iaīmaiaī. Iese jaca naie iaīmaiaīdi maijuidīiaīmaiaī. ¹⁷ Iaīmaiaīmo llote:

—Cue diga omico jaiōicaillena, cue diga mai bi. Cue llofueganona omico jaillena jitaīdicue. Lliciaīna birui ocabitomico; iadedi comīnina oitomico, cue dibeīmo naimaci illena.

¹⁸ Iena cacajanona, ieconi iaīmaiaī lloijina faīnonocaida, naimie diga jaidīiaīmaiaī. Ie llofueganona jaillena, jaidīiaīmaiaī. ¹⁹ Lliaī bai Jesús jaidemo, jiaīe menamiēna ciode. Naga ie ama iaīmaiaī. Damie Jacobo. Jiaīmie Juan. Iaīmaiaī moodi Zebedeo. Botemo iaīmaiaī lloijina sigaidīiaīmaiaī. ²⁰ Jesús iaīmaiaīna uaidote, ie llofueganona jaillena. Ie maijiraīni diga iaīmaiaī moona faīnonocaida, botemona ari billanona, Jesús diga jaidīiaīmaiaī.

*Jesúsdi Janaba anamo itīmie jillotaja rafue
(Lc 4.31-37)*

²¹ Bai jaillanona, Capernaumo ie llofuegano diga Jesús ride. Nainomo naimie ia, sábadoruimo judīuaī ofiracomo jaide. Nainomo llofue. ²² Moisés micorī llogacino llofueraīni isoi llofueñede. Illaīma uai isoi naimie llofuia jira, nainomo ite comīni naimie llofuīamona raījicaīdimaci. ²³ Janaba anamo illamie nainomo ite. ²⁴ Jesús llofuiana cacaita, Janabadi īmana ado cuirioitate:

—Odi Nazaret ie Jesús. ¿Bue ñeacadīo cai diga? Caina duere finuaībidīo. Ona uiñoticue. Odi Jusiñamui ie mare fetocamiedīo.

²⁵ Jesús naimiēna lletade:

—Llicai. Naimiēmona oni jai.

²⁶ Janaba naimiēna docaitajanona, ado cuirioillanona, naimiēmona oni jaide. ²⁷ Iena ciuanona, nana nainomo itino raījicaīdimaci. Coniniri siadotimaci:

—¿Ñiese ite? Bimie jiaīe uaido llofue. Janabamo naimie llua mei, īmamona Janaba oni jaide. Janaba Jesús uaina īnote.

²⁸ Iemona nana Galilea enīruemo Jesús mameci are soride.

*Jesús Pedro jīfaiñona jillotaja rafue
(Mt 8.14-15; Lc 4.38-39)*

²⁹ Ofiracomona Jesús jaillanona, ie llofuegano diga, Simón jofomo jaide. Andrés nainomo jiaī jainaīaide. Jacobo, Juan diga jiaī fo jaide. ³⁰ Ie facaise Simón jīfaiño duide. Abi cuaride. Nainomo itino Jesúmo naiñaiño duillana llote. ³¹ Iena cacajanona, naiñaiño dīne jaillanona, Jesús naiñaiño onollina llinote. Naiñaiñona naidacaitade. Ieconi abi cuarilla faīnonocaide. Guille finuanona, ie jofomo itinona ecade.

*Jesúsdi ailluena duidinona jillotaja rafue
(Mt 8.16-17; Lc 4.40-41)*

³² Navuida, jītibicaīdemo, Jesús dīne comīni ailluena duidinona atīdimaci. Janaba anamo itinona jiaī atīdimaci. ³³ Nana Capernaum comīni naie jofo nasemo ofīdimaci.

³⁴ Jesúsdi diga duiconona ailluena duidinona jillotate. Ailluena comīni Janaba anamona jillotate. Naimiēna jananiaī uiñua jira, Jesús naimaci ñaīana rairuide.

*Galileamo Jesús llofuia rafue
(Lc 4.42-44)*

³⁵ Ie areruido nia monaiñenia, Jesús casillanona, Capernaumona comīni īñenanomo Jesús jaide. Nainomo Jusiñamuimo jīde. ³⁶ Monaia, casīdemo, jofomo Jesús īñena jira, Simón, ie nabaiñiaī diga, Jesúsna jenuaide. ³⁷ Baillanona, raite:

—Nana comīni ona jenodimaci.

³⁸ Jesús uai ote:

—Jiaie nairaii dine mai cai jailli. Nainomo llofueiacadicue. Ie jira Capernaumona jino biticue.

³⁹ Nana Galileamo Jesús jaide. Judíuai ofiracuaimo llofuecana jaide. Ailluena cominimona jananiaina oni oretate.

Jesúdi efonaitimiena jillotaja rafue

(Mt 8.1-4; Lc 5.12-16)

⁴⁰ Ie facaise efonaitimie Jesús dine billanona, naimiena raise uaiduamona, caiñici ifodo ana rainadate. Raite:

—O jitaiededi, cuena jillotaredio.

⁴¹ Naimiena duenaillamona, Jesús ie onolli naimiemo oni ñuitajanona, naimiena jetade. Raite:

—Ona jillotaiacadie. Mai o jillo. ⁴² —Ieconí naimie jillode. ⁴³ Ie facaise Jesús naimiena oretaiacanano, naimiemo riire lloste:

⁴⁴ —O jilluana bumo lloño; iadedi Jerusalémo Jusiñamui jofomo Jusiñamui diga ñairaima dine mai jai. O jilluana comini raise uiñollena, naimiemo o abina acatajai. Moisés micorí jaie lloga rana Jusiñamuimo fecá.

⁴⁵ Iese Jesús naimiemo lloste; iadedi Jesús finoca rafue llocana eo uite. Ie muidona ailluena comini Jesúsna cioacana jira, Jesús marefodo comini illanomo jaisoiñede; ia comini iñenanomo jaisoide. Iese jaisoide; ia naganomona naimie dine biñoidimaci.

2

Jesús tisitaitimiena jillotaja rafue

(Mt 9.1-8; Lc 5.17-26)

¹ Nigarui illanona, Capernaumo Jesús dane abido ride. Comini iena fidianona, ² ie risoillacomo naimie dine ofidimaci. Ailluena billa jira, fo illino iñede. Nasemo jiai eo ofidimaci. Jesús naimacimo Jusiñamui rafuena llofujete. ³ Cominina Jesús llofuetemo, naimie dine nagaamagamie ie biramo biide tisitaitimiena atidimaci. ⁴ Ailluena comini illa jira, Jesús dine naimaci rinidimaci. Naie jofo bibanilla jira, jofo emodomo a jaidimaci. Jofo beicimo ite tidabacuideo a jaidimaci. Jofo emodo econuano, Jesús ecimo naimiena ie biramo biide diga, rao diga, ana ñuitadimaci. ⁵ Iena Jesús ciuanona, tisitaitimie jilluana naimaci iinuana Jesús uiñote. Tisitaitimie lloste:

—Nabai, o jeacino cue feitaja jira, iena jai oni dotadicue. Ie facai ibana jai oñeiticue.

⁶ Nainomo itinomona damerie Moisés micorí llogacinona llofueraini nainomo raidimaci. Comecina facadimaci: ⁷ “¿Ñiese bimiedi iese lloste? Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”. ⁸ Naimaci comeciai facajacinona Jesús uiñuanona, naimacimo jicanote:

—¿Bue ñellena omoi comeciaina iese facadomoi? ⁹ Bimiemo: “O jeacinona jai oni dotadicue” cue lloia, cue uai siñonana uiñoñeitomoi; ia bimiemo: “Mai naidacaillanona, o bira ferinocaida, mai macari” cue lloia, cue uai siñonana uiñoitomoi. ¹⁰ Monamona jaie cue billanona, imana jaidicue. Ie jira jeacino oni dotaja uai cuemo ite. Iena omoi uiñollena, tisitaitimie lloiticue: ¹¹ “Mai naidacai. O bira ferianona, o jofomo mai jai”.

¹² Iese naimie raillamona, tisitaitimie jillode. Naidacaida, ie bira feria mei, naimacimona jino jaide. Nana nainomo itino rajicaidimaci. Iemona Jusiñamuimo iobillacinona fecadimaci. Raitimaci:

—Bie isoide siño comena jaca cioñedicai.

Jesúdi Levína fetua rafue

(Mt 9.9-13; Lc 5.27-32)

¹³ Jiaruido jorai fuemo Jesús dane jaide. Ailluena comini naimie dine ofillanona, naimacina llofujete. ¹⁴ Llofuia mei, Jesús bai macaritemo, Leví raillamiena ciode. Levídi

Alfeo jito. Gobierno ucube ouillanomo naimie maijuiude. Nainomo raidena Levína cide. Naimiemo llote:

—Cue llofuegamiena o jaillena, cue diga bi. —Naidacaida, Jesús diga jaide.

¹⁵ Ie mei Leví jofomo Jesús ie llofueoicaigano diga guisaide. Naie facaise ailluena comini naimie diga jaisoidimaci. Naimacimona diga gobierno ucube oraini nainomo guisabitimaci. Moisés micori llogacinodo raise jaiñedino jiai guisabitimaci. ¹⁶ Ie facaise fariseuai comini, Moisés micori llogacinona llofueraini diga, nainomo jamai bitimaci. Jesúsna ciuanona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Naie isoidino diga fariseuai comini nabairiñena jira, iese jicanotimaci. ¹⁷ Iena caca-jano, Jesús llote:

—Ecairedinodi médicono jitañedimaci; ia duidinodi médicono jitaidimaci. Ie isoide. Mareuidino cuena jitañedimaci; ia maraiñedino cuena jitaidimaci. Jusiñamui dibeimo mareuidinona uaibiñedicue; iadedi maraiñedinona uaibiticue. Omoimona maraiñedino diga nabairiticue; ia naimacina uaibiticue.

Jesúmo comini guiñenana jicanua rafue
(Mt 9.14-17; Lc 5.33-39)

¹⁸ Ie facaise Jusiñamuina raise iobitallena, Juan Bautista llofueoicaigano guiñenaruillai ite. Ie facaise fariseuai comini jiai guiñenaruillai ite. Jesús dine comini billanona, naimiemo llote:

—Cai einamací llua isoi, Jusiñamuina naimaci raise iobitallena, guiñenaruillai illa facaiseconi Juan Bautista llofueoicaigano guiñedimaci. Naimaci jeacino facaina sunaicabitimaci. Fariseuai llofueoicaigano iedo jiai jaidimaci; ia o llofueoicaigano jaca guitimaci. ¿Bue ñellena cai einamací rafuedo jaiñedimaci?

¹⁹⁻²⁰ Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiai sunaiñedimaci. Iobillamona guitimaci. Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

²¹ Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite. ²² Jacagomona finoca bolsa como finoca vino joneñega. Jonegadena, marriñena jira, sirillamona igoí raire cuararite. Vino faifite. Igoí jiai faifite. Como finoca vino comogomo jonelle. Iemei iena faifñeite. Ie isoide. Omoi einamací rafue ifomo jiaie rafue birui ite. Iena omoimo llocabiticue. Iedo jaidicai —llote.

Sábadoruimo Jesús llofueoicaigano maijia rafue
(Mt 12.1-8; Lc 6.1-5)

²³ Jiairuido sábadoruimo Jesús, ie llofueoicaigano diga, trigo illa illi motodo joide naisona jaide. Ie llofueoicaigano trigona tijiano, guicana jaidimaci. ²⁴ Dajerie fariseuai iena ciuano, llotimaci:

—Rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijiamona, caimona jai maijidimaci. Iese cai abimo jeacinona jai finodimaci.

²⁵ Ie llofueoicaiganona riiduano, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide. ²⁶ Naie facaise Jusiñamui diga nanoca ñairaimadi Abiatar. Jusiñamui jofomo naimaci fo jailla mei, Jusiñamuimo fecaca llomeniconona uanona,

guitimaci. Jamai bue isoidino naie llomeniconna guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga, David micori iena guite; ia Jusiñamui naimacina duere finoñede. ²⁷ Jusiñamui sábadona finuamona, sábadote, nairui illamona comini caimare illena; ia omoi llofuiamona, iese iñedimaci. Nairuimo rairuica rana finoñellena, comini iese illena llofuecabitomoi. ²⁸ Monamona cue billamona, imana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiai rairuiredicue. Ie jira nairuimo cue jitailla rafuena finoredicue.

3

Jesúdi onollina idisarodimiena jillotaja rafue (Mt 12.9-14; Lc 6.6-11)

¹ Jiaie sábadoruimo judíuai ofiracomo Jesús dane jaide. Ie facaise onollina idisarodimie nainomo ite. ² Nainomo itino Jesús eruaidimaci, sábadoruimo Jesús naimie raabaca ie segoitai. Iena Jesús finoa, naimacimona sábadoruimo naimie jai maijia jira, naimiena llogidoiacadimaci. Sábadoruimo bu maijia, naimacimona jeacino finode. ³ Onollina idisarodimie mo Jesús llote:

—Cue ecimo mai bai bi.

⁴ Jesús nainomo itinomo jicanote:

—¿Nie isoide rafue sábadoruimo finuadi mare? Bimie birui cue jillotaiadedi, birui mare rafuena finodicue. Cuen a birui omoi meineiadedi, birui marañede rafue finodomoi. Sábadoruimo, ¿nie isoide rafue finuana rairuidomoi?

Comini dinena uai oñedimaci. ⁵ Naimie uaina naimaci inoñena jira, ricailanona, Jesús naimacimo erodate. Duidimie mo llote:

—O onolli mai oni ñuita.

Iena oni ñuitajamona jillode. ⁶ Iena ciuanona, fariseuai jino jaidimaci. Naimiena meinellena, illaíma Herodes díbeimo itinona baillanona, naimaci diga coniniri siadotimaci.

Jorai fuemo Jesúdi ailluena cominina llofuia rafue

⁷ Naie nairaimona jorai fuemo Jesús, ie llofueoicaigano diga, oni jaide. Galilea railla eniruemona ailluena comini naimie dine bitimaci. Judeamona jiaíno bitimaci. ⁸ Jerusalémoma, Idumeamona, Jordán ruicafabellemona, Tiro jinofemo ite eniruemona, Sidón jinofemo ite eniruemona ailluena bitimaci. Nana naimie siño finoca rafuena cacajanona, naimiena cioacadimaci. ⁹ Comini naimiena meetasi raillanona, ie llofueoicaiganomo daje botemo naimie jaillena eenogana llote. ¹⁰ Ailluena duidinona naimie jai jillotaja jira, nana duidino naimie mo riacadimaci. Jilloillena naimiena jetaacadimaci. Iemona naimie illa bote eenuana jitaide. ¹¹ Jananiai anamo itino Jesúsna cioia, Jesús uicomo ana bitadajanona, jananiai naimacina ñaitatajamona, raitimaci:

—Jusiñamui Jitodio. ¹² —Ia Jesús naimiena naimaci lluana rairuide.

Jesúdi ie doce llofueoicaiganona fetua rafue (Mt 10.1-4; Lc 6.12-16)

¹³ Naie facaise anedumo Jesús jaide. Ie jitaillano diese naimie dine uaidote. Naimie dine billa mei, ¹⁴ doce digamiena fetode. Naimie diga jaicabillena, naimacina fetode. Ie rafuena lollena, naimacina oretaiacade. ¹⁵ Janaba anamo itinomona Janabana oni oretallena, ie uai naimacimo ite. ¹⁶ Iese mameciredimaci: Simón; naimie mameci jiaicidi Jesús jítaca Pedrona. ¹⁷ Jacobo, Juan; iaímaiaí Zebedeo jito iaímaiaí. Jiaie mameci iaímaiaína Jesús jonete Boanergesna. Naie mameci oni dobañuamona mona guruama. Iciriruilla jira, iese mamecirediaímaiaí. ¹⁸ Andrés, Felipe, Bartolomé, Mateo, Tomás, jiaie Jacobo; naimiedi Alfeo jito. Tadeo, jiaie Simón; naimiedi cananista comini facaisemo duide. ¹⁹ Judas Iscariote micori; naimiedi Jesúsna gaítatimie.

*Fariseuai Jesúna jeare ñaia rafue
(Mt 12.22-32; Lc 11.14-23; 12.10)*

²⁰ Ie llofueoicaiganona fetua mei, ie risoilla jofomo naimaci diga Jesús abido jaide. Ailluena comini naimie dine billa jira, naimie guillena, naimie abi juanide. ²¹ Naimiena ie comini fidiano: “Naimiedi jai uairico isoi iacade” raillanona, comecina facadimaci. Ie jira naimiena ie ei jofomo isaibiacadimaci. ²² Jerusalémona Moisés micori llogacinona llofueraini naie facaise billanona, raitimaci:

—Beelzebúdi Janaba comini. Beelzebú anamo Jesús illamona, Beelzebú uaido Janaba illa cominimona Jesúdi Janabana oni oretate —raitimaci.

²³ Naimaci raillana naimie cacajanona, naimie dine Jesús naimacina uaidote. Llote:

—Janaba dibeimo Beelzebú illamona, dama ie abina oretanide. ²⁴ Ero, daje isoi comeciaina lloñenamo daje nairai facañenia, danomo maijinidimaci. Oni jaidimaci. ²⁵ Daje isoi comeciaina lloñenamo daje jofomo itino facañenia, danomo jainaiainidimaci. Oni jaidimaci. ²⁶ Ie isoide. Beelzebú uaido jananiaina omoi llua isoi cue oretai, Janaba ie dibeimo itino diga jai nabairiñede. Iemona naimie comini danomo iñeitimaci. Ie uai ieconi saite. ²⁷ Ero, mairidimie ie jofomo ite rana nibai fiacadomoi. Iena fillena, naimiena nano raise omoi maiga. Raise maiga mei, ie rana fiiredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. ²⁸ Ie jira bie omoimo lloiticue. Jusiñamui nana comini jeacinona dotarede. Naimiedi naimaci jeare ñaiacinona dotarede; ²⁹ iadedi naimiedi ie Joreña jeare ñaiacinona jaca dotañeite. Jusiñamui iena jaca feitañeite —llote.

³⁰ —Beelzebú anamo Jesús ite. Jusiñamui Joreño uaido siño rafuena finoñede; ia Janaba uaido siño rafuena finode —Jesúna raitimaci. Iese naimaci railla jira, “Jusiñamui naie isoide ñaiacinona jaca dotañeite” iese Jesús llote.

*Jesús ie comini
(Mt 12.46-50; Lc 8.19-21)*

³¹ Jesús comini naimie dine rillanona, naimie diga ñaiacanano jino naidaidimaci.

³² Ie facaise ailluena comini naimie ecimo raidimaci. Naimie comini rillana naimaci cacajano, naimiemo llotimaci:

—O ei, o amatiai diga jino ite. O diga ñaiacade.

³³ Jesús dinena uai ote:

—¿Bu cue ei? ¿Bu cue amatiai?

³⁴ Naimie ecimo itinomo erodajanona, llote:

—Jadi, cue ei, cue amatiai. ³⁵ Jusiñamui jitaillacinona finodimie cue amana, cue miriñona, cue eina. Imaci ua cue cominina.

4

*Jesúdi trigona judaidimiena llua rafue
(Mt 13.1-9; Lc 8.4-8)*

¹ Jiairuido jorai fuemo dane jaillanona, ailluena comini naimie dine ofillamona, Jesús naimacina llofuate. Ailluena comini nainomo ofilla jira, botemo Jesús jaillano, ana raide; iadedi comini jorai fuemo itimaci. ² Ailluena rafuena naimacina llofuate. Raite:

³ —Omoi fueollena, bie rafuemo raise cacarei. Damie trigona judaiaide. ⁴ Naimie judaiamona, naisomo janore iduai juide. Naimie bai jailla mei, silliñiai iena guisaibitimaci. Ie jira sicoñede. ⁵ Nofiemo jiaie iduai juide. Nainomo enirue raise iñede. Sicode; iadedi enirue raise iñena jira, ⁶ raise jainañena jira, ecasillamona duide. Ie jira llisiñede. ⁷ Eecuai illanomo jiaie iduai juide. Eecuai sicuamona riara eecuai ibaica. Ie jira llisiñede. ⁸ Mare eniruemo jiaie iduai juide. Sicode. Llisillamona danademo treinta

diga llisillana ote. Jiaïnamona sesenta diga llisillana ote. Jiaïnamona cien diga llisillana ote. ⁹ Omoi jeforena jira, raise fueollena, cue lluamo cacarei. Iena ñno.

Jesús ie como lloga rafuena llofuia rafue

(Mt 13.10-23; Lc 8.9-15)

¹⁰ Ailluena cominimona jailla mei, naimie diga jaisoidinodi, ie doce llofueoicaigano diga, Jesúmo ie llofuiana jicanotimaci. ¹¹ Uai ote:

—Jusiñamuidi omoïna ie sedaacana rafuena jai uiñotade. Jiaie iena uiñoñedomoi. Jiaie cominina iena nia uiñotañede. ¹² Ie jira bie isoidicinodo naimacimo lloticue. Cue siño finoca rafuena cioidimaci; iadedi iena naimaci ñnoñena jira, uiñoñeno jaitimaci. Cue llofuiana jamai cacadimaci; iadedi naimaci ñnoñena jira, raise cacaiñedimaci. Uiñoñedimaci. Jusiñamui dibeimo naimaci jaiacaiñena jira, Jusiñamui naimaci jeacinona oni dotañeite. Iena feitañeite. ¹³ Cue como llofuiacinona omoi raise cacaiñenia, dane cue llofuia, iena jiai raise nibai cacaiñeitomoi; ¹⁴ ia iena omoïna llofueiticue. Trigona judaidimiedi Jusiñamui rafue lloraima isoide. ¹⁵ Dajerie iduai naisomo juide. Dajerie comini comeciai naie naiso isoidimaci. Jusiñamui uaina cacadimaci; ia Taife naimaci comeciaino cacaja uaina ñnotañede. ¹⁶ Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaja, iena caimare feiñotimaci. ¹⁷ Nofiemo riga iduai jainaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefuia, abido danomo uaidimaci. ¹⁸ Jiaie iduai eecuai illanomo juide. Naie iduai sicua mei, iena eecuai ibailla jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. ñnotimaci; ¹⁹ iadedi naimaci comeciai jarire illamona, naimaci raruiaina ebiruillamona, naie uai naimaci comeciaino itabiñede. Jusiñamui jitaille rafuena finocana jaiñedimaci. ²⁰ Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise feiñotimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

Jesúdi lamparina ñaia rafue

(Lc 8.16-18)

²¹ Jorai fuedo Jesúdi cominina nia llofueite:

—Jai uneca lamparin jiaie illanomona atia mei, jiaie ra bide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainade. ²² Ie isoide. Cue rafue llocana jaia, comini comeciai iticinona uiñotade. Uanaicino naimaci cacajamona, damierie ñnotimaci. Damierie ñnoñedimaci. ²³ Omoi jeforena jira, raise fueollena, cue lluamo cacarei. Iena ñno.

²⁴ 'Cue lluamo raise cacarei. Omoi cacaja diese Jusiñamui omoïna uiñotaite. ²⁵ Iena omoi ñnoia, Jusiñamui omoïna canoite. Omoïna uiñocana jaitaite. Jiaimie iena janore cacajamona, iena ñnoñenia, Jusiñamui naimiena faifitaite.

Jesúdi Jusiñamui ie cominina sedaacana llofuia rafue

²⁶ Jesús llote:

—Jusiñamui dibeimo comini jailla rafuena nia lloiticue. Naimie dibeimo comini jaillena, naimie rafue llocana jaidicue. Jiaie uaido iena omoïmo lloiticue. Damie ie illimo judaiaide. ²⁷ Judaia mei, ie illimo nagarui ie maijicabilla isoi naimie jaide. Niese iduai denuana naimie raise uiñoñede; ²⁸ ia eniruemona nano sicode. Monaila mei, lliside. Iemona naicuai comuide. ²⁹ Jai einaia, iena ote. Ie isoide. Jusiñamui rafuena raise cacaiñedomoi; ia iena ñnocana jaidomoi.

Jesúdi mostaza ido llua rafue

(Mt 13.31-35; Lc 13.18-19)

³⁰ Jesús jiaie rafuena llote:

—Jusiñamui dibeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci. ³¹ Jiaie rafuedo iena omoimo lloiticue. Damie mostaza idona rillamona, naiemona eo aillue riarasicode. Mostaza ido eo janorede; ³² iadedi sicua mei, eo aillue riarajaillamona, ie onogailla; jegairiena jira, icairo anamo manaidinomo silliñia; jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

³³ Naie isoide rafuiaido Jesúdi Jusiñamui ie cominina sedaacana rafuena cominimo llote. ³⁴ Naimaci cacaja diese llote. Naimacimo jiaie rafuedo lloñede; ia ie llofueoicaiganomo iena eneno llofuede.

Jesúdi jorai baguana llicaitaja rafue
(Mt 8.23-27; Lc 8.22-25)

³⁵ Ailluena comini llofuia mei, jitoma jai sojicaidemo, ie llofueoicaiganomo Jesús llote: —Ruica enefebeimo mai cai jailli.

³⁶ Cominina fainonocaida, botemo naimie jai illamona, naimie llua isoi, oni jaidimaci. Jiaie botes jiai jaide.

³⁷⁻³⁸ Bai jaillanona, jillacimo Jesús inide. Ie ifogi almohadamo biide. Ie facaise aifi eo riire bite. Joraidi eo bagode. Baguamona, botemo jinui a uaide. Oruiacana jira, jacinailamona, Jesúna casitatimaci. Raitimaci:

—Maestro, ¿niese itio inoilla? Caina cano. Jai buisaidicai. Corobaisaidicai.

³⁹ Naimie casillano, aifina lletade. Jinui baguana llicaitade. Ieconi aifi llicaiide. Bagoñede. ⁴⁰ Ie llofueoicaiganomo jicanote:

—¿Bue ñellena jacinaitomoi? ¿Niese cuena raise inoñedomoi?

⁴¹ Uai oñeno eo rajicaidimaci. Coniniri ñaitimaci:

—Bimiedi ¿nie isoidimie? Aifi naimie uaina inote. Jorai naimie uaina jiai inote. —Bai jaillanona, ruica dine ridimaci.

5

Jesúdi Gadara railla eniruemo illa rafue
(Mt 8.28-34; Lc 8.26-39)

¹ Ruica dine naimaci ridemo, Gadara railla eniruemo sijidimaci. ² Botemona ari Jesús jaidemo, naimie dine damie bite. Naimiedi Janaba anamo itimie. ³ Comini raoillanomo nofie moto ifuaimo naimie i-isoide. Janaba anamo naimie illamona, comini diga marena jaca irainide. ⁴ Diga icaiño lloeo diga ie onollidi maiga; iadedi oni ecocaida, lloeona ticonote. Ie eilli jiai maiga; iadedi saitaicaida, lloeona ticonote. Ie jira buna naimiena raise mainide. ⁵ Nagarui nofie motomo ite. Anedumo jaisoide. Cuiricuirisoide. Dama ie abina nofici diga jaidode. Iese naimie isoide. ⁶ Nofiemona Jesúna ciuanona, aisicana Jesús dine bite. Naimiena sedallena, ie caiñici ifodo ana rainadate. ⁷⁻⁸ Jesús llote:

—Janaba, bimiemona oni jai.

Janabadi iimana ado llotatate:

—Nanoca Jusiñamui Jitodio. ¿Niese cuena nibaiacadio? Jusiñamui mamecido cuena duere finoñeno.

⁹ Jesús Janabamo jicanote:

—¿O mameci bu?

Uai ote:

—Aillosiedicai.

¹⁰ Bie illanomona naimacina oretañellena Jesúmo duere jicanotimaci. ¹¹ Naie facaise nainomo ite anedumo ailluena chanchuai itimaci. ¹² Chanchuai abimo naimaci jaillena Jesúmo duere jicanotimaci. ¹³ Jesús dinena:

—Jee —raite. Ieconi iima abimona oni jaillanona, chanchuai abimo jaidimaci. Dos mil chanchuai nainomo itimaci. Iena suidemo, iconi jillacimo joraimo chanchuai aisiano corobaisidimaci.

¹⁴ Iena cüanona, chanchuai sedaraini naimaci nairai dine aisicana jaidimaci. Naie rafuena llocana jaidimaci. Ie jira diga comini jaide, naie rafuena raise fidillena. ¹⁵ Jesús dine naimaci ridemo, jaive Janaba anamo illamiëna Jesús ecimo raillana ciodimaci. Naimie iniroina jai jetade. Naimie jai uairicoñede. Iena cüanona, Jesúsna jaciruitimaci. ¹⁶ Naie rafuena ciodino jaive Janaba anamo illamie jilluana llotimaci. Chanchuaimo suide rafuena jiai llotimaci. ¹⁷ Naie enirue itinodi Jesúsno naimaci eniruemonona oni jaillena duere jicanotimaci.

¹⁸ Botemo Jesús jaiacania, jaive Janaba anamo illamie Jesúsno jicanote, naimie diga jaillena; ¹⁹ ia Jesús raite:

—Dama ite. O nabaiñiai dine jai. Nana Jusiñamui omo finoca rafuena naimacimo llono. Jusiñamui ona duenaillana naimacimo llono.

²⁰ Ie jira oni jaide. Nana Decápolis railla eniruemo Jesús nana naimiemo finoca rafuena llocana jaide. Iena cacajamona, nana comini rajicaidimaci.

*Jesúdi mena duide riñona jillotaja rafue
(Mt 9.18-26; Lc 8.40-56)*

²¹ Ruica dibeimo ie llofueoicaigano diga Jesús abido rilla mei, ailluena comini naimie dine ofidimaci. Jorai fuedo naimie nia ia, ²² Jairona mameciredimiedi Jesús dine bite. Naimiedi judíuai rafue ofiraco sedarima. Jesúsno duere jicanollena, ana bitadate. ²³ Duere jicanote:

—Cue jisa jai fiodiacade. Cue jofomo cue diga bi, o onolli naiñaiño o jonellena, naiñaiño jilloillena.

²⁴ Iena cacajano, ie llofueoicaigano diga, naimie diga Jesús jaide. Ailluena comini Jesúsno ñajjillanona jaidimaci. ²⁵ Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. ²⁶ Diga manorainimona duere sefuide. Jilloñede; ia fodo jaide. Nana ie ucube jiai fuite. ²⁷ Jesús duidinona jilluana naiñaiño fidiamona, jinafo dinena billanona, naimie iniroina jetade. ²⁸ “Naimie iniroi cue jetajamona jilloiticue” comecina facajamona, naiñaiño naimie iniroina jetade. ²⁹ Ieconi diailladi faionocaide. Ie abi jilluana naiñaiño jai uiñote. ³⁰ Ie abimona ie uai oni jaillana Jesús uiñuanona, dobaicaide. Cominimo jicanote:

—¿Bu cue iniroina jetade?

³¹ Ie llofueoicaigano dinena uai otimaci:

—Ailluena comini o ecimo jaidimaci. Omo ñajjidinona: “¿Bu cue iniroi jetade?” raitio.

³² Raise uiñollena, Jesús ie ecimo itinomo erodate. ³³ Duidiñaiño ie jilluana uiñua jira, Jesús dine jaciruicana bite. Naimie uicomo ana bitadajanona, nana naiñaiño omo ite rafuena llote. ³⁴ Naiñaiño Jesúsno llote:

—Ñoo, cuena o inua jira, jai jillodio. Mai marena o jai. O duicomona jai jillobidio.

³⁵ Naiñaiño diga Jesús nia ñaitemo, Jairo jofomona jiaño bite. Jairomo llote:

—O jisa jai fiodaite. Maestrona ñaidoño.

³⁶ Iena cacajano, Jairomo Jesúsno llote:

—O comeci jarire iño; ia cuena nia ino.

³⁷ Ailluena comini naimie diga jaillana rairuide. Dani diese jaillana jitaide: Pedro, Jacobo, Juan. Juandi Jacobo ama. ³⁸ Jairo jofomo rillanona, nainomo itino eecuinaillana cacade. Failliñaiñana cacade. ³⁹ Jesús fo jailla mei, nainomo itinomo jicanote:

—¿Ñiese itomoi eecuinailla? Cuemonona naiñaiño fiodiacadesa. Jamai inide.

⁴⁰ Iena cacajano, naiñaiño jai fiodaite uiñuamona, Jesúri jaisitímaci. Naimacina Jesús jino oretaja mei, nai jitaíño moo díga, naiñaiño ei díga, ie llofueoicaigano díga, naiñaiño ecimo Jesús jaide. ⁴¹ Naiñaiño onollina llinocaida, judíuai uaido raite:

—Talita, cumi. —Iena oni dobaiñuamona: “Jitaíbici, mai naidacai” raite.

⁴² Ieconí jilluanona naidacaide. Jai jilluano macarite. Naiñaiño doce años jai ite. Nana nainomo itino ierí eo rajicaidímaci.

⁴³ —Bumo bie rafuena lloñeno —naimacimo Jesús llote. Guillena naiñaiño ecajana jiaí llote.

6

Nazaretmo Jesús illa rafue

(Mt 13.53-58; Lc 4.16-30)

¹ Naie illanomona Jesús oni jailla mei, ie llofueoicaigano díga Nazaretmo ride. ² Rilla mei, sábadoruimo nainomo ite ofiracomo llofue. Iena cacajanona, nainomo itino rajicaidímaci. Raitímaci:

—¿Ñiese eo abina uiñote? ¿Bumona ie uaina ote? ¿Ñiese siño rafuena naimiedi finode? Naimiedi jamai bue isoidíme. ³ Naimiedi amederaíma. María jito. Ie amatiáidi Jacobo, José, Judas, Simón. Naimie miriñotiaídi cai motomo jiaí ite. —“Cai comena naimie ite” raillanona naimie uaina jamaidímaci.

⁴ Jesús naimacimo llote:

—Naga illanomo comínidi Jusiñamui facaina lloraíma uaina feiñotímaci; iadedi naimie nairaímo naimie ia, ie jofomo naimie ia, ie comíní naimie uaina feiñoiacasiñede. Jamaisite. Ie isoide. Cue comínidomoina jira, cue uaina ñnoñedomoi.

⁵ Ie muidona nainomo siño rafuena eo finonide. Damíerie duidinona jetajamona, naimacina jillotate; ⁶ ia naimaci ñnoñenari rajicaide. Ie mei díga nairaíaimo Jesús llofuecana jaide.

Jesúdi ie llofueoicaiganona oretaja rafue

(Mt 13.53-58; Lc 4.16-30)

⁷ Ie doce llofueoicaiganona Jesús uaiduanona, naimacimo ie uai iñonocai, jananiaí anamona comínina jilloitallena. Ie rafuena llollena, jiaie illanuaímo naimacina menamíerie oretaiacade. ⁸ Raite:

—Ailluena rana uiñeno. Omoí abí ríidollena, jíguidana uiño. Llomenicono uiñeno. Ailluena rana omoí uiñellena, bolsano uiñeno. Ucubena uiñeno. ⁹ Zapatona jítajano jai. Abí omoí meidolle ñiroina uiñeno. ¹⁰ Nie nairaímo omoí jaia, daacomo omoí ri. Naie nairaímo omoí ille dínorí, daacomo omoí i. ¹¹ Omoína bu feiñoiacaiñenia, omoí uaina bu cacarefiacaiñenia, naie nairaímona omoí jaillanona, omoí eilliaímo ite jearacuaina oni jaidino. Maraiñede rafuena naimaci finuana naimaci uiñollena, omoí eilliaína jaidino.

¹² Jesús naimacimo llua mei, jaidímaci.

—Omoí jeacínona fainonocaillanona, Jusiñamui díbeimo omoí comeciaí iuai meid-uana omoí jai —llofuecana jaidímaci. ¹³ Janaba anamo ite comínimona Janabana oredímaci. Duidino abímo farena gia mei, naimacina jillotate.

Juan Bautista micorí fiodailla rafue

(Mt 14.1-12; Lc 9.7-9)

¹⁴ Jesús mamecí are sorilla jira. Herodes railla gobernador Jesús finoca rafuena fidíde. Naimie raite:

—Fiodaillamona Juan Bautista micorí jai jillode. Jesús raillamiedi naimie. Ie jira naimie siño rafuena finocabide.

¹⁵ Jiaie comíní raisoidímaci:

—Elías jai bairede.

Jiaíno raisoidímaci:

—Fiodaillamona Jusiñamui facaina jaiel loraïma micorï jai jillode.

¹⁶ Jesúsna fidiano, Herodes comecina facade: “Juan micorï ie ifogina navui jaitataticue. Fiodaillamona naimie jai jillode”.

¹⁷⁻¹⁸ Iese comecina facade, Herodes Juan micorïna navui meinetaja jira. Juan Bautista micorïna nia meinetañenia, Herodes ie ama Felipe aina ote. Naiñaiño mamecidi Herodías. Ie jira Juan micorï naimiemo llote:

—O ama ai diga itio. Maraiñede rafuena finodio. Jusiñamui iena rairuide.

¹⁹ Ie muidona Herodías dinena Juan Bautista micorïna jearuite. Naimiena meinetaiacade; ²⁰ ia finonide, Juan Bautista micorïna Herodes jaciruilla jira. Naimiedi Juan micorïna mareuidimiena uiñote. Naimie Juan micorï Jusiñamui rafuedo jaillana jiai uiñote. Ie muidona naimie Juan micorïna raise eenote. Diga icaiño naimie micorï llwana cacade. Iena gaide; ia iena raise cacaiñede. Ie muidona Herodías naimie micorïna meinetanide; ²¹ ia ja muidomo naiñaiño sedallirui ride. Herodes cumpleaños ie rafuena finode. Ailluena illaicomïnina ie rafuemo uaidote. Eo ucuberedinona jiai uaidote. ²² Rafuemo Herodías jisa saillamona, Herodena iobitade. Ie uaidoganona jiai iobitade. Iobillamona, Herodes naiñaiñomo llote:

—O jitailla ra cuemo jica. Iena omo fecaiticue. ²³ Illaïma uai cuemo illa jira, iena ua finoiticue. Nie isoide rana o jitaia, omo iiticue. Cue anamo ite nairai o jicadiodena, atuedo omo iiticue.

²⁴ Iena cacajano, naiñaiño ie ei dine jino jaide.

—¿Buena jicaiticue? —ie eimo jicanote.

Ie ei uai ote:

—Juan Bautista ifogina jica.

²⁵ Herodes dine raire abido billanona, llote:

—Juan Bautista ifogi bandejamo ja jonecaida, cuemo ine.

²⁶ Iena cacajano, Herodes sunaite; iadedi naimie llua jira, nainomo naimie uaidogano jiai illa jira, ie lloga uaina janoiacañede. ²⁷ Ie facaise ie soldaduaimona Herodes damie cárcelmo orede. Juan ifogina atillena ocuide. Herodes ocuilla isoi finode. Juan ifogina jaitade. ²⁸ Bandejamo naimie ifogi jonecaida, iena atiano, Herodías jisamo fecade. Ieconï ie eimo fecade. ²⁹ Iena fidianona, Juan micorï llofueoicaigano naimie micorï abina uaibitimaci. Iena raitimaci.

*Jesús cinco mil iñiaïna ecaja rafue
(Mt 14.13-21; Lc 9.10-17; Jn 6.1-14)*

³⁰ Jesús llofueoicaigano abido bia, Jesúsno nana naimaci finoca rafuena llotimaci. ³¹ Ie facaise ailluena comini naimaci dine biñoidimaci. Ie jira jafaici ollena abi juanide. Guillena jiai abi juanide. Ie jira Jesús ie llofueoicaiganomo llote:

—Jafaici cai ollena, eneno oni mai cai jailli. Comini iñenanomo mai cai jailli.

³² Ie muidona botedo comini iñenanomo dani jaidimaci. ³³ Ailluena comini naimaci oni jaillana cioidimaci. Naimacina uiñuamona, diga nairaiamona aisicana jaidimaci. Jesús nia riñenia, uicodo ie jaillanomo ridimaci. ³⁴ Jesús sijianona, ailluena comïnina ciode. Naimacina sedallena bu iñena jira, toïca llaudaïaina sedaraima iñena isoi, isoidimaci. Iena uiñuamona, Jesús naimacina duenaite. Ailluena rafuena naimacina llofue. ³⁵ Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuiacade. ³⁶ Comini mai abido oreta. Ianori ite nairaiamo, ianori ite jofuemo naimaci guille ollena, bie comïnina abido oreta.

³⁷ Jesús uai ote:

—Naimacina bene eca.

Uai onaisite:

—Naimaci guillena doscientos ucube raifi llomenico cai uana nïbai jitaïdio.

³⁸ Naimacimo jicanote:

—¿Niga llomenoico omoimo ite? Mai jibuisai.

Jibuisailla mei, raitimaci:

—Cinco llomenoico mena lliciai diga.

³⁹ Iena cacajano, cominimo raitie illanomo dajerise ana raillena Jesús llote. ⁴⁰ Naimaci cien digamierie ana raisite. Jiaino cincuenta digamierie ana raisite. ⁴¹ Naie cinco llomenicono, naie mena lliciai diga, Jesús uanona, monamo eruaillanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecalena. Iese naie mena lliciai nana cominimo fecade. ⁴² Nana guillanona monidimaci. ⁴³ Monillamona, fiebide guillena iraidimaci. Doce cirigaiaimo oruitatimaci. ⁴⁴ Cinco mil iñiaia diese guitimaci. Naimaci ainiaia, imaci uruiaia diga, jiaia guitimaci.

Jesús jinui emododo macarilla rafue

(Mt 14.22-27; Jn 6.16-21)

⁴⁵ Guilla mei, botedo ie llofueoicaigano ruica dine Betsaidamo jaillena llote. Naie facaiseconi cominina naimie nia facadote. ⁴⁶ Cominina facadua mei, aneduaimo dane jaide, Jusiñamui diga ñaillena. ⁴⁷ Jitibicaidemo, nainomo dama ite. Ie llofueoicaigano jorai motomo jai itimaci. ⁴⁸ Aifi naimacimo riire rilla jira, riire jaitimaci. Iena Jesús ciuanona, jinui emododo naimaci dine bite. Naimaci ecido naimie jaisaide; ⁴⁹ ia naimiena naimaci ciuanona, comecina facadimaci: “¿Bu joreño caimo billana ciodicai?” ⁵⁰ Naimiena ciuamona, nana jacinaillamona cuirioidimaci. Naie dacaiño Jesús naimacimo llote:

—Omoia joreñonicaiño. Cuesa. Jaciruiño.

⁵¹ Botemo Jesús jaide. Ie facaise aifi llicaiide. Ieri eo rajicaidimaci. ⁵² Janore guillemona ailluena cominina naimie ecajana jaive ciodicimaci; ia naimie uai siñonana nia raise uiñoñedimaci. Naimiena nia raise iñoñedimaci.

Jesúdi duidinona Genesaret eniruemo jillotaja rafue

(Mr 14.34-36)

⁵³ Ruica dine jaillanona, Genesaret railla eniruemo ridimaci. Nainomo sijidimaci. ⁵⁴ Botemona ari jaidemo, nainomo itino Jesúsna uiñotimaci. ⁵⁵ Nana naie eniruemo aisicana jaidimaci, duidino naimie dine atillena. Naimaci biira emododo duidinona atisite. Jesús illana naimaci fidiano, iese atiuidimaci. ⁵⁶ Diga nairaiaimo naimie jaide. Nie nairaimo Jesús ria, naimaci illano motomo duidinona atisite. Jilluana jitaidimaci. Ie iniroi fueda jetallena naimiemo duere jicanotimaci. Nana naimie iniroina jetadino diese jillodimaci.

7

Jesúdi comini comeciaina ñaia rafue

(Mt 15.1-20)

¹ Naie facaise fariseuai cominidi Jesús dine bitimaci. Moisés micori llogacinona llofueraini Jerusalémona jiaia bitimaci. ² Jesús llofueoicaiganomona damierie naimaci isoi guiñenana ciodicimaci. ³⁻⁵ Fariseuai dinena Jesúsno jicanotimaci:

—¿Bue ñellena omoia llofueoicaigano cai einamacia rafuedo jaiñedimaci? Naimaci guiacania, naimaci onolli cai einamacia llua isoi, raise jocoñedimaci. Ie jira cai abimo jecino finodomoia.

Iese jicanotimaci, naimaci einamacia rafuedo naimaci jailla jira. Maraiñede rafue naimacimo suiñellena, iese ailluena judíuai jaidimaci. Naimaci guiacania, naimaci einamacia llua isoi, onollina diga icaiño jocuano, guitimaci. Mercadomona bia, naimaci einamacia llua isoi, abina lleredimaci. Naimaci einamacia llua isoi, tazones, ollas, bandejas jiaia jocodimaci. Iese jaisoidimaci. Comecina facadimaci: “Iese cai finoia,

Jusiñamuimona mare. Iese cai finoñenia, Jusiñamuimona maraiñede. Naimie caina duere finoite”. Jearede rafue naimaci abimo oñellena, iese finouidimaci.

⁶ Jesús uai ote:

—Mareuidinona abi caitauidinodomoí. Isaías micorí jaie omoína raise llote. Naimiedi Jusiñamui llua cuete:

Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruiticai” llotimaci.

“Ona sedadicaí” llotimaci.

Jamai ñaitimaci. Naimaci comeciái cue dibeimo raise iñede.

⁷ Cue uai itena, jamai comini llucanona naimaci llofuecabilla jira, tainona cuena sedadimaci

cuete. ⁸ Isaías micorí llua isoi itomoi. Jusiñamui llogacinona fañonocaida, omoi einamací rafuedo jaidomoi. ⁹ ¿Bue ñellena nana Jusiñamui llogacinodo jaiñedomoi? Omoi einamací llogacinodo jaidomoi; iadedi nana Jusiñamui llogacinodo raise jaiñedomoi. ¹⁰ Moisés micorí jaie llote: “O moo uai ñnuanona, naimiena cano. O ei uai ñnuanona, naiñaiñona cano. Ie moori jeare ñaitimie, ie eiri jeare ñaitimie meinelle”. ¹¹⁻¹² Iese Moisés micorí llote; iadedi omoi einamací llotimaci: “Jusiñamuimo cai ucubena cai fecajamona, cai moonona, cai eina jai canonidicai”. ¹³ Iese omoi finocabilla jira, omoi einamací llogacinodo omoi jaillamona, Jusiñamui uaina jamaidomoi. Bie isoide rafuedo jaca jaidomoi.

¹⁴ Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoi uiñollena, cue llua cacarei. ¹⁵ Omoi einamací isoi omoi guiñenia, naimaci isoi omoi onollina omoi jocoñenia, omoi comeciaina jearetañedomoi. Omoi guillamona, omoi onollina jocuamona. Jusiñamuina nabaiñedomoi. Omoimo jeacino illa jira, Jusiñamuina nabaiñedomoi. Omoi comeciái jearena jira, jeacinona finocabidomoi.

¹⁶ Omoi jeforena jira, raise fueollena, cue llua cacarei. Iena ñno.

¹⁷ Cominimona oni jaillanona, Jesús ie risoilla jofomo jaide. Nainomo ie llofueoicaigano aillinano ie llua jicanotimaci. ¹⁸ Uai ote:

—¿Ñiese cue llua jiaí nia cacaiñedomoi? Ñie isoide ra guitomoina, omoi comeciáimo jeare iñede. ¹⁹ Omoi comeciáimo jaiñede; ia omoi jebemo jaide. Ie mei omoi abiaimona jino bite.

Jesús llua mona, nana guille radi mare uiñoticaí. ²⁰ Jesús llote:

—Omoi comeciái jearena jira, jearede rafuena finocabidomoi. ²¹ Omoi comeciái jearena jira, jeare comeciaina facacabidomoi. Omoi aiñede riño diga icabitomoi. Omoi iniñede ima diga icabitomoi. Firicabitomoi. Cominina meinecabitomoi. ²² Jiaí comini rana nicidocabitomoi. Jearede rafuena finocabidomoi. Iena eburitomoi. Jifuericabidomoi. Abina uradoicabidomoi. Jiaie comini joreña jeare ñaicabitomoi. Abina iedocabitomoi. Ebena jaicabidomoi. ²³ Bie isoidicinuai omoi comeciáimo illa jira, jearede rafuena finocabidomoi; iadedi omoi einamací llua isoi, omoi onolli jocoñenamona jeacino comuiñede.

*Jesúdi judío iñaiñoñediñaiñoña jillotaja rafue
(Mt 15.21-28)*

²⁴ Nainomona Jesús jaillanona, Tiro railla eniruemo jaide. Sidón railla eniruemo jiaí jaide. Nainomo jofomo jaillanona, iena buna fidiana jitañede; ia iena janonide.

²⁵⁻²⁶ Ie facaise judío iñaiñoñediñaiño daño bite. Naiñaiñodi sirofenicia nairai iñaiño. Ie jisa Janaba anamo ite. Jesúna fidiana, naimie dine bite. Naimiena raise uaiduanona, naimie ecimo ana bitadate. Ie jisamona Janabana oni oretallena Jesúmo duere jicade.

²⁷ Judíuaiñedinona naimie canoñenana naiñaiño uiñollena, naiñaiño mo Jesús llote:

—Uruiaí guillamona jiconiaina eadicaidena, maraiñede. Uruiaí nano eadicaí.

²⁸ Naiñaiño dinena uai ote:

—Jii, maestro; iadedi jiconiadi uruiái guillamona fiebide guillemona guitimaci. — Iese llote; ia jiaie rafuemo comecina facade. Uruiaina llote; iadedi judíuaimo comecina facade. Jiconiaina llote; ia judíuainédinomo jiaí comecina facade. Comecina facade: “O cominimo o rafue duide; ia cai Namana o illa jira, nibai o rafue caimo janore duide”.

²⁹ Jesús uai ote:

—Raise llotio. O jofomo mai abido jai. O jisamona Janaba oni jaide.

³⁰ Naimie llua isoi jofomo jaide. Ie jisa biramo bidená cide. Janaba naiñaiñomona oni jaillana jai uiñote.

Jesús jefona cacaiñedimiena jillotaja rafue

³¹ Tiro railla eniruemona Jesús oni jaide. Jaillanona, Sidón railla eniruemo jaide. Decápolis railla eniruemo jiaí jaide. Ja muidomo Galilea railla jorai fuemo ride. ³² Iena fidiano, naimie dine comini jefona cacaiñedimiena atide. Naimie gogoma. Naimiena jilloitallena, naimiemo ie onolli jonellena Jesúmo jicadimaci. ³³ Ailluena comini naimie dine jai billa jira, jefona cacaiñedimiena eneno oni uite. Nagafebe jefomo onocai ñuitade. Ie onocaimo tuajanona, iima ifena jetade. ³⁴ Jusiñamui dine monamo eruaita, naimiena duenailamona, jafaicina faite. Judíuái uaido naimiemo llote:

—¡Efata! —Oni dobaiñuamona: “¡Ecoricai!” raite.

³⁵ Ieconi ie jefodi ecoricaide. Jai raise cacade. Jai raise ñaite. ³⁶ Cominimo:

—Bimie jai jilluana bumó lloñeno —Jesús diga icaiño llote; ia naimie uaina iñoñedimaci. Iena llocana uitimaci. ³⁷ Naimieri eo rajicaidimaci. Coninina naimiena raitimaci:

—Naga rafuena raise finode. Jefona cacaiñedimiena jai jillotate. Gogonaitimiena jai jillotate.

8

Jesúdi cuatro mil iñiaina ecaja rafue

(Mt 15.32-39)

¹ Naie facaise naimie dine ailluena comini illanona, naimaci guille jai iñena jira, Jesús ie llofueoicaigano naimie dine uaidote. Raite:

²⁻³ —Bie comini darui amani bene cue diga illa jira, naimacimo guille jai iñede. Damierie eo aarena bitimaci. Naimacina aimeri oretaiacaiñedicue, naisomo naimaci bai raillano. Naimacina cue duenaila jira, naimacina canoiacadícue.

⁴ Jicanotimaci:

—¿Ñiese naimacina bene ecaiticai? Jofue iñenanomo iticai.

⁵ Jesús jicanote:

—¿Ñiga llomenico omoimo ite?

Uai otimaci:

—Siete.

⁶ Comini ana raillena Jesús llote. Naie llomeniconona uanona, Jusiñamuimo iobillacinona fecade. Tailluanona, ie llofueoicaiganomo fecade, naie cominimo fecallena. Iena finodimaci. ⁷ Naimacimo janore llicisiriaí jiaí ite. Ie facaina Jusiñamuimo iobillacinona fecaja mei, cominimo fecallena Jesús llote. ⁸ Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci. ⁹ Nainomo cuatro mil iñiaí guitimaci. Naimaci ainiaí, imaci uruiái diga, jiaí guitimaci. ¹⁰ Guilla mei, coninina naimaci jofuemo Jesús orede. Ie llofueoicaigano diga, botemo jaillanona, Dalmanuta railla eniruemo jaide.

Fariseuai comini Jesúmo siño rafuena fñuana jicanuano billa rafuena

(Mt 16.1-4; Lc 12.54-56)

11 Dajerie fariseuai comini Jesús dine bitimaci. Naimie uaina uaitaiacadimaci. Naimiena facacillena, siño rafuena finuana jicanoiacadimaci. Iena naimie finoñedena, naimie ie llua isoi iñenana uiñotimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

12 Sunaillanona, Jesús jafaici faite. Raite:

—¿Bue ñellena siño rafuena finuana cioiacadomoi? Omoi facaina iena finoñeiticue.

13 Ie llua mei, naimacimona oni jaidimaci. Ie llofueoicaigano diga, botemo dane jaillanona, ruica dine Jesús jaide.

Jesús siritate rana llofua rafue

(Mt 16.5-12)

14 Ruica dine rilla mei, Jesús llofueoicaigano llomeniconna feillana uibiñotimaci. Naimacimo daje llomenico ite. 15 Iena naimie uiñuamona, naimacimo Jesús llote:

—Fariseuai siritate ramona abina rairui. Illaíma Herodes siritate ramona abina rairui. —Iese Jesús llote; iadedi naimaci llofuiacinomona abi rairuillena ñaite.

16 Jesús iese llua jira, iena naimaci raise cacaiñena jira, dani coniniri siadotimaci:

—Llomeniconna cai atiñena jira, caimo iese llote.

17 Naimaci siaduana Jesús uiñua jira, naimie llua naimaci raise nia cacaiñena jira, naimacimo jicanote:

—¿Bue ñellena iese siadotomoi? ¿Ñiese cuena ñinoñedomoi? Cueno siño uai illana nia raise cacaiñedomoi. 18 Uisiredomoi. Jeforedomoi. ¿Ñiese cue navui siño finoca rafuemo comeciaina facañedomoi? 19 Navui cinco mil iñiaí cinco diga llomeniconna guitimaci. Monillamona, guigamona fiebillamona, ¿niga cirigaíaimo iraidomoi?

Uai otimaci:

—Doce.

20 Jesús llote:

—Jiaicaiño cuatro mil iñiaí siete diga llomeniconna guitimaci. Monillamona, guigamona fiebillamona, ¿niga cirigaíaimo iraidomoi?

Uai otimaci:

—Siete.

21 Jesús dinena jicanote:

—¿Ñiese cuena nia raise ñinoñedomoi? Siño uai cueno illana nia raise ñinoñedomoi.

Jesús uisnidimiena jillotaja rafue

22 Oni macarillanona, Betsaidamo Jesús, ie llofueoicaigano diga, ride. Ie facaise naimie dine comini uisnidimiena atide. Naimiena jilloitallena, naimiena jetallena, Jesúsimo jicanote. 23 Iena Jesús cacajanona, ie onollina llinuanona, nairaí illa jinofemo uisnidimiena uite. Ie mei ie uisina tuade. Ie uisina jiaí jetade. Naimiemo jicanote:

—¿Buena ciodio?

24 A eruaillanona, uai ote:

—Comini macarillana ciodicue; ia amena isoi eruaídimaci. Nia raise cionidicue.

25 Ie uisina Jesús dane jetade. Iemona oni erocailamona, jai jillode. Jai raise ciodo.

26 Jai jillua jira, ie jofomo naimiena abido orede. Jesús llote:

—Betsaidamo itino o jilluana lloño; ia nainomo jaiño o jofomo mai abido jai.

Pedro Jesúsna llua rafue

(Mt 16.13-20; Lc 9.18-21)

27 Cesarea Filipo eniruemo ite nairaíaimo Jesús jaidemo, ie llofueoicaiganomo jicanote:

—¿Ñiese jiaíe comini cuena raitimaci?

28 Uai otimaci:

—Damierie raitimaci: “Juan Bautista micoridío”. Damierie raitimaci: “Odi Elíadio”. Jiaíno raitimaci: “Jusiñamui facaina jaie ite llorainimona damie jai jillode. Imiedío”.

²⁹ Jesús dane jìcanote:

—¿Niese omoi cuena raitomoi?

Pedro uai ote:

—Odi cai Jilloitaramadio. Jusiñamui facaina lloraini micoriai o billena jaie llotimaci

³⁰ Jesús iena bumo llwana rairuide.

Jesús ie fiodaillena llofua rafue

(Mt 16.21-28; Lc 9.22-27)

³¹ Ie facaise ie llofueoicaiganona ie duere sefuillena llofuate. Llote:

—Cai judíuái illaicomíni cuena eo duere finoitimaci. Cuena jítaiñellemona, cuena meineitimaci; iadedi darui amani illanona, fiodaillamona jilloitícue.

³² Iena marefodo naimacimo llote. Iena cacajano, Pedro dinena lletade:

—Dama ite. Iese lloñoeno. Bie isoide rafuena lloñoeno.

³³ Ie llofueoicaiganomo erodajanona, Jesús Pedromo riire llote:

—Cuemona oni jai. Iese ñaiñoeno, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio.

³⁴ Naimie dine ailluena comini uaidua mei, ie llofueoicaigano nainomo jiai illanona, naimacimo llote:

—Cue cominina bu jaiacania, ie jítaille rafuedo jaiñena. Cue díbeimo naimie jaillamona, duere sefuicana jaite. Níbai naiemona fiodaite. Bu iese jaiacania, cue díbeimo naimie iite. ³⁵⁻³⁷ Duere sefuillana jaciruillamona, cue cominina bu jaiacaiñenia, ja muidomo faifite; iadedi duere sefuillana jaciruiñenamona, cue cominina bu jaiia, jaca faifíñeite. Cue cominina bu jaiñenia, níbai eo duere sefuiñeite. Níbai ailluena ra naimiemo iite; ia, ¿niese cue Moo dine riite? Nainomo naimie riñoeno faifite. ³⁸ Birui ite comini Jusiñamuina jítaiñedimaci. Naimiena jai faínonocaidimaci. Jeacinona finocana jaidimaci. Cuena bu meiruia, cue rafuena bu meiruia, dane cue bia, naimiena meiruitícue. Cuena meiruillamona: “Cristomo duidícue” bu lloiacaiñenia, íco cue bia: “Naimiedi cue comini” lloñeitícue. Jusiñamui jaienisaí díga, cue Moo dinena, monamona íco biitícue. Cue Moo uai cuemo illanona, ebire biitícue.

9

¹ Omoimo uanaicinona llotícue. Omoimona dajerie nia fiodaíñeitomoimo, illaimana ebire cue bairellena cioitomoi.

Jesús abi meidocaila rafue

(Mt 17.1-13; Lc 9.28-36)

² Seis dígarui illanona, anedumo comini iñenanomo Jesús jaide. Naimie díga jaillena, Pedrona uite. Jacobo jiai uite. Juan jiai uite. Jíaiie llofueoicaiganona uíñede. Nainomo rilla mei, naimaci uicomo naimie abi meidocaide. ³ Naie dacaiño naimie iniroi eo quenirecaide. Eo userecaide. Cai iniroimo jítoma lligaiñuamona ie isoi usere jaca jaiñede.

⁴ Naie facaise naimacimo Moisés micorí joreño, Elías díga, bairede. Elíadi Jusiñamui facaina jaie lloraima. Jesús díga ñaitíiaimaiai. ⁵ Iaimaiai jaiacania, Pedro Jesúsimo llote:

—Maestro, bene cai illana mare. Daje amani bisaini cai finollena, mare. Daje oie, jíaiie Moisés micorí ie, jíaiie Elías ie.

⁶ Eo jaciruilla jira, naimie ñaia rafuena raise uíñoñoeno jamai ebena ñaite. ⁷ Ie facaise uillie billamona, naimacina íbaide. Uilliemona Jusiñamui llote:

—Bimie cue isiruiga Jito. Naimie lluomo cacareillanona, iena íno —llote.

⁸ Ieconí oni erodajanona, dama Jesúsna ciodimaci. Jíainona cioíñedimaci.

⁹ Anedumona bitimacimo, naimacimo Jesús llote:

—Omoi aillí cíua rafuena bumo lloñoeno, cue fiodaillamona cue jillua dínorí. ¹⁰ Jesús llua isoi finodimaci. Iena bumo lloñedimaci; ia fiodaillamona naimie jilluana naimaci raise nia cacaiñena jira, iemo comecina facadimaci. ¹¹ Naimiemo llotimaci:

—Moisés micorí llogacinona llofueraini birui raicabitimaci: “Elías raillamie dane biite. Ie mei cai jilloitarama biite” raitimaci. Jusiñamui mona o billana ñnoticai. Odi cai jilloitaramana ñnoticai. Odi cai jilloitaramadiomo, ¿bue ñelli iese raitimaci?

¹² Uai ote:

—Raise ñnotomoi. Elías isoidimie jai bite, nana Jusiñamui jitailla rafue raise lollena. Jusiñamui ñbeimo naimaci illena, comini imaci comeciai meiduana llote. Jusiñamui facaina lloraini micoriai cue eo duere sefuillena cuetimaci. Comini cue jeare finollena cuetimaci. Iemo omoi comeciaina jiai faca. ¹³ Elías isoidimie jai bite; iadedi Jusiñamui facaina lloraima micorí jaie cuega isoi, naimaci jitailla jira, naimiena jai meinetimaci.

*Jesúdi Janaba anamo itimiena jillotaja rafue
(Mt 17.14-21; Lc 9.37-43)*

¹⁴ Ie jiaie llofueoicaigano ñine Jesús abido ria, nainomo ailluena comini itimacimo ride. Moisés micorí llogacinona llofueraini ñinena ie llofueoicaigano uaina uaitaside.

¹⁵ Jesús billana comini cñuanona, jacinaisidimaci. Naimiena feñollena, naimie ñine aisida jaidimaci. ¹⁶ Moisés micorí llogacinona llofuerainimo Jesús jicanote:

—¿Ñiese cue llofueoicaigano uaina uaitatomoí?

¹⁷ Uai oñedimaci; ia cominimona ñamie uai ote:

—Maestro, Janaba anamo cue jito illa jira, o ñine naimiena atidicue. Cue jito Janaba anamo illamona ñainide. ¹⁸ Nagarui Janaba bille ñiese, naimiena eniruemo uaitate. Iemona fueði mullede. Ie isidodi murude. Ie abi jaiare jaide. O llofueoicaiganomo jicadicue, Janabana oni oretallena; ia oretanidimaci. Ie jira Moisés micorí llogacinona llofueraini bie rafuena, o llofueoicaigano ñiga, uaina uaitatimaci.

¹⁹ Iena cacajanona, Jesús ie llofueoicaiganomo llote:

—Cue uai siñonana ñia ñinoñedomoi. Omoi ñiga are iticue. Raise omoi ñinollena, ¿ñie ñinori omoi ñiga iiticue?

Naie ñuidimie moomo llote:

—O jito cue ñine mai ati.

²⁰ Naie urue Jesús ñine atianona, Janaba naimiena ñaillitate. Iemona urue eniruemo uaide. Jabí-jabíde. Fue mullede. ²¹ Jesús ñinena ñaie urue moomo jicanote:

—¿Ñie ñinori o jitodi bie isoi ite?

Uai ote:

—Naimie uruenamona. ²² Janabadi, ñiga icaiño iraimo usillena, naimiena uaitate. Corobaillena, ñiga icaiño jñuimo jiai uaitate. Janaba oni o oretarenia, cocona ñuenail-lamona, cocona cano.

²³ Jesús uai ote:

—“O oretarenia” raitio. Ero, o jito jillotaredicue. Cueno o ñnoia, o jito jilloite.

²⁴ Naie urue moo ieconi llote:

—Ona ñnoticue. Raise ñia cue ñinoñenia, cuena raise ñnota.

²⁵ Naie facaise ailluena comini naimie ñine raire ofillana naimie cñuanona, Jesús Janabana lletade:

—Bie uruena ñaitatañedio. Naimiena cacaitañedio. Naimiemona oni jai. Naimie ñine dane biñeno.

²⁶ Ado cuirioillanona, naimiena eo rñire ñaillitajanona, Janaba oni jaide. Iemona ñaie urue fiodaitimie isoi erocaide. Naimiena cñuanona, nainomo itino raitimaci:

—Naimie jai fiodaite; ²⁷ —ia Jesús naimie onollina llñocaida, naimiena a ñaidanete.

²⁸ Iemona oni jaillanona, ñamie jofomo Jesús ñailli ria, naimie mo ie llofueoicaigano anado jicanotimaci:

—¿Bue ñellena Janabana oni oretanidicai?

²⁹ Jesús uai ote:

—Jusiñamuimo omoï jñamona, naimiena raise omoï ñnuamona, bie isoide Janabana oretaredomoï. Naimiena omoï raise ñnoñena jira, bie uruemonna Janabana oni oretañedomoï.

Jesús ie fiodaillena dane llofuia rafue

(Mt 17.22-23; Lc 9.43-45)

³⁰⁻³¹ Ie llofueoicaigano diga Jesús oni jaillanona, Galilea railla eniruemo jaide. Ie llofueoicaiganona naimie llofueiacana jira, naimie ie jaillana jiaie comini fidiana jitañede. Naimacimo llote:

—Monamona billanona, imana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci. Naie illaicomini cuena meineitimaci; iadedi darui amani illanona, jilloiticue.

³² Ie llofueoicaigano iena raise cacaiñedimaci; ia naimiemo iena jicanuana meiruitimaci.

Jesús ie llofueoicaigano moto imiëna ille rafue

(Mt 18.1-5; Lc 9.46-48)

³³ Capernaumo Jesús rilla mei, ie risoilla jofomo naimie ia, ie llofueoicaiganomo jicanote:

—Naisona cai bia, ¿nie isoide rafuena coniniri siadotomoï?

³⁴ Uai oñedimaci. Naimaci moto imiëna illena, naisodo siadocana bitimaci. Meiruillanona, uai oñedimaci.

³⁵ Naimie ana rainadaja mei, ie ecimo naimacina uaidote. Raite:

—Omoï moto imiëna bu iacania, jamai bue isoidimiëna naimie illa. Omoï muillaimana naimie jailla isoilla.

³⁶ Iena naimaci raise uiñollena, nainomo ite cominimona daje urue bai jainanocaida, naimaci motomo naimiëna jonete. Naimiëna menioita, naimacimo llote:

³⁷ —Jusiñamuimona bie urue jamai bue isoide. Abina iedoñede. Bie isoidimie cuemo duillamona, naimiëna feiñotimiedi cuena jai feiñote. Cuena feiñotimie Jusiñamuina jiaï jai feiñote, Jusiñamui cuena oretaja jira.

Jesúdi ie ñibeimo itinona llua rafue

(Mt 10.42; Lc 9.49-50)

³⁸ Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimiëna ciodicai. Cai diga naimie jaicabiñena jira, iena finuana rairuidicai.

³⁹ Jesús uai ote:

—Naimiëna rairuiñeno. Cue mamecido siño rafuena bu finoia, cuena jeare raire ñaiñeite. ⁴⁰ Cai ñibeimo itimiedi cai facaisena ite. ⁴¹ Ero, cuemo omoï duillamona, omoïna bu janore canoia, Jusiñamuimona ibana feiñoite. Omoïmo ñibai jamai jinuina fecaite; iadedi omoïna naimie canuamona, Jusiñamuimona ibana feiñoite. Ie jira naimie isoidino siño rafuena finuana rairuiñeno.

Jesúdi jeacinona finoñenana llofuia rafue

(Mt 18.6-9; Lc 17.1-2)

⁴² Jesús nia llofuate:

—Cuena como ñnotinona jeacinona finotaiacadimie iena finoñellena, naimie cimaiomo aillue nofici maianona, joraimo corobaillena naimiëna dotacadena, mare.

⁴³⁻⁴⁸ Biena ñaiticue. Nie isoide rafue omoïna jeacino finotaia, iena llinoñeno. Naie rafue ñine jaiñeno. Iemo eruaiñeno. Rana omoï jetaja jira, omoï ciua rana jira, omoï jitaillamona jeacinona finocabidomoï. Omoï abina omoï namatañenia, omoï onollina jaita. Omoï eillina jaita. Omoï uisina juicono. Iemona jeacinona finoñellena, Jusiñamui ñine daje onolli diga, daje eilli diga, daje uisi diga riitomoï; ia jeacino omoï finoia, iraimo jaitomoï. Nana omoï abi diga iraimo jaitomoï. Omoï comecina ñaiticue. Omoï abina

omoi raise namatallena, omoi comeci nano raise fino. Iraimo omoi jaiñellena, jeacino finoño. Naimacimo ite aiaí fioldaiñena jira, naie irai jaca duiñenamona, nainomo itino jaca duere sefuitimaci.

⁴⁹ 'Ero, birui omoi duere sefuillamona, cue cominina jai jaidinona uiñoitícue. ⁵⁰ Guille caimaretallena, sal mare; iadedi ie caimano jai iñenia, iena dane caimaretañedicaí. Ie isoide. Jeacino omoi finoia, omoi comeci caimare iñede. Jusiñamui jitaillacinona omoi finuamona, coniniri caimare omoi i. Coniniri uri omoi i.

10

Jesús iima ie aina dotaja rafuena llofua rafue

(Mt 19.1-12; Lc 16.18)

¹ Capernaumona ie llofueoicaigano diga, Jesús oni jaillanona, Judea railla enirue dine jaide. Jordán railla ille ruica díbeimo jaide. Ailluena comini naimie dine ofillamona, naimie llofueuilla isoi, naimacina llofue. ² Naimiena facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Iima ie aina dotajana rairuidio?

³ Uai ote:

—¿Niese Moisés micori llote?

⁴ Uai otimaci:

—Moisés micori jaie cuete: “Iima ie aina dotaacania, dotalle rabena nano cueite. Ie mei naiñaiñaona dotaite”.

⁵ Jesús uai ote:

—Jusiñamui uaina raise omoi iñoñena jira, Moisés micori iima ie aina dotajana rairuiñede; ⁶ iadedi nano dofoconi iese iñede. Enirue finua facaiseconi Jusiñamuidi come iaímaiaína finode. Imana finode. Riñaona jiaí finode. ⁷ Ie jira Jusiñamuidi jaie llote: “Ie ai diga illena, iima ie mooná faínonocaite. Ie eina jiaí faínonocaite. Ie ai diga illamona, menade comedi daamiena jai jaide” llote. ⁸ Menade come jai daamiena jai ite. ⁹ Jusiñamui iese iaímaiaína itataja jira, iima ie aina dotajana rairuidícue. Riño ie inina dotajana rairuidícue.

¹⁰ Jofomo ie llofueoicaigano diga, naimie nailli illanona, naimiemo bie rafuena jicanotimaci. ¹¹ Jesús dinena llote:

—Jiaie riño diga naimie illena, ie aina bu dotaia, naimiedi jeacinona jai finode. Ie aina jeare jiaí finode. ¹² Ie inina faínonocaillanona, jiaimiena nie riño uamona, naiñaiño jeacino jai finode.

Jesúdi naimie dine uruiaí billana jitailla rafue

(Mt 19.13-15; Lc 18.15-17)

¹³ Naie facaise Jesús dine comini naimaci jesanide diese atidimaci. Ie onolli naimacimo naimie joniana jitaídímaci. “Naimacina raise cano” ie Moomo lollena jitaídímaci. Ie llofueoicaigano iena rairuidímaci; ¹⁴ iadedi iena cacajano, Jesús icirite. Jesús raite:

—Uruiaí cue dine billesa. Naimacina rairuiñeno. Cuená bie isoi inotínodi Jusiñamui cominidímaci. ¹⁵ Bie uruiaí abina iedofnedímaci. Einamacimona jamái bue isoidímaci. Naimaci isoi bu iñenia, Jusiñamui cominina jaiñeitímaci. Jusiñamui naimiena sedallena, Jusiñamui cominina naimie jaiñeite.

¹⁶ Naie uruiaí dasarie meni-menioicaída, naimaci ifogímo ie onollina joneta:

—Jusiñamui omoína canoite —llote.

Ucuberedimie Jesús diga ñaía rafue

(Mt 19.16-30; Lc 18.18-30)

¹⁷ Ie llofueoicaigano diga Jesús oni jai jaillanona, aisicana damie naimie dine bite. Naimiena raise uaidollena, ie cañici ifodo rainadate. Raite:

—Maestro, odi maremedio. Jusiñamui diga ico cue jaca illena, ¿buena finoiticue?

¹⁸ Jesús uai ote:

—¿Bue ñellena odi: “Mare” cuena raitio? Dama damie maremie. Naimiedi Jusiñamui. Naimiemo jicano. ¹⁹ Moisés micori llogacinuaina ñnocana jai. Jaie cuete: “Comena meineño. O aiñede riño diga iño. Fñño. Jaiimiena o llogidoia, tainona lloño. O moo uaina ñno. O ei uaina ñno”.

²⁰ Uai ote:

—Maestro, uruena cue illa facaisemona nana bie llogacinuaina ñnoticue.

²¹ Jesús dinena naimiemo eruaillanona, naimie ie comecido jaide. Naimiemo llote:

—Omo daje rafue fiebide. Jusiñamui jitaillacino o jaiacania, o raise marebicaia-cania, omo ite raruiaina feca. Naie ucubena dueredinomo feca. Cuena o ñnuamona, monamo ico jaca iitio. Cue llofuegamiena o illena, mai cue diga bi.

²² Iena cacajano, naimiedi sunaite. Eo aillue ra naimiemo illa jira, iena naimie fecaacaiñena jira, sure jaide. ²³ Naimie jailla mei, ie llofueoicaiganomo eruaillanona, naimacimo llote:

—Ucuberedinodi Jusiñamui cominina jaillena eo sefuiruitimaci.

²⁴ Iena cacajano, iena naimaci raise cacaiñena jira, Jesús dane llote:

—Cue cominidomoi. Ero, ucuberedimiedi Jusiñamui cominina jaillena eo sefuiruite.

²⁵ Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiai raise jainide.

²⁶ Iena ie llofueoicaigano cacajano, Jusiñamui cominina ucuberedino raise jainina jira, “¿Ñiese dueredinodicaidi Jusiñamui cominina jaiticai?” raillamo comeciaina facadimaci. Raijicaillanona, coniniri raitimaci:

—Nana comini rana jitailla jira, ¿buca jillobiti?

²⁷ Naimacimo eruaillanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

²⁸ Pedro dinena llote:

—O llua isoi jai finodica. Nana cai rana fañonocaida, o diga jai jaicabidica.

²⁹ Jesús uai ote:

—Uanaicino lloiticue. Cuena naimie isiruillamona, cue rafuena naimie llamona, ie jofona bu fañonocaia, ie amatiaina bu fañonocaia, ie miriñuaina bu fañonocaia, ie moona bu fañonocaia, ie eina bu fañonocaia, ie uruiaina bu fañonocaia, ie eniruena bu fañonocaia, ³⁰ Jusiñamuimona birui ailluena ibana feiñoite. Duere sefuite; ia naimie isoi cue cominina ailluena jaillamona, naimie jofue iite. Ie amatiái, ie miriñuai, ie eitíai, ie uruai, ie enirue birui iite. Monamo naimie ico caimare iocire jaca iite.

³¹ Birui damieriemo ailluena ra illamona, Jusiñamuimo eo comecina facañedimaci. Naimacimona jamai bue isoiñedimaci; ia Jusiñamuimona ico jamai bue isoitimaci. Jaiainomo ailluena ra birui iñede; ia Jusiñamuimo comecina facadimaci. Naimacimona jamai bue isoidimaci; ia Jusiñamuimona ico jamai bue isoiñeitimaci.

Jesús ie fiodaillena dane llua rafue

(Mt 20.17-19; Lc 18.31-34)

³² Jerusalémo nia jaillanona, Jesús uicodo jaide. Nainomo naimie jaciruiño jaillamona, ie llofueoicaigano raijicaidimaci. Naimaci diga jaidino jaciruiocaia jaidimaci. Naimacina jiai meiniana jaciruitimaci. Ie llofueoicaigano diga ñaianona, naimiemo suille rafuena llote:

³³ —Ero, Jerusalémo jai jaidica. Monamona billanona, imana jaidicue; iadedi omoi illaicomini cuena gaitaitimaci. Gaitaja mei, cue meinellena lloiticue. Judíuaiñedino illaicominimo cuena fecaitimaci. ³⁴ Cueri jifanoitimaci. Cuena tuallaitimaci. Cuena faitimaci. Cuena meineitimaci; iadedi cue fiodailla mei, darui amani illanona, jilloiticue —llote.

*Jesús dine Jacobo Juan ia:maia: billa rafue**(Mt 20.20-28)*

³⁵ Naie facaise Jesús dine Jacobo, Juan diga bitia:maia:. Ia:maia: moodi Zebedeo. Raitia:maia:.

—Omo coco jicalle rafue cocoena finuana jita:dicoco.

³⁶ Jesús uai ote:

—¿Nie isoide rafuena jita:domico?

³⁷ Uai otia:maia:.

—Illa:mana o jailla mei, o ecimo coco illena o lluana jita:dicoco. Damie o nabeimo. Jia:mie o jarifebeimo. —Jia:ino afemo ia:maia: illena, iese llotia:maia:.

³⁸ Jesús dinena llote:

—Omico jicanuana raise uiñoñedomico. Cue eo duere sefuiticue. Llegi cacaiticue. ¿Ie isoi duere sefuiacadomico? ¿Ie isoi llegi cacaiacadomico?

³⁹ Uai otia:maia:.

—Jii. Sefuiacadococo.

Jesús dinena raite:

—Cue isoi duere sefuitomico. Llegi cacaitomico; ⁴⁰ iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

⁴¹ Iena jia:ie llofueoicaigano cacajano, naie ia:maia:iri iciritimaci. ⁴² Jesús nana naimacina uaiduanona, raite:

—Nana illa:cominidi naimaci anamo itinona ocuicabidimaci; ⁴³ iadedi omoi dine iese iñena. Omoi:mona bu imi:ena iacania, omoi mulla:mana naimie jaisoillasa. ⁴⁴ Omoi:mona bu imi:ena iacania, omoi:na naimie canocana jaisoillasa. ⁴⁵ Cuemona fueo. Biñedicue, cominina cue ocuillena; iadedi cominina canua:bidicue. Cue jitailla jira, nana comini facaina fioldaisa:biticue. Naimaci jeacinomona naimaci jillobillena, fioldaisa:biticue. Ailluena comini cuena inuamona, jilloitimaci. Coninina omoi canua —llote.

*Jesúdi Bartimeona jillotaja rafue**(Mt 20.29-34; Lc 18.35-43)*

⁴⁶ Oni jaillanona, Jericó railla naira:imo Jesús ride. Naiemona ie llofueoicaigano diga jaillanona, ailluena comini Jesús jinafona racadimaci. Naie facaise nai fuemo uisnidimie raide. Naimie mameci Bartimeo. Timeo jito. Nainomo jamai raide, ucubena jamai jica-jicallena. ⁴⁷ Nazaret ie Jesús jaillana naimie cacajano, ado cuirioide:

—David micori Jitona o illamona, Jusiñamuimona o billa jira, cuena duenai. Cuena cano.

⁴⁸ Naimie llicaillena, Jesús diga jaidino naimi:ena lletade; iadedi eo cuirioide:

—Maestro, David micori Jitona o illamona, cuena duenai.

⁴⁹ Naimi:ena cacajano, Jesús naidadajanona, llote:

—Naimi:ena cue dine uaido.

Bartimeona uaiduanona, raitimaci:

—O comecina ocuiño. Mai naidacai. Jesús ona uaidote.

⁵⁰ Iena cacajano, ie emodomo itiroina duiñuanona, raire naidacaida, Jesús dine bite.

⁵¹ Naimiemo Jesús jicanote:

—¿Niese ona cue nibaiana jita:idio?

Uai ote:

—Maestro, cioacadicue.

⁵² Jesús dinena uai ote:

—Cuena o inua jira, jai jillodio. Mai jai. —Iecon naimie jai cide. Jesús diga jaidino diga naimie jia: jaide.

11

Jesús illaïma isoi Jerusalémo jailla rafue
(Mt 21.1-11; Lc 19.28-40; Jn 12.12-19)

¹ Oni jaillanona, Jerusalémo iaireicaidimacimo, Betfagé railla nairaimo ie llofueoicaigano diga Jesús ride. Betania nainomo jiaï ite. Olivos railla anedumo naga nairai iaïmaïaï ite. Ie llofueoicaiganomona Jesús menamiëna orede. ² Raite:

—Bie nairai illa uicomo mai omico jai. Nainomo omico ria, cuinaca burritona baitomico. Ie emodomo nia buna jaiñede. Iena suiñuanona bene ati. ³ Omicomo: “¿Bue ñellena iena suiñodomico?” bu jicanoia, lloño: “Coco Nama iena jitaide. Nailli iena raïre abido oretaite llote”.

⁴ Naimie llua isoi, jaidiaïmaïaï. Naisomo jofo nasemo burritona baillanona, iena suiñodiaïmaïaï. ⁵ Ie facaise nainomo itino jicanote:

—¿Bue ñellena burritona suiñodomico?

⁶ Jesús llua isoi uai otiaïmaïaï. Ie muidona:

—Jee —raitimaci.

⁷ Burritona atidiaïmaïaï. Ie emodomo naimie llofueoicaigano naimaci iniroi jobianona, ie emodomo Jesús rainadate. ⁸ Naimiëna iobitallena, illaïma isoi naimie jaillena, diga comini, imaci iniroi diga, naiso motomo jobedimaci. Jiaïno nai fuemona raforona uanona, naiso motomo jobedimaci. ⁹ Dajerie Jesús uicomo jaidimaci. Dajerie naimie jinafona jaidimaci. Ado cuiriisite:

—¡Cai Jilloitaraima billa! Jusiñamui mamecido bitimie eo mare. ¹⁰ Cai illaïma David micori ifomo caina sedallena, damie billemo birui ocuridicaï. Jusiñamui caina jilloitajasa.

¹¹ Iese Jerusalémo naimie jaide. Nainomo rillanona, Jusiñamui jofomo jaide. Nainomo eruaide. Jitoma ana illa jira, ie doce llofueoicaigano diga, Betaniamo inillena jaide.

Jesús higuera railla riarana faidua rafue
(Mt 21.18-19)

¹² Ie areruido Betaniamona Jerusalémo abido ie llofueoicaigano diga Jesús bia, aimetaite. ¹³ Arena higuera railla riarana cïuanona, iena jibuide. Como firuide; ia naie llisilladi iñede. Ie llisilla facaise nia iñede. ¹⁴ Ie jira naie riarana llote:

—Biemona jaca llisiñeite. —Ie llofueoicaigano naimie lluaana cacadimaci.

Jesúdi Jusiñamui jofomona damieriena dotaja rafue
(Mt 21.12-17; Lc 19.45-48; Jn 2.13-22)

¹⁵ Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomo ite. Jusiñamuimo ofomaïaïna fecallena, naimiëmo toïca llaudaïaïna fecallena, nainomo comini jaisoidimaci. Naie comina ibatajanona, ofomaïaïna, toïca llaudaïaï diga, damierie fecauidimaci. Iena Jesús cïuanona, naimaci mesaïaïna oni caicode. Ucugina fecauidino rairacuai jiaï oni caicode. ¹⁶ Jofo facaimo marena tuilla jira, comini rana jamai uillanona, iedo jaisoidimaci. Atona tuidifodo jaisoidimaci. Iena Jesús rairuide. ¹⁷ Naimacina llofuate:

—Ie facaina loraïma micori Jusiñamui llogacino jaie cuega: “Cue jofo ite, nainomo nana comini cuemo jillena” cuega. Ero, ailluena omoi ibataja jira, naimie jofona firiruidino jofona omoi finoca.

¹⁸ Judíuai illaïcomini naimie finoca rafuena fidianona, naimiëna meinellena, coniniri siadotimaci. Ailluena comini naimie llofuiana ebiruillanona, rajjicaidimaci. Ie jira judíuai illaïcomini naimiëna jaciruillamona, naimiëna nia meinenidimaci. ¹⁹ Nairui navuida ie llofueoicaigano diga, Jerusalémona Jesús oni jaide.

Jesús faidoca riar duilla rafue
(Mt 21.20-22)

²⁰ Ie are ie llofueoicaigano diga, Jerusalén dine Jesús jaillanona, higuera railla riaru duillana ciotimaci. Nana ie jainao diga duillana ciotimaci. ²¹ Jesús navui are llwana Pedro uibiñuanona, naimiemo llote:

—Maestro, ero. O faidoca higuera jai duide.

²² Jesús uai ote:

—Jusiñamuina ñinocana jai. ²³ Uanaicinona omoimo lloiticue. Jusiñamui llwana raise bu ñinoia, naimie comeci igireñenia, bene ite anedumo naimie lloia: “Monailaimo o illena, benomona mai jai”, Jusiñamui ie jitaille rana finoite. ²⁴ Nie isoide rafue Jusiñamuimo omoi jicajia, naimie iena finuana omoi ñnuamona, iena naimie finoite. ²⁵ Jusiñamuimo o jiacania, jiaimie diga o rafue ia iena feita. Ie isoí cai Moo Jusiñamui omoimo ite jeacino jiaí feitaite; ²⁶ iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

Jesúdi ie siño uaina llua rafue

(Mt 21.23-27; Lc 20.1-8)

²⁷ Jerusalémo naimaci rillanona, Jusiñamui jofomo Jesús fo jailla mei, judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamací. Diese billanona, ²⁸ jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

²⁹ Jesús dinena uai ote:

—Omoimo daje rafuena nano jicanoiticue. Raise omoi fairioia, omoimo cue uaido cue finoca rafuena lloiticue. ³⁰ Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

³¹ Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori llwana ñnoñedomoi?” ³² “Comini” cai fairioia, bene itino caina nibai meineitimaci, Juan micoridi Jusiñamui facaina lloraíma naimaci railla jira.

³³ Ie jira fairiotimaci:

—Uiñoñedícai.

Jesús dinena raite:

—Ie muidona cuemo nie isoide uai illana omoimo lloñeiticue.

12

Jesúdi marañede majiraini rafuena llua rafue

(Mt 21.33-46; Lc 20.9-19)

¹ Judíuai illaicominimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi lláite. Jiaruido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona, jiaíno mo fecade. Ie mei jiaie eniruemo jaide. ² Uvas jai einaila facaise riaraiaina sedaraini dine naie patrón ie mullaímana orede, naie illimona dajerie riaru llisilla ollena; ³ iadedi naie sedarainidi ie mullaímana fatimaci. Ie mei naimiemo riaru fecañeno naimiema abido oredimaci. ⁴ Ie mei patrón jiaie mullaímana orede. Naimie ifogina bofedimaci. Naimiema jeare finodimaci. ⁵ Ie mei patrón jiaimiena orede. Naimiema meinetimaci. Ie mei ailluena mullaíaina orede. Damieriena fatimaci. Damieriena meinetimaci. ⁶ Patrómo ie isiruiga jito ite. “Cue jitona jaciruitimaci. Naimie uaina ñnoitimaci. Naimiema oretaiticue” patrón comecina facade. ⁷ Riaraiaina sedaraini naimiema ciuanona, coniniri raitimaci: “Bimiemo bie illi fiebiite, naimie moo fiodailla mei. Naimiema cai meinelli, bie illi caimo fiebillesa” raitimaci. ⁸ Naimaci dine naimie rilla mei, naimiema meinetimaci. Ie mei ie

abina illimona jino dotadimaci. ⁹ Iena fidia mei, ¿niese naie patrón nibaite? Ero, naimie billanona, ie illina sedarainina fuidoite. Ie mei jiañona ie illina sedataite.

¹⁰⁻¹¹ Naimacimo Jesús llote:

—Naie illi sedaraini isoidomoi. Jusiñamui facaina lloraima micori omoina jaie cuete. Ie ciegafuena raise facañedomoi. Naimie micori ciega:

Jofo finoraini jitaiñena noficidi nana naie jofomo ite nofici baifemo jai uaide.

Jusiñamui iena finotate.

Iena cai uiñuamona: “Eo mare” raiticai

ciega. Jusiñamui cominina damerie jaillana naimie micori cuete. Jusiñamui ortagamiena damerie jitaiñenamona, naimie cominina jaiñeitimaci; iadedi Jusiñamui ortagamiena ailluena ñnuamona, naimie cominina jaitimaci. Ero, Jusiñamui facaina lloraima micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi.

¹² Judíuai illaicomini iena cacajanona, Jesús naimacina ñaiana naimaci uiñuamona, naimiena gaitacadimaci; ia cominina jaciruitimaci. Ie jira naimiemona oni jaidimaci.

Jesúmo gobiernomo ucubena fecajana jicanua rafue

(Mt 22.15-22; Lc 20.20-26)

¹³ Judíuai illaicomini jailla mei, dajerie fariseuai cominina Jesús dine oredimaci. Illaima Herodes díbeimo itinona oredimaci. Naimie raise uai oñenia, naimiena duere finollena, Jesúsna facaciacadimaci. ¹⁴⁻¹⁵ Naimiemo llotimaci:

—Maestro, uanaicinona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio. Omo rafuena jicanoiacadicaí. Dani Jusiñamuina sedadicaí; iadedi romanuai railla nairai anamo birui cai illa jira, ¿naimaci illaima Césarmo ucubena cai fecajana rairuidio? Caimo llono —llotimaci.

Naimaci mareuidinona abina caitadinona naimie uiñuamona, naimacimo llote:

—¿Bue ñellena cuena facacitomoi? Ucube cuemo acata.

¹⁶ Ie jira acatatimaci. Naimacimo jicanote:

—¿Bu ie joreño nainomo ite? ¿Bumo jainaiade bie ciega radi?

Uai otimaci:

—César.

¹⁷ Jesús dinena raite:

—César iena itedi, Césarmo ille. Jusiñamui iena itedi, Jusiñamuimo ille —raite.

Naimie lluaña cacajano, naimie raise uai ua jira, ieri rajicaidimaci. Naimie iese llua jira, naimiena duere finonidimaci.

Jesús dine saduceuai railla comini billa rafue

(Mt 22.23-33; Lc 20.27-40)

¹⁸ Naie facaise saduceuai railla comini naimie dine bitimaci. Fiodaillamona jaca buna jilloñellena ñnotimaci. Jesúmo llotimaci:

¹⁹ —Maestro, cai facaina Moisés micori jaie ciega: “Iima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” ciega. ²⁰ Bie rafuena uiñoiacadicaí. Siete amatiai ite. Nano doforamie ie aina ote. Naimie nia uruiainide fiodailla. ²¹ Ie emodo imie ie ama feciñoña ote. Naimie uruiainide jiai fiodailla. Naie siete digamiedemona iese sefuide. ²² Uruiainide nana fiodailla. Ja muidomo naie riño jiai fiodaite. ²³ Fiodaillamona, ico naimaci jilloiadedi, ¿bu naie riño ienite? Naiñaiño siete digamienda inirede —llotimaci.

²⁴ Jesús uai ote:

—Moisés micori ciegafuiaína raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi. ²⁵ Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisaí ainidimaci. Ininidimaci. Ie isoi naie siete amatiai iitimaci. ²⁶ Fiodaitino ico jilloillena omoimo

lloiticue. Moisés micorí jofue iñenanomo illa facaise, amena boode motodo Moisés micorímo Jusiñamui ñaia facaise, naimie micorímo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. ²⁷ Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaina jiai jillotaite. Fiodaillamona jilluana omoi raise uiñoñedomoi —llote.

Jesús nanoca llogacinona llofuia rafue

(Mt 22.34-40)

²⁸ Naie facaise Moisés micorí llogacinona llofueraima Jesús dine billanona, naimiedi comini Jesús uaina uaitajana cacade. Jesús raise uai uana cacajano, Jesúmo jicanote:

—Moisés micorí jaiie llogacinuaimona, ¿nie llogacino ua nanoca llogacinona?

²⁹ Jesús dinena uai ote:

—Moisés micorí jaiie cuela: “Israel comini, bie rafuemo cacarei. Cai Nama Jusiñamui jaca dajede. ³⁰ Omoi jitailla jira, nana omoi comeciái diga, cai Nama Jusiñamuina isirui. Naimiemo omoi comeciaina eo faca”. ³¹ Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”. Bie mena llogacino jaiie llogacinuai baifemo faite.

³² Naie llofueraima dinena uai ote:

—Maestro, raise llotio. Jusiñamui jaca dajede. Jiaimie cai sedallena iñede. ³³ Cai jitailla jira, nana cai comeciái diga naimiena cai isiruia, naimiemo cai comeciaina eo facaia, cai abina cai isiruilla isoi cai ecimo itinona cai isiruia, Jusiñamuina raise sedadicaí. Bie rafuedo naimiemo toica ocaina fecajana baifemo faite. Bie rafuedi naimiemo cai ra fecajana baifemo faite.

³⁴ Naimie raise uai ua jira, naimiemo Jesús llote:

—Iese o ñnocana jaiia, Jusiñamui jitailla isoi, ie cominina raire jaitio. —Ie facaisemona buna naimiena facaciaibiñede.

Jesús dinena fariseuai cominimo jicanua rafue

(Mt 22.41-46; Lc 20.41-44)

³⁵ Jusiñamui jofomo Jesús jailla mei, nainomo itinomo jicanote:

—¿Ñiese Moisés micorí llogacinona llofueraini Cristona raitimaci? ¿Ñiese naimiedi David micorí jitona raitimaci? ³⁶ Jusiñamui Joreñodi David micorina ñaitatajanona, David micorí llote:

Jusiñamuidi cue Namamo llote: “Illaimana o illamona, cue nabei dine ana raí.

Ona ñnoñedino o anamo itataiticue”.

³⁷ “Cristodi cue Nama” David micorí raite. Iese naimie micorí railla jira, Cristo David micorí afemo faite. Naimiedi jamai David micorí jitoñede; ia jiai ie Nama. —Nainomo itino naimie llofuiana iocire cacareidimaci.

Jesúdi judúuai illaicominiña ñaia rafue

(Mt 23.1-36; Lc 11.37-54; 20.45-47)

³⁸ Jusiñamui jofomo Jesús nia llofuianona, raite:

—Moisés micorí llogacinona llofueraimona abina rairui. Ilaicominiña naimaci itimacidená, naimacina comini cioillena, eo mare ñiroina jitaacacabidimaci. Níne naimaci macaria, naimaci jamai bue isoíñedínona itimacidená, comini naimacina uaiduana gaídímaci. ³⁹ Comini naimacimo acarillena, ofiracomo uicomo raíacadímaci. Rafue ia: “Jamai bue isoíñedícaí” raillamo comecina facajanona, rafue nama ecimo raíacadímaci. ⁴⁰ Feciñuaimona rana ocabillanona, naiñaiñuaina duere finodímaci. Naimiena eo sedadímacidená, Jusiñamuimo are jicabidímaci. Iese naimaci icabilla jira, Jusiñamui naimacina jaiie comini baifemo duere finoite.

Jesúdi Jusiñamui jofomo duerede feciño ucube fecajana ciua rafue

(Lc 21.1-4)

⁴¹ Jusiñamui jofomo Jesús nia ia, ucube fecarano uicomo ana raide. Nainomo comini ucubena joniamo eruaide. Ailluena ucuberedino ailluena ucubena jonetimaci. ⁴² Ie facaise eo duerede feciño menaruñu jonete. ⁴³ Iena cianona, naimie dine ie llofueoicaiganona uaiduanona, naimacimo llote:

—Bie eo duerede feciño nana jiaie comini jonia baifemo jonete. ⁴⁴ Naimacimo ailluena ite ucubemona janore fecadimaci. Naiñaiño eo duerede; iadedi nana naiñaiñoite ite ucubena jonete. Ie jira jiaino baifemo jonete.

13

Jesúdi Jerusalémo ite Jusiñamui jofo judaiana llua rafue (Mt 24.1-2; Lc 21.5-6)

¹ Jusiñamui jofomona ie llofueoicaigano diga, Jesús jino jaidemo, ie llofueoicaiganomona Jesúmo damie raite:

—Maestro, bie jofomo ite noficiai co ebirede. Bico eo ebire cide.

² Jesús dinena uai ote:

—Bie jofo birui eo mare; ia nana bie jofomo ite noficiai ico judaisite —llote.

³ Ie mei Olivos railla anedu dine rillanona, Jusiñamui jofo uico dine Jesús naie anedu muidomo ana raide. Ie facaise Pedro, Jacobo diga, Juan diga, Andrés diga, eneno illanona, Jesúmo llotimaci:

⁴ —Jusiñamui jofo judaisillana omo jicanoiacadica. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

⁵ Uai ote:

—Omoina bie rafuena bu jifueñellena, omoi abina rairui. ⁶ Ailluena comini cue mamecido billemona: “Cristodicue” raitimaci. Diga cominina jifueitimaci. Iemona omoi abina rairui. ⁷ Jobaimia illena fiditomo; iadedi jaciruiño. Iese suite; iadedi abido nia biñeiticue. ⁸ Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo ñuisañuai suite. Diga illanuaimo comini aime guitimaci. Iese suia, omoi duere sefuillifue omoimo suite. ⁹ Abina rairui. Dajerie omoina llogidoitimaci. Omoina gaitaja mei, naimaci ofiracomo omoina faitimaci. Cueno omoi duilla jira, omoina gaitajanona, omoina duere finollena, illaicomini dine omoina uitimaci; ia naimacimo cue rafuena lloitoimo. ¹⁰ Diga comini cue rafuena nana nairaimo lloitoimaci, nana nairai iena cacaillena. Ie mei abido biiticue. ¹¹ Naie illaicomini dine omoi ia, juez dine omoi ia, omoi abi riidollicinomo omoi comeciaina jarire facañeno. Naie facaise omoi ñaillicinona uiñoitomo. Dani omoi comeciainicodo ñañeitomo; ia Jusiñamui Joreño uaido ñaitomo. ¹² Cueno inotomo; ia ailluena cuena inoñeitimaci. Cueno omoi inua jira, omoina enoitimaci. Iemona dajerie ie amana meinetallena, naimiena llogidoite. Dajerie moodi ie uruena meinetallena, naimiena llogidoite. Dajerie uruiaidi naimaci moona, naimaci eina meinetallena, naimacina llogidoitimaci. ¹³ Cue cominina omoi illamona, nana nairai omoina enoitimaci; iadedi cuena fainonocaiñedimie ja muidomo monamo jaca iite. Naimiena jillotaiticue. ¹⁴ Cue lluomo cacarei. Jusiñamui facaina lloaimadi jiaime jearede rafue finollena jaie llote. Naie rafue suia, Jusiñamui jofomo Jusiñamuina sedañeitomo. Nainomo ite jearede rafue finuana omoi cianona, naimemona omoi jillobillena, duere omoi sefuiñellena, Judeamo omoi illamona, aneduai dine omoi aisi. ¹⁵ Jofo emodomo omoi ia, ana billanona, aneduai dine raire rillena, jofomo jaiño. Nainomo ite rana omoi diga uiño. ¹⁶ Aneduai dine raire rillena, illimo omoi ia, abido jofomo biño, omoi iniroi omoi diga uillena. ¹⁷ Naie rafuemona jillobillena, naie facaise urueside riño duere sefuite. Uruena nia jirode riñodi jiaie duere sefuite. ¹⁸ Eo duere sefuiñellena, Jusiñamuimo omoi jicano, rollime facaiseconi bie rafue suiñellena. ¹⁹ Naie facaise comini eo duere sefuitimaci. Jusiñamuidi enirue finua facaisemona iese comini nia duere sefuiñedimaci. Ico iese eo duere sefuiñeitimaci. ²⁰ Naie facaise ianori

fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

²¹ Te facaise omoimo bu raia: “Jadi, Jusiñamui facaina lloraima benomo birui bairede. Naimiedi Cristo”, iena ñnoñeno, Jiaimie raia: “Oni batine Cristo birui bairede”, iena ñnoñeno. ²² Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. ²³ Te jira omoi abina rairui. Ero, bie rafue nia suiñenia, iena omoimo jai lloticue.

Jesús abido ie bille rafue

(Mt 24.29-35, 42-44; Lc 21.25-36)

²⁴ Naie duere sefuilla facaise meinoconi, jitoma lligaiñoñeite. Fivui jiai lligaiñoñeite. ²⁵ Monamona ucua ana llujite. Nana naie radi jaidisite. ²⁶ Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue. ²⁷ Cue jaienisaia cue ecimona oretaiticue. Cue fetocano diese naganomona ofitaitimaci.

²⁸ Higuera railla riaromona omoi fueo. Bie enruemo naie riaru firuillamona, fiemona raire illana uiñotomoi. ²⁹ Te isoide. Bie rafue ico suia, cue billirui iaiei illena uiñotomoi. ³⁰ Uanaicinona omoimo lloticue. Nana bie rafue suille facaiseconi bie nairai nia iite. ³¹ Mona enruue diga fuite; iadedi cue lloga uai jaca suite. ³² Cue abido billirui jaca bu uiñoñede. Jusiñamui jaienisaia iena uiñoñedimaci. Jusiñamui Jitodicue; iadedi cue abido billiruina jiai uiñoñedimaci. Dama cue Moo iena uiñote. ³³ Abina rairuicana jai. Naimie omoina canollena, Jusiñamuimo jiai jicabi. Cue billirui omoi uiñoñena jira, iemo ocuiri.

³⁴ Iena omoi raise uiñollena, bie rafuena lloticue. Patrón jiaie enruemo jaide. Nia jaiñenia, ie mullaiaia ie jofona sedatate. Nagamie ie maijille ocuide. Jofo nasena sedadimemo naimie billemo raise ocurillena llote. ³⁵ Naie patrón abido billena naimaci uiñoñena jira, naga hora iemo ocuritimaci. Nibai navuida baife biite. Nibai daferuise biite. Nibai atava ñaia facaise biite. Monaia, nibai biite. ³⁶ Ebena naimie biite. Inidimacimo naimaci baisaibi raillanona, naimaci jaca ocurilla. ³⁷ Te isoide. Ebena biiticue. Cue abido billirui omoi uiñoñena jira, iemo jaca omoi ocuiri.

14

Judíuai illacomini Jesúna gaitallena, siadua rafue

(Mt 26.1-5; Lc 22.1, 2; Jn 11.45-53)

¹ Naie facaise pascua railla rafue illena, menarui fiebide. Naie facaise llomenico guille rafue jiai ite. Naie rafue ia, siritaga rana jaca guiñedimaci. Egiptomona naimaci jaiagai jillobillana comecillena, naie rafue ite. Judíuai illacomini Jesúna jifuiano gaitaacadimaci. Naimiena meineiacadimaci. Iena siadua mei, ² raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaiñenamona, comini cai diga fuiritimaci. Nia sedaiticai.

Jesúmo riño caimare soride ra totaja rafue

(Mt 26.6-13; Jn 12.1-8)

³ Betania railla nairaimo Jesús jaillanona, Simón jofomo jaide, Simódi jaie efonaitimie. Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide.

⁴ Damierie iena cianona, iciritimaci. Coniniri dani ñaitimaci:

—Naie ra jamai dotade. Jai faifide. ⁵ Iena fecacadena, trescientos ucubena feiñote. Fecaja mei, naie ucube dueredinomo fecadena, caimona mare. —Naiñaiñona iese ñaitimaci.

⁶ Naimaci ñaiana Jesús uiñua jira, naimacimo llote:

—Dama ite. ¿Bue ñellena naiñaiño na jeare ñaitomoi? Mare rafuena cuemo finode. ⁷ Omoi diga dueredino jaca itimaci. Niruido o jitaia, naimacina canoredomoi; ia omoi diga jaca iñeiticue. ⁸ Cue facaina naiñaiño finoacana diese jai finode. Nia fiodañedicue; ia cue fiodaillirui facaina naiñaiño iese finode. ⁹ Omoimo uanaicinona lloiticue. Ninomo cue mare finoca rafuena bu lloia, naiñaiño na uibiñollena, nana cominimo naiñaiño finoca rafuena lloite.

Judas micori raillamie Jesúsna gaitataiacana rafue
(Mt 26.14-16; Lc 22.3-6)

¹⁰ Ie facaise Jesús llofueoicaiganomona Judas Iscariote micori raillamiedi Jesúsna gaitatallena, Jusiñamui diga nanoca ñairaini dine jaide. ¹¹ Iena cacajano, iobidimaci.

—Iena o finoia, omo ucubena fecaiticai —lloitimaci. Iemona Jesúsna gaitatalliruimo Judas ocuride.

Jesúdi ie fiodaille rafuena llua rafue
(Mt 26.17-29; Lc 22.7-23; Jn 13.21-30; 1 Co 11.23-26)

¹² Llomenico guille rafue illanona, judíuai comini toica llaudaiaina fajarui illanona, Jesúsno ie llofueoicaigano jicanote:

—¿Ninomo pascua railla rafue ie guille finuana jitaideo?

¹³ Naimacimona menamiena oretajanona raite:

—Jerusalémo omico jaillanona, nogodo jinuina uitimiena cioitomico. Naimiena raca.

¹⁴ Naimie jailla jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’ ” ¹⁵ Ie mei omicomo afebebamo ite aillue cuartona acataite. Na raruiai diga ite. Nainomo cai guille fino.

¹⁶ Jesús llua isoi jaidiaimaiai. Jerusalémo rilla mei, naimie llua isoi baitiaimaiai. Pascua rafue guille finodiaimaiai. ¹⁷ Nairui jitoma ana itemo, ie llofueoicaigano diga, Jesús nainomo guisaide. ¹⁸ Mesamo guitimacimo, Jesús llote:

—Omoimona damie cuena gaitataite. Naimie cue diga bene jai guite.

¹⁹ Iena cacajanona, sunaitimaci. Damierie naimiemo jicanoside:

—¿Cuena ñaitio?

²⁰ Uai ote:

—Omoimona damie bie platomo cue diga llomenico diga mutade. ²¹ Jusiñamui facaina lloiraíma micori cueda isoi, monamona jai billamona, fiodaíticue; iadedi cuena gaitataitimie eo duere sefuite. Naimie jeiciñegadena, cuemona mare.

²² Naimaci nia guitimacimo, llomenicono Jesús llinuanona, Jusiñamuimo iobillacinona fecaja mei, llomenicono tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi comecina facajano, iena guiño.

²³ Ie mei naimie jiroracona jiai llinote. Jusiñamuimo iobillacinona llua mei, naie jiroracomo jai totaca vino naimacimo fecade. Iemona nana jirodimaci. ²⁴ Naimie raite:

—Cue fiodaillamona, dama cue diaillamona, jeacino anamona ailluena jillotaiticue. Jusiñamui jiaie rafue birui itatajamona, naimaci jeacino oni dotajana jai llote. Bie vinodi naie rafue facai ie. ²⁵ Omoína bene dane iese caimare nabaiñeiticue. Cue Moo sedajanomo omoi diga cue ia, nainomo omoína dane iese caimare marena nabaiticue.

Jesúdi Pedro naimiena januana llua rafue
(Mt 26.30-35; Lc 22.31-34; Jn 13.36-38)

²⁶ Iobilla rua Jusiñamuimo naimaci rua mei, Olivos railla anedumo Jesús ie llofueoicaigano diga jaide. ²⁷ Naimacimo llote:

—Cuena fainonocaitomoi. Jusiñamui facaina lloiraíma micori iena jaie cueda: “Toica llaudaiai sedaraímana meinetimaci. Naimie toíniai uaficaida jaitimaci” cueda. Naimie

mícori caina cuete. ²⁸ Ero, fiodaillamona cue jillua mei, omoi uicodo Galileamo jaiticue, nainomo omoi diga dafai fillena.

²⁹ Pedro uai ote:

—Nana jiaíno ona fainonocaia, ona jaca fainonocaiñeiticue.

³⁰ Jesús dinena raite:

—Uanai omo lloiticue. Ja naio itava menacaiño nia ñaiñenia, dacaiño amani cuena janoitio.

³¹ Pedro dinena riire llote:

—O diga cue fiodaiadedi, ona janoñeiticue.

Nana ie llofueoicaigano daje uaido jiai raitimaci.

Jesúdi Getsemanímo Jusiñamuimo jia rafue

(Mt 26.36-46; Lc 22.39-46)

³² Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoi mona oni bai janore jaiticue. Cue Moo diga ñaillena jaiticue.

³³ Naimie diga Pedrona uite. Jacobona uite. Juan jiai uite. Naimie sunaicaide. Ie comeci uri iñede. ³⁴ Naimacimo llote:

—Cue comeci sunaicaide. Niadi fiodaiticue. Benomo fiebi; ia nia iniñeno cue facaina omoi jii.

³⁵ Naimie janore bai jaillanona, eniruemo bitadate. Naimie duere sefuiñellena, Jusiñamuimo jide:

³⁶ —Ore Moo, nana rana finoredio. Cuena legi cacaitañeno. Cue jitailla isoi cuena finoñeno; iadedi o jitailla isoi cuena fino.

³⁷ Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—Simón, ¿niese raire inidio? daje hora nia iñedemo. ³⁸ Iniñeno. Taife ramo omoi na fai raillano, iena omoi inoñellena, Jusiñamuimo jii. Omoi comeci mare rafuena finoacade; iadedi omoi comeci daní ocuiñoñede. Ie muidona Jusiñamuimo jii, omoi na naimie ocuiñotallena —llote.

³⁹ Ie mei dane jii llena jaide. Ailli naimie jia isoi, dane jide. ⁴⁰ Ie llofueoicaigano dine dane billanona, naimaci uisi llirioilla jira, naimaci inisitemo ride. Naimacina casitajano, Jesús naimaci diga ñaite; ia naimaci dinena uai uana uiñoñede. ⁴¹ Dane jia mei, ie llofueoicaiganomo dane billanona, naimacina casitajano, llote:

—¿Niese nia inidomoi? ¿Niese jafaici nia otomoi? Jai macabaite. Cue fiodaille facaise jai ite. Jusiñamui jitailla jira, cuena ja gaitajanona, naimiena inoñedino anamo ja iticue.

⁴² A naidacai. Maiña. Cue gaitataitimie jai bite.

Jesúna gaitalle rafue

(Mt 26.47-56; Lc 22.47-53; Jn 18.2-11)

⁴³ Jesús nia ñaitemo, ieconi Judas bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Naimaci butaralluna jiai atidimaci. Jusiñamui diga nanoca ñairainimona bitimaci. Moisés mícori llogacinona llofueraimona bitimaci. Naimaci einamacimona bitimaci. ⁴⁴ Jesús dine naimaci nia riñenia, Judas naimie diga bitinomo jai llote:

—Jesúna omoi uiñollena, naimiena llibanoiticue. Ie mei naimiena gaita. Naimiena raise maianona, naimiena oni uiño.

⁴⁵ Jesús dine naimie rillanona, Judas Jesús dine raire jaide. Naimiena uaidote:

—Maestro, jai biticue. —Ieconi naimiena llibanote. ⁴⁶ Ie jira Jesúna gaitadimaci.

⁴⁷ Iena cuanona, Jesús diga itinomona damie ie lloebi llinuanona, naimiedi nanoca ñairaima ie mullaima jefona jaibonote. ⁴⁸ Naimiena gaitadinomo Jesús llote:

—Omoi lloebina atidomoi. Omoi butaralluna atidomoi. Cuena gaitallena, firiraimadicueta cuemo omoi billa. ⁴⁹ Jusiñamui jofomo nagarui llofuecabiticue. ¿Bue ñe nainomo cuena gaitañedomoi? Cuena jai omoi gaitajamona, Jusiñamui facaina lloraini micoriai ciegafuia suite.

⁵⁰ Ie facaise nana naimie llofueoicaigano naimiena fainonocaillano, aisidimaci.

Jesús jinafona conirue racaja rafue

⁵¹ Ie facaise daje conirue Jesús jinafona racade. Jamai abimo iniroi ferinocaida racade. Naimiena cüanona, comini naimiena gaitadimaci; ⁵² ia ie iniroina fainonocaillanona, taimiena aiside.

Jesúdi judíuai illaicomini dine illa rafue

(Mt 26.57-68; Lc 22.54, 55, 63-71; Jn 18.12-14, 19-24)

⁵³ Jesúna gaitaja mei, Jusiñamui diga nanoca ñairaima dine naimiena uitimaci. Nana judíuai illaicomini itimaci. Nanoca ñairaini itimaci. Einamací jiaí itimaci. Moisés micorí llogacinona llofueraini jiaí itimaci. ⁵⁴ Pedro naimaci jinafona aarena racade. Jusiñamui diga nanoca ñairaima nairaibirimo jaide. Jofono sedadino diga nainomo ite iraimo agaide.

⁵⁵ Naimiena meinellena, nana naie illaicomini Jesúmo nicino illana uiñoiacadimaci. Iena coniniri siadotimaci; iadedi naimiemo jaca nie isoide marañede rafue illana uiñoñedimaci. ⁵⁶ Diga comini Jesúna llogidotimaci; ia tainona llotimaci. Daje isoi lloñedimaci. ⁵⁷ Damierie billanona, tainona llogiduanona, raite:

⁵⁸ —Bimie lluaña cacadicaí. Jusiñamui jofona jeare ñaite. Naimie llote: “Jusiñamui jofona comini finodimaci; ia iena cue judaíanona, darui amani illanona, jiaie finoiticue. Comini iena finoñeitimaci”. ⁵⁹ —Iese llotimaci; ia daje isoi lloñedimaci.

⁶⁰ Naimaci motomo Jusiñamui diga nanoca ñairaima naidadajanona, Jesúmo jicanote:

—¿Ñiese uai oitio? ¿Nie isoide rafue ona llogidotimaci?

⁶¹ Jesús dinena uai oñede. Naie ñairaima jicanote:

—¿Odi Cristodio? ¿Odi Jusiñamui Jitodio?

⁶² Jesús uai ote:

—Jii, naimiedicue. Monamona jaie cue billamona, imana jaidicue; ia ico jiairuido illaimana cue illena, Jusiñamui ecimo cue raillena, omoi nairai cioitimaci. Mona uilliemmo cue abido billena jiaí cioitimaci.

⁶³ Iena cacajanona, icirillanona, naie nanoca ñairaima dama ie iniroina cuaranote. Raite:

—Jiaíno naimiena llogidollena jai jitañedicaí. ⁶⁴ Jusiñamuina naimie jeare ñaiana jai cacadomoi. ¿Ñiese naimiena raitomoi?

Jiaie illaicomini dinena:

—Naimie fiódaillesa —llotimaci.

⁶⁵ Ie facaise damierie naimiena tuallaítimaci. Ie uiecona ibaila mei, naimiena ducoídimaci. Raitimaci:

—Bu o ducoia caímo llono.

Naimiena gaitadino dinena naimiena jiaí ducoídimaci.

Pedrodi Jesúna janua rafue

(Mt 26.69-75; Lc 22.56-62; Jn 18.15-18, 25-29)

⁶⁶ Naie facaise Pedro nairaibirimo ite. Naie nanoca ñairaima mullaíñuaimona dañaiño nainomo billanona, ⁶⁷ Pedro agaillana ciode. Raite:

—Nazaret ie Jesús cominidio.

⁶⁸ Pedro iena januano, raite:

—O lluaña uiñoñedicue. Iena raise cacaiñedicue.

Ie mei nase fueo jaide. Naie facaise itava dacaiño ñaite. ⁶⁹ Naie mullaíño naimiena dane cüanona, nainomo jamai itinomo llote:

—Bimiedi Jesús ie llofueoicaigano imie.

⁷⁰ Iena Pedro dane janote. Dallu illanona, nainomo jamai itino Pedromo llote:

—Odi Galilea imiedio. Jesús diga jaicabidio.

⁷¹ Uai ote:

—Uanai cue lloñenia, Jusiñamui cuena duere finoite. Uanaicinona cue llwana naimie uiñote. Ero, omoi llogamiēna uiñoñedicue.

⁷² Ieconī itava dane ñaite. Iena cacajano, Pedro Jesús llwana uibiñote. Jaive naio Jesús Pedromo llote: “Itava menacaiño nia ñaiñenia, dacaiño amani cuena janoitio”. Iena uibiñuamona, Pedro eo eede.

15

Pilato dine Jesús illa rafue

(Mt 27.1, 2, 11-14; Lc 23.1-5; Jn 18.28-38)

¹ Jitiramo monaidemo, judíuai illaicomini danomo siadotimaci. Jusiñamui diga nanoca ñairaini itimaci. Naimaci einamacī jiaī itimaci. Moisés micori llogacinona llofueraīni jiaī itimaci. Siadua mei, Jesúsna maianona, Pilatomo uitimaci. Romanuai railla nairaī anamo naimaci illa jira, Pilatodi naimaci gobernador. ² Pilato naimiemo jicanote:

—¿Judíuai comini illaimadio?

Jesús uai ote:

—Jii.

³ Ie muidona Jusiñamui diga nanoca ñairaini Jesúsna llogidotimaci:

—Naimie diga marañede rafuena finode —llotimaci.

⁴ Pilato dinena naimiemo jicanote:

—¿Ñiese uai oñedio? Ona eo llogidotimaci.

⁵ Jesús nia uai oñena jira, Pilato uainicaide.

Pilatodi Jesús fiodaillana llua rafue

(Mt 27.15-31; Lc 23.13-25; Jn 18.38-19.16)

⁶ Naga año pascua railla rafue facaiseconi cárcelmo itinomona Pilatodi comini jicacamiēna jamai jino orede. ⁷ Bie facaise cárcelmo Barrabás raillamie ite. Gobierno diga naimie navui jobairilla jira, naie facaise comena naimie meīnia jira, cárcelmo ite. ⁸ Ie facaise ailluena comini Pilato dine ofillanona, cárcelmona naimie finocabilla isoi, damie jino jamai oretallena jicadimaci. ⁹ Pilato jicanote:

—¿Bu jino cue oretallena jitaīdomoi? Omoi judíuai railla illaimana nībaī jitaīdomoi.

¹⁰ Iese jicanote; iadedi naimiedi Jusiñamui diga nanoca ñairaini Jesúsni uradoillana uiñote. Naimaci Jesúsna meīnīacanana jiaī uiñote. ¹¹ Jusiñamui diga nanoca ñairaini naimacina llotataja jira, comini dinena Barrabás jino jamai oretallena jicadimaci. ¹² Iena cacajano, Pilato naimacimo jicanote:

—¿Ñiese bimīēna cue finuana jitaīdomoi? Naimiedi omoi judíuai illaima raillamie.

¹³ Ado llotimaci:

—¡Naimiēna coraī!

¹⁴ Pilato dane jicanote:

—¿Ñie isoīde marañede rafuena finode? —Iena cacajano, ado ibi llonoidimaci:

—¡Naimiēna coraī!

¹⁵ Naimacina iobitallena, naimaci jitailla jira, Barrabás jino orede; iadedi Jesúsna sechedotaja mei, naimiēna coraillena orede.

¹⁶ Soldaduai naimiēna gobernador jofo fo uillanona, nana soldaduai nainomo ofidimaci. ¹⁷ Jiduirede iniroi naimiemo jitaīdīmaci. Eecuaīmona niga nuicīrainā naimie ifogīmo jitaīdīmaci. ¹⁸ Naimiēna jīfanoduanona, naimiēna uaidotimaci:

—¡Jadī, judíuai illaima!

¹⁹ Radosi diga ie ifogimo buta-butadimaci. Naimiena tuallaitimaci. Naimie illaimana itena, naimiena sedallena, caiñici ifodo raiedimaci. ²⁰ Jesúna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jitadimaci. Ie mei naimiena coraillena oni uitimaci.

Jesúna coraia rafue

(Mt 27.32-44; Lc 23.26-43; Jn 19.17-27)

²¹ Jerusalémona naimaci jaillanona, jamai bitimiemo dafaifidimaci. Naimiedi Simón. Cirene railla enirue imie. Naimie jito iaimaiaidi Alejandro iaimaiai Rufo diga. Jerusalén onifemona naimie billanona, naimiemo dafaifidimaci. Naimiena Jesús uiga cruzna rocatatimaci. ²² Gólgota raillanomo jaidimaci. Ifocoraia eruaila jira, iese mameciredede. ²³ Nainomo rillanona, ie abi isirena cacaiñellena, vinomo erirede rana faianona, Jesúmo fecadimaci; iadedi naimie iena jiroñede. ²⁴ Ie mei naimie cruzmo coraia mei, cruzna naidania mei, naie soldadaui naimie iniroi dani coninimo fecasite. Naie iniroi bu uille raillanona uiñollena, jifanododimaci.

²⁵ Jitoma nia furi daidemo, naimiena coraidimaci. ²⁶ Cruzmo ie llogiduaafuena jonetimaci. Jai cueba: “Judíuai comini Illaíma”. ²⁷ Ie mei mena firiruide iaimaiaina coraidimaci. Damie Jesús nabeimo coraica. Jiamie Jesús jarifebeimo coraica. ²⁸ Iemona Jusiñamui facaina lloaíma micori jaie cueba rafue suide. Cueba: “Maraiñedino isoi naimie jai ite”.

²⁹ Naisodo jamai jaidino Jesúna mameritimaci. Mamerillamona, ifogiaina jaididimaci. Raitimaci:

—Navui raisoidio: “Jusiñamui jofona judaiticue. Darui amani illanona, iena dane finoiticue” raisoidio. ³⁰ Ie muidona dama o abina mai jillota. Cruzmona ana bi.

³¹ Ie facaise Jusiñamui diga nanoca ñairaini naimiena jifanododimaci. Moisés micori llogacino llofueraini naimiena jiai jifanododimaci. Raitimaci:

—Jiaie comina jillotate; ia dama naimie abina jillotanide. ³² Naimiedi Cristodena, naimiedi cai judíuai comini illaíma raillamiedena, dama niadedi cruzmona ana ie billa. Iena cai cioia, naimiena inoiticaí. —Iese naimiena jifanododimaci. Naimie diga coraicamie iaimaiai naimiena jiai jeare ñaitiaimaiaí.

Jesús fiodailla rafue

(Mt 27.45-56; Lc 23.44-49; Jn 19.28-30)

³³ Jitoma naidai itemona, daje amani horas mona jitibicaide. ³⁴ Ie meinomo judíuai railla uaido Jesús ado jidaioide:

—Eloi, Eloi, ¿lama, sabactani? —jidaioide. Iena oni dobaíñuamona raite: “Cue Jusiñamui, cue Jusiñamui, ¿bue ñellena cuena faínonocaidio?” raite.

³⁵ Iena cacajano, nainomo jamai itinomona damierie raitimaci:

—Naimie jaie Jusiñamui facaina lloaíma Elíana uaidote —raitimaci. ³⁶ Naimacimona damie jarire jaillanona, fibecode ramo vinona faite. Radosimo jillillano jirollena, naimiemo a fecade. Raite:

—Dallu sedaiticaí. Elías naimiena jillotajaíbillena uiñoiacadicaí.

³⁷ Ie facaise ado cuirioita fiodaite. ³⁸ Naie facaise Jusiñamui jofomo ie fetaca iniroife ana anaba jillacimo motodo menafe cuararide. ³⁹ Jesúna sedallena, nainomo capitán ite. Jesúmo eruailanona, Jesús fiodaillana ciode. Raite:

—Uanai bimiedi Jusiñamui Jito.

⁴⁰ Dajerie riñoniaí naie rafuena aarena cioidimaci. Naimaci motomo María Magdalena ite. Jiaie María jiai ite. Naiñaiñodi Jacobo ei. Naimiedi jamamie. Naiñaiñodi jiai José ei. Salomé jiai ite. ⁴¹ Galileamo Jesús navui illa facaise naie riñoniaí naimie diga jaisoidimaci. Naimiena canoidimaci. Jerusalémo Jesús billanona, ailluena riñoniaí naimie diga jiai bitimaci. Ie fiodaillana jiai cioidimaci.

*Jesús raiafomo jonia rafue**(Mt 27.57-61; Lc 23.50-56; Jn 19.38-42)*

⁴² Jitoma ana itemo, sábado rille jai iairei illanona, ⁴³ Arimatea nairai imie Pilato dine jaide. Naimiedi José. Naimiedi illaicomini. Maremie. Naimie Jusiñamui ie cominina ico sedajanomo illemo ocuride. Ie comecina ocuiñocaida, Pilato dine jaide. Iena raillena, Jesús abina jicade. ⁴⁴ Iena cacajano, Pilato Jesús fiodaillana raise uiñoiacade. Ie fiodaillana nia fidiñede. Jesúna sedade capitána uaiduanona, naimiemo Jesús fiodaillana jicanote.

⁴⁵ —Jesús jai fiodaite —capitán railla mei, Pilato Jesús abina Josémo fecallena llote. ⁴⁶ José mare userede iniroi ibaja mei, cruzmona Jesús abi ana ua mei, naie iniroi diga ie abina ferinote. Nofici motomo finoca raiafomo jonete. Naifona ibaillena, aillue nofici nainomo bai ñuitade. ⁴⁷ María Magdalena, jiaie María diga, naimie raiana ciode. María José ei.

16*Jesús fiodaillamona jillua rafue**(Mt 28.1-10; Lc 24.1-12; Jn 20.1-10)*

¹ Sábadoruimo jitoma sojicaidemo, María Magdalena caimare soride rana ibade. Jacobo ei, María jiaie ibade. Salomé jiaie ibade. Jesús abimo jonellena, ie abina raise finollena naimaci einamací finocabilla isoi, naiñaiñuai iena ibade. ² Domingo jitramo jitoma como bairedemo, Jesús raiafo dine naiñaiñuai jaide. ³ Jaillanona, conñuaimo jicanote:

—¿Bu noficina caina oni ñuitalle raiafomona?

⁴ Raiafo dine rillanona, iemo eruaillanona, nofici oni ñuitacana ciode. Naie nofici eo aillue. ⁵ Raiafomo jaillanona, naiñaiñuai coniruena eruaidimiena nabeimo raillana ciode. Naimie are userede iniroina jítade. Naimiedi Jusiñamui jaienici. Naiñaiñuai jacinaite. ⁶ Nainomo itimie dinena raite:

—Jacinañeno. Nazaret ie Jesúna jenodomoí. Naimiena coraidimaci; ia fiodaillamona naimie jai jillode. Bene jai iñede. Naimie jonianomo mai eroda. ⁷ Naimie llofueoicaiganomo iena lluai. Ua Pedromo llono. Galileamo omoí uicomo naimie jaite. Omoimo naimie llua isoi, naimiena cioitomoí.

⁸ Naiñaiñuai jino jaillanona, raiafomona aisicana jaide. Jacinaillamona abi jaidisite. Jaciruillamona, iena bummo lloñede.

*Jesús María Magdalenamo bairia rafue**(Jn 20.11-18)*

⁹ Domingo jitramo Jesús jillua mei, María Magdalenamo Jesús nano bairede. Naiñaiño Janaba anamo navui illamona, Jesús naiñaiñomona siete jananiai navui oni orede. ¹⁰ Naiñaiño naimie bairia mei, naimie diga jaicabidinomo iena lluaide. Naimacimo iena nia lloñenia, sure eedimaci.

¹¹ —Naimie jai jillode. Naimiena jai ciodicue —naimacimo naiñaiño llua mei, iena inoñedimaci.

*Mena llofueoicaiganomo Jesús bairia rafue**(Lc 24.13-35)*

¹² Ie meinocni Jesús mena llofueoicaiganomo bairede. Naimie eruaisoilla isoi, eruañede. Iaimaiaí naisomo macaria, iaimaiaimo bairede. ¹³ Jerusalémo abido iaimaiaí rilla mei, jiaie llofueoicaiganomo iena llotiaimaiaí; ia inoñedimaci.

*Jesús ie once llofueoicaiganomo bairia rafue**(Mt 28.16-20; Lc 24.36-49; Jn 20.19-23)*

¹⁴ Ie once llofueoicaigano danomo guitimacimo, Jesús naimacimo bairede. Naimie jillua mei, damierie naimiena ciuanona, ie llofueoicaiganomo iena llote; ia ñnoñeditimaci. Naimaci ñnoñena jira, Jesús naimacimo riire llote. ¹⁵ Naimacimo llote:

—Nana nairaiaimo jai. Nana cominimo cue mare rafue llocana jai. ¹⁶ Cuen a ñnuamona, bautizagano diese Jusiñamui mona duere sefuiñeditimaci; iadedi Jusiñamui cuena ñnoñedinona duere finoite. ¹⁷ Cuen a ñnotino Janaba anamo itinomona Janabana oni oretaitimaci. Naimaci nia uiñoñega uaido ñaitimaci. ¹⁸ Jaiona naimaci linoia, naimacina niese nibaiñeite. Bainode ra naimaci jiroia, naimacina niese nibaiñeite. Duidinona naimaci jetajamona, jilloitimaci.

Jesús monamo jailla rafue

(Lc 24.50-53)

¹⁹ Ie llofueoicaigano diga ñaia mei, Jusiñamui cai Nama Jesús monamo uiga. Illaimana Jesús illa jira, Jusiñamui nabeimo naimie raide. ²⁰ Monamo Jesús jailla mei, ie llofueoicaigano, diga nairaiaimo, ie rafuena llocana jaidimaci. Cai Nama naimacina canuamona, naimacina siño rafuena finotate. Iemon a comini dinena Cristomona naimaci rafue illana uiñotimaci. Macaibaite. Cue ciega rafue jai fuite. Marcodicue.

LUCAS JESUCRISTO EN RUENO ILLA RAFUE CUIAFUE

Lucas Teófilo cartana orede

¹⁻⁴ Teófilo, cue isiruiga nabai. ¿Nigacino? Omo bie cartana orede cue. Cai motomo birui diga rafue jai suide. Jesucristo rafuena omo cueticue. Naimie billa mei, diga comini naimiemo suide rafuena cidimaci. Iena llocana jiai jaidimaci. Naimacimona bie rafue raise uiñoticue. Bie rafuena fidianona, damierie iena jai cuetimaci. Bie rafuena jiai jai cacadio. Bie rafuena cue raise uiñua jira, unacina o raise uiñollena, bie cartana jai cueticue. Iese birui cue comeci jitaide.

Jusiñamui jaienici Juan Bautista micori jeicillena llua rafue.

⁵ Jesucristo nia jeicillena, Zacarías illa facaise Herodena mameciredede illaimadi. Judea railla enruena sedade. Zacarías Jusiñamui diga ñairaima. Abías raillasie facaimo duillamona, Jusiñamui jofomo maijuide. Naimie aidi Elisabet. Naiñaiño jaie ite usumadi Aarón micori. Aarón micoridi Jusiñamui diga nano ñairaima. ⁶ Jusiñamuimona iaiaiaia mare, nana naimie lloga uaina raise iaiaiaia inua jira. ⁷ Naiñaiño onina jira, uruenidiaiaiaia. Jiai jai uacima iaiaiaia.

⁸ Zacarías facai ite comini maijia facaise ia, Jusiñamui jofo dine naimie maijiaide. ⁹ Nainomo naimie maijia, caimare soride ra fo jobaillena, naimiema fetodimaci. Naimaci finouilla isoi, jobaillanona dan Jusiñamui diga ñairaini naimiema fetodimaci. Iemei naimie fo jaide. ¹⁰ Fo jailla mei, naie caimare soride ra boa facaiseconi, Jusiñamui diga naimie ñaiano, ailluena comini Jusiñamui jofo ecimo itimaci. ¹¹ Ieconicai Nama Jusiñamui jaienicidi naie ra boano nabeimo Zacaríamo bairede. ¹² Naimiema cuanona, Zacarías jacinaita. ¹³ Jaienici naimiemo llote:

—Zacarías, jacinaiño. Jusiñamui o jiacinona jai cacade. Iemona o ai uruesite. Himana jocoite. Juan o jitalle naimie mamecidi. ¹⁴ Iemona o comeci caimare iite. Iobitio. Ailluena comini naimie jeiciari iobitimaci. ¹⁵ Jusiñamuimona naimie jamai bue isoiñeitimena jaite. Jifaitate rana jiroñeite. Naimie jeiciamona Jusiñamui Joreño naimiema namataite. ¹⁶ Cai Nama Jusiñamui dibeimo ailluena Israel cominina naimie itataite. ¹⁷ Jusiñamui jitaillacinona finocana jaite. Elíamo Jusiñamui Joreño jaie siño uai illa isoi, naimiemo iite. Jusiñamui rafuena naimie llumona, damierie, naimaci jaiagai isoi, Jusiñamuina inoitimaci. Ailluena Jusiñamui uaina jai inoñedimaci; ia damierie birui inoitimaci. Naimaci comeci Jusiñamui dibeimo meidoitimaci. Iemona cai Nama Jesucristo bia, naimiema inoitimaci.

¹⁸ Zacarías dinena jicante:

—¿Niese o llua suillena uiñoticue? Jai uacimadico.

¹⁹ Jusiñamui jaienici dinena uai ote:

—Gabrieldicue. Jusiñamuimona biticue. Cuena oretate, bie mare rafuena omo llollena.

²⁰ Ero, cue uaina o inoñena jira, uainitio, o jito jeicille dinori. Jiairuido bie rafue suite.

²¹ Jusiñamui jofomo jino itino Zacarías jino billena sedadimaci. “¿Bue ñellena naimie are biñede?” comeciaina facadimaci. Naimie jino are biñena jira, rajicaidimaci. ²² Naimie jino bitemo, naimaci diga jai ñainide. Ie onolli diga facajamona, Jusiñamui jaienici naimiemo jai llua uiñoticimaci. Naimie ñaiño ite. ²³ Jusiñamui jofomo naimie maijia facaise fuilla mei, ie jofomo abido jaide. ²⁴ Digarui illanona, ie aidi urueside. Ie jira jofomo naiñaiño cinco fivui fiebide, comeciina facajanona: ²⁵ “Cue uruesilla jira, iena nia buna lloiacañedicue. Cue Nama cuena jai duenallana uiñoticue. Navui cue urue inena jira, meiruiticue. Jai meiruiñeiticue. Comini cue joreña jai ñaiñeitimaci”.

Jusiñamui jaienici Jesús jeicillena llua rafue

²⁶⁻²⁷ Elisabet seis fivui uruesilla mei, Jusiñamuidi Galileamo ie jaienici Gabrielna orede. Nazaretmo María dine naimiena orede. María nia ininide; ia jai José jicanogañaiño. Naimie usumadi David micori.

²⁸ Rillanona, naiñaiño lote:

—Itio. Cai Nama Jusiñamui ona eo duenaite. Ona jai fetuamona, nana jiaie riñoniai baifemo naimiedi ona marena itatate.

²⁹ Iena cacajanona, naiñaiño jacinaita. Iena naiñaiño raise cacaiñena jira, iemo comecina facade. ³⁰ Gabriel dinena lote:

—Jacinaiño. Jusiñamui ona duenaite. ³¹ Birui uruesitio. Himana jocoitio. Naimie mamecina jitaitio Jesúsna. ³² Siño Jitona jaite. Nanoca Itimie Jitona jaite. Ie usuma David micori illaima illa isoi, Jusiñamuidi naimiena illaimana itataite. ³³ Illaimana illamona, Israel railla nairaina jaca sedaite. Naimie ifomo jiaimie jaca iñeite.

³⁴ María uai ote:

—Iima diga nia iñedicue. ¿Ñiese bie nibaille?

³⁵ Gabriel lote:

—Jusiñamui Joreño omo iite. Ie siño uai diga iena finoite. Jusiñamui marena isoi naimie jiai marenite. Naimiedi Jusiñamui Jito. ³⁶ O comini iñaiño, Elisabet, ie uaicitaila facaise jiai jai urueside. Naiñaiño jai jionaide; ia jai seis fivui naiñaiño uruesilla ite. ³⁷ Jusiñamui nana bie isoide rafuena finorede.

³⁸ María uai ote:

—Jee. Jusiñamui anamo iticue. O llucino cuemona mare.

Ie facaise Gabriel naiñaiñomona oni jaide.

Maríadi Elisabet dine jailla rafue

³⁹ Ie facaiseconi María aneduai dine Judea railla eniruemo Zacarías illanomo raire jaide. Elisabetna cioillena, jaide. ⁴⁰ Zacarías jofomo rillano:

—Itio —raillanona, Elisabetna uaidote. ⁴¹ Elisabet naiñaiño uaina cacajano, ieconi naiñaiño jeraimo ite urue iena jiai uiñuamona, niraide. Ie facaise Jusiñamui Joreño anamo Elisabet jai ite. ⁴² Iese illamona, María uruesillana uiñote. Naiñaiño ado lote:

—Jusiñamui ona eo marena canoite. O uruena marena itataite. ⁴³ Jamai bue isoidicue; ia, odi cue Jilloitaraima ei illanona, cue dine bitio. Iena cuemo nia lloñedio; ⁴⁴ ia, cuena o uaiduanona, iobillamona cue jeraimo ite uruedi niraide. ⁴⁵ Cai Nama omo llotataga uaina suillana o ñnua jira, Jusiñamui ona eo marena canoite. —Jusiñamui Joreño naiñaiño illamona, iena lote.

⁴⁶ María dinena uai ote:

Caiñai Nama eo mare. Naimiemo iobillacinona fecaacadicue.

⁴⁷ Naimiedi cue Jilloitaraimana jira, naimieri iobidicue.

⁴⁸ Jamai bue isoidicue; iadedi cuena fetode.

Ie jira biruimona nana comini cuena marena ñaitimaci.

⁴⁹ Naimiedi siño. Naimiedi mareuidimie. Cue facaina eo mare rafuena finode.

⁵⁰ Naimiena ñnotinona jaca duenaite. Cai jaiagaina jaca duenaite. Caina birui jaca duenaite. Ua nana naimiena ñnotinona duenaite.

⁵¹ Diga siño rafuena finoite. Abi iedotino comeciai facajacinona llucaitaite.

⁵² Naimiedi illaicominina oni dotaite; ia jamai bue isoidinona jamai bue isoiñedinona itataite.

⁵³ Dueredinona eo canoite; ia duenidinomo buena fecañeite.

⁵⁴ Duenaillamona, cai Israel cominina feitañeite.

⁵⁵ Cai jaiagaimo naimie jai llua isoi, birui caina canoite.

Abraham micorimo jai lote: “Ona duenaiticue. O cominina jaca duenaiticue”

María lote. ⁵⁶ Elisabet diga davui amani naiñaiño fiebide. Ie mei ie jofomo abido jaide.

Zacarías jito jeicia rafue

⁵⁷ Elisabet jocularui jai ridemo, imana jocode. ⁵⁸ Naiñaiño ecimo ite comini, naiñaiño comini diga, iena fidiamona, cai Nama naiñaiñoa eo duenaillana uiñotimaci. Naiñaiño diga iobidimaci. ⁵⁹ Ocho digarui jeicia mei, naimaci finouilla isoi, urue abina dia rafuemo bitimaci. Ie moo mamecina jitaacadimaci; ⁶⁰ iadedi Elisabet llote:

—Dama ite. Jitaiñedicue. Naimie mamecidi Juan cai jitalle.

⁶¹ Uai otimaci:

—¿Bue ñellena iese raitio? O cominimona jaca bu Juan mameciredimiena iñede.

⁶² Jefona cacaiñena jira Zacaríamo onolli diga jicanotimaci, ie jito mamecina jitalle.
⁶³ Onolli diga Zacarías fairiuano, rabena jicade. Cuete: “Naimie mamecidi Juan”. Ieri rajicaidimaci. “¿Bue ñelle iena jitade?” comeciaina facadimaci. ⁶⁴ Iecon Zacarías jai dane ñaite. Ie jira Jusiñamuimo iobillacino fecade. ⁶⁵ Nana iaiaiaia ecimo itino rajicaidimaci.

—Jusiñamui muidona naie rafue suide —llotimaci. Bie rafuena fidiano, nana Judea railla aneduaimo itinodi iena ñaoidimaci. ⁶⁶ Iena cacajano, comeciaina facadimaci: “Bimie jamai bue isoiñeitimiena jaite”. Cai Nama naimiena marena jaca canua jira, iese llotimaci.

Zacarías Jusiñamuimo iobillacinona fecaja rafue

⁶⁷ Ie facaise Jusiñamui Joreño Zacaríana llotatajanona, Zacarías llote:

⁶⁸ Cai Nama Jusiñamuidi mare.

Cai Israel comini dine biite, caina jilloitallena.

⁶⁹ David micori Jusiñamuina jaie sedade.

David micori cominimona siño Jilloitaramana cai dine oretaite.

⁷⁰ Ie facaina llorainido naimie jaie llua isoi, cai Jilloitaramana oretaite,

⁷¹ Taifemona, Janabamona cai jilloillena.

⁷²⁻⁷³ Cai usumatiaia micoriaimo: “Omoina duenaiticue” llote.

Cai usuma Abraham micorimo jaie llogacinona feitañede.

⁷⁴⁻⁷⁵ Taifemona cai jilloillena, cai Jilloitaramana oretaite.

Nana cai ille dinori Jusiñamuina jaciruiñoeno sedajana jitaide.

Naimie jitailla isoi cai illena, naimie jitaillacinona cai finollena, cai Jilloitaramana oretaite.

⁷⁶ Cue jito, ona lloiticue. Jusiñamui ie lloramana jaitio.

Cai Nama uicomo jaitio, comini comeciia o raise finollena.

⁷⁷ Ie cominimo jeacinomona jilluacinona lloitio.

Iena naimaci inoia, Jusiñamui naimaci jeacinona feitaite.

⁷⁸⁻⁷⁹ Jeacino anamo jai cai illa jira, jiti redinomo iticai isoidicai.

Jusiñamuina cai nia inoñenia, fiodaillana jaciruiticai.

Naimie caina duenaillamona, cai Jilloitarama billena o llofuellena, ona oretaite.

Naimiena cai inoia, jiti redinomo iñeiticai; ia Jusiñamui diga cai comeciia uri iite.

⁸⁰ Zacarías jito sairide. Jusiñamuina inocana jaide. Cominimo naimie nia marefodo lloñenia, jofue iñenanomo ite.

2

Jesús jeicia rafue

(Mt 1.18-25)

¹⁻² Jesús jeicia facaise César Augusto anamo ailluena nairaiaia ite. Romamona naimacina sedauide. Naie facaise Siria railla enirue gobernadori Cirenio. César Augusto, nie diese comini naga nairaimo illana naimie uiñollena, nana comini mameciaia cuellena ocuide. Jaca bu iese jaie finoñede. ³ Naimaci jaiagai illanomo mameciaia cuiana ocuide. ⁴ Ie jira José Galileamona Nazaretmona jaide. Judeamo Belémo jaide. David micori cominimo naimie jainaiaila jira, David micori illanomo jaide. ⁵ Ie ai María diga

jaide. Naiñaiño fenaí jai eo aillue. ⁶⁻⁷ Belémo iaímaiaí rillanona, naie facaise comini jofomo inillino iñena jira, jurareta jofomo ridiaímaiaí. Nainomo ie doforato jito jeicite. Jocua mei, iniroina naimiena ferinote. Ie jito inillena, jurareta ecaranomo naimiena jonete.

Jusiñamui jaienisaí toica llaudaiaí sedaraini dine jailla rafue

⁸ Jesús jeicia facaise naie naió Belén ecimo ite pastomo damierie toica llaudaiaína sedaraini itimaci. Naimaci toiniaina sedadimaci. ⁹ Ieconí caí Nama Jusiñamuimona daje jaienici naimacimo ebena bairede. Jusiñamui ie siño uai dígá naimacina quetiñote. Jacinaitimaci. ¹⁰ Jaienici llote:

—Jacinaiño. Mare rafue lloiacadicue. Nana cominina iobitallena, iena lloiacadicue.

¹¹ David micorí illanomo damie como jeiciga. Jusiñamui facaina lloraini micoriaí naimie billena jaie llouidimaci. Naimiedi Cristo caí Nama. Naimie omoi Jilloitaraima. Jeacinomona omoína jillotaite. ¹² Naimiena jibuisai. Iniroina ferinoga urue jurareta jofomo imaci ecaranomo baitomoi. Iemona cue llwana uanaicinona uiñoitomoi —llote.

¹³ Ie facaise naie jaienici dine ailluena jaienisaí bitimaci. Jusiñamuimo iobillacinona fecajano rotimaci:

¹⁴ Monamo Jusiñamui illanona, naimiemo iobillacinona fecaacadicaí. Cominina naimie duenaillamona, naimie dígá uri iitimaci rotimaci. Ie mei abido jaidimaci.

¹⁵ Monamo jaienisaí jailla mei, toica llaudaiaí sedaraini coniniri ñaitimaci:

—Belémo mai caí jailli, caí Nama caimo como lloga rafuena caí jibuisaillena.

¹⁶ Ieconí raire jaidimaci. María José dígá baitimaci. Iaímaiaí urue jurareta ecaranomo billana cioidimaci. ¹⁷ Naimiena ciua mei, nana naimacimo jaienici lloga rafuena llotimaci. ¹⁸ Nana naie rafuena cacadinodi ieri rajjicaidimaci. ¹⁹⁻²⁰ Iaímaiaí uruena ciua mei, llaudaiaí sedaraini imaci toiniái dine abido jaidimaci. Naimacimo jaienici llua isoi naimacimo suilla jira, iobidimaci. Nana naimaci cacaja rafueri, nana naimaci ciua rafueri Jusiñamuimo iobillacinona fecadimaci. María naie rafuena feitañede; ia iena comecina facauide.

Jerusalémo Jusiñamui jofomo Jesúna iaímaiaí uilla rafue

²¹ Ocho digarui illanona, naie urue abina dete. Ie ei jeraimo naimie nia comuiñenia, Jusiñamui jaienici naimie lloga mamecina jitade. Jusiñamui jaienici llua isoi, Jesúna ie mamecina jitade.

²²⁻²⁴ Moisés micorí jaie llua isoi Jerusalémo Jesúna uitiaímaiaí. Moisés micorí jaie cuete: “Cuarenta digarui jocua mei, Jusiñamuimona riño marena illena, Jusiñamuimo mena ficiri naiñaiño fecaja. Jusiñamui dígá ñairaima iena faja mei, riño facaina Jusiñamuimo jobaica”. Jiaí cuete: “Naga nano doforamiedi Jusiñamui ie. Ie muidona naimie facaina Jusiñamuimo ucubena fecaja”. Ie muidona Jerusalémo Jesús dígá jaidiaímaiaí.

²⁵ Naie facaise Jerusalémo Simeón raillamie ite. Jusiñamuimona naimiedi mareuidimie. Jusiñamuina eo inocana jaide. Naimie cominina Cristo jilloitallena, Cristo billemo ocuride. Naie facaise Jusiñamui Joreño anamo naimie ite. ²⁶ Iemona Jusiñamui Joreñodi, naimiena Cristona cioillena, navui uicodo uiñotade. O nia fioidañenia, Cristona cioitio raillanona llote. ²⁷ Jusiñamui jofomo Jusiñamui Joreño naimiena oretate. Jusiñamuimo Jesúna fecallena, Jesús ei, José dígá, Jesúna fo uillana Simeón ciode. ²⁸ Naimaci dine jaillanona, Jesúna meniñote. Jusiñamuimo iobillacinona fecajano jide:

²⁹ Nama, o anamo iticue.

Cuemo o lloga uai jai suilla jira, uri fioidaticue.

³⁰ O oretaga Jilloitaraimana jai cioidicue.

³¹ Naimiena oredio, nana comini jilloillena.

³² Naimiedi judíuafiñedinona uanaicinona uiñotaite.

O cominina iobitaite

jíide. ³³ Iena cacajamona, iaímaiaí jítóna lloga uairi rajicaidíiaímaiaí. ³⁴⁻³⁵ Simeón iaímaiaímo camaredicinona llote:

—Jusiñamui omoína raise canoite —llote.

Maríamo llote:

—Ero, ie rafuena llollena, Jusiñamui o jítóna jai fetode. Naimie illamona, comini comeciána facajacinona uiñotaite. Naimiemo suille rafuemonona o comeci sure iite. Cai cominimona ailluena naimiema jítaiñeitimaci. Ailluena jítaitimaci.

³⁶ Nairuido Jusiñamui jofomo Ana railla feciño ite. Jusiñamui naiñaiño mo lloga rafuena llouide. Naiñaiño moo Fanuel micori. Naiñaiño nairaidi Aser. Jítaiño facaisemonona ie ini díga siete años illanona, naimie fiodaite. ³⁷ Naiñaiño jai eo uaiciño. Ochenta y cuatro años naiñaiñodi jai ite. Jusiñamui jofomo jaca isoide. Nagarui Jusiñamuimo jíianona guicabiñeno naimiema sedauide.

³⁸ Simeón ñaiana cacajano, naiñaiño Jesús comini díne billano, Jusiñamuimo iobil-lacinona fecade. Naimie billemo naimaci ocuirilla jira, naiñaiño naimaci Jilloitaraímana nainomo itinomo llocana uite.

Nazaretmo abido naimaci jailla rafue

³⁹ Moisés micori lloga uai naimaci fuidua mei, Jesúna uillanona, Galileamo Nazaretmo naimaci illanomo abido jaidíiaímaiaí. ⁴⁰ Nainomo Jesús sairicana maíricana jaide. Eo abina uiñote. Naimieri iobillamona, Jusiñamui naimiema canouide.

Jerusalémo Jusiñamui jofomo Jesús illa rafue

⁴¹ Naga año Jerusalémo pascua railla rafue díne Jesús moo iaímaiaí jaisoidíiaímaiaí. Egiptomona naimaci jaiagai jillobillana comecillena, naie rafue ite. ⁴² Naimiemo doce años illa facaise Jerusalémo iaímaiaí jaisoilla isoi, jaidíiaímaiaí. Naimie doce años illa jira, Jesúna uitíiaímaiaí. ⁴³⁻⁴⁴ Rafue fuilla mei, abido bitíiaímaiaí. Ailluena comini jiaí billa jira, Jesús billana raise uiñoñediíiaímaiaí. “Cai comini díga naimie bite” raillanona comeciána facadíiaímaiaí; ia Jesús Jerusalémo fiebide. Darui raifi billa mei, iaímaiaí cominimo naimiema eo jenodíiaímaiaí. ⁴⁵ Baiñena jira, inia mei, Jerusalémo darui jaillanona, abido jaidíiaímaiaí. ⁴⁶ Ie are Jusiñamui jofomo naimiema baitíiaímaiaí. Moisés micori llogacinona llofueraini motomo naimie ite. Naimaci llofuiana cacade. Iena naimaci díga jiaí siadote. ⁴⁷ Nana cacadino naimie uiñogacinori rajicaidimaci. Naimie raise siadogacinori jiaí rajicaidimaci. ⁴⁸ Naimiema iaímaiaí baia, rajicaidíiaímaiaí. Ie ei naimiemo jícanote:

—¿Bue ñellena cocona duere finodio? O moocama díga ona eo duere jenodicoco.

⁴⁹ Naimie uai ote:

—¿Bue ñellena cuena duere jenodomico? Cue Moo jofomo naimie rafuena finodicue. ¿Ñiese bene cue illana uiñoñedomico?

⁵⁰ Naimie lluana raise cacaiñediíiaímaiaí. ⁵¹ Iemei iaímaiaí díga Nazaretmo naimie abido jaide. Iaímaiaí uai ñnuanona, iaímaiaí anamo ite. Ie ei María nana naie rafue ie comeciemo facauide. ⁵² Naimie sairicana abina uiñocana jaide. Jusiñamui naimieri iobide. Comini dínenona naimiema jiaí gaidimaci.

3

Jofue iñenanomo Juan Bautista micori illa rafue (Mt 3.1-12; Mr 1.1-8; Jn 1.19-28)

¹⁻² Jofue iñenanomo díga años Juan illanona, Jusiñamuimona ie uaina feiñote. Naimiedi Zacarías jito. Naie facaiseconi Romamo quince años Tiberio Césardi nanoca illaímana jai ite. Judea railla enírue gobernadori Poncio Pilato. Galilea railla enírue gobernadori Herodes. Naimie amadi Felipe. Iturea railla enírue, Traconite railla enírue díga,

governadordi Felipe. Abilinia railla enirue governadordi Lisantias. Jusiñamui diga nanoca ñairaima iaïmaiaïdi Anás, Caifás diga. ³ Jusiñamui llua jira, nana Jordán fuemo ite comini dine Juan llofuecana jaide. Llote:

—Omoï jeacina fainonocaida, Jusiñamui ðibeïmo omoï comeciï iuai meido. Iemona Jusiñamui omoï jeacina feitaite. Omoï comeci iuai omoï meidoïa, comini iena uiñollena, mai omoï bautizallomoi.

⁴ Isaías micori ie rabemo naimiena jaie cuete:

Jofue iñenanomo damie jidai-jidaïllana cacadicue.

Naimie llote: “Cai Nama biite. Naimie jaïllino atona fino.

⁵ Nana iconi oruita.

Naga aneduai diese eniruena judai.

Neïcaïruai joide naisona atona fino.

Naimo itaicuai illa diese eniruena oruita, daje facai illena.

⁶ Nana comini Jusiñamui naimacina jillotaiacanana uiñoitimaci”

cuete; ia naimaci comeciïna ñaite. Cai Namana ñnuana ñaite. Abina iedoñenana ñaite. Jeacino finocana jaïñenana ñaite. Cai Nama Jesús bia, Jesús uaina naimaci feiñollena, naimaci comeciï marena finuana ñaite.

⁷ Naimacina bautizallena, ailluena comini naimie dine bitimaci. Naimacimo llouide:

—Maraiñede rafuena finocana omoï jaïlla jira, jaïo nairai isoidomoi. ¿Ñiese jilloit-omoï? Cue dine omoï billena, ¿bu omoïmo lloga? ⁸ Omoï comeciï iuaïllaï meido. Omoï jeacina fainocai. Iemona Jusiñamui jitaïllacina fino. Mare rafuena finocana jaï. Naiemona omoï comeciï iuaïllaï meïduana uiñoiticaï. Ie mei bautizallomoi. Omoï comeciïna facañeno: “¿Bue ñellena o llua isoi finoiticaï? Jusiñamui Abraham micorina jaie eo raise nabaide. Abraham micori cai moo illamona, Jusiñamui riicaïllïfueмона jilloiticaï”. Ero, omoïmo lloiticue: Cue llua isoi omoï finoñenia, naimie riicaïllïfueмона jilloñeitomoi. Abraham micori uruiaïdomoi; iadedi Jusiñamui jitaïllacïnode jaïacaiñedomoi. Naimie jitaïa, naimie jitaïllacina naimaci finollena, bene ite noficimona naimiedi Abraham micori facaina uruiaïna comuitarede. ⁹ Ero, lliñede riara tiedomoi. Tia mei, maraiñena jira, iena jobaidomoi. Ie isoidomoi. Omoï maraiñena jira, Jusiñamui omoïna jaï duere finoacade. Ie riicaïllafue anamo jaï itomoi. Omoï comeciï iuai omoï meidoñenia, omoïna duere finoite.

¹⁰ Iena cacajanona, comini dinena naimie mo jïcanotimaci:

—Cai bautizaja mei, ¿ñiese iiticaï? ¿Ñie isoide mare rafuena finoiticaï?

¹¹ Juan uai ote:

—Ailluena ñiroiredimiedi ñiroinidimie mo ñiroina feca. Guilleredimiedi guillenedimie mo guillena feca.

¹² Naimacina bautizallena, gobierno ucubena oraini jiaï bitimaci. Jïcanotimaci:

—Llofueraïma, cai bautizaja mei, ¿ñiese iiticaï? ¿Ñie isoide mare rafuena finoiticaï?

¹³ Uai ote:

—Gobierno facaina omoï ibataïa, cominimona gobierno llua baïfemo oñeno.

¹⁴ Naimie dine billanona, soldaduai jïcanotimaci:

—Cai bautizaja mei, ¿ñiese iiticaï? ¿Ñie isoide mare rafuena finoiticaï?

Uai ote:

—Cominimona rana bairoñeno. Riicïnode rana oñeno. Tainona llogiduaïmona, cominimona rana oñeno. Omoï ucube illa diese feiño. Ie baïfemo ucubena ñicidoñeno.

¹⁵ Juan llofuïamona naïe facaise cominidi Cristo billemo ocuirilla jira, “Juandi ñibaï Cristo” raïllanona, Juanmo comeciïna facauïdimaci. ¹⁶ Iena fidiano, Juan llote:

—Cristoñedicue. Jusiñamui ðibeïmo omoï illamona, jinui diga omoïna bautizadicue. Cai baïfemo faïtimie bie facaise biite. Naimie cue ifomo meidoite. Jamaï bue cue isoïlla jira, naimiena cue canuana uiñoñedicue. Naimie mo omoï duïa, naimiedi Jusiñamui Joreño omoïmo itataite. Omoï comeciï iuai omoï meidoñenia, omoïna duere finoite.

¹⁷ Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isoide. Naimie rafuena lluanona, naimiedi comeciai iuailai meidotinona ie Moo illanomo ofitaite; iadedi jiaie cominina duere finoite. Iraimo dotaite. Naie irai jaca duiñede —llote.

¹⁸ Bie isidicinodo cominimo ie mare rafuena llofueuide. ¹⁹ Naie facaiseconi Herodedi gobernador. Ie ama ai ote, ie aina illena. Naiñaiñodi Herodías. Diga jiaie mariñede rafuena finode. Ie muidona Juan naimiena lletade. ²⁰ Maraiñede rafuena Herodes finocana jaillamona, Juan cárcelmo jonetade.

Juandi Jesúna bautizaja rafue
(Mt 3.13-17; Mr 1.9-11)

²¹ Ailluena cominina Juan bautizaja facaise, Jesúna jiaí bautizade. Bautizaja mei, Jesúsdi ie Moo diga ñaianona, mona bojode. ²² Ieconí Jusiñamui Joreño ucugina eruaillano, naimie emodomo ana bite. Monamona Jusiñamui llote:

—Cue isiruiga Jitodio. Ori iobidicue.

Jesucristo ie usumatiai
(Mt 1.1-17)

²³ Jesús treinta años illamona, Jesús ie maijille rafue tainede. “Naimiedi José micori jito” raillano naimiemo cominidi comeciaina facadimaci. Josédi Elí micori jito. ²⁴ Elídi micori Matat micori jito. Matat micori Leví micori jito. Leví micori Melqui micori jito. Melqui micori Jana micori jito. Jana micori José micori jito. ²⁵ José micori Matatías micori jito. Matatías micori Amós micori jito. Amós micori Nahum micori jito. Nahum micori Esli micori jito. Esli micori Nagai micori jito. ²⁶ Nagai micori Maat micori jito. Maat micori Matatías micori jito. Matatías micori Semei micori jito. Semei micori José micori jito. José micori Judá micori jito. ²⁷ Judá micori Joana micori jito. Joana micori Resa micori jito. Resa micori Zorobabel micori jito. Zorobabel micori Salatiel micori jito. Salatiel micori Neri micori jito. ²⁸ Neri micori Melqui micori jito. Melqui micori Adi micori jito. Adi micori Cosam micori jito. Cosam micori Elmodam micori jito. Elmodam micori Er micori jito. ²⁹ Er micori Josué micori jito. Josué micori Eliezer micori jito. Eliezer micori Jorim micori jito. Jorim micori Matat micori jito. Matat micori Leví micori jito. ³⁰ Leví micori Simeón micori jito. Simeón micori Judá micori jito. Judá micori José micori jito. José micori Jonam micori jito. Jonam micori Eliaquim micori jito. ³¹ Eliaquim micori Melea micori jito. Melea micori Mainán micori jito. Mainán micori Matata micori jito. Matata micori Natán micori jito. Natán micori David micori jito. ³² David micori Isaí micori jito. Isaí micori Obed micori jito. Obed micori Booz micori jito. Booz micori Salmón micori jito. Salmón micori Naasón micori jito. ³³ Naasón micori Aminadab micori jito. Aminadab micori Aram micori jito. Aram micori Esrom micori jito. Esrom micori Fares micori jito. Fares micori Judá micori jito. ³⁴ Judá micori Jacob micori jito. Jacob micori Isaac micori jito. Isaac micori Abraham micori jito. Abraham micori Taré micori jito. Taré micori Nacor micori jito. ³⁵ Nacor micori Serug micori jito. Serug micori Ragau micori jito. Ragau micori Peleg micori jito. Peleg micori Heber micori jito. Heber micori Sala micori jito. ³⁶ Sala micori Cainán micori jito. Cainán micori Arfaxad micori jito. Arfaxad micori Sem micori jito. Sem micori Noé micori jito. Noé micori Lamec micori jito. ³⁷ Lamec micori Matusalén micori jito. Matusalén micori Enoc micori jito. Enoc micori Jared micori jito. Jared micori Mahalaleel micori jito. Mahalaleel micori Cainán micori jito. ³⁸ Cainán micori Enós micori jito. Enós micori Set micori jito. Set micori Adán micori jito. Adándi Jusiñamui comuitagamie.

4

Taife ramo Jesús faia rafue
(Mt 4.1-11; Mr 1.12-13)

¹ Jusiñamui Joreño anamo Jesús illamona, Jordán railla illemona Jesús jaillano, jofue iñenanomo Jusiñamui Joreño naimiena orede. ² Nainomo cuarenta digarui Taifedi naimiena ramo faite. Naie facaiseconi Jesús jaca guiñede. Naie facaise fuilla mei, guiñeno illamona, naimie aimetaite. ³ Jesús aimetaillana Taife uiñuamona, naimiemo llote:

—Jusiñamui Jitodi odena, naimiemo llono: “Ore Moo, bie noficina llomenicono jaita”.

⁴ Jesús uai ote:

—Iena lloñeiticue. Jusiñamui facaina lloaíma micori iena jaie cuega: “Jiaie rafuedi llomenico guilla baifemo faite”.

⁵ Ie mei a ite anedumo Taife Jesúsna uillano, dallu illanona, naimiemo nana nairaiaína acatate. ⁶⁻⁷ Llote:

—Nana bie nairaiaí cue anamo ite. Iena cue iacagamie mo itataredicue. Cueno o sedajamona, iobillacinona cuemo o fecaia, nana bie nairaiaí omo fecaiticue. Bie nairaiaí illaímana jaitio.

⁸ Jesús uai ote:

—Dama ite. Ona sedañeiticue. Moisés micori jaie cuega: “Cai Nama Jusiñamuina seda. Dama naimiemo iobillacinona feca”.

⁹ Ie mei Jerusalémo Jusiñamui jofo muidomo Taife Jesúsna uite. Raite:

—Jusiñamui Jitodi odena, eniruemo mai ana uai. ¹⁰⁻¹¹ David micori ona jaie cuega: Ona eenollena Jusiñamuidi ie jaienisaímo lloite.

Eniruemo o uaiñellena, o abi bofedaiñellena, ona feiñoitimaci cuega. Naimie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

¹² Jesús uai ote:

—Dama ite. Ana uaiñeiticue. Ero, ie cominimo Moisés micori jaie cuega: “Cai Nama Jusiñamuina facaciñeno”. Naimie cuena raise eenuana jai uiñoticue. Jamai ebena naimiena facaciñeiticue. O lluaña finoñeiticue.

¹³ Taife naimiena ramo faia mei, naimiemono ie jitaille dinori oni jaide.

Galileamo Jesús ie rafue lolle jillaci
(Mt 4.12-17; Mr 1.14-15)

¹⁴ Jusiñamui Joreño naimiemo illamona, Galileamo Jesús abido jaide. Nana naie eniruemo naimie mameci soride. ¹⁵ Ailluena judíuai ofiracuaimo naimie llofueuide. Iena cacajanona, comini: “Naimie llofuiacino mare” raitimaci.

Nazaretmo Jesús illa rafue
(Mt 13.53-58; Mr 6.1-6)

¹⁶ Macarillamona, Nazaretmo naimie jaide. Navui nainomo naimiedi sairide. Naimie jaisoilla isoi, sábadomo nainomo ite ofiracomo jaide. Jaie cuegafuiaína ado facallena, naimie a naidadate. ¹⁷ Naie lloraco nama mullaímadí Isaías micori jaie cuegafuiaí jai ferinoga rabe naimiemo fecade. Iena oni suiñocaida, bie rafuena baillanona facade:

¹⁸⁻¹⁹ Jusiñamui Joreño cuemo ite.

Dueredinomo mare rafuena llollena, cuena fetode.

Taife anamo ailluena comini illa jira, Jusiñamui naimacina jillotaiacana uiñoñedimaci.

Jusiñamui rafuena ailluena comini uiñoñena jira, naimie illanomo rillena uiñoñedimaci.

Jeacino anamo naimaci illa jira, Jusiñamui naimacina jillotaiacana uiñoñedimaci.

Naimie naimacina duenaillana birui uiñuana jitaide.

Naimacimo mare rafue llollena, cuena jai oretate.

²⁰ Naie rafue facaja fuillamona, ciegafuiai abido fecade. Naimacina llofuellena, dane ana raide. Nana nainomo ite comini naimiemo eo eruaidimaci. ²¹ Iemei naimie naimacina llofuate. Raite:

—Omoi como cacaja ciegafuiai omoi motomo jai suide. Cuenã ñaite.

²² Naimie lluana comini cacajano, coninina raitimaci:

—Naimie fue mare. Naimie marena llofuate. —Iemona rajicaillamona, coniniri raitimaci—, Naimiedi jamai José jito. ¿Ñiese naie rafue birui suide?

²³ Iena uñuamona, Jesús dinena llote:

—Cue lluana ñnoñedomoi. Comeciaina facadomoi: “Capernaumo naimie siño finoca rafuena fididicai. Siño rafuena cai motomo naimie jiai finoia, naimiena ñnoiticai. ‘Ua médico duia, ie abina dama jillotarede’ cai einamací raisoidimaci. Ie isoide. Naimie llua isoi naimie ia, siño rafue cai motomo finorede” comeciaina facadomoi. ²⁴ Uanaicinona omoimo lloiticue. Naimie comini nairaimo Jusiñamui facaina lloraima ia, ie comini naimie uaina feiñoiacasiñede. Iena jamaisite. Ie isoide. Cue nairaimo cue illa jira, cue uaina ñnoñedomoi. ²⁵ Jaiie ie isoide. Elías facaiseconi daje amani años abimo atomonado noci deiñede. Aime guitimaci. Naie facaiseconi bie eniruemo cai comini dine ailluena feciñuai itimaci; iadedi omoi jaiagai Jusiñamui uaina ñnoñedimaci. ²⁶ Jusiñamuidi Eliana cai comini dine oreñede; iadedi jiaie eniruemo ite feciño dine naimiena orede. Sarepta railla nairaimo orede. Sidón railla eniruemo naie nairai ite. Cai cominiñede feciño mo orede. ²⁷ Jiaie rafuena lloiticue. Eliseo micoridi Jusiñamui facaina jaiie llote. Eliseo micori facaiseconi bie eniruemo diga efonaitino ite; iadedi naimacimona Jusiñamui buna jillotañede. Omoi jaiagai Jusiñamui uaina ñnoñena jira, Eliseo micori duidinona jillotañede. Naie facaiseconi dama Naamán micorina jillotate. Cai cominimo naimie duiñede; ia Siria railla eniruemo duide. Ie isoidomoi. Cue uaina ñnoiacaiñedomoi—llote.

²⁸ Jesús lluana cacajano, naie ofiracomo itino eo iciritimaci. ²⁹ Naidacaillano, naimiena jino uitimaci. Naie illanodi iconimo ite. Nainomo naimiena uillanona, iconimona naimiena ana dotaacadimaci. ³⁰ Naimiena meineiacadimaci; iadedi naimaci motomo naimie jaillanona, naimacimona naimie jillobillano oni jaide.

Jesúdi Janaba anamo itimie jillotaja rafue

(Mr 1.21-28)

³¹ Jesús Capernaumo jaide, Galilea railla eniruemo ite. Nainomo naimie ia, sábadoruimo judíuai ofiracomo jaide. Nainomo llofuate. ³² Illaíma uai isoi naimie llofuia jira, nainomo ite comini naimie llofuia mona rajicaidimaci. ³³ Janaba anamo illamie nainomo ite. Jesús llofuiana cacaita, Janabadi ñimana ado cuirioitate:

³⁴ —Odi Nazaret ie Jesús. ¿Bue ñeiacadio cai diga? Caina duere finuaibidio. Ona uñoticue. Odi Jusiñamui ie Mare Fetocamiedio.

³⁵ Jesús naimiena lletade:

—Llicai. Naimiemona oni jai. —Iena cacajanona, naimaci motomo Janaba ñimana ana dotade; ia naimiedi bofedaiñede. Ie mei Janaba naimiemona oni jaide. ³⁶ Iena ciuanona, nana nainomo itino rajicaidimaci. Coniniri siadotimaci:

—¿Ñie isoide Jesús uai? Janabamo naimie llua mei, ñimamona Janabadi oni jaide.

³⁷ Jesús finoca rafue muidona, naimie mamecidi nana naie eniruemo soride.

Jesúdi Simón Pedro jifaiño jillotaja rafue

(Mt 8.14-15; Mr 1.29-31)

³⁸ Ofiracomona Jesús jaillanona, Simón Pedro jofomo jaide. Ie facaise Simón jifaiño duide. Abina cuaride. Naiñaiño jilloitallena, nainomo itino Jesúmo jicanote.

³⁹ Naiñaiño dine Jesús jaillanona, ie uai lluamona, naie duicodi oni jaide. Ieconi naiñaiño jillode. Abi cuariñede. Naidacaillanona, guille finuanona, ie jofomo itinona ecade.

Jesúdi ailluena duidinona jillotaja rafue

(Mt 8.16-17; Mr 1.32-34)

⁴⁰ Nairuido jítoma ana ítemo, comíni ailluena duidinona Jesús díne atídímaci. Díga duícuaí illanona atídímaci. Naimacína jetajamona, naimacína jillotate. ⁴¹ Jananiaina jiaí oní oretajano, jananiái dínená raíte:

—Odí Jusíñamuí Jítodío. —Naimiána naimaci uíñua jira, Jesús naimaci ñaiana rairuide. Naimiedi Jusíñamuí Jítóna uíñotímaci.

Judeamo Jesús llofuia rafue

(Mr 1.35-39)

⁴² Ie areruido jítiramo jofue íñenanomo Jesús jaide; íadedí comíni naimiána jenuaidímaci. Baillanona, naimaci motomona naimie jaiñellena jicannotímaci. ⁴³ Naimacímó llote:

—Jiaíe nairaimo cue mare rafuena lloiacadícue. Naimie anamo comíni illana Jusíñamuí jitailla jira, naimacímó iena lloiacadícue. Ie mare rafuena llollena, Jusíñamuí cuena orede. Oní jaitícue. Omoí díga fiebiñeítícue.

⁴⁴ Ie mei Judeamo íte ofracuaimo Jesús llocana jaide.

5

Jesús muidona, naimaci ailluena lliciaína ua rafue

(Mt 4.18-22; Mr 1.16-20)

¹ Jiaíruido Genesaret railla jorai fuemo Jesús ía, ailluena comíni naimie díne bitímaci. Ie rafue raise cacaillena, coníni oní ñuicocana naimie ecímó bitímaci. ² Ie facaise jorai fuemo Jesús mena síjide botena cíode. Naimaci llojjina naimaci jocua jira, naie botemo llojji fairainí íñede. ³ Comíni íe llofuíacínona raise cacaillena, Jesús daje botemo jaide. Naie bote namadí Simón Pedro. Naie bote joraimo janore baí ñuitallena Simómó jicanote. Botemo ana raíta, botemona comínina llofuete. ⁴ Llofuia mei, Simómó llote:

—Aforedínomo jai. Nainomo omoí llojjina faíno.

⁵ Simón uai ote:

—Maestro, cue nabaiñiaí díga namona naío llojji faitícaí; íadedí jaca buena oñedícaí. ¿Ñiese ja oítícaí? Íadedí o llua jira, llojjina faitícue.

⁶ Iena naimaci faía mei, ailluena lliciaína jítatímaci. Ie jira naimaci llojji cuaranoiacade. ⁷ Iena cíuano, onollí díga ímací nabaiñiaína uaidote, naimiána naimaci canollena. Naimaci canuaíbilla mei, lliciaína naga bote oruíate. Eo oruílla jira, buiacade. ⁸ Iena cíuano, Simón Pedro Jesús mó íobíllacínó fecallena, caíñící ífodo raínadate. Raíte:

—Odí síño Jítodío; ía cue jamái bue ísoílla jira, cuemona oní jai. Jecínona finuídímedícue.

⁹ Ailluena lliciaína naimaci ua jira, naimaci raíjjicaíllamona, íena naimie llote.

¹⁰ Naimie nabaiñiaímona Zebedeo jító íaímaíaí íte. Juan díga Jacobo íaímaíaí. Simómó Jesús llote:

—Cuena jacíruiñeno. Lliciaína bíruí ocabítomóí; íadedí cue díbeímo naimaci íllena, bíruímona comínina oítomóí.

¹¹ Eníruemo síjjiano, naimaci raruaí faínonocáda, Jesús díga jaídímaci.

Jesúdí efonaitímíena jillotaja rafue

(Mt 8.1-4; Mr 1.40-45)

¹² Jiaíruido Jesús dí jaíe nairaimo ía, efonaitímie naimie díne bite. Naimie eo fodo jaide. Jesúsna naimie cíuano, naimiána raise uaiduamona, ana bítadate. Llote:

—Maestro, o jítaiadedí, cuena jillotaredío.

¹³ Jesús íe onollí oní ñuitajanona, naimiána jetade. Raíte:

—Ona jillotaíacadícue. Maí o jílló. —Íeconí jíllode.

¹⁴ Jesús naimíemo llote:

—Omo suide rafue jaca bumo lloñeno; iadedi Jerusalémo Jusiñamui jofomo Jusiñamui diga ñairaimamo o abina acatajai. O jillua jira, Jusiñamuimo Moisés micori jaie lloga rana feca Iemona comini o jilluana uiñoitimaci.

¹⁵ Iese Jesús naimiemo llote; iadedi Jesús finoca rafue llocana eo uite. Ie muidona naimie lluaana cacaillena, duidinona Jesús jillotallena, ailluena comini naimie dine bitimaci. ¹⁶ Bitimaci; iadedi Jusiñamui diga ñaillena, jofue iñenanomo Jesús jaide.

Jesúdi tisitaitimiena jillotaja rafue

(Mt 9.1-8; Mr 2.1-12)

¹⁷ Jiairuido naimie llofueia, diga comini naimie illa jofomo bitimaci. Fariseuai railla comini bitimaci. Moisés micori llogacinuaina llofueraini bitimaci. Galileamona diga nairaimona bitimaci. Judeamona bitimaci. Jerusalémona bitimaci. Jusiñamui uaido Jesús naimie dine bite duidinona jillotate. ¹⁸ Ie facaise ie bairamo bide tisitaitimiena Jesús dine damerie atidimaci; ¹⁹ iadedi naimaci uillifo iñena jira, ailluena comini illa jira, riñedimaci. Naie jofo bibanilla jira, jofo emodomo a jaidimaci. Jofo beicimo ite tidabacuido a jaidimaci. Jofo emodo econocaida ifodo naimiena ie bairamo bide diga, comini motomo Jesús ecimo ana ñuitadimaci. ²⁰ Iena Jesús ciuanona, tisitaitimie jilluana naimaci inuana Jesús uiñote. Tisitaitimie llote:

—Jadi, o jeacinona cue feitaja jira, iena oni jai dotadicue. Ie facai ibana jai oñeiticue.

²¹ Nainomo itinomona Moisés micori llogacinona llofueraini itimaci. Fariseuai jiai itimaci. Comeciaina facadimaci: “Naimie Jusiñamuina jeare ñaite. Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade”. ²² Naimaci comeciaina facajacinona Jesús uiñuanona, naimacimo jicanote:

—¿Bue ñellena omoi comeciaina iese facadomoi? ²³ Bimiemo: “O jeacinona jai oni dotadicue” cue lloia, cue uai siñonana uiñoñeitomoi; ia bimiemo: “Mai naidacaillanona macari” cue lloia, cue uai siñonana uiñoitomoi. ²⁴ Monamona jaie cue billanona, imana jaidicue. Ie jira jeacino oni dotaja uai cuemo ite. Iena omoi uiñollena, tisitaitimie llote: “Mai naidacai. O bira ferianona, o jofomo mai jai”.

²⁵ Iese naimie raillamona, tisitaitimie jillode. Iecon naimaci motomo naimie naidaide. Ie bira feriano, Jusiñamuimo iobillacino fecajano, ie jofomo jaide. ²⁶ Nana naiena ciolino eo rajicaidimaci. Iemona Jusiñamuimo iobillacinona fecadimaci. Eo rajicaillamona, raitimaci:

—Bie isoide siño comena jaca cioiñedica.

Jesúdi Levína fetua rafue

(Mt 9.9-13; Mr 2.13-17)

²⁷ Jesús jino macarillano, gobierno facaina ucube oraimana ciode. Naimie mameci Leví. Ie ucubena ouillanomo raide. Jesús naimiemo llote:

—Cue llofuegamiena o jaillena, cue diga bi.

²⁸ Naidacaida, Jesús diga jaillanona, ie maijana fainonocai. ²⁹ Nailli ie jofomo Leví aillue rafuena finode, Jesús iena. Diga ucube oraini guisaibitimaci. Diga jiaie comini jiai guisaibitimaci. Jesús diga danomo guitimaci. ³⁰ Nainomo fariseuai cominidi, Moisés micori llogacino llofueraini diga, jama bitimaci. Jesúsna ciuanona, ie llofueoicaiganomo jicanotimaci:

—¿Bue ñelli ucube oraini diga guitomoi? Maraiñede comini diga guitomoi.

Moisés micori llogacinodo ucube oraini raise jaiñenamona, naie isolino diga fariseuai comini nabairiñena jira, iese jicanotimaci. ³¹ Jesús iena cacajano, llote:

—Ecairedino médicono jitañedimaci; iadedi duidinodi médicono jitañedimaci.

³² Jusiñamui dibemo mareuidinona uaibñedice; iadedi maraiñedinona uaibitice.

Jesúmo comini guiñenana jicanua rafue

(Mt 9.14-17; Mr 2.18-22)

³³ Naie facaise fariseuai dinena Jesúmo llote:

—Cai einamací llua isoi, Jusiñamuina cai raise iobitallena, guiñenaruillai illa facaiseconi guiñedícaí. Jusiñamuimo jicabidícaí. Cai jeacino facaina sunaicabitícaí. Cai einamací rafuedo Juan Bautista llofueoicaigano jaidímací. Cai llofuegano iedo jiaí jaidímací; iadedí o llofueoicaigano jaca guitímací. ¿Bue ñellena cai einamací rafuedo jaiñedímací?

³⁴ Jesús uai ote:

—Jiaie rafuedo iena lloiticue. Coniruedí ie aina uarui ia iobilla jira, ie nabaiñiaí sunaiñedímací. Iobillamona guitímací. ³⁵ Jiairuido jai aireiacade conirue naimací díga iñenia, naimací comecí sunaillamona, naimací jitaia, guiñenaruillaídí iite. Ie isoide. Cue comíni díga birui cue illa jira, iocire itímací. Ico cue jaille mei, sunaitímací. Ie muidona birui cue llofueoicaigano guicabitímací. ³⁶ Jiaie rafuedo iena lloiticue: Nia jocoñega comue iniroidí jacaie iniroimo jilliñega. Jilliadí jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite. ³⁷ Jacagomona finoca bolsa como finoca vino joneñega. Jonegadena, maríñena jira, sirillamona igoí raire cuararite. Vino faifite. Igoí jiaí faifite. ³⁸ Como finoca vino comogomo jonelle. Iemei iena faifíñeite. ³⁹ Navui finoca vino jirua mei: “Navui finoca vino nia mare” raillamona, como finoca vino buna jiroacaiñede. Ie isoide. Omoí einamací rafue ifomo jiaie rafue birui ite. Iena omoímo llocabitícue. Iedo jaidícaí; ia omoí einamací rafuemo omoí fibilla jira, jiaie rafuedo birui jiacaiñedomoí —llote.

6

Sábadoruimo Jesús llofueoicaigano maijia rafue (Mt 12.1-8; Mr 2.23-28)

¹ Jiairuido sábadoruimo Jesús, ie llofueoicaigano díga, trigo illa illi motodo joide naisona jaide. Ie llofueoicaigano trigona tijiano, golluano, guicana jaidímací. ² Dajerie fariseuai iena ciuano, llotímací:

—Rairuica rana finosite. Moisés micorí rairuilla jira, sábadoruimo maijinidícaí; iadedí trigona naimací tijiamona, caimona jai maijidímací. Caimona jeacínona jai finodímací.

³ Ie llofueoicaiganona riiduano, Jesús uai ote:

—Cuemona jeacino finoñedímací. David micorí jaie finoca rafuemo omoí comeciaí raise facañedomoí. David micorí guille iñenia, naimie aimetaia, ie nabaiñiaí díga Jusiñamui jofomo fo jaide. ⁴ Jusiñamuimo fecaca llomeniconona uanona, guitímací. Jamai bue isoidíno naie llomeniconona guillana Jusiñamui rairuide. Daní Jusiñamui díga ñairainí iena guiredímací. David micorí iena guite; ia Jusiñamui naimacina duere finoñede. ⁵ Monamona cue billamona, immana jaidícue. Ie jira sábadoruimo comíni finolle rafuena rairuiredícue. Nairuimo finoñelle rafuena jiaí rairuiredícue. Ie jira nairuimo cue jitailla rafuena finoredícue.

Jesúdi onollina idisarodímienna jillotaja rafue (Mt 12.9-14; Mr 3.1-6)

⁶ Jiaie sábadoruimo judíuai ofiracomo Jesús jaillanona, llofue. Ie facaise nainomo nabellimo idisarodímie ite. ⁷ Moisés micorí llogacínona llofuerainí, fariseuai díga, Jesúmo eruaidímací, sábadoruimo Jesús naimienna raabaca ie segoitai. Iena Jesús finoa, naimacimona sábadoruimo naimie jai maijia jira, naimienna llogidoiacadímací. Naimacimona sábadoruimo bu maijia, jeacínona finode. ⁸ Naimací comeciaina facacínona Jesús uíñuamona, onollina idisarodímiemo llote:

—Cue ecímo naidada. —Iemei Jesús ecímo naidadate.

⁹ Jesús nainomo itínomo jicanote:

—¿Ñie isoide rafue sábadoruimo finuadena mare? Bimie birui cue jillotaiadedí, birui mare rafuena finodícue. Cuena birui omoí meineiadedí, birui maraiñede rafue finodomoí. Sábadoruimo ¿ñie isoide rafue finuana rairuidomoí?

¹⁰ Naimacimo eruaillanona, duidimiemo llote:

—O onolli mai oni ñuita. —Iena ñuitajanona jillode. ¹¹ Nainomo itino iena ciuanona, eo iciritimaci.

—¿Ñiese Jesúna nibaiticai? —naimona coniniri siadotimaci.

Jesúdi ie doce llofueoicaiganona fetua rafue

(Mt 10.1-4; Mr 3.13-19)

¹² Nairui aneduaimo Jesús jaide, Jusiñamui diga ñaillena. Namona naio jüide.

¹³ Monaidemo, ie llofueganona naimie dine uaidote. Naimacimona doce digamiena fetode. Naimie diga icabillena, naimacina naimie facaina llorainina naimaci jaillena, naimacina fetode. ¹⁴ Iese mameciredimaci: Simón; naimie mameci jiaicidi Jesús jítaca Pedrona. Andrés; naimiedi Pedro ama. Jacobo, Juan, Felipe, Bartolomé, ¹⁵ Mateo, Tomás, jiaie Jacobo; naimiedi Alfeo jito. Jiaie Simóna fetode. Naimiedi cananista comini facaisemo duide. ¹⁶ Judas; naimiedi Jacobo jito. Judas Iscariote micori; naimiedi Jesúna gaitatimie.

Jesúdi ailluena cominina llofuia rafue

(Mt 4.23-25)

¹⁷ Aneduaimona siniaidinomo ie doce llofueoicaigano diga Jesús bite. Ie jiaie llofuegano naimie dine bitimaci. Ailluena jiaie comini bitimaci. Nana Judeamona bitimaci. Jerusalémona bitimaci. Tiromona bitimaci. Sidómona bitimaci. Tiro monaillai fuemo ite. Sidón monaillai fuemo jiaie ite. Naimie lluomo cacareillena bitimaci. Naimaci duicomona jiaie jilloiacadimaci. ¹⁸ Jananiaie anamo itinomona Jesús jananiaina oni orede. ¹⁹ Nana comini naimiena jetaacadimaci. Naimiemo siño uai illa jira, naimiena jetajamona, naimaci duicomona jillodimaci.

Jesús lloga rafue

(Mt 5.1-12)

²⁰ Ie llofueganomo eruaillanona, Jesús llote:

—Naimie anamo omoi jai illamona, Jusiñamui omoína sedaacana rafuena omoína llofueiticue. Naimiena jitaidomoína, omoína sedaite. Comeciaina facadomoi: “Jusiñamui jitaillacinona dani finonidicai; ia Jusiñamui caina canuamona, iena finoiticai”. Naimie comini omoi illamona, naimie omoína canoite. Iemona caimare iitomoi. ²¹ Naimie jitaillacino omoi finuamona, Jusiñamui omoína sedaite. Naimiedi mare rafuena omoi finuana canoite. Iemona caimare iitomoi. Omoi sunaia, Jusiñamui omoína sedaite. Ailluena comini jeacino finocana jaidimaci. Iena uñuamona, sunaitomoi. Naie isoidino omoi illamona, Jusiñamui omoi comeciaina ocuiñotaite. Iemona iocire iitomoi. ²² Cuemo omoi duia, duere sefuitomoi. Jiaie comini omoína enoitimaci. Omoína oni dotaitimaci. Omoína jeare ñaitimaci. Cuemo omoi duilla jira, omoína jamaitimaci; ia Jusiñamui omoína caimare itataite. ²³ Omoi isoi omoi jaiagaimona Jusiñamui facaina lloraini micoriai jiaie duere sefuidimaci. Iena omoi uñuamona, monamo Jusiñamuimona ailluena ibana ico omoi feñua jira, birui omoi duere sefuia, iocire omoi jai. ²⁴ Iese iitomoi; ia Jusiñamuina jitañedino ico duere sefuitimaci. Comeciaina facadimaci: “Jusiñamuina jitañedicai. Marena birui iticai. Nana cai comecai jitaillacino birui caimo ite”. Iese birui itimaci; ia Jusiñamui naimacina ico duere finoite. ²⁵ Jusiñamuimona buena birui jitañedino ico duere sefuitimaci. “Nana cai comecai jitailla rafue caimo birui illa jira, Jusiñamuimona buena jitañedicai” raitimaci. Iese birui itimaci, ia Jusiñamui naimacina ico duere finuamona, buenitimaci. “Cai comeciaina iocire itatallena, Jusiñamuina jitañedicai” damerie birui raitimaci. Naimaci jeacino facaina sunañedimaci. Birui ite rafuena ebiruitimaci. Iese birui itimaci; ia Jusiñamui naimacina ico duere finuamona, sunaitimaci. Eeitimaci. ²⁶ Naimaciri iobillamona, omoi jaiagaidi Jusiñamui facaina llorainina abi caitadinona marena ñaitimaci. Damerie birui daje

isoidimaci. Jusiñamuina iobitaiacaiñedimaci; ia cominina iobitaiacadimaci. Iemona comini naimacina marena ñaitimaci; ia Jusiñamui naimacina ico duere finoite.

Jesúdi iba oñenana llua rafue
(Mt 5.38-48; 7.12)

²⁷ Jesús llote:

—Cue lluana cacajamona, iena ñino. ñnuamona omoína enoidinona isirui. Naimacina cano. ²⁸ Omoí jeare ñaitinona marena ñaino. Omoína jeare finodino facaina Jusiñamuimo omoí jii. ²⁹ Omoí cacaina bu dutaiade, iba oñeno; iadedi enefebeimo dobaida, enefebeimo jiaí dutallena. Omoí ñiroina bu bairoiachania, omoímo naimie nia jicañenia, naimie jitailla ñiroi baífemo naimiemo feca. ³⁰ Omoímo ite rana bu jicaia, iena caidiñeno feca. Omoímona rana bu bairoia, iena abido jicañeno. ³¹ Jusiñamui jitaillacinona omoí finuamona, jiaie cominina marena fino. Jiaie comini omoína finuana omoí jitailla isoi, naimacina fino. Naimaci omoína marena finuana omoí jitaia, naimacina marena fino. Naimaci omoína maraiñeno finuana omoí jitaia, naimacina ie isoi maraiñeno fino. O finoacaga ra isoi jiaie cominimo fino. ³² Naimie cominina omoí illamona, nana comini daje isoi isirui. Omoína isiruitinona omoí isirui, mare; iadedi omoína gaiñenanona omoí isiruiñenia, Jusiñamui omoína: “Mare” raiñeite. Maraiñede rafuena finoraini naimacina isiruitinona isiruitimaci. Nana cominina omoí isiruiñenia, maraiñede rafuena finoraini baífemo faiñedomoi. Naimaci isoi itomoi. ³³ Naimie cominina omoí illamona, nana comini daje isoi cano. Omoína canodinona omoí canoia, mare; iadedi omoína canoñedinona omoí canoñenia, Jusiñamui omoína: “Mare” raiñeite. Maraiñede rafuena finoraini naimacina canodinona canodimaci. Nana cominina omoí canoñenia, maraiñede rafuena finoraini baífemo faiñedomoi. Naimaci isoi itomoi. ³⁴ Naimie cominina omoí illamona, nana cominimo daje isoi rana feca. Omoímo ra fecadinomo rana omoí fecajia, mare; iadedi omoímo rana fecañedinomo rana omoí fecañenia, Jusiñamui omoína: “Mare” raiñeite. Maraiñede rafuena finoraini naimacimo rana fecadinomo rana jiaí fecadimaci. Nana cominimo rana omoí fecañenia, maraiñede rafuena finoraini baífemo faiñedomoi. Naimaci isoi itomoi. ³⁵⁻³⁶ Omoína gaiñedinona isirui. Naimacimo mare rafuena fino. Naimacimo rana jamai feca. Naimacimona iba uamo ocuiriñeno; ia Jusiñamui omoí raise ibaite. Jusiñamui maraiñedinona canocabide. Naimieri iobiñedimaci; ia naimacina canocabide. Naimacina duenaicabite. Ie jira maraiñedinona omoí duenai. Naimie isoi omoí illamona, maraiñedinodi naimie cominina omoí illana uiñoitimaci. Jusiñamuidi cominina duenaila isoi, cominina omoí jiaí duenai.

Jesúdi jiaie cominina mameriñenana llua rafue
(Mt 7.1-5)

³⁷ Jesús llote:

—Duenailacinona nia llofueiacadicue. Jiaie cominina mameriñeno. Jiaie cominina omoí mameria, omoímo ite maraiñede rafue facaina Jusiñamui omoína duere finoite. Omoímo maraiñede rafuena bu finoia, iena feita. Iena omoí feitañenia, Jusiñamui omoímo ite maraiñede rafuena feitañeite. ³⁸ Jiaie rafuedo iena lloiticue. Rana omoí fecaia, iena raise omoí gaieia, ico ibana omoí oia, raise gaiecana feiñoitomoi. Ie isoide. Jiaínomo maraiñede rafuena finoñeno; ia naimacina duenailamona, naimacimo rana jamai feca. Iena raise feca. O fecaja diese Jusiñamuimona eo raise ibana feiñoitomoi.

³⁹ Naimacina iena nia llofuiamona, naimacimo Jesús jiaie rafuena llote:

—Cue cominina omoí illamona, bie rafuena cacarei. Uanaicinodo omoí jaiñenia, uisnidimie isoi iitomoi. Uisnidimie jiaie uisnidimienaa ifonide. Ifo iade, nagamaiaí dafomo uaidiaimaiaí. ⁴⁰ Fueotimie ie llofueraíma baífemo uaiñede; iadedi naimie raise fueoia, ie llofueraíma isoi jaite. Raise fueollena, cue uaimo cacarei. ⁴¹ Omoí ecimo itimie mo janore maraiñedicino illana omoí uiñoia, iemo comecina facañeno;

iadedi omoimo ailluena ite maraiñedicinomo nano omoi comecina faca. ⁴² Omoimo maraiñedicino illamona, ¿niese omoi ecimo itimienna mameritomoí? Omoimo ite maraiñedicinomo omoi comecina facaacaíñena jira, maredinona abi caitadinodomoí. Omoi comeciaina nano raise fino. Iemei omoi ecimo itimienna canorenitomoí. Naimie comecina raise canorenitomoí.

Jesúdi riarra llisilla llilla llua rafue
(Mt 7.17-20; 12.34-35)

⁴³ Jesús nia llofue:

—Mare riarra maraiñede riarra isoi llisiñede. Maraiñede riarra mare riarra isoi jiai llisiñede. ⁴⁴ Llisillamona nie isoide riarra illana uiñotícaí. Amena ie llisilla llillamona amena marena uiñoga. Llillamona, amena maraiñenana jiai uiñoga. Eecuaimona uvas railla riarana oñedícaí. Monaigimona higos railla riarana jiai oñedícaí. ⁴⁵ Ie isoide. Naimaci comeciaino iticinomona comini ñaitimaci. Mare comeci iticinomona maremiedi mare rafuena finocabide. Maraiñede comeci iticinomona maraiñedimie maraiñede rafuena finocabide.

Jesúdi naimienna #nuana ñaia rafue
(Mt 7.24-27)

⁴⁶ Jesús nia llofue:

—Omoimona damierie cuena: “Cai Nama” raitomoí; iadedi cue llogacinona finoñedomoí. ⁴⁷ Diga comini cue dine bitimaci. Cue uaina cacadimaci. ⁴⁸ Cue uaina #notimie jofona raise finodimie isoide. Jofona raise finodimiedi ie jofona finodemo, jofona goiñellena, nofici illa dinori eo ana raite. Noci deidemo, eo jinuidemo, jofomo ille toia, jofo raise finua jira, jofo goiñede. Iena faíñede. Ie isoide. Cue llua #notimie faíñeite. ⁴⁹ Cue uaina #noñedimie jofona raise finoñedimie isoide. Jofona raise finoñedimiedi ie jofona finodemo, enirue emodomo iena finode. Ana raiñede. Noci deidemo, eo jinuidemo, jofomo ille toia, jofo goillamona, jai eo judaisite. Iena faífide. Ie isoide. Cue llua #noñedimie faífite —llote.

7

Jesúdi capitán mullaimana jillotaja rafue
(Mt 8.5-13)

¹ Ie llua fuillamona, Jesús Capernaumo jaide. ² Nainomo romanos railla nairaimo duide illaíma ite. Cien soldaduaina sedauide. Naimiedi capitán. Judíuñedimie. Ie mullaíma eo duide. Niade fiadaiacade. Capitán naimienna eo gaide. ³ Capernaumo Jesús illana capitán fidiano, Jesús dine judíuai einamacina orede. Naimie dine Jesús billena jitaide. Ie mullaímana jillotajaíbillena jitaide. ⁴ Jesús dine naimaci rillano, capitán dine naimie billena, naimiemo duere jicanotimaci. Raitimaci:

—Naimiedi caimona maremienna jira, naimienna o canuana jitaidícaí. ⁵ Cai nairaina isiruite. Ie ucube diga cai ofiracona finotate.

⁶ Iena cacajamona, Jesús naimaci diga jaide. Capitán jofomo iaírei Jesús ria, capitádi Jesús dine ie nabaiñaína orede, Jesúsno llollena:

—Maestro, biñeno. Jamai bue cue isoilla jira, cue jofomo biñeno. ⁷ Jamai bue cue isoilla jira, o dine jiai jaiñedicue. O illanomona o uaido cue mullaíma jilloita. ⁸ Jiaie illaícomini anamo iticue. Naimaci lloga uaina #noticue. Cue anamo jiaie soldaduai illanona, cue uaina #notimaci. Cue anamo cue mullaíma illa jira, naimiedi cue uaina #note. O anamo naie duico illa jira, o uaina bene o lloia, cue mullaíma jilloite.

⁹ Iena cacajano, Jesús raijicaide. Oni dobaidajano, naimie diga jaidinomo llote:

—Bie isoidimie cue uaina #notimienna jaca baiñedicue. Cai judíuai cominimona bie isoidimienna jaca iñede. Mai abido jai.

¹⁰ Capitámona bitino abido capitán jofomo rillano, mullaíma jai jilluana cioidimaci.

Jesúdi feciño jítóna jillótaja rafue

¹¹ Jiairuido Naín railla nairaimo Jesús jaide. Ie llofueoicaigano jiai jaidimaci. Ailluena comini jiai jaidimaci. ¹² Naie nairai ie nasemo naimie iaireicaia, jai fiodaitimiena comini jino atiana ciode. Naie fiodaitimiedi conirue. Ie eidi feciño. Dajede ie jítodi jai fiodaite. Ailluena Naín itino naie feciño diga jaidimaci. ¹³ Jesús naiñaiñona ciuanona, naiñaiñona duenaite. Naiñaiñona raite:

—Mai eeño.

¹⁴ Fiodaitimie dine Jesús jaillanona, naimaci ieconi naidadallena, ie uiga rana jetade. Naimiena uitinodi ieconi naidadatimaci. Fiodaitimie mo Jesús llote:

—Mai a rainada.

¹⁵ Iena Jesús llua mei, naie fiodaitimie ie uiga ramona a rainadate. Ie meinoconi naimie ñaite. Jesús naimiena ie eimo abido ite. ¹⁶ Naieri nana jacinaitimaci. Jusiñamuimo iobillacinona fecadimaci. Raitimaci:

—Jusiñamui facaina lloraima cai motomo ite. Naimie uai eo siño. Naimiena Jusiñamui oretaja jira, Jusiñamui caina birui canoacana jira, iobidicai.

¹⁷ Nana Judeamo itino Jesús finoca rafuena fididimaci. Judea enirue fuemo ite nairaiaidi jiai fididimaci.

Jesús dine Juan Bautista micori ie llofueoicaiganona oretaja rafue
(Mt 11.2-19)

¹⁸ Juan Bautista micori llofueoicaiganodi nana Jesús finoca rafuena fidiano, iena naimie mo llote. Ie llofueoicaiganomona Juan micoridi menaimiena uaidote. ¹⁹ Llote:

—Jofue iñenanomo navui cue ia, jiaimie billena llofuecabiticue. Jesús dine omico jai: “¿Buudio? ¿Odi Juan llofuegamiedio? ¿Jiaimie bille mo nia ocuiriticai?” naimie mo jicano.

²⁰ Jesús dine iaimaiai rillano, Jesúmo llotiaimaiai:

—Juan Bautista cocona orede. Jofue iñenanomo navui naimie ia: “Jusiñamuimona damie biite” naimie llofuecabite. Juan llofuegamiena o illana uiñoiacadicai. Imieñedi odena, jiaimie bille mo nia ocuiriticai. Cocomo llono.

²¹ Jesús dine iaimaiai billa facaiseconi, Jesús diga isoide duicuai illanona jillotate. Jananiai anamo itinomona jananiaina oni jiai orede. Uisnidinona uisina dane ciotate.

²² Ie jira Jesús iaimaiaimo llote:

—Cue llua cacadomico. Cue finoca rafuena ciodomico. Juan dine abido omico jaillanona, iena naimie mo llono. “Uisnidino jai ciodimaci. Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fiodaillamona damerie jai jillodimaci. Dueredino mare rafuena jai cacadimaci”. Iese naimie mo llono. ²³ Jiai llono: “Ñibai nana cue rafuena raise cacaiñedio; ia cuena jaca nia ñnocana o jaia, caimare iitio”.

²⁴ Iaimaiai abido jailla mei, naimie ecimo ailluena ite cominimo Jesúdi Juan rafuena llote:

—Jofue iñenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena comecina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoifede. Nie isoide rafue naimie mo ia, cue rafuena llocana jaide. ²⁵ ¿Bue ñellena naimie dine jaidomoi? Mare iniroina jítadimiena cioiñedomoi. Mare iniroina jítadinona omoi cioacaniadedi, illacomini dine jaidomoi. Naimacimo ailluena ra ite. ²⁶ Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie llua jira. ²⁷ Malaquías micori naimiena jaie cuega: “Jusiñamui raite: ‘Ero, o uicodo cue rafuena lollena, damiena oretaiticue, comini comeciaina marecinona duiñollena’ ” cuega. Malaquías Juan Bautistana cuete. ²⁸ Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofue; ia naimie cue lloga rafuena omoi iso

cacaiñede. Naimie cue lloga rafue omoi isoi suillana cioiñede. Iemona naimie baifemo faitomoi.

²⁹ Naimacina navui Juan bautizaja jira, nainomo ite comini iena cacajano, Jusiñamuimo iobillacinona fecadimaci. Gobierno ucube orainidi jiai fecadimaci; ³⁰ iadedi fariseuai iobillacinona fecañedimaci. Moisés llogacinuaina llofueraini jiai fecañedimaci. Jusiñamui naimacina jillotajana naimaci jamailla jira, naimaci jeacinona Jusiñamuimo lloñena jira, Juan naimacina navui bautizañede. ³¹ Jesús llote:

—Cuenta ñnoñedinona lloiticue: Ero, omoina ñaiticue. ³² Jifanote uruiái isoidomoi. Uruiái jifanoiacania, naimaci nabaiñiaina uaiduanona, raitimaci: “Omoi diga jifanoiacadicaí; iadedi caí diga jifanoiacaiñedomoi. Caimarede rafuena caí jifanoiacania, sunailla rafuena jifanoiacadomoi. Sunailla rafuena caí jifanoiacania, caimarede rafuena jifanoiacadomoi. Coninina nabairiñedicaí” raitimaci. ³³ Ie isoidomoi. Juan jirorainide. Caimare guñede; ia naimie diga nabairiñedomoi. Naimiena gaiñedomoi. Ie jira omoimona dajerie naimiena raitimaci: “Janaba anamo naimie illamona, naimie uairico isoi ite” raitimaci. ³⁴ Monamona billanona, imana jaidicue. Omoi isoi guiticue. Caimataidicue; ia cue diga nabairiñedomoi. Cuenta jiai gaiñedomoi. Ie jira cuenta jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimedio”. ³⁵ Iese raitomoi; iadedi Jusiñamuina ñnotinodi cue finoca rafuena marenana uifotimaci.

Jesús Simón jofomo illa rafue

³⁶ Jiairuido fariseuai cominimona, ie jofomo naimie diga guillena, damiedi Jesúna uaidote. Naimiedi Simón. Naimie dine Jesús jaillanona, naimie diga guite. ³⁷ Jesús guitemo, daje riño fo jaide. Naiñaiñodi marañede rafuena finoraño. Naicomo Jesús guillana fidiano, naiñaiño fo jaide. Noficimona finoca frascona atide, na soride ra illa diga. ³⁸ Judíuai aciaita jaca guisoidimaci. Jinafo dine eilli jonesuidimaci. Fo jaillano, naie riño Jesús abimo naidaide. Naiñaiño eiamona, naiñaiño uisimona uaide uillinociai diga Jesús eillina jocode. Safenaillena, naimie eillina ie ifotie diga dote. Ie eillina jiai llibanote. Ie mei ie eillimo frascomona soride rana totade. Naimiena naiñaiño isiruillamona, iese naiñaiño finode. ³⁹ Iena cüanona, Simón dama comecina facade: “Bimie Jusiñamui facaina lloramadena, nie isoide naimiena jetade riñona niade uifote. Naimiedi naiñaiño marañede rafuena finoraño uifote. Iena naimie uifueamona, naiñaiño jino raire orede. Naimiedi Jusiñamui facaina lloramañede”. ⁴⁰ Jesús naimie comecina facajacinona uifueano, naimiemo llote:

—Simón, naiñaiño finoca rafuena o raise fueollena, omo bie rafuena lloiacadice.

Simón uai ote:

—Maestro, mai cuemo llono.

⁴¹ Jesús llote:

—Damie menamaiaimo ucubena fecade. Damie mo quinientos diga ucubena fecade. Jiaimie mo cincuenta diga ucubena fecade. ⁴² Ie iade, naiena abido meidonidiaimiai. Ie jira ucubena fecadimiedi raite: “Dama omico meidoñega. Naiena jai feitaticue”. Ero, Simón, ¿nimieca ucubena fecadimiena eo isiruite?

⁴³ Simón dinena uai ote:

—Cue comeci raite: Ailluena ucube feitaja jira, eo ailluena ucubena igamie.

Jesús dinena raite:

—Raise cue uaina fairiotio.

⁴⁴ Iemei Jesúdi riño dine dobaidajanona, Simómo llote:

—Biñaiño ja lloiticue. O jofomo biticue; ia cuenta raise nafueñedio. O nabai o dine bia, naimiena raise nafuecabitio. Ie jearede eilli jocollena, comini finocabilla isoi, jñui fecadio. Safenaillena eilli dora fecadio. Naimiena llibanotio. Ie abi caimare sorillena, janore soride ra naimiemo jonetio. Iese cuenta nafueñedio; ia bie riño cuenta isiruillamona, ie uillinociai diga cue eillina jocode. Ie ifotie diga dote. ⁴⁵ Naiñaiño cue

ecimo fo billanona, cue eillina diga icaiño llibanote. ⁴⁶ Naiñaiño cue eillimo soride rana totade. ⁴⁷ Naiñaiño eo jeacino ite; ia cuena naiñaiño eo isiruillamona, nana ie jeacinona jai oni dotajana uiñoticaí. “Jeacino cuemo raise iñede” comecina bu facaia, Jusiñamui naimie jeacina oni dotajamona, naimie Jusiñamuina janore isiruite. Iemo o comecina faca.

⁴⁸ Naiñaiño lote:

—O jeacino jai oni dotaca. Iena jai feitaticue.

⁴⁹ Jiaíno nainomo guillanona, coniniri ñaitimaci:

—Bimiedi ¿nie isoidimie? Bimie jeacino oni dotanide.

⁵⁰ Jesús dinena riñomo lote:

—Cuena o ñinua jira, o jeacinomona jai jillodio. Mai uri o jaillano o i.

8

Dajerie riñoniai Jesúsna canua rafue

¹ Ie facaise diga nairaímo Jesúsdi mare rafuena llocana jaide. Naimie anamo comini illana Jusiñamui jitailla jira, Jesúsdi Jusiñamui díbeimo naimaci comeciaí iuaina meid-uana llofuede. Ie doce llofueoicaigano naimie diga jaidimaci. ² Dajerie riñoniai jiaí jaidimaci. Naiñaiñuaimona dajerie Jesús navui jananiai anamona orecañaiñuai. Dajerie duicomona jilloitagañaiñuai. María Magdalena ite. Naiñaiñomona siete diga jananiai oni oretate. ³ Juana ite. Naiñaiño inidi Chuza. Herodes raila illaíma ecimo naimie maijuide. Susana ite. Jiaíe riñoniai jiaí itimaci. Naiñaiñuai ramona Jesúsna canouidimaci.

Jesúdi trigona judaídimeia llua rafue

(Mt 13.1-9; Mr 4.1-9)

⁴ Diga nairaíamona ailluena comini Jesús dine billanona, naimacimo lote:

—Jusiñamui omoína sedaacana omoi fueollena, bie rafuena lloiticue. ⁵ Damiedi trigona judaíaide. Naimie judaíamona naisomo janore iduai juide. Comini nainomo jaillano, iena saitadimaci. Bai jailla mei, sillíñiai iena jiaí guisaíbite. Ie jira sicoñede.

⁶ Nofiemo jiaíe iduai juide. Sicode; iadedi jinui raise iñena jira, duide. ⁷ Eecuaí illanomo jiaíe iduai juide. Eecuaí sicuamona, riana eecuaí ibaica. Ie jira llisiñede. ⁸ Mare eniruemo jiaíe iduai juide. Sicode. Llisillamona danademo cien diga llisillana ote.

Bie rafuena naimie llua mei, naimacimo lote:

—Omoi jeforena jira, raise fueollena, cue lluomo cacarei. Iena ñno.

Jesús ie como lloga rafuena llofua rafue

(Mt 13.10-23; Mr 4.10-20)

⁹ Jesúsno ie llofueoicaigano ie como lloga rafuena jicanotimaci:

—¿Bue ñellena bie isoide rafuedo cominina llofuetio?

¹⁰ Uai ote:

—Jusiñamuidi omoína ie sedaacana rafuena jai uiñotade. Jiaíe iena uiñoñedomoi. Jiaíe cominina iena nia uiñotañede. Ie jira bie isoidicinodo naimacimo lloticue. Cue siño finoca rafuena ciodimaci; iadedi iena naimaci ñnoñena jira, uiñoñeno jaidimaci. Cue llofuiana jamai cacadimaci; iadedi naimaci ñnoñena jira, raise cacaiñedimaci. Uiñoñedimaci.

¹¹ Omoína cue como lloga rafuena llofueiticue. Naie iduaídi Jusiñamui uai. ¹² Dajerie comini comeciaí naisomo juide iduai isoidimaci. Jusiñamui uaina cacadimaci; ia naimaci naie uaina ñnoi raillano, naimaci naiemona jilloi raillanona, Taife naimaci comeciaímo cacaja uaina ñnotañede. ¹³ Jiaíe iduai nofiemo juide. Dajerie comini comeciaí naie nofie isoidimaci. Jusiñamui uai nano naimaci cacaía, iena caímare feiñotimaci. Nofiemo riga iduai jainaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefua, abido danomo uaidimaci. ¹⁴ Jiaíe iduai eecuaí illanomo juide. Naie iduai sicua mei, iena eecuaí ibailla jira, raise llisiñede. Dajerie comini comeciaí naie illano isoidimaci. Jusiñamui uaina

cacadimaci. Inotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciaino itabiñede. Jusiñamui jitaille rafuena finocana jaiñedimaci. ¹⁵ Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Mare jeanide comeciainona inocana jaidimaci. Eo lliside isoidimaci. Jusiñamui jitailla rafuena sefuiruiñeno inocana jaidimaci.

Jesús ie rafue llocana jailla llua rafue

(Mr 4.21-25)

¹⁶ Jesús nia llote:

—Lamparín bu unia meinoconi, jiaie ra bñide anamo rainañega; iadedi jofu jeraimo lligaiñollena, nainomo bite comini raise cioillena, ie rairanomo rainaca. ¹⁷ Ie isoide. Cue rafue llocana jaia, comini comeciai iticinona uiñotade. Uanaicino naimaci cacajamona, damierie inotimaci. Damierie inoñedimaci. ¹⁸ Cue lluaño raise cacarei. Iena omoi inuamona, Jusiñamui omoína canoite. Omoína uiñocana jaitaite. “Jusiñamui rafuena uiñoticue” raitimiedi inoñenia, Jusiñamui naimiena faifitaite.

Jesús díbeimo itinona ñaia rafue

(Mt 12.46-50; Mr 3.31-35)

¹⁹ Cominina Jesús nia llofua, naimie dine Jesús ei, ie amatiai diga bitimaci; ia ailluena comini illa jira, naimiemo riñedimaci. ²⁰ Nainomo itino naimiemo llote:

—O ei, o amatiai diga jino naidaidimaci. O diga ñaiacadimaci.

²¹ Jesús uai ote:

—Jusiñamui uaina cacajamona, iena inotino ieca cue eidi, cue amatiaidi.

Jesúdi jorai baguana llícaitaja rafue

(Mt 8.23-27; Mr 4.35-41)

²² Jiairuido botemo Jesús jailla mei, ie llofueoicaiganomo llote:

—Ruica díbeimo mai cai jailli. —Ie mei jaidimaci. ²³ Naimaci jaidemo, Jesús inide. Bai jaidimacimo, eo riire aifi bite. Baguamona botemo jinui a uaide. Oruiacana jira, eo jacinaitimaci. ²⁴ Jesúna casitajano, naimiena raitimaci:

—Maestro, jai buisaidicai. Jai corobaisaidicai.

Naimie casillano, aifina lletade. Joraina llícaitade. Ieconi aifi llícaide. Bagoñede. ²⁵ Naimacimo jicanote:

—¿Bue ñellena cuena inoñedomoi? —Naimiena jacinaillamona uai oñedimaci. Raijicaillamona, coniniri ñaitimaci:

—Bimiedi, ¿nie isoidimie? Aifi naimie uaina inote. Jorai naimie uaina jiai inote.

Jesúdi Gadara railla eniruemo illa rafue

(Mt 8.28-34; Mr 5.1-20)

²⁶ Ruica díbellemo ridemo, Gadara railla eniruemo sijidimaci. Galilea facaisemo ite. ²⁷⁻²⁹ Botemona ari Jesús jaidemo, damie Jesús dine bite. Naie nairai imie. Janaba anamo illamie. Taimiena jai jaicaisoide. Jofomo naimie irainide; ia comini raioillanomo noñie moto ifuaimo i-isoide. Ebena cominina naimie faei raillanona, lloeo diga ie onollidi maiga. Ie eilli jiai maiga; iadedi lloeo oni ticonote. Ie mei jofue iñenanomo Janaba naimiena jaitate. Iese suisoide.

Jesúna naimie ciuanona, cuirioide. Jesús ecimo uaide. Janaba naimiena ado llotatate: —Jesús, nanoca Jusiñamui Jitodio. ¿Ñiese cuena nibaiacadio? Cuena duere finoñeno.

Iese raite, Janaba naie imamona oni jai oretajana Jesús llua jira. ³⁰ Jesús naimiemo jicanote:

—¿O mamaci bu?

Uai ote:

—Aillosiedicai. —Ailluena jananiai naimie ecimo illa jira, iese naimiedi raite. ³¹ Jesúsno duere jicanoside, iraimo naimacina nia oretañellena. ³² Naie facaise nainomo ite anedumo ailluena chanchuai itimaci. Chanchuai abimo naimaci jaillena Jesúsno duere jicanotimaci. Jesús dinena:

—Jee —raite. ³³ Ieconi himamona jaidemo, chanchuai abimo jaidimaci. Iena suidemo, iconi jillacimo joraimo chanchuai aisidimaci. Dinomo corobaiside.

³⁴ Iena ciuanona, chanchuai sedaraini naimaci nairai dine aisicana jaidimaci. Naie rafuena llocana jaidimaci. ³⁵ Ie jira diga comini jaide, naie rafuena raise fidillena. Jesús dine naimaci ridemo, jaive Janaba anamo illamiena Jesús ecimo raillana cioidimaci. Naimie iniroina jai jitade. Naimie jai uairicoñede. Iena ciuanona, Jesúsna jaciruitimaci. ³⁶ Naie rafuena ciodinodi como bitinomo naimie jilluana llotimaci.

³⁷ Naimiena naimaci jaciruillanona, naimacimona oni jaillena nana naie eniruemo ite nairaidi Jesúsno jicanotimaci. Ie jira botemo Jesús jaide, ruica dibeimo abido jaillena. ³⁸ Ieconi jaive Janaba anamo illamie Jesúsno jicanote, naimie diga jaillena; iadedi Jesús raite:

—Dama ite. ³⁹ Mai o jofomo o jai. Nainomo itinomo nana Jusiñamui omo finoca rafuena lloño.

Ie mei jaide. Nana naimie nairaimo Jesús naimiemo finoca rafuena llocana jaide.

Jesúdi mena duide riñona jillotaja rafue
(Mt 9.18-26; Mr 5.21-43)

⁴⁰ Ruica dibeimo Jesús abido ria, naimie abido billemo naimaci ocuirilla jira, ailluena comini naimiena feiñotimaci. ⁴¹ Jairona mameciredimiedi Jesús dine bite. Naimiedi judíuai rafue ofiraco sedaraima. Jesúsno duere jicanollena, ana bitadate. Naimie jofomo Jesús billena duere jicanote. ⁴² Dañaiñode ie jisa. Doce años naiñaiñodi ite. Niadedi fioidiacade. Ie jira Jesúsno jicanuabite. Iena cacajano, naimie diga Jesús jaide. Ie llofueoicaigano jiai jaidimaci. Jesús jaillano, diga comini naimiemo ñaijisaide.

⁴³ Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. Naiñaiño jaca buna jillotanide. ⁴⁴ Jinafo dinena billanona, Jesús iniroi fueda jetade. Iemona diailladi faionocaide. Jillode.

⁴⁵ Jesús dinena jicanote:

—¿Bu cuena jetade?

Naimie ecimo ite comini uai otimaci:

—Ona jetañedicaí.

Ie nabaiñiai diga Pedro dinena raite:

—Maestro, ailluena comini o ecimo jaidimaci. Omo ñaijidimaci.

⁴⁶ Jesús uai ote:

—Damie cuena jetade. Cue abimona cue uai jaillamona, naimie jai jillode.

⁴⁷ Jaive duidiñaiñodi Jesús naiñaiñoña uinuana uinote. Ie jira Jesús dine jaciruicana bite. Naimie uicomo ana bitadajanona, nana comini uicomo naimiena jetaja rafuena llote. Naiñaiño ieconi jilluana llote. ⁴⁸ Jesús dinena naiñaiñoña raite:

—Ñoo, cuena o inua jira, jai jillodio. Mai jaillanona, uri o i.

⁴⁹ Naiñaiño diga Jesús nia ñaitemo, Jairo jofomona damie bite. Jairomo llote:

—O jisa jai fioidaite. Maestrona ñaidoñeno.

⁵⁰ Iena Jesús cacajano raite:

—O comeci jarire iñeno; ia cuena nia ino. Naiñaiño jilloite.

⁵¹ Jairo jofomo naimaci rillano, ailluena comini naimie diga fo jaillana rairuide. Dani diese fo jaillana jitaide: Pedro, Jacobo, Juan, nai jitaibici moo, naiñaiño ei. Jaca diese fo illana jitaide. ⁵² Nana nainomo itino eecuinaidimaci. Failliñaidimaci. Jesús dinena raite:

—Omoí eeñeno. Cuemona naiñaiñodi fioidañedesa. Jamai inide.

⁵³ Jai fiodaitedi: “¿Bue ñelli inide raitio?” raillanona jaisitimaci. ⁵⁴ Jesús fo jailla mei, naiñaiño onollina llinocaida, raite:

—Jitaibici, mai naidacai.

⁵⁵ Ieconí naiñaiño joreño abido bite. Naidacaide. Jesús llote:

—Guillena naiñaiño eca. ⁵⁶ —Naiñaiño moo, ie ei diga, rajicaidiaimaia. Jesús iaimaiaimo llote:

—Bie rafuena bumó lloño.

9

Jesúdi ie llofueoicaiganona oretaja rafue

(Mt 10.5-15; Mr 6.7-13)

¹ Ie doce llofueoicaiganona naimie dine Jesús uaiduanona, naimacimo ie uaina iñonocaide, jananiaina anamona cominina jilloitallena. Duicuaina oni oretallena, iena jiai iñonocaide. ² Naimacimo llote:

—Omoí jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoí illana Jusiñamui jitailla jira, naimie díbeimo omoí comeciai iuaina meido”. Duidinona jillota. ³ Omoí jaia, buena uiño. Omoí abina riidollena, jiguídana uiño. Ailluena rana omoí uiñellena, bolsana uiño. Llomeniconá uiño. Ucubena uiño. Guille ifo meidollena, rana uiño. Meidolle iniroina uiño. ⁴ Nie nairaimo omoí jaia, daacomo omoí ri. Naie nairaimo omoí ille dinori, daacomo omoí i. ⁵ Omoína comini feiñoñenia, naimaci nairaimona omoí jaia, omoí eilliaimo ite jearacuaina oni jaidino. Nicino naimacimo illana naimaci uiñollena, omoí eilliaina oni jaidino.

⁶ Jesús naimacimo llua mei, jaidimaci. Jusiñamui rafuena lluanona, diga nairaimo jaidimaci. Diga comini imaci duicomona jillotatimaci.

Juan Bautista micori fiodailla rafue

(Mt 14.1-12; Mr 6.14-29)

⁷ Naie facaise Herodes railla gobernador nana Jesús finoca rafuena fidide. “Fiodaillamona Juan Bautista micori jai jillode” dajerie railla jira, ie comeci uri iñede. ⁸ Jiaie comini raisoidimaci:

—Elías jai bairede.

Jiaíno raisoidimaci:

—Fiodaillamona Jusiñamui facaina jaie lloraima micori jai jillode.

⁹ Jesúsna fidiano, Herodes comeci uri iñede. Comecina facade: “Juan micori ie ifogina navui jaitataticue. Ie muidona ¿birui bu ie rafuena fididicue?” Raise uiñollena, Jesúsna cioacade.

Jesús cinco mil iñiaina ecaja rafue

(Mt 14.13-21; Mr 6.30-44; Jn 6.1-14)

¹⁰ Jesús llofueoicaigano abido bia, Jesúsno naimaci finoca rafuena llotimaci. Ie mei daní ie llofueoicaigano diga Jesús Betsaida railla nairai dine jaide; ¹¹ iadedi comini iena fidianona, naimiena racadimaci. Naimie dine naimaci rilla mei, naimacina feiñuanona, naimie anamo comini illana Jusiñamui jitailla jira, Jesúsdi Jusiñamui díbeimo naimaci comeciai iuaina meiduana llofue. Duidinona jiai jillotate.

¹² Jitoma ana ítemo, ie doce llofueoicaigano naimie dine billanona, raitimaci:

—Jofue bene iñede. Bene jaca buedi iñede. Ianori ite nairaiamo, ianori ite jofuemo naimaci inillena, naimaci guille ollena, bie cominina abido oreta.

¹³ Jesús uai ote:

—Naimacina bene eca.

Uai onaisite:

—Dani caimo ite cinco llomenico mena lliciai diga. Nana naimaci guillena, ¿guille cai iballena nibai jitaideo?

¹⁴ Cinco mil iñiai nainomo illa jira, ailluena guille jitaillana uñotimaci. Naimaci ainiai, imaci uruiai diga, jiai itimaci. Ie llofueoicaiganomo Jesús llote:

—Comini ana raillesa llono. Cincuenta digamierie ana imaci raillesa llono.

¹⁵ Iena finodimaci. ¹⁶ Naie cinco llomenicono, naie mena lliciai diga Jesús uanona, monamo eruaillanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. ¹⁷ Nana guillanona monidimaci. Monillanona, fiebide guillena iraidimaci. Doce cirigaiaimo oruitatimaci.

Pedro Jesúsna lua rafue

(Mt 16.13-19; Mr 8.27-29)

¹⁸ Jiairuido Jesús ie Moomo jiaa facaiseconi, ie llofueoicaigano naimie diga illanona, naimacimo jicanote:

—¿Niese cominidi cuena raitimaci?

¹⁹ Uai otimaci:

—Damierie raitimaci: “Juan Bautista micorideo”. Damierie raitimaci: “Odi Elíadio”. Jiaino raitimaci: “Jusiñamui facaina jaie ite llorainimona damie jai jillode. Imiedio”.

²⁰ Jesús naimacimo jicanote:

—¿Niese omoi cuena raitomoi?

Pedro uai ote:

—Odi cai Jilloitaraimadio. Jusiñamui facaina lloraini micoriai o billena jaie llotimaci. Jusiñamui ona orede.

Jesús ie fiodaillena llofua rafue

(Mt 16.20-28; Mr 8.30-9.1)

²¹ Jesús naimaci como llogacino bumo llwana rairuide. ²² Llote:

—Cai judíuai illaicomini cuena eo duere finoitimaci. Cuena jitañellemona, cuena meineitimaci; iadedi darui amani illanona, fiodaillanona jilloiticue.

²³ Nana ie llofueoicaiganomo llote:

—Cue cominina bu jaiacania, ie jitaile rafuedo jaiñena. Cue dibeimo naimie jaillamona, duere sefuicana jaite. Nibai naiemona fiodaite. Bu iese jaiacania, cue dibeimo naimie iite. ²⁴ Duere sefuillana jaciruillanona cue cominina bu jaiacaiñenia, ja muidomo faifite; iadedi duere sefuillana jaciruiñenamona cue cominina bu jaia, jaca faifñeite. ²⁵ Cue cominina bu jaiñenia, nibai eo duere sefuñeite. Nibai aillena ra naimiemo iite; ia, ¿niese cue Moo dine riite? Nainomo naimie riñeno faifite. ²⁶ Cuena bu meiruia, cue uaina bu meiruia, dane cue bia, naimiena meiruiticue. Cuena meiruillanona: “Cristomo duidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaienisaí siño uai isoi illanona, cue Moo dinena monamona ico biiticue. Cue Moo uai cuemo illanona, ebire biiticue. ²⁷ Uanaicinona omoimo lloticue. Omoimona dajerie nia fiodañeitomoi, illaimana cue bairellena cioitomoi.

Jesús abi meidocaila rafue

(Mt 17.1-8; Mr 9.2-8)

²⁸ Ocho digarui illanona, Jusiñamuimo jillena, anedumo Jesús jaide. Naimie diga jaillena, Pedrona uite. Juan jiai uite. Jacobona jiai uite. Jiaie llofueoicaiganona uñede. ²⁹ Naimie jiamona naimie abi meidocaide. Naimie iniroi naie dacaiño eo userecaide. ³⁰ Ieconí menamie bairiano, Jesús diga ñaitiaimaiaí. Moisés micori joreño ite. Elías jiai ite. ³¹ Ebire bairediaimaiaí. Jesús Jerusalémo fiodaile rafuena ñaitimaci. ³² Ie facaiseconi Pedro ie nabaiñiai diga jai inidimaci; ia casillanona, Jesús ebirenana ciodimaci. Jesús ecimo itiaimaiaina jiai ciodimaci. ³³ Iaimaiaí jaiacania, Pedro Jesúsno llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie. —Iese raite; ia ie ñaia rafuena raise uiñoñoeno jamai ebena ñaite.

³⁴ Iena naimie nia lluanona, uillie billamona, naimacina ibaide. Uillie ibaibillaconi jacinaitimaci. ³⁵ Uilliemona Jusiñamui naimacimo llote:

—Bimiedi cue Jito. Naimiena fetodicue, cue jitaille rafue finollena. Naimie llua omoi cacareillanona, iena ñno —llote.

³⁶ Jusiñamui llua mei, dama Jesúna dane cioidimaci. Jesús diga itino naimaci cúa rafuena naie facaiseconi jaca bumo lloñedimaci.

Jesúdi Janaba anamo itimiena jillotaja rafue

(Mt 17.14-21; Mr 9.14-29)

³⁷ Ie areruido anedumona ana bitimacimo, ailluena comini naimacimo dafaifide. ³⁸ Cominimona damie ado llote:

—Maestro, cue dajede cue jito duillana jibuisaibi. ³⁹ Janaba naimie anamo illamona, cue jito cuiritate. Cue jitona naillitacabite. Iemona ie fue mullecabide. Naimiena bofedaicabite. Naimiemona oni jaiacaiñede. ⁴⁰ Janabana oni oretallena, o llofueoicaiganomo jicanoticue; ia oretanidimaci.

⁴¹ Iena cacajanona, Jesús ie llofueoicaiganomo llote:

—Cue uai siñonana nia ñnoñedomoi. Cue mare rafuedo nia raise jaiacaiñedomoi. Omoi diga are iticue. Raise omoi ñnollena, ¿nie dinori omoi diga iiticue? —Naie duidimie moomo llote—, O jito cue dine mai ati.

⁴² Naie urue billano, Janaba naimiena enruemo ana dotade. Naimiena naillitate; ia oni jaillena Jesús Janabana lletade. Iecon naie urue jillode. Iemei Jesús ie moomo naimiena fecade. ⁴³ Comini iena cúanona, Jusiñamui siño uai naimiemo illari raijicaidimaci.

Jesús ie fiodaillena dane llofuia rafue

(Mt 17.22-23; Mr 9.30-32)

Naimaci nia raijicaia, Jesús ie llofueoicaiganomo llote:

⁴⁴ —Cue llua feitaño. Monamona billanona, imana jaidicue; ia Jusiñamui jitailla jira, jiairuido illaicomini cuena meineitimaci.

⁴⁵ Jesús llua raise cacaiñedimaci. Naimie iena llofueña jira, iena raise uiñoñedimaci. Naimiemo iena jicanuana jiai meiruitimaci.

Jesús ie llofueoicaigano moto imiena ille rafue

(Mt 18.1-5; Mr 9.33-37)

⁴⁶ Ie facaise Jesús llofueoicaigano conini uaitajanona raitimaci:

—¿Bu cai moto imiena ille?

⁴⁷ Jesús naimaci comeciái facajacinona uiñuamona, nainomo ite cominimona daje urue bai jainanocaida, naimaci motomo naimiena jonete. ⁴⁸ Raite:

—Comini dinena bie urue jamai bue isoide; ia bie isoidimie cuemo duillamona, naimiena feiñotimiedi cuena jai feiñote. Jusiñamui cuena oretaja jira, cuena feiñotimie Jusiñamuina jiai jai feiñote. Jamai bue isoidimiedi omoi moto imiena ille.

Jesúdi ie dibeimo itinona llua rafue

(Mr 9.38-40)

⁴⁹ Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimiena cioidicai. Cai diga naimie jaicabiñena jira, iena finuana rairuidicai.

⁵⁰ Jesús dinena uai ote:

—Naimiena rairuiño. Cai dibeimo itimiedi cai facaisena ite. Ie jira naimie isoidinona rairuiño.

Jesús dinena Jacobo, Juan iaímaiaí lletaja rafue

⁵¹ Monamo abido Jesús jaillirui iaírei ia, Jerusalémo jaiacanamo naimie comecina facade. ⁵² Ie jira dajeriena uicodo oretate. Ie inillinona jenollena, Samaria railla nairaímo jaidimaci; ⁵³ iadedi Jerusalémo naimaci jailla jira, judíuainedonona samaritanodi gaiñena jira, Jesús llofueoicaiganona feiñoiacaiñedimaci. ⁵⁴ Iena fidianona, Jacobo, Juan diga, Jesúmo jicanotiaímaiaí:

—Nama, ¿bie comini jobaillena, monamona irai billena Jusiñamuimo coco jicanuana jitaídió?

⁵⁵ Iaímaiaímo eruaíllanona, Jesús dinena iaímaiaímo riire lletade:

—Dama ite. Iena jitaíñedicue.

⁵⁶ Ie mei inillena jiaíe illanomo jaidimaci.

Jesús ie llofuegamiena damie jaillena ie rafue

(Mt 8.19-22)

⁵⁷ Naisona ie llofuecaigano diga, Jesús oni jaillanona, Jesúmo damie llote:

—O jaillinomo o diga jaiacadícue. O llofuegamiena jaiacadícue.

⁵⁸ Jesús uai ote:

—Janorede ocainaiáidi joforedimaci. Silliñiaí jillainiaíredimaci; iadedi jofonidícue. Monamona billanona, imana jaidícue; iadedi buenidícue. Jofonidícue. Cue diga o jaiacania, bue isoidena cuemona oñeitío. Iemo o comecina raise faca.

⁵⁹ Jiaímiemo Jesús llote:

—Cue llofuegamiena o jaillena, cue diga mai bi.

Naimie uai ote:

—O diga jaitícue; ia cue moo nia fioidañena jira, o diga nia jaiñeitícue.

⁶⁰ Jesús naimiemo dane llote:

—Dama ite. Cue diga mai bi. Cuena inoñedínodí o moona canoredimaci. Naimie fiodaia, naimiena naimaci raille. Cue rafue jiaíe rafue baífemo faite. Naimie anamo comini illana Jusiñamui jitailla jira, naimie díbeimo naimaci comeciaí iuaina meiduana llocana cue diga mai o bi.

⁶¹ Jiaímie Jesúmo llote:

—O llofuegamiena jaiacadícue: iadedi cue jofomo nano jaiacadícue, cue cominina facadollena.

⁶² Jesús uai ote:

—Cue llogamiena jaiacania, jiaíe ramo naimie comecina eo facañena. Jiaíe ramo naimie comecina eo facaia, Jusiñamui facaina raise maijinide.

10

Ie rafuena lollena, Jesús setenta digamiena oretaja rafue

¹ Ie llofueganona llofuaí mei, naimacimona Jesús setenta digamiena fetode. Naga naimie jaiacana nairaíaimo menamieriena oretate. ² Naimacimo llote:

—Diga comini ite, naimacina Jusiñamui rafuena inotallena; iadedi eo janore lloraini ite. Jusiñamuimo jicano, jiaíe llorainina naimie oretallena. ³ Mai jai; iadedi abi rairuicana jai. Toica laudaiaí janallari illanomo illa isoi, omoína oredícue. ⁴ Ucubena uiñeno. Ailluena rana omoi uiñellena, bolsana uiñeno. Meidolle zapatona uiñeno. Naisomo bu omoi dafaífia, are ñañeno. ⁵ Bu ie jofomo omoi ria, jofomo itinomo marena uaido. ⁶ Nainomo maremie ia, o uaina fairioite. Maremie iñenia, o uaina fairioñenia: “Jusiñamui ona canoite” naimiemo lloñeno. ⁷ Nie nairaímo omoi ria, daacom omoi ri. Omoi ecalle rana guiño. Cue facaina omoi maijia jira, comini omoína ecajia, cue facaina omoi maijia facaina omoi guiño. Naga jofomo guicana jaiñeno. ⁸ Nie nairaí omoi ria, omoína naimaci feiñoia, omoi ecalle rana uaitañeno guiño. ⁹ Duidinona jillota. Nainomo itinomo llono: “Naimie anamo omoi illana Jusiñamui jitailla jira, naimie díbeimo omoi comeciaí

iuaina meido”. ¹⁰ Nie nairaimo omoi ria, omoina naimaci feiñoñenia, ie naiso motomo jaillanona llono: ¹¹ “Omoi naisomo cai eillimo ite jearacuai jai jaidinoticaí, maraiñede rafue omoimo illana omoi uiñollena. Jusiñamui omoina sedaacade; ia iena jitaiñedomoi” llono. ¹² Sodoma nairai jaie eo maraiñede. Jusiñamui iena jaie fuidode; ia nana comini naimie uicomo ico ia, Jusiñamuidi omoina feiñoñedinona Sodoma railla nairai baifemo duere finoite.

Jesús ie ñnoñedinona llua rafue
(Mt 11.20-24)

¹³ Ie fetocanomo Jesús nia llote:

—Corazín railla illanomo navui iticue. Betsaida railla illanomo navui jiai iticue. Naimaci dine diga siño rafuena finodicue; iadedi ñnoñedimaci. Ico duere sefuitimaci. Tiro railla nairaimo, Sidón railla nairaimo naie isoide siño rafuena finodicuena, naimaci comeciai eo isinotaillamona, naimaci comeciai iuai meidotimaci. Naimaci comeciai iuai meiduana jiaie comini uiñotallena, ebinide iniroina jitajanona, jusefo naimaci ifogiaimo jonetimaci. ¹⁴ Jusiñamui uicomo nana comini ico ia, Corazímo itino Tiro nairai baifemo duere sefuitimaci. Sidón nairai baifemo duere sefuitimaci. ¹⁵ Capernaumo itino jiai duere sefuitimaci. Birui abina iedoiacadimaci; iadedi jiairuido sure iitimaci. Monamo cue Moo diga jaca iñeitimaci; iadedi naimie naimacina duere finollemona, sure iitimaci. ¹⁶ Omoi lluana naimaci cacaacania, cuena cacadimaci. Omoi lluana naimaci jitaiñenia, cuena jitaiñedinodí cuena oretagamiena jiai jitaiñedinodí. —Jesús naie fetocanomo iese llua mei, oni jaidimaci.

Ie setenta fetocano abido billa rafue

¹⁷ Jiairuido Jesús ie setenta fetocano abido caimare bitimaci. Raitimaci:

—Nama, o facaido cominimona jananiaina oni oredicai.

¹⁸ Jesús naimacimo llote:

—Monamona Taife borilla isoi jaie ana dotajana cidicue. Iemona cue uai naimie uai baifemo faiana uiñoticue. ¹⁹ Jaiomona ramo omoi jiriñena uai omoimo jai itataticue. Acaiduaimona ramo omoi jiriñena uai omoimo jiai jai itataticue. Nana cue díbeimo iñedinomo omoi anamo jai itataticue. Omoina niесе nibaiñeitimaci; ²⁰ iadedi omoi uaina jananiai ñnua jira, iobiñeno; iadedi Jusiñamui cominina omoi illamona, omoi mameciai monamo Jusiñamui rabenicomo jai cuiamo iobi.

Jesús ie Moo diga ñaia rafue
(Mt 11.25-27; 13.16-17)

²¹ Ie facaiseconi ie Moo Joreño naimiemo illa jira, Jesús iobide. Raite:

—Ore Moo, oca mona Namadio. Oca enirue Namadio. Abina uiñotinona bie isoide rafuena uiñotañedio; iadedi jamai bue isodinona iena uiñotadio. O jitailla jira, iese uiñotadio. Ie jira iobillacinona omo fecaacadicue. Mai.

²² Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitaile díese omoina naimiena uiñotadicue. Ie muidona naimiena uiñotomoi.

²³ Ie llofueoicaigano diga eneno ia, naimacimo llote:

—Cue finoca rafuena omoi ciua jira, ni ua omoi marena illino jillaci. ²⁴ Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioiñedinodí. Iena cacaacadimaci; ia cacaiñedinodí. Jusiñamuina jaie ñnotino micoriai iena cioacadimaci; iadedi cioiñedinodí. Iena cacaacadimaci; iadedi cacaiñedinodí.

Jesús cai ecimo itimiena isiruillana llua rafue

²⁵ Jesús ecimo itinomona Moisés micori llogacinuaina llofueraimadi Jesúna facaciano, naimiemo jicanote:

—Maestro, Jusiñamui illanomo jaca cue illena, ¿bue finoiticue?

²⁶ Jesús uai ote:

—¿Ñiese Moisés micori llogacinuai iena raite?

²⁷ Uai ote:

—Moisés micori jaie cuela: “O jitailla jira, o comecina facajamona, cai Nama Jusiñamuina nana o comeci jitaillamona naimiena eo isirui. O abina o isiruilla isoi, o ecimo itinona isirui”.

²⁸ Jesús dinena raite:

—Marena cue uai otio. Iena o finoia, Jusiñamui illanomo jaca iitio.

²⁹ Naie llofueraima Jesúmo dane jicanote:

—¿Bu cue ecimo itino?

³⁰ Jesús uai ote:

—Jiaie rafuedo iena omo lloiticue. Jerusalémona Jericómo damie jaide. Naimie jaillano fñiredino naimie dine bitimaci. Ie ñiroina bairosite. Naimiena fatimaci. Niade ie meinianona ie ecimona jaisite. ³¹ Dallu illanona, Jusiñamui diga ñairaima naie naisona jaide. Fagamiena cide; iadedi ecido jaide. ³² Dallu illanona, Jusiñamui jofomo maijiraíma jiaí jaide. Fagamiena cñuanona, ecido jiaí jaide. ³³ Ja muidomo Samaria nairai imie jaide. Naie nairaina enoidomoi. Fagamiena naimie cñuanona, naimiena duenaitie. Iemona naimie canoacade. ³⁴ Naimie dine jaillano, ie bofellañona manode. Jiaí maitade. Ie burro emodomo jonecaida, naimiena uite. Inillinomo rilla mei, nainomo naimiena sedade. ³⁵ Ie areruido ie ñia jofo namamo janore ucubena fecade. Raite: “Naimiena seda. Naimie facaina jiaie rana o oia, abido cue bia, iena ibaiticue”. Ie mei oni jaide.

³⁶ —Naie llofueraímamo Jesús dinena jicanote— ¿Fagamie ecimo itimiedi bu?

³⁷ Uai ote:

—Fagamiena duenaitimie.

Jesús raite:

—Jai raise uiñotio. Mai jai. Ie isoi finocana o jai.

Jesúdi Marta iaiñuai María jofomo illa rafue

³⁸ Nia macaritimacimo, comini illanomo Jesús ie llofueoicaigano diga ridimaci. Marta raillañaiño ie jofomo naimiena feiñote. ³⁹ Naiñaiño euiñodi María. Jesús ecimo llaribamo María ana raide, naimie llofuiacinona cacarellena; ⁴⁰ iadedi Martamo maijille eo illa jira, naiñaiño naimie llofuiacinona cacareñede. Ie jira Jesúmo llote:

—Nama, cue euiño cuena canoacaiñena jira, daño maijidicue. “O euiño cano” naiñaiño lono.

⁴¹ Jesús uai ote:

—Ero, Marta, jarire itio. Diga o ramo comecina facadio; ia Jusiñamui rafuemo comecina faca. ⁴² María iemo comecina jai facade. Naiñaiño cue llofuiana nano cacaiacade. Ona canollena naiñaiño lloñeiticue.

11

Jusiñamuimo Jesús jñia rafue

(Mt 6.9-15; 7.7-11)

¹ Jiairuido ie Moo diga Jesús ñaia, ie llofueganomona damie naimiemo llote:

—Nama, jñiana caina llofue, ie llofueoicaiganona Juan Bautista micori llofui isoi.

² Jesús uai ote:

—Omoi jñia, iese omoi jñi:

Ore Moo, comini ori iobidesa.

O illaimana jira, nana cominina o anamo raire itata.

O jaienisai o jitaillacinona finua isoi, cominina o jitaillacinona finota.

³ Nagarui guille caimo itata.

⁴ Caina jeare jiaño finoia, iena caimona feilla isoi, cai jeacinona omona feilla jira, cai jeacinona oni dota.

Caina ramo bu faia, caina cano, iena cai inoñellena.

⁵ Iena naimacina nia llofuellena, Jesús jiaie rafuena llote:

—Naiona mona moto llomenicona jicallena, o nabai dine o jaia, ado lloitio: “Nabai, daje amani llomenicona jitaídícue. ⁶ Jiaie nabai cue jofomo como ride. Jaca cuemo buedi iñede, naimiena cue ecallena”. ⁷ Ie jofu jeraimona o nabai fairioite: “Cuena uaidoño. Cue nasedi jai cue ibaicasa. Cue uruiaí jai inidimaci. Jiaí inidícue. Llomenicona omo fecallena casiacaíñedicue”. ⁸ Ja muidomo casillano, omo iena fecaite. Ie nabaina o illa jira, fecañeite; iadedi o eo jitailla jira, o jitailla rana fecaite. ⁹⁻¹⁰ Daje ra omoi faifia, iena jenodomoí. Raise jenoia, iena baitomoí. Damiena omoi jenoia, naimie illanomo jaidomoí. Nainomo naimiena baillamona, omoína feiñoite. Ie isoide. Buena omoi jitaia, Jusiñamuimo jica. Iena omoi jicaja jira, iena naimie cacajamona, omoímo ite.

¹¹ 'Ero, omoimona ie moomo llomenicona ie jito jicaia, noficina fecañede. Lliciaína jicaia, jaiona fecañede. ¹² Jigina jicaia, acaidona fecañede. ¹³ Jeacinona finocabidomoí; iadedi omoi uruiaímo mare rana fecacabillana uiñotomoí. Cai Moo Jusiñamui jaca mareuidimie. Cai baifemo naimie faite. Ie muidomo naimacina canollena, naimiemo jicadinomo ie Joreñoña itataite.

*Comini Jesúsna jeare ñaia rafue
(Mt 12.22-30; Mr 3.19-27)*

¹⁴ Jiairuido Janaba anamo illamiemona Jesús Janabana oni orede. Janabana nia oretañenia, Janaba anamo naimie illamona, naie ñima ñainide. Janaba oni jailla mei, naimie ñaite. Ie jira comini rajicaidimaci; ¹⁵ iadedi dajerie raitimaci:

—Beelzebú anamo bimie illamona, Beelzebú uaido jananiaina oni orede —raitimaci. Beelzebúdi Janaba comini.

¹⁶ Jiaño naimiena facaciacasite. Raitimaci:

—Siño uai omo ia, Jusiñamuina siño rafuena finota.

¹⁷ Naimaci comeciaina Jesús uiñua jira, naimacimo llote:

—Daje isoi comeciaina lloillamo daje nairai facañenia, danomo maijinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainaiainidimaci. Oni jaidimaci. ¹⁸ Ie isoide. Beelzebú uaido jananiaina, omoi llua isoi, cue oretaia, Janaba ie dibeimo itino diga jai nabairiñede. Iemona naimie comini danomo iñeitimaci. ¹⁹ Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uiñollena. Iemei cue finoca rafuena uaitañeitomoi.

²⁰⁻²² Jiaie rafuedo iena lloitícue. Ero, ie rana raise riduamona, maíridimie ie rana raise enoite. Ie jofomo ie ra illanona, iena raise sedaite. Jamai bue isoidimie ie rana fiñide; iadedi naimie baifemo maíridimie bia, naimiena emodofillamona, ie rana fiñede. Ie isoide. Janaba anamona cominina jillotacabitícue. Naimie afemo nano cue iñenia, cominina jillotandícue. Naimie afemo cue illa jira, iena finoredícue. Jusiñamui uaido jananiaina cue oretaia, Jusiñamui rafuena cue llua uiñotomoí.

²³ 'Cue dibeimo iñedimie cuena enoide. Cue dibeimo cominina itatañedimiedi naie cominina cuena inotañede.

*Janaba anamo illamie rafue
(Mt 12.43-45)*

²⁴ Jesús naimacimo nia llote:

—Birui bene ite marañede cominidi Janaba anamo illamie isoidimaci. Naimiemona Janaba oni jaia, jiaie illanona baillena, jofue iñenanomo jaide; iade baiñede. Baiñena jira, naimie comecina facade: “Navui cue anamo illamie dine abido jaitícue”. ²⁵ Abido naimie bia, naie ñima comeci namanidena naimie baite. ²⁶ Iemei oni jaillanona, jiaie

siete jananiaina naimie diga atide, naimaci anamo naie iima illena. Naie siete jananiainaimie baifemo marañedimaci. Iemona naie iima eo fodo jaide. Ie isoide birui ite marañede comini. Cue rafue naimaci inoñenia, eo fodo jaitimaci.

Daje riño Jesús eina marena ñaia rafue

²⁷ Cominimo Jesús llotemo, comini motomona dañaiño Jesúsimo llote:

—O ei caimare illesa. Naiñaiñomona comuidio. Naiñaiño monoi jirodio. Naiñaiño caimare illesa.

²⁸ Jesús uai ote:

—Marena llotio; ia Jusiñamui uaina naimaci cacajamona, iena inuamona, jiaino eo caimare iitimaci.

Dajerie Jesús siño rafuena finuana jitailla rafue

(Mt 12.38-42; Mr 8.12)

²⁹ Ie facaise diga comini Jesús dine biñoidimaci. Naimacimo llote:

—Birui ite cominidomoi marañedomoi. Siño rafuena cue finuana cioacadomoi; iadedi iena omoi jamai cioillena, siño rafuena finoñeiticue. Ero, Jonás micori jaie ite rafuena uiñotomoi. Naiemo omoi comeciaina omoi faca. ³⁰ Naimiemo suide rafuemoni Nínive railla nairaidi Jusiñamui naimiena oretajana jaie uiñotimaci. Ie isoide. Fiodaillamona cue jilluamona birui ite cominidi Jusiñamui cuena oretajana uiñoitimaci. ³¹ Ero, Saba railla nairai ie illaiño micoridi Salomón micori dine jaie aarena jaide. Naimie micori uiñuacinona naiñaiño micori cacareillena, aarena jaide. Salomón micori baifemo birui uaidicue; iadedi cuena inoñedomoi. Omoi comeciainuana birui omoi meidoñena jira, Jusiñamui uicomo nana comini ille facaiseconi naiñaiño micori omoina ico ñaite: “Naimiedi siño rafue finuana ciodomoi. ¿Bue ñellena naimiena inoñedomoi?” omoina ico ñaite. ³² Lliciai jeraimona naimie jillua mei, Nínive railla nairai dine Jonás micori jaide. Nainomo Jusiñamui rafuena llote. Naie comini iena cacajano, naimaci comeciainuana meidotimaci. Cue rafuena omoi cacajamona, omoi comeciainuana birui omoi meidoñena jira, Jusiñamui uicomo ico nana comini ille facaiseconi: “Cue cominidomoi” omoina raiñeiticue. Jonás micori baifemo birui uaidicue; iadedi cuena inoñedomoi.

Jesús comini illa rafue

(Mt 5.15; 6.22-23)

³³ Jesús llote:

—Lamparín bu unia mei, jofo anamo bainino rainañega. Cirigai anamo rainañega. Ie rairanomo rainaca, comini nainomo bia, jofo jerai lligaiñollena. ³⁴ Omoi uisi diga rana ciodomoi. Omoi uisi marañenia, rana raise cioñedomoi. Ie isoide. Omoi comeci marañenia, marañedicinona finocana jaidomoi. Jusiñamuina uiñoñedomoi. Ie rafuena jiaie uiñoñedomoi. ³⁵ Ie jira omoi comeciaina raise fino, cue rafuena omoi raise inollena. ³⁶ Nana omoi comeciainuana marena ia, cue rafuena inocana jaitomoi. Iena raise uiñoitomoi. Jofomo lamparín raise lligaiñua isoi, cue rafuena raise uiñoitomoi.

Jesúdi juduai illa cominina ñaia rafue

(Mt 23.1-36; Mr 12.38-40; Lc 20.45-47)

³⁷ Cominina Jesús llofua mei, daje fariseo imie naimie dine bite. Raite:

—Cue diga cue jofomo mai guisaibi. —Jesús fairiua mei, naimie diga guisaide.

³⁸ Naimie nia guiñenia, naimaci einamací llogacinodo naimie jaiñenamona, Jesús ie onollina jocoñede. Ie jira naie fariseo imie rajicaide. Ie comecina facade: “Naimie eo mare llofueraima. ¿Ñiese cai einamací llogacinodo jaiñede?” ³⁹ Jesús naimiemo llote:

—Da platos jinafo, da pocillos jinafo jocodino isoidomoi. Da platos jerai, da pocillos jerai jocoñedino isoidomoi. Omoi abina finodomoi; iadedi omoi comeciaina finoñedomoi. Rana eo nicidotomoi. Omoi comeciainuana jearede. ⁴⁰ Abi uiñoñedomoi. Jusiñamui omoi

abiaina omoi comeciai diga finode. Omoi finoca rafuena uiñote. Omoi comeciaina facajacinona jiai uiñote. ⁴¹ Omoi comeciai marena ia, jiaie cominina canodomoí. Iemona Jusiñamuimona omoi abi jiai mare. ⁴² Fariseuai, omoimo rafuena lloiticue. Nana omoi illimo ite ramona Jusiñamuimo janore jisa feca-fecacabidomoí; iadedi jiaie cominimo mare rafuena raise finoñedomoí. Jusiñamuina jiai raise isiruiñedomoí. Nana naie isoide rafuena omoi jiai finua. ⁴³ Comini omoiri acarillena, ofiracomo uicomo raiacadomoí. Nine omoi macaria: “Jamai bue isoñedicaí” omoi comeciaina facajamona, jiaie comini omoína uaiduana gaidomoí. Iese omoi jailla jira, Jusiñamui omoína duere finoite. ⁴⁴ “Bainino ite raiáfo emodomo comini uiñoñeno macarillamona, naimaci abi jai jearede” raitomoí. Bainino ite raiáfo isoidomoí. Omoi diga jiaie cominidi omoimo ite jeacinona uiñoñeno nabairillamona, jeacinona jiai finodimaci. Iese omoi finocana jaia, Jusiñamui omoína duere finoite.

⁴⁵ Naie facaise Moisés llogacinuaina llofuerainimona damie Jesúmo llote:

—Iese o lloia: “Jeacono finodomoí” caina jiai llotio.

⁴⁶ Jesús uai ote:

—Jusiñamuimona jiai duere sefuitomoí. Omoi einamací llogacinuaido raise naimaci jaillena, diga rafue comini finuana jitaidomoí; iadedi iedo naimaci raise jaillena, naimacina jaca canoñedomoí. “Jusiñamuina eo raise sedadicaí” comecina facadomoí.

⁴⁷ Omoi jaiagaidi Jusiñamui facaina llorainina meinetimaci. Naie lloraini micoriai raiáfuaí birui marena finodomoí; ⁴⁸ iadedi naimaci micoriai llogacinuaido omoi birui jiai jaiñena jira, omoi jaiagai finoca radi: “Mare” raitomoí. Jusiñamui rafuedo birui omoi raise jaiñena jira, omoi jaiagai isoi itomoí. Iese omoi jailla jira, Jusiñamui omoína duere finoite. ⁴⁹ Omoína Jusiñamui abi uiñuamona jai llote: “Cue rafuena lollena, naimaci dine cue facaina llorainina oretaiticue. Cue rafuena eo uiñotinona jiai oretaiticue. Dajeriena meinetimaci. Jiaínona duere finoitimaci”. ⁵⁰ Enirue finua facaisemona ailluena Jusiñamui facaina llorainina meinetimaci. Omoimona Jusiñamui iba oite. ⁵¹ Abel micori jaie ite. Ie ama naimiena meinete. Naimie facaisemona omoi jaiagaidi diga llorainina meinetimaci. Zacaríana jiai meinetimaci. Jusiñamui jofomo Jusiñamuimo toica ocaina jobaisoillano motomo naimiena meinetimaci. Omoimona Jusiñamui birui iba oite. ⁵² Omoi llofuiamona comini Jusiñamui rafuena uiñoñedimaci. Jusiñamui rafuena raise uiñoñedomoí. Jiaíno iena raise uiñuana jitaiñedomoí. Iese omoi jailla jira, Jusiñamui omoína duere finoite.

⁵³ Fariseo jofomona Jesús jailla mei, fariseuai comini icirillamona, Jesúmo diga rafuena jicanotimaci, naimie uaina uaitallena. Moisés micori llogacino llofueraini daje isoi uai uaitatimaci. ⁵⁴ Naimie raise uai oñedena, naimiena duere finoacadimaci.

12

Jesúdi mareuidinona abi caitadinona llofuia rafue

¹ Ie facaiseconi eo ailluena comini Jesús dine ofidimaci. Ailluena illa jira, conini eilliamimo naidadatimaci. Ie llofueoicaiganomo Jesús llote:

—Fariseuai siritate ramona abina rairui. Biena ñaiticue. “Maredicaí” raitimaci; iadedi mareuidinona abi caitadimaci. Naimacimona abina rairui. ² Naimaci birui finoca rafuena birui bainino finodimaci; ia Jusiñamui naimaci comeciai iticinona ico uiñotaite.

³ Ero, cue rafuena birui anado llocana jaidomoí; ia ico marefodo iena llocana jaitomoí.

Jesúdi jaciruiñeno llofuia rafue

(Mt 10.28-31)

⁴ Ie llofueganomo Jesús llote:

—Cue nabaiñiaidomoí. Omoína meineiacadinona jaciruiñeno. Omoi abina meineredimaci; ie iadedi omoi joreña meinenidimaci. Omoína naimaci meinia, omoi joreño Jusiñamui dine jaite. Iena uiñuamona, omoi meineiacadinona jaciruiñeno.

⁵ Cue rafuedo omoï raise jaiñenia, Jusiñamuina jacirui. Omoï fiodailla mei, omoï abina omoï joreño diga iraimo ie dotalle uai naimiemo ite. Ie jira naimiena jacirui. ⁶ Ero, dabecuiro janorede sillina fecadomoïna, eo janore ibaca. Silliñiaï eo janore raifide; iadedi Jusiñamui naimaci illana uiñote. ⁷ Ero, niga ifotirai omoïmo illana Jusiñamui jiaï uiñote. Naimiedi omoïna sedajana jiaï uiñote. Silliñiaï bai femo Jusiñamui isiruigaomoi. Omoï duere finoacadinona jaciruiñeno. Jusiñamui jitañenia, omoïmo jaca buena suiñeite.

Jesús naimiena janoñenana llofua rafue
(Mt 10.32-33; 12.32; 10.19-20)

⁸ Ie llofueoicaiganomo Jesús nia llote:

—Cue rafuena omoï llua mona, jiaïno omoïna duere finoitimaci. Cuena birui omoï janoñenia, nana comini Jusiñamui jaienisaï uicomo ico ia, nainomo omoïna janoñeiticue. “Cue cominidomoi” omoïna raiticue. ⁹ Cuena birui omoï janoïa, nana comini Jusiñamui jaienisaï uicomo ico ia, nainomo omoïna janoiticue. “Cue cominiñedomoi” omoïna raiticue. ¹⁰ Jusiñamuidi naga cuena jeare ñaitimie jeacinona feitarede; iadedi Jusiñamuidi ie Joreño na jeare ñaitimie jeacinona feitañeite. ¹¹ Cue rafuena omoï llua muidona, duere sefuitomoi. Illaïcomini dine omoïna llogidollena comini uia, omoï abi riidollicinomo omoï comeciaina jarire facañeno. ¹² Naie facaiseconi Jusiñamui Joreño omoï abi riidollicinona uiñotaite.

Jesúdi raruaï eo uamona abi rairuillana llofua rafue

¹³ Nainomo ite cominimona damie Jesúmo llote:

—Maestro, cue moo jai fiodailla mei, cue ama doforamie cue facaina ite rana cuemo iacaiñede. Naimiemo llono, cuemo illena.

¹⁴ Jesús uai ote:

—Juezñedicue. Bie isoide rafue cuemo duiñede.

¹⁵ Ie ecimo itinomo llote:

—Ero, rana nicidoño. Ailluena ra omoïmo illamona, Jusiñamui illanomo riñeitomoi.

¹⁶ Iena omoï raise uiñollena, jiaïe rafuedo iena lloiticue. Ucuberedimiedi ie illimona ailluena rana ote. ¹⁷ Ie jira comeciina facade: “Cue illimona ailluena rana oticue; iadedi ¿ninomo iena eenoiticue? ¹⁸ Birui cuemo ite eenoracona judaïiticue. Ie mei aillue eenoracona finoiticue. Nainomo cue rana eenoiticue”. ¹⁹ Ie comeciina facaite: “Cuemo ailluena ra jai ite. Diga años nia iiticue. Jamai iiticue. Marena guiticue. Caimare iiticue”. ²⁰ Iese comeciina facade; iadedi Jusiñamui naimiemo llote: “Abi uiñoñedio. Cue llua jira, ja naïona fiodaïtio. Ie mei omo ite ra omo fiebiñeite”. ²¹ Dama ramo ie comeciina bu facaïa, Jusiñamui jitaillacinomo ie comeciina bu facañenia, faifite.

Jesúdi Jusiñamui cai sedajana llua rafue
(Mt 6.25-34)

²² Ie llofueoicaiganomo Jesús llote:

—Jusiñamui jitaillacinomo omoï comeciina facaïa, omoï illamo omoï comeciina jarire facañeitomoi. Bue omoï guillemo jarire comeciina facañeno. Omoï jtalle iniroïmo jarire comeciina facañeno. ²³ Jusiñamui omoïna itataja muidona, guille omoïmo iite. Naimie omoï abi finua muidona, iniroïdi omoïmo iite. ²⁴ Silliñiaïmo comeciina faca. Buena riñedimaci. Nie isoide guillena eenoñedimaci; iadedi omoï Moo Jusiñamui naimacina sedajamona, naimaci guille ite. Naimaci bai femo omoï faïa jira, naimie omoïna canoite. ²⁵ Omoïmona, ¿bu ie comeci jarire facajamona a sairite? Iese jaca buna a sairifede. Dama Jusiñamui omoïna a sairitarede. ²⁶ Omoï comeciaina facajamona omoï a sairifena jira, jiaïe ramo omoï comeciaina jarire finoñeno. ²⁷ Safiamo omoï comeciaina faca. ¿Niese sicodimaci? Maiñedimaci. Iniroïna tiferiñedimaci; iadedi Salomón micori naimaci isoï jaïe iñede. Naimie illaïmana jira, naimie micori iniroï eo ebirede; iadedi safia naimie iniroï bai femo ebire eruaïde. ²⁸ Jusiñamui safiana ebiretacabide. Dallu facaise illanona,

safiadi duide. Safia bai femo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena ino. Jusiñamuina eo janore inotomoi. ²⁹ Omoi comeciaina jarire icana jaiñeno. “¿Buena guiticaí?” raiñeno. Iemo comeciaina eo facañeno. ³⁰ Jusiñamuina inoñedino iemo comeciaina facacabidimaci. Nana omoi jitaillacinona omoi Moo Jusiñamuidi uinua jira, naimaci isoi iñeno. ³¹ Jusiñamui jitaillacinona finocana omoi jai. Naimiemo omoi comeci facaia, omoi illamo omoi comeciaina jarire facañeitomoi. Iemona guille omoimo Jusiñamui iite. Iniroi omoimo jiaí iite.

Jesúdi Jusiñamuimo comeciaina facaja rafue
(Mt 6.19-21)

³² Jesús llote:

—Cue cominina omoi illanona, uri omoi i. Omoi Moo Jusiñamui jitailla jira, naimie anamo omoina itatajamona, omoina sedaite. ³³ Omoi raruiaina fecajanona, ucubena dueredinomo feca. Sabiñeite bolsana ono, omoi ra faifi raillano. Monamo omoi ra illa isoi ñaiticue. Monamo omoi ra illa isoi, iena faifiñeitomoi. Firiraima nainomo jaiñede. Girreco nainomo jiaí iñede. ³⁴ Aillue ra omoimo ia, Jusiñamuimo comeciaina facañedomoi; iadedi naimie jitaillacinona omoi finoia, naimiemo comeciaina facadomoi.

Jesús ie abido billemo ocurillana llofua rafue

³⁵⁻³⁸ Jesús nia llofue:

—Monamona ico cue abido billemo ocuri. Iena omoi raise cacailena, bie rafuedo iena lloiticue. Dame ie nabai ie ai ua rafue dine naiona jaide. Ie mullaiaí naimie abido billemo ocurillana ocuide. Naimie billemo naimaci raise ocuria, iniroina jitanona, lamparíniaí unianona, ocuritimaci. Iese naimaci ia, nasena naimie tuia, iena raire econoitimaci. Nie hora naimie abido bia, naimiena naimaci inñeno ocuria, ieri naimie iobite. Iobillamona, mullaimana naimie itena, mesamo naimacina ecaite. Naimie bille hora naimaci uinñoñena jira, jaca ocuricana naimaci illa. ³⁹ Ero, firiraima bille facaiseconi jofo namadi uinnotena, nia caadote, ie ra faifi raillanona. ⁴⁰ Monamona ico abido biiticue. Omoi ocuriñena facaisemo biiticue. Ie jira cue billemo raise ocuri.

Jesúdi patrón ie mullaimana ie jofona sedataja llua rafue
(Mt 24.45-51)

⁴¹ Ie como lloga rafuena cacajano, Jesúmo Pedro jicanote:

—¿Bumo bie rafuena llotio? ¿Caimo llotio? ¿Nana cominimo?

⁴² Uai ote:

—Bie isoide cominimo lloticue. Ie mullaiaímona patrón damiena fetode, ie jiaie mullaiaína sedallena. Naimacina sedajanona, naimie naimacina jiaí ecade. ⁴³ Ie mei patrón oni jaide. Jofomo abido naimie bia, ie nanoca mullaíma raise maijiana fidia, naimiena raise ibaite. ⁴⁴ Iobillamona, nana ie raruiaina sedataite; ⁴⁵ iadedi naie mullaíma marañenia, comeciaina facaite: “Cue patrón are biñeite. Jiaie rafuena finoiticue”. Ie comeciaina iese facaja jira, naimie anamo ite mullaiaína faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite. ⁴⁶ Ie ocuriñena facaise ie patrón abido billanona, naimiena meinetaite. Ie uaina inoñedino isoi, duere finoite. ⁴⁷ Naie mullaíma ie patrón jitailla rafuena finuana uinnote; iadedi iena finoñede. Ie jira eo duere sefuite; ⁴⁸ iadedi marañede rafuena raise uinñoñeno jiaie mullaíma finoia, janore duere sefuite. Ie isoide. Jusiñamui rafuena raise uinnotino iedo raise jaiñenia. Jusiñamui naimacina eo duere finoite. Iena janore uinnotino iedo raise jaiñenia, Jusiñamui naimacina janore duere finoite. Iese omoimo suiñellena, mare mullaíma isoi, Jusiñamui jitaillacino finocana omoi jai.

Jesús muidona nana comini uri iñena rafue
(Mt 10.34-36)

⁴⁹ Jesús llote:

—Cuenta naimaci ñnollena, eniruemo comini dine biticue. Cuenta dajerie ñnuamona, cue cominina jaitimaci. Cuenta jiaino ñnoñenamona, cue cominina jaiñeitimaci. Iemona cominina duere finoiticue. Cue maijia raire fuiduana jitaidicue. ⁵⁰ Cue nia eo duere sefuiticue. Iena raire suillena jitaidicue. ⁵¹ Nana cominina uri itatallena eniruemo biñedicue. Cuenta ñnoñedinodi cuenta ñnotinona enoitimaci. Enoillamona, cuenta ñnotinona duere finoitimaci. ⁵² Cue billamona, daje jofomo itino diese danomo iñeitimaci. Dabecuero comini nainomo ia, menamie cue ñibeimo iite. Daje amani cue ñibeimo iñeite. Iese iñenia, daje amani cue ñibeimo iite. Mena cue ñibeimo iñeite. ⁵³ Cue lloga rafuena damierie ñnua muidona, ie moo illa ñibeimo ie jito iñeite. Ie jito ñibeimo ie moo iñeite. Ie ei illa ñibeimo naiñaiño jisa iñeite. Ie jisa ñibeimo ie ei iñeite. Ie jifaiño illa ñibeimo ie miodi iñeite. Ie mio ñibeimo ie jifaiño iñeite. Iese cominina uri itatañedicue.

Jesúdi monamo ite rana llofua rafue
(Mt 5.25-26; 16.1-4; Mr 8.11-13)

⁵⁴ Cominimo Jesús dane llote:

—Bie eniruemo afai dine uilliena omoi cioia, raicabitomoi: “Noci deiacade”. Iese omoi ciua meinomo, ua noci deide. ⁵⁵ Bie eniruemo beici dinena aifi bia: “Eo ecasiite” raicabitomoi. Iese aifi bia, ua eo ecasite. ⁵⁶ Abina uiñotinona abi caitadinodomoi. Monamo eruaillamona, rafue suillana uiñotomoi; iadedi omoi ecimo suiacalle rafuena raise uiñoñedomoi. Cue lloga rafuena raise cacaiñedomoi. ⁵⁷ Iemo omoi comeciaina raise facañedomoi. ⁵⁸ Ero, omoina bu llogidoia, juez dine nia omoi riñenia, omoina llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoina jonetaite. ⁵⁹ Nana raise ibañenia, juez llua isoi, jino jaiñeitomoi. Ie isoide. Cue rafue omoi cacajamona, naimiemona duere sefuiñellena, Jusiñamui diga omoi rafuena raise fino.

13

Jesúdi comeciái iuai meiduana dana llua rafue

¹ Cominina Jesús nia llofuetemo, jiaie comini Jesús dine billanona, raitimaci:

—Jerusalémo Jusiñamui jofomo dajerie Galileamona navui bitimaci. Ocainaiaina fatimaci, Jusiñamuina naimaci sedallena. Ie facaiseconi Pilato railla gobernadori soldaduaina orede, naie cominina fallena.

² Jesús uai ote:

—¿Ñiese comeciaina facadomoi? “Bie comini iese duere sefuilla jira, jiaie Galilea comini baifemo jeacinona finodimaci” comeciaina facadomoi. ³ Iese omoi comeciaina facañeno; ia omoi comeciái iuai meiduamo comeciaina faca. Omoi comeciái iuai omoi meidoñenia, omoidi jiaí faifitomoi. ⁴ Siloé railla tidacana navui ana goillamo, dieciocho digamie saitabidimaci. Iena fididomoi. ¿Ñiese naimacimo omoi comeciaina facadomoi? “Nana Jerusalémo ite comini baifemo jeacinona finodimaci” comeciaina facadomoi. ⁵ Iese omoi comeciaina facañeno; ia omoi comeciái iuai meiduamo comeciaina faca. Omoi comeciái iuai omoi meidoñenia, omoidi jiaí faifitomoi.

Jesúdi ie Moo comini comeciái iuai meiduamo fecuise ocurilla llua rafue

⁶ Iena comini raise uiñollena, Jesús bie rafuena llote:

—Damie ie illimo higuera railla riarana rite. Sicua mei, riarana ollena jibuisaide; iadedi nia llisiñede. ⁷ Ie jira ie illina sedaraimamo llote: “Ero, daje amani años bisoidicue, riarana ollena. Nia llisiñede. Iena mai tie. Naie illanomo jiaie riarana coco rillesa”. ⁸ Ie illina sedaraima uai ote: “Dama ite. Daje año nia seda. Riarana abina caigíticue. Eniruena

caimaretaiticue. ⁹ Jiaie año llisia, mare. Llisiñenia, iena tteiticoco”. Ie isoide. Jusiñamui omoi comeciai iuai meiduamo are ocurrite; ia meidoñenia, omoina duere finoite.

Jesúdi jicaidiñaiñona jillotaja rafue

¹⁰ Jiairuido sábadoruimo judíuai ofiracomo Jesús llofue. ¹¹ Nainomo duidiñaiñodi ite. Janaba anamo naiñaiño illa jira, naiñaiño jicaide. Atona naidainide. ¹² Naiñaiñona Jesús ciuanona, naiñaiñomo llote:

—Ñoo, o duicomona jai jillodio. ¹³ —Ie mei naiñaiñona jetade. Ieconí naiñaiño atona naidadate. Ie jira Jusiñamuimo iobillacinona fecade. ¹⁴ Naie ofiraco sedaraima icirite, sábadoruimo Jesús naiñaiñona jillotaja jira. Nainomo itinomo llote:

—Seis digarui ite maijillena. Nairuido omoi bi, omoi duicomona omoi jilloillena. Sábadoruimo biñeno. Sábadoruimo maijiñedicaí.

¹⁵ Jesús uai ote:

—Maijiñedinona abi caitadinodomoí. Sábado iruimo maijicabidomoí. Sábado iruimo omoi toiniaina imaci illanomona suiñodomoí, jinui illanomo naimaci jiruaillena. Naie isoide maijia omoimona mare. ¹⁶ Ie isoide. Bie riñodi Abraham micorí comini. Omoi nairai iñaiño. Dieciocho años Janaba anamo jai illamona, duere sefuide. Naiñaiñona canollena, sábado iruimo naiñaiñona Taife anamona cue jillotaia, cuemona mare.

¹⁷ Iena Jesús lluamona, nana naimie díbeimo iñedinodi meidaitimaci; iadedi jiaie comini iobidimaci, diga mare rafue naimie finua jira.

Jesúdi mostaza ido llua rafue

(Mt 13.31-32; Mr 4.30-32)

¹⁸ Jesús jiaie rafuena llote:

—Jusiñamui díbeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina íco jaitimaci. ¹⁹ Jiaie rafuedo iena omoimo lloiticue. Mostaza railla ido eo janorede. Ie illimo damie iena rillamona, eo aillue riaradi sícode. Ailluena jira, nainomo silliñiaí jicaiciaina finodimaci.

Jesús siritate rana llofuia rafue

(Mt 13.33)

²⁰ Jesús jiaie rafuena llote:

—Jusiñamui díbeimo comini jailla rafuena lloiticue. Jiaie uaido iena omoimo lloiticue. ²¹ Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

Jesúdi Jusiñamui díne rille llua rafue

(Mt 7.13-14, 21-23)

²² Jesús diga nairaimo llofuecana jaide. Jerusalén díne jaide. ²³ Jesús oni jaillanona, damie naimiemo jicanote:

—Nama, ¿niga comini o uaina ñnoitimaci? —Jesús uai ote:

²⁴ —Monamo cue Moo díne jaille nasedi janorede isoide. Naie nasedo llicana o jai. Ailluena comini naiedo jaiacanitimaci; iadedi fo jainitimaci. ²⁵ Naie jofo nama nase íbaila mei, ¿niese fo jaitomoi? Jino naidaimona, nasena tutajanona, raitomoi: “Nama, o nase econo”. Naimie uai oite: “Omoína uiñoñedicue”. ²⁶ Dane lloitomoi: “O diga navui guiticaí. Cai illanomo llofuetio”; ²⁷ iadedi naimie uai oite: “Omoína uiñoñedicue. Cue cominiñedomoi. Jeacino omoi comecimo nia illa jira, mai jai”. ²⁸ Jusiñamui illanomo Abraham micorina, Isaac micorina, Jacob micorina, nana Jusiñamui facaina lloraini micorina cíoitomoi; ia omoi jino illamona, duere sefuillamona, eetitomoi. ²⁹ Diga comini Jusiñamui illanomo iitimaci. Ailluena judíuaiñedino naga nairaimona Jusiñamui illanomo biitimaci. Nainomo coninina caimare nabaitimaci. ³⁰ Naga nairaimona

Jusiñamui cominina jillotarede. Cue rafuena cacadomoi; ia cue cominina omoi jaiacania, abi iedoñoeno cuena inocana omoi jailla.

Jesús Jerusalémo itinomo llua rafue
(Mt 23.37-39)

³¹ Ie facaiseconi dajerie fariseuai comini Jesús dine billano raitimaci:

—Benomona mai o jai. Cai illaima Herodes ona meineiacade.

³² Jesús uai ote:

—Herodedi eo jifueraima. Naimie dine jai. Naimiemo llono: “Janaba anamo ite cominimona Janabana oni orecabidicue. Duidinona jillotacabiticue. Birui siño rafuena finocabidicue. Ico iese nia finoiticue. Iese cue maijille fuite. ³³ Nia oni jaiticue. Ailluena Jusiñamui facaina lloraini micoriai nainomo jai fiodailla isoi, Jerusalémo cue rafue jiai raire fuite” llono.

³⁴ Jerusalémo itinomo comecina facajano, Jesús llote:

—Jerusalémo itino, omoi mo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoina cue sedallena, atava ie uruia sedaja isoi, diga icaiño cue anamo omoina uaidoiacadie; iadedi omoi dinena cuena jitaiñedomoi. ³⁵ Iemona Jusiñamuidi omoi illanona jai faionocaide. Cue Moo dine jaiticue. Cue jailla mei, cuena cioiñeitomoi. Ico cue abido bia, comini cuena lloitimaci: “Jusiñamui oretagamie eo mare. Naimiedi cai Nama” lloitimaci.

14

Jesúdi abina siridimiena jillotaja rafue

¹ Jiairuido sábadoruimo Jesúdi fariseo imie jofomo guisaide. Naie fariseo imiedi illaicomini. Nainomo itino Jesúmo eo eruaidimaci. ² Guille facaise naie jofomo duidimie bite. Naimie abina siridimie. ³ Nainomo itinomona damieriedi fariseuai comini. Moisés micori llogacinuaina llofueraini jiai itimaci. Naimacimo Jesús jicanote:

—Sábadoruimo comena cue jillotaia, ¿omoi mona jeacino finodicue? ¿Niese Moisés micori llogacinuai iena llote?

⁴ Uaina oñedimaci. Ie jira Jesús duidimie onollina llinuamona, naimiena jillotate. Ie mei naimiena jino orede. ⁵ Nainomo itinomo llote:

—Sábadoruimo maijicabidomoi. Sábadoruimo omoi jurareta pozomo uaidena, iena jillotallena, nairuimo iena ari otomoi. Omoimona naie isoide maijia mare. Bimiena cue jillotaja jira, ¿niese cuena jeare ñaitomoi? ⁶ Iena cacajanona, uainicaidimaci.

Jesúdi guillena uaidoganona llua rafue

⁷ Jesúdi naimaci guisaibillana cide. Jiaino baifemo illena, jofo nama abimo nana raiaicadimaci. Iena ciuamona, naimacimo Jesús rafuena llofuate:

⁸ —Rafue dine guillena omoina bu uaidoia, jofo nama abimo raifeno, omoi baifemo itimie bi raillano. ⁹ Jofo nama abimo omoi raia, omoi baifemo itimie bia, jofo nama omoi mo lloite: “Bimie mo omoi raillanona fecá”. Meidailanona, oni rainadaitomoi. ¹⁰ Ie jira rafue dine omoina uaidoia, naie jofomo omoi ria, oni rai. Ie mei jofo nama jitaia, omoi mo lloite: “Cue abimo rai”. Ie mei nana naie itino omoi iobillana cioitimaci. ¹¹ Ie isoide. Jusiñamuidi jiaimie afemo iacadimiena jiaimie afemo iñenana itataite. Jusiñamuidi jiaimie afemo iacaiñedimiena jiaimie afemo itataite.

¹² Naimiena uaidotimie mo Jesús llote:

—Guille rafuena o finoia, naga icaiño o nabaiñiaina uaidoñoeno. Naga icaiño o cominina uaidoñoeno. Naga icaiño o ecimo itino ucuberedinona uaidoñoeno. Naimacina o uaidotona, jiairuido guillena ona uaidoitimaci, naie iba o ollena; ¹³ ia rafuena o finoia, dueredinona uaido. Ñuja-ñujacaida macaritinona uaido. Uisnidinona uaido.

¹⁴ Naimacimona iba ico o oñenamona, Jusiñamui ona caimare itataite. Jiairuido fiódail-lamona mareuidino jilloia, monamo Jusiñamui ona ibaite.

Jesúdi ailluena guille finoca rafuena llua rafue

¹⁵ Jesús abimo itinomona Jesús lluaana damie cacajano, raite:

—Monamo Jusiñamui illanomo itimiedi marena iite.

¹⁶ Jesús uai ote:

—Iena omoi raise uiñollena bie rafuena lloiticue. Damie aillue rafuena finode. Ailluena cominina uaidote. ¹⁷ Rafue illaruimo ie mullaimana orede, cominina dane uaidollena. Raite: “Mai bi. Nana guille finuadi jai fuite”; ¹⁸ ia biacaiñedimaci. Damie llote: “Eniruena como ibadicue. Iena jibuisaiacaducue. O rafuemo jaiñeiticue. Ie jira cue joreñaona iciñeitiaosa”. ¹⁹ Jiaimie llote: “Diez diga juraretana como ibadicue. Naimacina jibuisaiacaducue. O rafuemo jaiñeiticue. Ie jira cue joreñaona iciñeitiaosa”. ²⁰ Jiaimie llote: “Riño como oticue. Ie jira o rafuemo jaiñeiticue”. ²¹ Ie nama dine naie mullaima abido jaide. Comini biacaiñenana llote. Iena cacajano, rafue namadi icirite. Ie mullaímamo llote: “Cai nairai naisona jai. Dueredinona uaido. Ñuja-ñujacaida jaidinona uaido. Uisínidinona uaido”. ²² Ie mei naie mullaima jaide. Abido naimie bia, ie namamo llote: “O lluaana finodicue. Ailluena comini jai bitimaci. O jofomo illino nia ite”. ²³ Rafue namadi uai ote: “Naisomo itinona bene atillena, cue jofona oruitallena, cai nairaimona jino jai. ²⁴ Cue nano uaidogano cue guillena guiñeitimaci”. Ie isoide. Jusiñamui rafuena feiñotino monamo Jusiñamui illanomo ico itimaci; ia naimie rafuena jitaiñedino nainomo ico iñeitimaci.

Jesúdi naimie llofueganona jaiacadino rafue

²⁵ Naie facaise ailluena comini Jesús diga jai jaisoidimaci. Naimacimo llote:

²⁶ —Cue llofuegamiena jaiacadimie cuena ie moo baifemo isiruilla. Cuena ie ei baifemo isiruilla. Cuena ie ai baifemo isiruilla. Cuena ie uruia baifemo isiruilla. Cuena ie amatai baifemo isiruilla. Cuena ie miriñotiai baifemo isiruilla. Cuena ie abi baifemo isiruilla. Iese cuena isiruiñenia, cue llofuegamiena raise jainide. ²⁷ Cue llofuegamiena bu jaillamona, duere sefuicana jaite. Nibai naiemona fiódaita. Bu iese jaiacaiñenia, cue llofuegamiena naimie raise jainide.

²⁸ 'Ero, jiaie rafuedo iena lloiticue. Jofona bu finoacania, ie ucubena bailla diese uiñollena: “¿Niga raifite?” comecina nano facade. ²⁹ Iese naimie comecina facañenia, goguirai naidania mei, ie ucube riñenia, taiguanona, naimieri jaisitimaci. ³⁰ Raitimaci: “Ie jofo finua tainede; iadedi fuidonide”.

³¹ 'Ero, jiaie rafuedo iena lloiticue. Illaíma jobaimena finoacania, nano comecina facade: “Cuemo ite diez mil soldaduai. Cue bacauaimo ite veinte mil soldaduai. ¿Niese emodofiticue?” Comecina facaja mei: “Emodofiñeiticue” naimie comecina facajia, ³² nia are naimie bacauai ia, daguelli uicodo orede, ie fairiconi diga ñaillena. Raite: “Jobairiacaiñedicue; ia o diga bie rafuena raise finoacaducue”. ³³ Biemo comecina omoi faca. Ie raruiaimo bu comecina eo facaia, cue llofuegamiena jainide.

³⁴ 'Sal mare; iadedi ie caimano jai iñenia, ¿dane niese nibaiamona caimarenite? ³⁵ Jai maraiñede. Eniruemo jonegadena, jiai maraiñede. Oni dotaca. Ie isoide. Cue llua isoi omoi iñenia, cue llofueganona jainidomoi. Omoi jeforena jira, raise fueollena, cue llua mo cacarei. Iena ñno.

15

*Jesúdi naimiena ñnotinomona damie faifillana jitaiñena rafue
(Mt 18.10-14)*

¹ Naimaci bisoilla isoi ie rafuena cacaillena, diga gobierno ucubena oraini Jesús dine ofidimaci. Jusiñamui llogacinona raise jaiñedino jiai ofidimaci. ² Iena ciuano, fariseuai cominidi, Moisés micori llogacinuaina llofueraini diga, Jesús joreñaona ñaitimaci:

—Bimie marañedicinona finorainina feiñote. Naimaci diga jiai guite.

³ Naimaci ñaiana uiñuanona, Jesús naimacimo bie rafuena llote:

⁴ —Omoimona damiemo cien toica llaudaiaia nibai ite. Naimacimona daje feiraite. Ie noventa y nueve llaudaiaina fainonocaida, iena jenuaite, ie baille ñinori. ⁵ Baillanona, ie fecanicomo rocanocaida, iobicana biite. ⁶ Jofomo naimie ria, ie nabaiñiaina uaidoite. Ie ecimo itinona jiai uaiduanona, raite: “Cue diga iobi. Cue feiraite llaudana jai baiticue”. ⁷ Ie isoide. Cue rafuena cue llumona, damie ie comeci jeacinona fainonocaillamona, ie comeci iuai meiduamona, monamo itino eo iobitimaci; iadedi noventa y nueve comini marena illamona, janore iobitimaci.

Jesúdi faifide ucubena bailla llua rafue

⁸ Jesús llote:

—Jiaie rafuena omoimo lloiticue. Dañaiñodemo diez diga ucube ite. Naiemona daje ucube naiñaiño faifia, lamparín unianona, ie jofona gallaite. Eo jenoite, ucube ie baille ñinori. ⁹ Iena naiñaiño baia, ie nabaiñiaina uaidoite. Ie ecimo itinona jiai uaiduanona, raite: “Cue diga iobi. Cue faifide ucubena jai baiticue”. ¹⁰ Ie isoide. Cue rafuena cue llumona, damie ie comeci jeacinona fainonocaillamona, ie comeci iuai meiduamona, Jusiñamui jaienisaie eo iobitimaci.

Jesúdi damie ie moo fainonocaila llua rafue

¹¹ Jesús llote:

—Jiaie rafuena omoimo lloiticue. Damiemo mena jito ite. ¹² Ie moomo jamamie llote: “Moo, o fiodailla mei, o raruaiaimona janore feiñoiticue. O fiodaillana sedaacaiñedicue. O raruaiaina cue facaina birui jitaidicue. Cuemo ine”. Ie jira ie moo naimiemo fecade. ¹³ Ie mei nano nie ñinori illamona, nana ie raruaiaie iraianona, jiaie eniruemo jaide. Nainomo ie ucube jamai buruemo faiaide. ¹⁴ Nana naimie ucube fuidua facaise, naie eniruemo guille iñede. Aime guitimaci. Naimie jiai aime guite. ¹⁵ Ie jira nainomo ite patrón ñine maijaide. Naie patrón ie chanchuaia sedallena naimiena orede. ¹⁶ Naimiena jaca buna ecarainina jira, chanchuai guillemona guiacade. ¹⁷ Iese naimie duere sefuilla jira, ja muidomo abina uiñocaillamona, comecina facade: “Cue moo jofomo nana naimie mullaiaie raise guitimaci. Guille fiebicabite; iadedi bene aimeri fiodaicue”. ¹⁸ Cue moo ñine abido ja jaiticue. Naimiemo lloiticue: Jusiñamuimo jeacinona finodicue. Omo jeare jiai finodicue. ¹⁹ Odi: ‘Cue jito’ cuena raiñeno. O mullaiaie illa isoi, cuena abido feiño”. ²⁰ Ie facaise ie moo ñine jai jaide. Nia aare naimie ia, ie moo naimiena cide. Ie jitona duenaillanona, naimie ñine aiside. Naimiena caimadote. Jiai llibanote. ²¹ Ie jito naimiemo llote: “Moo, Jusiñamuimo jeacinona finodicue. Omo jeacino jiai finodicue. Odi: ‘Cue jito’ cuena raiñeno”. ²² Ie moo iena cacajano, ie mullaiaimo llote: “Cue jitona naimie eruaillena, eo mare iniroina ati, naimie jitallena. Cue jitona naimie illa jira, iena jitallena, anillona ati. Naimie jitallena, zapatona jiai ati. ²³ Janoreta farediretana fano. Iena raise finuanona, iena mai cai guilli. Iobillamona, caimare ebirede rafuena finoiticaie. ²⁴ Navui cuemona cue jito fiodaite isoide. Caje cuemo dane abido rilla. Navui cuemona naimiedi faifide; iadedi birui naimiena dane ciodicue”. Naimie llua isoi, rafuena finodimaci. ²⁵ Naie facaise nano doforamie illimo ite. Jofomo abido naimie bia, comini iraisillana cacade. ²⁶ Daje mullaiaimona uaiduanona, naie rafuena jicanote. ²⁷ Naie mullaiaimona uai ote: “O ama abido jai bite. O ama ramo jiriñeno abido billa jira, o moo ie janoreta farediretana jai fatatate”. ²⁸ Iena cacajano, icirite. Fo jaiacaiñede. Ie jira ie moo jino bite. Naimiena fo uaidote. ²⁹ Ie moomo llote: “Ero, diga años o diga maijidicue. O uaina jaca iñoticue; iadedi cue nabaiñiaie diga, rafuena cue finollena, chivo cuemo jaca fecañedio. ³⁰ O jito jamamie ie ucube callirediñaiñuaimo fuidode; iadedi abido naimie billano, naimie facaina janoreta farediretana fatatatio”. ³¹ Ie moo uai ote: “Moo, nagarui cue diga itio. Nana cue radi oienite. ³² Cuemona o ama navui fiodaite

isoide; iadedi naimiena dane ciodicue. Naimie navui faifide raiticue; iadedi caje cuemo dane abido rilla. Cue iobillanona rafuena finodicue”. Bie rafuemona omoi fueollena, iena jai lloticue —Jesús llote.

16

Jesúdi patrón ie mullaíma finoca rafuena llua rafue

¹ Ie llofueoicaiganomo Jesús jiaie rafuena llote:

—Ucuberede patrón ie mullaímana ie rana sedatate. Naie patrón eneno oni illanona, ie mullaíma ie rana raise sedañenana fidide. ² Naimiena uaiduanona, naimiemo jicanote: “¿Maraiñede o finoca rafuena niese fididicue? Omo ite cuentas cioacadicue. Cuemo ati. Cue diga jai maijiñeitio”. ³ Iena cacajano, naie mullaíma comecina facade: “¿Niese nibaiticue? Cue nama cuena jai dotaacade. Maijiana ocuinidicue. Jiaie cominimona ucube jamai jicajana meiruiticue. ⁴ Cue finuana jai uiñoticue. Naimaci jofomo comini cuena ico feiñollena cue dotaja mei, nana cue patrón debedinona uaidoiticue”. ⁵ Ie jira naimacina uaidote. Damiemo jicanote: “¿Cue patrómo niga debedio?” ⁶ Uai ote: “Cien bidones raifi aceitunamona oga aceitena debedicue”. Naie mullaíma raite: “O rabemo jarire ja cueno: cincuenta bidones”. ⁷ Jiaimie mo jicanote: “¿Niga debedio?” Uai ote: “Cien digagai trigo raifi debedicue”. Naie mullaíma dinena raite: “O rabemo ochentana cueno”. ⁸ Iena fidiano, naie mullaímamo ie patrón raite: “Jiairuido marena o illemo o comecina raise facadio. Eo abina uiñotimiedio” raite. Ero, Jusiñamuina inoñedinodi naimiena inotino baifemo ra fecajana baitadimaci. ⁹ Naiemona omoi fueollena, omoi mo lloiticue. Omoi mo ite ra diga dueredinona cano. Iemona omoi nabaiñiaina jaitimaci. Omoi fiodaia, omoi ra bene fiebite; ia Jusiñamui illanomo naimaci diga omoi ia, naimacina birui omoi canuamona, nainomo omoi na marena ñaitimaci. ¹⁰ Janore ra omoi mo illamona, Jusiñamui facaina birui omoi raise maijia, ailluena ra omoi mo itedena, Jusiñamui facaina jiaie raise maijimotoi. Janore ra omoi mo illamona, maraiñede rafuena birui omoi finoia, ailluena ra omoi mo itedena, maraiñede rafue nia jiaie finoitomo. ¹¹ Omoi mo birui ite ra diga Jusiñamui facaina omoi raise maijiñenia, naimiemona jiaie rana feiñoñeitomo. ¹² Omoi anamo ite ra diga Jusiñamui facaina omoi raise maijiñenia, Jusiñamui ie rafue omoi mo itatañeite. ¹³ Mena patrones diga daruido buna jaca maijinide. Mena diga bu maijiacania, damiena jiaimie baifemo gaite. Ie gaiamie ocuica rana finoite. Jiaimie ocuica rana raise finoñeite. Ie isoide. Raruiam ollemo comecina omoi eo facaia, Jusiñamui jitaillacinomo comecina raise facañeitomo.

Jesúdi fariseuai comini diga dane ñaia rafue

¹⁴ Jesús llofuiana fariseuai comini cacajano, ucubena eo gaia jira, naimie uaina jamaidimaci. ¹⁵ Naimacimo Jesús llote:

—Omoi finoca rafuemona comini omoi na: “Mare” raillana jitaidomoi; iadedi Jusiñamui omoi comeciaie maraiñenana uiñote. Iese omoi illana Jusiñamui gaiñede. ¹⁶ Jusiñamui facaina lloraini micoriaie ciegafuiaimona Jusiñamui rafuena cacacabidomoi. Moisés micori ciegafuiaimona iena jiaie cacacabidomoi. Juan Bautista micorimona naimie anamo omoi illana Jusiñamui jitaillana cacadomoi. Jusiñamui dibeimo omoi comeciaie iuaina meiduana cacadomoi. Iena jiaie llocabiticue. Iena ailluena inuamona, Jusiñamui dibeimo birui duere iacadimaci. ¹⁷ Mona enirue diga nia ia, nana Jusiñamui llogacinuai suicana jaite.

Jesús iima ie aina dotaja rafuena llofuia rafue

(Mt 19.1-12; Mr 10.1-12)

¹⁸ Jesús llote:

—Naga aina dotadimiedi, jiañaiño ollena, jeacinona jai finode. Dotacañaiño bu oia, jeacinona jai finode.

Jesúdi ucuberedimie iaímaiaí Lázaro ie rafuena llua rafue

¹⁹ Jesús jiaie rafuena llote:

—Cue llogacinona omoí raise uñollena, bie rafue lloiticue. Ucuberedimie ite. Eo mare ñiroina jitade. Eo caimare raise guicabite. ²⁰ Naimie nasemo Lázaro raillamie jamai bide. Naimiedi dueredimie. Efonaitimie. ²¹ Naimiedi ucuberedimie guiga allamona guiacade; ia guiñede. Jiconiaidi naimie efociana mecabite. ²² Ie mei naimie fodaite. Jusiñamui cominina naimie illamona, Jusiñamui jaienisai naimie joreño monamo Abraham micorí joreño illanomo uitimaci. Ucuberedimie jiaí fodaite. Comini naimiena raítimaci. ²³ Jusiñamui cominina naimie iñenamona, naimie joreño iraimo jaide. Nainomo naimie duere sefuillamona, Abraham joreño aarena ciode. Naimie ecimo Lázaro micorí ie joreño jiaí ciode. ²⁴ Abraham joreño uaidote: “Cue moo Abraham, cuena duenai. Lázaron a cue dine oreta, ie onocai diga, jinuina cue fuemo llocatallesa, cue fuedo manare jaillena. Bie iraimona jai eo legi cacadicue”. ²⁵ Abraham joreñodi uai ote: “Moo, o illa ñinori naga ra omo ite. Marena itio; iadedi Lázaro duere sefuide. Birui naimie marena ite; iadedi o duere sefuideo. ²⁶ O dine jainidicai. O enefebetuemo itio. Cai enefebetuemo jiaí iticai. Caimona omoí dine bu jaiñellena, omoimona cai dine bu biñellena, iese ite”. ²⁷ Ucuberedimie micorí joreño ñinena uai ote: “Cue moo jofomo Lázaron a oreta. ²⁸ Cueno cinco amatiaí ite. Naimacimo riire llollena, bie iraimo naimaci riñellena, naimiena oreta”. ²⁹ Abraham joreñodi uai ote: “Naimacimo Moisés micorí cuegafuiaí ite. Jusiñamui facaina jaie lloraini micoriaí cuegafuiaí jiaí ite. Iemo naimaci comeciana facallesa”. ³⁰ Uai ote: “Iese lloño. Iemo comeciana facañeitimaci; iadedi fiodaillamona jilluanona, naimaci dine bu jaia, naimiena ñnoítimaci. Naimaci comeciaí iuai meidoítimaci”. ³¹ Abraham joreñodi uai ote: “Moisés micorí cuegafuiaí, Jusiñamui facaina jaie lloraini micoriaí cuegafuiaí naimaci ñnoñenia, fiodaillamona bu jilloia, naimiena jiaí ñnoñeitimaci” —Jesús llote.

17

Jesúdi jeacinona fñoñenana llofuia raufe

(Mt 18.6-7, 21-22; Mr 9.42)

¹ Ie llofueoicaiganomo Jesús llote:

—Diga ramo omoí faicana uitinomo riitomoí. Omoí ramo faitimie duere sefuite. Jusiñamui omoí ramo faitimiena duere finoite. ² Como creyentena jaidimiena ramo bu faia, naimie cimaimo aillue nifici maianona, joraimo corobaillena naimiena dotacadena, mare. ³ Como creyentena jaidimiena ramo omoí faiñellena, abina omoí rairui. O ecimo itimie ona jeare finoia, naimiemo iena llono. Ie comecina meidoiacania, naimie jearede finoia rafuena feita. ⁴ Nagarui diga icaiño ona jeare naimie finoia, naga icaiño o diga naimie marena dane ñaiacania, naie rafuena feita.

Jesúdi naimiena ñnuana llua rafue

⁵ Ie doce llofueoicaigano Jesús llote:

—Ona ñnoticai; ia caina o uaina eo ñnota.

⁶ Uai ote:

—Jusiñamuina eo janore ñnotomoidena, bene ite amenamo omoí lloia: “Benomona jai. Joraimo sico”, naie amena omoí uaina ñnote.

Jesúdi ie facaina llofueoicaigano maijia llua rafue

⁷ Ie llofueoicaiganomo Jesús llote:

—Bie rafuemon a omoí fueollena, iena lloiticue. Illimo ie mullaíma maijiamona, ie toñiaí sedajamona jofomo abido naimie ria, ie patrón naimiemo lloñeite: “Mai nano guisaíbi”; ⁸ iadedi naimiemo lloite: “Cueiena guillena nano fino. Cuen a eca. Ie mei guitio”. ⁹ Naie mullaíma ocuica rana finua muidona, mullaímana naimie illa jira,

ie mullaímamo patródi iobillacinona fecañeite. ¹⁰ Ie isoide. Nana cue lluana omoi finodomoina, dani omoi maijiadi, cue cominina omoi illa jira, cuemona iobillacinona feiñoñeitomoi.

Jesúdi diez efonaitinona jillotaja rafue

¹¹ Jerusalémo ie llofueoicaigano diga Jesús jaidemo, naimie nabeimo Samaria enirue ite. Naimie jarifebeimo Galilea enirue ite. ¹² Nairai dine naimie riacania, diez efonaitinodi naimiemo dafaifidimaci. Eneno oni naidaidimaci. ¹³ Naimiena ado uaidotimaci: —Jesús, Maestro, caina duenai. Caina ja jillota.

¹⁴ Naimacina Jesús ciuana, naimacimo llote:

—Mai jai. Jusiñamui diga ñairainimo omoi abina acata. —Jaidimacimo, jillodimaci.

¹⁵ Ie abi jilluana ciuano, naimacimona damie Jesús dine abido bite. Jusiñamuimo iobillacinona ado fecade. ¹⁶ Naimiemo iobillacinona jiai fecallena, Jesús uicomo ana bitadate. Naimiedi judiúñedimie. Samaritano imie. ¹⁷ Jesús llote:

—Diez digamiedomoi. Omoína jai jillotaticue. ¿Ninomo jiaínodi nueve digamie itimaci? ¹⁸ ¿Niese Jusiñamuimo iobillacinona fecaacaiñedimaci? Dama bimie fecade. Naimiedi judío imieñedimie.

¹⁹ Jesús naimiemo llote:

—A naidada. Mai jai. Cueno o ñnua jira, jai jillodio.

*Jesúdi Jusiñamui ie cominina sedajana llofua rafue
(Mt 24.23-28, 36-41)*

²⁰ Naie facaise fariseuai comini Jesúmo jicanotimaci:

—¿Niruido Jusiñamui caina bene sedaite?

Jesús uai ote:

—Siño rafuena omoi ciuamona, Jusiñamui omoína sedallena uiñoñeitomoi. ²¹ Buena ciuamona raiñeitomoi: “Jadi, Jusiñamui bene caina jai sedade”. “Jadi, batine caina jai sedade”; iadedi omoi motomo itinomona Jusiñamui dibeimo damierie illamona, Jusiñamui omoi motomo jai illana uiñoitomoi.

²² Ie llofueoicaiganomo llote:

—Jairuido duere sefuillamona cue diga janore jisa iacanitomoi; iadedi iese nia iñeitomoi. ²³ Damierie raia: “Ero, batine Cristo jai bairede” nainomo jaiñeno. Naimaci raia: “Ero, bene Cristo jai bairede” iena ñnoñeno. ²⁴ Mona borillamona mona jillacidi usare ciode. Ie isoide. Cue abido bia, nana comini iena uiñoitimaci. ²⁵ Birui iese nia suiñeite. Nano duere sefuiticue. Birui ite comini cuena jiai feiñoñeitimaci. ²⁶ Abido cue billirui iairei ia, Noé micori facaiseconi itino isoi, comini iitimaci. Naimaci duere sefuillemo Noé micori facaise itinodi comeciaina facañedimaci. ²⁷ Naie facaiseconi nia eo noci deiñenia, Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori. Nia noci deiñenia, Noé micori lloga uaina ñnoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue. ²⁸ Lot micori facaiseconi daje isoidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Rana ibauidimaci. Iena fcauidimaci. Illimo maijuidimaci. Jofona finouidimaci. Naimaci isoilla isoi icana jaidimaci. ²⁹ Dani iemo comeciaina facadimaci. Jusiñamuimo comeciaina facañedimaci. Iese icana jaidimaci, Sodomamona Lot micori jailla dinori. Nairui monamona boode azufre ebena billanona, nana Sodomamo itino jobaide. Ebena nana faifidimaci. ³⁰ Ie isoide. Abido cue billiruimo comini iitimaci. Cue bia, ebena biiticue. ³¹ Naie facaise bu ie jofo emodomo ia, ie raruiaina ollena, naimie diga uillena, bu fo jaiñena. Illimo bu ia, ie raruiaina ollena, ie jofomo bu jaiñena. ³² Iemona fueollena, Lot ai micori rafuemo comeciaina faca. Naiñaiño ie raruiaimo daño comeciaina facajamona, na ie abi diga faifide. ³³ Dama ie raruiaimo ie

comecina bu facaia, ja muidomo faifite. Cue diga jaca iñeite; iadedi cue jitaillacinona finuamo ie comecina bu facaia, monamo cue diga jaca iite. ³⁴ Cue bille facaise menamie daje cuartomo iniano iitiaimaia. Damie jaite. Jiaimie fiebite. ³⁵ Mena riño danomo doberillanona iitiaiñuai. Dañaiño jaite. Jiañaiño fiebite. ³⁶ Menamie illimo maijiano iitiaimaia. Damie jaite. Jiaimie fiebite.

³⁷ Ie llofueoicaigano jicanotimaci:

—¿Ñine jaitimaci?

Uai ote:

—Urujaisai rifaide ramo ofillana uiñua isoi, nana cuena ñnotino cue abido billena uiñoitimaci. Cuemo duillamona, cue diga jaitimaci.

18

Jesúdi feciñona llua rafue

¹ Ie llofueoicaiganomo Jesús rafuena dane llote:

—Jusiñamuimo jicabi, omoi jicaca rafue omoi feiñolle ñnori. Raire feiñoñenia, abina jafueño. ² Iena omoi raise uiñollena, bie rafuena lloiticue. Jiaie nairaimo juez ite. Jusiñamuina jaciruiñede. Cominina jiai jaciruiñede. ³ Nainomo naimie ñine daje feciño jai-jaicabillanona, raite: “Cuena duere finodimie mona cuena cano”. ⁴ Naimie ñinena raite: “Dama iesede. Ona canoñeiticue”. Ie mei ie comecina facade: “Jusiñamuina jaciruiñedicue. Cominina jiai isiruiñedicue; ⁵ ia naiñaiño cuemo sefuire bi-bina jira, naiñaiño canoiticue, cue rairaifaiñellena”.

⁶ Jesús llote:

—Maraiñede juez llua cacadomoi. Ja muidomo naiñaiño canode. ⁷ Ero, biemo omoi começaina faca. Jusiñamui naie juez isoñede. Nagarui Jusiñamuimo naimaci jicaia, ¿ñiese naimie ie fetocanona canoñeite? Jaca canoite. ⁸ Raire fairiuanona, naimacina raire canoite; iadedi abido cue bia, ¿ñiga cuena ñnotino iitimaci? Nibai ailluena cuena ñnoñeitimaci.

Jesúdi Jusiñamuimo menamie jia llua rafue

⁹ “Mareuidicai” dajerie railla jira, “Jiaie comini baifemo faiticai” dajerie railla jira naimacimo Jesús bie rafuena llote:

¹⁰ —Jusiñamui jofomo, nainomo jillena, menamie jaidiaimaia. Damie fariseo imie. Jiaimie gobierno ucubena oraima. ¹¹ Fariseo imie naidadacaida, dama anado jide: “Jusiñamui, jiaie comini isoñedicue. Fñidimaci. Maraiñedicue. Naimaci añede riño diga itimaci. Cue ecimo ite ucubena oraima isoi iñedicue. ¹² Naga semana menarui guicabiñedicue, ona raise cue sedajanona. Cue ramona omo fecacabidicue. Macaibaite” jide. ¹³ Gobierno ucubena oraima eneno naidadacaida, jide. Monamo eruaiñede; iadedi jamai bue isoillanona, jogobena farode. Raite: “Jusiñamui, jeacinona finoraimadicue. Cuena duenai. Macaibaite” jide. ¹⁴ Jusiñamuidi jiaimie afemo iacadimie na jiaimie afemo iñenana itataite. Jusiñamuidi jiaimie afemo iacaiñedimie na jiaimie afemo itataite. Ie jira gobierno ucubena oraima ie jofomo Jusiñamuimona jai marebicaillanona jaide; ia fariseo imie iese jaiñede.

Jesúdi naimie ñine uruia billana jitailla rafue

(Mt 19.13-15; Mr 10.13-16)

¹⁵ Naie facaise Jesús ñine comini naimaci eisaiaina atisite. Ie onolli naimacimo naimie joniana jitaidimaci. “Naimacina raise cano” ie Moomo lollena jitaidimaci. Iena cñuanona, ie llofueoicaigano cominina Jesús ñine billana rairuidimaci; ¹⁶ iadedi Jesúdi eisaiaina uaiduano raite:

—Uruiaie cue ñine billesa. Naimacina rairuiñeno. Cuena bie isoi ñnotinodi Jusiñamui cominidimaci. ¹⁷ Bie uruiaie abina iedoñedicue. Einamacimona jamai bue isoidimaci.

Naimaci isoi bu iñenia, Jusiñamui cominina jaiñeite. Jusiñamui naimiena sedallena, Jusiñamui cominina naimie jaiñeite.

*Ucuberedimie Jesús diga ñaia rafue
(Mt 19.16-30; Mr 10.17-31)*

¹⁸ Ie facaise illaicominimona damie Jesús mo jicanote:

—Maestro, odi mareuidimiedio. Jusiñamui diga ico monamo cue jaca illena, ¿nie isoide rana finoiticue?

¹⁹ Jesús uai ote:

—¿Bue ñellena cuena: “Mareuidimiedio” raitio? Dama damie mareuidimiena. Naimiedi Jusiñamui. Naimiemo jicano. ²⁰ Moisés micori llogacinuaina ñnocana jai. Jaie cuete: “O aiñede riño diga iñeno. Comena meineñeno. Rana fiñeno. Jiaimiena o llogidoia, tainona lloñeno. O moo uaina ñno. O ei uaina ñno”.

²¹ Uai ote:

—Cue uruena illa facaisemona nana bie llogacinuaina ñnoticue.

²² Iena cacajano, Jesús raite:

—Daje rana nia finoñedio. O raise marebicaiacania, omo ite raruiaina feca. Naie ucubena dueredinomo feca. Cuena o ñnuamona, monamo ico jaca iitio. Cue llofueoicaiganona o illena, mai cue diga bi.

²³ Jesús llwana naimie cacajano, sunaicaide. Naimiemo eo ailluena ra illa jira, iena fecaacaiñede. ²⁴ Naimiemo eruaillano, Jesús raite:

—Ucuberedinodi Jusiñamui cominina jaillena eo sefuiruite. ²⁵ Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui cominina jiai raise jainide.

²⁶ Jesús llwana cacadino jicanote:

—¿Iemona buca jillobiti?

²⁷ Jesús uai ote:

—Nana comini dani jillobinidimaci; iadedi Jusiñamuidi naimacina jillobitarede.

²⁸ Pedro raite:

—Ero, o llua isoi cai jofuena fañonocaida, o diga jaisoidicai.

²⁹ Uai ote:

—Uanaicinona lloticue: Jusiñamui cominina naimie jaillamona, ie jofona bu fañonocaia, ie aina bu fañonocaia, ie amatiaina bu fañonocaia, ie moona bu fañonocaia, ie eina bu fañonocaia, ie uruiaina bu fañonocaia, ³⁰ Jusiñamuimona ailluena ibana birui feiñoite. Monamo ico jiai jaca iite.

*Jesúdi ie fiodaillena dane llua rafue
(Mt 20.17-19; Mr 10.32-34)*

³¹ Ie doce llofueoicaigano eneno uillanona, dani naimacimo llote:

—Ero, Jerusalémo jai jaidicai. Monamona billanona, imana jaidicue. Jusiñamui facaina lloraini cuena jaie cuetimaci. Nana naie rafue ja suite. ³² Judíuaiñedinomo judíuai illaicomini cuena fecaitimaci. Cueri jifanoitimaci. Cuena jeare finoitimaci. Cuena tuallaitimaci. ³³ Cuena faitimaci. Cuena meineitimaci; ia darui amani illanona, cue fiodaillamona jilloiticue.

³⁴ Naimie llwana raise cacaiñedimaci. Naimacina iena Jesús nia raise llofueñena jira, iena raise uiñoñedimaci.

*Jesúdi uisnidimiena jillotaja rafue
(Mt 20.29-34; Mr 10.46-52)*

³⁵ Jericó railla nairaimo ie llofueoicaigano diga Jesús riacademo, uisnidimie naiso fuemo raillana cide. Ucubena jamai jica-jicade. ³⁶ Ailluena comini Jesús diga jaillana naimie cacajano, naie cominimo nie isoide rafue illana jicanote. ³⁷ Uai otimaci:

—Nazaret ie Jesús como bene bite.

³⁸ Ie jira naimie cuirioide:

—David micori Jitona o illamona, cuena duenai. Cueno cano.

³⁹ Uicodo jaidino naimiena lletade, naimiena llicaitallena; iadedi naimie eo cuirioide:

—David micori Jitona o illamona, cuena duenai.

⁴⁰ Naimiena cacajano, Jesús naidadate.

—Cue dine naimiena ati —llote. Naimiena atianona, naimiemo Jesús jicanote:

⁴¹ —¿Niese ona cue nibaiana jitaideo?

Uai ote:

—Maestro, cioacadie.

⁴² Jesús raite:

—Mai eroda. Cueno o inua jira, jai jillodio.

⁴³ Iecon naimie uisidi cide. Jusiñamuimo iobillacinona fecajano, Jesús diga jaidino diga naimie jaide. Naimie jilluana ciuamona, nana comini Jusiñamuimo iobillacinona jiai fecadimaci.

19

Jesús Zaqueo diga illa rafue

¹ Jericómo Jesús rillanona, nainomo macaritemo, ² naie facaise nainomo Zaqueo raillamie ite. Gobierno ucubena nanoca oraíma. Naimiedi eo ucuberede. ³ Jesús bai macaritemo, Zaqueo naimiena cioacade; iadedi ailluena comini illamona, Zaqueo ianorina jira, Jesúsna cionide. ⁴ Ie jira uicodo aisicana jaide, amenamo a jaillena, naimiena cioillena. ⁵ Naimie dine Jesús rillano, Zaqueomo a erodate. Naimiena uaidote:

—Zaqueo, raire ana bi. O diga danomo illena, o jofo dine jaitie.

⁶ Ie jira raire ana bite. Ie jofomo Jesúsna iocire feiñote. ⁷ Iena jiaie comini ciuanona, Jesús joreña jeare ñaianona raitimaci:

—Mariñedinona finoraíma jofomo naimie jaide.

⁸ Jesúsna naimie feiñua mei, Zaqueo Jesús ecimo naidaita, naimiemo llote:

—Nama, atuedo cue raruaiña dueredinomo biruimona fecaitie. Bumona navui cue fiia, cuatro diga ra abido itie.

⁹ Jesús uai ote:

—Iese o llua jira, o comini diga Jusiñamuina jai o inuana uiñoticaí. —Jamai bitinomo llote:

—Zaqueodi Abraham micori jito; ia Jusiñamuina navui inoñede. ¹⁰ Naimie isoidino jillobitallena, bitie. Monamona billanona, imana jaie jaidie. Jusiñamuina inoñedinona jenuaibidie, naimacina jillobitallena.

Illaima ie mullaiaimo ucubena fecaja rafue

¹¹ Zaqueo jofomo itino Jesús llofuiana cacajano, comecina facadimaci: “Jerusalén ianori ite. Nainomo Jesús rilla mei, illaima isoi nainomo Jusiñamui ie cominina raire sedaite”. ¹² Iena naimaci raise uiñollena, Jesús bie rafue naimacimo llote:

—Illaima jito ie nanoca illaima dine jiaie nairaímo jaide. Ie cominina sedallena, nanoca illaimamona ie uaina feiñoiacade. Iemei abido biacade. ¹³ Nia naimie jaiñenia, diez diga ie mullaiaína uaidote. Nagamierie daberie ucubena fecade. Naimacimo llote: “Bie ucube diga jiaie ucube ocana omoi jai”. Ie mei oni jaide. ¹⁴ Ie comini naimiena enoidimaci. Jainona nanoca illaima dine oretajano, raitimaci: “Bimie caina sedajana jitañedicaí”; ia nanoca illaima dinena naimaci lluaña jaca cacaiñede. Ie jira naie nanoca illaima naie illaima jito ie uaina ite. ¹⁵ Ie uaina feiñua mei, abido ie enruemo jaide. Rilla mei, ie mullaiaína uaidote. Nie diese ucubena ocana naimaci jaillana uiñoiacade. Ie jira naimacina uaidote. ¹⁶ Nano bitimie raite: “Nama, o cuemo dabe fecadio. Dabedemona jai cuemo ite diez digabe”. ¹⁷ Naie illaima naimiemo llote: “Eo marena maijido. Mare mullaímadio. Janore ra raise o sedaja jira, ona diez

nairaiaina sedataitucue”. 18 Ie mei jiaie mullaïma billanona, raite: “Nama, o cuemo fecaca dabedemona jai cuemo ite cinco digabe”. 19 Illaïma llote: “Ona cinco nairaiaina sedataitucue”. 20 Ie mei jiaie mullaïma bite. Raite: “Nama, jadi, o cuemo iga o ucube. Iniroimo tilliano, iena eenoticue. 21 Ona cue jaciruillano, odi eo riimiena jira, iena jamai eenoticue. Jiaie cominimona ie rana bairocabidïo. O maijiñena ramona ocabitïo”. 22 Illaïma dinena raite: “Eo maraiñede mullaïmadïo. Cuena o llua isoi, ona duere finoitucue. Cue riimienana uiñotïo. Jiaie comini ie rana cue bairuana uiñotïo. Cue maijiñena motomo ra cue uana uiñotïo; ia buena maijiñedio. 23 ¿Bue ñellena bancomo cue ucube joneñedio? Bancomo itena, jiaie ucubena ocana jaide. Ie mei abido cue bia, omo cue fecaja ucube baifemo feiñoticue”. 24 Nainomo itinomo llote: “Naie ucube naimiemonna bairuano, diez digabe itimiemo feca”. 25 Uai otimaci: “Naimiemo ailluena ucube jai ite. ¿Bue ñellena dane jiaie fecaitïo?” 26 Illaïma dinena uai ote: “Ailluena raredimie jiaie rana feiñoite; iadedi janore raredimie ie rana faifite. 27 Cuena enoidinona bene ati. Naimacina cue sedajana jitañedimaci. Naimacina meine”.

Jesús nia llote:

—Ie isoide. Iese omoïmo suiñellana, Jusiñamui ie comini sedalliruina omoï uiñoñena jira, cue jitaillacino finocana jai.

*Jesús Jerusalémo jailla rafue
(Mt 21.1-11; Mr 11.1-11; Jn 12.12-19)*

28 Naie rafuena llofua mei, Jerusalén dine comini uicodo ie llofueoicaigano diga Jesús jaide. 29 Jerusalén iaireicaidemona, mena nairaimo riacade. Betfagémo railla nairaimo ride. Betania nainomo jiaie ite. Olivos railla anedumo naga nairai iaïmaiaï ite. Ie llofueoicaiganomona mena orede. 30 Raite:

—Bie nairai illa uicomo mai omico jai. Nainomo cuinaca burritona baitomico. Naie burrito emodomo nia buna jaiñena. Iena suiñuano bene ati. 31 Omicomo: “¿Bue ñellena iena suiñodomico?” bu jicanoia, llono: “Coco Nama iena jitaide”.

32 Naimie llua isoi jaidiaïmaiaï. Naimie llua isoi burritona baitiaïmaiaï. 33 Ie facaise ie nanaï iaïmaiaïmo jicanote:

—¿Bue ñellena cai burritona suiñodomico?

34 Uai otiaïmaiaï:

—Coco Nama iena jitaide.

35 Ie mei Jesúmo iena atidiaïmaiaï. Burrito emodomo iniroina jobianona, ie emodomo Jesúdi rainadate. 36 Jesús iese jaidemona, naimiema iobitallena, illaïma isoi naimie jaillena, comini imaci iniroi diga, naiso motomo jobedimaci. 37 Jerusalémo joide naiso ite nafai muidomo naimie rillanona, naie ituemo ana jaillanona, nana Jesús diga jaidino caïmare itimaci. Nana Jesús siño finoca rafuena naimaci jai ciua jira, iena naimaci uibiñuamona, Jusiñamuimo iobillacinona ado eo fecadimaci. 38 Raitimaci:

—¡Cai Illaïma billa! ¡Jusiñamui mamecido bitimiemo cai iobicabillasa! O muidona Jusiñamuidi comini diga uri ite. ¡O finoca rafue muidona Jusiñamuimo iobicabillasa!

39 Naie cominimona dajerie fariseuai raitimaci:

—Maestro, o diga jaidinona llicacilla, naimacina lleta.

40 Uai ote:

—Naimaci llicacilla, biso fuemo ite noficidi cuena marena ñaite.

41 Jerusalémo Jesús iairei ria, iena ciuano, eede. 42 Raite:

—Jerusalén itino, Jusiñamui diga omoï uri illena jai bitucue. Omoïna naimie cominina itataiacaducue; iadedi iena jitañedomoï. Iena jitaïdomoïdena, ico duere sefuiñeitomoï. 43 Jiaïruido omoï bacauai jobaimena finuanona, omoïna cirinoitimaci. Omoï ecido llaïtimaci. 44 Omoïna meineitimaci. Omoï uruaïna meineitimaci. Omoï illanona judaïitimaci. Jusiñamui omoï motomo birui illana omoï uiñoñena jira, iese omoïmo suite.

Jesúdi Jusiñamui jofomona damieriena dotaja rafue
(Mt 21.12-17; Mr 11.15-19; Jn 2.13-22)

⁴⁵ Jerusalémo Jesús rilla mei, Jusiñamui jofomo jaide. Jusiñamuimo ofomaiaina fecallena, naimiemo toica llaudaiaina fecallena, nainomo comini jaisoidimaci. Naie cominina ibatajanona, ofomaiaina, toica llaudaiai diga, damierie fecauidimaci. Iena ciuanona, naimacina jino orede. ⁴⁶ Raite:

—Ie facaina lloraima micori Jusiñamui llogacino jaie cuega: “Cue jofo ite nainomo cuemo comini jillena” cuega. Ero, ailluena omoi ibataja jira, naimie jofona firiruidino jofona omoi finoca.

⁴⁷ Jusiñamui jofomo nagarui Jesús llofuate. Judíuai illaicomini Júsuna meineiacadimaci; ⁴⁸ iadedi niese nibañedimaci, nana comini naimie llofuiana eo jitailla jira.

20

Jesúdi ie siño uaina llua rafue
(Mt 21.23-27; Mr 11.27-33)

¹ Jusiñamui jofomo Jesúdi cominina llofuate. Jusiñamui rafuena llofuate. Judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamaci. Diese billanona, ² jicanotimaci:

—¿Nie isoide uaido o finoca rafuena finocabidio? ¿Bu omo iga uai diga o finoca rafuena finocabidio?

³ Jesús dinena uai ote:

—Omoimo nano jicanoitícue. ⁴ Juan Bautista micoridi cominina navui bautizade. ¿Bu naimie micorina cominina bautizatate? ¿Jusiñamui? ¿Comini? Cuemo llono.

⁵ Dani coniniri iena siaduanona raitimaci:

—“Jusiñamui” cai fairioia, caimo jicanoite: “¿Bue ñellena naimie micorina ñinoñedomoi? ¿Bue ñellena naimie micori llua isoi bautizañedomoi?” ⁶ “Comini” cai fairioia, bene itino caina meineitimaci, Juan micoridi Jusiñamui facaina lloraima naimaci railla jira.

⁷ Ie jira Jesús uai otimaci:

—Uiñoñedicaí.

⁸ Jesús dinena raite:

—Ie muidona cuemo nie isoide uai illana omoimo lloñeiticue.

Jesúdi marañede majiraini rafuena llua rafue
(Mt 21.33-44; Mr 12.1-11)

⁹ Nainomo itinomo Jesús llote:

—Jiaie rafue omoimo lloiticue. Iemo cacarei. Daje patrón uvas railla riaraiaina rite. Ie mei ibatajanona jiaínomo fecade, iena sedallena. Ie mei jiaie eniruemo are illena jaide.

¹⁰ Uvas jai einalla facaise riaraiaina sedaraini dine daje mullaimana orede, naimie facaise iedinona naimie feiñollena; iadedi naie sedaraini naie mullaimana fatimaci. Uvas naimiemo fecaño abido oredimaci. ¹¹ Ie mei patrón jiaie mullaimana orede. Naimiena fatimaci. Jeare finodimaci. Uvas naimiemo fecaño abido oredimaci. ¹² Naie patrón jiaimiena orede. Naimiena eo bofedaitajanona jino dotadimaci. ¹³ Iemei patrón comecina facade: “¿Niese nibaitícue? Cue isiruiga jítóna oretaitícue. Naimiena nibai jaciruitimaci. Naimie uaina ñnoitimaci”.

¹⁴ Riaraiaina sedaraini naimiena ciuanona, coniniri ñaitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” ñaitimaci. ¹⁵ Naimiena jino dotajanona, naimiena meinetimaci. Iena fidia mei, ¿niese naie patrón nibaiite? ¹⁶ Naimie biite, naie sedarainina meinellena. Ie mei jiaínona ie illina sedataite.

Naie rafuena cacadino raitimaci:

—Bie isoide rafue suillana jitañedicaí.

¹⁷ Naimacimo Jesús eruailano, llote:

—Naie illi sedaraini isoidomoi. Jusiñamui facaina lloraima micori omoina jaie cuete. Ie cuegosuena raise facañedomoi. Naimie micori cueda:

Jofo finoraini jitaiñena nofici nana naie jofomo ite nofici baifemo jai uaide.

cueda. Jusiñamui cominina damerie jaillana naimie micori cuete. Jusiñamui ore-tagamiena damerie jitaiñenamona, naimie cominina jaiñeitimaci; iadedi Jusiñamui ore-tagamiena ailluena inuamona, naimie cominina jaitimaci. Ero, naimie micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi. ¹⁸ Naie noficina nia ñaiticue. Noficimo bu eicaitaia, bofedaite; ia naie nofici bumo ana uaia, naimienua saitaite. Ie isoide. Cue lluna omoi jamaia, duere sefuitomoi. Iena omoi inoñenia, ja muidomo faifitomoi —llote.

Jesúmo gobiernomo ucubena fecajana jicenua rafue

(Mt 21.45-46; 22.14-22; Mr 12.12-17)

¹⁹ Jesús como lloga rafuedo naimacina ñaiana uinotimaci. Ie jira naie facaiseconi judíua illaicomini naimienua gaitaacadimaci; iadedi cominina jaciruitimaci. ²⁰ Ie jira naimienua uinododimaci. Mare rafuedo abi caitadinona oredimaci. Naimie raise uai oñenia, naimienua duere finollena, naimienua facaciacadimaci. Gobernadormo naimienua llogidoiacadimaci. ²¹ Jesúmo llotimaci:

—Maestro, uanaicinuona marena llofuecabitio. Nana cominina dauaido llofuecabitio. Jusiñamui rafuedo cai marena jaillana raise llofuetio. ²² Omo rafuena jicanoiacadica. Dama Jusiñamuina sedadica; iadedi romanos railla nairai anamo birui cai illa jira, ¿naimaci illaia Césarmo ucubena cai fecajana rairuidio? Caimo llono —lloimaci.

²³ Naimienua naimaci jifuiana uinuanona, Jesús dinenua uai ote:

²⁴ —Ucube cuemo acata. ¿Bu ie joreño nainomo ite? ¿Bumo jainaiade bie cueda radi?

Uai otimaci:

—César.

²⁵ Jesús raite:

—César ienua itedi, Césarmo ille. Jusiñamui ienua itedi, Jusiñamuimo ille —raite.

²⁶ Jesúsdi uai raise ua jira naimie llua mona jeare rafuena uinoneditimaci, naimienua llogidollena. Naimie lluari rajicaillamona, llucadimaci.

Jesús dine saduceuai railla comini billa rafue

(Mt 22.23-33; Mr 12.18-27)

²⁷ Naie facaise dajerie saduceuai railla comini naimie dine bitimaci. “Fiodaillamona jaca buna jilloñeite” raisoidimaci. ²⁸ Jesúmo llotimaci:

—Maestro, cai facaina Moisés micori jaie cueda: “Fima fiodailla meinoconi, naimie urue inenia, ie ama naie feciño olle. Naimiedi uruiaina ie ama facaina comuitaite” cueda.

²⁹ Bie rafuena uinoiacadica. Siete amatia ite. Nano doforamie ie aina ote. Naimie nia uruiainide fiodailla. ³⁰⁻³¹ Ie emodo imie ie ama feciñona ote. Naimie uruiainide jiai fiodailla. Naie siete digamiedemona iese sefuide. ³² Ja muidomo naie riño jiai fiodaite.

³³ Fiodaillamona, ico naimaci jilloiadedi, ¿bu naie riño ienite? Naiñaiño siete digamienua inirede —lloimaci.

³⁴ Jesús uai ote:

—Birui aina otomoi. Inina otomoi; ³⁵ iadedi fiodaillamona, Jusiñamui diga jaca itino jillua mei, ainitimaci. Ininitimaci; ³⁶ ia Jusiñamui jaienisa isoi illanona, dane fiodañeitimaci. ³⁷ Fiodaitino jilluana omoimo lloiticue. Moisés micori jofue inenanomo illa facaise, amenua boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. ³⁸ Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaia jiai jillotaite. Naimiemo naimaci duillamona, naimaci abiaia diga jilluanona, naimie diga jaca itimaci —llote.

³⁹ Iena cacajano, Moisés micorì llogacinuaina llofuerañimona dajerie raite:
—Maestro, raise llotio.

⁴⁰ Ie facaise naimiemo nie isoide rafuena dane jìcanuana jacìruitimaci.

Jesús ñinena fariseuai cominimo jìcanua rafue
(Mt 22.41-46; Mr 12.35-37)

⁴¹ Iemei naimie ecimo itinomo Jesús jìcanote:

—¿Ñiese Moisés micorì llogacinona llofuerañi Cristona raitimaci? ¿Ñiese naimiedi David micorì jìtona raitimaci? ⁴² Salmos railla ciegafuiaimo David micorì jaie cuela: Jusiñamuidi cue Namamo llote: “Illaìmana o illamona, cue nabeimo ana rai.

⁴³ Ona ñinoñedino o anamo itataitìcue”.

⁴⁴ “Cristodi cue Nama” David micorì raite. Iese naimie micorì railla jira, Cristo David micorì afemo faite. Naimiedi dama David micorì jitoñede; ia jiaie Nama.

Jesúdi judíuai illaìcominina ñaia rafue
(Mt 23.1-36; Mr 12.38-40; Lc 11.37-54)

⁴⁵ Nana cominì cacajano, ie llofueganomo Jesús llote:

⁴⁶ —Moisés micorì llogacinuaina llofuerañimona abina rairui. Illaìcominina naimaci itimacidena, naimacina cominì cioillena, eo mare ñiroina jitaacacabidimaci. Ñine naimaci macaria, naimaci jamai bue isoñedìnona itimacidena, cominì naimacina uaiduana gaidimaci. Cominì naimaciri acarillena, ofiracomo uicomo raiacadimaci. Rafue ia, naimaci jamai bue isoñedìnona comecina facajanona, rafue nama ecimo raiacadimaci.

⁴⁷ Feciñuaimona rana ocabillanona, naiñaiñuaina duere finodimaci. Naimiena eo sedadimacidena, Jusiñamuimo are jicabidimaci. Iese naimaci icabilla jira, Jusiñamui naimacina jiaie cominì baifemo duere finoite.

21

Jesúdi Jusiñamui jofomo duerede feciño ucube fecajana ciua rafue
(Mr 12.41-44)

¹ Jusiñamui jofomo Jesús nia ia, a erodatemo, nainomo ite eenoranomo ucuberedino ucubena joniana ciode. ² Eo duerede feciño menaruñu joniana jiaie ciode. ³ Ie llofueoicaiganomo Jesús llote:

—Bie eo duerede feciño nana ucuberedino jonia baifemo jonete. ⁴ Naimacimo ailluena ite; iadedi naie ucubemona janore jonetimaci. Naiñaiño eo duerede; iadedi nana naiñaiñoite ite ucubena jai jonete. Janore jonete; ia Jusiñamuimona naiñaiñoite jiaie baifemo jonete.

Jesúdi Jerusalémo ite Jusiñamui jofu judaiana llua rafue
(Mt 24.1-28; Mr 13.1-23)

⁵ Naie facaise Jesús llofueoicaiganomona dajerie Jusiñamui jofona eruailanona, raite:
—Mare nofici ñiga finoca. Eo mare ra nainomo jiaie ite.

⁶ Jesús llote:

—Birui bie rana ciodomoi; iadedi ñico jiairuido nana bie jofomo ite nofici ai oni judaisite.

⁷ Jìcanotimaci:

—Jusiñamui jofu judaisillana omo jìcanoicadicaie. ¿Ñiruido iena suite? Nana o lloga rafue suillena, ¿nie isoide rafue nano suite? Iena caimo llono.

⁸ Uai ote:

—Omoina bie rafuena bu jifueñellena, omoi abina rairui. Ailluena cominì cue mamecido billanona: “Cristodicue” raitimaci. “Cristo jai bairede” raitimaci. Naimaci ñibeimo ñeno. ⁹ Jobaimiaie illena fidiitomoi; iadedi jacìruiño. Iese suite; iadedi abido nia biñeitìcue. ¹⁰ Daje nairai jiaie nairai ñiga jobairite. Daje gobierno jiaie gobierno ñiga jobairite. ¹¹ Eo aillena ñuisañuaie suite. Ñiga illanomo cominì ñaie guitimaci.

Duicuai eo iite. Monamo comini diga jacirede rana cioitimaci. ¹² Bie isoide rafue nia suiñenia, cuena ñnoñedino omoina llogidoitimaci. Omoina gaitatajanona, omoina duere finoitimaci. Naimaci ofiracomo omoina uitimaci. Cárcelmo omoina jonetimaci. Cuemo omoi duilla jira, omoi duere sefuillena, illaicomini dine omoina uitimaci. ¹³ Naie facaiseconi cue rafuena naimacimo lloitomoi. ¹⁴ Omoi abina omoi riidoia, omoi lluana uicodo jarire iñeno. ¹⁵ Omoi raise lollena, omoina canoiticue. Uiñoracinona omoimo iiticue. Iemona omoi dibeimo iñedino o uaina uaitanitimaci. ¹⁶ Cuena ñnotomoi; ia ailluena cuena ñnoñeitimaci. Cuemo omoi duilla jira, omoina enoitimaci. Iemona dajerie mootiai, dajerie eitiai, dajerie amatiai, dajerie nabaiñiai omoina llogidoitimaci. Omoimona dajeriena meineitimaci. ¹⁷ Cue cominina omoi illamona, nana nairai omoina enoitimaci; iadedi cuena fañonocaiñedimie ja muidomo monamo jaca iite. Naimiena jillotaiticue. ¹⁸ Omoi ille dinori Jusiñamui omoina raise sedaite. ¹⁹ Duere omoi sefuia, cuena fañonocaiñeno jai. Ja muidomo monamo jaca iitomoi. ²⁰ Jerusalén fuedo ruicabene icaifona soldaduai ia, ie judaïlle facaiseconi iaïrei iite. ²¹ Naiemona omoi jillobillena, duere omoi sefuiñellena, Judeamo omoi illamona, aneduai dine aisi. Jerusalémo omoi ia, naiemona oni jino omoi jai. Jino omoi ia, Jerusalémo omoi jaiñeno. ²² Ie facaina lloraini micoriai ciegafuiai suillanona, naie facaiseconi naimiena ñnoñedinomona Jusiñamui ñbana oite. ²³ Naie rafuemona jillobillena, naie facaise urueside riño duere sefuite. Uruena nia jirode riñodi jiai duere sefuite. Naie facaise comini duere sefuitimaci. Llegi cacaitimaci. ²⁴ Lloebi diga meinecana uitimaci. Jiaie nairai dine naimacina jaiadoitimaci. Judíuaiñedino sedalle facaise dinori, naimaci anamo Jerusalémo itino iitimaci.

Jesús abido ie bille rafue

(Mt 24.29-35, 42-44; Mr 13.24-37)

²⁵ Jesús nia llofueite:

—Jitoma nagarui illa isoi iñenamona, fivui nagarui illa isoi iñenamona, ucuai nagarui illa isoi iñenamona, comini jiaie rafue suillena uiñoitimaci. Monailai eo baguamona, comini comeciai eo jarire iitimaci. ²⁶ Nana monamo ite radi jaidisite. Iena raise naimaci uiñoñena jira, ñie isoide rafue suillena naimaci uiñoñena jira, jaciruillamona, comini fioidaitimaci isoi iitimaci. ²⁷ Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue. ²⁸ Bie isoide rafue suia, omoina cue jilloitajai billirui iaïrei illa jira, cue billiruimo raise ocuiri.

²⁹ Iena omoi raise uiñollena, bie rafuena omoimo lloiticue. Higuera railla riaramo omoi comeciaina faca. Nana amenamo comeciaina faca. ³⁰ Bie eniruemo amena firuillamona, fiemona raïre illana uiñotomoi. ³¹ Ie isoide. Bie rafue ico suia, Jusiñamui ie cominina raïre sedajana uiñoitomoi. ³² Uanaicinona omoimo lloiticue. Nana bie rafue suille facaiseconi bie nairai nia iite. ³³ Mona fuite. Enirue jiai fuite; iadedi cue lloga uai jaca suite. ³⁴ Jifaillacinona omoi ebirui raillano, omoi ecimo ite rana ebirui raillano, abina rairuicana jai. Cuena ñnoñedinona duere finollena, ebena abido biiticue. ³⁵ Cue bia, illaimana cue illamona, nana cominimo juez isoi lloiticue. ³⁶ Ie jira nagarui abi rairuicana jai. Naie duere sefuille facaise omoi jilloillena, Jusiñamuimo jii. Ja muidomo monamo cue diga jaca iitomoi —llote.

³⁷ Jusiñamui jofomo Jesús nagarui llofueuide. Naiona Olivos railla anedumo, nainomo ñillena, jaisoide. ³⁸ Nagarui jitiramo naimiena cacareillena, Jusiñamui jofomo comini bisoidimaci.

22

Judíuai illaicomini Jesúna gaitallena siadua rafue

(Mt 26.1-5, 14-16; Mr 14.1-2, 10-11; Jn 11.45-53)

¹ Naie facaise pascua railla rafue iaïrei ite. Naie facaise llomenico guille rafue jiai ite. Naie rafue ia, siritate rana jaca guiñedimaci. Egiptomona naimaci jaiagai

jillobillana começillena, naie rafue ite. ² Judíuai illaicomini Jesúna meineiacadimaci; iadedi cominina jaciruillanona, naimiena nia meineñedimaci.

³ Ie facaiseconi Taife ie anamo Judas Iscariote micorina itatate. Judadi Jesús ie doce llofueoicaigano imie. ⁴ Jusiñamui diga nanoca ñairaini dine jaide. Jusiñamui jofona sedaraini dine jiai jaide. Jesúna gaitatallena, naimaci diga ñaiaide. ⁵ Iobillanona, naimiemo ucubena feaacadimaci. ⁶ Judas dinena:

—Jee —raite. Jesús diga ailluena comini iñena facaiseconi naimiena gaitatallena sedade.

Jesúdi ie fiodaille rafuena llua rafue

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Llomenico guille rafue illanona, judíuai comini toica llauda fauillarui ride. ⁸ Jesúdi Pedro iaimaiai Juan diga oretajano, raite:

—Cai rafue guille uicodo finollesa omico jai.

⁹ Naimiemo jicanotiaimaiai:

—¿Ninomo naiena coco finuana jitaidio?

¹⁰ Uai ote:

—Ero, Jerusalémo omico ria, nogodo jinuina uitimiena cioitomico. Naimie jailla jofomo naimiena raca. ¹¹ Jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’ ” Iese llono. ¹² Ie mei omicomio afebebamo ite aillue cuartona acataite. Na raruiai diga ite. Nainomo cai guille fino.

¹³ Jaidiaimaiai. Naimie llua isoi baitiaimaiai. Pascua rafue guille finodiaimaiai.

¹⁴ Guille facaiseconi ia, Jesús ie llofueoicaigano diga nainomo guisaide. ¹⁵ Mesamo guitimacimo, ie llofueoicaiganomo llote:

—Nia cue fiodaiñenia, omoi diga bie rafue guillena eo jitaidicue. ¹⁶ Ie cominina cue Moo ico sedalle facaise ia, nana bie rafue fuite.

¹⁷ Jiroracomo jai totaca vino llinocaida, Jusiñamuimo iobillacinona fecaja mei, raite:

—Mai llino. Biemona nana dajena omoi jiro. ¹⁸ Omoina bene dane iese caimare nabaiñeiticue. Cue Moo sedajano omoi diga ico cue ia, nainomo omoina dane iese caimare marena nabaiticue. —Iena jirodimaci.

¹⁹ Llomenicono llinuanona, Jusiñamuimo iobillacinona fecaja mei, iena tairude. Naimacimo fecajano raite:

—Biedi cue abi facai ie. Omoi facaina fiodaiticue. Cue abimo omoi começina facajano, iena guiño.

²⁰ Naimaci guilla fuilla mei, jiroracomo vino diga dane oruitajanona, naimacina jirostate. Raite:

—Cue fiodaillamona, dama cue diaillamona, jeacino anamona jilloitomoi. Jusiñamuidi omoimo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. —Iena jirodimaci.

²¹ Jesús llote:

—Ero, cuena gaitataitimie cai diga guite. ²² Monamona billanona iimana jaidicue. Jusiñamui jitailla isoi jai jaiocaidicue; iadedi Jusiñamuimona cuena gaitataitimie eo duere sefuite.

²³ Iemei: “¿Nimie Jesúna gaitatalle?” dani coniniri siadoside.

Naimaci moto imiena bu ille rafue

²⁴ Ie facaise coniniri siaduana raitimaci:

—¿Cai moto imiena bu ille?

²⁵ Iena cacajanona, Jesús raite:

—Naimaci jitailla ra finollena, judíuaiñedino illaimaiaidi naimaci anamo itinona ocuicabide. “Cai anamo itinona canocabidicai” raitimaci; ²⁶ iadedi omoimo iese

iñede. Omoi moto itimie omoi moto imieñedimiena jailla. Omoimona bu imiēna iacania, omoi mullaimana naimie jaicabillasa. Omoimona bu imiēna iacania, omoīna naimie canocana jaicabillasa. ²⁷ Ero, jiaie rafuedo iena lloiticue. Naimiēna ecallena, naimiēna canollena, patrón anamo ie mullaiaī itimaci. Naimaci baifemo patrón il-lamona, naimacina canollena, ie mullaiaī facaina maijiñede. Cue anamo itomoi; ia omoīna canollena, omoi mullaīma isoi iticue. ²⁸ Birui duere cue sefuidicue, cuena faīnonocaiñedomoi. ²⁹ Cue Moo cuena illaīmana jai itatate. Omoīna fetodicue, ³⁰ jiaīruido cue illaīma illa facaiseconi cue ecimo omoi caimare marena iocire illena. Nainomo omoi judiaī doce nairaiaīna sedaitomoi.

Jesúdi Pedro naimiēna januana llua rafue
(Mt 26.31-35; Mr 14.27-31; Jn 13.36-38)

³¹ Jesús llote:

—Simón Pedro, ero, Taifedi Jusiñamuimo ona jicanote, o ramo faillena; ³² iadedi ori jai jidicue, cuena nia ĩnocana o jaillena. Ico cuena raise o ĩnoñena mei, cue dibeimo o comeci iuaī dane o meidoia, iemona jiaie creyentiaī comeciaina ocuiñotaitio.

³³ Pedro uai ote:

—Nama, cárcelmo o ia, nainomo jiaī iticue. O fiodaia, jiaī fiodaiticue. Ona faīnonocaiñeiticue.

³⁴ Jesús uai ote:

—Pedro, jitiŕamo itava nia ñaiñenia, dacaiño amani cuena janoitio.

Jesús fiodailla facaise iaīrei illa rafue

³⁵ Ie llofueoicaiganomo Jesús llote:

—Omoimo ite rafuena uiñoiacadicue. Cue rafue llollena, navui omoīna oredicue. “Ucubena uiño, bolsa uiño, meidolle zapatos uiño” omoimo lloticue. Naie fa-caiseconi omoi, ¿bue rana jitaīdomoi?

Uai otimaci:

—Cai buena jitaīñedicaī.

³⁶ Jesús raite:

—Biruiomona omoi duere sefuitomoi. Ie jira abina rairuicana jai. Birui ucube omoimo ia, nīne omoi jaia, iena uiño. Bolsa bumo ia, iena uiño. Abina rīdollena, omoimo lloebi iñenia, janore ĩniraina feca, lloebi ollena. ³⁷ Cuena jaie cūgafuaī ja suite. Isaías micori cuena jaie cūga: “Maraiñede rafue finoraīma isoi naimie duere sefuite”.

³⁸ Raitimaci:

—Ero, Nama, mena lloebi caimo birui ite.

Jesús uai ote:

—Mena ia, macaibaite.

Jesúdi Getsemanímo Jusiñamuimo jīa rafue
(Mt 26.36-46; Mr 14.32-42)

³⁹ Guille mei, ie llofueoicaigano diga, Jesús jino jaide. Olivos railla anedumo naimie jaisoilla isoi jaide. ⁴⁰ Nainomo ria, naimacimo llote:

—Taife omoīna ramo fai raillano, iena omoi ĩnoñellena, Jusiñamuimo jī —llote.

⁴¹ Naimie janorede nofici bai faia uaila dīnori bai jaide. Caiñici ifodo ana raīta, Jusiñamuimo jīde:

⁴² —Ore Moo, o jitaia, cue duere sefuillamona cuena jillota. Cue jitailla isoi cuena finoño; iadedi o jitailla isoi cuena fino.

⁴³ Naimie comecina ocuiñotallena, ie facaiseconi monamona Jusiñamui jaīenici bite.

⁴⁴ Jesús comeci jarire illamona, naimie rīoci faitemo, difai dīruena enīruemo uaide. ⁴⁵ Jīa mei, ie llofueoicaigano dīne abido bite. Ocosinaillamona, jai ĩnīdimaci. ⁴⁶ Naimacimo jicanote:

—¿Bue ñellena inidomoi? Mai casi. Taife ramo omoina fai raillano, iena omoi inoñellena, Jusiñamuimo jii.

Jesúna gaitalle rafue

(Mt 26.47-56; Mr 14.43-50; Jn 18.2-11)

⁴⁷ Nia Jesús lloia, diga comini naimie dine bitimaci. Judas Iscariote micori naimacina ifode. Naimiedi Jesús llofueoicaigamie. Naimiena llibanollena. Jesús dine iairei bite.

⁴⁸ Jesús raite:

—Judas, cuena llibanuanona, cuena gaitataiacadio.

⁴⁹ Ie llofueoicaigano naie rafuena jai ciotimaci. Jicanotimaci:

—Nama, ¿cai atica lloebi diga ona riidoiticaí?

⁵⁰ Ie facaise naimacimona damiedi Jusiñamui diga nanoca ñairaima ie mullaíma ie nabei jefona jaibonote. ⁵¹ Jesús dinena raite:

—Dama ite. —Ie jefona naimie jetajamona, naimiena jillotata. ⁵² Diga illaicomini Judas diga Jesús dine bitimaci. Naimacimo Jesús llote:

—Fuiraimadicueta cuena omoi gaitajaibilla. Omoi lloebina atidomoi. Omoi butaral-luna jiai atidomoi. ⁵³ Nagarui Jusiñamui jofomo omoi motomo llofuecabiticue; iadedi cuena gaitañedomoi. Jusiñamui jitailla jira, cuena omoi gaitaja facaise jai ride. Taife anamo jai itomoi.

Pedrodi Jesúna janua rafue

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Naimiena gaitaja mei, Jusiñamui diga nanoca ñairaima jofomo uitimaci. Pedro aarena naimaci jinafona racade. ⁵⁵ Nairairi motomo irai bonua mei, ana raidimaci. Pedro naimaci diga jiai raide. ⁵⁶ Nainomo ite mullaíñodi irai bouamona, Pedromo eruailano raite:

—Bimiedi Jesús diga jaisoidimie.

⁵⁷ Pedro abi janote:

—Naimiena uiñoñedicue.

⁵⁸ Dallu illanona, jiaimie Pedrona cianona llote:

—Jesús ie llofueoicaigano imiedio.

Pedro dinena uai ote:

—Imieñedicue.

⁵⁹ Daje hora illanona, jiaimie raite:

—Bimie galileo imiena jira, bimiedi Jesús diga ua jaisoidimie.

⁶⁰ Pedro dinena raite:

—O lluana uiñoñedicue. —Ieconí naimie ñaitemo, iitava ñaite. ⁶¹ Jesús dobaidacaida, Pedromo erodacaide. Iemei Pedro Jesús lluana uibiñote. Jesús naimiemo jaive llote: “Iitava nia ñaiñenia, dacaiño amani cuena janoitio”. ⁶² Pedro jino jaillanona, eo sunail-lamona, eo eede.

Jesúna jifanodua rafue

(Mt 26.67-68; Mr 14.65)

⁶³ Ie facaise Jesúna gaitadino naimiena jifanododimaci. Naimiena jiai fatimaci. ⁶⁴ Ie uisina maítimaci. Llotimaci:

—Siño jitodiosa, ¿bu o faja? caimo llono.

⁶⁵ Iese jifanodocana uitimaci.

Jesúdi judíuai illaicomini dine illa rafue

(Mt 26.59-66; Mr 14.55-64; Jn 18.19-24)

⁶⁶ Monaidemo judíuai illaicomini ofidimaci. Jusiñamui diga nanoca ñairaini ofidimaci. Moisés micori llogacino llofueraíni ofidimaci. Naimaci dine naimiena gaitadino Jesúna uitimaci. Naie illaicomini dinena raitimaci:

⁶⁷ —Ua Cristodiona, iena caimo llono.

Jesús uai ote:

—Omoïmo iena cue lloia, ñnoñeitomoi. ⁶⁸ Buena omoïmo cue jicanoia, cue uaina oñeitomoi. ⁶⁹ Monamona jaie billanona, ñimana jaidicue. Cuen a omoï meiniamona, illaïma isoi Jusiñamui ecïmo raire iiticue.

⁷⁰ Nana jïcanotimaci:

—“¿Jusiñamui Jitodïcue” raitio?

Uai ote:

—Raise cacadomoi. Imïedicue.

⁷¹ Iena cacajano, raitimaci:

—Naimïe llua jai cacadïcaï. Jïaïe comini naimïena llogïduana jai jïtaiñedicai. “Jusiñamui Jitona iticue” naimïe llua jira, Jusiñamuina jai jeare ñaite. Naimïe Jusiñamui Jitoñede.

23

Pilato ðine Jesús illa rafue

(Mt 27.1-2, 11-14; Mr 15.1-5; Jn 18.28-38)

¹ Judïuai illaïcomini naidacaïllanona, Pilato ðine Jesúna uitimaci. ² Naimïena llogïdotimaci:

—Cai cominïmo maraiñedïfuen a llote. Gobiernomo ucubena cai fecajana rairuide. Naimïe jïaï raite: “Cristodïcue. Illaïmadïcue”.

³ Pilato ðinena naimïemo jïcanote:

—¿Judïuai comini illaïmadïo?

Uai ote:

—Jïi, judïuai illaïmadïcue.

⁴ Jusiñamui ðïga nanoca ñairainïmo Pilato llote. Nainomo bite cominïmo jïaï llote:

—Ñïcinodï naimïemo iñede.

⁵ Uai otimaci:

—Gobierno joreño comini comecïaï jeare feidocana naimïe uite. Nana Judeamo uite. Galileamona tainede. Bene jai caïmo ride.

Herodes ðine Jesús illa rafue

⁶ Iena cacajano, naimïe llogïdotïnomo Pilato jïcanote:

—¿Naimïedï Galilea imïe?

⁷ —Jïi —raitimaci. Galilea enïrue illaïma Herodes. Naïe facaiseconi Jerusalémo naimïe illa jira, naimïe ðine Pilatodï Jesúna orede. ⁸ Jesúna Herodes cïuanona, iobide. Naimïe finoca rafuena naimïe fïdïa jira, naimïena cioacade. Siño rafuena naimïe finuana jïaï cioacade. ⁹ Jesúmo ïe finoca rafuena are jïcanote; iadedï Jesús ðinena uaina oñede. ¹⁰ ïe facaiseconi judïuai illaïcomini Jesúna rïre llogïdotimaci. ¹¹ Herodes ïe soldaduai ðïga naimïena eo jeare ñaitimaci. Illaïma jïtauïga ñïroïna jïtatatïmacï. ïe meï Pilato ðine naimïena abïdo orede. ¹² ïemona nairuido Herodes Pilato ðïga nabairite. Jïaïe conïmana enoidïaïmaïaï.

Pilatodï Jesús fïodaïllana llua rafue

(Mt 27.15-26; Mr 15.6-15; Jn 18.39-19.16)

¹³ Pilatodï judïuai illaïcominïna, nainomo ïte comini ðïga, uaidote. ¹⁴ Raite:

—Bïmïe cue ðine atïdomoi. Raitomoi: “Comini comecïaï feidocana naimïe uite”. Naimïemo jïaï jïcanotïcue; ïa naimïemo ñïcinodï iñede. ¹⁵ Herodes cue ðine naimïena como abïdo orede. “Naimïemo ñïcinodï iñede” jïaï raite. Naimïena cue meïnetallena, naimïe jaca ñïcinona fïnoñede. ¹⁶ ïe jira naimïena cue sechedotajanona, naimïena onï oretaiticue.

¹⁷ Naïe rafue facaiseconi naga año cárcelmona ðamïena jïno jamai oretauïde. ¹⁸ Pilato llua cacajano, nana comini ado cuiriïdïmacï:

—¡Naimiena oni uiño, naimiena meinellena! ¡Barrabás cárcelmona jino oreta!

¹⁹ Gobierno diga jobaimena naimie navui finua jira, naie facaise comena naimie meinia jira, Barrabás cárcelmo ite. ²⁰ Jesúna naimie jamai oretaiacana jira, comini diga Pilato dane ñaite; ²¹ iadedi cuiiriidimaci:

—¡Naimiena corai! ¡Naimiena meine!

²² Pilato dane jicanote:

—¿Nie isoide maraiñede rafuena finode? Naimiena cai meinellena, naimie jaca nicinona finoñede. Naimiena sechedotaiticue. Ie mei naimiena jamai oretaiticue.

²³ Eo riire cuiiriidimaci:

—¡Naimiena corai! —Ja muidomo Pilato dinena:

—Jee —raite. ²⁴ Naimaci jitailla isoi Pilato fairiote. Jesúna meinellena llote. ²⁵ Ie mei Barrabásna cárcelmona jino oretate, naimiena comini jicaja jira; iadedi Jesúna naimacimo fecade, naimiemo naimaci jitailla ra naimaci finollena.

Jesúna coraia rafue

(Mt 27.32-44; Mr 15.21-32; Jn 19.17-27)

²⁶ Jesúna soldaduai oni uitemo, Simón raillamie diga dafafidimaci. Naimiedi Cirene railla enirue imie. Jerusalén onifemona bite. Jesús jinafona naimiena cruzna rocaicaida sonotate. ²⁷ Ailluena comini Jesúna racadimaci. Ailluena riñoniai eo eecana jaisite. ²⁸ Iena cacajano, Jesús naiñaiñuai dine dobaidacaida, naiñaiñuaimo llote:

—Jerusalén itiñaiñuai, cue facaina eeñeno; iadedi omoi facaina mai omoi ee. Omoi uruai facaina mai omoi ee. ²⁹ Ero, jiaruido duere sefuillemona comini raitimaci: “Oiniñuai jiaie riñoniai baifemo duere sefuiñena jira, marena itimaci”. ³⁰ Jusiñamui riicaillafuemona jilloiacanamona, comini jiai raitimaci: “Aneduai caimo jaicorillana jitaidicai”. ³¹ Maraiñede rafuena finoñedicue; iadedi jai duere sefuidicue, Maraiñede rafuena finodimaci. Ie jira cue baifemo eo duere sefuitimaci.

³² Naie iaimaiaina meinellena, mena maraiñede imana jiai uitimaci. Gobierno llogacinona inoñediiaimaia. ³³ Ifocoraina eruaila illanomo naimaci ria, Jesúna coraidimaci. Naie maraiñede iaimaiaina jiai coraidimaci. Damie Jesús nabeimo. Jiaimie Jesús jarifebeimo. ³⁴ Jesús ie Moomo llote:

—Ore Moo, naimaci finoca rafuena naimaci raise uiñoñena jira, bie soldaduai cuena duere finua rafuena feita —llote. Bu dajerie uille uiñollena, Jesús iniroina jifanoduanuano soldaduai facasite.

³⁵ Ailluena comini eruidimaci. Judíuai illaicominidi naimiena jifanoduanona, coniniri raitimaci:

—Naimiedi jiaie cominina duicomona jillotate. ¿Niese dama naimie abina birui jillotañede? Naimiedi Jusiñamui oretagamiedena, Jusiñamui fetocamiedena, fiodaillamona dama naimie abina jillotarede.

³⁶ Soldaduai naimiena jiai jifanododimaci. Ie abi isirena cacaiñellena, naimiemo vino fecajanona, ³⁷ raitimaci:

—Judíuai illaimadidena, fiodaillamona dama o abina jillota. —Naie vino Jesús jiroñede.

³⁸ Jesús ifogi afeconi rabicimo Pilato cuetatate: “Bimiedi judíuai comini illaima”.

³⁹ Jesús diga coraica iaimaiaimona damie naimiena taigode:

—Jusiñamui bitiodena, nia fiodañenamona dama o abina jillota. Cocona jiai jillota.

⁴⁰ Jiaimiedi naimiena lletade:

—¿Bue ñellena bimiena taigodio? ¿Niese jearede rafuena nia finoacadio? Ja fiodaitio. Iemei Jusiñamui uicomo ja iitio. ¿Niese Jusiñamui uicomo o illena jaciruiñedio?

⁴¹ Maraiñede rafuena coco finua jira, duere sefuidicoco; iadedi bimie maraiñede rafuena finoñede.

⁴² Iemei Jesúmo llote:

—Illa imana o illa facaise cuena começi.

⁴³ Jesús uai ote:

—Uanaicino lloticue. Birui cue diga cue Moo illanomo iitio.

Jesús fiodailla rafue

(Mt 27.45-56; Mr 15.33-41; Jn 19.28-30)

⁴⁴ Jitoma naidai jai itemo, daje amani horas mona jitibicaide. ⁴⁵ Jitoma raise lligaiñoñede. Jusiñamui jofo ie fetaca iniroife ana anaba jillacimo motodo menafe cuararide. ⁴⁶ Jesús ado llote:

—Ore Moo, cue joreñoña feiño. —Ie mei naimie jai fiodaite.

⁴⁷ Soldaduai imaci capitán bie rafuena ciuano, Jusiñamuina jaciruillamona, raite:

—Bimie maraiñede rafuena finoñede.

⁴⁸ Ailluena comini Jesús fiodaillana ciodimaci. Ie mei eo sunaillamona, jogobemo fairuanona, jofomo abido jaidimaci. ⁴⁹ Jesús nabaiñiai bie rafuena aarena ciodimaci. Galileamona bite riñoniai bie rafuena aarena jiai ciodimaci.

Jesús raiafomo jonia rafue

(Mt 27.57-61; Mr 15.42-47; Jn 19.38-42)

⁵⁰⁻⁵² Pilato dine José raillamie jaide, Jesús abina jicallena. Naimiedi illaicomini. Maremie. inogamie. Jesúsna meiniana jitaiñede. Arimatea railla nairai imie. Judeamo naie nairai ite. Naimiedi Jusiñamui ie cominina ico sedajanomo illemo ocuride. ⁵³ Pilato:

—Jee —railla mei, Jesús abina cruzmona ana uanona, iena useroi diga ferinote. Nofici ie raiafomo jonete. Nia bu raiafomono jonete. ⁵⁴ Nairui viernes. Sábadorui rille jai iairei illa jira, Jesús abina raiafomo raire jonete. ⁵⁵ Galileamona navui bite riñoniai racadimaci. Raiafona ciodimaci. Naimie abi finuana ciodimaci. ⁵⁶ Ie jira caimare soride rana finollena, naimie abimo jonellena, jofomo jaidimaci. Naie ra finua mei, ie abina raise finollena, raiafomo abido jaidimaci. Ie mei sábadoruimo jafaici otimaci, Moisés micori jaie llua isoi.

24

Jesús fiodaillamona jillua rafue

(Mt 28.1-10; Mr 16.1-8; Jn 20.1-10)

¹ Domingo jitiramo monaidemo, naie riñoniai raiafomo jaidimaci, iñaiñuai finoca soride rana uillena. ² Raiafo ibaila nofici oni joillana ciodimaci. ³ Fo jaidemo, Jesús abina cioiñedimaci. ⁴ Uainicaidimaci. Ieconimenamie naiñaiñuai ecimo bairediaimaiai. Iaimaiai iniroi eo quenirede. ⁵ Iaimaiaina jacinaillamona, ifogi ana jitadacaidimaci. Naie iaimaiai dinena jicanote:

—¿Bue ñellena fiodaitimie illanomo cajedimiena jenodomo? ⁶ Galileamo navui naimie omoimo llogacinona começiñedomoi. ⁷ Naimie raite: “Monamona billanona, imana jaidicue. Jusiñamui jitailla jira, maraiñede rafue finoraini anamo iiticue. Cuena coraitimaci. Darui amani illanona, fiodaillamona jilloiticue” raite.

⁸ Iemona ie llogacinona jai começitimaci. ⁹ Raiafomona abido jaidimaci. Ie once llofueoicaiganomo naiñaiñuai ciua rafuena llotimaci. Naie llofueoicaigano diga itinomo jiai llotimaci. ¹⁰ Naie riñoniaimona María Magdalena ite. Juana ite. María ite. Naiñaiñodi Jacobo ei. ¹¹ Naie riñoniaidi iena llotimaci; iadedi ie rafuena cacadinodi iena inoñedimaci.

—Jamai fuena ñaitomoi —raitimaci.

¹² Iena cacajano, Pedro aisicana raiafomo jaide. Nainomo ria, ana jitadacaida, fo erodate. Useroi joillana cide. Iemo ie começina facajano, jofomo abido jaide.

Mena llofueoicaiganomo Jesús bairia rafue

(Mr 16.12-13)

13 Jesús jilluarui mena llofuega iaímaiaí Emaús raila nairaímo jaidímaiaí. Jerusalémona níbaí once kilómetros ite. 14 Nana Jesúmo suide rafuena ñaíano jaidímaiaí. 15 Iaímaiaí ñaíanona, Jesús iaímaiaí díga dafáífillanona, iaímaiaí díga jaide. 16 Jusiñamuidí iaímaiaína naimíena uiñotañena jira, naimíena uiñoñedímaiaí. 17 Iaímaiaímo Jesús jicánote:

—¿Buena ñaitomíco? —Ieconí naidadatíiaímaiaí. Sunaitíiaímaiaí. 18 Naie iaímaiaímona damíedi Cleofas. Naimíe uai ote:

—¿Ñiese Jerusalémo biruí suide rafuena uiñoñedio? Níbaí como ridío. Nana jiaí cominí iena uiñotímaci.

19 Uai ote:

—¿Ñie isoide rafue suide?

Uai otíiaímaiaí:

—Nazaret íe Jesús rafue. Naimíedi Jusiñamuí facaina lloaíma. Díga síño rafuena finode. Comínina raise llofue. Jusiñamuímona naimíedi maremie. Comínimona naimíe maremie; 20 íadedí caí illaícomíní naimíena gaitatítimaci. Naimíena cruzmo coraitítimaci. 21 Jusiñamuí naimíe caí díne orecaímímo comecína facadícoco. Naimíe caí illaímána illemo ocuridícoco; ía naimíe jai fodaíte. Naimíe fodaíllamona daruí amaní jai ite. 22 Caí comínimona dajerie riñoniaíbiruí caína jacínaitadímaci. Jítíramo Jesús raíafomo jaidímaci; 23 íadedí naimíe abína cioíñedímaci. Abído naimací bia: “Jusiñamuí jaíenisáína ciodícaí” raitímaci. Naie jaíenisáí naimacímó llote: “Naimíedi caje”. 24 Íemei caímóna dajerie raíafomo jaidímaci. Riñoniaí llua ísoi ciodímaci. Jesús abína cioíñedímaci.

25 Jesús dínená uai ote:

—Abí uiñoñedomíco. Nana Jusiñamuí facaina lloaíní micoríaí cüegafuíána ínoíacáíñedomíco. 26 Cristo duere sefuíllena cüetímaci. Jusiñamuí íena jítáíllena cüetímaci. “Naimíe nía ílláímána jaíñenia, duere sefúíte” cüetímaci.

27 Íemei Jesús íaímaiaína llofue. Moisés micorí cüegafuíána llofue. Jusiñamuí facaina lloaíní micoríaí cüegafuíána jíaí llofue. Nana Cristóna cüegafuíána llofue.

28 Emaús díne íaireí naimací ría, Jesús nía jaíacademo, 29 naimíena caídídímaiaí. Raitíiaímaiaí:

—Coco díga fiebí. Jítoma jai ana ite. Jai abí juaníde, nía o jaíllena. —Íe muidóna íaímaiaí díga fiebíllena fo jaide. 30 Naíllí gütímacímó, llomenícona Jesús línuano, Jusiñamuímo íobíllacínóna fecade. Íena taíruano, íaímaiaímo fecade. 31 Jusiñamuí jítáílla jira, íeconí Jesúna uiñotíiaímaiaí. Íemei íaímaiaímona naimíena jai cioícaíñena.

32 Daímaiaí ñaitíiaímaiaí:

—Coco díga naimíe ñaía, coco comecí caímare íte.

33 Naie dacáíño Jerusalémo abído jaidímaiaí. Jesús llofueoícaígano naimací nabáíñíai díga danómó íllána baítíiaímaiaí. 34 Iaímaiaímo llotímaci:

—Caí Nama fodaíllamona jai jíllode. Simón Pedromo jai baírede.

35 Íe meí náísona íaímaiaí jaílla rafuena llotíiaímaiaí:

—Caí gütícaímó, naimíena uiñotícoco —llotíiaímaiaí.

*Jesús íe llofueoícaígano bairía rafue
(Mt 28.16-20; Mr 16.14-18; Jn 20.19-23)*

36 “Jesúna ciodícoco” llotíiaímaiaímo, íe llofueoícaígano mótomó Jesús baírede. Llote: —Jai bitícue. Uri omó í.

37 Naimíena cíuamóna, jacínaitímaci. “Joreña ciodícaí” comecíána facajanóna, jíaí jacíruitímaci. 38 Naimacímó Jesús jicánote:

—¿Bue ñíllena jacíruitómóí? ¿Bue ñíllena cue bene íllána ínoñedomóí? 39 Cue onóllímó eruáí. Cue eíllímó eruáí. Jesúdícue. Cúena jeta, raise uiñóllena. Cúemo lílcíí íte. Cúemo íllaí íte. Jamáí joreño ísoíñedícue.

⁴⁰ Iena llua mei, coraiafona naimaci cioillena, ie onolli ie eilli diga acatate.
⁴¹ Iobiacadimaci; iadedi nia raise inoñedimaci. Iemo comeciaina nia facadimacimo, naimacimo jicanote:

—¿Bue illa, cue guillena?

⁴² Naimiemo janorede jai ruica lliciaina fecadimaci. ⁴³ Iena feiñuanona, rite. Iena ciodimaci. ⁴⁴ Naimacimo llote:

—Navui omoi diga cue ia, diga rafue omoimo lloticue. Moisés micori cuena cuete. Jusiñamui facaina lloraini micoriai cuena cuetimaci. Jusiñamui jitailla jira, iena jai suide.

⁴⁵ Naie facaiseconi naimacina naie ciegafuiaina raise uiñotade. ⁴⁶ Naimacimo llote:
 —Jusiñamui facaina lloraini micoriai cuena jaie cuetimaci: “Cristo duere sefuite. Fiodaillamona darui amani illanona, jilloite. ⁴⁷ Naimie muidona comeciai iuai meidua-mona, Jusiñamui naimaci jeacinona oni dotaite. Naimie rafue nana nairaimo damierie lloitimaci”. Omoimo biena lloticue. Cue rafuena lollena, Jerusalémo taineitomo. ⁴⁸ Bie rafuena ciodomoi. Iena lloitomoi. ⁴⁹ Ero, navui naimie llua isoi, cue Moo Joreño omoi dine oretaiticue. Jerusalémo fiebi, naimie Joreño omoi feiñolle dinori. Cue rafuena omoi lollena, naimie Joreño omoi comeciaina ocuiñotaite.

Jesús monamo jailla rafue

(Mr 16.19-20)

⁵⁰ Betania railla nairai dine Jesús naimacina ifode. Marecinona naimacimo llote.
 —Jusiñamui omoina raise marena canoite —llote. ⁵¹ Iena naimacimo lluanona, monamo jaide. ⁵² Jerusalémo eo caimare abido jaidimaci. ⁵³ Jusiñamuimo iobillacino fecajano, Jusiñamui jofomo nagarui itimaci. Mai. Macaibaite. Lucadicue.

JUAN JESUCRISTO ENIRUEMO ILLA RAFUE CUIAFUE

Jesucristo rafue iese tainede

¹ Jaca bue nia iñenia, Cristo jaca ite. Jusiñamui uai naimiemo illamona, naimie caina Jusiñamuina birui uiñotade. Jusiñamuimo jaca duide. Naimiedi Jusiñamui. ² Jusiñamui diga jaca nano ite. ³ Naga ite rana finode. Naimie finoñega ra jaca iñede. Naga ite rana comuitaga. Naimie comuitañega ra jaca iñede. ⁴ Naimie muidona iticai. Naimiena cai inuamona, jaca iiticai. Lligaiñora diga rana cai ciua isoi, caina Jusiñamuina uiñotade. ⁵ Naimiena inoñedinomomito itimaci isoidimaci. Naimaci comeciaino itirede. Ie uaido naimaci comeciaina lligaiñote, naimaci comeciaino ite jeacino oni jaillena.

⁶⁻⁷ Naimaci comeciaina lligaiñotimiena lollena, Juan micori llucacino Jusiñamuina nana comini inollena, Jusiñamuidi Juan Bautista raillamie micorina oretate. ⁸ Juan naie lligaiñoñedinome; iadedi Juan naimiena luai bite. ⁹ Nanoca lligaiñotimiena llote. Nanoca lligaiñotimiedi eniruemo billanona, nana comini comeciaina lligaiñote. ¹⁰ Naimie muidona comini comuidimaci; iadedi naimie bene billa meinoconi, comini dinena naimiena uiñoñedinomomito. ¹¹ Ie nairai illanomo naimie ride; iadedi nana cai nairai naimiena feiñoñedinomomito. ¹² Damierie naimiena feiñotimaci. Naimiena inotimaci. Ie uaido naimiedi naimacina Jusiñamui uruiaina itatate. ¹³ Iena Jusiñamui jitailla jira, Jusiñamui uruiaina jaidicai. Comemona jeiciamona iena jaiñedicai. Comini jitaillamona iena jaiñedicai. Buena cai finuamona iena jaiñedicai.

¹⁴ Iemo caina Jusiñamuina uiñotalena, Jusiñamui Jito comena jaide. Naie facaise cai comini motomo naimie ite. Cai cominina eo duenaite. Uanaicinsona llouide. Ie siño uaina uiñocana jaidicai. Jusiñamui dajede ie Jitona ciodicai. ¹⁵ Juan micori naimiena cominimo jaie llote:

—Birui omoimo lloticue; iadedi jaimie cue ifo meidoite. Cue baifemo faite. Cue nia jeiciñenia, naimiedi jaca ite —llote.

¹⁶ Jesucristo caina eo duenaillamona, birui caina eo canocabide. ¹⁷ Moisés micori Jusiñamui uaina jaie llote; iadedi iemona Jusiñamui caina duenaillana jaie raise uiñoñedicai. Jesucristo llamona Jusiñamui caina duenaillana jai raise uiñotica. Naimiemona uanaicinsona jai raise cacadicai. ¹⁸ Jaca buna Jusiñamuina cioñede; iadedi dajede ie Jito caina naimiena uiñotade. Ie Moo diga danomo illamona, Jesús naimiena uiñote.

Juan Bautista micoridi Jesúna llua rafue

(Mt 3.11-12; Mr 1.7-8; Lc 3.15-17)

¹⁹ Jerusalémoma Juan micori dine judíuai illaicominidi Jusiñamui diga ñairainimona dajerie oredimaci. Jusiñamui diga ñairaini canorainimona dajerie jiai oredimaci. Naimiemo:

—¿Budío? —raillano jicanotadimaci. Juan dine rillanona, raitimaci:

—Cai Jilloitaraíma biite raillamie mo ocuridicai. Cristo raillamie billemo ocuridicai.

¿Odi naimiedio? —raillanona jicanotimaci. ²⁰ Naimie dinena janoñede; ia:

—Imieñedicue —raite.

²¹ Dane naimiemo jicanodosite:

—¿Budío? ¿Elías?

Juan micori dinena uai ote:

—Elíañedicue.

Raitimaci:

—Moisés micori Jusiñamui facaina lloraíma ico billena jaie llote. ¿Odi naimiedio?

Juan dinena raite:

—Ieñedicue.

²² Dane jıcanotımacı:

—¿Budıo? Caimo llono, caı oretatınomo caı lllollena. ¿Nıese naimacımo ona lloitıcaı?

²³ Juan dınena raite:

—Jofue iñenanomo ado llotımıedıcue. Isaías mıcorı jaie llua isoi llocabitıcue: “Caı Nama bıite. Naimıe nıiso atona raise fıno”. Iese llotıcue; ia naimıe uaina omoı feıñollena, omoı comeıcaı raise fınollena ñaitıcue.

²⁴ Juan dıne bıtinodi farıseuı comını. ²⁵ Nia jıcanoıacadımacı:

—Odı caı Jilloıtarımañenia, o Elıañenia, o Moısés mıcorı llotımıeñenia, ¿bue ñellena comınına bautızadıo? ¿Nıe isoıde uai omoı ite? ¿Nınomona o uaina otıo?

²⁶ Juan dınena uai ote:

—Comınına bautızadıcue; iadedı omoı motomo omoı uıñoñegamıe jai ite. ²⁷ Naimıe cue ifo meıdoıte. Cue bıafemo faıte. Jamai bue cue isoılla jıra, naimıe illafomo cue rıñena jıra, naimıena canonıdıcue.

²⁸ Naıe rafuedı Betábaramo suıde. Jordán raılla ille ruıcafebeımo ite. Nainomo Juan bautızauıde.

Juan mıcorı Jesúna dane llua rafue

²⁹ Ie areruido Juan mıcorıdı Jesús naimıe dıne bıllana cıuano, naimıena raite:

—Ero, Jusiñamui Jıto toıca llauıda mamecıdo jai bıte. Caı jeacıno facaina faga llauıda ifomo Jusiñamui ie Jıtona jai orede. Naimıe fallemona comını jeacınona dotaıte. ³⁰ Navuı naimıena ñaitıcue. Llotıcue: “Cue ifo jıaimıe meıdoıte. Jamai bue isoıdıcue; iadedı naimıe jamai bue isoıñede. Cue nıa jeıcıñenia, naimıedi jaca ite”. ³¹ Cue dıne naimıe nıa bıñenia, naimıedi caı Jilloıtarımána uıñoñedıcue; iadedı comınına bautızallena bene itıcue, caı comınımo naimıena lllollena.

³² Juan jıai llote:

—Monamona ucugı isoi Jusiñamui Joreño ana bıllana cıodıcue. Jesúmo baıte.

³³ Naimıedi caı Jilloıtarımána nıa uıñoñedıcue; iadedı comınına bautızallena, cuena oretagamıedi jaie cuemo llote: “Cue Joreño ana bıllana damıemo baıllana ıco cıoitıo. Cue Joreño baıllamıedi cue Joreño omoımo fecadıte”. ³⁴ Naıe rafuena cıodıcue. Iemona naimıedi Jusiñamui Jıtóna llotıcue.

Jesús ie fetocacaga comını ie rafue

³⁵ Ie areruido Juan mıcorı llofueoıcaıganomona menamıe Juan mıcorı dıga ia, ³⁶ Juan mıcorı Jesús macarıllana cıuano, raite:

—Ero, Jusiñamui Jıto toıca llauıda mamecıdo jai bıte.

³⁷ Juan mıcorı dıga itııaımaıaı nıena cacajano, Jesúna racadııaımaıaı. ³⁸ Jınafo dıne erodajanona, Jesús iaımaıaına cıode. Iaımaıaımo jıcanote:

—¿Buena jıtaıdomıco?

Iaımaıaı dınena uai otııaımaıaı:

—Rabbı, ¿nı o jofıo? ¿Nınomo itıo? —uai otııaımaıaı. Rabbı onı dobaiñuamona: “Llofuerımıa raıllamıe”.

³⁹ Jesús nıaı iaımaıaı uaina ote:

—Maı. Cue dıga bı, omıco uıñollena. —Ie jıra jadııaımaıaı. Jesús illanona cıodııaımaıaı. Jıtoma nıa a illa jıra, nıaruido naimıe dıga fıebıdııaımaıaı. Jıtırecadıemo onı jadııaımaıaı.

⁴⁰⁻⁴¹ Naıe iaımaıaımona damıe Andrėna mamecıredıme. Jesús dınena naimıe jadıemo, ie ama nano jenuaide. Naimıe amadı Simón Pedro. Naimıena baıllanona, llote:

—Jai caı comınına Jilloıtarımána bııtıcue. Cristo raıllamıena bııtıcue.

⁴² Ie meı Jesús dıne naimıena uıte. Jesús naimıena eo eruadıllanona, raite:

—Bıruı o mamecıdı Simón. Juan ie jıtodıo. Bıruımona Cefana jıaı mamecırenıtıo —raıte. Onı dobaiñuacıdı Pedro.

Jesús menamıe uadıua raufe

⁴³ Ie areruido Jesús Galıleamo jıacıade. Felıpena baıllanona raite:

—Cue llofuegamiena o jaillena, cue diga coco jaillesa, mai cue diga bi. ⁴⁴ Felipedi Betsaida nairai imie. Andrés iaimaiai Pedro diga daje nairai iaimaiai. ⁴⁵ Jesús naimiemo llua mei, Felipedi Natanaelna oni jenuaide. Higuera railla riará anamo naimiena baillanona, raite:

—Moisés micori jaie cuedamiena jai baiticue. Jusiñamui lloraini micoriaidi naimiena jaie jiai cuetimaci. Naimiedi Jesús. Nazaret imie. Ie moodi José.

⁴⁶ Natanael naie nairaina uaitajanona raite:

—Nainomo mare comedi iñede.

Felipe dinena raite:

—Naie o uiñollena, cue diga mai bi.

⁴⁷ Jesúmona iaimaiai iaire ia, Jesús dinena llote:

—Ero, buna jifueñegamie billa. Nanoca Israel imie bite.

⁴⁸ Natanael dinena uai ote:

—¿Bu cuena llogao? ¿Ñiese cuena uiñotio?

Jesús uai ote:

—Felipe ona ailli nia baiñenia, higuera railla riará anamo o illana jai uiñoticue.

⁴⁹ Jacinaillamona, Natanael dane uai ote:

—Maestro, odi Jusiñamui Jitodio. Cai comini illaimadio.

⁵⁰ Jesús dinena uai ote:

—Amena anamo o illana cue uiñua jira, cuena ñnotio. Diga siño rafuena ciojitio. Bie rafue baifemo finuana ciojitio. ⁵¹ Jusiñamui mona billanona, imana jaidicue. Uanaicino omo lloticue. Mona ecorillana o cioia, Jusiñamui jaienisaie cue dine billena cioitio. Cuemona abido jaillena jiai cioitio.

2

Jinuimona Jesús vino finua rafue

¹ Menarui illanona, Galileamo Canámo imma ie ai uarafue ite. Rafue nama uaidua jira, nainomo Jesús ei jaide. ² Jesús jiai uaidoga. Ie llofueoicaiganodicaie jiai uaidogacai. ³ Vino cueillamona, Jesús ei Jesúmo llote:

—Vino jai iñede.

⁴ Jesús dinena uai ote:

—Quei, ¿bue ñellena iese cuemo llotio? Siño rafue cue finolle facaisedi nia riñede.

⁵ Iemei ie eidi rafue nama mullaiaimo llote:

—Naimie omoimo llua fina.

⁶ Jinui nainomo eenollena, nainomo seis noficimona finoca llerodana raisoide. Naiemona jinuina ouidimaci. Marena illena, cai einamacie llua isoi, jofomo naimacie ria, naimacie abiaina llereuidimaci. Naga lleroda nibai cinco latas totaca. ⁷ Mullaiaimo Jesús llote:

—Naie llerodaiaina jinui diga oruita. —Pozomona jinui atiano, naie llerodamo toidimaci.

Iena finua mei, ⁸ Jesús naimacimo llote:

—Llerodamona janore jisa uanona, rafue nama dine uiño.

⁹ Naie facaiseconi naie jinuidi vinona jaide. Rafue nama naiena facade. Naimiedi ninomona naie vino uana uiñoñede. Dani nainomo ite mullaiaie uiñotimaci. Jirua mei, ai otimie uaiduano, ¹⁰ raite:

—Rafue bu finoa, eo caimarede vino nano fecade. Comini ailluena jirua mei, janore caimarede vino fecade; iadedi iese fecañedio. Eo mare vino jinafona fecadio —raite.

¹¹ Galileamo Canámo Jesúsdi siño rafuena nano finode. Iemona caina ie uai siñona uiñotade. Ie muidona naimie siño Jitonana ñnoticaie.

¹² Rafue fuilla mei, Capernaumo Jesús ie ei diga, ie amatiaie diga, ie llofueoicaiganodicaie diga jaide. Nano nigarui nainomo iticaie.

*Jusiñamui jofomona Jesúdi rana fecarainina dotaja rafue
(Mt 21.12-13; Mr 11.15-18; Lc 19.45-46)*

¹³ Pascua railla rafue iaire iacana jira, Jerusalémo Jesús cai diga jaide. Egiptomona cai jaiagai jillobillana comecillena, naie rafue ite. ¹⁴ Rillano, Jusiñamui jofomo diga rana fecarainina ciode. Ucube ollena, nainomo juraretaiai, toica llaudaiai, ucugiai fecauidimaci. Ucubena meidorainidi jiai itimaci. ¹⁵ Naimaci ocainaiai diga naimaci jino jiullena, rao Jesús uanona, iena lleride. Naimaci ucubena judaide. Mesaiana oni caitade. ¹⁶ Ucugiana fecarainimo llote:

—Omo ucugiana jino uño. Cue Moo jofomo ra feca-fecajana jitaiñedicue —llote.

¹⁷ Iemo Jusiñamuina lloraini micoriai ciegafuiana jai comecitica. Iese jaie cueba: “O jofona cue riduamona, jiano cuena meinetaitimaci”. ¹⁸ Nainomo ite judíuai illaicomini dinena raitimaci:

—¿Ñie isoide uaido naimacina jino oredio? Siño rafuena fino, siño uai omo illana cai uñollena. ¹⁹ Jesús uai ote:

—Bicono judai. Darui amani maijiamona iena dane nillana fuidoiticue.

²⁰ Dane raitimaci:

—Cuarentiséis años bicomio maijidimaci, iena finollena. ¿Ñiese iena darui amani illanona, iena dane nillana fuidoitio?

²¹ Iese raitimaci; ia Jesúdi Jusiñamui jofona ñaiñede. Dama ie abina ñaite. Fiodaillamona ie jilloillena ñaite. ²² Jesús fiodaillamona naimie jillua mei, ie llofueoicaiganodicai bie llucinona comecitica. Ie jira naie ciegafuena inotica. Jesús llucinona jiai inotica.

Jesúdi comini comeciaino iticino llwana jitaiñena rafue

²³ Pascua railla rafue facaiseconi Jerusalémo Jesús ia, diga siño rafuena finode. Ie jira ailluena comini naimie uaina inotimaci. Coniniri raitimaci:

—Naimiedi cai Jilloitaraima. ²⁴ —Naganomo comeciaina naimaci facaja jira, naie cominina naimie uñuamona, Jesús naimaci motomo iacaiñede. ²⁵ Naimaci comeciaino iticinuaina naimie eo raise uñua jira, comini rafuena naimiemo bu llwana jitaiñede.

3

Nicodemo Jesús diga ñaia rafue

¹⁻² Judíuai illaicominimona damiedi Nicodemo. Naimiedi fariseo imie. Naiona Jesús dine billanona, raite:

—Maestro, cai cominina llofuellena, Jusiñamui ona orede. Iena uñoticue. Siño rafuena o finua jira, Jusiñamui uai omo illana uñoticue.

³ Jesús dinena uai ote:

—Raise llotio; ia daje rafue omo llotiticue: Uanai omo llotiticue. Dane abido comonori o jeicifenia, Jusiñamui ie cominina sedajanomo jaca initio.

⁴ Nicodemo abido jicanote:

—¿Ñiese eimie ie ei jeraimo dane iite? ¿Ñiese dane comonori jeiciite?

⁵ Jesús uai ote:

—Uanai omo llotiticue. Jusiñamui ie comini sedajanomo o illena, dama o eimona jeicifnellio. Jusiñamui Joreño bu dane comonori comuitañenia, Jusiñamui ie cominina sedajanomo jaca iñeite. ⁶ Comemona cai comuitaia, jaca comedica; iadedi Jusiñamui Joreño cai comuitaiadedi, Jusiñamui uruedica. ⁷ Omo dane llotiticue: Comonori jeicia. Ieri rajicaiñeno. ⁸ Iena o raise cacaillena, jiaie rafuedo iena llotiticue. Aifidi ie jitailla dine sairide. Iena cacadio; iadedi ninena billana uñofedio. Níne jaillana jiai uñofedio. Ie isoide. Níese Jusiñamui Joreño cominina comuitajana jiai uñofedio.

⁹ Nicodemo dane jicanote:

—¿Ñiese biedi dane iite? Raise cacaiñedicue.

¹⁰ Jesús uai ote:

—Jusiñamui rafuena omo: cominina llofuecabitio. Jusiñamui rafuena omo lloticue; ia iena raise cacaiñedio. ¹¹ Uanaicinona omo lloticue. Abi uiñuamona omo lloticue. Cue ciua rafuena lloticue; iadedi cue lluaña inoñedio. ¹² Bene ite rafuena cue lloia, iena inoñediota, monamo ite rafuena cue lloia, iena jiai raise inoñeitio. ¹³ Eniruemona monamo jaca buna jaiñena jira, monamo ite rafuena bu raise uiñoñede. Monamona cue billa jira, nainomo abido jaiticue. Ie muidona nainomo ite rafuena uiñoticue. ¹⁴ Monamona biticue; ia amenamo fiodaiticue. Jofue iñenanomo Moisés micori jao joreño amenamo jaie cuinade. Jaioniai ainillamona comini fiodaiñellena iena cuinade. Comini ie isoi jilloillena, ie isoi cuena coraitimaci. ¹⁵ Cue fiodaillamona bu cue uaina inoia, monamo jaca iite.

Jusiñamuidi cominina eo isiruilla rafue

¹⁶ Jusiñamuidi cominina eo isiruilla jira, comini dine ie damiede Jitona orede. Ie Jitona naimaci inollena, naimiena orede. Naimiena inuamona, monamo jaca itimaci. Jiai faifñeitimaci. ¹⁷ Naimacina duere finotallena ie Jitona oreñede; iadedi naimaci jeacinomona jilloillena, naimiena orede. ¹⁸ Jusiñamuidi Jesús uaina inotinona jaca duere finoñeite; iadedi ie dajede Jitona uaina naimaci inoñena jira, Jusiñamui duere finollicino anamo jai itimaci. ¹⁹ Comini comeciaina lligaiñollena, Jusiñamui Jito bite. Jeacino comeciaino illana naimaci uiñollena, naimaci comeciaina lligaiñuabite; iadedi naimaci comeciai jitiredinomo iacana jira, jearede rafue naimaci finua muidona, naimiena jitañedimaci. Ie jira Jusiñamui naimacimo duere finollicinona anamo jai itimaci. ²⁰ Naimie finoca rafue bai raillano, naga jeacino finoraima ie comeci lligaiñuana jitañede; ²¹ ia Jusiñamui jitaillacinona finodino naimaci finoca rafue baillena, lligaiñotimie dine marefodo bitimaci.

Juan micoridi Jesúsna dane ñaia rafue

²² Digarui illanona, Jesús ie llofueoicaiganodica: diga, Judea railla eniruemo macaricana jaidica: Nainomo diga irui fiebidica: Llofuiamona inotinona bautizacana uitica: ²³⁻²⁴ Nia cárcelmo iñenia, ailluena jinui nainomo illa jira, Enón railla nairaimo bautizajanomo Juan micori jiai ite. Salim railla naira: iairei ite. ²⁵ Naie facaise Juan micori llofueoicaigano judíuai imie diga bautizajana siadotimaci. ²⁶ Ie muidona Juan micori dine billanona, raitimaci:

—Maestro, navui Jordán ruica dine damie billena llotio. Naimiena o bautizallena, o dine navui bite; iadedi birui naimiedi cominina bautizade. Ailluena comini naimie dine jaioidimaci. O dine jai raise biñedimaci.

²⁷ Juan uai ote:

—Jusiñamui ie uai fecañedena, Jusiñamui facaina buna jaca buena finonide. ²⁸ Cue lluaña navui cacadomo: Lloticue: “Cai comini Jilloitara:mañedicue. Cristoñedicue. Naimie billena cue llollena, Jusiñamuidi naimie uicomo cuena orede”. ²⁹ Jiaie rafuedo iena lloticue. Damie ie aina ua mei, dama naimiemo duide. Ie aina ua rafue facaise, naimie nabai iena ciuano, ieri jiai iobide. Ie isoide. Comini cue dine navui biñoidimaci. Birui Jesúsno jaioidimaci. Naimiemo jai duidimaci. Iena cue cacajamona, ieri iobidicue. ³⁰ Comini naimie uai siñona uiñuana jitaidicue. Comini cue jamai bue isoidimiena uiñuana jiai jitaidicue. ³¹ Jamai comedicue. Ie jira eniruemo ite rafuena llocabiticue. Jusiñamuimona Jesús billa jira, cai baifemo faite. ³² Ie Moo illanomo ciua rafuena llote. Ie Moo illanomo cacaja rafue jiai llote; iadedi eo janore comini naimiena inotimaci. ³³ Naimiena inotimiedi Jusiñamui uanaicinona lluaña raise uiñote. ³⁴ Jusiñamuidi ie Joreño ie Jitomo caidiñeno fecaja jira, naimie Jusiñamui uaina llocabite. ³⁵ Jusiñamuidi ie Jitona isiruite. Ie jira naga rafue naimiemo fecade. ³⁶ Bu Jusiñamui Jitona inoia, Jusiñamui illanomo jaca iite; iadedi bu naimiena inoñenia, Jusiñamui illanomo jaca iñeite. Jusiñamui ricaiillafue anamo jai ite.

4

Galileamo Jesús jailla rafue

¹⁻² Naie facaise ailluena comini Jesúsmona fueotimaci. Iemei naimie dibeido bautizadimaci. Naimacina naimie bautizallena, janore comini Juan dine jaide. Jesúsdi bautizañede. Dani ie llofueoicaiganodicaí bautizadicaí. Fariseuai bie rafuena fidiano, iena Jesús uíñua jira, ³ Judeamona Galileamo Jesús cai díga dane abido jaide.

Samaria iñaiño díga Jesús ñaia rafue

⁴ Galileamo jaillena, Jesúsdi Samaria railla enirue dibeido jaiacade. ⁵ Samariumo caí ria, Sicar railla nairaimo iaírei rillano, daje pozomo ridicaí. Naie pozodi Jacob micorí jaie finoca. Jacob micorí naie pozo illano ie jito José micorímo jaie fecade. ⁶ Jitoma naidai itemo, naie pozo fuemo caí rillano, Jesús ana raide. Are macarillanona, jafaici ote. ⁷⁻⁸ Jesús pozomo fiebicailla meinona, Sicarmo jaidicaí, guille ollena. Caí jailla mei, Samaria iñaiñodi jinui ollena, pozomo bite. Jesús naiñaiñomo jicade:

—Jinuina cue ine, cue jirollesa.

⁹ Naiñaiñodi uai ote:

—Judío imiedio. Samaria iñaiñodicue. ¿Ñiese cuemo jinuiña jicadio? —Naiñaiño iese raite, judíuai Samaria comini díga ñairainina jira.

¹⁰ Jesús dinena dane uai ote:

—Jusiñamui omo feaacalle ra uiñotiodena, o díga ñaitimiena uiñotona, cuemo jaca itataite jinuiña cuemo jicadio. Iemei omo iena fecadicue.

¹¹ Naiñaiño uai ote:

—¿Ñiese bie pozomona jinuiña oitio? Eo ana ite. ¿Ñinomona jaca itataite jinuiña oitio?

¹² Caí usuma Jacob micorí bie pozo caímo jaie iñonocaiga. Naiemona naimie micorí jaie jirode. Ie uruíaí micoríaí jaí naiemona jirodimaci. Ie ocainaíaí dajemona jaí jirodimaci. Caí usuma micorí baífemo faiñedio —raite.

¹³ Jesús uai ote:

—Nagamíai bie jinui jirua mei, dane jiroacanite; ¹⁴ iadedi cue fecalle jinuiña jirua mei, dane jiroacaiñenite. Cue fecalle jinui, torafo illa isoi, naimiemo jaca iite. Jusiñamui dine illena, naimiena jaca itataite.

¹⁵ Naiñaiño naimie uai ote:

—Ero, cue dane jiroacaiñellena, bene dane cue biñellena, o lloga jinui cuemo ine.

¹⁶ Jesús dinena uai ote:

—O jofomo mai jaí. O ini díga abido bene bi.

¹⁷ Naiñaiño uai ote:

—Ininidicue.

Jesús dinena uai ote:

—Uanai llotio. Ua ininidio. ¹⁸ Cinco díga inina jaí faicaidio. Birui o díga itimiedi jaí o iniñede. Uanaicinona ua llotio.

¹⁹ Iemona abina uiñocaillamona, naiñaiño dinena uai ote:

—Odi Jusiñamui ie lloraimadio. Iena uiñoticue. ²⁰ Caí jaiagai baí bene ite anedumo Jusiñamuina sedaudimaci. Ie jira nainomo Jusiñamuina nia sedadicaí; iadedi omoi judíuai dinena raitomoi: “Jerusalémo Jusiñamuina caí sedauilla”.

²¹ Jesús dinena dane uai ote:

—Cuena ino. Jaiiruido baí bene ite anedumo caí Moona sedañeitomoi. Jerusalémo naimiena jaí sedañeitomoi. ²² Raise uiñoñoeno Jusiñamuina biruido sedadomoi; iadedi caí nairaimona caí Jilloitaraima illa jira, naimiena raise uiñuana sedadicaí. ²³ Jaiiruido, ua birui, cominidi: “¿Ñinomo Jusiñamuina sedaiticaí?” raillamo comeciaina facañeitimaci. Naimaci comeciái jitaillamona, naimaci illanomo Jusiñamuina ua sedaitimaci. Naie isoide comini naimiena sedajana Jusiñamui jitaide. ²⁴ Jusiñamui comeñede. Naimiedi jafaici. Omoi comeciái jitaillamona naimiena omoi sedajana jitaide.

²⁵ Riño uai ote:

—Cai Jilloitaraïma billena uiñotïcúe. Naimïedi Cristo. Naimïe bia, nana bie isoide rafuena caina raise uiñotaite.

²⁶ Jesús raite:

—Naimïedicúe.

²⁷ Ieconï abïdo ridïcai. Riño ðiga Jesús ñaïa jira, raïjicaidïcai; iadedï: “¿Buena naiñaiño jitaide?” raïllano jïcanoñedicai. “¿Buena ñaitomïco?” raïllano jïai jïcanoñedicai. ²⁸ Ie lleroda pozo ecïmo raïnanocaida, Jesús llua isoï, naïe facaise naiñaiño ie naïraïmo abïdo jaide. Nainomo abïdo rïllanona, naiñaiño comïnïmo llote:

²⁹ —Aïlli pozo fuemo cue jaca cioïraïninamïe ðiga ðafaïfidïcúe. Nana cue finouïga rafue ðïese cuemo llote. Maï, cai jïbuisaïlli. Naimïedi pozo fuemo ite. Nïbai naimïedi cai Jilloitaraïma. Naimïedi nïbai Cristo.

³⁰ Ie jira Jesús ðïne aïlluena comïnï bitïmacï. ³¹ Naïe riño ie naïraï ðïne jaïlla mei, abïdo cai ðïne nïa riñenia, Jesúna raïticaï:

—Maestro, maï guiño.

³² Naimïe uai ote:

—Cuemo guille illana uiñoñedomoï.

³³ Conïnïri siadotïcai:

—Jai nïbai bu ecajaïbiga.

³⁴ Jesús uai ote:

—Jusiñamui cuena oretate. Naimïe jitaïlla rafuena finocana jaïdicúe. Naimïe rafuena cue lluamona, jai guitïcúe isoidïcúe. ³⁵ Comecïna facadomoï: “Jusiñamui uaina nïa lloñeïticaï. Ico iena lloiticaï”. Ie isoide. Illïmo rïara nïa llisïñenia, comecïaïna facadomoï: “Rïara einaillena, naga amaga fïvui fiebite. Naïe facaise maïjïitïcaï”. Omoïmo llotïcúe: Omoï ecïmo eruaï. Rïara jai einaitïe isoide. Naimacïmo Jusiñamui rafue llollena, iena naimacï ñnollena, aïlluena comïnï jai itïmacï. ³⁶ Naïe llisillamo maïjïitïmïedi ie ucubena feïñoïte. Ie isoide. Jusiñamui rafuena ðamïerie llocabïllamona, comïnï iena cacadïmacï. Jïaïno billamona, iena ðane cacajamona, iena ñnotïmacï. Naïe mare rafue lloraïni ïbana feïñoïtïmacï. Jusiñamui ðïbeïmo naimacï ðajena maïjïa jira, ðajena iobitïmacï. ³⁷ Cai comïnï iena raïcabïtïmacï: “ðamïe ïduaïna rïte; ïa jïaïmïe llisillana ote”. ³⁸ Ie isoide. Omoïna oredïcúe, comïnï cue ðïbeïmo itatallena. Naimacïmo cue uaina nano lloñedomoï; iadedï nano jïaïno naimacïmo cue uaina llotïmacï. Ie jira nana omoï llofuiamona cue uaina ñnotïmacï.

³⁹ Samaria ïñaiño lluamona, naiñaiño naïraïmona aïlluena comïnï Jesúna ñnotïmacï. “Naimïedi nana cue finoca rafuena cuemo llote” naimacïmo naiñaiño llote. “Naimïedi cai Jilloitaraïma” raïllanona Jesúna ñnotïmacï. ⁴⁰ Jesús ðïne naimacï rïllanona, naimacï ðiga naimïe fiebillena, Jesúmo jïcanotïmacï. Ie jira Jesús menarui naimacï ðïnomo fiebïde. ⁴¹ Naimïe llofuiamona, jïaïe aïlluena comïnï naimïena ñnotïmacï. ⁴² Riño mo llotïmacï:

—ðañ o lluamona, navui ñnotïcaï; iadedï naimïe uaina cai cacajamona, birui raise ñnotïcaï. Naimïedi comïnï ua Jilloitaraïma.

⁴³ Menarui illanona, nainomona Galïleamo Jesús cai ðiga jaide. ⁴⁴ Caïmo llote:

—Jusiñamuïna lloraïmadi ie naïraï illanomo ïa, naïe comïnï naimïe lluamo cacarefacïañedïmacï; ⁴⁵ iadedï Galïleamo cai rïllanona, nainomo itïno naimïena caïmare feïñotïmacï. Pascua raïlla rafue facaise Jerusalémo nana naimïe finoca rafue navui naimacï cïua jira, naimïena caïmare feïñotïmacï.

Jesúdi illaïcomïnï jïtona jïllotaja rafue

⁴⁶ Galïleamo Jesús cai ðiga macaria, ðane Canámo ridïcai. Nainomo jïnuïmona vino navui finode. Nainomo cai ïa, Capernaum raïlla naïraïmo itïmïe jïto ðuide. Duidïmïe moodï gobierno ðiga maïjïuide. ⁴⁷ Judeamona Galïleamo Jesús illana naimïe fïðïano,

Canámo bite. Jesús illanomo billena, ie jito jai fiódaiacana jira, ie jítóna jillótallena Jesúmo duere jicánote. ⁴⁸ Jesús naimiemo llote:

—Siño rafuena omo: cioiñenia, cuena ñnoñedomoi.

⁴⁹ Uai ote:

—Maestro, cue diga bi, cue jito fiódaiñellesa.

⁵⁰ Jesús uai ote:

—Mai jai. O jito jai fiódaiñeite —llote. Naie ñima Jesús uaina ñnuano, ie jofomo abido jaide. ⁵¹ Naisóna naimie jaidemo, ie mullaia: diga afeedo beici dafaifide. Llotimaci:

—O jito jai jillode.

⁵² Ie jira naimie jicánote:

—¿Ñino jítoma ítemo, jillode?

Uai otimaci:

—Navui are jítoma oni llua: caidemo, ab: cuarillad: fañnonocáide.

⁵³ Ie comecina facade: “Navui are naie facaise Jesús cuemo llote: ‘O jito jai jillode’ ”. Ie mullaia: llua: cacajamona, naimied: Jesús: ca: jilloitaramana ñnote. Nana naimie jofomo itino jia: ñnotimaci. ⁵⁴ Judeamona Galileamo Jesús abido billano, siño rafuena íese jai finode.

5

Joraibimo tsitaitimie jillua rafue

¹ Digarui illa mei, ca: judíua: rafue íacana jira, Jerusalémo Jesús abido jaide. ² Jerusalémo toica llaudaia: jaisoilla nase facaimo joraibi íte. Ca: judíua: uaimona nai joraibi mamecidi Betesda. Naie jorai fuedo íte cinco jifocotia: ³ Nainomo diga duidino bídimaci: uisínidimaci, ñuja-ñujacaidino, tsitaitino. Jínuina begollena sedadimaci. ⁴ Feide isoidemona dacaiño Jusíñamui jaienid: jínuina begotallena bite. Iemei nai jínuimo nano jaidimie íe duicomona jillode. ⁵ Duidino motomo tsitaitimie íte. Treintiocho años duide. ⁶ Naimiena ciuano, naimie are duillana uíñuamona, Jesús naimiemo jicánote:

—¿Jilloiacadio?

⁷ Duidimie uai ote:

—Ji: íadedi jínuina begoia, jaca buna íñede cue canoítene. Ie jira jiaimied: cue uicodo jínuimo jaide. Ie jirari nia jilloñedicue.

⁸ Jesús uai ote:

—Mai naídaca: O bíra ferinocáida macari.

⁹ Iecon: naimie jillode. Ie bíra ferianona oni jai macarite.

Sábadoruimo duidimie jilloitajana siadua rafue

Sábadoruimo, judíua: jafaici ouillaruímo, naimie jillode. ¹⁰ Ie jira judíua: illaicomínid: jillodimie mo llote:

—Birui sábado. O bíra abinocáida o uilla jira, Moisés micor: rairuica rana jai finodio. Sábadomo ma:jinidica: Birui jafaici uaruimo jaca buena jetanidica:.

¹¹ Naimie uai ote:

—Cuena jilloitatimie cuemo llote: “O bíra mai ferinocáida macari”.

¹² Judíua: dínen: jicánote:

—¿Bu íena omo llote? —Naimie uíñoñena jira, uai ñede.

¹³ Jesús: comín: motomo ítabilla jira, ailluena comín: illa jira, jai jillodimie íe jilloitatimiena uíñoñede. ¹⁴ Ie meinocon: dallu illanona, Jusíñamui jofomo Jesús dínen: naimiena baite. Llote:

—Jai jillodio. Abido dane eo duere o sefuisa, dane jeacínona finóñeno.

¹⁵ Ie mei judíua: illaicomínimo jillodimie lluaide. Llote:

—Jesús raillamie cuena jillotate.

¹⁶ Sábadoruimo Jesús bie rafuena finua jira, judíuai illaicomini naimiena duere finoacasite. ¹⁷ Jesúsdi abina riduano llote:

—Cue Moodi ie jitailla rafue jaca finode. Ie isoi cue jitailla rafue finocana jaca jaidicue —llote. ¹⁸ Sábadoruimo naimacimona Jesús maijia jira: “Jusiñamuidi cue Moo” naimie railla jira: “Jusiñamuidicue” naimie railla jira, judíuai illaicomini naimie meinellena eo jitaidimaci.

Jesús ie Moo isoi finua rafue

¹⁹ Naimacimo Jesús llote:

—Uanaicinona lloticue. Buena dama finonidicue. Cue Moo finua rafuena cuano finocabidicue. Cue Moo finua isoi finodicue. ²⁰ Cue Moo cuena isiruillanona, nana ie finoca rafuena cuena jai uiñotade. Naimie Jitona cue illa jira, bie imana cue jilloitaja baifemo jiaie siño rafuena finoiticue, omoi rajicaillena. ²¹ Fiodaitinona jilloitallena, cue Moomo ie uai ite. Naie uai cuemo jiai ite. ²² Cue Moo juez isoi naimie inoñedinomo lloñeite; iadedi naimacimo juez isoi cue llollena, naimaci duere sefuillena, ie uai cuemo iga. ²³ Omoi dine naimie cuena oretate. Naimiedi omoi cuena iobitajana jitaide, naimiena omoi iobitaja isoi. Cuena omoi iobitañenia, cue Moona jiai iobitañedomoi. ²⁴ Uanaicinona lloticue. Cue uaina bu cacaia, cuena oretatimiena bu inoia, monamo jaca iite. Jearede rafue naimie finua facaina duere sefuiñeite. Faifiñeite; ia monamo Jusiñamui diga jaca iite. ²⁵ Uanaicino lloticue. Jusiñamui Jitodicue. Ua birui cuena inoñedino cue uaina cacareitimaci. Cuena cacajamona, cuena inuamona, jaca iitimaci. ²⁶ Cominina jaca itatallena, cue Moomo uai ite. Comini jaca itatallena, cuemo ie uai jiai iga. ²⁷ Cuena inoñedinomo juez isoi cue llollena, naimiemo cue duillamona, ie uai cuemo jiai iga. ²⁸ Ieri rajicaifieno. Jiaruido nana jai fiodaitino diese cue lluaana cacaitimaci. ²⁹ Fiodaillamona naimaci abiai jilloitimaci. Ie mei cue jitaillacinona finodino jaca illena lloticue. Cue jitaillacinona finoñedino diese duere sefuillena lloticue. ³⁰ Naimacimo cuena oretatimie jitailla isoi lloticue. Dama cue comecimo ite rafuena cue lloñena jira, bie llucacimodi uanaicino.

Jusiñamui ie Jito uaina comini inoñena rafue

³¹⁻³² Jesús nia llote:

—Dama cue abina cue lloiadedi, bu cuena jaca inoñede; iadedi Jusiñamui cue facaina jiai llote. Naimie llucacino uanaicino. Iena uiñoticue. ³³ Naimiena cacareillena, Juan Bautista micori dine cominina navui oretatomo. Abido naimaci bia, naimaci cacaja rafuena omoimo llollena, naimacina oretatomo. Juan llucacimodi uanaicino. ³⁴ Naimie micori cue rafuena llouide; iadedi naimie micori llogacimomo omoi comeci eo facajana birui jitaifnedicue. Cuena omoi inollena, naimie mamecina jai llinoticue. ³⁵ Lamparín raise lligaiñua isoi, ie rafuedo Juan micori omoi comeciaino iticinona raise uiñotade. Dallu ieri iobidomo. ³⁶ Cue finoca rafue Juan micori finoca rafue baifemo faite. Cue siño finoca rafuena ñaiticue. Cuena naimie oretajamona, cue Moo uaido iena finodicue. Ie jira naiemona naimie dinena cue billana jai uiñotomo. ³⁷ Cue finoca rafue muidona cuena uiñotomo; iadedi naimie lluaana jaca cacaiñedomoi. Naimiena jiai jaca cioiñedomoi. ³⁸ Cuena omoi inoñena jira, naimie uaina feiñoñedomoi. ³⁹ Jusiñamui dine omoi rillena, Jusiñamui facaina lloraini micoriai ciegafuiaina facacabidomo. Naifuiaidi cuena ñaite; ⁴⁰ iadedi Jusiñamui dine omoi rillena, cue uaina inoiacaiñedomoi. ⁴¹ Cuemo iobillacinona omoi fecallena sedañedicue. ⁴² Jusiñamuina isiruiñedomoi. Iena uiñoticue. ⁴³ Cue Moo mamecido cue billanona, cuena feiñoñedomoi; iadedi dama ie mamecido jiamie bia, naimiena feiñoitomo. ⁴⁴ Jaca inoiacaiñedomoi. Iobillacino coninimo fecadomo; iadedi ua Jusiñamuidi omoina “Mare” raillana jitaifnedomo. ⁴⁵ “Cue Moomo omoi marañede finoca rafuena lloticue” raillanomo comeciaina facañeno. Moisés micori ciegafuiaimo omoi llogiduafue jai ite. Moisés micori ciegafuiaimuidona Jusiñamui dine omoi jaca

illemo ocuridomoi. ⁴⁶ Moisés micorí ciegafuina inotomoina, cuena naimie micorí cuia jira, cuena jiaí inoitomoi. ⁴⁷ Naimie ciegafuina inoñedomoi. Ie jira cuena jiaí inoñeitomoi —llote.

6

Jesús cinco llomenicomona ailluena cominina ecaja rafue

(Mt 14.13-21; Mr 6.30-44; Lc 9.10-17)

¹ Jiaí ruidio Galilea railla jorai ie ruica díbeimo Jesús ie llofueoicaiganodícaí díga jaide. Naie joraidí jiaí Tiberiana mameciredede. ² Duidinona naimie jillotauillana naimaci ciua jira, ailluena comini naimiena racadimaci. ³⁻⁴ Naie facaiseconi pascua railla rafuedí jai iaire ite. Jesús caí díga anedumo a jaillanona, dinomo ana raide. ⁵ Oni erodatemo, ailluena comini naimie díne billana ciode. Felipemo jicanote:

—Naimaci guillena, ¿ninomona llomeniconona oiticaí?

⁶ Naimiena facacillena, iena jicanote; iadedí Jesús ie finolle rana jai uíñote. ⁷ Felipe uai ote:

—Janore naimaci guillena, doscientos dígarui ie majia ucube díese llomenico oiticaína, baiñede.

⁸ Naie facaise caimona damie iena cacade. Naimiedí Simón Pedro ama. Andréna mameciredede. Naimie raite:

⁹ —Cinco cebadamonona finoca jenide llomenico daje uruemo bene ite. Mena lliciaí jiaí naimiemo ite; ia ¿niese nibaiticaí? Baiñeite.

¹⁰ Jesús caimo llote:

—Cominimo llono, ana imaci raillesa.

Ie jira raitire illanomo ana raídímací. Cinco mil iñiaí itímací. ¹¹ Llomeniconona Jesús ua meinoconi, Jusiñamuimo iobillacinona fecajano, Jusiñamuimo jíde. Iemei cominimo caína naie llomeniconona fecatate. Comini jitailla díerise lliciaí daje isoi fecatate. ¹² Naimaci monillamonona, caimo Jesús llote:

—Buena jaca faifíñellena, fiebide guille danomo irai.

¹³ Ie jira iena iraidícaí. Naie cinco llomenicomona, comini guigamonona fiebidemonona, doce cirigaíaimo oruitatícaí. ¹⁴ Jesús finoca rafuena naie cominidí ciuanona, llotímací:

—Jusiñamui facaina lloraini micoriaidí caí Jilloitaraima íco billena jaie llotímací. Bimiedí naimie.

¹⁵ Naimaci illaimana naimie illena, naimiena gaitacadimaci. Iena naimie uíñua jira, iena naimie jitaíñena jira, aneduaímo naimie oni jaide.

Capernaumo Jesús abido jailla rafue

(Mt 14.22-27; Mr 6.45-52)

¹⁶ Jitoma ana ítemo, jai navuidemo, ie llofueoicaiganodícaí joraimo jaidícaí. ¹⁷ Caí botemo caí jaillano, ruica Capernaumo jaiacadícaí; iadedí Jesús nia biñede. Jesúsna sedadícaímo, naimie biñena jirari, jai jítirena facaiseconi jai jaidícaí. ¹⁸ Ríire aífí illa jira, jorai eo bagode. ¹⁹ Nibai cinco, nibai seis kilómetros jaidícaímo, damie caí díne jinui emododo billana ciodícaí. Bote díne naimie billana ciuanona, jacinaitícaí. ²⁰ Jesús caimo llote:

—Jesúdicuesa. Jacinaiñeno.

²¹ Iena cacajanona, botemo naimiena a billana jitaídícaí. Ieconí ruica díne caí jaiacananomo ridícaí.

Comini Jesúsna jenua rafue

²²⁻²⁴ Caí jailla mei, daje bote nairuido illa jira, jinafomo fiebidino Jesús caí díga jaiñenana uíñotímací. Caí Nama ie Moomo iobillacinona fecajanomo, cominimo guille fecajanomo, Tiberiamona dajerie botes naie facaise iaire bite. Monaidemo, Jesúsna

naimaci cioñena jira, cai jiai iñena jira, naie botiaido Capernaumo Jesúna jenollena, jaidimaci.

Jesús: “Llomenicodicue” railla rafue

²⁵ Ruica dine Jesúna comini baillanona, jicanotimaci:

—¿Niruido bene ridio? ²⁶ Jesús uai ote:

—Navui are omoína cue ecajamona, iemona omoi monillamona, cuena jenodomoí. Siño rafuena cue finuana ciodomoi; iadedi cuena nia inoñedomoi. ²⁷ Guille raire cueicabide. Cueiruide ramo comeciaina eo facañeno. Cueiruiñede ramo comeciaina eo faca. Jusiñamui diga omoi jaca illemo comeciaina eo faca. Cue Moo Jusiñamui, imana cue jaillena, cuena oretate. Ie uai cuemo illanona, cue uaina omoi inuamona, Jusiñamui diga jaca iitomoí.

²⁸ Jicanotimaci:

—Nia Jusiñamui dibeimo iticaina, ¿nie isoidifue finodicaina mare?

²⁹ Jesús uai ote:

—Naimie oretagamie uaina omoi inuana jitaide.

³⁰ Naimaci dinena dane jicanotimaci:

—¿Nie isoide rafuena finoitio? iena cai ciuano, o uaina cai inollesa. ³¹ Cai jaiagai jofue iñenanomo Jusiñamuimona bite guilla ra guisoidimaci. Moisés micori iena jaie cueda: “Jusiñamuimona bite guiga ra naimacimo nagarui fecauide”. Iemo jiai birui ocuiridicai. Naie isoide siño rafuena o finuana jiai cioacadicaí —llotimaci.

³² Jesús uai ote:

—Uanai lloticue. Moisés micori naie guiga ra jaca fecañede. Cue Moo iena fecauide. Birui naimiedi monamona bite ua llomenicono omoi jai fecaacade. ³³ Jusiñamui fecaacalle llomenico monamona jai bite. Comini iena guillamona, jaca iitimaci.

³⁴ Llotimaci:

—Nagarui caimo bie isoide llomenicono feca.

³⁵ Jesús uai ote:

—Llomenico guillamona iticai. Omoi llomenico isoidicue. Cuena inuamona, monamo jaca iitomoí. Cuena inotimie dane aimetañeite. Cuena isiruitimie jaca dane jiroacaiñenite. —Iese llote; ia naimaci comeciaina ñaite. Naimaci comeciai jitaillacino naimacimo jaca illena ñaite—. ³⁶ Cuena ciodomoi; iadedi cuena inoñedomoi. ³⁷ Nana cue dibeimo cue Moo itatallinodi cuena inoitimaci. Cuemona naimacina jaca oni dotañeiticue. ³⁸ Cuena oretatimie ie jitailla rafuena finollena, monamona jai biticue. Dama cue jitailla rafuena finoiticuena biñedicue. ³⁹ Cuena oretatimiedi cue dibeimo itatallinomona buna faifillana jitañede. Jusiñamui lluaruimo fiodaillamona nana naimaci abiaína cue jilloitajana jiai jitaide. ⁴⁰ Jusiñamui Jitona cue illana bu inoia, cuena bu inoia, monamo jaca iite. Jusiñamui lllorruimo fiodaillamona naimie abina jillotaiticue. Iese cue Moo jitaide.

⁴¹ Jesús: “Monamona bite llomenicodicue” railla jira, judíuai illaicominidi naimie uaina jamaillano inosiñede. ⁴² Raitimaci:

—Bimiedi Jesús. José jito. Ie moona uiñoticaí. Ie eina jiai uiñoticaí. ¿Niese naimiedi: “Monamona biticue” raite?

⁴³ Jesús uai ote:

—Iese omoi naiñeno. ⁴⁴ Naimiena cue Moo inotañenia, bu cuena inonide. Cuena bu inoñenia, Jusiñamui lllorruimo fiodaillamona naimie abina jillotaiticue. ⁴⁵ Jusiñamuina lloraini micoriai jaie iena cuetimaci: “Jusiñamuidi nana cominina ico llofueite” cuetimaci. Birui naie rafue jai suide. Naga cue Moomo cacarefidimie, naga cue Moomona fueotimie cuena jiai inoite. ⁴⁶ Buna cue Moona jaca cioñede. Naimiemona cue billamona, dama cue cúa. ⁴⁷ Uanaicinona lloticue. Cue uaina inotimie monamo jaca iite.

⁴⁸ Jesús dane llote:

—Llomenico guillamona iticai. Omoi llomenico isoidicue. Cuen a #nuamona, monamo jaca iitomoi. ⁴⁹ Jofue iñenanomo omoi jaiagai Jusiñamuimona bite rana guisoidimaci; iadedi fiodaitimaci. ⁵⁰ Birui jiaie guille ra ite. Monamona ite. Iena bu guia, monamo jaca iite. ⁵¹ Bie llomenicodi cue. Monamo cominina jaca itatallena, monamona biticue. Bu bie isoide llomenicon a guia, jaca iite. Bie llomenicodi cue abi. Comini facaina fiodaiticue.

⁵² Iena cacajano, judíuai illaicomini coniniri naiena siadotimaci. Raitimaci:

—¿Ñiese bimie abina riiticaí?

⁵³ Ie jira Jesús dinena raite:

—Uanai lloticue. Cue abina omoi riñenia, cue diruena omoi riñenia, cue Moo diga jaca iñeitomoi. ⁵⁴ Bu cue abina ríia, bu cue diruena ríia, cue Moo diga jaca iite. Fiodaillamona naimie abi iirairuimo jillotaiticue. ⁵⁵ Cue abidi ua rille. Cue diruedi ua rille. ⁵⁶ Bu cue abina ríia, bu cue diruena ríia, cuena nabaide. Naimiena jiai nabaidicue. ⁵⁷ Cue Moo cuena orede. Naimiedi jaca ite. Cue Moo jaca illa jira, cue jaca iticue. Daje isoide. Bu cue abina ríia, cue illamona, naimie jiai iite. ⁵⁸ Bie isoide guille ra monamona jai bite. Omoi jaiagai jai guiga ra isoíñede. Jai fiodaitimaci; iadedi bie guille ra birui bu guia monamo jaca iite. —Iese llote; iadedi naimie fiodaillamona, naimiena comini #nuamona, Jusiñamui diga naimaci jaca illena ñaite.

⁵⁹ Capernaumo judíuai ofiracomo Jesús biena llote.

Jesús diga jaisoidino naimie llua na siadua rafue

⁶⁰ Jesús diga jaisoidino naimie llua na cacajano, coniniri siadotimaci:

—Bie llua eo irirede. Bu iena cacaiñede.

⁶¹ Jesúsdi naimaci iese siaduana uiñote. Ie jira llote:

—Cue llua na raise #noñedomoi. ⁶² Jusiñamuimona imana jaillena jai biticue. Monamo abido ico cue jaillena cioitomoina, iena jiai nbaí raise #noñeitomoi. ⁶³ Cai joreño caimo illamona, iticai. Dani cai abi diga iñedicaí. Ie isoide. Cue llogacino Jusiñamuimo duide. Iena omoi #nuamona, jaca iitomoi; ⁶⁴ ia omoimona nana #noñedomoi —llote. Nano dofoconimona Jesúsdi naimiena #noñedinona uiñote. Naimiena gaitataitimiena jiai uiñote.

⁶⁵ Jesús dane llote:

—Ie jira omoimo lloticue: Cue Moo jitañenia, cuena jaca bu #nonide.

⁶⁶ Iena cacajano, Jesús diga jaisoidinomona, diga comini naimiena fañonocaidimaci.

⁶⁷ Ie jira ie doce llofueoicaiganodicaímo Jesús jicanote:

—¿Jiai cuena fañonocaida, abido jaitomoi?

⁶⁸ Simón Pedro uai ote:

—Nama, o diga cai jaiñenia, ¿bu diga jaiticaí? Jusiñamuimo cai rillena, o isoi Jillotaraíma iñede. Jaiñiemmo jaca itatajaracinodi iñede. ⁶⁹ O llua na jai #noticaí. Jusiñamui mare Jitodio. Iena uiñoticaí.

⁷⁰ Jesús dane uai ote:

—Doce digamie fetocaomoi; iadedi omoimona damie Taifemo jainaiide —llote.

⁷¹ Caímona Judas Iscariote micorina ñaite. Judas micori Jesúsna gaitataiacadimie.

7

Jesús amatiaí naimiena #noñena rafue

¹ Jaiiruido Galileamo ite nairaiáimo Jesús macarite. Judíuai illaicomini naimiena meineiacana jira, Judeamo jaiñede. ² Jifocotiaíai railla rafue iaíre ite. Judíuai ie rafue.

³ Ie jira Jesús amatiaí naimiemmo llote:

—O diga jaicabidino o finua rafuena raise cioillena, beno fañonocaida, Judeamo jai.

⁴ Bu ie mameci are soriacania, bainino majirainina. Ie isoide. Siño rafuena o finoia, ailluena comini illa motomo iena fino.

⁵ Jesús amatiai naimiena inoñena jira, iese raite. ⁶ Jesús dinena uai ote:

—Jerusalémo nia jaiñeiticue; iadedi nainomo omoi jaiacalliruido omoi jai. ⁷ Comini omoína enoñedimaci. Naimaci finoca jearede rafuena cue llua jira, cuena jaca enoidimaci. ⁸ Jerusalémo rafuemo jai. Cue jaillirui nia riñena jira, nia jaiñeiticue. ⁹ —Iese lluaño, Galileamo naimie fiebide.

¹⁰ Naimie amatiai rafuemo jailla mei, Jesúsdi naimaci jinafona dama bainino jaide.

¹¹ Nai rafuemo judíuai illaicomini Jesúsna jenuano baiñenano, cominimo jicanotimaci:

—¿Ninomo naimie ite? —Uiñoñena jira, comini uai oñedimaci.

¹² Nainomo ailluena comini itimaci. Comini illa motomo naimiena anado siadoside. Jiaño dinena: “Naimiedi mare” raitimaci. Jiaño dinena: “Naimiedi cominina jifuate” raitimaci. ¹³ Judíuai illaicominina iciana comini jaciruillanona, anado siadoside. Jesúsna marefodo buna ñaiñede.

Sábadoruimo Jesús maijia rafue

¹⁴ Jifocotiaiai railla rafue atuedo fuitemo, Jesús Jusiñamui jofomo jaillano, llofuate.

¹⁵ Illaicomini naimie llofuiamona rajicaidimaci:

—¿Niese naimie abi uiñote? Eo rafuena uiñotimiemona jaca fueoñede —raitimaci.

¹⁶ Jesús uai ote:

—Dama cuemona oñega cue llofuiacinodi. Cuena oretatimie ie. ¹⁷ Jusiñamui jitail-lacinona finoiacadimiedi ninomona cue llofuiacinona cue uana uiñoite. Jusiñamuiamona cue uana uiñoite. Dama cue comecimona cue oñenana jiai uiñoite. ¹⁸ Bu dama ie comecimona ie llofuiacinona uanona lloia, naimiedi comini naimiemo iobillacinona fecajana jitaide; iadedi bu ie oretatimiena iobitaia, uana lote. Marañedicinona finoñede. ¹⁹ Moisés micori Jusiñamui uaina jaie lote; iadedi birui naie llogacinuaina nia raise inoñedomoi. Iena raise inotomoidena, cuena niade meineiacañedomoi.

²⁰ Comini dinena uai ote:

—Ñibai uairitaidio. ¿Bu ona meineiacade?

²¹ Jesús uai ote:

—Dacaiño sábadoruimo damiena jillotaticue. Ie jira cue uaina uaitatomo.

²² Sábadoruimo jiai maijicabidomo. Moisés micori isaiai abiai diana omoimo jaie lote; iadedi naimie micori naiena nano lloñede. Naimie micori usumatiai naiena nano llotimaci. Sábadoruimo isana abi dellirui ia, detomo. ²³ Moisés micori llogacinona inollena, sábadoruimo isaiana detomo. Sábadoruimo imana raise jillotaticuemo, ¿bue ñellena cue diga iciritomo? ²⁴ Cominimo jamai eruaillanona, naimacina jeare ñaiñeno; ia naimaci finoca rafuena raise uiñuamona, naimacimo comecina faca. Cue finoca rafuemo comecina faca.

Jesúna comini siadua rafue

²⁵ Ie jira Jerusalémo itinno coniniri siadotimaci:

—Illaicomini bimiena meineiacadimaci; ²⁶ iadedi beno marefodo naimie llofuate. Jaca buena lloñedimaci. Illaicominidi: “Bimiedi cai Jilloitaraíma” raillano ñibai comeciaina facadimaci. ²⁷ Bimie ie billanona cai uiñua jira, naimiedi cai Jilloitaraímañedimie. Cai Jilloitaraíma baireia, jaca budi naimie billanona uiñoñeite —siadotimaci.

²⁸ Ie jira Jesús Jusiñamui jofomo naimie llofuiano lote:

—Cuena uiñotomo. Ninena cue billana jiai uiñotomo. Cue jitailla jira biñedicue; iadedi jaimie cuena oretate. Naimiedi uana lote. Naimiena uiñoñedomoi. ²⁹ Naimiemona cue billa jira, naimiena uiñotocue. Cuena oretate —lote.

³⁰ Ie jira illaicomini Jesúsna gaitaacadimaci; iadedi naimie fiódaille facaise nia riñena jira, buna naimiena gaitañede. ³¹ Nairui ailluena comini naimie uaina inotimaci. Raitimaci:

—Cai Jilloitaraíma bia, ¿niese naimiedi bimie baifemo jiaie rafuena finoite?

Jesúna gaitaiacana rafue

³² Fariseuaidi comini iese ñaiana cacajano, Jesúna gaitallena, Jusiñamui diga nanoca ñairainidi ailluena policiana orede. ³³ Ie jira naimacina Jesús dinena raite:

—Dallu omoi diga nia iiticue. Ie mei cuena oretatimie dine abido jaiticue. ³⁴ Cuena jenoitomo; iadedi cuena baiñeitomo;. Cue dine binitomo;.

³⁵ Ie jira nainomo ite illaicomini dani siadotimaci:

—¿Ñine jaite? ¿Ñiese naimiena baiñeitica;? Judíuaiñedinona llofuellena, jiaie eniruemo cai comini dine nibai jaite. ³⁶ ¿Ñiese naimie raite: “Cuena jenoitomo; iadedi cuena baiñeitomo;”? ¿Ñiese raite: “Cue dine binitomo;”? —iese siadotimaci.

Jesúdi Jusiñamui Joreña ñaia rafue

³⁷ Jifocotiaiai railla rafue fuillarumo, ua rafue ie nairumo, Jusiñamui jofomo itinomo Jesús ado llote:

—Bu jiroacania, cue dine bi. ³⁸ Jusiñamui facaina lloraini micoriai jaie cuega: “Naimiena ñnotimie comecimo jaca itatate jinui isoi iite, torafomona jinui tonooilla isoi”.

³⁹ Jesúdi iese llote; ia Jusiñamui Joreña ñaite. Jusúna ñnotinomo Jusiñamuidi ie Joreña ico illena ñaite. Jesús nia fioidañena jira, iena nia iñega.

Comini Jesúna dane siadua rafue

⁴⁰ Jesús lluaana comini cacajano, raitimaci:

—Jusiñamui facaina lloraini micoriai Jusiñamui facaina lloraima ico billena jaie llotimaci. “Cristo nia baireñena, naimie biite” llotimaci. Bimiedi naimie.

⁴¹ Jiaino raitimaci:

—Naimiedi cai Jilloitaraima. Naimiedi Cristo.

Jiaino raitimaci:

—Cai Jilloitaraima Galileamona biñeite. ⁴² Jusiñamui facaina lloraima micori cuega: “Cai Jilloitaraimadi David micori jito. Belémo David micori illanomo jeicille”.

⁴³ Ie jira daje isoi naimiemo comeciaina facañedimaci. ⁴⁴ Jiaino naimiena gaitaacadimaci; iadedi buna naimiena jetañede.

Judíuai illaicomini Jesúna ñnoñena rafue

⁴⁵ Ie mei policías naimaci illaicomini dine abido jaidimaci. Fariseuai dinena jicanotimaci:

—¿Bue ñellena Jesúna atiñedomoi?

⁴⁶ Policías dinena uai ote:

—Naimie llofua isoi jaca buna llofueñede. Iena jacinailanona, naimiena atiñedica;.

⁴⁷ Fariseuai dane llotimaci:

—Cominina jifua isoi, omoina jiai jifue. ⁴⁸ Cai illaicomini dinena naimiena jaca ñnoñedica;. Moisés micori llogacinodo raise jaidica; ⁴⁹ ia Jesús llofuiana cacadino Moisés micori llogacinuaido jaca raise jaiñedimaci. Ie jira jaca faifitimacisa.

⁵⁰ Naie illaicominimona Nicodemo raillamie ite. Naimie naiona Jesús dine navui jaide. Fariseo imie. ⁵¹ Jesúna riiduanona, naimie llote:

—Cai einamaci llocabitimaci: “Bu duere cai finoacania, nano naimie llamo cacarefitica;. Jearede rafue naimie finuana cacareillano, naimiena duere finoitica;”. Iena cai cacaiñena, naimiena duere finoñeitica;.

⁵² Nicodemomo llotimaci:

—Galileamona bitino isoi ñaitio. Naimie llofuegamiena nibai jai jaiacadio. Jiaie cuega-fuiaina raise faca. Jusiñamui facaina lloraini micoriaidi cai nairaina Jilloitaraima Galileamona billena jaie cueñedimaci. Bie Jesús raillamiedi cai nairaina Jilloitaraimañedimie.

⁵³ Ie meinoconi damierie imaci jofomo jaidimaci.

8

Ie ñiñede ñima diga riñodi rafuetailla ie rafue

¹ Naie facaise Jesúsdi Olivos railla anedumo jaide. ² Ie areruido jítiramo Jusiñamui jofomo abido dane jaide. Ailluena comini naimie dine billa jira, naimie ana raíta, naimacina llofuete. ³ Naie facaise Moisés micori llogacinona llofuerainimona dajerie bitimaci. Fariseuaimona dajerie jiai bitimaci. Daje riño atidimaci. Ie iniñede ima diga naiñaiñona jai eida timaci. Comini illa uicomo atiano, ⁴ Jesúsimo llotimaci:

—Llofueraima, biñaiño ie iniñede ima diga eida ticai. ⁵ Moisés micori jaie cuega: “Bie isoidiñaiñodi nofici diga fairinoga, meinellena”. ¿Niese naiñaiñona o raitio?

⁶ Naimiena facacillena, naimie raise uai oñenia, naimiena llogidollena, iese jicanotimaci. Iena cacajano, Jesús ana jítadacaida, eniruemo ie onocai diga cuete.

⁷ Naimiemo diga icaiño jica-jicanuano, naimie naidacaida, naimacimo llote:

—Omoimona jeacino iñedimie naiñaiñomo nano noficina fairino.

⁸ Dane ana jítadacaida, eniruemo dane cuete. ⁹ Naimie lluaana cacajano, dajerie jino jaidimaci. Nano eo einamacidi jino jaidimaci. Ie mei conirueni jino jaidimaci. Nana comini tuua mei, nainomo Jesús fiebide, naie riño diga ñaillena. ¹⁰ Eruaillano naiñaiñomo jicanote:

—¿Ni nai o llogidotino?

¹¹ Naiñaiño uai ote:

—Jaca iñedimaci. Cuena jai llogidoiacaiñedimaci.

Jesús uai ote:

—Jiai ona duere finoñeiticue. Mai jai. Jeacino dane finoñeno.

Jesúdi comini comeciai lligaiñua rafue

¹² Jesúsdi cominina dane llofuianona, raite:

—Jeacino oni jaillena, comini comecaina lligaiñoticue. Cuena inotimie jítiredinomo jaca iñeite. Jeacino anamo jai iñedimie Jusiñamui diga ico jaca iite.

¹³ Fariseuai dinena uai otimaci:

—Dama o abina ñaitio. Ie jirari uanaicinona lloñedio.

¹⁴ Jesús uai ote:

—Dama cue abina lloticue; iadedi uanaicinona lloticue. Ninena cue billanona uiñoticue. Nine cue jaillinona jiai uiñoticue. Ninena cue billanona uiñoñedomoi. Nine cue jaillinona jiai uiñoñedomoi. ¹⁵ Abi raise uiñoñeno cuena jeare ñaitomoi. Iese omoína ñaiñedicue; ¹⁶ iadedi omoína cue ñaia, uanaicinona lloticue. Dama cue uaina omoína lloñedicue. Cuena oretatimie omoína jiai llote. ¹⁷ Moisés micori iena jiai jaie cuega: “Menamie daje isoi lloia, naie iaímaiaí llucinodi omoi inua” cuega. ¹⁸ Cue facaina lollena, menamie jai ite. Cue facaina lloticue. Cue Moo cue facaina jiai llote.

¹⁹ Fariseuai dinena jicanote:

—¿Ni o moo?

Jesúdi uai ote:

—Cuena uiñoñedomoi. Cue Moona jiai uiñoñedomoi. Cuena uiñotomoi, cue Moona jiai uiñotomoi.

²⁰ Jusiñamui jofomo ucube eenoracomo bicinona siadotimaci. Jesús fiodaille facaise nia riñena jira, jaca buna naimiena gaítañede.

Jesúna comini inoñenia, naie jeacino diga fiodailla rafue

²¹ Naimacimo Jesús dane llote:

—Ico oni jaiticue. Cuena jenoitomoi; iadedi cuena baiñeitomoi. Na omoimo jeacino nia itemo, fiodaitomoi. Cue jaillinomo jainitomoi.

²² Ie jira judíuai illaicomini dinena iena siadotimaci:

—Dama ie abina meineite.

“Cue jaillinomo jainitomoi” Jesús railla jira, iese siadotimaci.

²³ Jesúsdi uai ote:

—Jusiñamuimo ite rafuemo duiñedomoi. Naimiemo ite rafuemo duidicue. Naimie dibeimo iñedomoi; ia naimie dibeimo iticue. ²⁴ Cue Jusiñamui Jitonana omoi ñnoñena jira, na omoi jeacino diga fioidaitomoi.

²⁵ Jicanoside:

—¿Budío?

Jesús uai ote:

—Nano omoi motomo cue illamona bumiedicuena omoi na raicabiticue. ²⁶ Diga rafue omoi mo lloiacadicue. Marañede rafuena omoi finuana omoi mo nia lloiacadicue; iadedi omoi mo cuena oretatimie uaina dama lloticue. Nai uaidi uanaicino —llote.

²⁷ Naimiedi ie Moo Jusiñamuina llote; iadedi cacañedimaci. ²⁸ Ie jira Jesús llote:

—Cuena omoi meinia mei, bumiedicuena uiñoitomoi. Cue uaido dama lloñedicue; iadedi cue Moo cue llofua uaido llocabiticue. ²⁹ Cuena oretatimie cue diga ite. Naimie jitailla rafuena cue finua jira, cuena fainonocañede.

³⁰ Iese Jesús llotemo, diga illaicomini naimie uaina como ñnoiacadimaci.

Comini Taiñe anamo illa rafue

³¹ Jesúsdi naimie uaina como ñnoiacadinomo llote:

—Cue llua ñnocana omoi jaia, cue ua cominidomoi. ³² Uanaicinona uiñoitomoi. Ie mei jiaimie anamo dane iñeitomoi.

³³ Uai otimaci:

—Abraham micori ie uruiaidicai. Jiaimie anamo jaca iñedicai. ¿Bue ñellena llotio: “Jiaimie anamo iñeitomoi”?

³⁴ Jesúsdi uai ote:

—Uanai lloticue. Jeacino finocabidomoi. Naga jeacino finoraíma ie jeacino anamo jai ite. Omoi jeacino anamo omoi illana ñaiticue. ³⁵ Jiaie rafuedo iena lloticue. Ie patrón anamo itimiemo ie patrón rafuedi duiñede; iadedi naie patrón jitomo ie rafuedi duide. ³⁶ Ie isoide. Jusiñamui Jitona cue illamona, naimie rafuemo duidicue. Ie jira omoi mo cue lloia, omoi jeacino anamo ua iñeitomoi. ³⁷ Abraham micori ie uruiaidomoi. Iena uiñoticue; iadedi cue llua omoi raise ñnoñena jira, cuena meineiacadomoi. ³⁸ Cue Moo diga jaie cue illamona, cue cúa rafuena llocabiticue. Omoi moomona cacaja rafuena finocabidomoi.

³⁹ Uai otimaci:

—Cai moodi Abraham micori.

Jesús dane uai ote:

—Abraham micori uruiaidomoidena, Abraham micori finoca rafue isoi finodomoi. Abraham micori uruiañedomoi. Ie jira Abraham micori finoca rafue isoi finoñedomoi. ⁴⁰ Uanai cue llua jira, cuena meineiacadomoi; iadedi Abraham micori iese finoacañede. Cue lluaicino Jusiñamuimona oticue. ⁴¹ Jusiñamui uruai finoca rafuena finoñedomoi; iadedi omoi moo finoca rafuena finocabidomoi.

Uai otimaci:

—Jamai nairai ie uruiañedicai. Cai Moodi Jusiñamui.

⁴² Jesús dane llote:

—Jusiñamuidi omoi moodena, cuena isiruitomoi, naimiemona cue billa jira. Cue jitailla jira, biñedicue; iadedi cuena oretate. ⁴³ ¿Bue ñellena cue llua cacañedomoi? Cacareirainidomoi. ⁴⁴ Omoi moodi Taiñena jira, cue llua ñnoñedomoi. Naimie jitailla rafuena finoacacabidomoi. Nano dofomona naimiedi comena meineraima. Naimie taino jaca llua jira, uanaicinona naimie jaca gañede. Naimie tainona lloia, ie comeci llua isoi llote. Naimiemona taino lluaicnodi comuicabide. Naimie isoidomoi. ⁴⁵ Uanai cue llua jira, cuena ñnoñedomoi. ⁴⁶ ¿Nie isoide jeacino finodicue? Cuemo llono. Uanai cue lla, ¿bue ñellena cuena ñnoñedomoi? ⁴⁷ Jusiñamuina mooredimiedi Jusiñamui uaina cacade. Jusiñamui uruiañedomoi. Ie jira cue llua cacañedomoi.

⁴⁸ Naimiena jearuillanona, naie illaicomini dinena iese raitimaci:

—Samaritano nairai imiedio. Janaba illamiedio. Uairitaidio.

⁴⁹ Jesús uai ote:

—Janaba illamieñedicue. Cue finoca rafuemona cue Moona iobitadicue; iadedi iese cuena omoi ñaia mona cuena iobitañedomoi. ⁵⁰ Omoimona iobillacinona feiñollena, cue rafuena finoñedicue; ia cue Moo iena oiacade. Cuena omoi ñnoñenia, cuemo iobillacinona omoi fecañenia, cue Moo omoina duere finoite; ⁵¹ ia bu cue llwana ua ñnoia, jaca ua fioidaite.

⁵² Naie illaicomini dinena uai otimaci:

—Janaba illamiediona jai uiñotica. Abraham micori jai fioidaite. Jusiñamuina lloraini micoriai jai jai fioidaite; iadedi: “Bu cue llwana ñnoiadedi, fioidaite” raitio. ⁵³ Cai usuma Abraham micori baifemo fañedio. Jusiñamuina lloraini micoriai baifemo fañedio. ¿Bumiediota?

⁵⁴ Jesús uai ote:

—Dama cue abina birieñedicue; ia cue Moo cuena marena ñaia mona, cuena iobitate. “Cai Moodi Jusiñamui” raicabitomoi; ⁵⁵ iadedi naimiena uiñoñedomoi. Naimiena uiñotica. “Naimiena uiñoñedicue” cue raia, omoi isoi taino llotica. Naimiena uiñotica. Naimiena jai ñnotica. ⁵⁶ Omoi usuma Abraham micori eniruemo cue ico billena jai uiñote. Iena uiñuamona, naimie iobide.

⁵⁷ Illaicomini dinena uai otimaci:

—Odi cincuenta años nia iñedio. ¿Niese Abraham micorina ciodio?

⁵⁸ Jesús uai ote:

—Abraham micori nia iñena facaiseconi jaca itica.

⁵⁹ Iena cacajanona, naimie fairinollena, naie illaicomini noficina llinotimaci; iadedi Jesús reirillanona, Jusiñamui jofomona oni jai.

9

Jesús uisidimien jillotaja rafue

¹ Jai ruidio ie llofueoicaiganodica diga Jesús macaria, uisidimien ciode. Iese nanomona jaca naimie jiciga. ² Jesús jicanotica:

—Llofueraima, ¿bue ñellena naimie iese jiciga? ¿Nie isoide ra ie moo jetajamona, naimie iese jiciga? ¿Nie isoide ra ie ei jetajamona, naimie iese jiciga? Caimo llono.

³ Jesús uai ote:

—Naimie jeacino finua muidonañede. Ie moo muidonañede. Ie ei muidonañede. Jaca bue jetajamona, iese comuñede. Jusiñamui uai siñonana comini uiñollena, iese jiciga.

⁴ Nia userena jira, cuena oretatimie ie jitailla rafuena finoacadica. Raie jirenite. Ie mei bu jaca maijinite. ⁵ Eniruemo cue nia ia, comini comeciaina lligaiñotica. —Iese Jesús llote; iadedi jai rafuena ñaite. Naimie nia fioidaite, Jusiñamui rafuena llocana naimie jaillana ñaite. Ie fioidaillirui jai iaie iacanana ñaite. Comeciaina lligaiñuana llote, jeacino oni jaillana.

⁶ Iena llwana eniruena tuajano, enirue idia finuanona, uisidimie uisina naie enirue diga rignote. ⁷ Raite:

—Siloé railla joraibimo mai noisai —raite. Siloé oni dobañuamona: “Oretarabi”.

Ie jira naimie noisade. Uisi jai ciode, abido bite. ⁸ Billa mei, naimie ecimo itino, jai naimien ciocabidino diga, naimie jillwana coniri siadotimaci:

—¿Buuta naimie? Bene ucube jicallena raicabidimie isoide.

⁹ Jai raitimaci:

—Jii, naimie.

Jai raitimaci:

—Iñede. Naimien eruaide isoide.

Naimie dinena raite:

—Uisidimiedica; iadedi jai ciotica.

¹⁰ Naimiemo jìcanotimaci:

—¿Niese jai birui ciodio?

¹¹ Uai ote:

—Jesús raillamie enirue idiai finuano, cue uisina riginote. Cuemo llotote: “Siloé railla joraibimo noisai”. Ie jira noisaidicue. Jai ciodicue.

¹² Jìcanotimaci:

—¿Ninomo ite nai Jesús?

Naimie uai ote:

—Uiñoñedicue.

Comini uisnidimie jai jilluana siadua rafue

¹³ Navui uisnidimie jai jillua mei, fariseuai dine comini naimiena uitimaci.

¹⁴ Sábadoruimo Jesúdi naimiena jillotaja jira, ¹⁵ fariseuai naimiemo jìcanotimaci:

—¿Niesenamona jai ciodio?

Uai ote:

—Jesús raillamie enirue idiai finuano, cue uisina riginote. Ie mei Siloé railla joraibimo noidicue. Iemona jai ciodicue.

¹⁶ Fariseuaimona jiaino raitimaci:

—Sábadoruimo bimiena Jesús jillotaja jira, caimona jai maijde isoide. Jesús maijia jira, Jusiñamuimona naimie biñede.

Jiaino raitimaci:

—¿Niese jearede ra finouidimiedi uisnidimiena jillotate? —Ie jira daje isoi comeциаina facañedicue.

¹⁷ Ie jira navui uisnidimie mo dane jìcanotimaci:

—Naimie ona jillotaja jira, ¿niese odi Jesúna raitio?

Uai ote:

—Naimiedi Jusiñamui uai lloraima.

¹⁸ Naimie moo, naimie ei iaiaimaimo nia jìcanoñenia, judíuai illaicomini nai iima jaca cioiñenano inosiñede. Ie jira iaiaimaina uaiduanona, ¹⁹ jìcanotimaci:

—¿Bimiedi omico jito? ¿Naimie jaca uisnino jeiciga?

²⁰ Uai otiaimaimai:

—Jii, bimie coco jito. Jaca uisnino jeiciga. Iena uiñoticoco. ²¹ Niese jai naimie uisina ciuana uiñoñedicoco. Bu naimiena jilloitajana jiai uiñoñedicoco. Naimiemo jìcano. Naimiedi jai eimiesa. Dama ie facaina jai ñaite —uai otiaimaimai.

²² Bie rafue nia suiñenia, judíuai illaicomini navui llotimaci: “Jesúdi cai Jilloitarama bu lloia, cai ofiracomo naimiena fo billana rairuiticai”. Iena jaciruillanona, ²³ llotiaimaimai: “Naimie jai eimiesa. Naimiemo jìcano”. ²⁴ Ie jira illaicomini dane naimiena uaiduano, llotimaci:

—Jusiñamuimo iobillacinona feca. Jesúmo fecañeno. Naimie jearede rafuena finouidimiena uiñoticai.

²⁵ Uai ote:

—Naimie jearede rafuena finouillana uiñoñedicue. Daje rafuena uiñoticue. Navuidi ciorainidicue. Birui jai ciodicue. Iena uiñoticue.

²⁶ Jìcanotimaci:

—¿Niesede ra diga finuamona odi uisina ciodio? ¿Niese ona jillotate?

²⁷ Uai ote:

—Omoimo jai lloticue; iadedi cacaiacaiñedomoi. ¿Bue ñellena omoimo dane lloticue? ¿Ie llofueganona jaiacadomoi?

²⁸ Riire uai otimaci:

—Naimie ie llofuegamiedio. Caidi Moisés micori ie llofueganodicai. ²⁹ Jusiñamui Moisés micorimo jaie lluaana uiñoticai; iadedi bimiena uiñoñedicai. Naimie ninena billana jiai uiñoñedicai.

³⁰ Nai iima uai ote:

—Jadi, naimie ninena billana uiñoñedomoi; iadedi cuena jillotate. ³¹ Jusiñamuidi jearede rafuena finodino ñaia uaina cacarefiñede. Naie isoidino siño rafuena finoñenana uiñotícaí; iadedi Jusiñamuidi naimiena sedadimie ñaia uaina cacade. Ie jitaila rafuena finodimie ñaia uaina cacade. Naie isoidino siño rafuena finuana uiñotícaí. ³² Enirue finua facaisemona jaca buna uisinino jeicigamiena jilloitañede. ³³ Jesúsdi Jusiñamuimona biñedimiedena, jaca buena finonide.

³⁴ Uai otimaci:

—Jamai cai nairai imiedio. ¿Niese caina llofueitio?

Ie jira naimaci ofiracomona naimiena jino dotadimaci.

Jesús uisinidimie diga ñaia rafue

³⁵ Uisinidimiena jino dotajana fidianona, Jesús naimiena jenode. Baillano, jicante:

—¿Omoi cominina Jilloitaraimana ñnotio?

³⁶ Uai ote:

—¿Bumai naimie? Cuemo llono, naimiena cue ñnollesa.

³⁷ Jesús uai ote:

—Naimiena ciodio. O diga ñaite. Cue.

³⁸ Caiñici ifodo rainadajanona, iobillacinona fecallena, uai ote:

—Nama, jai o uaina ñnotícue.

³⁹ Jesús uai ote:

—Uisinidino cioitallena, eniruemo biticue. Jai uisina ciodino uisina cioitañellena biticue. —Iese Jesús raite; ia naimaci comeciaina ñaite. Jesús “Jai marañedicaí” raitinona jillotajabite. Jesús “Jai maredicaí” raitinomo ite jeacino naimaci uiñollena bite.

⁴⁰ Naimie ecimo ite fariseuai iena cacajano, jicantotimaci:

—¿Uisinidomoi caina raitio?

⁴¹ Jesús uai ote:

—Uisinidino isoi itomoina, omoimo ite jeacino omoi muidonañede; ia “Jai ciodicaí” omoi railla jira, omoimo ite jeacino omoi muidona.

Iese raite; ia naimaci comeciaina ñaite. Jeacino naimacimo illana naimaci uiñoiacañena jira, iese ñaite. Naimaci jeacino oni dotajana jitañedimaci.

10

Toica llaudaiaí sedaraima rafue

¹⁻² Jesús dane llofuate:

—Cue rafuena omoi raise uiñollena, toica llaudaiaí ñaiticue. Llaudaiaí jino uicabilla isoi, llaigafomo nasedo fo jaidimiedi naie llaudaiaí sedaraima; ia jinofebéi dinena bitimiedi firiraima. ³ Llaigafó llaudaiaí sedaraima fo jaillena, nase sedaraimadi nase econote. Llaudaiaí naimie uaina uiñotimaci. Imaci mameciado uaiduamona, llaigafomona jino bitimaci. ⁴ Nana ie llaudaiaí jino bia, naimacina ifode. Naimie uaina uiñuanona, naimiena racadimaci. ⁵ Naimaci uiñoñegamiena racañedimaci; iadedi naimie uaina naimaci uiñoñena jira, naimiemona oni aisidimaci.

⁶ Bie isoidicinona Jesús llofuate; iadedi naie comini iena cacañedimaci. ⁷ Ie jira Jesús dane llofuate:

—Llaigafó ie nase isoidicue. ⁸ Damierie firirainina bitimaci. Ie jira llaudaiaí naimaci uaina cacañedimaci. —Iese Jesús llofuate; ia naimiena ñnotinona ñaite. Naimiena abi caitadinona ñaite. Naimie ñnotino naimiena abi caitadino llogacinomo cacarefiñena ñaite. ⁹ Nia llofuate:

—Llaigafó isoidicue. Bu cue nasedo fo bia, jilloite. Llaudaiaí isoi fo biite. Jino jaité. Mare guille baite isoite. —Iese llofuate; ia naimiena ñnotino marena illana ñaite. Naimiemona naimaci jitaila rafuena uana ñaite. ¹⁰ Nia llofuate:

—Llaudaiaina fillena, meinellena, faifillena, firiraima bite; iadedi cominina jaca raise itatallena, biticue. ¹¹ Llaudaiai marena sedaraimadicue. Mare sedaraimadi ie toinaia facaina riiduanona ie abina faifite. ¹² Janallari bia, laudaiai naimie ieñena jira, jamai maijidimiedi, laudaiaina fainonocaillano, ecimona aiside. Llaudaiaina janallari gaitaacanamona, laudaiai tuudimaci. ¹³ Jamai ucube oiacanano, isiruiñenano, jamai maijidimie aiside. ¹⁴ Iese iñedicue. Mare sedaraimadicue. Cue laudaiaina uiñoticue. ¹⁵ Cue Moo diga conimana coco uiñua isoi, naimaci cuena jiai uiñotimaci. Cue laudaiai facaina fiodaiticue. —Iese Jesús llofujete; ia naimiena inotinona ñaite. Jamai maijidimie isoi naimacina sedañede. Naimacina raise riidote. Naimaci facaina jiai fiodaiacade. ¹⁶ Nia llofujete:

—Jiaie llaigafomo jiaie laudaiai cuemo ite. Naimacina jiai atiacadicue. Cue uaina cacaitimaci. Ie mei danomo nana cue laudaiai iitimaci. Naimacina dama sedaiticue. —Iese Jesús llofujete; ia jiaie nairaiaimo naimiena inoitinona ñaite. Dajena naimacina sedajana ñaite.

Jesús fiodaille rafue

¹⁷ Jesús nia llofujete:

—Cue jai fiodaiacanamonona, cue Moo cuena isiruite. Fiodaillamonona dane jilloiticue. ¹⁸ Cue jitañenia, jaca buna cuena meineñeite. Cue jitailla jira, fiodaiticue. Siño uai cuemo illa jira, cue jitailliruimo fiodaiticue. Cuemo cue Moo siño uaidi jai illa jira, dane jilloiticue.

¹⁹ Jesús iese llofuia jira, judíuai illaicominidi daje isoi comeciaina facañedimaci. ²⁰ Jiaínodi:

—Naimiemo Janaba illamie —raitimaci—. Uairico. Naimiena cacareiacañedicai —raitimaci.

²¹ Jiaíno raitimaci:

—Bie isoidicinona Janaba illamie llofueñede. Janaba illamie uisnidimiena jillotanide.

Jesús ie Moo diga daje isoi comeci lloilla rafue

²² Rollime facaise Jerusalémo Jesús ite. Naie facaiseconi Jusiñamui jofo ie finua comeci rafue ite. ²³ Salomón micori finotaga jofo abi ibirimo Jesús macarite. ²⁴ Naie facaise judíuai illaicomini naimie dine bitimaci. Jicanotimaci:

—¿Niruido caimo ona lloitio? Odi cai Jilloitaramania, caimo marefodo llono.

²⁵ Jesús uai ote:

—Omoimo jai lloticue; iadedi inoñedomoi. Cue Moo mamecido cue finoca rafuemona cuena uiñotomoi. ²⁶ Cue toica laudaiaimo omoi jainaiañena jira, cuena inoñedomoi. ²⁷ Cue toica laudaiai cue uaina cacadimaci. Naimacina uiñoticue. Cuena racadimaci. ²⁸ Naimaci jaca itataticue. Jaca abina faifñeitimaci. Cue anamonona jaca budí naimacina bairoñeite. ²⁹ Cue Moo naimacina cuemo fecade. Naimacidi jiaíno baifemo faitimaci. Naimiemona jaca budí naimacina baiironide. ³⁰ Cue Moo diga daje isoi comecina lloidicoco. —Iese llote; ia naimiena inotinona ñaite. Naie illaicomini naimiemo jainaiañena jira, naimiena inoñedimaci. Iena Jesús ñaite.

³¹ Jesús llofuiana cacajano, naie illaicomini noficina llinotimaci, naimiena meinellena. ³² Iena cianona, Jesús llote:

—Cue Moo uaido diga mare rafuena finodicue. ¿Nie isoide rafuena cue finua muidona, cuena meineiacadomoi?

³³ Uai otimaci:

—Mare rafuena o finua muidona, ona meineñeiticai. Jamai imadio. “Jusiñamuidicue” o raila jira, ona meineiticai. Jusiñamui Joreña jiai jeare ñaitio.

³⁴⁻³⁶ Jesús dinena uai ote:

—Jaie ciegafuiana jamainidicai. Nainomo Jusiñamuidi naimie uaina cacadinomo jaie llote: “Omoídi jusiñamuillaidomoi”. Jusiñamui ie uaina cacadinomo jaie iese lloide,

¿Niese cuena jeare ñaitomoi? Jusiñamui cuena fetuano, cuena bene oretate. “Jusiñamui Jitodícue” cue railla jira, “Jusiñamui Joreñona jeare ñaitio” raitomoi. ³⁷ Cue Moo isoi cue finoñenia, cuena ñnoñeno; ³⁸ iadedi cuena omoi ñnoiacañenia, cue Moo isoi cue finoia, naie rafuena ñno. Iemei cue Moomo cue jainaiaillana uiñoitomoi. Cuemo cue Moo jainaiaillana jiai uiñoitomoi.

³⁹ Iena cacajano, naimiena dane gaitaacadimaci; iadedi naimacimona jillode.

⁴⁰ Ie mei Jesús Jordán railla ille ruica dibeimo jaide. Nainomo Juan micori cominina nano bautizade. Nainomo rillanona, nainomo Jesús fiebide. ⁴¹ Ailluena comini Jesús dine bitimaci. Coninina raitimaci:

—Juan micori siño rafuena finoñede; iadedi nana Juan micori Jesúsna llucacnodi uanaicino.

⁴² Nainomo ailluena cominidi Jesús naimaci Jilloitaraimana ñnotimaci.

11

Betaniamo Jesús abido jailla rafue

¹ Naie facaise Betaniamo Lázaro raillamedi duide. Naimie miriñodi Marta, María iañuái. ² Naie Maríadi jiairuido Jesús eillimo camare soride rana totade. Ie mei naiñaiño ie ifotie diga naimie eillina safenaillena dote. ³ Naie iañuái Jesús dine uaina orediañuái, naimie billena. Naimie jibuisaibillena llotatatiñuái:

—Nama, o isiruigamie duide —llotatatiñuái.

⁴ Jesús naie rafuena fidiano, llote:

—Jamai fodaillena naimie duiñede. Jusiñamui uaina siñonana comini uiñollena, naimie duide. Iemono comini dinena: “Ua Jusiñamui Jitodio” cuena raitimaci.

⁵ Jesúsdi Lázaron a isiruite. Ie miriño iañuaina jiai isiruite; ⁶ iadedi Lázaro duillana Jesús fidiano, naimie dine jaiñede. Naimie illanomo menarui nia fiebide. ⁷ Ie mei ie llofueoicaiganodicaimo llote:

—Judeamo abido dane mai cai jailli.

⁸ Uai oticai:

—Llofueraima, judíuái illaicomini birui noficina ona fairinoiacadimaci. ¿Niese naimaci dine dane jaitio?

⁹ Uai ote:

—Nagarui userede. Userenia bu macaria, raise ciua jira, eicaitañede; ¹⁰ iadedi bu naiona macaria, raise cioñena jira, eicaitaide. —Iese llofujete; ia naimie rafuedo jaillena ñaite. Raite:

—Cue rafue suicana jaite. Cue jitaille dinori nia llofuetícue. Cue rafuedo omoi jiaia, marena jaitomoi. Iedo omoi jaiñenia, duere sefuitomoi.

¹¹ Dane llote:

—Lázaro jai ñide; iadedi naimiena casitallena, jaitícue.

¹² Uai oticai:

—Nama, naimie jamai ñnia, nia dama casite.

¹³ Naimie jafaici uanona ñniamo comeciaina facadicaí; iadedi Jesús naiena lloñede. Lázaro fodaillana ñaite. ¹⁴ Ie jira Jesús caimo marefodo llote:

—Naimie jai fodaite. ¹⁵ Nainomo cue ññena jira, cue siño uai omoi ñnollena, omoi facaina iobidícue. Naimie dine mai cai jailli.

¹⁶ Caímona Tomás caimo llote:

—Maña. Naimie diga fodaísaiticai —llote. Tomás mameci jiaicidi Dídimó. Naimiedi gorasa.

Jesús Marta diga ñaia rafue

¹⁷ Betaniamo cai ria, Lázaro raiafomo jai nagaamagarui illana fididicaí. ¹⁸ Jerusalémona Betaniamo tres kilómetros dinori illa jira, ¹⁹ diga judíuái illaicomini

eedollena, Marta iaiñuái María dine bitimaci. ²⁰ Jesús billana Marta fidiano, cai dine naisomo bite; iadedi jofomo María fiebide. ²¹ Jesúsno Marta llote:

—Nama, o bene itiona, cue iio fioldañede; ²² iadedi Jusiñamui buena o jicaia, naimie iena finoite. Iena uiñoticue.

²³ Jesús dinena uai ote:

—O iio abido jilloite.

²⁴ Naiñaiño uai ote:

—Nana comini jilloilliruimo naimie jia jilloite. Iena uiñoticue.

²⁵ Jesús uai ote:

—Fiodaillamona comini abiana jilloitaramadicue. Jusiñamui diga jaca illena, cominina itataraimadicue. Bu cuena inuanona, fioldadedi, iemona ico jilloite.

²⁶ Cuena inotimiena Jusiñamui illanomo jaca illena itataiticue. ¿Iena inotio?

²⁷ Naiñaiño uai ote:

—Jii, Nama; odi cai jilloitaramadio. Odi Jusiñamui Jitodio. Jusiñamui dinena o billamo jai e ocuridicaí.

²⁸ Iese raillanona, jofomo Marta abido jai de. Ie euiñona uaiduano, anado llote:

—Llofueraima jai ride. Ona uaidote.

²⁹ Iena cacajano, raire cai dine María bite. ³⁰ Marta diga ie ñaianomo Betania ecimo Jesús nia ite. ³¹ Jesús dine María nia jaiñenia, judíuai illaicominidi Mariana nia eedotimaci. María jino jaillana ciuano, racadimaci. “Raiafomo eellena naiñaiño jai de” raillanona comeciaina facadimaci. ³² María Jesús dine rillano, naimiena duenaillano, cañici ifodo rainadacaida, llote:

—Nama, bene itiona, niadedi cue iiodi fioldañede.

Jesús Lázaron jillotaja rafue

³³ María eiana Jesús ciuano, naiñaiño diga bitino eiana ciuano, naimie comeci eo sunaite. Sunaillamona, jafaicina faite. ³⁴ Jicanote:

—¿Ninomo Lázaron raitomoi?

Uai otimaci:

—Nama, mai jibuisaibi.

³⁵ Lázaron duenaillanona, Jesús eede. ³⁶ Iena ciuano, judíuai illaicomini dinena llotimaci:

—Ero. Naimiena eo isiruite.

³⁷ Jiaíno raitimaci:

—Navui uisnidimiena jillotate. ¿Bue ñellena bimiena jilloitañede, naimie nia fioldañenia?

³⁸ Iena cacajanona, ie siño uai finuana naimaci nia raise inosiñena jira, Jesús comeci dane sunaite. Oni jaillanona, raiafomo ridicaí. Nofici motomo ite naie raiafo. Ifodi jiaie noficina ibaica. ³⁹ Jesús llote:

—Nofici oni ñuita.

Marta dinena naimie uai ote:

—Nama, naimie abi jai sorirede. Nagaamagarui raiafomo jai ite.

⁴⁰ Jesús uai ote:

—Cuena o inoia, Jusiñamui uai siñonana uiñoitio.

⁴¹ Iemona cominidi noficina oni ñuitadimaci. Jesús monamo eruaillano, llote:

—Moo, cue uaina o cacaja jira, iobidicue. ⁴² Jaca cuena cacadio. Iena uiñoticue; iadedi cue diga bene itino illa muidona, iese ado lloticue. Cuena o oretajana naimaci inollena, o diga ado ñaiticue.

⁴³ Ie mei eo ado llote:

—Lázaro, jino bi.

⁴⁴ Nai fioldaitimie nia naimie abi nana ferinua ra diga jino bite. Jesúsdi cominimo llote:

—Naimie abi ferinua oni suiño. —Ie jira suiñodimaci.

⁴⁵ Ie muidona María diga bitinomona ailluena comini Jesúna ñnotimaci. Naimie finoca rafuena ciuanona, ñnotimaci.

Jesúna meinellena, illaicomini comeciaina facaja rafue

(Mt 26.1-5; Mr 14.1-2; Lc 22.1-2)

⁴⁶ Jesúna ññoñedinomona damierie Jesús finoca rafuena fariseuai dine lluidimaci.

⁴⁷ Ie jira Jusiñamui diga nanoca ñairaini, fariseuai diga, danomo ofidimaci. Jesús rafuena siadotimaci:

—¿Ñiese naimiena nibaiticai? Diga siño rafuena ua finocabide. ⁴⁸ Naimiena ñiese cai nibañenia, nana comini naimiena ñnoitimaci. Nana comini naimie dibeimo jai, naimaci illaimana naimie jaillana jitaitimaci. Iemei romanos soldaduai biitimaci. Jusiñamui jofona judaiaibitimaci. Cai nairaiaina jiai fuidoitimaci. Iena jitaiñedicai.

⁴⁹ Naie facaise nanoca Jusiñamui diga ñairaimana Caifás illamona, naimacimo llote:

—Naimie rafuena raise uiñoñedomoi. ⁵⁰ Iese cai nairaimo suiñellena, damie cai nairai facaina fiodaitena, mare. Iena ñbai nia raise uiñoñedomoi.

⁵¹ Ie comeciina dama facajano, iese lloñede; ia Jusiñamui diga nanoca ñairaimana naimie illamona, Jusiñamui naimiena buena llotatate:

—Jesúdi cai comini facaina fiodaite.

⁵² Cai comini facaina dama fiodañede; iadedi nana Jusiñamuina ñnoitina facaina fiodaite. Diga nairaimo itimaci; iadedi naimiemo dajena nana naimaci duillena, naimie fiodaite. ⁵³ Caifás llua naimaci cacajamona, judíuai illaicomini comeciaina nia facadimaci, naimiena meinellena.

⁵⁴ Ie jira Jesús judíuai illaicomini illa motodo marefodo macariñede. Jofue iñena dofodo jaidicai. Efraín railla nairai dine ridicai. Nainomo diga irui iticai. ⁵⁵ Pascua railla rafue iaire iacana jira, ailluena comini Jerusalémo naimaci nairaimona jaidimaci. Rafue nia taineñenia, naimacimo ite rafue oni jaillena, cai einamací llua isoi finodimaci.

⁵⁶⁻⁵⁷ Jusiñamui diga nanoca ñairainidi fariseuai diga navui ñaitimaci:

—Bu Jesúna cioia, naimiena cai gaitallena, caimo llono.

Rafuemo bitino illamona, Jesúna jenodimaci. Jusiñamui jofomo naimaci ia, coninimo jicanododimaci:

—¿Ñiese comeciaina facadomoi? ¿Jesús bene biite? Cai illaicomini llua jira, ñbai jai biñeite. Illaicomini llua fidiano, naimie biñeite.

12

Betaniamo Lázaro jofomo Jesús guilla rafue

(Mt 26.6-13; Mr 14.3-9)

¹ Pascua railla rafue rilledi seis digarui fiebidemo, Jesús cai diga Betaniamo jaide. Betania Lázaro illano. Jesús Lázarona fiodaillamona navui jillotate. ² Jesúri iobillano, Lázaro ie guille rafuena finode. Marta guille bai jonega. Jesús diga guitino motomo Lázaro ite. Jesús llofueoicaiganodicaidi jiai motomo guiticai. ³ Iemei Maríadi nardomona finoca caimare soride ra Jesús eillimo totade. Daje botella raifi totade. Safenaillena naiñaiño ifotie diga ie eillina dote. Nai caimare soride ra eo raifide. Daje botella ite. Iemona nana jofo jeraidi soride. ⁴ Caimona Judas Iscariote micorina mameciredimie ite. Jesúna gaitataitimie. Llote:

⁵ —¿Bue ñellena bie soride radi fecañede, ucubena ollena? Fecacadena, trescientos digarui maijia ucube diese raifide. Ie mei nai ucube dueredinomo fecadena, mare — llote. ⁶ Dueredinona naimie duenañede; iadedi naimie cai ucubena sedade. Naimiedi firiraíma. Naie ucubemona fiuilla jira, iese naimie llote.

⁷ Jesús uai ote:

—Dama ite. Bie soride ra naiñaiño jai eenoga cue fiodaillirui iena. ⁸ Dueredino omoi diga jaca iitimaci; iadedi omoi diga jaca iñeiticue.

Ailluena comini Lázarona ciua rafue

⁹ Lázaro jofomo Jesús illana ailluena cai illaicomini fidiano, bitimaci. Navui fiodaillamona Lázarona Jesús jillotaja jira, Jesúna dama cioiacaiñedimaci; iadedi Lázarona jiai cioiacadimaci. ¹⁰ Ie jira Jusiñamui diga nanoca ñairainidi Lázarona jiai meinellemo comeciaina facadimaci. ¹¹ Lázaro muidona ailluena judíuai illaicomini naimaci illa dibeifainonocaida, Jesúna ñnotimaci.

Jerusalémo illaíma isoi, Jesús marena jailla rafue

(Mt 21.1-11; Mr 11.1-11; Lc 19.28-40)

¹² Pascua railla rafue illa jira, ailluena comini Jerusalémo itimaci. Egiptomona cai jaiagai jillobillana comecillena naie rafue ite. Jesús Lázaro diga guillarui ie areruido Jesús Jerusalémo billana naie comini fididimaci. Fiodaillamona Lázarona Jesús navui jilloitajana diga comini ciodimaci. Iena llocana uitimaci. Ie jira ailluena comini Jesús dine jaidimaci. ¹³ Raforona uanona, naimiena feiñollena, naimie uicomo jaidimaci. Ado cuiriisite:

—¡Cai jilloitaraíma billa! ¡Jusiñamui mamecido bitimie eo mare! ¡Cai Illaíma eo mare! —cურიisite.

¹⁴ Jesúdi ailli baiga burrito emododo jaide. Jusiñamui facaina lloiraíma micori jaie llua isoi jaide. Jaie llote: ¹⁵ “Jerusalén imaci, jacinaiñeno. O Illaíma burrito emododo biite”. ¹⁶ Naie facaise bie rafuemo comeciaina facañedícai; iadedi Jesús jillua mei, bie rafuena comecitícai. ¹⁷⁻¹⁸ Lázarona Jesús jillotaja jira, ailluena comini Jesús dine jaidimaci. ¹⁹ Iena ciuano, fariseuai coniniri ñaitimaci:

—Jaca buena birui finoñedícai. Ailluena comini Jesús dibeimo jai jaidimaci.

Judíuaiñedino Jesúna cioiacana rafue

²⁰ Judíuaiñedino Jusiñamuina sedallena, pascua railla rafuemo jiai bitimaci. ²¹ Naie facaise cai dine bitimaci. Felipedi Galilea ie Betsaida nairai imiena jira, Felipe dine bitimaci. Felipemo llotimaci:

—Jesúna cioiacadícai.

²² Felipe iena Andrémo llote. Ie mei Jesúmo lluaidiaímaiaí. ²³ Jesús uai ote:

—Monamona biticue; ia jai cue fiodable facaise ride. Comini cue uaidi siñonana uiñua facaise jai ride. ²⁴ Jiaie rafuedo iena lloitícue. Ido rilla mei, naie ido sicoñenia, buena iñede; iadedi sicuamona, ailluena llisilladi iite. Ie isoide. Cue fiodaiñenia, jaca bu jillobiñeite. Cue fiodaillemona ailluena comini jillobitimaci. ²⁵ Ie abimo ite rafuemo comecina dama bu facaia, ja muidomo faifite; ia cuemo ite rafuemo comecina bu facaia, monamo jaca iite. ²⁶ Cuen bu raise sedaacania, cue rafuedo naimie jaite. Cue llofuegamiena naimie jaillamona, cuemona fueoite. Iemona cue Moodi naimiena caimare itataite. ²⁷ Cue comeci jai rucaicuerite; iadedi, ¿ñiese raiticue? Raiñeiticue: “Moo, cue fiodaillemona cuena jillote”. Fiodaillena biticue. Ie jira raiticue: ²⁸ “Moo, cominina o uai siñonana uiñota”.

Ieconí monamona Jusiñamui llote:

—Jai iena finodícue. Dane iena finoitícue.

²⁹ Jusiñamui ñaiana nainomo ite comini raise cacaiñenano, raitimaci:

—Mona gurude.

Jiaíno raitimaci:

—Naimiemo Jusiñamui jaienicí llote.

³⁰ Jesús uai ote:

—Cue facaina naie llua cacaiñedomoi; iadedi omoi facaina iena cacadomoi. ³¹ Cuen uiñoñedino duere sefuilla facaise ja taineite. Taife anamo comini jai itimaci; ia Jusiñamui Taífena ja anafaitaite. ³² Cruzmo cue fiodaia, naimacina jilloitallena, ailluena cominina cue dibeimo itataitícue. ³³ —Naimie fiodaillana naimaci uiñollena, iese llote.

³⁴ Naie comini uai otimaci:

—Jusiñamui facaina lloraini micoríai jaie cuega: “Cai Jilloitaraima jaca fioidañeite”. ¿Ñiese raitio: “Jusiñamuimona biticue; ia fioidaiticue”?

³⁵ Jesús dane uai ote:

—Cue llofua dinori omoi comeciaina nia lligaiñoticue. Cue llamo cacarei. Omoi diga cue nia ia, cue llofuiamo cacarei. Jitiredemo bu macaria, nai illana raise uiñoñede. Ie isoide. Jeacino anamo itinodi jitiredinomo itimaci isoidimaci. Uanaicinona uiñoñedimaci. ³⁶ Jeacino anamona omoi jilloillena, cue llofua uaido omoi comeciaina birui lligaiñoticue. Cue uaina ñno, cue cominina omoi jaillena.

Bie lua mei, Jesús oni jaillano, naimacimona reirite.

Comini Jesús uaina ñnoñena rafue

³⁷ Jesús diga siño rafuena finode; iadedi ailluena comini: “Naimiedi cai Jilloitaraima” raillana nia ñnosñede. ³⁸ Iemona Isaías micorí jaie cuegafuiai suide. Naimie jaie cuega: Jusiñamui, cai llucinona cacadimaci.

O siño uaido o finoca rafuena jiai cioidimaci; iadedi ñnoñedimaci.

³⁹⁻⁴⁰ Isaías micorí dane cuega:

Naimaci cioi raillano, Jusiñamui naimacina uisnidino isoi itatate.

Naimaci comeciaina abina uiñoi raillano, naimaci comeciaina feitate.

Naimiena ñnoi raillano, iese naimacina jai itatate.

Ie jira jai ñnonidimaci. ⁴¹ Jusiñamui ie ebirede rafuena naimie ciuamona, Isaías micorí iena llote. Isaías micorí Jesúna llote. ⁴² Isaías micorí iese llote; iadedi ailluena judúuai illacomini Jesús uaina ñnotimaci. Fariseuaina jaciruillanona, iena janotimaci. Naimaci ofracomona naimacina jino dotajana jaciruitimaci. ⁴³ Comini naimacina iobitajana naimaci eo jitailla jira, dotajana jitaiñedimaci. Jusiñamuimo ite iobillacinona raise oiacañedimaci.

Jesús ie Moona ñaia rafue

⁴⁴ Naie facaise Jesús eo ado llote:

—Cuena ñnotimie cuena oretatimiena jiai jai ñnote. ⁴⁵ Cuena cioidimie cuena oretatimiena jiai cide isoide. ⁴⁶ Comini comeciaina lligaiñollena biticue. Ie muidona naga cuena ñnotimie jitiredinomo jai ññede. Jeacino anamo jai ññede. ⁴⁷ Cue uaina cacajano ñnoñedimie juez isoi birui lloñedicue. Cominina duere finollena, biñedicue; iadedi naimaci jeacinomona naimacina jilloitallena biticue; ⁴⁸ ia cuena bu ñnoñenia, cue uaina naimie ñnoñenia, ja muidona faifite. Cue uaina naimie ñnoñellemona, nana naimiena ñnoñedino janafefilliruimo Jusiñamui naimiena ico duere finoite. Cuena jitaiñedimie, cue uaina jitaiñedimie comini janafefilliruimo janafefite. ⁴⁹ Dama cue comeci facaja uaido lloñedicue. Cue Moo cuena oretaja muidona, cue Moo cuemo lloga uaido lloticue. ⁵⁰ Cue Moo lloga uaidi naimie dibeimo cominina jaca itatate. Iena uiñoticue. Ie jira cue Moo cuemo lloga uaina jaca lloticue.

13

Jesúdi ie llofueoicaigano eilliaina jocua rafue

¹ Pascua railla rafue riacana areruido ia, Jesús ie Moo dine abido jaiacanana uiñote. Naimaci diga naimie nia ia, ie cominina jaca eo isiruite. ² Jesúna gaitatallena, naie facaise Taifedi Judas Iscariote micorí comecina feidote. Judas micorí Simón jito. ³ Jesúdi ie uai ie Moomona feiñuana uiñote. Ie Moo dinena billana uiñote. Ie Moo dine abido jaillena jiai uiñote. ⁴ Nairuido Jesús cai diga guite. Guilla meinoconi, Jesús a naidacaida ie abimo ite ñnirina duiñode. Abi dora diga ie moillina ferinote. ⁵ Janorede nogomo jinuina totaja mei, cai eilliaina jocode. Safenaillena, ie dora diga dote. ⁶ Simón Pedro dine naimie ria, Pedro jicanote:

—Nama, ¿cue eillina jiai jocoitio?

⁷ Jesús uai ote:

—Cue finoca rafuena birui uiñoñedio; iadedi jiairuido uiñoitio.

⁸ Pedro uai ote:

—Cue eillina jaca jocoñeitio.

Jesús uai ote:

—O eillina cue jocoñenia, cue facaina iñeitio.

⁹ Pedro uai ote:

—Nama, dama cue eillina jocoñeno. O facaina raise cue illena, cue onolli, cue ifogidiga, jiai joco.

¹⁰ Jesús uai ote:

—Nana o abina jocoñeiticue. Da o eillina jocoiticue. Jai noidimie mena icaiño noiñede. Ie abi jai jeanide. Dama ie eillina nibai dane jocoacade. Omoi comeciai jiai jai jeanide; iadedi omoimona damie comeci nia jearede.

¹¹ Naimiena gaitataiacadimiena naimie uiñua jira, iese llote.

¹² Cai eilliaina jocua mei, ie iniroi dane jitaja mei, dane ana rainadajanona, caimo jicanote:

—Omoimo ailli cue finoca rafuena nibai raise cacaiñedomoi. ¹³ Cuen a “Cai Nama” raicabitomoi. “Cai llofueraima” cuena jiai raicabitomoi. Iese cuena omoi raia, mare. Ie isoi iticue. ¹⁴ Omoi Namadicue. Omoi llofueraimadicue; iadedi omoi mullaima isoi iticuedena, omoi eilliaina jai jocodicue. Omoi jamai bue isoidinomona, omoi eilliaina danirie jocua. ¹⁵ Cuemona fueo. Abi iedoñeno cue isoi omoi jai. Cue afemo iñedomoi. ¹⁶ Uanai omoimo lloticue. Mullaima ie nama afemo iñede. Oretagamie ie oretatimie afemo iñede. Ie isoide. Cue afemo iñedomoi; ia omoi eilliaina jocodicue. “Jiaimie afemo iticai” raillanomo comecina omoi facañeno. ¹⁷ Bicino omoi uiñuamona, iese omoi finoia, caimare iitomoi. ¹⁸ Nana omoina iese ñaiñedicue. Nana cue fetocanona uiñoiticue. David micori jaie llote: “Cue diga gutinomona damie cuena enoidimie ite”. ¹⁹ Bie nia suiñenia, iena jai lloticue. Iena cuemo suilla mei, David micori llogacino raise ñnoitomoi. ²⁰ Uanai lloticue. Cue oretagamiena bu feiñoia, cuena jiai feiñote. Bu cuena feiñoia, cuena oretatimiena jiai feiñote.

Jesúdi ie gaitataitimiena llua rafue

(Mt 26.20-25; Mr 14.17-21; Lc 22.21-23)

²¹ Jesús iese llua mei, ie comeci sunaite. Llote:

—Uanai lloticue. Omoimona damie cuena gaitataite.

²² Caimona ¿nimie naimiena gaitataite? raillanona, comecina facajano, coninimo eroridicai. ²³ Cuen Jesús eo gaia jira, Jesús abimo iticue. ²⁴ Cuen uaiduanona, Pedro cuemo llote:

—“¿Bu ona gaitataite?” Jesúmo jicano.

²⁵ Ie jira Jesúmo jicanoticue:

—Nama, ¿bu ona gaitataite?

²⁶ Jesús uai ote:

—Bie llomeniconna mutajanona, naimiemo fecaiticue —raite. Mutaja mei, Judas micorimo fecade. Naimie micoridi Simón Iscariote jito. ²⁷ Llomeniconna guilla meinoconi, Taife anamo Judas micori illamona, Taife naimie comecina feidote. Jesús naimiemo llote:

—O finoacaga rana raire fino.

²⁸ Jesús Judas micorimo llua raise uiñoñedicai. ²⁹ Judas micori ucubena sedaja jira, jiaino comecina facade: “ ‘Cai jitaille guille ibarisai’ Jesús naimiemo llote”. Iese lloñenia, “ ‘Janore ucube dueredinomo feca’ nibai naimiemo llote”. ³⁰ Guilla mei, Judas micorijino jaide. Naie facaise jai jitireficaide.

Jesús ie fiodaillena ñaia rafue

³¹ Judas micori jailla mei, Jesús lloste:

—Jusiñamuimona billanona, iimana jaidicue; ia cue fiodaille facaise jai ride. Cue fiodaillemona cominidi Jusiñamui uai siñonana uiñoitimaci. ³² Iemona Jusiñamui uai siñonana comini uiñoia, Jusiñamuidi cominina cue siño Jitona jiai uiñotaite. Iese ja finoite. ³³ Cue comini, dallu omoi diga bene iticue. Jaiticue. Cue diga iacanitomoí. Judíuai illaicominimo navui cue llua isoi, omoimo ja lloiticue. Cue jaillinomo nia jaiñeitomoí. ³⁴ Ie jira jiaie rafuena omoimo ja lloiticue. Omoína cue isiruilla isoi, coninina omoi isirui. ³⁵ Coninina omoi isiruillamona, jiaie cominidi cue cominidomoína uiñoitimaci.

Pedro Jesús diga ñaia rafue

(Mt 26.31-35; Mr 14.27-31; Lc 22.31-34)

³⁶ Naie facaise Pedro naimiemo jicanote:

—Nama, ¿nine jaitio?

Jesús uai ote:

—Cue jaillinomo cue diga ja jaiñeitio. Jiairuido jaitio.

³⁷ Pedro uai ote:

—Nama, ¿bue ñellena ja jaiñeticue? O jitaia, o facaina ja fiodaiticue.

³⁸ Jesús dinena uai ote:

—Cue facaina fiodaiacadío. Uanai omo lloticue. Nia monaiñenia, itava nia ñaiñenia, dacaiño amani cuena janoitiosa.

14

Jesús ie Moo dinomo rille rafue

¹ Jesús ie llofueoicaiganodicaína nia llofujete:

—Rucaicueriñeno uri i. Jusiñamuina ñnocana jai. Cuena jiai ñnocana jai. ² Cue Moo illanomo diga comini illanuai ite. Iese iñedena, omoimo jai lloticue. Omoi illinuaína raise finollena, nainomo jaiticue. ³ Fuiduanona, dane abido biiticue. Omoína cue dine uillena, cue dine omoi illena, biiticue. ⁴ Cue jaillinona birui uiñotomoí. Nainomo omoi rillena jiai uiñotomoí.

⁵ Tomás uai ote:

—Nama, o jaillinona uiñoñedicaí. ¿Ñiese nainomo riiticaí?

⁶ Jesús uai ote:

—Omoi naiso isoidicue. Uanaicinona lloticue. Cue Moo díbeimo cominina jaca itataticue. Cue Moo dine joide naiso isoidicue. Jaca dasode cue Moomo duide naidi. Cue Moo dine o ria, cuena ñno. ⁷ Cuena uiñotomoína, cue Moona jiai uiñotomoí. Biruidemona naimiema uiñotomoí. Naimiema jai ciodomoi.

⁸ Felipe uai ote:

—Nama, o Moona caimo acata. Iemo jai macaibaite.

⁹ Jesús uai ote:

—Felipe, are omoi diga iticue; iadedi cuena nia uiñoñedomoi. Cuena ciodimie cue Moona jiai jai ciode isoide. ¿Ñiese llotio: “O Moona caimo acata”? Cue Moona jai ciodio isodio. ¹⁰ Cue Moo diga daajedicoco. Iena nia ñnoñedio. Cue llua di cue Moo uai. Cue llua di cue comeci iuañede. Cue motodo naimie maijide. ¹¹ Cue Moo diga daajedicocona ñno. Cue uaina omoi ñnoñenia, siño rafuena cue finua jira, cuena ñno.

Jesús ie Moo Joreña llua rafue

¹² Jesús nia llofujete:

—Uanai lloticue. Cuena omoi ñnoia, cue finoca rafuena jiai finoitomoí. Cue Moo dine cue jailla jira, cue Moo Joreña omoi dine cue oretaja mei, cue finua baifemo finoitomoí. ¹³ Cue Moo uai siñonana omoi uiñollena, buena cue díbeido cue Moomo omoi jicaia, nana iena finoiticue. ¹⁴ Cue díbeido omoi jicaia, iena finoiticue. ¹⁵ Cuena omoi isiruia, cue llogacinuaína ñnoitomoí. ¹⁶ Ie Joreño omoimo fecallena cue Moomo jaiticue.

Naie Joreñodi omoina canoite. Omoi diga jaca iite. ¹⁷ Uanaicinona llocabite. Naimiena naimaci uiñoñena jira, cuena ñnoñedino naimiena feiñoñidimaci; iadedi naimie omoi diga illa jira, naimiena uiñotomoi. Omoi diga jaca iite. ¹⁸ Omoina fañonocaiñeiticue; ia dane biiticue. ¹⁹ Nano nigarui illanona, cuena ñnoñedino cuena nia cioitimaci. Ie mei cuena cioiñeitimaci; iadedi fiodaillamona cue jillua mei, cuena nia cioitomoi. Cue jaca illa jira, jiai jaca iitomoi. ²⁰ Fiodaillamona cue jillua mei, cue Moomo cue duillana raise uiñoitomoi. Cuemo omoi duillana jiai raise uiñoitomoi. Omoimo cue duillana jiai raise uiñoitomoi. ²¹ Cue llogacinuaina omoi isirua, cuena isiruitomoi. Ie jira cue Moodi omoina jiai isiruite. Omoina jiai isiruiticue. Omoina cuena uiñotaiticue.

²² Iscariotena mamecireñede Judas naimiemo jicanote:

—Nama, ¿bue ñellena daní caina ona uiñotaitio; iadedi jiaie comina ona uiñotañeítio?

²³ Jesús uai ote:

—Cuena isiruitinona cue rafuena uiñotadicue. Bu cuena isirua, cue llogacinuaina ñnoite. Cue Moo naimiena isiruite. Iemona naimiena nabaiticoco. ²⁴ Bu cuena isiruiñenia, cue llogacinuaina ñnoñede. Cue llogacinodi cuejeñede. Cue Moo ie. Naimie cuena oretate. ²⁵ Omoi diga nia cue illamona, bie llogacinuai omoimo jai lloticue. ²⁶ Cue Moodi omoina canollena, naga rafuena omoina llofuellena, cue facaina ie Joreñona omoimo oretate. Omoina nana omoimo llogacinuaina comecitaite. ²⁷ Cue Moo ñine jaiticue; iadedi omoi comeciaina uri itataticue. Cuena ñnoñedino omoi comeciaina iese itatanidimaci. Jarire iñeno. Jaciruiñeno. ²⁸ Ailli cue llua cacadomoi: “Cue Moo ñine jaiticue; iadedi dane biiticue”. Cue Moo ñine cue jailla jira, cuena omoi isirua, cueri iobitomoi. Cue Moo cue afemo ite. ²⁹ Bie rafue cuemo nia suiñenia, uicodo omoimo iena jai lloticue. Naie suia, cuena fañonocaiñeno omoi jaillena jitaidicue. ³⁰ Omoi diga are nia ñaiñeiticue. Cuena ñnoñedino anamo itimie cuena jai duere finoacade. Taifena ñaiticue. Naimie anamo iñedicue; ³¹ iadedi cue Moona cue isiruillana cuena ñnoñedino uiñollena, cue Moo cuemo llua isoi, finoiticue. Mai cai jailli.

15

Uvas railla riarra ie rafue

¹ Jesús nia llofuate:

—Cue ñibeimo marena omoi illena omoi raise uiñollena, jiaie rafuedo iena llofueiticue. Uvas railla ua riaradicue. Cue Moodi uvas railla riarra sedaraima. ² Cue amena igailaidomoi. Llisiñede igai cue Moo cugaica. Eo llisillena, naga lliside igaina janore muido jaigaica. Ie isoide. ³ Cue llogacinuaido jaillamona, jai jaigaica isoidomoi. Iemona omoi comeciái jai jeanide. ⁴ Cuena nabai. Ona jiai nabaiticue. Naie amenamo jai ñuiñena jira, daje ñibegaise jaitaca igaidi jai llisiñede. Ie isoide. Cuena omoi nabaicabiñenia, llisiñede igai isoidomoi. Ie jira cuena nabai. ⁵ Uvas railla riaradicue. Cue amena igailaidomoi. Cuemo omoi ñuiadedi, omoimo cue ñuiadedi, eo lliside isoidomoi; iadedi cuemo omoi ñuiñenia, jaca llisiñede isoidomoi. Cuemo omoi ñuiñenia, cue jitailla isoi mare rafuena jaca finoñeítomoi. ⁶ Jai ñuide igailai safenailla mei, marañena jira, jobaillena, danomo ofitaticai. Cuemo ñuiñedimie jai ñuide igai isoide. Jusiñamuimona duere sefuite. ⁷ Cuena omoi nabaia, cue uaina omoi feitañenia, omoi jitailla rana jica. Ie mei feiñoitomoi. ⁸ Eo lliside omoi isoia, cue Moo iobide. Iese omoi ia, ua cue cominidomoi. —Iese Jesús llofuate; ia naimie ñibeimo naimaci raise illena ñaite. Mare rafuena naimaci finocana jaillena ñaite.

⁹ Nia llofuate:

—Cuena cue Moo isiruilla isoi, omoina isiruiticue. Cuena nabaicabi. ¹⁰ Cue Moo llogacinuaina cue ñnuamona, naimie isiruillacino anamo iticue. Cue Moo llogacinuaina omoi ñnuamona, cue isiruillacino anamo itomoi. ¹¹ Cue isoi omoi comeciái eo camarellena, bicinuai omoimo lloticue.

¹² 'Dane bie rafuena llotícue. Omoína cue isiruilla isoi, coninina omoi isirui.
¹³ Naimaci o isiruillamona, o nabaiñiaí facaina o fodaia, naimacina eo ua isiruitio.
¹⁴ Cue llogacinuaina omoi ñnoia, cuena nabaidomoi. ¹⁵ Omoína “Cue mullaiaídomoi” jaca raiñedicue; iadedi omoína “Cue nabaiñiaídomoi” birui raitícue. Mullaiaí imaci patrón finoca rafuena uiñoñedimaci. Ie jira nana cue Moomona cue cacaja rafuena omoímo jai llotícue. Ie jira nana cue rafuena jai uiñotomoi. ¹⁶ Cuena fetoñedomoi; iadedi omoína fetodicue. Omoi lliside isoicabillana omoímo jai llotícue. Ie mei buena cue mamecido cue Moomo omoi jicaia, omoímo fecaite. ¹⁷ Coninina omoi isiruillena jai llotícue.

Comini Jesúsna enoilla rafue

¹⁸ Jesús nia llofueite:

—Cuena ñnoñedino omoína enoia, nano cuena jai enoidimaci. Iena uiñotomoi. Omoína nia enoiñenia, cuena jai enoidimaci. ¹⁹ Naimacimo jainaiaídomoína, omoína isiruitimaci; iadedi naimacimo omoi jainaiaíñena jira, omoína cue fetua jira, omoína enoidimaci. ²⁰ Omoímo jai llotícue. Illaíma duere sefuia, naimie anamo itino jiaí duere sefuidimaci. Ie isoide. Cuena comini duere finua isoi, omoína jiaí duere finoitimaci. Cue llofuiacinona naimaci ñnua isoi, omoi llofuiacino jiaí ñnoitimaci. ²¹ Cuena oretatimiena naimaci uiñoñena jira, cue muidona iese finoitimaci. ²² Naimacimo ite jeacinona naimacimo lloñedicuena, naimacimo ite jeacinona uiñoñedimaci. Cue rafuena naimaci cacajamona, naimacimo ite jeacinona jai uiñotimaci. Naimacimo jeacino nia ia, naimaci muidona. ²³ Cuena enoidimiedi cue Moona jiaí enoide. ²⁴ Eo siño rafuena naimaci motomo finodicue. Buna cue isoi jaca finoñede. Iena finoñedicuena, naimacimo ite jeacinona uiñoñedimaci. Cue siño finoca rafuena jai cioidimaci. Ie jira cuena enoidimaci. Cue Moona jiaí enoidimaci. ²⁵ Naimacina David micori jaie llote: “Naimacimo buena finoñedicue; ia cuena enoidimaci”. Naie ciegafuiaí jai suide.

²⁶ 'Cue Moo ie Joreño omoímo oretaitite. Ie Joreño omoína canoite. Omoína uanaicinona uiñotaite. ²⁷ Cue nano lluaruimona cue diga omoi illa jira, cue facaisena jiaí raise llotomoi.

16

Judíuaí illaícomini Jesús llofueoicaiganona duere finua rafue

¹ Jesús nia llofueite:

—Danomo abido omoi jaiñellena, cue uaina omoi faínonocaiñellena, bicinuai omoímo ja llotícue. ² Omoi ofiracomona illaícomini omoína dotaitimaci. Jiaíruido omoína meiniamona: “Jai Jusiñamuina marena sedadicaí”, comeciaina facaitimaci. ³ Cuena naimaci ñnoñena jira, cue Moona jiaí naimaci ñnoñena jira, iena finoitimaci. ⁴ Bie rafue omoímo sua, naie facaise cue lluaana omoi comecillena, omoímo birui llotícue. Omoi diga cue illa jira, navui iena lloñedicue; iadedi omoímona birui oni jaitícue.

Jesús Jusiñamui Joreñoña llua rafue

⁵ Jesús nia llofueite:

—Cuena oretatimie dine ja jaitícue; iadedi omoímona buna: “¿Ñine jaitio?” cuemo jaca nia jicanoñede. ⁶ Omoímo bie rafue cue llua jira, omoi comeciái eo sure ite. Ie jira cue jaillinona jicanoñedomoi. ⁷ Uanai llotícue. Cue jaia, mare. Cue jaiñenia, omoína canoraíma omoi dine biñeite. Cue jaia, omoi dine naimiena oretaitícue. Jusiñamui Joreñodi omoi canoraíma. ⁸ Naimie bia, cuena ñnoñedinona naimacimo ite jeacinona uiñotaite. Naimiedi Jusiñamui marena naimaci illana jitaillana uiñotaite. Naimiedi Jusiñamui naimacina duere finollena jiaí uiñotaite. ⁹ Cuena naimaci ñnoñenia, naimacina naimacimo jeacino nia illana uiñotaite. ¹⁰ Cue Moo dine abido cue jaillinona, cuena cioñeitimaci; ia iemona Jusiñamui Joreño cue uaina siñonana uiñotaite. ¹¹ Fiodaillemona

jilloitícue. Iemona cuena ñnoñedino anamo itimiedi cue Moo janafefillacino anamo iite. Taifena ñaitícue. Cue finoca rafue muidona, cue Moo Joreñodi cominina, cue Moo Joreñodi cominina naie janafefillemona jilluana uiñotaite. ¹² Diga rafue omoimo nia lloiacadícue; iadedi jai rairafaidomoi. ¹³ Jusiñamui Joreño bia, omoimo nana uanaicinuaina llofueite. Dama ie facaina llofueñeite; iadedi ie cacajacinodo llofueite. Jiairuido suille rafuena llofueite. ¹⁴ Omoina cue rafuena uiñotaite. Ie jira cuena iobitaite. Nana cue Moomo ite uaidi cueje. ¹⁵ Ie jira bie rafuena llotícue. Jusiñamui Joreño omoina cue rafuena raise uiñotaite.

Sunaillamona caimare illa rafue

¹⁶ Jesús nia llofueite:

—Dallu illanona cuena cioiñeitomoi. Ie mei dallu illanona, cuena dane cioitomoi.

¹⁷ Ie llofueoicaiganodicaimona damierie dan coninimo jicanodosite:

—¿Ñiese caimo llote: “Dallu illanona, cuena cioiñeitomoi. Ie mei dallu illanona, cuena dane cioitomoi. Cue Moo dine jaitícue”? ¹⁸ ¿Buena caimo llote? Raise cacaiñedicai.

¹⁹ Cai jicanuana Jesús uiñuanona, naimie jicanote:

—¿Cue lluaana raise uiñoiacadomoi? ²⁰ Cuemo suille rafue sua, eo eitomoi; iadedi cuena ñnoñedino eo iobitimaci. Sunaitomoi; iadedi jiairuido caimare iitomoi. ²¹ Jiaie uaido iena llotícue. Riño jocoacania, naiñaiño jigico isirede. Jocua mei, naiñaiño urue jeiciamona, isirenadi feibicaide. Iemona jai iobide. ²² Ie isoide. Ja sunaitomoi; iadedi dane omoina cioitícue. Fiodaillamona cue jillua mei, dane cuena cioitomoi. Ie mei caimare iitomoi. Iemona omoina buna sure itatañeite. ²³ Nairuimo cuemo buena jicañeno; iadedi cue Moomo jica. Ie mei cue muidona naimie omoimo fecaite. ²⁴ Cue mamecido cue Moomo buena jaca nia jicañedomoi. Jica. Ie mei feiñoitomoi, omoi comeci eo caimare illena.

Jiairuido Jesús marefodo llua rafue

²⁵ Jesús nia llofueite:

—Jiaie uaido bicinona omoimo jai llotícue. Jiairuido iese lloñeitícue. Omoina cue Moona marefodo llotícue. ²⁶ Nairuimo cue Moomo omoi facaina jicañeitícue. Cue mamecido cue Moomo omoi jitaillacinona dan jicaitomoi. ²⁷ Omoina naimie isiruillamona, omoimo fecajite. Cuena omoi isiruilla jira, cue Moomona cue billana omoi ñnuua jira, cue Moo omoina isiruite. ²⁸ Cue Moomona eniruemo bitícue. Naimie dine abido jaitícue.

²⁹ Lloticai:

—Jai marefodo caimo llotio. O uaina meidocana jai uiñedio. ³⁰ Nana rafuena o uiñuana uiñoticaí. Cai comeciaino iticinona o uiñuamona, caina raise uiñotio. Iemona Jusiñamuimona o billana jai ñnoticai.

³¹ Jesús uai ote:

—Cuena jai ñnotomoi. ³² Jiairuido, ua birui, oni tuuitomoi. Nagamiai jofomo omoi jailla mei, dama ifoconi fiebitícue; iadedi dama iñeitícue. Cue Moo cue diga iite. ³³ Cuena omoi ñnuano, omoi uri illena, omoimo bie llotícue. Eniruemo omoi ia, jaca duere sefuitomoi; iadedi omoi comeciaina ocuiño. Omoina duere finodinona jai cue emodofilla jira, omoi comeciaina ocuiño. Naimaci baifemo faitícue.

17

Jesús ie Moo diga ñaia rafue

¹ Jesús bicinona llua mei, monamo eruaillano, jide:

—Moo, cue fiodaiacananui jai ride. Cue uai siñonana uiñota. Iemei o uai siñonana jiaí uiñotaitícue. ² Nana comini afemo cuena jai itatatio. Himana cue jaillamona, nana comini afemo cuena jai itatatio. Comini comeciainuaina o meidotajamona, cue fiodaillamona, ailluena comini o diga jaca iitimaci. ³ Ona nanoca Jusiñamuina uiñoitimaci. Jai cuena

o oretajana jiaí uíñoitímaci. ⁴ Ailluena siño rafuena jai finodícue. Nana o cuemo lloga rafuena cue finuamona, bene ona jai iobitadícue. ⁵ Ore Moo, enírue nia íñena facaiseconi o díga itícue. Illaíma isoi o ecimo dane ebire iacadícue. Dane cuemo ine, daje isoi coco illesa. ⁶ Comini comeciaí iuaina o meidotajamona, naimacina jai llofuecabitícue. O anamo naimaci illamona, omo ite rafuena llofuecabitícue. Iemona o rafuena ínocana jaidímaci. ⁷ Nana cuemo ite rafue omona feiñotícue. Iena jai uíñotímaci. ⁸ Nana cuemo o llogacínuaína naimacimo jai llotícue. Jai ínotímaci. Omona cue billana jiaí jai ínotímaci. Cuen a o oretajana jiaí ínotímaci. ⁹ Naimaci facaina biruí jíídícue. Naimacina cuena ínotadío. Ie jira omo jai duidímaci. Ona ínoñedíno facaina biruí jííñedícue. ¹⁰ Nana o díbeimo itínodí cueje. Nana cue díbeimo itínodí oíe. Nana naimacirí iobidícue. ¹¹ Bene enírue mo fiebitímaci. Enírue monamo jaitícue. O díne abído jaitícue. Ore Moo, jeacino naimaci finoi raillano, o anamo o uai díga naimacina seda. Coco comeci lloilla isoi, naimaci daje isoi comeciaina lloita. ¹² Naimaci díga nia cue ía, naimacina cue anamo sedadícue. Naimacina raise sedadícue, naimaci feirai raillano. Naimaci motomona dama Judas feiraite. Jusiñamui lloráima micorí ciegafuíai suillena, naimíe ua faífte. ¹³ O díne ja jaitícue. Cue isoi naimaci comeciaí eo caímare illena, naimacimo ailluena rafuena jai llotícue. ¹⁴ O llogacínuaína jai llotícue. Ona ínoñedínomo naimaci jainaíaiñena jira, ona ínoñedíno naimacina enoidímaci. Ona ínoñedínomo jiaí jainaíaiñedícue. ¹⁵ Enírue mona biruí o naimacina uana jícanoñedícue; iadedí Taífemona naimacina o sedajana biruí jícanotícue. ¹⁶ Ona ínoñedínomo jainaíaiñedímaci. Ona ínoñedínomo jiaí jainaíaiñedícue. ¹⁷ O llogacínuaído naimacina marena itata. O llogacínuaídi uanaicino. O jitaillacínona naimaci finollena, o uai naimaci comeciaino raise itata. ¹⁸ Bene cuena o oretaja isoi, ona ínoñedíno díne naimacina oretatícue. ¹⁹ Uanaicínona naimaci uíñuamona, naimaci comeciaí marebicaillena, cuena ínotíno facaina fiodaiacadícue. ²⁰ Bimacina biruí dane jííñedícue; iadedí bimaci cue rafuena íco lloía, jiaíe comini cuena ínoitímaci. Cuen a íco ínoitíno facaina biruí jiaí jíídícue. ²¹ Daajedicoco. Coco illa isoi, naimaci comeciaina daje isoi lloillena, nana naimaci facaina jíídícue. Daje isoi comeciaí lloillamona, cuena nia ínoñedínodí ínoitímaci. Iemona cuena o oretajana ínoitímaci. ²² Cuemo o iga uaidí ebirede. Naimaci comeciaí lloillena, naimacimo o uai jai cue iga. ²³ Naimacirí dajedicai. O díga daajedicoco. Naimaci comeciaí daje isoi lloillana jitaídícue. Iemona cuena ínoñedíno bene cuena o oretajana uíñoitímaci. Cuen a o isiruilla isoi, naimacina o isiruillana jiaí uíñoitímaci. ²⁴ Ore Moo, naimaci cue díne illena jitaídícue. Enírue nia íñenia, illaíma isoi o ecimo ebire jaíe itícue. Dane íe isoi ebire biruí cue ía, naimaci cuena cíuana jitaídícue. ²⁵ Ore Moo, mareuidímedíno. Jiaíe comini ona uíñoñedímaci; iadedí ona uíñotícue. Cue llofueoicaiganodí o cuena oretajana jai uíñotímaci. ²⁶ Naimacimo ona jai llotícue. O cuena isiruilla isoi conínna naimaci isiruillena, naimacimo nia llotícue —jíde.

18

Jusúna gaitalle rafue

(Mt 26.47-58; Mr 14.43-54; Lc 22.47-54)

¹ Jíia meí, Jesús íe llofueoicaiganodícaí díga, Cedrón railla iconí enefebeimo ruica aceituna railla riaraiái illanomo naíona jaide. ² Jesús caí díga nainomo jaisoilla jira, Judas micorí naíe illanona jiaí uíñote. Jesúsna gaitatallena nainomo Judas jaide. ³ Soldaduaí díga policías díga jaide. Naimacina ífode. Jusiñamui díga nanoca ñairainí naimacina oredímaci. Fariseuai naimacina jiaí oredímaci. Soldaduaídi lamparíníairí bitímaci. Reinaíairí jiaí bitímaci. Sidaníaíri jiaí bitímaci. Judas naimacina ífode. ⁴ Jesúsdi nana naimíemo suille rafue uíñuanona, naimaci díne billano, jícanote:

—¿Buna jenodomoí?

⁵⁻⁶ Uai otímaci:

—Nazaret ie Jesús.

Jesús uai ote:

—Imiedicue.

Iena cacajano, jacinailamona, abido ñajillamona, eniruemo uaidimaci. Jesúsna gaitatallena, Judas micori naimaci diga ite.

⁷ Jesús dane jicante:

—¿Buna jenodomo?

Uai otimaci:

—Nazaret ie Jesús.

⁸ Jesús uai ote:

—Omoimo jai lloticue: “Imiedicue”. Cuen a omo jenoia, cue diga itino oni jaillena rairuñeno.

⁹ Naimie ie Moomo como lloga uai suillena, iese llote. Iese ie Moomo como llote: “Cuen a o ñnotaganomona jaca buna faifñedicue”. ¹⁰ Ie daacaiño Simón Pedro ie lloebi llino caida, Jusiñamui diga nanoca ñairaima mullaima jefona jaibonote. Naie mullaima mamecidi Malco. ¹¹ Iena ciuanona, Jesús Pedromo llote:

—O lloebina eeno. Cue Moo jitailla isoi, fioidaiticue.

¹² Ie mei soldaduai, imaci capitán diga, judíuai imaci policías diga, Jesúsna gaitajano, naimiena maitimaci. ¹³ Anás dine nano uitimaci. Anásdi Caifás jifai. Caifásdi Jusiñamui diga nanoca ñairaima. ¹⁴ Navui Caifás judíuai illaicomínimo llote: “Damie nana cai comini facaina fioidaitena, mare”.

Pedro Jesúsna nano janua rafue

(Mt 26.69, 70; Mr 14.66-68; Lc 22.55-57)

¹⁵ Simón Pedro Jesús jinafo racade. Jiai racadicue. Cuen a Jusiñamui diga nanoca ñairaima uñua jira, ie nairairimimo Jesús diga jaidicue; ¹⁶ iadedi Pedro nasemo fiebicaide. Ie jira jino abido jaillano, Pedro fo atillena, nasena sedaraiño jicantocue.

¹⁷ Naiñaiño Pedromo llote:

—Jesús llofueoicaigano imiedio.

Pedro uai ote:

—Ieñedicue.

¹⁸ Rosirena jira, naie jofu mullaiai, policías diga, cooci diga irai bonodimaci. Agaillena irai ecimo naidaidimaci. Agaillena Pedro naimaci motomo jiai ite.

Jesús Anás dine illa rafue

(Mt 26.59-66; Mr 14.55-64; Lc 22.66-71)

¹⁹ Ie facaise Anás Jesúsno ie llofueoicaiganodicaina jicante. Ie llofuiacinuaina jiai jicante. ²⁰ Jesús dinena uai ote:

—Nana comínimo marefodo lloticue. Omo ofiracuaimo jaca llofuecabiticue. Jusiñamui jofomo jiai jaca llofuecabiticue. Nainomo nana o comini oficabidomoi. Bainino buena jaca lloñedicue. ²¹ ¿Bue ñellena birui cuemo jicantio? Cuen a cacadinomo iena jicano. Cue llofuiana uñotimaci.

²² Iese Jesús llua jira, daje policia naimie uiecona butade. Jesúsno jicante:

—¿Bue ñellena iese uai otio?

²³ Jesús dinena naie uai ote:

—Naimie uai jeare oticuen a, cuemo llono. Jeare oñedicuemo, ¿bue ñellena cuena butadio?

²⁴ Jesús uai oñede. Iemei Anásdi Caifás jofomo Jesús maianona orede.

Pedro Jesúsna dane janua rafue

(Mt 26.71-75; Mr 14.69-72; Lc 22.58-62)

²⁵ Ie facaise Pedro irai ecimo nia agaide. Nainomo itino naimiemo llote:

—Jesús llofueoicaigano imiedio.

Pedro janote:

—Ieñedicue.

²⁶ Naie facaise daje mullaïma Pedromo llote:

—Aceitunas railla riaraiï illanomo ona ciodicue —llote. Jusúna soldaduai gaitaja facaiseconi Pedro naie mullaïma ie come jefona ailli jaïbonote, soldaduai Jesúna gaitaja ie daacaiño. ²⁷ Pedro dane janote. Ieconi itava ñaite.

Jesús Pilato ðine illa rafue

(Mt 27.1-2, 11-14; Mr 15.1-5; Lc 23.1-5)

²⁸ Ie mei Caiías jofomona gobernador jofomo Jesúna jitiramo uitimaci. Naie facaise gobernardi Pilato. Naimiedi judíuaiñedimie. Naimaci einamaci rairuilla jira, judíuaiñedimie jofomo naie facaise fo jaiñedimaci. Fo jaiadedi, pascua railla rafue guilledi guiñega. ²⁹ Ie jira Pilato jino bite. Naimacimo jïcanote:

—¿Ñie isoide rafue muidona llogidotomoi?

³⁰ Uai otimaci:

—Bimie maraiñede rafue finoñedena, o ðine naimiena atiñedicaï.

³¹ Pilato llote:

—Naimiena uiño. Omoi einamaci llogacínuaïdo naimiena duere fino.

Uai otimaci:

—Come meinellena caïmona rairuidomoi. Naimie coraïana jitaidicaï —llotimaci.

³² Navui Jesúdi: “Cuenta cruzmo coraitimaci” llote. Naie llucino jai suisaide.

³³ Pilato fo abido jaillano, Jesúna uaiduano, naimiemo llote:

—Judíuai illaïma raillamiedio.

³⁴ Jesús ðinena jïcanote:

—¿O comecina dama iese facajano llotio? Iese comecina o facañenia, jiaïmie omo lloga.

³⁵ Pilato uai ote:

—Judío imieñedicue. O rafue raise uiñoñedicue. Omoi comini cuemo ona fecadimaci. Jusiñamui ðiga nanoca ñairaini cuemo jiaï fecadimaci. ¿Ñie isoide maraiñede rafuena finodio?

³⁶ Jesús uai ote:

—Eniruemo cominina sedañedicue. Judíuai illaïcomini cuenta gaitañellena, eniruemo cominina sedadicedena, cue comini cue facaina fuiridimaci.

³⁷ Pilato uai ote:

—Ie jira odi illaïmadio.

Jesús uai ote:

—Jaca railla. Uanaicino lollena, jeicigacue. Nana uanaicinona jitaidino cue lluaña cacadimaci.

³⁸ Pilatodi Jesús uaina uaitajamona, raite:

—¿Ñie uai naidi uaina?

Ie mei dane jino billano, cominimo llote:

—Jaca nicino naimiemo iñede.

Jesúna coraïacana rafue

(Mt 27.15-31; Mr 15.6-20; Lc 23.13-25)

³⁹ Pilato nia llote:

—Naga año pascua railla rafue illa facaise, damie cárcelmona jino ollena, cuemo jïcanuaïbisoidomoi. Bie año omoi jitaïa, omoi illaïma raillamiena mareña oretaiticue.

⁴⁰ Comini ðinena cuiriidimaci:

—Dama ite. Bimiena jitaiñedicaï. Barrabásna cárcelmona mareña jino oreta. —Iese cuiriidimaci. Barrabásdi firiraïma.

19

¹ Ie mei Pilato Jesúna oni uillanona, naimiena sechedotade. ² Jifanodosillena, soldaduai eecuaimona finoca nuiciraina naimie ifogimo jitadimaci. Jiduirede iniroina jitatajano raitimaci:

³—Judíuai illaimadio. —Iemei ie uiecona bucoidimaci.

⁴ Pilato dane jino billano, raite:

—Naimie omoi dine jino ja biite. Naimiemo nicinodi iñede —raite.

⁵ Ie facaise Jesús jino bite. Eecuaimona finoca nuiciraina jitaca. Jiduirede iniroina jitaca. Pilato naimacimo llote:

—Jadi, naimie.

⁶ Jusiñamui diga nanoca ñairainidi, jiaie illaicomini diga, naimiena cuano, cuiiriidimaci:

—Naimiena corai.

Pilato llote:

—Naimiemo nicinodi iñede; ia oni uillanona, naimiena omoi corai.

⁷ Uai otimaci:

—Moisés micori jaie cuega: “Bu Jusiñamuina jeare ñaianona, fiodailla”. “Jusiñamui Jitodicue” naimie railla jira, naimie fiodailla. Naimie Jusiñamui Jitona abina caitadimie. Caïmona naimiedi marañede rafue jai finode.

⁸ “Naimiedi Jusiñamui Jito” comini raillana Pilato cacajano, eo jacinaite. ⁹ Jesúna dane fo uite. Jesúdi Jusiñamui Jitona naimie raise uiñollena, Jesúmo jicanote:

—¿Ninena bitio?

Jesús uai oñede. ¹⁰ Ie jira Pilato dane jicanote:

—¿Bue ñellena cue uaina oiacañedio? Uai cuemo ite, o marena oretallena. Uai cuemo ite, ona coraitallena.

¹¹ Jesús uai ote:

—O anamo Jusiñamui cuena itataja jira, o uai ite, cuemo lollena. Ie jira omo cuena fecadino o baifemo jeacino finodimaci.

¹² Ie facaimona Pilato Jesús marena jino oretaiacade; iadedi judíuai illaicomini dinena cuiiriisite:

—Bimie o jino marena oretaia, cai nanoca illaïma ie nabaiñedio. “Illaïmadicue” Jesús lluamona, cai nanoca illaïma dibeïmo naimiedi iñede. Cai nanoca illaïmadi César.

¹³ Comini lluana cacajano, Pilato Jesúna jino atide. Ie cominimo lloranomo raide. Naie illano nofinina mamecïrede. Judíuai uaido Gabatana mamecïrede. ¹⁴ Pascua rafue guilla finoraruijoma naidai illanona, Pilato dinena llote:

—Jadi, omoi illaïma.

¹⁵ Iemona cominidi cuiiriisite:

—¡Naimie oni uillanona, naimiena meïne! ¡Naimiena corai!

Pilato jicanote:

—¿Bue ñellena omoi illaïmana coraiticue?

Jusiñamui diga nanoca ñairaini uai otimaci:

—Cai illaïmadi César. Jiaie illaïmadi caïmo iñede. Jaca dallaïmade cai illaïmadi.

¹⁶ Ie mei Pilato naimacimo naimiena fecade, coraïllena.

Jesúna coraïacana rafue

(Mt 27.32-56; Mr 15.21-41; Lc 23.26-49)

Pilato lua jira, Jesúna uitimaci coraïllena. ¹⁷ Jesúdi ie cruzna rocaocaida sonode. Ifocoraina eruaila mamecïrede illanomo jaidimaci. Judíuai uaido naie illano Gólgotana mamecïrede. ¹⁸ Nainomo naimiena coraidimaci. Naimie abïmo menamie coraïca. Damie Jesús nabeïmo. Jiaïmie jarifebeïmo. ¹⁹ Cruzmo jonellena, Pilato rabiçimo cuetatate: “Nazaret ie Jesús. Judíuai Illaïma”. ²⁰ Judíuai uaido cuega. Romanos comini uaido jiaï cuega. Griego uaido jiaï cuega. Jesús coraïano Jerusalén ianori illa jira, aïlluena comini iena cioidimaci.

²¹ Iena ciuamona, naie rabičina meidollena, Jusiñamui diga nanoca ñairaini Pilatomo llotimaci:

—“Judíuai Illaíma” raillano jai cuetatatio. Iena meiduana jitaídicaí. Bimie dinena raisoide: “Judíuai Illaímadícue” raillanona, o cuetatajana jitaídicaí

²² Pilato uai ote:

—Jai cuetataticue. Jiaie rabiçimo dane cuetatañeíticue.

²³ Jesúna coraía mei, soldaduai naimie iniroi uanona, naga soldado digamie jonega iniroi. Nagaamaga soldaduai ite. Ie camisa fiebide. Naie daje jamai nigaroi. ²⁴ Ie jira dani coniniri ñaitimaci:

—Bie camisa cuaranoñeíticaí, dani cai fecallena. Mai. Conima jabomaiticaí, iena ollena. —Iese finuano Jusiñamuina lloraima micori ciegafuiai suide. Jaiie cueba: “Cue iniroi dani naimacimo fecaitimaci; iadedi cue camisa ollena, conima jabomaitimaci”. Iese finodimaci.

²⁵ Cruz abimo Jesús ei, ie euiño diga ite. Cleofas aidi ite. Naiñaiño mameci María. María Magdalena jiai ite. ²⁶ Jesús ie eina ciode. Cuenaiñaiño ecimo jiai ciode. Cuenaiñaiño eo gaide. Ie jira ie eimo llote:

—Jadi, o jito isoi itimie anamo iitio.

²⁷ Cueno llote:

—Jadi, o ei isoidiñaiño anamo iitio.

Naie dacaiño naiñaiño cue jofomo uillanona, naiñaiño sedadícue.

²⁸ Ie mei Jesús nana rafue jai fuillana uíñuano, llote:

—Jiroacadícue. —Iese lluanona, Jusiñamuina lloraima micori jaiie ciegafuiai jai suide.

²⁹ Nainomo llerojimo vino ite. Radosimo fibecode rana joniano, vinomo faite. Iemei Jesúmo fecade jaronollena. ³⁰ Iena jaronuano, Jesús llote:

—Cue maijia jai fuite. Jai macaibaite. —Ie ifogi ana jítadacaida, fiodaite.

Jesús sida diga ducia rafue

³¹ Pascua railla rafue guille finuarui illa jira, judíuai illaicomini Pilato dine jaidimaci. Raíre fiodaillena, coraicano idaíaina uellullena naimiemo jicanuaidimaci. Sábado rafue ie nairui nia illanona, sábadorui jai raíre taíneacana jira, coraicano cruzmo sábadoruimo illana jitaíñedimaci. ³² Soldaduai jaillano, Jesús ecimo coraica iaímaiaí idaíaina uellude. ³³ Jesús dine billano, naimie jai fiodaillana ciódimaci. Ie jira naimie idaíaina uelluñedimaci; ³⁴ iadedi daje soldado Jesús ciraigiconi sida diga ducide. Naifo diaide. Naifomona jinui jiai bite. ³⁵ Nana iena ciódicue. Uanai llotícue. Omoi inollena, iena llotícue. ³⁶ Soldaduai iese finuamona, jaiie ciegafuiai jai suide. Jaiie Jesúna cueba: “Naimie illaicina taínoñeítimaci”. ³⁷ Jiai jaiie cueba: “Judíuai dinena naimaci ducitagamiemo íco eruaitimaci”.

Nofici ifomo Jesús raía rafue

(Mt 27.57-61; Mr 15.42-47; Lc 23.50-56)

³⁸ Naie facaise Pilato dine José raillamie jaide. Cruzmona Jesús abi oni ollena, Pilatomo jicanuaide. Josédi Arimatea nairai imie. Pilato faíriote. Ie jira José Jesús abi ana uanona, iena oni uite. Judíuai illaicomínina naimie jaciruillanona, Jesúna bainino inote. ³⁹ Nicodemo jiai bite. Siorede rana atíde. Mirra áloe diga jai tamiano atíde. Nibai treinta kilos atíde. Naimiedi Jesús dine naíona navui bite. ⁴⁰ José, Nicodemo diga, Jesús abina useroina ferinotiaímaiaí. Naimaci comini finouilla isoi, naie siorede radi iniroimo jonega. ⁴¹ Amenaiaí iaíre illanomo Jesúsdi coraica. Nainomo nofici ie raíafodi ite. Nia buna naifomo raíñenafo. ⁴² Naifo iaíre illa jira, sábadorui jai riacana jira, jiaie raírafo jenollena abi juanina jira, nainomo naimiena jonetiímaiaí. Nofici diga raírafo raise íbailla mei, jofomo jaidiaímaiaí.

20

Fiodaillamona, Jesús jillua rafue
(Mt 28.1-10; Mr 16.1-8; Lc 24.1-12)

¹ Domingo jítiramo nia monaiñenia, raiafomo María Magdalena jaide. Raiafo ibaila nofici oni joillana ciode. Jesús abina cioiñede. ² Ie jira aisicana Pedrona jenuaide. Cuenajia jenuaide. Baillano, llote:

—Cai illaicomini cai Nama abina raiafomona otimaci. Naimiena jonianona uiñoñedicue.

³ Ie mei raiafomo jaidicoco. ⁴ Aisicana jaidicoco; iadedi riire cue aisicana jailla jira, nano ridicue. ⁵ Ana bitadacaida, fo erodaticuemo, useroi joillana ciodicue; iadedi fo jaiñedicue. ⁶ Ie mei Simón Pedro rillano, fo jaide. Useroi joillana jia ciode. ⁷ Ie ifogimo ferinoga iniroi eneno illana ciode. Raise nacuana ciode. ⁸ Iemei jia fo jaidicue. Iniroina ciuamona, Jesús jai jilluana inoticue. ⁹ Jaiie ciegafuia llot: “Fiodaillamona jilloite”. Naie ciegafuiaina como raise inoticoco. ¹⁰ Ie mei jofomo jaidicoco.

María Magdalenamo Jesús bairia rafue
(Mr 16.9-11)

¹¹ Raiafomo abido billano, coco jailla mei, nainomo María fiebide. Eede. Ana bitadacaida, fo erodatemo, ¹² Jusiñamui mona mena jaienici jai billana ciode. Userede iniroi jitadiaimaia. Jesúsna navui jonianomo ana raidiaimaia. Damie ifogi dibeimo raide. Jai mie eilli dibeimo raide. ¹³ Naiñaiño como jicanotiaimaia:

—¿Bue ñellena eedio?

Naiñaiño uai ote:

—Cue Namana bu oni uillanona, naimiena jonianona jai uiñoñedicue.

¹⁴ Naie facaise jinafo dine erocaillanona, Jesúsna ciode; iadedi naimiena uiñoñede. ¹⁵ Naiñaiño comecina facade; “Naimiedi bie illano sedaraima”. Jesús naiñaiño como jicanote:

—¿Bue ñellena eedio? ¿Bu jenodio?

Naiñaiño uai ote:

—Jesúna o uia, naimie jonianona cuemo llono. Ie mei naimiena oni uiticue.

¹⁶ Jesús dinena uai ote:

—¡María!

Naimie dine naiñaiño como raise dobaicaide. Judíuai uaido llote:

—¡Raboni! —Naie uai oni dobaiaimona: “Llofueraima”.

¹⁷ Jesús uai ote:

—Cuenalinoñoeno cuena faicai. Cue Moo dine nia a jaiñedicue. Cue amatia dine mai jaillanona, cue rafuena lluai. Cue Moo dine jaiticue. Naimiedi cue Jusiñamui. Naimie jia omoi Moo. Jia omoi Jusiñamui.

¹⁸ Ie jira María Magdalena Jesús llofueoicaiganodicaimo lluaibite:

—Cai Namana jai ciodicue. —Iemei caimo naimie naiñaiño como lluaana llote.

Jesús ie llofueoicaiganomo bairia rafue
(Mt 28.16-20; Mr 16.14-18; Lc 24.36-49)

¹⁹ Domingo naio Jesús llofueoicaiganodica jofomo ofidica. Judíuai illaicominina cai jaciruillamona, nasia nana cai ibaica. Nase econoñoeno ieconi Jesús cai motomo billanona, caina uaiduano, llote:

—Uri omoi i.

²⁰ Ie onollina acatate. Ie ciraigina jia acatate. Cai Namana jai cai ciuari eo iobidica.

²¹ Jesús dane llote:

—Uri omoi i. Cue Moo cuena oretaja isoi cue rafuena llollena, omoina oretaiticue.

²² Ie facaise caina firaiñuanona, raite:

—Jusiñamui Joreñona omoi feiñuana jitaídícue. ²³ “O jeacínona jai dotade” bumo omoi lloia, Jusiñamui jai dotaca. “O jeacínona nia dotañede” bumo omoi lloia, Jusiñamui nia dotañega.

²⁴ Naie naio Tomásna mameciredede llofueoicaigamie cai diga iñede. Dídimona jiai mameciredede. Naimiedi gorasa. ²⁵ Naimiemo llotícaí:

—Cai Namana ailli ciodícaí.

Tomás uai ote:

—Clavo ifona naimie onolli jeraimo cue cioñenia, naie ifona cue jetañenia, naimie ciraigi ifona cue jetañenia, ñnoñeítícue.

Jesús ie llofueoicaiganomo dane bairia rafue

²⁶ Ocho digarui illanona, Jesús llofueoicaiganodícaí dane ofillano, Tomás cai diga ite. Nana nasiaí ibaica; iadedí nase econoñeno ieconi Jesús cai motomo dane fo billano, uaiduano, llote:

—Uri omoi i.

²⁷ Iemeí Tomásno llote:

—Eroda cue onollimo. Naifo jeta. Ciraigi ifona jiai jeta. ñnoñeno jaiñeno. Mai ñno.

²⁸ Tomás uai ote:

—Cue Namadio. Cue Jusiñamuidio.

²⁹ Jesús dane uai ote:

—Cuena o ciua jira, cuena ñnotio; iadedí cuena cioñedíno cuena ñnoia, jiai caimare iitimaci.

³⁰ Jesús diga siño rafuena finode. Iena ciodícaí. Nana naie rafuena bie rabenicomo cueñedícue; ³¹ iadedí dajerie cuetícue. Jesúdí cai Jilloitaraímana omoi ñnollena, iena cuetícue. Naimiedi Jusiñamui Jitona omoi ñnollena, iena jiai cuetícue. Naimiena omoi ñnuano, naimie diga jaca iitomoí.

21

Jesús ie llofueoicaiganomo ane bairia rafue

¹ Diga irui illanona, Tiberiana mameciredede jorai fuemo Jesús ie llofueoicaiganodícaímo dane bairede. ² Nainomo diese itícaí: Simón Pedro, Tomás, Natanael, cue ama Jacobo, cue, jiaie iaímaiaí. Tomás mamecí jiaicídí Dídimó. Natanael Galilea ie Caná nairaí imie. ³ Simón Pedro caímo llote:

—Lloiji faíaitícue.

Naimie uai otícaí:

—O diga jaitícaí. —Iese raillano, botemo jaidícaí. Namona naio lloijina faitícaí; ia jaca buena oñedícaí. ⁴ Monaiacademo, Jesús jorai fuemo bite; iadedí naimiena uiñoñedícaí.

⁵ Jesús caímo jicanote:

—Caimaci, ¿nie diese lliciaína jai otomoí?

Uai otícaí:

—Jaca oñedícaí.

⁶ Naimie dane uai ote:

—Omoi bote nabei díne omoi lloijina faíno.

Ie jira faitícaí. Ailluena lliciaí naiemo jilla jira, a aiñonidícaí. ⁷ Iena ciuamona, Pedromo llotícue:

—Cai motomo cai Namadí ite.

Pedro iena cacajano, naimie taímiena jira, ie ñiroi jítade. Jesús díne naimie raíre rillena, joraimo daiade; ⁸ iadedí botedo bitícaí. Enírué iaíre illa jira, na lliciaímo sonocana, lloijina atídícaí. Nibaí cien metros oni ite. ⁹ Jorai fuemo cai ría, coocímona bonoca iraina ciodícaí. Lliciaí iraimo ruica jai ite. Llomenico jiai ite. ¹⁰ Jesús caímo llote:

—Omoi oga lliciaímona janore atí.

¹¹ Ie jira Simón Pedro botemo jaillano, llojjina llinuanona, eniruemo ari sonode. Ciento cincuenta y tres jemerie jitaticai. Ailluena ite; iadedi lloiji cuarariñede. ¹² Jesús llote:

—Mai guisaibi. —Jesúna cai uñua jira: “¿Budío?” jaca buna raiñena. ¹³ Jesúsdi llomenico diga lliciaina caina ecade. ¹⁴ Fiodaillamona jillua facaisemona dacaiño amani caimo Jesús jai abina bairetate.

Jesús Pedro diga ñaia rafue

¹⁵ Guilla mei, Jesús Simón Pedromo llote:

—Simón, odi Juan jitodio. —Jiai jicante— ¿Nana o nabaiñiai baifemo cuena isiruitio?

Simón uai ote:

—Jii, Nama, ona cue isiruillana uñotio.

Jesús uai ote:

—Toica llaudaiai uruiaina omoi raise sedaja isoi, cuena ñnotinona raise seda. Naimacina cue rafuena raise llofue.

¹⁶ Dane llote:

—Simón, odi Juan jitodio. —Dane jicante— ¿Cuena isiruitio?

Simón uai ote:

—Jii, Nama, ona cue isiruillana uñotio.

Jesús dinena uai ote:

—Toica llaudaiai uruiaina omoi raise sedaja isoi, cuena ñnotinona seda.

¹⁷ Dane jicante:

—Simón, ¿cuena isiruitio? —Jesús naimiemo dane jicanua jira, “Jesús cue uaina ñnoñede” raillanona, Pedro comeci sunaite.

Uai ote:

—Nama, naga rafuena uñotio. Ona cue isiruillana uñotio.

Jesús uai ote:

—Toica llaudaiai uruiaina omoi raise sedaja isoi, cuena ñnotinona seda. ¹⁸ Daje rafue omo nia lloiticue. O nia conirue facai o ñiroi dama jitadio. Ie mei o jitaillanomo jaidio. O uaicroma facaiseconi o onolli oni ñuitaitio. Ie mei jiaimie o ñiroi ona jitajano, o jitañenanomo ona uite. Cue lluaña ñnocana o jai.

¹⁹ Fiodaillena Pedro uñollena, uicodo Jesús iese llote. Cristo llua isoi, Cristo rafue muidona, illaicomini Pedrona jiairuido meinetimaci. Naimie fiodaillanona, Jusiñamuina iobitade.

Jesús ie gaia llofueoicaigamiemo llua rafue

²⁰ Pedro diga Jesús nia ñaia facaise, Pedro dobaicaillanona, cuena ciode. Iaimaiai jinafona racadicue. Jesús gaiaimedie. Navui cai guia, Jesús nia fiodañenia, Jesús abimo cue ia, Jesúmo jicantocue: “¿Bu gaitatallio?” ²¹ “Cuena ñnotinona seda” Pedromo Jesús llua mei, Pedro dobaicaillanona, cuena ciuano, Jesúmo jicante:

—Nama, ¿niese naimie fiodaite?

²² Jesús uai ote:

—Naimie nia itemo, cue abido bia, dama iesede. Naimie rafuedi omo duiñede; ia cue lluaña ñnocana o jai.

²³ Ie jira creyentiai naie lluaña fidiano cuena raitimaci:

—Naimie fiodañeite. —Iese raitimaci; iadedi Jesús iese raiñede. Jesús llote: “Naimie nia itemo, cue abido bia, dama iesede. Naimie rafuedi omo duiñede”.

²⁴ Nana rafuena ciuano lloticue. Iena cueticue. Uanaicinuaina cueticue.

²⁵ Jesús ailluena jiaie rafuena finode. Nana ie rafue cuedadena, enirue baiñede, naie libros eenollena. Mai. Juandicue.

JESUCRISTO ORETAGANODI NAIMIE RAFUE LLOCANA UILLA RAFUE

Jesús Jusiñamui Joreño billena llua rafue

¹ Teofilo, o dine, ¿nigacino? ¿Nie isoidio? Omo jiaie rabe birui dane oretaiacadie. Lucadie. Navui jiaie cartana oretaticue. Ailluena Jesús finoca rafuena nainomo cueticue. Ailluena Jesús llofuiacinona jiaie cueticue. ² Monamo naimiena Jusiñamui nia uiñenia, Jesús ie llofueoicaiganona llofueuide. Ie llofueoicaiganona jiaie naimie fetuamona, Jusiñamui Joreño uaido naimacina llofueuide. Naie llofuiacinona navui cueticue. Jesús monamo jailla mei, ie llofueoicaigano naimie oretaganona mameciredimaci. ³ Naimie fodaillamona ie jillua mei, naimacimo bairede. Naimie ua jilluana naimaci raise uiñollena, diga icaiño cuarenta digarui naimacimo baireuide. Naimacina Jusiñamui dibeimo ie comini jai illa rafuena llofueuide. Naimiemo jai suide rafuena llofueuide. Naimiemo nia suiñede rafuena llofueuide.

⁴ Naimaci diga Jesús guilla facaise, naimie Jerusalémona naimaci oni jaillana rairuide. Raite:

—Cue Moo ie Joreño omoimo fecallena, omoimo jai llotie. Naiena omoi feiñollena, Jerusalémo nia fiebi. ⁵ Naimie rafuena comini inuamona, Juan Bautista micori jinui diga bautizade; iadedi cue rafuena omoi inuamona, nano nigarui illanona, cue Moo ie Joreñona feiñoitomo —raite.

Monamo Jesús jailla rafue

⁶ Ie llofueoicaigano diga Jesús dane ofillanona, naimiemo jicanotimaci:

—Nama, ¿birui cai judiaie cominina jai sedaitio, David micori cai usumatiaie micoriaie jiaie sedaja isoi?

⁷ Naimie uai ote:

—Naie rafue suille facaiseconi jaca uiñoñeitomo. Naimie siñona illamona, dama cue Moo naie rafue suilliruina uiñote; ⁸ iadedi cue Moo ie Joreñona omoi feiñua mei, siño uai omoimo iite. Ie jira Jerusalémo cuena lloitomo. Judeamo, Samariamo, ua nana eniruemo ite nairaimo lloitomo —raite.

⁹ Naimie iena llua mei, Olivos railla anedumo jai jaidimaci. Nainomo itimacimo, naimaci eruaisitemo, monamo Jesús Jusiñamui uiga. Uillie illa jira, naimiena cioisiñede. ¹⁰ Monamo nia eruidemo, ieconi naimaci dine Jusiñamui jaienici, mena ima bairia isoi, bairediaimaia. Naie iaimaia iniroi userede. ¹¹ Raitiaimaia:

—Galileo imaci, ¿bue ñellena monamo eruidomo? Omoi motomona Jesús monamo jaillana jai ciidomo. Naimie jai jailla isoi, dane abido ico biite —raitiaimaia.

Matiana fetua rafue

¹² Naimacimo Jusiñamui jaienici llua mei, Olivos railla anedumona Jerusalémo naisodo abido jaidimaci. Olivos railla anedumona Jerusalémo ochocientos metros dinori illanona, sábadoruimo Moisés micori lloga dinori macaritimaci. ¹³ Rillano imaci cuartomo jaidimaci. A dibebamo ite. Nainomo itimaci: Pedro, Jacobo, Juan, Andrés, Felipe, Tomás, Bartolomé, Mateo, jiaie Jacobo. Naimiedi Alfeo jito. Simón ite. Naimiedi cananista comini facaisemo duide. Judas ite. Naimie jiaie Jacobo jito. Diese nainomo itimaci. ¹⁴ Naimaci jitaillamona, Jusiñamuimo jillena, nagarui danomo ofidimaci. Jillena, jaino naimaci diga jiaie ofisoidimaci. Diga riñoniaie jiaie ofisoidimaci. Jesús ei, María, jiaie ofisoide. Jesús amatiaie jiaie ofisoidimaci.

¹⁵ Comini ofilla motomo Pedro naidaita, rafuena llote. Nibaie ciento veinte comini nainomo itimaci. Pedro llote:

¹⁶—Amatíai, David micorí jaie lloga rafue birui jai suide. Jusiñamui Joreño jaie David micorína Judas micorína ñaitatate. Salmos rabenicomo naie ñaiacínodi cueba. Iena uiñotícaí. Judas micorína uiñotícaí. Naimie Jesúsna gaitadinona ifode. ¹⁷ Naimiedi da cai llofueoicaigano imie. Cai diga maijjuide. ¹⁸ Ie maraiñoeno finoca rafuemona ucubena feiñua mei, ie comeci iuaina meiduanona, naie ucubena oni judaíde. Judíuái illaicomíni naie ucube diga enirruena ibadímaci. Nainomo Judas micorí ie cimáio cuinajanona, ie abína dama meinete. Rifaillamona, ana uaillamona, ie jebegi boficaillamona, nana ie jebegi jino uaide. ¹⁹ Nana Jerusalémo itino iena fidídímaci. Ie jira cai uaido naie enirue mameciredede Acéldama. Oni dobaiñuamona dirue toillaníe. ²⁰ Ero, Salmos rabenicomo Judas micorína iese David micorí jaie cueba:

Naimie illano taino iite.

Buna jaca iemo iñeite.

Naimie maijille jiaimiemo iite.

Iese cueba. ²¹⁻²² Ie jira cai diga itinomona damiēna fetoitícaí. Cai Nama Jesús cai diga illa facaiseconí, nagaruí diga iñiaí cai diga jaisoidímaci. Juan Bautista micorí Jesúsna bautizaja facaisezona, Jesús monamo caimona jaillaruí facaiseconí, naimaci cai diga jiaí itímaci. Naimacimona damiēna fetoitícaí, Jesús jilluana cai diga lollena. —Iese Pedro raite.

²³ Ie mei mena iimana fetodímaci. Damiēdi José Barsabas. Jiaíci mameci Justo. Jiaimiedi Matías. ²⁴ Ie mei Jusiñamuimo jüdímaci:

—Nama, nana comíni imaci comeciāna uiñotío. ¿Nie iimana jitaídío? Caina uiñota.

²⁵ Naimiedi Judas ifo meidoite. Jesús ie oretagamíēna naimie jaillamona, cai diga maijjíte. Ie fiodaillamona Judas micorí ie maijiana jai faínonocaide —jüdímaci. ²⁶ Ie jira conima jabomasíde, uiñollena bu ille. Matíamo baite. Iemei jiaíe once diga oretagano isoi naimie íte.

2

Cristo oretagano Jusiñamui Joreño feiñua rafue

¹ Pentecostés railla rafue iruí ría, nana creyentíai díese danomo itímaci. Pentecostés trigo ua ie rafue. Pascua rafue illa meinoconí, cincuenta dígaruí illanona bie rafue íte. ² Danomo ía, ebena illacínomona monamona ríire aífí billa isoi buena cacadímaci. Nana jofomo itino naiēna jiaí cacadímaci. ³ Iena naimacímimo baírede. Iena cíodímaci. Irai boua isoi eruaíde. Nana naimacímimo baite. ⁴ Iese Jusiñamui Joreño feiñotímaci. Nana naimaci comeciāna namatade. Iemei diga nairai uaillaído ñaitímaci, Jusiñamui Joreño naimacína ñaitatajamona. Naimaci ñaía uaillaína uiñoñedímaci.

⁵ Naie facaiseconí Jerusalémo Jusiñamui rafuedo eo jaide judíuáídi itímaci. Diga nairaiāimona bitímaci. ⁶ Creyentíai ñaiana naimaci fidiano, ailluena comíni jino tainomo ofdímaci. Nagamíáídi ie nairai uaina cacade. Ie jira jacínaitímaci. ⁷ Eo raíjicaídímaci. Conínimo jicanotímaci:

—¿Buta ñaíte? Nana Galileos imaci. ⁸ ¿Nie se naimacína cacadícaí? Cai uaido dajerie ñaiana cacadícaí —raitímaci. ⁹ Diga comíni imíai itímaci: Partos, Medos, Elamitas, Mesopotamia imaci, Judea imaci, Capadocia imaci, Ponto imaci, Asia imaci, ¹⁰ Frigia imaci, Panfilia imaci, Egipto imaci, Libia imaci. Libia imaci enirue Cirenemo ruica eruaíde. Romamona jamai macarítino jiaí itímaci. ¹¹ Judíuái itímaci. Judíuáiñedíno jiaí itímaci. Judíuái isoi Jusiñamuína jai sedadímaci. Cretenses itímaci. Arabes itímaci.

—Cai uaido Jusiñamui ie ebírede finoca rafuēna cacadícaí —raitímaci. ¹² Nana eo raíjicaídímaci. Danírie jicanododímaci:

—¿Bue íte?

¹³ Jiaíe comíni jifanoduano, raitímaci:

—Jifaidímaci. Ie jira íese ebēna ñaitímaci.

¹⁴ Ie facaise ie once nabaiñiaí naimie ecimo illanona, Pedro nainomo como ofidinomo ado llote:

—Caímaci, ua nana Jerusalén imaci, cue lluomo cacarei. Naie rafuena lloiticue.

¹⁵ Omoi comeciaina omoi facaja isoi, jifaiñedicaí. Jitoma nia furi daidemo, bu jaca jifairainina. ¹⁶ Joel micori bie rafuena jaie llote. Joel micori Jusiñamui rafuena lloraima. Naimie jaie lloga rafue birui caimo jai suide. ¹⁷ Llote:

Jusiñamui caimo llote: “Jiaíruído bie rafue suite.

Cue Joreña diga cominimo fecajiticue.

Iedo omoi uruiaí cue lluana lloitimaci.

Iemona omoi coniruiaina nicairitaiticue.

Iemona omoi einamacina jiaí nicairitaiticue.

¹⁸ Ua nana cuena sedadinomo cue Joreña fecajiticue.

Naimaci cue lluana lloitimaci.

¹⁹ Monamo eo jacirede rafuena ico suiñotaiticue.

Eniruemo eo jacirede rafuena ico jiaí suiñotaiticue.

Comini jobairillemona, eniruemo comini diruedi eo iite.

Naie facaise daje diese enirue boojite. Bouamona uillie eo iite.

²⁰ Jitoma lligaiñoñeite. Fivui diruena eruaite.

Nana bie suite, Cristo billa facaise nia iñenia.

Naie facaise diga jacirede rafue suite;

²¹ iadedi birui cuemo bu jicaia, ie jeacinomona naimiena jillotaiticue” Jusiñamui llote.

Ie Joreño caimo birui illamona, Joel micori llogacino jai suide.

²² ‘Caímaci, bie uaina omoi cacarei. Nazaret ie Jesúsna ñaiticue. Jusiñamuidi omoi motomo naimiena siño rafuena jai finotate. Iena jai uiñotomoi. ²³ Jusiñamui comeci jaie facaja isoi, Jusiñamui jitailla isoi, Jusiñamui naimiena omoimo fecade. Jesúsna coraitatomoí. Jusiñamuina inoñedinona naimiena meinetadomoí; ²⁴ iadedi fiodaillamona naimiena Jusiñamui jillotajano, legi ie cacajamona naimie jillobide. Naimie fiodaite; iadedi fiodaillamona nainomo iñoñede. ²⁵ David micori naimiena jaie llote: Jusiñamui cue diga jaca illana uiñoticue.

Cue ecimo naimie ite, cue comecina ocuiñotallena.

²⁶ Ie jira cue comeci caimare ite. Eo iobidicue.

Cue marena illemo jai jiaí ocuridicue,

²⁷ raiafomo cue joreña naimie faionocaiñena jira,

ie mare jito abi rifaillana naimie jitañena jira.

²⁸ Naimie cuena jilloitallena uiñoticue.

Cue diga naimie illa jira, cue comeci caimare iite.

²⁹ ‘Caímaci, cai usuma David micorina marefodo ñaiticue. David micori ñaia, dama naimie facaina ñaiñede. Jesúsna ñaite. David micori jaie fiodaite. Raiafomo jonega. Naifo bene nia illamona, naimiedi Jesúsna ñaiana uiñoticaí. ³⁰ Ie ia David micori Jusiñamui rafuena llote. Naimie micoridi Jusiñamui naimiemo uanaicinona lluana uiñote. Jaie Jusiñamui naimiemo llote: “O uruiaimona damie illaimana illanona, ie cominina sedajite” llote. ³¹ Cristona ñaite. David micori nia suiñede rafuena llote. Naimie micori Cristo jilloillena llote: “Raiafo Jusiñamui fiodaillanomo Cristo Joreño faionocaiñeite. Cristo abi rifañeite” llote. ³² Jesúsna ñaite. Jusiñamui Jesúsna jai jillotate. Nana cai iena ciodicai. Ie jira iena lloticaí. ³³ Ie ecimo Jesúsna jai dane itatajanona, Jusiñamui naimiena iobitade. Ie Moo llua isoi, Jesús jai ie Moo Joreño caimo jai fecade, omoi birui ciua isoi, omoi birui cacaja isoi. ³⁴ Naimie abi monamo jaiñena jira, David micori dama naimie facaina ñaiñede; ia Cristona ñaite. Ero, jaie David micori raite:

Jusiñamui Cristomo llote: “Cue ecimo ana raí.

³⁵ Ona inoñedinona o anamo itataiticue”

raite. David micori llua isoi, birui jai suide.

³⁶ Pedro nia ñaite:

—Jesúna coraidomoi; iadedi Jusiñamui naimiena cai Namana itatate. Naimiena cai Jilloitaraimana jai itatate. Nana judíuai comini naiena uiñuana jitaídícue.

³⁷ Pedro lluana cacajano, naimaci comeciáimo ríre baite. Pedromo iena jicanotimaci. Ie nabaiñaímo jiai jicanotimaci:

—Caimaci, o lluana jai cacadicaí. ¿Bue finoíticaí?

³⁸ Pedro uai ote:

—Omoi comeciáí iuaina meido. Iemei Jusiñamui omoímo ite jeacínuaína dotajite. Jesucristo facaina omoi bautizallomoi. Jusiñamui Joreñoa jiai feiñoitomoi. ³⁹ Omoímo ie Joreño fecallena navui llote. Omoi uruíaimo jiai fecaite. Jiaíe nairaíai itinomo jiai fecaite. Ua nana Jusiñamui fetocanomo jiai fecaite.

⁴⁰ Díga uai naimacimo Pedro llote. Raite:

—Ailluena comini maraiñede rafuena birui finocana jaidimaci. Faiítimaci. Naimaci isoi jaiñeno; iadedi cue lluana omoi cacajamona, iena ñno.

⁴¹ Díga comini ie lloga uaina feiñuano, bautizadimaci. Nairuido nibai tres mil comini creyentiaína jaidimaci. ⁴² Cristo oretagano llofuiana fueuidimaci. Cristo oretaganona eo nabaidimaci. Nagarui ofillanona, Jesús fiodaillana comeciuidimaci. Jusiñamuimo jñuidimaci.

Cristona ñnotino illa rafue

⁴³ Cristo oretaganodi díga siño rafuena finuamona, nana comini jacinaitimaci. ⁴⁴ Nana creyentiaí damacina itimaci. Naimaci raruaí coninimo fecauuidimaci. ⁴⁵ Dueredino ia, naimacina canollena, raruairedino naimaci raruaína vendedimaci. Iemei naie ucube dueredinomo fecadimaci. ⁴⁶ Jusiñamuina sedallena, nagarui Jusiñamui jofomo ofisoidimaci. Danírie imaci jofuemo Jusiñamuina jiai sedauuidimaci. Nainomo danomo guillanona, Jesús fiodaillana comeciuidimaci. Caimare imaci comeciáí illamona, caidíñeno guisoidimaci. ⁴⁷ Jusiñamuimo iobillacinona fecacana jaidimaci. Nana cominidi naimacina: “Mare” raitimaci. Naimacina Jusiñamui itataja isoi, nagarui comini creyentiaína jaidimaci.

3

Jusiñamui jofomo Pedro llucino

¹ Jusiñamui jofomo jña facaise Pedro iaímaiaí Juan díga jaide. Jitoma ana ia, comini jñuidimaci. ² Iaímaiaí jaillanomo jiaíe comini tisitaitimiena atiana ciódiaímaiaí. Tisitaitimiena naimie jaca jeiciga. Naimiena nagarui atiano, Jusiñamui jofu ie ebiredena railla nase fuemo rainauuidimaci. Nainomo naimiena rainauuidimaci, fo jaidinomona ucube jica-jicallena. ³ Iaímaiaí fo jaiacania, ucube jicallena, ie onolli ñuitade. ⁴ Iaímaiaí naimiemo eruaillano, Pedro raite:

—Cocomo eruai.

⁵ Ie jira iaímaiaímo eruaide. Ra feiñoitena, ocianona sedade. ⁶ Pedro raite:

—Ucube cuemo iñede; iadedi cuemo ite rana omo fecaitícue. Nazaret ie Jesucristo uai cuemo illa jira, ona macaritaitícue.

⁷ Pedro naimie onollido llinuano, a naidanete. Ieconí naimie eíllidi jillode. Ie taisicoñuai jiai jillode. ⁸ Daiacaillanona naidacaide. Macarillanona, iaímaiaí díga fo jaide. Jusiñamuimo iobillacinona fecajano, daiacaillanona macarite. ⁹ Nana comini naimie macarillana ciódimaci. Naimie iobillacinona fecajana jiai cacadimaci. ¹⁰ Naimie nase fuemo ana raísoilla jira, naimiena uiñotimaci. Naimiemo jai suide rafuena eo rajicaídímaci. ¹¹ Naimiedi Pedro iaímaiaí Juan díga nia llinuano, naimaci díne Salomón micorí finotaga jofu abi ibirimo comini aisídímaci. Rajicaídímaci. ¹² Iena ciuano, Pedro naimacina raite:

—Caimaci, ¿bue ñellena biemo rajicaidomoi? ¿Bue ñellena caimo iese eruaidomoi? “Daïmaiaï iaïmaiaï uaido naimïena jilloitate” raïllanona cocomo eruaidomoi. ¹³ Iena finoñedicoco; iadedi Jusiñamui iena finuano, ie Jito Jesúna iobitate. Cai usumatiaï micoriaï, Abraham, Isaac, Jacob, ua nana cai usumatiaï micoriaï bie Jusiñamuina sedadimaci; iadedi Jesúna birui fecadomoi, coraïllena. Pilato naimïena jino marena ore-taiacana jira, Pilato ecimo naimïena llogidotomoi. ¹⁴ Mareuidimïena jitaiñedomoi; iadedi come fatimïena cárcelmona jino billana jitaïdomoi. Barrabás raïllamïena jitaïdomoi. ¹⁵ Jusiñamui dibeïmo caina itatatimïena meinetomoi. Naimïe fiodaite; ia Jusiñamui naimïena jillotate. Iena ciodicoco. Ie jira iena lloticoco. ¹⁶ Tisitaitimïe jilluana jai ciodomoi. Naimïena uiñotomoi. Jesúna naimïe ñnua jira, Jesús naimïena mairitate. Naimïena raise jillotate. Iena jai ciodomoi.

¹⁷ Caimaci, ero, omoi finoca rafuena abina uiñoñoeno finodomoi. Omoi illaïcomini jiaï daje isoi finodimaci. ¹⁸ Jaie Jusiñamuidi ie facaina llorainina jiaïruido sulle rafuena llotatate. Naimacina Cristo legi cacajana llotatate. Birui naie llogacino suide. ¹⁹ Omoi comeciïaï iuailaï meido. Jusiñamui dibeïmo omoi comeciïaïna meido. Iemei Jusiñamui omoi jeacinona dotaite. Iena jaca feitaite. ²⁰ Omoi uri illa facaise illena, Jusiñamui omoi diga illena, iena fino. Jusiñamui Jesucristona omoi dine dane oretallena, iena fino. Naimïedi omoi Jilloitaraima. ²¹ Jusiñamui facaina lloraini micoriaï jaie lloga rafue sulle dinori monamo naimïe fiebiite. Jaie Jusiñamuidi ie mare lloraini micoriaï uaido biena llote. ²² Moisés micori raite: “Omoi cominimona naimïe rafue lloraimana jaïllena, cai Nama Jusiñamui cue isoi damïena fetoite. Nana naimïe omoi mo lluana cacarei. ²³ Bie lloraimana bu cacarefiñena, Jusiñamui naimïena duere finoite. Iemona faïfite”. ²⁴ Nana Jusiñamui ie lloraini micoriaïdi birui sulle rafuena llotimaci. Samuel micori illa facaisemona naimaci biena llotimaci. ²⁵ Jusiñamuidi cai usumatiaï micoriaïmo rafuena llote; ia bie rafue birui omoi mo jiaï duide. Jusiñamui Abraham micorimo jaie llote: “Nana cominidi o uruiaï muidona caïmare iitimaci”. ²⁶ Ie rafue suiñollena, Jusiñamui ie Jitona omoi dine navui orede. Omoi caïmare illena, nano omoi maraiñedicinona faïnonocaitallena, omoi dine naimïena nano jai oretate.

4

Cristo oretagamaiaï llaïcomini motomo illa rafue

¹ Comini diga Pedro iaïmaiaï Juan diga ñaïa facaise, Jusiñamui diga ñairainidi naie iaïmaiaï dine bitimaci. Jusiñamui jofona sedaraini illaïma diga, saduceuaï raïlla comini diga jiaï bitimaci. ² Fiodaïllamona Jesús jai jilluana llofuetiaïmaiaï. Cominina iaïmaiaï llofuia jira, naie iaïmaiaï diga iciritimaci. ³ Iaïmaiaïna gaïtajanona, jai navuilla jira, cárcelmo jonetimaci, ie jitiramo naie rafuena siadollena. ⁴ Iese suide; ia Pedro llogacinona cacadinomona aïlluena comini naïena ñnotimaci. Cinco mil digamïe creyentiaïna jai itimaci.

⁵ Icoiti Jerusalémo nana judiaï illaïcomini siadollena ofidimaci. ⁶ Anás jiaï bite. Naimïedi Jusiñamui diga nanoca ñairaima. Caifás bite. Juan bite. Alejandro jiaï bite. Nana Jusiñamui diga nanoca ñairaima cominidi ofidimaci. ⁷ Naimaci motomo Pedro iaïmaiaï Juan diga atianona, iaïmaiaïmo jïcanotimaci:

—¿Bu uai diga biena finodomico?

⁸ Jusiñamui Joreño nana Pedro comecimo namatajano, Pedro naimacimo llote:

—Illaïcomini, bie rafuena omoi mo lloticue. ⁹ Tisitaitimïe jilluana birui cocomo jïcanotomoi. “¿Buemona naimïe jillode?” raïllanona cocomo jïcanotomoi. ¹⁰ Jesucristo uai diga jillode. Omoi biena uiñuana, ua nana judiaï comini biena uiñuana jitaïdicue. Jesucristodi Nazaret imïe. Naimïena jai coraidomoi; ia Jusiñamui naimïena jai jillotate. Ie jira omoi uicomo Jesús muidona tsitaitimïe jai benoconi naïdaïllana ciodomoi. ¹¹ Omoi jofo finoraini isoidomoi. Omoi jitaiñede noficidi jiaïe nofici baïfemo jai jaide.

Jesúdi naie nofici isoide. Naimie rafuena omoi jitaíñena jira, naimiena meinetomoi. ¹² Cai jeacinomona jiaimie caina jillotanide. Nana eniruemo ite cominimona jiaimie buna jaca jillotanide. Dama Jesús caina jillotarede —llote.

¹³ Jaciruiño marefodo llofuetiaimaia. Nainomo itino iena cacajano, comecina facadimaci: “Abina uiñoñediamaia. Jamai bue isoidiamaia”. Ie jira rajicaidimaci; iadedi Jesús llofueoicaigaiaimaiaina illana uiñotimaci. ¹⁴ Jilloitagamie iaimaia diga naidallana cidimaci. Ie jira naimaci uai iñede. ¹⁵ Naie rafuena siadollena, naie illacomini iaimaiaina bai oredimaci. ¹⁶ Coninimo jicanotimaci:

—¿Niese naie iaimaiaina nibaiticai? Nana Jerusalémo itino iaimaia siño rafuena finuana jai fididimaci. Iena janonidicai. ¹⁷ Jiaie comini iena fidi raillano, Jesús rafuena iaimaia llofuiana rairuiticai.

¹⁸ Ie mei iaimaiaina naimaci dine dane uaidotimaci. Iaimaiaimo Jesús rafuena llofueñellena riire llotimaci. ¹⁹ Pedro iaimaia Juan diga naimaci uai ote:

—Ie rafuena coco llollena Jusiñamui jitaide. Omoi uaina coco ñnoia, Jusiñamui jitailla rafuena finoñeiticoco. Cocomo llono. ¿Bu uaina ñnoiticoco? ¿Jusiñamui? ¿Omoi? Cocomo iese llono. ²⁰ Daimaia coco ciua rafuena lloticoco. Daimaia coco cacaja rafuena lloticoco —raite.

²¹ Iaimaiaina jacinaitajamona, iaimaiaina jino oretatimaci. Iaimaiaina duere finoñedimaci, nainomo ite comini icirinaiñellena. Jusiñamuimo nana nainomo itinodi iobillacinona fecadimaci, tisitaitimie jai jillua jira. ²² Jai jillodimie mo cuarenta años baifemo ite. Siño uaido naimie jillua jira, comini iobidimaci.

Naimacina Jusiñamui canollena, naimiemo jiacino

²³ Iaimaia jino jailla mei, iaimaia nabaiñia dine jaidiaimaia. Illacomini iaimaiaimo llua llotiaimaia. ²⁴ Naimaci iena cacajano, Jusiñamuimo damie llua isoi jidimaci:

—Ore Moo, mona finodio. Eniruena finodio. Monailaina finodio. Nana naiemo ite rana jai finodio. ²⁵ Cai usuma David micorina raise uiñoticai. Naimiedi ona sedadimie. Naimiena bie rafuena o Joreño jaie llotatajamona, naimie llote:

¿Bue ñellena Jusiñamui diga judúuaiñedino iciritimaci?

¿Bue ñellena Jusiñamuimo comini tainomo comeciaina facadimaci?

²⁶ Illacomini ofidimaci, Jusiñamui diga fuirillena.

Jusiñamui facaisena iñedimaci.

Cristo facaisena jai iñedimaci

llote. ²⁷ Naie rafue birui bene suide. Bie nairaimo Herodedi, Poncio Pilato diga, judúuaiñedino diga, judúuai comini diga, ofide. O mare Jito Jesús facaisena iñedimaci. Naimacimo o oretagamie facaisena iñedimaci. ²⁸ Naimaci ofillamona, nana o jitailla rafuedi, o jaie lloga rafue diga, jai suide. ²⁹ Nama naimaci jaciruitajacinona jai uiñotio. Cai comeciaina ocuiñota, o rafuena jaitaiño cai lollesa. ³⁰ Duidinona jilloita. O mare Jito Jesús uaido caina siño rafuena finota —jidimaci.

³¹ Jusiñamuimo jiacino fuilla meinoconi, naimaci ofiracodi jaidisite. Jusiñamui Joreño nagamiai comecimo namatade. Iemona Jusiñamui uai jaitaiño llocana jaidimaci.

Creyentia damacina illa rafue

³² Nana creyentia damacina itimaci. Naimacimo raruaia ia, dajena naimacimo duide.

³³ Naie facaise siño uaido naimie oretagano cai Nama Jesús jilluana llofueuidimaci. Iemona cominidi naimacina: “Mare” raitimaci. Nagarui Jusiñamui naimacina eo canode.

³⁴ Naimaci dine buna buena jaca jitaíñedimaci. Ucube ollena, enirueredino imaci eniruena fecadimaci. Ucube ollena, joforedino imaci jofona fecadimaci. Ucubene atianona, ³⁵ Cristo oretaganomo fecadimaci. Ie mei dueredinomo imaci jitailla isoi fecauidimaci. ³⁶ Naimaci motomo José mameciredimie ite. Cristo oretagano jitaca mamecidi Bernabé. Ie mameci oni dobaiñuamona firadotimie. Naimie nairaidi levita.

Naimiedi Chipre railla uiasi imie. ³⁷ Jerusalémo naimie fecalle eniruedi ite. Iena fecajamona, ucube atiano, Cristo oretaganomo fecade.

5

Ananías micori ie ai micori diga Jusiñamuina jifuia rafue

¹ Naie facaise Ananías ie ai diga iaimaia eniruenta jiai fecade. Ie ai mamecidi Safira. ² Naie iba naimiemo dabeí fiebide. Ie ai iena uiñote. Atuedo atianona, Cristo oretaganomo fecade, “Nana ucube atidicue” raillanona. ³ Jusiñamui Joreño Pedrona naie rafuena uiñotajamona, Ananíamo Pedro jicanote:

—¿Ñiese Taife o comecimo namatade? Jusiñamui Joreñomo taino llotio, dabeí ucube omo fiebilla jira. ⁴ Enirue nia fecañenia, nia oie. Fecaja mei, naie ucubedi nia oie. ¿Bue ñellena o comecina marañeno facadio? Cominimo taino llotio. Jusiñamuimo tainona jiai llotio.

⁵ Ananías bie uaina cacajano ieconi fodaillamona oni caide. Nana iena ciódino eo jacinaitimaci. ⁶ Iemei nainomo ite conirueniai naimiena feridimaci. Jino uillano, raiafomo jonetimaci.

⁷ Naie rafue daje amani horas illanona, naimie ai ie inimo suide rafuena uiñoño bite.

⁸ Pedro naiñaiño jicanote:

—¿Ñie diese o fecaca o enirue? Cuemo llono.

Naiñaiño uai ote:

—Jii, ie diese coco fecaca.

⁹ Pedro jicanote:

—¿Bue ñellena Jusiñamui Joreña jifuetomico? Ero, o ini raiafomo jonetino saisia jai nasemo cacade. Naimaci ona jiai jino ja uitimaci.

¹⁰ Naimie ecimo ieconi naiñaiño fodaillamona, oni caide. Conirueniai fo billano, naiñaiño fodaillana ciódimaci. Jino uillano, ie ini abimo dafomo jonetimaci.

¹¹ Iena fidiamona, nana creyetiai eo jacinaitimaci. Nana bie rafuena fididinodi jiai eo jacinaitimaci.

Cristo oretagano ailluena siño rafuena finodimaci

¹² Comini motomo Cristo oretaganodi ailluena siño rafuena finoudimaci. Naie facaise nana naimacidi Jusiñamui jofomo Salomón micori finotaga jofa abi ibirimo ofisoidimaci.

¹³ Jiaie cominidi jaciruillanona, naimacina nabaiñedimaci; iadedi naimacina raite:

—Cristo oretagano fue eo mare.

¹⁴ Jaciruitimaci; iadedi creyentiana ailluena comini jaidimaci. Ailluena iñiai, ailluena riñoniai, diese creyentiana jaidimaci. ¹⁵ Imaci biramo duidinona jonecaida, naisomo atidimaci. Pedro nainomo macarillano, o lloti naimie joreño naimacimo ibaillamona, “Jillobitica” raillano, atidimaci. ¹⁶ Jerusalémo ie fuemo ite nairaiaimona comini biadedi, duidinona jiai atidimaci. Janaba anamo ite cominina jiai atidimaci. Nana jillodimaci. Ie isoi Cristo oretagano siño rafuena finoudimaci.

Cristo oretagano duere sefuilla rafue

¹⁷ Cristo oretagano finoca rafueri Jusiñamui diga nanoca ñairaima eo uradoide. Nana naimie dibeimo itino jiai eo uradoidimaci. Saduceuai railla cominimo duidimaci. ¹⁸ Eo uradoillamona, Cristo oretaganona gaitajano, cárcelmo jonetimaci. ¹⁹ Naiona Jusiñamui jaienicidi cárcel nasena econote. Cristo oretagano jino atiano, naimacina raite:

²⁰ —Jusiñamui jofomo mai abido jai. Cominimo Jusiñamui dine naimaci ille rafuena llono.

²¹ Iena cacajano, monaidemo, Jusiñamui jofomo jaillano, llofuetimaci. Ie facaiseconi Jusiñamui diga nanoca ñairaima, ie comini diga billano, danomo ofillena illaicominina uaidote. Cárcelmo policiaiana oretate, Cristo oretaganona atillena. ²² Cárcelmo jaidemo, naimacina cioñedimaci. Abido billanona, llotimaci:

²³ —Cárcel ie nase jaca ibaicana ciodicai. Raise llaveca. Nase fuemo jaca soldaduai itimaci; iadedi econoticaimo, jaca buna cioñedicai.

²⁴ Jusiñamui jofo nanoca sedaraíma, Jusiñamui diga ñairaini diga, bie llwana cacajano, uainicaidimaci. Comecina facadimaci: “¿Ñie isoide rafue naimacimo jai suide?”

²⁵ Iemo damie billanona, naimacina raite:

—Cárcelmo jonega cominidi Jusiñamui jofomo jai itimaci. Cominina jai llofuetimaci.

²⁶ Iena cacajano, Jusiñamui jofo nanoca sedaraíma ie policías diga jibuisaide. Cristo oretaganona atide. Fecuisse atide, comini dinena policiaína noficiado fairinoi raillano.

²⁷ Naimacina atiano, illacomini motomo jonetimaci. Iemei Jusiñamui diga nanoca ñairaima naimacimo llote:

²⁸ —Omoimo Jesús rafuena llofuiana rairuidicai; iadedi nana Jerusalén cominina jai llofuetomoi. Iese omoi llofuecabia, “Cai illacomini Jesúna meinetimaci” llotomoi.

²⁹ Pedrodi jiaie oretagano diga uai ote:

—Jesús rafuena cai llofuiana jai rairuidomoi; iadedi omoi llua baifemo Jusiñamuina ñnoiacadicai. ³⁰ Cai usumatiai micoriai Jusiñamuina sedavidimaci. Naie Jusiñamuidi Jesúna jai jillotate. Jesúna meinellena, cruzmo coraidomoi; ia Jesúna omoi meinia mei, ³¹ Jusiñamuidi ie ecimo naimiena jai itatate. Cai illaimana naimiena jai itatate. Cai jilloitaraimana naimiena jiai jai itatate. Cai judíuai comini comeciai iuai meidollena, naimaci jeacinuai dotallena, iese naimiena itatate. ³² Bie rafuena llofuecabiticai. Jusiñamui Joreño uaido iena jiai llofueticai. Jusiñamuina ñnotinomo Jusiñamuidi ie Joreño jai fecade —raite.

³³ Iena cacajano, illacomini eo iciritimaci. Cristo oretaganona meineiacadimaci; ³⁴ ia ieconi illacomini motomo damie naidaide. Naimie mameci Gamaliel. Moisés micori llogacinona uiuicaide. Nana cominidi naimie uaina ñnotimaci. Cristo oretaganona dallu bai oni oretajanona, naimie llote:

³⁵ —Caimaci, omoi bie cominimo omoi finolle rafuemo comeciaina raise faca. ³⁶ Jaie Teudas micori illaimana jaiacade. “Jai uaina baitimiedicue” raillano, naimie dibeimo cuatrocientos iññiai jaidimaci. Iemei naimie fiodaite. Naimie micori dibeimo itinodi oni tuusite. Jai naie rafuedi jaca ieconi duide. ³⁷ Naimie micori illa mei, comini mameciaina cuiana gobernador llua facaise, Galileo ie Judas micoridi jobairiacade. Jiaie comini naimie dibeimo illena fuemo faite. Naimie jiai fiodaite. Naimie micori dibeimo itino oni tuusite. ³⁸ Ie jira ja omoimo lloiticue: Bie cominina fañonocai. Jamai cominimona naimaci llogacino iade, jamai cominimona naimaci finuacino iade, ieconi duite. ³⁹ Jusiñamuimona bie rafue ia, jaca ñiese nibañeitomoi. Jusiñamuimona bie rafue ia, Jusiñamui diga omoi rafuedi iite.

Naimaci naimie llwana feñuano, ⁴⁰ Cristo oretagano fo atiano, naimacina fatimaci. Naimaci Jesús rafuena llofuiana eo rairuide. Ie mei jino imacina oredimaci; ⁴¹ iadedi illacomini illanomona Cristo oretagano caimare jaidimaci. “Jesús dibeimo cai illa jira, caina duere finodimaci” raillano, caimare jaidimaci. Jusiñamui naie facaise naimacina riidoñena jira, jiai caimare itimaci. ⁴² Jusiñamui jofomo nagarui Jesucristo rafuena llofuetimaci. Comini jofuemo nagarui jiai llofuetimaci. “Jesúdi cai Jilloitaraima” llofueuidimaci.

6

Creyentiaína canollena, siete digamie diáconuaina illena, fetua rafue

¹ Naie facaise ailluena comini creyentiaína jaidimaci. Uradoillamona griego uaido ñaite comini dinena, judíuai uaido ñaite cominina jeare ñaitimaci. Grieguai feciñuai judíuai feciñuai isoi nagarui rana feñoñena jira, jeare ñaitimaci. ² Ie jira naie doce oretaganodi creyentiai danomo ofillena, nana naimacina uaidotimaci. Naimacimo llotimaci:

—Jusiñamui uaina lollena, ra fecalle diga, abi juanide. Jusiñamui uaina llofuiana cai fainonocaiadedi, maraiñede. Ra jamai cai fecaiadedi, jiai maraiñede. ³ Ie jira, amatai, omoimona siete digamiena feto. Inoganona feto. Jusiñamui Joreño nana comecimo namatadinona feto. Eo abi uiñotinona feto. Ie isoide iñiaina feto. Bie ra fecarainina maijitimaci. ⁴ Ie mei cai abi juarenite, Jusiñamuimo cai jüllena, Jusiñamui uaina cai llofuellena.

⁵ Nana cominidi:

—Jee —raitimaci. Esteban micorina fetodimaci. Naimie Jusiñamuina eo inote. Jusiñamui Joreño nana naimie comecimo namatade. Jiai fetodimaci: Felipe, Prócoro, Nicanor, Timón, Parmenas, Nicolás. Nicoládi Antioquía nairai imie. Judíuai comini isoi naimiedi Jusiñamuina inote. ⁶ Fetua mei, oretagano dine atidimaci. Jusiñamuimo oretagano jia mei, fetocanomo imaci onolli jonetimaci, Jusiñamui naimacina marena itatallena.

⁷ Naie facaise Jusiñamui uaidi cominido uiñotacana jaide. Jerusalémo ailluena comini creyentiaina jaidimaci. Jusiñamui diga ñairainimona creyentiaina ailluena jiai jaisite.

Esteban micori ie rafue

⁸ Esteban micori fue eo mare. Jusiñamui Joreño naimiena namatajamona, naimie uai eo siño. Comini motomo ailluena siño rafuena finouide. ⁹ Naie facaise daje judíuai comini ofiracomona damerie Esteban micori dine bitimaci. Patrón anamona jillobidinomo naie ofiraco jainaiade. Naimaci diga damerie Cirene nairai imaci bitimaci. Damerie Alejandría nairai imaci danomo jiai bitimaci. Cilicia nairai imaci jiai bitimaci. Asia nairai imaci jiai bitimaci. Esteban conini uaina uaitatimaci; ¹⁰ iadedi naimaci uaitalle uaidi iñede. Naimacimo Esteban uai isoidiuidi iñede. Jusiñamuimona ie uaina ua jira, Esteban abina uiñuano ñaite. ¹¹ Ie jira jiaie cominimo bainino ibajano, naimiena llogidotadimaci. Raitimaci:

—Esteban Moisés micori jinafomo jeare ñaiana cacadicaí. Naimiedi Jusiñamui jinafomo jeare ñaiana jiai cacadicaí.

¹² Iese llumona, comini comeciaina feidocana jaidimaci. Ilaicomini comeciaina feidocana jiai jaidimaci. Esteban dine billanona, naimiena gaitadimaci. Naie rafuena siadollena, naimaci ofiracomo naimie micorina uitimaci. ¹³ Tainona llogidotinona jiai atidimaci. Llotimaci:

—Bimiedi Jusiñamui jofona jeare ñaicabite. Bimiedi Moisés micori llogacino jinafomo jiai jeare ñaicabite. ¹⁴ Naimiedi Jesús bie jofona judaillena llote. Moisés micori caimo llogafuiai fainonocaillena jiai llote. Iena cacadicaí.

¹⁵ Iemo nana illaicomini naimiemo eruidimacimo, naimie uieco Jusiñamui jaienici isoi eruaide.

7

Esteban micori abi riidua rafue

¹ Jusiñamui diga nanoca ñairaima Esteban micorimo jicanote:

—¿Ua ie isoi naimaci llucino ite?

² Naimie uai ote:

—Caimaci, cacarei. Cai jaiagamona cai fueollena, naimaci micoriaina lloiticue. Jusiñamui maremiena jira, naimiedi cai eirue jitomo jaie bairede. Cai eirue jitodi Abraham micori. Mesopotamiamo naimie micori nia ia, Harámo naimie micori nia jaiñenia, Jusiñamuidi naimie micorimo bairiano ³ llote: “O eniruemona mai jai. O cominimona mai jai. Omo cue acatalle eniruemo jaitio”. ⁴ Ie jira Caldea railla eniruemona naimie micori jaide. Harámo rillanona, diga iruillaí nainomo ite. Naimie moo micori fiodailla mei, omoi birui illa eniruemo Jusiñamui naimie micorina oretate. ⁵ Nainomo rillanona, Jusiñamuidi naie enirue naimie micorimo fecañede. Ua janore jisa fecañede; iadedi: “Omo iena ico fecajiticue” raite. “O uruiaimo fecajiticue” jiai llote;

iadedi naie facaise Abraham micori uruenide. ⁶ Jusiñamui jiai llote: “O uruiái jiaie comini eniruemo jaianitimaci. Egiptomo jaianitimaci. Naimacina duere finoitimaci. Cuatrocientos años legi cacajitimaci. ⁷ Naimacina maijitaite nairaina duere finoiticue. Ie mei o uruiái naie eniruemona biitimaci. Bie illanomo cuemo iobillacinona fecajitimaci” llote. ⁸ Ie cominina naimaci jaillena, Jusiñamui Abraham micorimo isaiaí diese abina diana llote. Ie facaise Abraham micori Isaac micorina comuitate. Ie jeiciamona ocho digarui illamona, Abraham micori naimie micorina dete. Isaac micori Jacob micorina comuitate. Jacob micori doce uruiaina comuitate. Naimaci micoriaimona cai doce diga nairai comuidimaci.

⁹ 'Caimaci, José micorina Jacob micori uruiái micoriai uradoillamona, Egipto cominimo naimiena fecadimaci; ¹⁰ iadedi Jusiñamui naimiena eo sedade. Ie legi ie cacajamona naimiena jillotate. Naimiemo uiñoracinona fecade. Ie jira Faraón micori naimiena jiai gaide. Faraón micoridi Egipto illaíma. Ie muidona Faraón Joséna fetode, nana Egiptomo itinona sedallena. Ie jofona jiai sedatate. ¹¹ Naie facaiseconi nana Egipto comini aime guitimaci. Canaámo Jacob micori illanona, nana nainomo itino diga aime jiai guite. Eo duere sefuidimaci. Cai usumatiaí micoriai naimaci illanomo guillena baiñedimaci. ¹² Egiptomo guille illana Jacob micori fidiano, guille ollena, nano facaise ie uruiái micorina nainomo oretate. ¹³ Ie mei José ie amatiaina naimiena uiñotade. Faraón di José comini illana fidide. ¹⁴ Ie jira José di ie moona uaidote. Nana ie cominina uaidote. Setenta y cinco digamie ite. ¹⁵ Ie jira Egiptomo Jacob micori jaide. Nainomo fiodaite. Ie uruiái micoriai nainomo jiai fiodaitimaci. ¹⁶ Siquem railla nairai illanomo naimaci comini naimaci micoriaina uillano, nofici ie raiafomo jonetimaci. Siquemmo Abraham micori naifona Emmor uruiái micoriaimona jaie ibade.

¹⁷ 'Caimaci, Jusiñamui Abraham micorimo lloga rafue suille iaírei illa facaiseconi, Egiptomo cai cominidi eo jebuidimaci. Abraham micorimo: “Egiptomona o uruiái biitimaci” Jusiñamui jaie llote. ¹⁸ Naie facaise jiaie illaíma Egiptona sedade. José micorina uiñoñede. ¹⁹ Ie jira cai cominina jifuiano maijitaide. Uruiái fiodaillena, naimacina imaci uruiaina fainonocaitate. ²⁰ Ie facaiseconi Moisés micori jeiciga. Jusiñamui naimie micori eo ebire eruaiide. Ie moo jofomo daje amani fivui ite. ²¹ Ie mei naimiedi fainonocaiga. Faraón jisa micoridi naimie micorina uanona, naiñaíño jito isoi naimie micorina uiuicaide. ²² Naimie micori nana Egipto comini uiñuacinona fueote. Illaíma uai isoi naimie uaidi ite. Eo abina uiñotimie.

²³ 'Caimaci, naimie micori cuarenta años illa facai, ie comini dine ie jaillamo ie comecina facade. Naimie cominidi cai judiuaí comini. ²⁴ Egipto imiemona damie legi cacajana ciuano, naimiena riidote. Riidianona, Moisés micoridi Egipto imiena meinete. ²⁵ Moisés micori comecina facade: “Cue muidona Egiptomona Jusiñamuidi cue cominina oretate”. “Cue comini buena uiñotimaci” raillanona comecina facade; ie iadedi iena uiñoñedimaci. ²⁶ Ie arediruido Moisés micoridi mena come iaímaiaí fuirillana ciode. Iaímaiaína marena itataiacade. Raite: “¿Bue ñellena conimana duere finoacadómico? ¿Bue ñellena o come diga fuiridómico?” ²⁷ Duere finoacadimie naimiena oni ñuitade. Jicanote: “¿Bu odi cai illaímana jonegao? ¿Bu caimo ona llotatate juez isoi? ²⁸ ¿Na are Egipto imie o meinia isoi cuena jiai meineiacadio?” ²⁹ Iena cacajano, come fajana naimie llinua jira, jacinaillanona, Moisés micori aiside. Madián railla eniruemo jamai ua illafuena ite. Dinomo ie aina ua mei, nainomo mena jitona comuitate.

³⁰ 'Caimaci, cuarenta años illa mei, jofue iñenanomo Moisés micori illanona, Jusiñamui jaíenici naimie micorimo bairede. Sinaí railla anedu ianori ite. Amena boua isoi amenamo bairede. Naie boode amenadi fuiñede. ³¹ Iena ciuano, Moisés micori rajicaide. Naie iaíreise naimie micori jibuisaidemo, naimiemo Jusiñamui llote: ³² “O usumatiaí imaci Jusiñamuidicue. Abraham, Isaac, Jacob, imaci Jusiñamuidicue” llote. Jacinaillamona Moisés micori abi docaide. Jaciruillanona, erodañede. ³³ Jusiñamui

naimiena raite: “Jamai bue o isoilla jira, o zapatona duiño. Benomo cue illa jira, o naidailanodi eo mareno. ³⁴ Egiptomo cue comini legi cacajana raise ciodicue. Naimaci duere sefuillana uñoticue. Ie jira omo bairedicue, naimacina Egiptomona jilloitallena. Mai jai. Egiptomo ona oretaiticue” llote; ³⁵ iadedi comini dinena Moisés micorina jaie jitaiñenamona, naimiena raitimaci: “¿Bu illaimana odi jonegao? ¿Bu o juezna jonegao?” Comini dinena naimiena jitaiñedimaci; iadedi Jusiñamui naimiena illaimana itatate. Naimiena Egiptomona cominina jilloitaramana jiai itatate. ³⁶ Egiptomona Moisés naimacina atide. Egiptomo nia ia, diga siño rafuena finode. Jiairede monailai fuemo naimaci rillanona, siño rafuena jiai finode. Jofue iñenanomo cuarenta años siño rafuena finocana jaide.

³⁷ 'Caimaci, Moisés micoridi cai judíuai cominimo llote: “Omoimona Jusiñamuidi damiena ie rafue lloraimana ico oretaiticue, naimie cuena oretaja isoi”. ³⁸ Jofue iñenanomo naimaci ia, Moisés Jusiñamui jaienici diga anedumo ñaite. Anedu mamecidi Sinaí. Iemei cai usumatiai micoriai diga naie jaienici facaina Moisés ñaite. Caimo fecallena, naimiedi cominina itatate uaina feiñote; ³⁹ iadedi cai usumatiai micoriai naimiena ñnoiacaiñedimaci. Naimiena jitaiñedimaci. Egiptomo abido jaillemono naimaci comeci facadimaci. ⁴⁰ Ie jira comini dinena Aarón micorimo llotimaci: “Egipto eniruemona Moisés caina atide; iadedi naimie cai diga illana ja uñoñedicaí. Cai facaina Jusiñamuina eruaide jiraraina fino, Egiptomo abido caina ifollena”. ⁴¹ Iemo jurareta urue joreña finodimaci. Iena sedallena, faga toica ocainaiaina fecadimaci. Naimaci finoca rafueri eo caimataidimaci. ⁴² Ie jira Jusiñamui naimacimona oni jaillanona, naimacina fañonocaide. Iemona jitomana sedauidimaci. Fivuina jiai sedauidimaci. Ucuaina jiai sedauidimaci. Jusiñamui rafue lloraima ie rabenicomo biena jaie iese cuega:

Jusiñamui llote: “Judíuai imaci, cuarenta años jofue iñenanomo omoi ia, cuemo omoi faga toica ocainaiiai fecañedomoi;

⁴³ iadedi cuemo omoi comeciaina facañeno Moloc railla jiraraina sedadomoi.

Refán railla ucuduna jiai sedadomoi.

Naimacina sedallena, jiraraina finodomoi.

Ie jira Babilonia nairai baifemo omoina oretaiticue”

cuega. Naie facaise cai usumatiai micoriai Jusiñamuina jitaiñedimaci.

⁴⁴ 'Caimaci, bie rafuena cai fueollena, cai usumatiai micoriai motomo Jusiñamui illana lloiticue. Jofue iñenanomo cai usumatiai micoriai motomo daje jofo aillocona nitimaci. Nainomo Jusiñamuina sedallena, Jusiñamui Moisés micorimo acataja isoi, iena nitimaci. Jusiñamui jaie cuega noficidi naicomo eenoga. ⁴⁵ Josué diga bie eniruemona naimaci billa facaise, cai usumatiai micoriai naicono atidimaci. Bie enirue jiaie nairaiaimo jainaiide; iadedi Jusiñamui naie nairaiaina dotajano, cai usumatiai naie eniruena bairodimaci. Naico nainomo ite David micori facaiseconi. ⁴⁶ Jusiñamui David micorina eo canode. Ie jira David micoridi cai usuma Jacob micori ie Jusiñamui jofona finollena jicanote: ⁴⁷ ia Salomón micoridi jofona Jusiñamui iena finode; ⁴⁸ iadedi Jusiñamuidi ñima finoca jofomo i-iñede. Jusiñamui facaina lloraima micoridi Jusiñamuina iese cuete:

⁴⁹⁻⁵⁰ Cai Nama raite: “Monamo cue illamona, nana comini cue anamo itimaci.

Jafaici oticuedena, naga rana cue finua jira, nainomo cuena omoi sedallena, ñie isoide jofona omoi finuana jitaiñedicue” raite.

⁵¹ 'Ero, omoi comeci jiairede. Omoi comeci ñnoñede. Jefonidomoi isoidomoi. Ie jira Jusiñamui Joreño anamo iacaiñedomoi. Omoi usumatiai micoriai isoi itomoi. ⁵² Omoi usumatiai micoriaidi nana Jusiñamui rafue lloraima micoriaina duere finodimaci. Mareuidimie billena llotinona meinetimaci. Mareuidimiena gaitatatomoi. Naimiena jai meinetomoi. Jesúna ñaiticue. ⁵³ Jusiñamui jaieniciaimona Moisés micori llogacinona feiñotomoi; iadedi iena ñnoñedomoi.

Judíuai Esteban micorina meinia rafue

⁵⁴ Esteban llofuiana naimaci cacajano, eo iciritimaci. Icirillamona, isiduai muru-muru raite. ⁵⁵ Jusiñamui Joreño nana Esteban micori comecimo namatajamona, monamo eruailano, naimiedi Jusiñamui ebirenana ciode. Naimiedi Jusiñamui nabeimo Jesús naidaillana ciode. ⁵⁶ Raite:

—Mona ecuaillana ciodicue. Jusiñamui Jito Jusiñamui nabeimo naidaillana ciodicue.

⁵⁷ Esteban llwana cacajano, jefo oroisite. Eo cuiriillano, naimie dine aisicaidimaci. ⁵⁸ Jerusalémona naimiena jino dotadimaci. Naimacimo ite emodomo itiroina duiñuanona, Saulo railla conirue ecimo iniroina joneside. Iemei Estebana noficido fairinoside. ⁵⁹ Estebana nofici diga fairinuano, Estebadi Jusiñamuimo ado jüide:

—Cue Nama Jesús, cue joreño feiño.

⁶⁰ Ieconí caiñici ifodo rainadacaida ado jüide:

—Naimaci bie jeacino finua muidona, ibana oñeno.

Iese naimie jüa mei, fiodaite.

8

Saulo creyentiaina duere finua rafue

¹⁻² Saulo dinena Esteban meiniana jiai jitaide. Cristo rafuena eo inotinomona damerie Esteban micori raiafomo jonetimaci. Eiamona naimacimo uillinoci eo ite. Nairui Jerusalémo ite creyentiaí duere sefuilla facaiseconi tainede. Nana comini tuficaida jaidimaci. Judea railla eniruemo jaidimaci. Jiaínodi Samaria railla eniruemo jaidimaci; iadedi Cristo oretagano nine jaiñedimaci. ³ Ie facaiseconi Saulodi creyentiaina eo duere finode. Diga jofomo jamai jaillano, iñiaina gaitade, cárcelmo jonellena. Riñoniaina jiai gaitade.

Felipe Samariamo illa rafue

⁴ Tuficaida jaidino naga illanomo Jesús rafuena llocana uitimaci. ⁵ Samariamo Felipedi daje nairaimo jaide. Nainomo Cristo rafuena llofueuide. ⁶ Ailluena cominidi Felipe llofuiana eo raise feiñotimaci, naimie siño rafuena finua jira. ⁷ Felipedi diga jananiai anamo ite cominimona jananiaina oretate. Raire cuirioillano, jaidimaci. Ailluena tisitaitinona jillotate. Ailluena ñuja-ñujacaidinona jiai jillotate. ⁸ Ie jira naie nairaimo ite comini eo iobidimaci.

⁹ Naie nairaimo Simóna mameciredimie ite. Naimie siño rafuena finouide. Iemona Samaria cominina rajicaitade. Naimie raite:

—Siñomedicue.

¹⁰ Nana comini naimiena inotimaci. Abina uiñoñedino inotimaci. Abina uiñotino jiai inotimaci. Raitimaci:

—Naimie uaidi Jusiñamui ie. Naimiedi siño jito —raitimaci. ¹¹ Iese naimacina are jifuate. Naimaci rajicailla jira, naimaci naimiena cacadimaci. ¹² Ie mei Felipe Cristo ie mare rafuena llote. Naimie anamo naimaci illana Jusiñamui jitailla jira, Jusiñamui díbeimo naimaci comeciai iuaina meiduana llote. Naimaci Felipe llofuiana inotimaci. Inuamona, Felipe naimacina bautizade. Iñiaina bautizade. Riñoniaina jiai bautizade.

¹³ —Jiai inoticue —Simón di raite. Naimie bautizaja mei, Felipe diga jaoicaide. Felipedi diga siño rafuena finua jira, Simón naiena ciuano, rajicaide.

¹⁴ Jerusalémo ite Cristo oretaganodi, Samaria comini Jusiñamui uaina feiñuana cacajano, Pedro, iaimaiai Juan diga, batine oredimaci. ¹⁵ Iaimaiai rillano, naimaci Jusiñamui Joreño feiñollena Jusiñamuimo jüdiaimaiai, ¹⁶ naimacimo Jusiñamui Joreño nia iñena jira. Cai Nama Jesús facaina jai bautizadimaci; ia Jusiñamui Joreño nia feiñoñedimaci.

¹⁷ Ieconí iaimaiai onollí naimacimo joniano, Jusiñamui Joreño feiñotimaci.

¹⁸ Naimaci Jusiñamui Joreño feiñuana Simón di ciuano, ucubena iaimaiaimo fecaacade.

¹⁹ Raite:

—Cuemo omico uaina ine, bumo cue onollina cue joniamona, naimie Jusiñamui Joreñoña feiñollena.

²⁰ Pedro dinena uai ote:

—O ucube diga o faifisa. Ucube diga Jusiñamui fecaca uaina ibaacadío; iadedi Jusiñamui naiena jamai fecade. ²¹ Bie rafuedi omo duiñede. Jusiñamuimona o comeci nia maraiñede. ²² O comeci iuai meido. Naimie o comecimo ite maraiñede facajacinuaina oni dotallena, cai Namamo jica. ²³ Omo ailluena maraiñedicino illana uiñoticue. O comeci eo uradoide. Maraiñedicinona o comecimo namaredío.

²⁴ Simón uai ote:

—O llua cuemo suiñellena, o Nama diga cue facaina ñaino.

²⁵ Cristo rafuena iaímaiaí llua mei, Jerusalémo abido bitiaímaiaí. Abido billano, Samariamo diga comini illanuaimo Jesús ie mare rafuena llocana bitiaímaiaí.

Etiopía imie creyentena jailla rafue

²⁶ Naie facaise Jusiñamui jaienisaímona damie Felipemo llote:

—Beicido joide naído mai jai. Jerusalémona Gazamo joide naísona jai —llote. Naie naíso jofue iñenanodo joide. ²⁷ Ie jira jaide. Jusiñamuina sedajamona, naie facaise Etiopía enirue imie Jerusalémona bite. Etiopía illaiño diga maijuide. Naiñaiño mamecidi Candace. Naimiedi nana naiñaiño gobierno ucubena sedade. ²⁸ Naimie jai abido jaillano, ie carretamo raíta, Isaías micori cuela rabenicono ado facade. ²⁹ Jusiñamui Joreño Felipemo llote:

—Naimie dine iaírei jai. Carreta dine jai.

³⁰ Naimie dine Felipedi aisicana jaillanona, rabe ado facajana cacade. Felipe dinena naimiemo jicanote:

—¿O facaca rabenicono uiñotío?

³¹ Naimie uai ote:

—¿Ñiese uiñoticue, bu cuena canoñenia?

Felipemo jicanote, naimie diga a jaillano danomo raillena.

³² Naimie facaca ciegafue iese raite:

Toica llauda fallena uilla isoi, naimiema uitimaci.

Toica llauda itirai garedino dine eeñena isoi, naimie ñaiñede.

Ie abina riidollena, uaina oñede.

³³ Maraiñede rafuena naimie finoñede; ia naimiema duere finodimaci.

Naimie uruiaí iñededí, ¿bu naimie rafuena lloite?

Meinia meinoconi, naimie jai iñede.

³⁴ Etiopía imie Felipemo jicanote:

—¿Bie lloraíma bu iena llote? ¿Dama naimie iena llote? ¿Jiaímiema iena llote? Cuemo llono.

³⁵ Iemei Felipedi bie ciegafuimona naimiemo Jesús ie mare rafuena llote. ³⁶ Naísona jaidiaímaiaímo, jinui illanomo ridiaímaiaí. Etiopía imie dinena raite:

—Ero, bie jinui itemo, ¿bue ñe cuedi bautizañellicue?

³⁷ Felipe uai ote:

—O comecimona o ñnoia, cuemona mare.

Naimie uai ote:

—Jesucristodi Jusiñamui Jitonana ñnoticue.

³⁸ Naimie ie carreta jorodate. Iemei jinui dine jaidiaímaiaí. Felipedi naimiema bautizade. ³⁹ Jinuimona iaímaiaí bia, Jusiñamui Joreño Felipena oni uite. Etiopía imie Felipena dane cioñede; iadedi Etiopía imie iobicana jaide. ⁴⁰ Jusiñamui Joreño Azotomo Felipena uite. Cesarea dine naimie jaillanona, naga nairaíaimo Jesús ie mare rafuena llocana uite. Ie mei Cesareamo ride.

9

Saulo creyentena jailla rafue
(Hch 22.6-16; 26.12-18)

¹ Naie facaise Saulo cai Nama Cristona ñnotinona eo duere finoacade. Icirillamona, naimacina meineiacade. Ie jira Jusiñamui diga nanoca ñairaima dine jaide. ² Judíuai comini naie ñairaima anamo illamona, creyentiaina duere finollena, Saulo cartana naimiemo jicajaide. Damascomo ite judíuai ofiracuaimo dajerie cartana uiacade. Naie ofiracuai sedaraini naimie canollena jitaide. Jesucristona ñnotinona naimie baia, naimacina gaitajano, Jerusalémo atillena, naimiena canollena, cartana jitaide. Fiñiai baia, riñoniai baia, naimacina Jerusalémo atiacade. ³ Cartana ua mei, naimie jaillano, Damascomo iaie ia, ieconi monamona damie naimie abina quetiñote. ⁴ Eniruemo naimie ana uaillano, monamona damie naimiemo lluaana cacade:

—Saulo, Saulo, ¿bue ñellena cuena duere finodio?

⁵ Naimie uai ote:

—¿Budío?

Monamona damie raite:

—Jesúdicue. Cuena duere finodio. Iemona o abina duere finodio, ricaiillamona raise maiga jurareta suiñoacana isoi. Ie isoidio. Ricaiillamona, cuena duere finoacadio.

⁶ Naidacai. Damascomo mai jai. Nainomo o finolle rafue omo lloiticue.

⁷ Saulo diga jaidinodi ñaiñeno naidaidimaci. Naie uaina cacadimaci; iadedi buna cioiñedimaci. ⁸ Ieconi Saulo naidacaide. Ie uisi ecoricaillamona, erodatemo, jai buena cioiñede. Ie onollina llinocaida, naimiena Damascomo uitimaci. ⁹ Darui amani cioiñede. Jusiñamuimo comecina facajamona, guiñede. Jiai jiroñede.

¹⁰ Damascomo Ananiana mameciredimie ite. Naimiedi creyente. Iniñenamona, Ananías nicairilla isoi cacaillena, Cristodi naimiemo rafuena llote:

—Ananías.

Naimie uai ote:

—Jii, bene iticue.

¹¹ Cai Nama Cristo naimiemo llote:

—Naidacai. Atona joide railla naisona jai. Judas ie jofomo jai. Naicomo Tarso ie Saulona jicano. Naimie cuemo jai jide. ¹² Naimie damiena jai nicairite isoide. Ananiana mameciredimiena nicairite isoide. Ona nicairite isoide. Naimie dine o jaillena ona nicairite isoide. Naimiemo o onolli joniamona, naimie dane ciuana nicairite isoide.

¹³ Ananías uai ote:

—Nama, diga cominimona naimiena fididicai. Jerusalémo naimiedi maraiñede rafuena ona ñnotinomo finode. ¹⁴ Jusiñamui diga nanoca ñairaima uai naimiemo ite, nana bene ite creyentiaina gaitallena.

¹⁵ Cai Nama naimiemo llote:

—Mai. Naimie jai cue fetoca, judíuaiñedinomo cue rafuena llollena, illaicominimo cuena llollena, judíuai cominimo cue rafuena jiai llollena. ¹⁶ Cuena naimie jai ñnua muidona, naimie nie isoi legi cacajite. Naimiemo iena lloiticue.

¹⁷ Ie jira Ananías naie jofomo jaide. Ie onolli Saulomo joniano, raite:

—Saulo, jai cue amana jai itio. Naisomo cai Nama Jesús omo jai bairede. Naimie cuena o dine orede, dane o cioillena, Jusiñamui Joreño nana o comecimo namatallena.

¹⁸ Ieconi Saulo uisimona lliciai ico isoide ra uaide. Dane ciuana, naidaide. Ie mei jai bautizaga. ¹⁹ Ie mei jai guite. Dane mañide. Diga irui Damascomo ite creyentiaí diga naimie ite.

Damascomo Saulo illa rafue

²⁰ Judíuai ofiracomo naimie jaillanona, Jesús ie rafuena llofuede. “Jesúdi Jusiñamui Jito” raillanona llofuede.

²¹ Nana naimiena cacadinodi rajicaide. Raitimaci:

—Bimie Jerusalémo Jesúna ñnotinona duere finouide. Naimacina gaitallena, Jusiñamui diga nanoca ñairainimo uillena, naimie bene bite; ia Jesús ñibeimo jai ite.

²² Saulo nagarui jacitaiñeno llofuiamo fibioicaide. Llofueuide:

—Jesúdi cai Jilloitaraima. —Naimie raise llofuia jira, judíuai ñinena iena uaitanidimaci.

²³ Digarui illa mei, judíuai comeciaina facadimaci, naimiena meinellena. ²⁴ Naimie aisi raillano, aremona nairai nasiaina sedadimaci. Naiona nasiaina jiai sedadimaci, naimiena meinellena; iadedi Saulo iena fidiano, ²⁵ naiona creyentiai naimiena oni uitimaci. Naimie jillobillena, laigafo jinofebeimo cirigaímo rainajanona, naimiena ana ñuitadimaci.

Jerusalémo Saulo illa rafue

²⁶ Jerusalémo naimie jaide. Naimie ria, creyentiaína nabaiacade; ia naimiena jaciruitimaci. Creyentena naimie jaillana ñnoñedimaci. ²⁷ Ie jira Bernabé naimiena Cristo oretagano ñine uillano, naimacimo naiso motomo Saulo cai Namana ciuana llote. Naiso motomo cai Nama Saulomo lluaña jiai llote. Damascómo naimie ia, Jesúna jacitaiñeno llofuiana jiai llote. ²⁸ Ie jira Saulona nabaidimaci. Jerusalémo jaisoillanona, cai Nama ie rafuena jacitaiñeno lloouide. ²⁹ Iena cacajanona, griego uaina ñaite judíuaidi naimie llofuiana uaitatimaci. Naimiena meineiacadimaci. ³⁰ Creyentiai iena fidiano, Cesareamo Saulona uitimaci. Ie mei Tarsomo naimiena oredimaci.

³¹ Judeamo, Galileamo, Samariamo nana creyentiai uri itimaci. Cai Namana ñnocana jaidimaci. Cai Namana jaciruoicaida jaidimaci. Jusiñamui Joreño naimaci comeciaina eo ocuiñotade. Ailluena comini creyentiaína jaidimaci.

Eneas jillua rafue

³² Naie facaise diga illanuaimo Pedro macarite. Lidamo ite creyentiai ñine ride. ³³ Nainomo ñaimie ñiramó ñidena ciode. Naimiedi Eneas. Ocho años tisitaillamona ñide. ³⁴ Naimiena ciuano, Pedro naimiemo llote:

—Eneas, Jesucristo ona jai jillotate. Mai naidacai. O ñira ferí. —Ieconí naimiedi naidadate. ³⁵ Nana Lidamo ite comini, nana Sarónmo ite comini diga, naimiena jilluana ciuanona, creyentiaína jaidimaci.

Fiodaillamona Dorcas jillua rafue

³⁶ Jopemo Tabitana mamecirediñaiño ite. Griego uaimona oni dobaíñuamona naie mameci Dorcas. Naiñaiño creyente. Ailluena mare rafuena finouide. Ailluena duerede cominina canouide. ³⁷ Naie facaise naiñaiño ñuicotaide. Ie mei fodaite. Naimaci einamací finua isoí, ie nabaiñiai naiñaiño abina jocodimaci. Iemei aneba ie quartomo naiñaiñoña jonetimaci. ³⁸ Lidamona Jope iaire ite. Pedro Lidamo creyentiai illana fidiano, menamie naimie ñine oredimaci. Iaimaiaína llotatatimaci:

—Buena sedaño cai ñine raire bi.

³⁹ Ie jira Pedro naidacaida, naie iaimaiaí diga jaide. Naimie ria, aneba ie quartomo naimiena uitimaci. Nana feciñuai Pedro ecimo eecana naidaidimaci. Dorcas finouiga ñiroina naimiemo acatatimaci. ⁴⁰ Dorcas finouiga rafuena Pedro fidiano, Pedro nana naimacina jino orede. Caiñici ifodo naimie raíta, Jusiñamuimo jide. Abido dobaicaida, naiñaiñoño erodate. Raite:

—Tabita, mai rainaicaí.

Ieconí naiñaiño uisi oni erodate. Pedrona ciuano, a rainadate. ⁴¹ Naiñaiño onolli llinuanona, a naidanete. Ie mei Pedrodi feciñuaina, jiaie creyentiai diga, uaidote, naiñaiño jai cajenana naimaci cioillena. ⁴² Nana Jopemo ite comini naie rafuena fididimaci. Ie jira ailluena comini cai Namana ñnotimaci. ⁴³ Jopemo Pedro diga irui Simón jofomo ite. Simóndi ocaina goína cuidoraíma.

10

Cornelio comeci iuai meidua rafue

¹ Cornelio raillamiedi Cesareamo ite. Naimiedi capitán. Italamona bite soldaduai naimie anamo itimaci. ² Naimiedi Jusiñamui llogacinodo jaide. Nana ie comini diga Jusiñamuina inote. Judíuai cominimo ailluena rana jamai fecauide. Jusiñamuimo jiiuide. ³ Jitoma ana ia, naimiemo jai nicairilla isoi ite. Naimiedi Jusiñamui jaienicina naimie dine billana ciode. Jaienici di uaidote:

—Cornelio.

⁴ Naimiena Cornelio jaciruiocaida eruaide. Jicanote:

—Nama, ¿buena jitaideo?

Naimie uai ote:

—Jusiñamui o jiacinuaina jai cacade. Jusiñamui di duerede cominina o canuana jiai feitañede. ⁵ Mai, Jopemo damerie o mullaiaimona oreta, Simón raillamiena atillena. Naimie jiaie mamecidi Pedro. ⁶ Naimiedi igoi cuidoraíma jofomo ite. Naie cuidoraíma mamecidi Simón. Monailai fuemo naimie jofo ite.

⁷ Jusiñamui jaienici jailla mei, Cornelioidi ie mullaiaimona mena uaidote. Naimie anamo ite soldaduaímona damie jiai uaidote. Naie soldadodi Jusiñamuina jiai inote. ⁸ Nana naimiemo Jusiñamui jaienici llua naimacimo lua mei, Jopemo oretate. ⁹ Ie are naimaci jaillano, Jopemo ianori riacanano, jitoma naidai ia, jofo emodomo Pedro jaide, Jusiñamuimo jiiillena. ¹⁰ Naimie aimetaite. Guiacade. Guillena comini finodemo, naimiemo nicairilla isoi ite. ¹¹ Mona oni econuana ciode. Aillue sábana isoi, buena ana billana ciode. Eniruemo naga muiduedo maigado ana bite. ¹² Naiemo jiaiforie eruaide ocainaiái ite. Diga eniruemo jorode raniai ite. Diga nuiciniai jiai ite. Nana Moisés micori fimaidoga rille radi ite. ¹³ Naimiedi monamona damie llua naimie cacade:

—Pedro, naidacaida, fajano, buena rino.

¹⁴ Pedro uai ote:

—Nama, dama ite. Moisés micori fimaidoga rille rana jaca riñedicue.

¹⁵ Monamona damie llua naimie dane cacade:

—Jusiñamui jai fimaidoñede. Ie jira iese lloño.

¹⁶ Dacaiño amani iese suide. Ie mei naie radi monamo abido jaide.

¹⁷ Pedro ie comecina facade: “¿Niese illana ciodicue?” Ie daacaiño Cornelio oretagano bite. Simon illa jofo jicanuano, naie nasemo ride. ¹⁸ Simón Pedrona naie jofomo illana jicanotimaci. ¹⁹ Pedro ie nicairillana isoidemo comecina facajano, Jusiñamui Joreño naimiemo llote:

—Ero, daje amani ima ona jenode. ²⁰ Naidacaida, ana jai. Naimaci diga buena sedaño mai jai. O dine naimacina oredicue.

²¹ Pedro di comini dine ana jaide. Raite:

—Omo jenocamedicue. ¿Bue ñiaibitomo billa?

²² Uai otimaci:

—Cornelio raillamie anamo iticai. Corneliomo Jusiñamui jaienici birui llote: “Pedro dine damieriena oreta, naimiena o jofomo atillena. Jusiñamui rafuena raise cacaillena, naimiena ati” llote. Cornelioidi capitán. Naimiedi mareuidimie. Jusiñamuina inotimie. Nana judíuai comini dinena naimiedi mareuidimie.

²³ Iena Pedro cacajano, naimie jofomo inillena naimacina fo uaidote. Ie are naimaci diga jaide. Damerie Jopemo ite creyentiai naimie diga jiai jaidimaci. ²⁴ Ie are Cesareamo ridimaci. Cornelio naimaci billemo ocuride. Nana ie cominina jai uaidote. Ie nabaiñiai jiai jai uaidote. ²⁵ Pedro fo jaia, Cornelio dinena naimiena uaidote. Pedro anamo bitadate, Jusiñamuimo fecaja isoi Pedromo iobillacinona fecallena. ²⁶ Pedro di naimiena a naidanete. Raite:

—Mai a naidada. Cue jiai jamai imadicue.

²⁷ Naimie diga ñaiano fo jaidiaimaia. Ailluena comini ofillana ciode. ²⁸ Naimacimo llote:

—Moisés micori judío imie judíuñedimie nabairillana rairuide. Iena uiñotomoi. Judíuñedimie jofomo illana jia rairuide. Ie areruido Jusiñamui nicañilla isoidifuenta cuemo acatate. Iemona jai fueoticue. Jiaie nairai diga cue nabairillena, Jusiñamuimona marenana jai uiñoticue. Jusiñamui omoina cue jearuillana jai jitaiñede. ²⁹ Ie jira buena sedaño biticue, cuena o uaidua jira. ¿Bue ñellena cuena uaidotomoi? Cuemo llono.

³⁰ Cornelio uai ote:

—Nairui nagaamagarui illa meinomo, bie hora cue jofomo Jusiñamuimo jidicue. Ieconí Jusiñamui jaienicí cuemo bairede. Naimie iniroi quenirede. ³¹ Cuena raite: “Jusiñamui o jiana cacade. Naimiedi duerede cominina o canuana feitañede. ³² Ie jira Jopemo damieriena oreta, Simón Pedrona uaidollena. Jiaie Simón jofomo ite. Simondi igoí cuidoraíma. Ie jofo monaillai fuemo ite”. ³³ Iemona ona uaidoticue. O comece marena jira, bene bitio. Jai nana bene iticai. Jusiñamui cai diga jia ite. Cai Nama nana omo lluana cacareillena, bene iticai.

Corneliomo Pedro llua rafue

³⁴ Pedro uai ote:

—Jusiñamui nana comini naimie ñnuana jitaillana jai uiñoticue. ³⁵ Naga nairaímona Jusiñamuidi cominina jai jitaide. Bu naimiena ñnoia, bu mare rafuedo jiaia, Jusiñamui naimiena jai jitaide. ³⁶ Cai judíuai cominimo Jesucristo llumona, Jusiñamui dibeimo cai illena jai uiñoticai. Iemona Jusiñamui diga cai uri illana jai jiaí uiñoticai. Jesús nana cai Nama. Bie rafuena navui janore fididomoi. ³⁷ Nana Judeamo bie rafue llocana jai jaide. Juan micori bautizajana llua mei, Galileamo Jesús naimie llofuiana tainede. ³⁸ Jusiñamuidi ie Joreñoña Jesúsno fecade. Jesús Nazaret imie. Naimiemo ie uaina jiaí fecade. Ie jira Jesús mare rafuena finocana uite. Jusiñamui naimie diga illa jira, diga Taife anamo itinona jillotate. ³⁹ Judíuai eniruemo nana naimie siño finoca rafuena ciodicai. Iena birui llocabiticai. Cruzmo jonianona, cai illaicomini naimiena meinetimaci; ⁴⁰ iadedi darui amani illa mei, Jusiñamui naimiena jillotate. Jusiñamui jitailla jira, Jesús jillua mei, ailluena comini naimiena ciodimaci. Cajedimiena ciodimaci. Jiaí ciodicai. ⁴¹ Nana comini naimiena cioñedimaci; iadedi Jusiñamui fetocano diese naimiena ciodimaci. Fiodaillamona naimie jillua mei, naimie diga guiticai. Naimie diga jamai jirodicai. Naimiena cai raise uiñua jira, Jusiñamui caína fetode, naie rafuena lollena. ⁴² Cominimo bie rafuena lluana caimo llote. Jusiñamui Jesúsna jai fetode, naimiena ñnoñedinona duere finollena. Nia fiodañedinona duere finoite. Jai fiodaitinona jiaí duere finoite. Ie jira Jesús rafuena llocana jaidicai. ⁴³ Jesús muidona naga naimiena ñnotimie ie marañedicinodi Jusiñamui dotalle. Iena nana Jusiñamui facaina lloraini micoriai jaie llotimaci.

Judíuñedino Jusiñamui Joreñoña feiñua rafue

⁴⁴ Pedro biena nia llofueia, Jusiñamui Joreño nana bie rafuena cacadinomo bite. ⁴⁵ Iena ciuanona, Pedro diga bite creyentiaí rajicaidimaci. Naimacidi judíuai comini. Judíuñede cominimo Jusiñamui ie Joreño jai fecaja jira, rajicaidimaci. ⁴⁶ Jusiñamui Joreño naimacimo illamona, judíuñedinodi jiaie nairai uailaído ñaitimaci. Naie ñaia uailaina uiñoñedimaci. Jusiñamuimo iobillacinona jai fecadimaci. Pedro diga bitino iena cacajano, rajicaidimaci. Iemei Pedro raite:

⁴⁷ —Cai feiñua isoi, Jusiñamui Joreñoña jiaí feiñotomoi. Omoi bautizallena jaca budi rairuiñeite.

⁴⁸ Ie jira naimiedi naimaci Jesucristo facaina bautizallena llote. Bautizaja mei, naimaci diga fiebillana naimaci jitailla jira, diga irui nainomo fiebide.

11

Jerusalémo Pedro i naimiemo jai suide rafuena llote

¹ Judeamo ite Cristo oretagano, jiaie creyentiai diga, judúuaiñede comini Jusiñamui uaina feiñuana fididimaci. ² Pedro Jerusalémo abido ria, judúuai comini naimiema icidimaci. ³ Jicanotimaci:

—¿Bue ñellena judúuaiñedino jofomo jaidio? ¿Bue ñellena naimaci diga guitio?

⁴ Pedro uai uanona, naimacimo naie rafuena nagacinuaina llote:

⁵ —Jopemo navui cue ia, Jusiñamuimo cue jiaia, nicairilla isoi iticue. Aillue sábana isoi ana billana cidicue. Monamona ana lloride, ie muiduai maiga diga. Cuemo ana ride. ⁶ Nainomo eruaidicue, diga rana cidicue: ocainaiaina, eniruemo jorocana jaidinona, nuiciniaina. Iena cidicue. ⁷ Monamona damie cuemo llwana cacadicue. Raite: “Pedro, naidacaillanona, fajanona, rino”. ⁸ Naie uai oticue: “Nama, dama ite. Moisés micori fimaidoga rille rana jaca riñedicue”. ⁹ Monamona dane cuemo llote: “Jusiñamui iena jai fimaidoñede. Ie jira iese lloñeno”. ¹⁰ Dacaiño amani iese suide. Ie mei monamo nana abido dane jaide. ¹¹ Ieconí daje amani iima cai illa jofomo ridimaci. Cesaremona cue dine damie naimacina orede. ¹² Jusiñamui Joreñodi naimaci diga buena sedaño cue jaillena cuemo llote. Cue diga seis creyentiai jiai jaidimaci. Cuená uaidotimie jofomo jaidicai. ¹³ Nainomo cai rilla mei, naimie ie jofomo Jusiñamui jaienicina navui ciuana caimo llote. Naie jaienici naimiemo llote: “Jopemo cominina oreta, Simón Pedrona atillena. ¹⁴ O jitaille rafuena omo lloite. Naie rafuena o cacajamona, jeacinomona jilloitio, nana o jofomo ite comini diga” llote. Ie jira naimie cuena uaidote. ¹⁵ Nainomo cue llofuia facaiseconi, nano dofoconi caimo billa isoi, Jusiñamui Joreño naimacimo bite. ¹⁶ Iena cue ciuamona, cai Nama Jesús lloga uaina comeciticue. Naimie navui llote: “Juan micori rafuena comini feiñuamona, Juan naimacina bautizade; iadedi cue rafuena omoi feiñuamona, cue Moo ie Joreña birui feiñoitomo”. ¹⁷ Cai Nama Jesucristona cai iñuamona, Jusiñamuidi ie Joreña caimo navui fecade. Naimacimo daje isoi birui fecademo, ¿ñiese Jusiñamui díbeimo iñeiticue?

¹⁸ Iena Cristo oretagano cacajano, jai naimaci uaina uaitallicino iñede. Jusiñamuimo iobillacinona fecadimaci. Raitimaci:

—Naimaci jaca illena, Jusiñamuidi judúuaiñede comini comeciai iuai meiduana jai jitaide. Naimie díbeimo naimaci illana jai jitaide. Ie jira naimieri iobidicai.

Antioquíamo ite creyentiai illa rafue

¹⁹ Esteban micorina duere finua facaise, creyentiai tuficaida jaidimaci. Feniciamo damerie jaidimaci. Chipremo damerie jiai jaidimaci. Antioquíamo damerie jiai jaidimaci. Dani judúuai cominimo naimaci rafuena llotimaci; ²⁰ iadedi tuficainomona jiaino Chipremona billanona, Cirenemona billanona, Antioquíamo rillano, judúuaiñedinomo cai Nama Jesús rafuena llotimaci. ²¹ Cristo uai naimacimo illamona, ailluena comini iñotimaci. Cai Nama díbeimo jaidimaci. ²² Jerusalémo ite creyentiai iena fidiano, Antioquíamo Bernabéna oretatimaci. ²³ Naimie ria, naimaci marena illamona, naimiedi Jusiñamui naimacina dueruillana uiñote. Ie jira iobide. Imaci comeciai ocuiñocana iñocana jaillana naimacimo llote. ²⁴ Naimiedi maremie Jusiñamui Joreño nana naimie comecimo namatadimie. Jusiñamuina eo iñotimie. Naie facaise ailluena comini creyentiaina jaidimaci.

²⁵ Ie mei Tarsomo Bernabé Saulona jenuaide. Naimiema baillanona, Antioquíamo naimiema uite. ²⁶ Daje año creyentiai diga nabairillanona, naimacina llofuetiaimaiai. Antioquíamo creyentiaidi cristianona nano mameciredimaci.

²⁷ Iemei Jerusalémona Antioquíamo damerie Jusiñamui rafuena lloraini bitimaci. ²⁸ Naimacimona Agabo raillamie ite. Jusiñamui Joreñodi naimiema llotatate:

—Nana comini ico aime guitimaci. —Claudio illaimana illa facaiseconi iese jai suide. ²⁹ Ie jira Antioquiamo ite creyentiaidi, Judeamo ite creyentiamo, ucubena oretaiacadimaci. ³⁰ Nagamiai imacimo illa dierise ucubena oredimaci. Creyentiana llofuerainimo Bernabé diga, iaiaiai Saulo diga, naie ucubena oredimaci.

12

Herodes Agripadi creyentiana duere finua rafue

¹ Naie facaise Herodes railla illaimadi creyentiamona damieriena gaitatate, naimacina duere finollena. ² Lloebi diga Jacobo cimaiona jaitatate. Jacobodi Juan ama. ³ Ieri judiai illaicomini iobidimaci. Iena uinuamona, Herodes Pedrona jiai gaitatate. ⁴ Naie facaiseconi judiai comini llomenico guilla rafue ite. Naimiena gaitatajanona, cárcelmo jonete. Soldaduaina orede, naimiena sedallena. Daje soldado Pedro nabeimo lloeo diga cuinaca. Daje soldado Pedro jarifebeimo lloeo diga cuinaca. Mena soldado naie cuarto ie nasena sedade. Ie isoi sedaudimaci. Naie llomenico guilla rafue fuilla mei, comini illa uicomo naimiena meineiacade. ⁵ Ie jira Pedro cárcelmo fiebide; iadedi creyentiai naimie facaina eo jidimaci. ⁶ Herodes naimiena meineiacanarui naio Pedro soldaduai motomo inide. Mena lloeo diga maiga. Soldaduai cárcel nasena jiai sedadimaci. ⁷ Ieconci cai Nama ie jaienici di cárcelmo bairede. Cárcelmo lligaiñote. Naimiena casitallena, jaienici Pedro ciragina jetade. Raite:

—Raie naidacai.

Ie mei naimie onollimo ite lloedi oni uaide. ⁸ Jaienici naimiena raite:

—O iniroina jita. O zapatona jiai jita— Iena jitaja mei, naie jaienici dane raite—. O iniroi o abimo ferino. Cue diga mai bi.

⁹ Naie jaienici jinafona Pedro jino jaide. Pedrodi naie jaienici naimiemo finoca rafuena uiañode.

—Nicañilla isoi comecina facadicue —raite. ¹⁰ Naga nasena sedade soldadomona jaide. Jino jaillena, nanoca nasemo ride. Nai nasedi lloema ie; iadedi nase dama ecoride. Jino jaidiaiaiai. Daje calle jaillanona, jaienici naimiena fañonocade. ¹¹ Iemona Pedro naimiemo suide rafuena jai uiañocade. Raite:

—Cue Nama ie jaienicina uanaí oretate. Herodemona cuena jillobitade. Judiai illaicomini cue meinellena cue sedajamona cuena jillobitade.

¹² Iena jai naimie uiañuano, María jofomo jaide. Maríadi Juan Marcos ei. Jusiañamui jillena, naicomo ailluena comini ofidimaci. ¹³ Rillanona calle fuemo ite nasena tute. Daje mullaño bite. Naiñaiño mamecidi Rode. ¹⁴ Naimie uaiduamona, naiñaiño Pedro uaina uiañote. Iobilla jira, nase econoñede; iadedi abido fo aiside. Pedro nasemo illana llote. ¹⁵ Raitimaci:

—Odi uairico isoidiosa.

Naiñaiñodi:

—Pedrodi jaca ieseuide —raite.

Uai uamona:

—Naimie joreño ite —raitimaci.

¹⁶ Pedro nasena nia tua jira, nasena econuaibitimaci. Econuamona naimiena naimaci cuamona, rajicaidimaci. ¹⁷ Fo jaillano, Pedro ie onolli jaidide, naimaci llicaillena. Cárcelmona cai Nama naimiena jino ua rafuena llote. Raite:

—Jacobomo iena llono. Jiaie creyentiamo iena jiai llono.

Ie mei Pedro jino jaillano, jiañonomo jaide.

¹⁸ Monaidemo, Pedro nainomo iñena jira, soldaduai rajicaillanona, siadotimaci. ¹⁹ Herodes iena fidiano, naimiena jenotate. Naimiena baiñena, soldaduai jicanote. Baiñena jira, naimacina meinellena llote. Iemei Judeamona Cesareamo Herodedi jaide.

Herodes micori fiodailla rafue

²⁰ Naie facaise Herodedi Tiro railla nairai diga, Sidón railla nairai diga, eo icirite. Naimaci uri ille rafuena siadollena, naimie dine bitimaci. Herodes ecimo maijidimiedi Blasto. Blasto diga naie cominidi nabairite, naimaci dibeimo naimie illena. Herodes enruemona naimaci guille billa jira, uri illena naimiemo jicanote. ²¹ Naie cominina Herodes feñollena, ie ebirede iniroina jitade. Naimacina feñollena, ie rairabicimo raide. Iemona raita, rafuena are llote. ²² Iena cacajano, comini ado cuiriidimaci:

—Jamai imadi ñañena. ¡Jusiñamui ñaia!

²³ “Jusiñamuiñedicue” naimie raiñena jira, ieconi cai Nama jaienici naimiena iracotaitate. Jusiñamuimo iobillacino naimie fecañena jira, aiaí naimiena aite. Iemona naimiedi fodaite.

²⁴ Naie facaiseconi Jusiñamui uai llocana jaide. Ailluena comini iena inotimaci.

²⁵ Iaimaiaí uiga ucube illanona, Bernabé, Saulo diga, Jerusalémona Antioquíamo abido bitiaimaiaí. Juan Marcos jiaí atidiaimaiaí.

13

Bernabéna, iaímaiaí Saulo diga, fetua rafue

¹ Antioquíamo creyentiaí motomo Jusiñamui facaina lloraini itimaci. Llofueraini jiaí itimaci: Bernabé, Simón. Simón di jiaíe mameci Negro. Lucio ite. Naimiedi Cirene imie. Manaén ite. Naimiedi Herodes ie amana mamede. Herodedi Galilea railla enrue gobernador. Saulo jiaí ite. ² Naimaci Jusiñamuina sedajamona, guiñenaruillaí ia, Jusiñamui Joreño naimacimo llote:

—Bernabé iaímaiaí Saulo diga feto, cuejena. Cue rafuena iaímaiaí lollena, iaímaiaína jai fetodicue.

³ Jusiñamuimo naimaci jiaí mei, Jusiñamui iaímaiaína fetuana naimaci uiñuamona, naimaci onolli iaímaiaímo jonia mei, iaímaiaína naimacimona oni oretatimaci.

Pablo, iaímaiaí Bernabé diga, Chipremo illa rafue

⁴ Iaimaiaína Jusiñamui Joreño oretaja jira, Seleuciamo jaidiaímaiaí. Nainomona botedo Chipremo jaidiaímaiaí. Chipredi uiasi. ⁵ Chipremo ria, Salaminamo judúuaí ofiracuaimo Jusiñamui uaina llofuetiaímaiaí. Juan Marcos iaímaiaí diga jiaí jaide. ⁶ Nana naie uiasimo jaillanona, Pafos railla nairaímo ridimaci. Nainomo Barjesúna mameciredimiena baitimaci. Naimie judío imie. Naimiedi aima. Naimiedi diga siño rafuena finoraíma. “Jusiñamui rafuena lloticue” raite; iadedi taino lloráíma. ⁷ Gobernador diga maijuide. Gobernador di Sergio Paulo. Gobernador di abina uiñotimie. Jusiñamui uaina cacaacana jira, naimie Bernabé iaímaiaí Saulo diga uaidote. ⁸ Barjesús ie jiaíe mamecidi Elimas. Naie iaímaiaí llofuiana uaitate. Gobernador inuana jitaíñede. ⁹ Saulodi jiaíe mameci Pablo. Pablo dinena naimiena eo eruaiillano, Jusiñamui Joreño nana Pablo comecimo namatajamona, ¹⁰ naimiemo llote:

—¡Eo jifueraimadio! ¡Eo marañedio! ¡Taife dibeimo itio! Nana mare rafue dibeimo iñedio. Cai Nama ie mare uanaicinona dobairadodio. ¹¹ Cai Nama ie uaido ona ja iracotaitaticue. Nano nigarui useredinona cioiñeitio.

Ieconí naimie cioiñede. Cominina jenuaide, ie onollido llinocaida ie uillena. ¹² Iena ciuamona, gobernador creyentena jaide. Cai Nama Jesús rafue siñonana ciuanona, naimie jacinaite.

Jesús rafuena llocana jaidiaímaiaí

¹³ Pafomona botedo Pablo ie nabaiñiaí diga jaide. Perge railla nairaímo ride. Perge Panfilia railla enruemo ite. Juan Marcos iaímaiaína fañonocaida, Jerusalémo abido jaide. ¹⁴ Pergemona Antioquíamo jaidiaímaiaí. Pisidia railla enruemo Antioquía ite. Sábadoruimo judúuaí ofiracomo jaillano, ana raidiaímaiaí. ¹⁵ Moisés micori ciegafuena

facaja mei, Jusiñamui facaina lloraini micoriai cuegafuena facaja mei, judíuai ofiraco sedadino iaimaiaimo llotimaci:

—Caimaci, cominimo bue omico lloiacania, mai llono.

¹⁶ Pablo naidadajano, ie onollina jaidide, comini llucaillena. Raite:

—Jusiñamuina sedallena bene itomoi. Omoimona damierie judíuaidomoi. Jiaino judíuaifedomoi; iadedi judíuai isoi Jusiñamuina sedadomoi. Cue llamo mai cacarei. ¹⁷ Iemona omoi fueollena, cai jaiagai rafuena lloiticue. Cai judíuai comini Jusiñamuina birui sedadicaí. Naimiedi cai jaiagaina jaie fetode. Egiptomo naimaci ia, naimacina eo jebuitate. Nainomona ie siño uai diga naimacina atide. ¹⁸ Jofue iñenanomo cuarenta años naimacina canode. ¹⁹ Canaán eniruomo siete nairaina cuenode. Cai jaiagaimo, naimaci uruiái diga, naie eniruena fecade, naimaci iena. ²⁰ Cuatrocientos cincuenta años cai jaiagaina fetuamona, naie eniruena naimacimo fecade. Naie facaise Jusiñamuidi jueces fetode, cai jaiagaina naimaci canollena. Naimie dibeimo naimacina itatallena, Jusiñamui naie jueces fetode; iadedi Samuel micori illa facaise juecesna jai jitaifedimaci. Samuel micoridi Jusiñamui facaina lloraima. ²¹ Illaimana naimaci jitailla jira, Jusiñamui Saúl micorina fetode. Naimiedi Cis micori jito. Naimie micori nairaidi Benjamín. Cuarenta años Saúl micori cai usumatiaí micoriaina sedade. ²² Naimie ifo meidollena, naimaci illaimana illena, Jusiñamui David micorina fetode. Naimiedi Isaí micori jito. Jusiñamui naimie micorina llote: “Bimie eo cue comecido jaidimie. Nana cue jitaille rafuena finoite”. ²³ Jusiñamui llua isoi, David micori uruiaimona Jesúdi cai judíuai comini Jilloitaraimana jaide. ²⁴ Jesús nia llofueñenia, Juan Bautista micori llofueuide. Juan micori cai cominimo llouide: “Omoi jeacinona fainonocaida, Jusiñamui dibeimo omoi comeciaí iuailai meido. Iena omoi meidoia, comini iena uiñotallena, mai omoi bautizallomoi”. ²⁵ Juan micori ie llofuaí fuillamona, raite: “Omoi comeci facajamieñedicue. Cue ifomo jaimiena meidoite. Naimie isoiñedicue. Jamai bue isoidicue. Jamai bue cue isoilla jira, naimiena cue canuana uiñoñedicue”.

²⁶ Caimaci, cai eirue jito Abraham micorimona comuidicaí. Jusiñamuina birui sedadicaí. Ie jira cai jeacinomona naimie jilloitalle rafue caimo duide. Jesúna ñaiticue. ²⁷ Jerusalémo itinodi, cai illaicomini diga, Jesúna jaie meinetimaci. Naga sábado Jusiñamui facaina lloraini micoriai cuegafuinaína facadimaci; iadedi iena raise cacaiñedicue. Jesúna naimaci meiniamona, Jusiñamui lloraini micoriai cuegafuinaína jai suitatimaci. ²⁸ Jesús marañede rafuena finoñede; iadedi naimiena meinetimaci. Pilatomo jicanotimaci, naimiena meinellena. ²⁹ Nana Jusiñamui facaina lloraini micoriai cuegafuinaína suilla mei, cruzmona naimie ana uano, nofici ie raiafomo naimiena jonetimaci; ³⁰ iadedi fiodaillamona Jusiñamui naimiena jillotate. ³¹ Galileamona Jerusalémo naimie diga jaidino naimiena diga icaiño cidimaci. Iemei cominimo naimie rafuena jai llocabitimaci. ³² Jusiñamui cai jaiagaimo jaie lloga rafue jai suide. Iena omoimo ja lloiticoco. ³³ Jusiñamuidi cai jaiagaimo llogafue birui jai suide. Jesúna cai dine jai orede. Naiena salmos dosmo cuega: “Jusiñamui llote: ‘Cue jitodio. Birui ona Jilloitaraimana itataticue’ ”. ³⁴ Fiodaillamona Jusiñamui naimiena jai jillotate. Ie abi jaca rifaiñede. Iena Jusiñamui jiai raite: “Davidmo cue llogacinona omoi facaina jaca finojiticue”. ³⁵ David micori jiaie salmomo iena cuete: “O mareuidimie jaca rifailana jitaifedio” raite. ³⁶ Jusiñamui David micorina ñañede. Ie illa dinori David micoridi Jusiñamui jitailla rafuena finode. Ie mei naimie fiodaite. Ie raiafomo naimie comini naimiena jonetimaci. Ie mei David micori abi rifaide; ³⁷ iadedi Jusiñamui Jito abidi ie isoi rifaiñede.

³⁸ Caimaci, daje rafue omoimo lloiacadicue. Jesús fiodailla jira, Jusiñamui omoi jeacino oni dotaacade. Moisés micori llogacinodi omoi marañedicinomona omoína jillotañede; ³⁹ iadedi Jesúna birui omoi ñnoia, omoi jeacino anamona jilloitomoi. ⁴⁰ Abina omoi rairui, Jusiñamui facaina lloraini micoriai jaie cuegafuiaí omoimo sui raillano. Jaie cuetimaci:

⁴¹ Ero, Jusiñamui uaina jamaidomoi. Ieri raijicaidomoi; iadedi faifidomoi.

Omoi motomo siño mare rafuena birui finodicue.

Bu omoimo iena iese lloia, bie rafuena inoñeitomoi.

Ie isoi omoimo suiñellena, Jesúna birui omoi mai ino.

⁴² Ie mei Pablo llicaiide. Iaimaia jino jaidemo, comini iaimaiaimo jicanotimaci, jiaie sábadoruimo bie rafuena naimacimo dane lollena. ⁴³ Comini jino jailla mei, ailluena comini Pablo, iaimaia Bernabé diga, ñaicana jaidimaci. Judíuai iese jaidimaci. Judíuaiñedino iese jia jaidimaci. Naie judíuaiñedinodi judíuai isoi Jusiñamuina inotimaci. Pablo, iaimaia Bernabé diga, ñaicana jaillanona, naimacimo llotiaimaia:

—Jusiñamui omoina duenailana omoi jai uiñua jira, Jesús rafuena mai omoi ino.

⁴⁴ Jiaie sábadoruimo ailluena comini ofidimaci, Jusiñamui uaina cacareillena.

⁴⁵ Ailluena cominina ciuano, judíuai comini dinena eo uradoidimaci. Pablo joreña ñaitimaci. Naimie llofuiacinuaina uaitatimaci; ⁴⁶ iadedi Pablo, iaimaia Bernabé diga, jacitaiño llofuetiaimaia:

—Omoimo Jusiñamui uaina nano lloiacadicoco. Iena jitaiñedomoi. Jusiñamui diga omoi jaca illena jitaiñedomoi. Ie jira judíuaiñedino dine jaiticoco. ⁴⁷ Iese Jusiñamui jaie llote:

Judíuaiñedinomo ona oretaiticue, naimacimo cue rafue lollena,

naga eniruemo ite cominimo jeacinomona jilluana lollena.

⁴⁸ Iena cacajano, judíuaiñedino iobidimaci.

—Jusiñamui rafue mare —raitimaci. Jusiñamui jaca illena fetocano diese Jesúna inotimaci. ⁴⁹ Nana bie eniruemo cai Nama Jesús uaina llocana jaide; ⁵⁰ iadedi judíuai dinena diga cominina fuemo faicana uitimaci. Jusiñamuina sedade riñonia fuemo faicana uitimaci. Naie riñonia mamecia are soride. Illaicomini fuemo faicana uitimaci. Ie jira Pablo, iaimaia Bernabé diga, duere finodimaci. Naimaci illanomona iaimaia jino dotadimaci; ⁵¹ iadedi jioracuai iaimaia eillimona jaidinotiaimaia, naimacimo ite jeacinuaina naimaci uiñollena. Ie mei Iconio railla nairaimo jaidiaimaia; ⁵² iadedi Antioquíamo ite creyentia eo iocire itimaci. Jusiñamui Joreño nana naimaci comecimo namatade.

14

Iconiomo Pablo, iaimaia Bernabé diga, illa rafue

¹ Iconiomo judíuai ofiracomo, iaimaia Antioquíamo jailla isoi, jaidiaimaia, Cristo rafuena duere llotiaimaia. Ie jira ailluena comini creyentia jaidimaci. Judíuai cominimona ailluena inotimaci. Judíuaiñede cominimona ailluena jia inotimaci; ² iadedi inoñede judíuai judíuaiñedinona fuemo faitimaci. Naimacimo creyentia tainona llotimaci; ³ iadedi nainomo are fiebidiaimaia. Cai Nama facaisena jacitaiño llotiaimaia. Cai Nama Jesús iaimaia siño rafuena finotate. Ie jira comindi cai Nama Jesús naimacina dueruillana fididimaci; ⁴ iadedi nana comini naiena inoñedinomaci. Comecia daje isoi lloisiñede. Damerie judíuai facaisena itimaci. Damerie naie iaimaia facaisena itimaci. ⁵ Judíuaiñedinodi, judíuai diga, naimaci illaicomini diga, naie iaimaia duere finoacadimaci. Noficina iaimaia fairigiacadimaci. ⁶ Iena fidiano, Licaoniamite nairaimo aisicano jaidiaimaia. Listra railla nairaimo jaidiaimaia. Derbe railla nairaimo jia jaidiaimaia. Naie nairai ecimo ite eniruemo jia jaidiaimaia. ⁷ Nainomo Jesús ie mare rafuena llofuetiaimaia.

Listramo iaimaiaimo suilla rafue

⁸ Listramo damie titaite. Nanomona naimie iese jeicia jira, jaca macariñede. ⁹ Pablo llofuiana naimie raise cacajamona, “Jusiñamui cuena jillotarede” raillanona, tisitaimie inote. Pablo dinena naimiemo eruaillano, naimie inuana uiñote. ¹⁰ Naimiemo ado llote:

—A naidada.

Iemei daiacaida naimie macarite. ¹¹ Ailluena comini Pablo finoca rafuena cioidimaci. Naimaci uaido ado cuiridimaci:

—Iñiaí isoi Jusiñamui cai dine bite.

Naie cominidi Júpiter railla jusiñamuina sedauidimaci. Mercurio railla jusiñamuina jiaí sedauidimaci. ¹² Ie jira Bernabé mamecidi jiaicina jonega Júpiter. Pablo mamecidi jiaicina jonega Mercurio, naimie ñairaimana illa jira. ¹³ Naie nairai nanoca nase ruica facai Júpiterna sedauilla jofo ite. Iaimaiaina sedallena, safia diga juraretaiaina abina finoduanona, Júpiter facaina ñairaima naimacina atide. Ailluena comini diga bite. Juraretaiaina fallena, “Naie iaimaiaidi cai Jusiñamui” raillano, iaimaiaimo feaacadimaci. ¹⁴ Iaimaiaí iena ciuanona, “Comini marañede rafuena finoacade” raillano, iaimaiaí ñiroina cuaranotiaimaiaí. Comini motomo aisicana jaidiaimaiaí. Ado llotiaimaiaí:

¹⁵ —Nabaiñiaí, ¿bue ñellena cocomo iese finodomoí? Jamai imadicoco. Omoí isoidicoco. Jusiñamuina omoí sedallena, jamai rana omoí sedañellena, mare rafuena omoímo jai lloticoco. Cajede Jusiñamuina sedadicoco. Naimiedi mona finode. Eniruena finode. Monailaina jiaí finode. Nana nainomo ite rana jiaí finode. ¹⁶ Jaie Jusiñamuidi nana omoí judíuaiñedino omoí jitailla rafuena finuana rairuiñede; ¹⁷ iadedi naimie finoca rafuemona naimiena uiñoredomoí. Omoí facaina mare rafue naimie finocabide. Noci deitate. Omoí riara sicotate. Omoímo guille itatate. Iemona omoí comeciaina caimare itatate. Iemona Jusiñamuina uiñoredomoí.

¹⁸ Iese Pablo llote; iadedi iaimaiaimo juraretaiaina fecajana jaca fañonocaiacaiñedimaci. ¹⁹ Nano nigarui illamona, Pisidiamo ite Antioquíamona judíuai comini bitimaci. Iconiomona jiaí bitimaci. Judíuai dinena fuemo faiamona, naimaci díbeimo comini jaidimaci. Iemona noficido Pablona fairigite. Naie nairaimona naimiena sonocana uitimaci, fiódaitimiena naimie eruaila jira. ²⁰ Naimiena iese fañonocailla mei, creyentiaí naimie ecimo billamona, naimie a naidadate. Nai nairaimo abido jaide. Ie are Derbemo, Bernabé diga, jaide. ²¹ Naie nairaimo Jesús ie mare rafuena llotiaimaiaí. Diga comini creyentiaina jaidimaci. Ie mei Listramo abido jaidiaimaiaí. Iconiomo abido jiaí jaidiaimaiaí. Pisidiamo ite Antioquíamo jiaí abido jaidiaimaiaí. ²² Creyentiaí comeciaina ocuiñotadiaimaiaí. Cristona nia ñnuana llotiaimaiaí. Raitiaimaiaí:

—Jusiñamui dine cai nia riñenia, eo duere sefuiticaí.

²³ Naga creyentiaí illanomo creyentiaina sedarainina fetodiaimaiaí. Guiñeno Jusiñamuimo jiaí mei, guiñena facaise mei, naimiena naimaci jai ñnua jira, cai Nama illa anamo naimacina fañonocaidiaimaiaí.

Siriamo ite Antioquíamo abido jaidiaimaiaí

²⁴ Pisidiamo jaillanona, Panfiliamo ridiaimaiaí. ²⁵ Pergemo Cristo uaina llua mei, Ataliamo jaidiaimaiaí. ²⁶ Nainomona botedo Siriamo ite Antioquíamo abido ridiaimaiaí. Nano naie iaimaiaí illanomo abido ridiaimaiaí. Nainomona iaimaiaí navui nia jaiñenia, creyentiaí dinena Jusiñamui iaimaiaina duenaillana uiñuamona, iaimaiaina oredimaci. Jusiñamui rafuena iaimaiaí llollena, iaimaiaina oredimaci. Naie maijia fuilla jira, jai abido bitiaimaiaí. ²⁷ Iaimaiaí rilla mei, creyentiaina ofitadiaimaiaí. Nana Jusiñamui iaimaiaimo finoca rafuena llotiaimaiaí.

—Jusiñamuidi judíuaiñedino naimiena ñnuana jai jitaide —llotiaimaiaí. ²⁸ Dinomo creyentiaí diga are itiaimaiaí.

15

Jerusalémo Moisés micori llogacinona siadua rafue

¹ Antioquíamo Jerusalémona janore comini billano, creyentiaina iese llofuetimaci:

—Moisés micori caimo llua isoi, omoí abina omoí detatañenia, jeacinomona jillo-biñeitomoi.

² Ie jira creyentiaí uri iñedimaci. Pablo, iaímaiaí Bernabé diga, Jerusalémona bitino llofuiana eo uaitatíiaímaiaí. Ie muidona creyentiaí dinena iaímaiaína, jiaíe creyentiaí diga, Jerusalémo jaillena fetodimaci. Cristo oretagano diga, Jerusalémo ite creyentiaína sedaraini diga, bie rafuena siadoiacasite. ³ Creyentiaí naimacina oretaja mei, Fenicia railla enirue díbeido jaidimaci. Ie mei Samaria railla enirue díbeido jiaí jaidimaci. Creyentiaí illanuaímo llofuecana jaidimaci. Judíuaíñedino creyentiaína jai jaillana naimacimo jiaí llotimaci. Ie jira naie creyentiaí caímare itimaci.

⁴ Jerusalémo ria, creyentiaídi naimacina feiñotimaci. Cristo oretagano itimaci. Creyentiaína sedaraini jiaí itimaci. Naimacimo nana Jusiñamui iaímaiaímo finoca rafuena llotíiaímaiaí. Cristo rafuena iaímaiaí llofuíamona, judíuaíñedino Cristona ñnuana llotíiaímaiaí. ⁵ Iena cacajano, fariseuai díbeimo ite creyentiaímona jiaíno naidaita raitimaci:

—Moisés micorí llogacínuaína ñnuamona, judíuaíñede creyentiaí abina diana jitaídicaí.

⁶ Bie rafuena siadollena, Cristo oretaganodi, creyentiaí sedaraini diga, danomo ofidimaci. ⁷ Iena are siadua mei, Pedro naidacaillano, raite:

—Amatíai, judíuaíñedinodi cuemona Jesús ie mare rafuena cacaillena, jiaíe omoímona Jusiñamui cuena fetode. Iena uiñotomoi. Cue llofuíamona ñnotimaci. ⁸ Nana comíni comeciaína naimíe uiñuamona, judíuaíñedino naimíena ñnuana Jusiñamuidi uiñote. Caímo fecaja isoi, ie Joreño naimacimo fecaja jira, Jusiñamuidi judíuaíñedinona jitaillana jai uiñoticaí. ⁹ Jusiñamuidi naimacina caí isoi jai feiñote. Naimíena naimaci ñnuua jira, naimíe naimaci comeciaímona jeacínona jai dotade. ¹⁰ ¿Bue ñellena Jusiñamuina ñnoiacaíñedomoi? Jusiñamui jitaillacino omoi finoacaiñena jira, naimíe omoína duere finuana jitaídomoi. Caí jaiagai Moisés micorí llogacínodo jaidimaci; iadedi iena raise ñnoñedimaci. Nana ie llogacínona jaca finonidimaci. Iedo jiaíe jiaí jaidicaí; iadedi iena jiaí finonidicaí. ¿Bue ñellena iedo birui caí jaillana jitaídomoi? ¹¹ Jesucristo caína duenailla jira, caí jeacínomona jilloiticaí. Judíuaíñedino caí isoi jilloitimaci.

¹² Iena cacajano, nana ofidíno uai llícaídicaí. Iemei Bernabé lluaana cacadimaci. Pablo lluaana jiaí cacadimaci.

—Jusiñamui judíuaíñedino motomo cocona síño rafuena finotate —lloíiaímaiaí.

¹³ Iaímaiaí ñaía mei, Jacobo raite:

¹⁴ —Amatíai, cuemo cacarei. Judíuaíñedinomo Jesús rafue Simón Pedro nano llua rafuena jai cacadicaí. Creyentiaína naimaci jaillena, Jusiñamui naimacina jai fetode.

¹⁵ Jusiñamui facaina lloraini micoríai iena jiaíe cuetimaci:

¹⁶⁻¹⁸ Jusiñamui jiaíe llote: “David micorí illaíma isoi illaímana illena, cue Jitona íco oretaiticue.

David jícorí jito illaímana birui iñede;

iadedi David micorí ifomo illaímana cue Jito iite.

Iemona judíuaíñedino cuena ñnoítimaci.

Naimaci cue comínina jaillena jiaí jitaídicaí.

Iena cue llua jira, iena finoíticue” llote.

¹⁹ Ie muidona cue comeci raite: Judíuaíñedinomona creyentiaína jaidínona duere finoñeiticaí. ²⁰ Naimacimo rabena oreta, dama buena lollena: “Jiraraímo fecaca llícisina riñeno. O aiñede riño diga iñeno. O iniñede íima diga iñeno. Llerínoga rana riñeno. Diruena jiaí riñeno”. ²¹ Jaiemona naga sábadu naga judíuaí ofiracomo judíuaídi Moisés micorí cuezafuaímona naie isoide lletarafuena cacadimaci. Ie jira naie isoide rafuedo nia jaiticaí; iadedi jiaíe Moisés micorí lletarafuedo jaiñeiticaí.

²² Ie mei Cristo oretaganodi, creyentiaína sedaraini diga, comeciaína facadimaci, naimacimona comínina fetollena, Antioquíamo oretallena. Nana creyentiaí comeciaína facajano: “Jee” raitimaci. Pablo, iaímaiaí Bernabé diga, naimacina oretaiacadimaci.

Judana fetodimaci. Naimie mameci jiaicidi Barsabás. Silana jiai fetodimaci. Jiaie comini baifemo rafuena baitadiiaimaiai. ²³ Rabena cuetimaci, iaimaiai diga oretallena. Iese raillano, cuetimaci:

“Antioquíamo itino, Siriamo itino, Ciliciamo itino, omoimo cueticai. Jerusalémo iticai. Cristo oretaganodicai. Creyentiaina sedarainidicai. Omoidi cai amatiai. Omoimo jai cueticai. Judíuñediomoi; iadedi cai amatiaidomoi. ²⁴ Cai motomona jiaie comini naimaci llofuiado omoina uri itatañenana fididicai. Omoi jeacinomona omoi jilloillena, Moisés micori llogacinodo omoi jaillana jitaidimaci. Ie jirari omoi comeciai rucaicuerite. Naimacina oretañedicai. ²⁵ Danomo cai ofilla mei, menamiena fetodicai, omoimo oretallena, Bernabé, iaimaiai Pablo diga. Bernabéna isiruiticai. Pablona jiai isiruiticai. ²⁶ Iaimaiai cai Nama Jesucristo muidona navui niadedi fiodaitiaimaiai. ²⁷ Ie jira Judas, iaimaiai Silas diga, oretaiticai. Omoimo bie rabe cuia isoi lloitiaimaiai. ²⁸ Jusiñamui Joreño caimo illamona, bie rafuena omoimo lloiticai. Ailluena rafue omoi finuana lloñeiticai. Dani bie rafuena finojitomoi. ²⁹ Jiraraimo fecaca rana riñeno. Diruena riñeno. Llerinoga rana riñeno. O añede riño diga iñeno. O iniñede ima diga iñeno. Iese omoi iñenia, marena iitomoi. Macaibaite” cuetimaci.

³⁰ Ie mei Antioquíamo jaidimaci. Ailluena cominina ofitaja mei, naimacimo cartana fecadimaci. ³¹ Iena facajano, naie llucaciori iobidimaci. ³² Judas Jusiñamui facaina loraíma. Silas daje isoide. Diga rafuena creyentiaimo llofuetiaimaiai. Naimaci comeciaina jiai ocuiñotadiaimaiai. ³³ Diga irui nainomo illa mei, iaimaiaina oretatinomo creyentiaí iaimaiaina marena abido oretatimaci.

³⁴ Nainomo Silas comecina facajano, fiebide. Ie jira Judas dama abido jaide. ³⁵ Antioquíamo Pablo, iaimaiai Bernabé diga, cai Nama Jesús rafuena llofuellena fiebidiaimaiai. Diga comini jiai iese llofuetimaci.

Pablo jiaie eniruemo ite creyentiaí dine dane jailla rafue

³⁶ Diga irui illa mei, Pablo Bernabémo llote: p —Naga navui coco llua nairaimo creyentiaí dine abido mai coco jai. Cai Nama ie mare rafuena dane lloiticoco. Nie isoi naimaci illana jibuiticoco.

³⁷ Bernabédi, naie iaimaiai diga, Juan Marcos uiacade. ³⁸ Panfiliamo iaimaiaina navui Juan fañonocade. Iaimaiai diga llofuellena jaiñena jira, Pablo naimiena dane uiacañede. ³⁹ Riire ñaitiaimaiai. Comecina daje isoi lloñediaimaiai. Ie jira dajena jaiñediaimaiai. Bernabé Juan Marcona uillanona, Chipremo aillue botedo jaidiaimaiai. ⁴⁰ Ie mei Pablo Silana uite. “Jusiñamui omicono canoite” creyentiaí dinena raillanona, iaimaiaina oredimaci. ⁴¹ Siria railla eniruemo Jesús rafuena llocana jaidiaimaiai. Cilicia railla eniruemo jiai llocana jaidiaimaiai. Creyentiaí comeciaina ocuiñotacana jaidiaimaiai.

16

Timoteo iaimaiai diga jailla rafue

¹ Nano Derbemo Pablo, iaimaiai Silas diga, ridiaimaiai. Iemona Listramo ridiaimaiai. Nainomo Timoteo railla creyente ite. Naimie eidi judía iñaiño. Jiai creyente. Ie moo micoridi griego imie. ² Listramo ite creyentiaí, Iconiomo ite creyentiaí diga, naimiena: “Mare” raitimaci. ³ Pablodi Timoteona uiacade, naimie diga jaillena. Timoteo moo micori griego imiena jira, naimie abina nia detatañede; iadedi nainomo ite judíuai illa jira, Moisés micori llua isoi, Pablo Timoteo ie abina dete. Judíuñedimie naimaci motomo ia, naimaci motomo inide. ⁴ Naga nairaimo naimaci jaillanona, Jerusalémo siadogacina creyentiaimo llote. Jerusalémo Cristo oretagano, creyentiaina sedaraini diga, navui naicinona siadotimaci. Creyentiaí naie lluaña ñnollena, iena llocana

jaidimaci. ⁵ Ie jira creyentiai inocana jaidimaci. Nagarui ailluena comini creyentiaina jaidimaci.

Pablo nicairilla ra isoidena ciua rafue

⁶ Jusiñamui Joreño Asia railla eniruemo ie uaina naimaci llofuiana rairuilla jira, Frigia railla eniruemo macaricana jaidimaci. Iemona Galaciamo jaidimaci. ⁷ Misiamo naimaci rillano, Bitiniamo jaiacade; iadedi Jesús Joreño dane imaci jaillana rairuide. ⁸ Ie jira Misiamona ecido jaillano, Troas railla nairaimo jaidimaci. ⁹ Nainomo naie naiona Pablo nicairilla ra isoidena ciode. Daje Macedonia imiedi uicomo naidaita naimiemo jicajicanode. Raite: “Macedoniamos ruica o bi. Caina canuaibi”. ¹⁰ Naiona Pablo ciua mei, naie facaisemona Pablo diga jaidicue. Lucadicue. Ie jira bie rafuena raise uinoticue, iena omo cuellena. Macedoniamos ruica dine cai jaille botena jenodicai. Comecina facadicai: “Jusiñamuidi caina uaidote, nainomo ie mare rafuena cai lollena”.

Filipomo illa rafue

¹¹ Ie jira Troamona Samotraciamo monaillaido atona ie mamedo jaidicai. Ie icoitidiruido Neápolis railla nairaimo ridicai. ¹² Dinomona Filipomo duide naisodo jaidicai. Macedoniamos ite. Naie enirue facaise ie nanoca nairai Filipos. Naie nairaidi Romamona bitino nairai. Diga irui nainomo iticai. ¹³ Sábadoruido naie nairaimona nasedo jino jaidicai. Comecina facajamona: “Dinomos nibai comini oficabidimaci, Jusiñamuimo jillena”, ille fuemo jaidicai. Nainomo dañaiñorie riñoniai billanona, dinomo ana raicai, naiñaiñuaimo Cristo rafuena lollena. ¹⁴ Naimacimona dañaiño cai llofuiana eo cacade. Naiñaiño mamecidi Lidia. Tiatira railla nairai iñaiño. Naiñaiñodi jiduirede iniruena fecauide. Jusiñamuina jai sedade. Pablo llofuiana naiñaiño cacajano, cai Nama Jesús naiñaiño comeci naie lluana feiñotade. Naie facaise creyentena jaide. ¹⁵ Naiñaiño ie jofomo itino diga bautizaja mei, caimo llote:

—Cuedi cai Namana cue jai inuana omoi uinuamona, cue jofomo mai bi, nainomo omoi fiebillesa. —Duere caina uai-uaidode.

¹⁶ Jusiñamuimo jiranomo jairuido jaidicaimo, daje jitañomo dafaifidicai. Naiñaiñodi jainomona ibacañaiño. Janaba anamo naiñaiño jiai ite. Iemona naiñaiño jairuido suille rafuena llouide. Naie rafuena lluana ibatajano, naiñaiño namaiaidi ailluena ucubena feiñoudimaci. ¹⁷ Naiñaiñodi cai jinafona jaillanona, ado cuiri-cuiricaide:

—Naimaci nanoca Jusiñamui ie lloraini. Omoi jilluana omoimo llocabitimaci.

¹⁸ Diga irui naiñaiñodi iese cuiri-cuirisoide. Icirillamona, Pablo abido dobaidacaida, naiñaiñomo ite Janabamos llote:

—Cue Nama Jesucristo uaido naiñaiñomona oni jai. —Iemona oni jaide.

¹⁹ Naiñaiño lluamona ucubena jai oñenana naiñaiño namaiai jai uinua jira, Pablo, iaiaiai Silas diga, gaitadimaci. Iaiaiaina plazamos illaicomini illanomos sonocana uitimaci. ²⁰ Dinomos iaiaiaina illaicomini dine atidimaci. Iese iaiaiaina llogidotimaci:

—Naie iaiaiaidi cai nairaina uri itañediiaiaiai. Iaiaiai judíuai comini.

²¹ Romanuai cominina cai illa jira, iaiaiai llogacinuaina cai inoia, iedo cai jaia, marañede.

²² Iena cacajano, nana comini naie iaiaiaina fanaisitimaci. Illaicomini naie iaiaiai iniroina cuaranuanona duiñode. Rasi diga, iaiaiaina diga icaiño fatatatimaci.

²³ Iaiaiaina eo faja mei, cárcelmo jonetimaci. Cárcelna sedaraimamos iaiaiaina raise sedallena llotimaci. ²⁴ Iese llua jira, iaiaiaina llaveracomo fo iaiaiaina uite. Donoramos iaiaiai eillai ñuitajano, raise donode.

²⁵ Naiona daferui facai Pablo, iaiaiai Silas diga, Jusiñamuimo ifuerillacinona rorodiaiaiai. Jiai jiidiaiaiai. Jiaie llavecamos naiona cacadimaci. ²⁶ Jamai ebena illacinomona ñuisañodi suide. Cárcel illanodi jaidisite. Naie facaiseconi nana nasiadi ecocorinaite. Ie dacaiño nana llavecamos imaci donua radi oni ecoride. ²⁷ Cárcelna sedaraima casidemos, cárcel ie nasiai ecocorinaillana ciode. “Llavecamos jai aisidimaci”

raillamo naimie comecina facade. Ie jira ie lloesi aiñoicaida, dama abi faitaacade. “Illaicomini bia, ¿bue lloiticue?” raillamona comecina facade; ²⁸ iadedi Pablodi eo riire cuirioide:

—¡O abina dama meineño! Bene nana iticaisa.

²⁹ Lamparina atillena cárcelna sedaraima jicajanona, jarire fo jaide, Pablo iaimaia Silas dine. Jacinaillano, naimie abidi docaillamona, iaimaia uicomo caiñici ifodo ana rainadate. ³⁰ Iaimaiaina jino ua mei, nai iaimaiaimo jicanote:

—¿Buena finojiticue, cue jeacinomona cue jilloillena?

³¹ Uai otiaimaia:

—Coco Nama Jesúna ñno. Iese na o jofomo ite comini diga o jilloillesa.

³² Iemei naimiena Jesús ie rafuena llofuetiaimaia, nana ie jofomo itino diga. ³³ Naie facaise iaimaia bofellaña jocode. Iemei naimiedi, nana ie comini diga, bautizaga. ³⁴ Guillena, ie jofomo naie iaimaiaina uite. Jusiñamuina jai ñnua jira, na ie comini diga, naimie caimare ite.

³⁵ Ie oni monaidemo, illaicominidi dajerie policiana cárcelmo oretatimaci, nai iaimaiaina jino orellena. ³⁶ Cárcel sedaraimadi naie rafuena Pablomo llote. Raite:

—Omico jaillena, illaicominidi omicono oredimaci. Mai marena jai.

³⁷ Iadedi policiamo Pablodi llote:

—Cocodi romanuai cominidicoco; iadedi cocomo ite rafuena raise uiñoño cocona marefodo fatimaci. Cárcelmo cocona jonetimaci. Jai bainino cocona jino oretaicadimaci. Iese jino jaiñeiticoco. Naimacimo llono: “Cocona jino ollena bi”.

³⁸ Ilaicominimo policias naiena lluaibitemo, illaicominidi naiena cacajanona, eo jacinaite, romanuai cominina iaimaiaina jira. Cai nanoca illaicominidi romanuai nairai cominina jamai ebena duere finuana rairuidimaci. ³⁹ Ie jira naie iaimaia dine illaicominidi jaidimaci, iaimaiaina: “Dama dino iesede” raillena. Jino atia mei, nairaimona jino iaimaia jaillena oredimaci. ⁴⁰ Cárcelmona jino billano, Lidia jofomo fo jaidiaimaia. Creyentiaina ciuano, naimaci comeciaina ocuiñotallena, naimacina dane llofuetiaimaia. Ie mei oni jaidiaimaia.

17

Pablo, iaimaia Silas diga, Tesalónicamo illa rafue

¹ Anfípolis railla nairaimo macaritiaimaia. Apolonia railla nairaimo macaritiaimaia. Ie mei Tesalónica railla nairaimo ridiaimaia. Dinomo judíuai ofiracodi ite. ² Pablo fibilla isoi, nainomo fo jaide. Daje amani sábadoruimo Jusiñamuina cuegosuaimona naimacina llofuate. ³ Iese naimacina llofuate:

—Cristo llegei cacaita. Fiodaillamona naimie jilloite. Naimiedi Jesús. ⁴ Naiena cacadinomona ailluena ñnotimaci. Pablo, Silas iaimaia dibeimo jaidimaci. Jusiñamuina ñnote grieguaimona ailluena comini creyentiaina jaidimaci. Ie emodoconi ailluena nanocañaiñuaidi creyentiaina jiai jaidimaci; ⁵ iadedi judíuaidi uradoillano, jamai itinomona eo marañede ññiaina uaiduanona, ailluena cominina ofitatimaci. Ie jira naie nairai uri ñnedimaci. Iaimaiaina comini uicomo uillena, Jasón jofomo binaisite. ⁶ Iaimaiaina baiñenano, Jesóna, jiaie creyentia diga, illaicomini illanomo aiñoicaida uitimaci. Cuirisite:

—Naga nairaimo cominina uri itañedíiaimaia. Benomo jai bitiaimaia. Jai benomo billanona, Jasón ie jofomo iaimaiaina feiñote. ⁷ Cai nanoca illaima ie llogacinona jai ñnoñnedimaci. Ie anamo jai iacaiñnedimaci. Raitimaci: “Jiaie illaima anamo iticai. Jesús raillamie anamo iticai”.

⁸ Judíuai iese lluamona, cominidi uri ñnedimaci. Ilaicominidi jiai uri ñnedimaci. ⁹ “Naie iaimaia dane biñeitiaimaia” illaicominimo creyentia raillano, illaicominidi Jasón jiaie creyentia diga, jino oretatimaci.

Bereamo Pablo, iaímaiaí Silas díga, illa rafue

¹⁰ Naie naio creyentiaídi Pablona, iaímaiaí Silas díga, Bereamo raíre oretatímaci. Díno mo rillano, judíuaí ofiracomo jaidíiaímaiaí. ¹¹ Nainomo ite judíuaí eo mare. Tesalónicamo ite judíuaí isoiñedímaci. Bereamo itínodi Cristo rafuena iocíre feiñotímaci. Niedi uanaicinoni raillanona, nagarui Jusiñamuina cuezafuíaína facadímaci. ¹² Ie jira naimacimona ailluena inotímaci. Judíuaíñedinomona ailluena nanocañaiñuaí inotímaci. Ailluena iñiaí jiaí inotímaci; ¹³ iadedi Bereamo Pablo Jusiñamui ie uaina jai lluaña Tesalónicamo ite judíuaídi fidiano, díno mo jaidímaci. Comínina fuemo faillena, jaidímaci. ¹⁴ Naie facaise creyentiaídi Pablona oni oretatímaci. Monaillai fuemo duide naisona oretatímaci. Silas, iaímaiaí Timoteo díga, fiebidíiaímaiaí. ¹⁵ Pablo uigamací naimíe díga Atenamo jaidímaci. Dane abído Bereamo jaidímacimo, naimacimo Pablo llote:

—“Silas, iaímaiaí Timoteo díga, raíre cue díne billesa” llono.

Atenamo Pablo illa rafue

¹⁶ Atenamo iaímaiaí rillena Pablo sedademo, naie nairaimo ailluena jiraraíiaína cíode. Iena cíuanona, Pablo comecídi jeareficaíde. ¹⁷ Naiena cíua mei, judíuaí ofiracomo judíuaí díga coniníri Jusiñamui rafuena siadote. Jusiñamuina jai inote judíuaíñedíno díga coniníri iena jiaí siadote. Plazamo nagarui jamai itíno díga coniníri iena jiaí siadote. ¹⁸ Jamai comecína facadínomona damíerie naimíe díga jiaí ñaitímaci. Epicúreo railla rafuedo jaisoidímaci. Estoico railla rafuedo jiaí jaisoidímaci. Damíerie naimacimona raitímaci:

—¿Buena nai ñaillareuidímíe caímo lloiacade?

Jiaíno raite:

—Jiaíe nairai jusiñamuillaícaímo lloiacade isoide.

Jesús fiodaillamona jilluana Pablodi llouilla jira, íese raitímaci. ¹⁹ Ie jira naimíena naimací siadouillanomo uitímaci. Naie illano Areópagona mamecírede. Jícanotímaci:

—¿Níe isoide o comocínuaí? Caímo llono, caí uiñollena. ²⁰ Eo feiredicínuaína cacadícaí. ¿Buena nai llofuíacínodi llote? Iena uiñoiacadícaí.

²¹ Nana Atenamo ite comíní, jiaíe illanomona bitíno díga, jamai aillí como imací fídía rafuena ñai-ñaidímaci. Jamai aillí fídía rafuena caca-cacadímaci. Jiaíe rafuena finoñedímaci.

²² Jícanua mei, Areópago railla illanomo Pablo naidacáida llote:

—Atenas imací, omoímo rafuena lloiacadícue. Omoí jusiñamuillaína eo sedacabidomoi. ²³ Cue macarillamona, omoí jusiñamuillaína sedaja jiraraína cíodicue. Daje jiraraí abímo íese cuela: “Uiñoñega Jusiñamuina sedadícaí” cuela. Uiñoñoeno naimíena sedadomoi. Ja omoímo naimíena lloítícue. ²⁴ Jusiñamui biníena jaíe finode. Ie emodocóni Jusiñamuidi nana biníemo itínona jiaí finode. Naimíedi mona íe Nama. Enírué íe Nama. Ie jira íima finoca jofomo naimíe íñede. ²⁵ Naga jítaille rana naimíemo illa jira, naimíena canonidícaí. Naimíe nana comínina comuitate. Jiaí nagarui jafaicí caí uadí caímo iga. Uanaí nana rana caímo iga. ²⁶ Damíedemona nana comínina jebuitate, nana eníruemo naimací illena. Naimací illa dínorí naimíe jonega. Naimací illanomo naimíe jiaí jonega. ²⁷ Íese jonega, naimací naimíena jenollena. Jenuano, níbai naimíena baitímaci. Caímona naimíe are íñede. ²⁸ Naimíe jaca illa jira, caí jiaí itícaí. Jiaí cajedícaí. Ie isoí omoí rafue lloraíni jiaí llotímaci: “Naimíe íe uruaídícaí”.

²⁹ Naimíe caína comuitaja jira, Jusiñamuidi jiraraí isoiñedena uiñotícaí. Jusiñamuidi oromona finoca ra isoiñede. Platamona finoca ra isoiñede. Noficimona finoca ra isoiñede. Íima íe onollí díga finoca ra isoiñede. ³⁰ Comínídi abí uiñoñoeno jeacino jaíe finouidímaci. Jusiñamui naimacína nía janafeñede; iadedí jai biruí Jusiñamuidi nana comínina naga illanomo naimací comecíai íuaí meídollena jítaide. ³¹ Naimací comecíai íuaí naimací meídoféna, naimíe jai lloga facaise, naimacína duere finoite. Naimacína

duere finollena, ie Jitona jai fetode. Naimaci finoca rafuena naimie raise uifnuamona, naimacina duere finoite. Fiodaillamona Jesúna naimie jai jilloitaja jira, iena uifnoticai.

³² Fiodaillamona Jesús jilluana cacajano, damierie jaisitimaci. Ieconí jiaínodí raite:

—Jiaíruido o lluana dane cacajiticai.

³³ Iemei naimaci motomona Pablo jino jaide. ³⁴ Naie cominimona damierie naimie díbeimo jaidimaci. Inotimaci. Naimacimona damie Areópagomo siadoudimie. Ie mamecídí Dionisio. Jiaíñaiño inote. Naiñaiño mamecídí Dámaris. Daje facaiseconí jiaie comínidí inotimaci.

18

Corintomo Pablo illa rafue

¹ Atenamona Corinto railla nairaimo Pablodí jaide. ² Nainomo Aquila raillamiena baiseside. Naimiedí judío imie. Ponto railla eniruedí naimie comuillano. Ie aí mamecídí Priscila. Naiñaiño díga Romamona como bitiaimaiaí. Romamona Claudio nana judíuai cominina jai oretate. Ie jirari bitiaimaiaí. Roma ie nanoca illaimadí Claudio. ³ Pablo iaímaiaí daje isoi maíjia jira, Pablo iaímaiaí jofomo fiebide. Iaímaiaí conima díga maíjide. Chivos itiraiaí ie nilla iniroina tiforisoidimaci, naimemona jofona finollena. ⁴ Naga sábadoruimo judíuai ofiracomo llofujete, judíuaina inotallena, judíuaiñedinona iena jiaí inotallena. ⁵ Macedoniamona Silas, iaímaiaí Timoteo díga, bitemo, Pablodí nagarui Jusiñamui uaina llofueuide. Judíuaimo: “Jesúdí cai jilloitaraima” llouide; ⁶ ia naimie uaina inosiñedimaci. Jiaí naimie jinafomo jeare ñaitimaci. Naimaci comeciaí jeare cúa jira, Pablo ie iniroina jaidinote, naimacina raillano:

—Daní omoi muidona Jusiñamui omoína duere finojite. Cue muidonañeite. Jai judíuaiñedinó díne jaiticue, naimacina cue llofuellena.

⁷ Iese raillano, oní jaide. Justo jofomo jaide. Naimiedí Jusiñamuina inouidimie. Ie jofó judíuai ofiraco ecimo ite. ⁸ Crispodí, nana ie jofomo itino díga, cai Nama Cristona inote. Naimiedí judíuai ofiraco ie sedaraima. Ailluena Corintomo ite cominí creyentiaina jaidimaci. Ie meí naimacídí bautizaga. ⁹ Daje naóna Pablo nicaírilla isoidemona, Pablomo cai Nama Jesucristodí llote:

—Maí jacíruiño. Faicaíño cue rafuena llocana jai. ¹⁰ O díga iiticue. Budí ona maraiño finoñeite. Bie nairaimo ailluena comínidí cue díbeimo jaitimaci.

¹¹ Ie jira daje año ie emodo seis fivuí dínomo Pablodí fiebide, naimacimo Jusiñamui uaina llofuellena.

¹² Corinto railla nairaidí Acaya railla eniruemo jainaiáide. Naie facaiseconí damierie judíuai cominí Pablona faiacadimaci. Galión díne naimiena uitimaci. ¹³ Raitimaci:

—Cai illaima llogacino isoi bimiedí cominina Jusiñamuina sedallena llofueñede.

¹⁴ Pablo uai oiacademo, judíuaimo Galióndí llote:

—Judíuai, cacarei. Naimie maraiñede rafuena finodena, naimie omoína jifuetena, omoi lluomo nia cacarefidicue; ¹⁵ iadedí jamai naimie uailai cuemo llotomoi. Omoi usumatiaí micoriaí mameciaí cuemo jiaí llotomoi. Omoi einamací llogacinuaina cuemo jiaí llotomoi. Iena omoi coniníri siadotomoi. Bie isoide rafuena siadoiacañedicue.

¹⁶ Iemona naimiedí nainomona naimacina oní orede. ¹⁷ Ie meí Sóstenena gaitadimaci. Sóstenes ofiraco ie sedaraima. Naimiena gobernador uicomo fanaisite; ia naifuenta Galión níese nibañede.

Antioquíamo Pablo abido jailla rafue

¹⁸ Naifue suilla meí, nainomo Pablo are fiebide. Ie meí creyentiaina facaduano, Priscila iaímaiaí Aquila díga, Siria railla eniruemo botedo jaide. Ie uai raise finuana uifnollena, Moisés micorí llua isoi, Cencreamo rillano, ie ifogina rijiruda garetate.

¹⁹ Efesomo rillanona, iaímaiaína faínonocaide. Judíuai comíni Jusiñamui rafuena siadol-lena, Pablodí judíuai ofiracomo fo jaide. ²⁰ Are naimaci motomo fiebillena naimiemo jicanotimaci; iadedí Pablo dinena uai ote:

—Fiebiñeíticue — ²¹ Naimacina facaduano, llote —. Jerusalémo jaiticue; iadedí Jusiñamui jitaia, dane omoi dine abído riíticue. —Iemei Efesomona jaide. ²² Cesareamo sijiano, Jerusalémo macarite. Creyentiaí dine jaide. Ie mei Antioquíamo jiaí macarite.

²³ Nainomo are fiebilla mei, Pablo dane jaide. Galaciamo macarite. Ie mei Frigiamo macarite. Nana creyentiaí imaci comeciaina ocuiñotacana jaide.

Apolos illa rafue

²⁴ Ie facaise Efesomo Apolos raillamie Alejandría railla nairaimona ride. Judío imie. Naimie eo raise llofueuidimie. Naimiedí Jusiñamui facaina lloraini micoriaí cuegafuiaí raise uiñote. ²⁵ Naimiedí Jesús ie rafuena navui jai cacade. Ie comecimona iena eo llote. Jesús rafuena raise llofueite; iadedí naimie dama Juan micori ie bautizajana uiñote. Nana Jesús finoca rafuena nia uiñoñede. Jusiñamui Joreño feiñuana jiaí uiñoñede. ²⁶ Judíuai ofiracomo naimie llofua, jacitaiño llofueite. Priscila, iaímaiaí Aquila diga, naíena cacadiiaímaiaí. Ie jira naimiena oni eneno uitiaímaiaí. Ie uiñoñega rafuena eo raise naimiena llofuetiaímaiaí. ²⁷ Acayamo Apolodí jaiacana jira, creyentiaídi naimie comecina ocuiñotajano, naimiena oresite. Acayamo ite creyentiaímo rabemo cuetimaci. Jusiñamui naimacina dueruilla jira, creyentiaína jai jaidimaci. Naimiena marena feiñollena iese cuetimaci. Nainomo naimie rillanona, creyentiaína eo canode. ²⁸ Judíuai diga marefodo jiaí eo ñaíte. Iemona naimaci uai ollinodí iñede. Naimiedí Jusiñamui cuegafuiaímona Jesúdi caí Jilloitaraímana llofueite.

19

Efesomo Pablo illa rafue

¹ Corintomo Apolo nia itemo, nairaiái onifedo joide naído jailla mei, Pablo Efesomo ride. Dinomo rillanona, creyentiaína baite. ² Naimacimo jicanote:

—¿Cristona omoi ñnuaruimo Jusiñamui Joreñoña feiñotomoi?

Uai otimaci:

—Jusiñamui Joreñoña nia jaca cacaiñedicaí.

³ Dane jicanote:

—¿Nie isoi omoi bautizagaomoi?

Uai otimaci:

—Juan micori lloga rafue facaina bautizagacaí.

⁴ Pablo uai ote:

—Mare. Juan llote: “Omoi comeciái iuaina meido. Iemei bautizallomoi”. Ie ifo meidoitimiena comíni ñnollena llote. Jesúna ñnollena llote. Jesús rafuena omoímo raise lloíticue.

⁵ Iena cacajano, caí Nama Jesús díbeido bautizadimaci. ⁶ Naimacimo Pablo ie onollina joniamona, Jusiñamui Joreñoña feiñotimaci. Ie mei naimaci uiñoñega nairai uaido ñaitimaci. Jusiñamui Joreño naimacimo llua rafuena jiaí llotimaci. ⁷ Nibaí nana naimacidi doce iñiaí.

⁸ Sábadoruimo judíuai ofiracomo fo jaillano, naimie anamo naimaci illana Jusiñamui jitailla jira, Jusiñamui díbeimo naimaci comeciái iuaina meiduana Pablodí jacitaiño eo llouide. Nainomo daje amani fivui fiebide. ⁹ Naimacimona jiaínodí Pablo uaina uaitatimaci. Jiaí ñnoiacaíñedimaci. Naimaci ñnoñena ira, ofiracomo bitinomo: “Cristo rafuedí marañede” llouidimaci. Ie jira Pablodí creyentiaí diga naimacimona eneno oni jaide. Tiranno ie lloracomo nagarui Pablodí llofueuide. ¹⁰ Mena fiemona iese llofueuide. Ie jira diga Asia railla eníruemo ite comínidi caí Nama ie uaina cacadimaci. Judíuai cacadimaci. Judíuaiñedino jiaí cacadimaci.

11 Jusiñamuidi Pablona siño rafuena finotate. 12 Duidinomo cominidi naimie jetaca pañueluaina uitimaci. Duidinomo naimie jetaca iniroina jiai uitimaci. Naiena jetajamona, duidinodi jillodimaci. Janaba anamo itinodi jiai jillodimaci. 13 Naie facaise jamai macarisoidino ridimaci. Judíuai imaci. Naimacidi icoriraini. Jesús mameci llinuano, jananiai anamo itinomona jananiaina oni oretaiacadimaci. Jananiaimo raitimaci:

—Pablo llua isoi, Jesús muidona bimacimona oni jai.

14 Esceva ie siete jitotiaidi iese finoacadimaci. Escevadi Jusiñamui diga ñairaima. 15 Janabana oni oretaiacadimacimo, Janaba dinena uai ote:

—Jesúna uiñoticue. Pablona jiai uiñoticue; iadedi omoína uiñoñedicue.

16 Ieconí Janaba anamo itimie naimaci emodomo daiacaide. Riire nana naimacina emodoficaide. Ie jira naie jofomona taímiaina jino aisidimaci. Naimacidi bofellaiai diga jino aisidimaci.

17 Nana Efesomo itino iena fididimaci. Judíuai, judíuaiñedino diga, naifuena fididimaci. Naifuena fidianona, eo jacinaitimaci. Iemona cai Nama Jesús mamecidi are soride. Comini dinena: “Jesús uai eo siño” raitimaci. 18 Ie jira ailluena creyentiaidi bil-lano, imaci navui marañede finoca rafuena Jusiñamuimo llotimaci. Icorilla rafuena finouidimaci. Iena marefodo llotimaci. 19 Ailluena icorilla rafuia illabiai atianona, marefodo jobaidimaci. Níga raifi rabiai jobaillana facadimaci. Cincuenta mil ucube diese facai rabiaina jobaidimaci. 20 Cai Nama Jesús uaina eo llocana jaide. Cominidi naie uai siñonana uiñotimaci.

21 Naie rafue illa mei, Pablodi comecina facajano raite: “Macedoniamos cue macarillamona, Acayamos cue jiai macarillamona, Jerusalémo riacadicue”. Ie emodoconi naimiedi raite: “Nainomona Romamos jiai jaiacadícue”. 22 Naimie nia Asiamos nano nígarui illanona, mena canoraímana Macedoniamos oretate. Timoteona, iaímaiai Erastos diga, oretate.

Efesomo ite comini marañede rafue finoacadimaci

23 Naie facaiseconi Pablo nia oni jaiñenia, Jesucristo rafue muidona Efesomo ite cominidi marañede rafuena comuitatimaci. 24 Demetrio raillamie platamona diga rana finouide. Naimiedi Diana ie jofo joreñuaina finouide. Naimie anamo ailluena maijuidimaci. Dianadi naimaci jusiñamui. 25 Naimie isoi maijuidinona Demetrio uaidote, nana naimaci danomo ofillena. Ie mei raite:

—Jai danomo ofidícai. Bie maijiamona cai ucubena uana raise uiñotomoi; 26 iadedi Pablo raillamiedi diga cominina jai llofuate: “Comini finoca raniaidi jusiñamuillañede”. Naie llofuiamona ailluena comini naimie díbeimo jaidimaci. Dama Efesomo iese suiñede; iadedi ua nana Asiamos iese suide. 27 Ie jira abina rairuiacadícai, cai maijille faifi raillano, comini Diana jofona jiai sofei raillanona. Cominidi naiñaiñona ebiruillana feítaitimaci. Naiñaiñori rajicaiñeitimaci. Dianadi eo ebirede jusiñamui. Nana Asiamos ite comini naiñaiñona sedacabidimaci. Unai nana bie eníruemo ite nairaidi naiñaiñona sedacabidimaci. Ie jira abina rairuiacadícai.

28 Iena cacajano, eo iciritimaci. Riire cuiriidimaci:

—¡Efeso ie Diana eo ebirede!

29 Danírie siadumona, nana comini eo faillíñaidimaci. Iemo nana comini dajena naimaci ofiracomo fo raire jaisite. Gayona, iaímaiai Aristarco diga, gaitajano uitimaci. Naie iaímaiaidi Pablo ie nabai iaímaiai. Iaímaiai comuillanodi Macedonia. 30 Pablo ofiracomo jiai fo jaiacade; iadedi creyentiaidi naimie fo jail-lana rairuidimaci. 31 Illaicominimona damíerie nabaiñiai naimiemo fo jaillana jiai rairuidimaci. 32 Fo itinomona damíerie daje rafuena ebena cuiriidimaci. Jiaíno jiaífuena ebena cuiriidimaci. Eo faillíñaidimaci; ie iadedi bue ñellena naimaci ofillana raise uiñoñedimaci. 33 Comini motomona judíuai dinena damíe uicomo oredimaci. Ie mamecidi Alejandro. Cominina llícaitallena, ie onollí jaidianona, cominimo lloiacade;

³⁴ iadedi naimie judío imiēna naimaci uiñuanona, nana daacaiño cuiiriidimaci. Mena horas raifi cuiiri-cuiiriidimaci:

—¡Efeso ie Diana eo ebirede!

³⁵ Iemei naie nairai rabe cueraimadi cominina llicaitatate. Naimaci llicaiilla meinoni, naimie llucinona cacadimaci. Raite:

—¡Cacarei! Cai nairaidi Dianana sedacabidicai. Naiñaiño ebirediñaiño. Naiñaiño eraide jiraraidi monamona jaie uaide. Iena jiai sedacabidicai. Nana bie eniruemo ite comini iena uiñotimaci. Bu naiena uiñoñedimiena jaca iñede. ³⁶ Bu cue llua jaca uaitañeite. Ie jira omoi llicai. Comeciai facañeno buena finoño. ³⁷ ¿Bue ñellena Gayo iaiaiaia Aristarco diga, benomo atidomoi? Iaiaiaiaidi cai jusiñamui joreñoña ñaiñediiaiaiaia. Naiñaiñoña jeare finoñediiaiaiaia. ³⁸ Demetrio, ie maijiraini diga, iaiaiaiaia llogidoiacania, cominina llogidoraco ite. Diga jueces jiai ite. Coniniri nainomo iena siado; ³⁹ iadedi jiai nicino omoimo ia, cai illacomini ofia, buena siaduanu, caimo lloitimaci. ⁴⁰ Birui bie rafue cai finua jira, illacomini nibai caina duere finoitimaci. ¿Ñiese cai nibaille? Illacomini caimo buena jicanoia, ¿ñiese raiticai?

⁴¹ Naie llua mei, ofidinona jino orede. Iemei jai jono tuudimaci.

20

Macedoniam Pablo dane jailla rafue

¹ Efesomo ite rafue suilla mei, Pablodi creyentiaina uaidote. Naimaci comeciaina ocuiñotafuena llote. Iemei naimacina naimie facaduanu, Macedonia railla eniruemo jaide. ² Nainomo ite nairaiamo macarite. Comecina ocuiñotalena, naimacina llofuecana jaide. Iese Macedoniamona Grecia railla eniruemo risaide. ³ Nainomo daje amani fivui illa mei, Siriamu botedo abido jaiacade; iadedi judiuidi naimiēna meineiacanana Pablo fidiano, Macedoniamu abido macarite. ⁴ Jiaino naimie diga jaidimaci. Sópater jaide. Naimiedi Berea nairai imie. Pirro jito. Aristarco, iaiaiaia Segundo diga, jaide. Tesalónica nairai imie iaiaiaia. Gayo naimie diga jiai jaide. Gayodi Derbe nairai imie. Timoteo naimie diga jiai jaide. Tíquico, iaiaiaia Trófimo diga, jiai jaidiaiaiaia. Asia imie iaiaiaia. ⁵ Coco uicodo naimaci jaillano, Troamu cocona sedadimaci. ⁶ Llomenico guillaruilla railla rafue fuilla mei, Filipomona jaidicoco. Monailaido dabecuirorui coco jailla mei, Troamu naimaci diga dane danomo dafaifidicoco. Nainomo siete digarui fiebidicoco.

Troamo Pablo illa rafue

⁷ Domingoruimo Jesús fiodaillana comecillena, danomo ofidicaimo, Pablodi caina llofue. Icoiti naimie jaiacana jira, Pablo are ñaite. Naiona jitoma daferui illa facai nia ñaite. ⁸ Cai ofillanomo ailluena lamparini ai ite. ⁹ Pablo are ñaia jira, daje coniruemo iniaicidi suide. Naie conirue mamecidi Eutico. Naimiedi ventanamo raide. Naimie eo inia jira, ventanamona ana uaide. Tercer pisomo a iticai. Nainomona eniruemo naimiedi uaide. Ana jibuisaibidemo, naimiēna meniñocaidemo, naimie jai fiodaillana cioidimaci. ¹⁰ Ie jira Pablo ana jaide. Naimie emodomo jitadacaida, naimiēna meniñote. Cominimo llote:

—Omoi rucaicueriño. Naimie cajede. Jafaicina nia faite.

¹¹ Abido a jaidimaci. Jesús fiodaillana comecillena, llomeniconu tairuano, cominimo Pablo fecade. Guilla meinomo, naimaci diga naimie are ñaite, monaiacademo. Ie mei oni jaide. ¹² Nainomona conirue jai cajede uitimaci. Ie jira nana naimaci naimieri eo iobidimaci.

Mileto railla nairaimo Pablo jailla rafue

¹³ Pablodi Troamona Asón railla nairaimo arido jaiacana jira, botedo jaidicai. Iese uicomo Asónmo jaidicai. Nainomona Pablona botedo uiacadicai. ¹⁴ Ie jira Asónmo naimiēna cai baillanona, cai diga botemo bite. Ie mei Mitilene railla nairaimo jaidicai. ¹⁵ Nainomona dane monailaido cai jaillano, ie areruido Quío railla nairaimo

ruicafebellemo jaidicai. Dane ie areruido Samos railla nairai mamedo atona jaidicai. Ie areruido dane cai jaillano, Miletomo sijidicai. ¹⁶ Abi juarenia, Pentecostés railla rafue suilliruimo naimie Jerusalémo iacade. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite. Asia railla eniruemo naimie are iacaiñena jira, Pablo comecina facade: “Efeso ecido monaillaido jaiticai”.

Efesomo ite creyentiaí sedarainimo Pablo llua rafue

¹⁷ Creyentiaína sedarainina uaidollena, Miletomona Efesomo Pablo cartana orede. ¹⁸ Naimie dine naimaci rillanona, Pablo naimacimo llote: —Asiamo nano cue rillaruimona, niese omoi diga nagarui cue illana uiñotomoi. ¹⁹ Cai Nama diga abina iedoñeno maijuidicue. Eecana sure maijidicue. Judíuai cuena duere uiñodosia jira, ie facaiseconi dueredicue. ²⁰ Cuemo ite marecinona omoimo jaca janoñedicue. Nana Jusiñamui rafuena omoimo jai lloticue. Omoi ofillanomo omoína llofueuidicue. Omoi jofuemo omoína jiai llofueuidicue. ²¹ Judíuaina llofueticue. Judíuaiñedinona daje isoi llofueticue. Jusiñamui dibeimo omoi comeciai iuaina meiduana lloticue. Cai Nama Jesúna omoi inuana jiai lloticue. ²² Jusiñamui Joreñodi cuena jai jaicaitaja jira, Jerusalémo birui jaiticue. Nainomo ramo cue jirille rafuena uiñoñedicue; ²³ iadedi Jusiñamui Joreño naga nairaimo cuemo llote: “Llaveracomo ona gaitajano ona jonesiite. Duere sefuitio”. ²⁴ Cue ille dinori are illemo comecina facañedicue. Dama cue ille dinori fuidoiacadicue. Cai Nama Jesúmona cue feiñoga maijiana fuidoacadícue. Mare rafuena omoimo lloiacadicue. Jusiñamui omoína duenaillana jiai lloticue. ²⁵ Jusiñamui anamo omoi illa rafuena omoimo jai lloticue. Jai dane cue uiecona cioiñeitomoi. Iena uiñoticue. ²⁶⁻²⁷ Cue uaina jaca janoñedicue; ia nana Jusiñamui uai omoimo lloticue. Ie jira cuemona omoi diga cue comeci mare. Jusiñamui uaido omoi jaiñenia, cue muidonañeite. ²⁸ Mai omoi abi rairui. Jusiñamui Joreñodi omoína creyentiaína sedatate. Naimacina raise seda. Jusiñamui dibeimo itinona llofue. Naimie Jito fiodailla muidona, naimacina ote, naimie iena. ²⁹ Naimacidi toica llaudaíai isoidimaci. Nia abina raise uiñoñedimaci. Cue jailla meinoconi, taino llorainidi, janallari isoi, omoimo biite. Naimaci nana omoi sedaca cominina ramo faite, danomo abido naimaci jaillena, jiconiaí llaudaíai gaitaja isoi. ³⁰ Omoimona uanañedicinona llorainidi iite. Creyentiaína ramo faitimaci, omoi llucinona fañonocaillena, naimaci dibeimo illena. ³¹ Ie jira abina rairui. Bie rafuena feitañeno. Daje amani fiemona nana omoína jai llofueticue. Naiona omoína llofueticue. Aremona omoína jiai llofueticue. Omoína cue duenaillamona, eianona omoína llofueticue. ³² Mai. Cai Nama illa anamo omoína fañonocaiticue. Naimie uaimona naimie omoína duenaillana jai uiñotomoi. Naie uaidi omoína jiai ocuiñotaite. Iemona Cristona inocana jaitomoi. Nana naimie fetocano diga naimie illanomo ico jaca iitomoi. ³³ Jiaíno ie ucubena jaca nicidoñedicue. Bu ie iniroillaina jaca jiai oiacañedicue. ³⁴ Cue jitaille rana dama cue maijiano oticue. Cue diga jaidino imaci jitaille rana jiai dama cue maijiano oticue. Iena nana omoídi uiñotomoi. ³⁵ Iese cue illamona omoína llofueticue. Iese maijiano duerede cominina canocana jaiacadícai. Cai Nama Jesús ie llogacinona uiñoticaí. Naimie raite: “Raruiaina cai feiñoia, iobidicai; iadedi cai eo iobiacania, jiaíno raruiaína fecadícai”. ³⁶ Naie llua meino, naimaci diga caiñici ifodo rainadajano, Jusiñamuimo jide. ³⁷ Nana naimacidi eo eedimaci. Pablona caimaduanona, naimiena libanotimaci. ³⁸ “Cuena dana cioiñeitomoi” naimacimo llua jira, eo sunaitimaci. Ieconi naimie diga botemo jaidimaci.

21

Jerusalémo Pablo jailla rafue

¹ Naimacina cai facadua meinoconi, suiñodicai. Cos railla nairaimo atona jaidicai. Ie are Rodas railla uiasimo ridicai. Iemei Pátara railla nairaimo ridicai. ² Nainomo Fenicia railla eniruemo jaiacade botena baiticai. Nai botemo cai jailla mei, suiñodicai. ³ Chipre

railla uiasina cai ciojia, cai nabei dibeimo ite. Iemei Siria railla eniruemo jaidicai. Tiro railla nairaimo sijidicai. Botedo uiga raruiaina nainomo joneacadimaci. ⁴ Tiromo ite creyentiai cai baillanona, siete digarui naimaci diga iticai. Jerusalémo naimiena judúuai meineñellena, nainomo naimie jaiñellena, Jusiñamui Joreño naimacina Pablomo llotatate. ⁵ Digarui illa meinomo oni jaidicai. Naie nairaimona nana naimaci cai diga jaidimaci. Riñoniai, naimaci uruiái diga, jaidimaci. Caiñici ifodo monaillai fuemo ana rainadajano Jusiñamuimo jiidicai. ⁶ Naimaci facadua meinoconi, botemo jaidicai. Naimaci imaci jofuemo abido jaidimaci. ⁷ Tiromona Tolemaida railla nairaimo jaidicai. Creyentiaina uaiduano, darui naimaci diga iticai. ⁸ Ie are jaillano, Cesareamo cai ria, Felipe jofomo jaidicai. Felipedi Jesucristo ie rafuena lloraima. Jerusalémo diáconuaina creyentiai jaie fetua facaise, Felipena fetodimaci. ⁹ Naimie dinomo fiebidicai. Naimiemo cuatro jisa ite. Naiñaiñuái nia iima abina uiñoñede. Jusiñamui naiñaiñuáiimo llucacina llocabitimaci.

¹⁰ Digarui nainomo cai illamo Judeamona damie bite. Naimie mameci Agabo. Jusiñamui facaina lloraima. ¹¹ Caimo ria, naimiedi Pablo cinturóna aiñode. Naie diga ie eillina maite. Ie onollina jiai maite raillano:

—Jusiñamui Joreño raite: “Jerusalémo judúuai illaicomini bie cinturón jainaoide iimana daje isoi maitimaci. Judúuaiñedinomo naimiena fecajitimaci” raite.

¹² Naiena cai cacajano, naie comini diga, Pablona caididicai, naimie Jerusalémo jaiñellena. ¹³ Pablo uai ote:

—¿Bue ñellena eedomoi? ¿Bue ñellena cue comecina ocuiñoñañedomoi? Cue maiana jaca jitaidicue. Ua cue fodaillana jaca jiai jitaidicue. Cue Nama Jesús muidona cue fodaiaidedi, damamai fodaiciticue.

¹⁴ Cai lloga uai naimie iñoñena muidona, raiticai:

—Cai Nama jitaille rafuena finuana jitaidicai. —Iemei llicaidicai.

¹⁵ Nano nigarui illanona, cai raruiaina finuano, Jerusalémo jaidicai. ¹⁶ Cesareamo ite creyentiaimona jiano cai diga jaidimaci. Mnasón jofomo caina uitimaci. Naimiedi Chipre railla uiasi imie. Naimiedi nano bie rafue tainiamona creyente.

Jacobo diga Pablo ñaia rafue

¹⁷ Jerusalémo cai ria, creyentiaidi caina caimare uaidotimaci. ¹⁸ Ie are Pablo, cai diga, Jacobo dine jaide. Nana creyentiaina sedaraini nainomo jai ofidimaci. ¹⁹ Uaidua mei, Pablo nagacinuaido Jusiñamui judúuaiñedinomo finoca rafuena llote:

—Cue llofuiamona ailluena judúuaiñedino creyentiaina jaidimaci —llote.

²⁰ Naie rafuena cacajano, Jusiñamuimo iobillacina fecadimaci. Iemei naimiemo llotimaci:

—Ama, ero, judúuaimona ailluena comini jai creyentiaina jaidimaci; ia nana naimaci Moisés micori llogacinodo eo jaidimaci. ²¹ O finoca rafuena jai fididimaci. Ona comini ñaiana jai fididicai. Jiaie nairai motomo ite judúuaina Moisés micori llogacinona faionocaillana llofuetio. Naimaci uruiái abina deñenana llofuetio. Moisés micori llogacinuaido jaiñellena llofuetio. ²² Ie jira ¿niese nibaiticai? O rillana jai fididimaci. ²³ Ie jira omo cai lluaana fino. Cai ecimo cuatro iima jai ite. Nie isoide rafuena Jusiñamuimo jai llotimaci. ²⁴ Jusiñamui jofomo naimacina uiño. Naimaci diga Moisés micori llua isoi, o abi fino. Naie rafuena raise fuidollena, Jusiñamuimo fecallena, toica ocainaiaina naimaci facaina iba. Naie rafue omoi fuiduanona, omoi ifogina rijiruda gareitomo. Ie mei nana comini mare rafuena o finocana jaillana uiñoitimaci. Moisés micori llogacinodo o nia jaillana uiñoitimaci. Iese omo lloiacadica. ²⁵ Judúuaiñedino Moisés micori llogacinodo jaillena lloñeiticai. Naimacimona creyentiaina jaidinomo navui cueticai: “Jiraraimo fecaca rana riñeno. Diruena riñeno. Llerinoga rana riñeno. O aiñede riño diga iñeno. O iniñede iima diga iñeno” cueticai.

²⁶ Pablo “Jee” raillanona, nai cuatro iima diga ie are Moisés micori llogacinona finuano, Jusiñamui jofomo jaide, naimie ie finoca rafue fuillarui lollena. Jusiñamuimo

nagamiaa rana fecajaruina jiaa llote. Siete digarui illanona, Moisés micori llua isoi, naie rafuena fuidoiacadimaci.

Pablona gaitaja rafue

²⁷ Naie siete iruillai fuiacanuillaimo Asiamona damerie juduaadi bitimaci. Jusiñamui jofomo Pablona ciuano, comini comeciaina feidocana uitimaci. Pablona gaitajanona, ²⁸ cuiriidimaci:

—Caïmaci, caina cano. Bimie naga illanomo llofuiamona, cominina raise itatañede. Moisés micori llogacinuaido jaiñede. Bifona raise sedañede. Juduaañedinno bifomo atiano, bie mare jofo naimie jai jeare finode.

²⁹ Iese ite: Jerusalémo Trófimo diga Pablona ciodimaci. Trófimodi Efeso nairai imie. Juduañedimie. Pablo naimiena Jusiñamui jofomo uillamo comeciaina facadimaci; iadedi uiñede. Juduaa cominimona juduañedimie Jusiñamui jofomo jaillana marañede.

³⁰ Asiamona bitino cuiriillamona, nana Jerusalémo ite comini icirinaidimaci. Aisicana Jusiñamui jofomo jarire ofidimaci. Pablona gaitajanona, naifomona naimiena jino sonodimaci. Ie mei Jusiñamui jofona sedaraini nasena ibaidimaci. ³¹ Pablona meineiacania, soldaduai ie comandantedi nana comini ieillana fidide. ³² Iecon naimiedi, ie soldaduai diga, nana ie illaicomini diga, comini dine aisicana bitimaci. Ie jira cominidi naimiacina ciuano, Pablona fajana faïnonocaidimaci. ³³ Comandante naimiemo iaïreicaia, Pablona gaitade. Naimiena mena lloeo diga maillena llote. Jïcanote:

—¿Bu naimiedi? ¿Bue ñete?

³⁴ Nana ieidinodi jiaïforie llotimaci. Ie jira naie rafuena naimie jaca uiñoñede. Ie muidona cuatello naimiena uillena llote.

³⁵ Cuartel tidabacuimo naimaci ria, comini jarire jailla jira, soldaduai Pablona uitimaci. ³⁶ Ailluena comini racadimaci. Ocuioisite:

—¡Naimiena meine!

Pablo ie abi riidua llua rafue

³⁷ Cuartello jaiacania, Pablo comandantemo llote:

—O diga ñaïacadicue.

Raijicaillamona, naimie uai ote:

—Griego uaido ñaitio— ³⁸ Jiaa llote—. Egipto imieñedio. Navui jobaime finodio. Jofue iñenanomo, cuatro mil cominina meinetinona uitio.

³⁹ Pablo uai ote:

—Naimieñedicue. Judío imiedicue. Ciliciamo ite Tarso railla nairaimona biticue. Naie nairai mamecidi are soride. Cominimo cue llollena, omo jïcanoïacadicue.

⁴⁰ —Jee —raite. Pablo tidabacui muidomo naidaide. Cominina llïcaïtallena, ie onollina jaidide. Comini llïcaïlla mei, Pablo juduaa uaido naimacimo llote:

22

¹ —Caïmaci, einamacì, cue abi riiduacinomo mai omoi cacarei.

² Naimie juduaa uaido llua naimaci cacajano, llïcaïdìmacì. Ie jira Pablo llote:

³ —Judío imiedicue. Ciliciamo ite Tarso railla nairaimo jeicigacue. Bene omoi nairaimo escuelamo jaidicue. Gamalielmona fueotìcue. Moisés micori llogacinuaina eo raise facadicue. Jusiñamui rafuedo birui omoi isoi jaidicue. ⁴ Jesucristo ñnotinona jaie eo duere finodicue. Diga creyentiaïna maïanona, cárcelmo joneticue. Iiñiaïna duere finodicue. Riñoniaïna jiaï duere finodicue. ⁵ Jusiñamui diga nanoca ñairaima cuena uiñote. Nana omoi illaïcomini cuena uiñotimaci. Creyentiaïna duere finollena, naimacimona dajerie cartana jaie feiñotìcue. Damascomo ite juduaïmo cuetimaci. Damascomo jaidicue, nainomo ite creyentiaï maïano, Jerusalémo atianona, naimacina duere finollena.

Pablodi Jesúna ñnuana llua rafue
(Hch 9.1-19; 26.12-18)

6 'Omoimo bie rafuena lloiticue. Jerusalémona jaidicue; iadedi Damascomo cue iaireicaia, jitoma naidai iacania, ieconi monamona damie cue abina eo quetiñote. 7 Eniruemo ana uaidicue. Monamona damie cuemo llwana cacadicue: “Saulo, Saulo, ¿bue ñellena cuena duere finodio?” 8 Jicanoticue: “¿Budío?” Monamona damie uai ote: “Nazaret ie Jesúsicue. Cuena duere finodio”. 9 Cue diga itinodi cue quetiñua rana cioidimaci; iadedi cue diga ñaitimiena cacaiñedimaci. 10 Raiticue: “Nama, ¿bue ñeiticue?” Cai Nama cuena raite: “Naidadajanona, Damascomo jai. Nainomo o finolle rafuena omo lloiticue”.

11 'Cuena eo quetiñua jira, cioiñedicue. Cue diga itino cue onollido llinocaida, Damascomo cuena uitimaci. 12 Nainomo Ananías raillamiedi ite. Jusiñamuina eo inote. Moisés micori llogacinuaido eo jaisoide. Nainomo ite judíuaidi naimiena: “Mare” raitimaci. 13 Naimie cuemo bite. Cuemo llote: “Saulo, ama, mai oni eroda”. Ieconi dane erodajanona, naimiena cioidicue. 14 Naimie raite: “Cai usumatiai micoriai ie Jusiñamuidi ona fetode, naimie jitaille rafuena o uñollena, ie mare Jitona o cioillena, naimie uaina o cacareillena. 15 Nana cominimo naimiena lloitio. Nana o ciua rafuena lloitio. Nana o cacaja rafuena jiaí lloitio. 16 Mai cue llwana ino. Naidadajanona, o jecino oni dotallena, Jusiñamuimo jica. Ie mei bautiza” raite.

Judíuañedinomo Pablo jailla lua rafue

17 'Ie mei Jerusalémo abido cue billa mei, Jusiñamui jofomo Jusiñamuimo cue jiaia, nicairiticue isoidicue. 18 Cai Namana cioidicue. Cuemo llote: “Jerusalémona raire mai jai. Cominidi o cuena llwana feiñoñeitimaci”. 19 Uai oticue: “Nama, naga judíuai ofiracomo ona inotinona fauidicue. Cárcelmo naimacina joneuidicue. Nama, Jerusalémo itino iena uñotimaci. 20 Esteban micori fiodailla facaiseconi nainomo iticue. Naimie o facaina lloraima. Naimie fiodailla jira, iobidicue. Naimiena meinetino iniroina sedadicue”; 21 iadedi cue Nama cuemo llote: “Mai jai. Judíuañedinomo ona are oretaiacadicue”.

Comandante anamo Pablo illa rafue

22 Bie lloga dinori comini Pablo llwana cacadimaci. Iemei cuiriidimaci:

—Bie isoide ima illana benomo jitañedicaí. ¡Naimiena meine!

23 Cuirillamona naimaci iniroina jaidisite. Icirisiano eniruena jiaí fadosite. 24 Judíuai uaido cominimo Pablo llua jira, comandante iena cacaiñede; iadedi comini icirillana ciuanona, naimie llote:

—Naimiena cuartelmo uño. Naimiena fano. Naimiemo ite rafuena caimo naimie llollena, naimiena duere fino.

25 Naimiena maiano naimiena fallena, Pablodi nainomo ite capitámo jicanote:

—¿Juez nia lloñenia, romano nairai imiena fajana mare? Romano nairai imiedicue.

26 Capitán iena cacajano, comandante dine jaide. Iena llote. Jicanote:

—¿Ñiese nibaíticai? Bimie romanuai nairai imie.

27 Iena cacajano, comandante bite. Pablomo jicanote:

—¿O Romano nairai imiedio?

Pablo uai ote:

—Jii.

28 Comandante dinena raite:

—Romanuai nairai imiena cue jaillena, eo ibadicue.

Pablo uai ote:

—Romanuai nairai imiena jeicigacue.

29 Ieconi naimiena duere finoacadino naimiemona raire oni jaidimaci. Pablo romanuai nairai imiena jira, naimiena jai ebena maia jira, comandante jiaí jacinaite. Comecina nibaí facade: “Iese naimiemo cue finua jira, ie ibana ollena, cue illaimamo cuena jiaí llogidoite”.

Illacomini motomo Pablo illa rafue

³⁰ Comandantedi judíuai Pablona llogíduana ua raise uifoiacade. Ie jira ie are Pablona suiñollena llote. Jusiñamui diga nanoca ñairaini, nana judíuai illaicomini diga, ofillena llote. Pablona atiano, naimaci motomo uillanona, naimiena naidanete.

23

¹ Ie abina riidollena, Pablo naie judíuai illaicomini motomo ite. Naimacimo eruailano, Pablo raite:

—Caimaci, cuemona nana cue illa dinori Jusiñamui jitailla rafuena finocabidicue. Naimiemona cue comeci mare.

² Ananíadi Jusiñamui diga nanoca ñairaima. Pablo llwana naimie gaiñenamona, Pablo ecimo itinona Pablo fuena farotate. ³ Pablo dinena naimiemo llote:

—Jusiñamui o fuena faroite. Mareuidimiena abina caitadio. Moisés micori llogacinuai muidona benomo itio, cuemo llollena; iadedi cue finoca rafuena raise o uifoiñeno cue fue ebena farollena llotio.

⁴ Nainomo itino raite:

—Jusiñamui diga nanoca ñairaimamo jeare ñaitio.

⁵ Pablo uai ote:

—Moisés micori iena jaie cuiana uifoiñocue. “Illaicomini jeare ñaiñeno” cuete. Caimaci, naimie Jusiñamui diga nanoca ñairaima illana uifoiñedicue. Uifoiñocuedena, naimiemo iena lloñedicue.

⁶ Cominimo Pablo eruailamona, saduceuai railla comini nainomo illana ciode. Fariseuai railla comini nainomo illana jiai ciode. Ie jira naimacimo ado llote:

—Caimaci, fariseo imiedicue. Fariseo imie jitodicue. Fiodaillamona ico jilluacinomo ocuriticue. Ie jira bene cuena llogidoiacadomo.

⁷ Naimie iena lloia, naimaci comeci daje isoi lloñedicue. ⁸ Saduceuai cominidi fariseuai comini isoi ñoñedicue. “Fiodaillamona jilloñeiticai” saduceuai comini railana ñoside. “Jusiñamui jaienisa iñede. Comini joreñuai iñede” railana ñoside; iadedi fariseuai comini dinena nana naie rafue illana ñnotimaci. ⁹ Ie jira eo failliñaidimaci. Fariseuai motomona jiaino naidadajanona, llote:

—Bimie mo jeacino iñede. Jusiñamui jaienici naimiemo nibai jaie llwamona, bie rafue naimiemo ite.

¹⁰ Naimaci iese riire failliñaidimaci. Naimaci Pablona llagui raillano, comandantedi soldaduaimo cuartelmo naimiena uillena llote.

¹¹ Ie are naiona cai Nama Pablomo bairede. Raite:

—Comecina ocuiño. Jerusalémo cuena o llua isoi, Romamo cuena jiai llotio —raite.

Pablona meineiacana rafue

¹² Monaidemo, judíuaimona jiaino comeciaina facadimaci: “Pablona nia cai meineñenia guiñeiticai. Jiroñeiticai”. ¹³ Cuarenta baifemo ite comini iese comeciaina facadimaci. ¹⁴ Naimaci judíuai illaicomini dine jaillano, raitimaci:

—Dani comeciaina facadica: Pablona nia cai meineñenia, jaca buena guiñeiticai.

¹⁵ Omoi dine Pablona atillena, naimiemo eo raise jicanua isoi, comandantemo jicano. Pablo iairei bia, naimiena cai meinellena, ocuidoitica.

¹⁶ Pablo enaise naie rafuena fidiano, cuartelmo jaide, Pablomo llollena. ¹⁷ Iena cacajano, Pablodi capitána uaidote. Raite:

—Bie coniruena comandante dine uifoiño. Naimie diga ñaiacade.

¹⁸ Ie jira naimiena uite. Raite:

—Cuartelmona Pablo cuena uaidote. Bie conirue omo atillena cuemo jicanote. O diga ñaiacade.

¹⁹ Naimie onollina comandante llinocaida, bai ie atianona, naimiemo jicanote:

—¿Bue cuemo lloiacadio?

²⁰ Naimie uai ote:

—Ico are Pablona illaicomini dine uillena, naimiemo eo raise jicanua isoi, omo jicanollena, judíuai dani comeciaina facadimaci. ²¹ Naimaci jitailla isoi finoño. Cuarenta digamie baifemo naimiena reiduano sedadimaci. Llotimaci: “Guiñeiticai, jiroñeiticai, Pablona nia cai meineñenia”. Naimacidi omo jicanolle rafuena o finollena sedadimaci.

²² Comandante coniruena facaduano raite:

—Jaca bumo cuemo o llua lloño.

Félix dine Pablo oretaja rafue

²³ Comandante mena capitána uaidote. Llote:

—Doscientos soldaduaina uaido, imaci raruiái finollena, Cesareamo navuida baife imaci jaillena. Setenta caballuaido jaitino uaido. Doscientos ducirainina jiaí uaido.

²⁴ Jiaie caballona ati, naie emodomo rainadacaida Pablo jaillesa. Félix railla gobernador dine naimiena raise uiño —llote. ²⁵ Cartana jiaí cuete. Iese cuete: ²⁶ “Félix, omo cueticue. Claudio Lisiasdicue. Cai mare gobernardio. ¿Nigacino? Cue uai o dine oredicue. ²⁷ Dame o dine oredicue. Judíuai naimiena meineiacana jira, soldaduai diga naimiena gaitaticue. Naimiena gaitataja mei, naimiedi romanuai nairai imienana fididicue. ²⁸ Judíuai illaicomini dine naimiena uiticue, naimaci llogiduacinona raise cue uiñollena. ²⁹ Naimaci einamací llogacinuai muidona naimiena llogidotimaci. Iena fididicue. Naimie jaca buena finoñede. Naimiena meinellena, naimie cárcelmo jonellena lloiacañedicue. ³⁰ Jiaíno naimiena dane meineiacanana fididicue. Ie jira o dine naimiena oretaticue. Ie llogidotino o dine jaillena jiaí lloiticue. Naimaci naimiena omo lloitimaci” cuete.

³¹ Comandante llua isoi, soldaduai naiona Pablona Antípatrismo uitimaci. ³² Ico are eillido jaide soldaduai cuartelmo abido bitimaci; ia Pablo caballuaido jaidino diga oni jaide. ³³ Cesareamo railla nairaimo rillanona, gobernardormo cartana fecadimaci. Naimie dine Pablona jiaí uitimaci. ³⁴ Gobernador cartana facade. Ie mei Pablomo ie nairai illanona jicanote. Pablo uai ote:

—Cilicia.

³⁵ Gobernador dinena raite:

—O llogidotino bia, o rafuena cacajiticue.

Soldaduai jiaí llote:

—Omoi anamo Herodes railla illaíma micori jofomo naimiena seda.

24

Félix dine Pablo riidua rafue

¹ Dabecuirorui illa mei, Ananías bite. Naimiedi Jusiñamui diga nanoca ñairaima. Jiaie illaicomini diga bite. Tértulo raillamie jiaí bite. Naimiedi llogidoraíma. Gobernardormo Pablona llogiduaíbitimaci. ² Pablona uaidua mei, gobernardormo Tértulo Pablo finoca rafuena llote:

—Félix, bie rafue omo lloiticue. Eo mareuidimiedio. O muidona eo uri iticai. Cai nairaina canollena, diga mare rafuena finodio. ³ Iobillamona, nana cai iena feiñoticai.

⁴ Ona iciaicañedicue; iadedi o fue maria jira, cue llua dallu cacarei. ⁵ Bimiedi eo cai abina aruire finode. Nana enruemo ite judíuaina uri itañede. Naimiedi Jesús raillamie rafuedo jaidino illaíma. ⁶ Jusiñamui jofona jeare naimie finoiacana jira, naimiena gaitadicaí. Moisés micori llogacinuaido naimiena duere finoacadicaí; ⁷ iadedi comandante Lisias ride. Caímona naimiena riire bairode. Naimiena cai llogidollena, o dine cai billena caímo llote. ⁸ Pablomo o jicanoiacania, naimiemoa bie rafuena uiñoitio. Nana naimiena cai llogiduacinona uiñoitio.

⁹ Judíuai illaicomini, Tértulo llua isoi, dacinodo llotimaci.

¹⁰ Iemei gobernador dinena Pablomo llote:

—Mai o facaina o ñaino.
Ie jira Pablo ñaite:

—Diga años cai nairai o anamo iticai. Ie jira cue abina riiduacinona omo marefodo lloiticue. ¹¹ Doce digarui illanona, Jerusalémo como birui ridicue. Iena uifoiacadiosa jiaie cominimo jicano. Jusiñamuina sedallena, Jerusalémo iticue. ¹² Bu diga conima uaina jaca uaitañedicue. Jusiñamui jofomo uaina uaitañedicue. Judúuai ofiracuaimo uaina jiai uaitañedicue. Naisomo uaina jiai uaitañedicue. Cominina uri itatañenana lloñedicue. ¹³ Nie isoide rafuena cue finuana cioiñedimaci. Ie jira cuena raise llogidonidimaci; ¹⁴ iadedi jiaie rafuena lloiticue. Cai usumatiai Jusiñamuina sedadimaci. Naimiena jiai sedadicue. Nana Moisés llogacinuaina ñnoticue. Nana Jusiñamuina lloraini micriai cuegafuiaina ñnoticue. Bimacimona jiaie llogacinuaido jai jaidicue. Bimacimona uanaiñedicinodo jaidicue. ¹⁵ Fiodaillamona comini ico jilloillena ñnoticue. Jusiñamuina ñnotino jilloitimaci. Jusiñamuina ñnoñedino jiai jilloitimaci. Beno itino iena jiai ñnotimaci. ¹⁶ Ie jira marena iadicue, “Maraiñede rafuena Pablo finode” comini lloñellena, “Maraiñede rafue Pablo finode” Jusiñamui lloñellena. ¹⁷ Diga años Jerusalémo abido biñedicue. Jerusalémo ite dueredinona canollena, ucubena birui atidicue. Jusiñamuina jiai sedajaibidicue. ¹⁸ Moisés micori llua isoi, cue abi marena finuano, nairui Jusiñamui jofomo cuena baitimaci. Aillena comini cue diga iñede. Cominina iciritañedicue. ¹⁹ Naie facaise Asiamona jiaie judúuai bitimaci. Cuemo nicino ia, ¿bue ñellena naimaci bene biñedimaci, cuena llogidollena? ²⁰ Naimaci biacaiñenia, ¿bue ñellena bene itino bie rafuena raise lloiacaiñedimaci? Naimaci motomo Jerusalémo cue ia, maraiñede rafuena cue finuana lloñedimaci. ²¹ Navui naimaci motomo cue lloticue: “Fiodaillamona comini ico jilloitimaci”. Iena birui ñaitimaci. Ie jira cuena llogidoiacadimaci.

²² Félixdi Jesús dibeimo itino rafuena raise uifua jira, Pablo rafuena nairuido siadoiacaiñede.

—Comandante Lisias bia, dane omoi rafuena siadoiticue —raite. ²³ Félix capitámo Pablo cárcelmo sedajana llote. Naimiena maiñellena jiai llote. Naimiena canollena, naimie nabaiñiai naimie dine jaillena rairuiñede.

²⁴ Diga irui illa mei, Félix, ie ai diga, bite. Naiñaiño mameci Drusila. Naiñaiñodi judía iñaiño. Pablona uaidua mei, Pablo llofuiana cacadiiaimaiai. Jesúna ñnuana cacadiiaimaiai. ²⁵ Jeacino finoñellena, dama ie jitailla rafuena finoñellena, jiairuido Jusiñamui ricaiñafue anamo iñellena cacadiiaimaiai. Pablo llofuiamona Félix jacinaite. Ie jira raite:

—Jai macaibaite. Cue abi juarelliruido ona dane uaidoiticue.

²⁶ Pablo jino jaille iballe ucubemo ocuride. Ie jira diga icaiño naimiena uaidote, naimie diga ñaillena. ²⁷ Mena años illa mei, Porcio Festodi Félix ifo meidote. Félixdi judúuaina iobitaacana jira, cárcelmo Pablona fañonocaide.

25

Festomo Pablo llua rafue

¹ Naie provinciamo darui amani rilla mei, Cesareamona Jerusalémo Festo jaide. ² Nainomo Jusiñamui diga nanoca ñairainidi, jiaie judúuai illaicomini diga, Festomo Pablona llogidotimaci. ³ Festomo daje rafuena jicanotimaci, naimaci iena. Pablona Jerusalémo atillena jicanotimaci. Naiso motomo naimiena meinellemo comeciaina facadimaci. ⁴ Festo uai ote:

—Pablo Cesareamo fiebiite. Raire nainomo abido jaiticue. ⁵ Omoi illaicominimona damerie cue diga jaitimaci, nicino naimiemo ia, naimiena llogidollena.

⁶ Nibai ocho, nibai diez diga irui nainomo illa mei, Cesareamo naimie abido jaide. Ico are ie cominimo llouillanomo raide. Pablo atillena llote. ⁷ Pablo billa mei, Jerusalémona

bite judíuái naimie ecimo ofidimaci. Diga fododicinona naimiena llogidotimaci; iadedi tainuaido llogidotimaci. ⁸ Pablo uai ote:

—Judíuái llogacinuaina jaca jeare finoñedicue. Jusiñamui jofona jeare finoñedicue. Cai nanoca illaimamo jearede rafuena jiai finoñedicue.

⁹ Iena cacade; iadedi Festo judíuaina iobitaacana jira, Pablomo jìcanote:

—¿Jerusalémo cue diga jaiacadio? Nainomo nana bie rafuena siadoitìcue.

¹⁰ Pablo uai ote:

—Llogidoracomo jai itìcue. Cai nanoca illaima facaina cominimo llotio, naimacina duere finollena. Benomo cue llole. Judíuaimo jaca buena finoñedicue. Iena raise uiñotio. ¹¹ Romanuai railla nairai illaicomini llogacinona cue ñinoñenia, damamei jearede rafuena cue finoa, cue fiodaillemo jaca ocuridicue; iadedi cuemo nicino iñenia, cuena meinellena bu cuena judíuaimo fecañeite. Cue rafue naimie siadollena, Romamo cai nanoca illaima ñine jaiacadicue.

¹² Ie ecimo ite canoraini diga Festo ñaia mei, Festo raite:

—Cai nanoca illaima ñine o jaiacana jira, nainomo jaitio.

Agripamo Pablo llua rafue

¹³ Diga irui illa mei, Agripadi Festo ñine, ie miriño Berenice diga, Cesareamo bitiaimaiai. Agripadi naie enirue illaima. ¹⁴ Diga irui nainomo itiaimaiai. Naimiemo Festodi Pablo ie rafuena llote:

—Félix Pablona cárcelmo bene fainonocade. ¹⁵ Jerusalémo navui cue ia, Jusiñamui diga nanoca ñairaimadi, judíuái einamacì diga, naimiena llogidote. Naimiena duere finollena cuemo jìcanotimaci. ¹⁶ Naimaci uai oticue: “Cai Romanos cominidi llogidogamiena jamai tainomo duere finoñedicaì; iadedi llogidogamiedi ie llogidotino uai nano cacareiticaì. Ie mei ie abi riidollicinomo jiai cacareiticaì”.

¹⁷ Ie jira naimaci cue ñine benomo navui bia, ie are cominimo cue llouillanomo raidicue. Pablona cue ñine uaidotìcue. ¹⁸ Naimiena llogidotinodi lloia, naimiena marañede finoca rafue cue facaja isoi, llogidoñedimaci. ¹⁹ Dani naimaci ñnuacinona llotimaci. Jesús raillamie rafuena llotimaci. “Jesús jai fiodaite” raitimaci; iadedi Pablodi: “Jesús jai cajede” raite. ²⁰ Bie rafuena raise cue uiñoñenia, naimiemo navui jìcanotìcue: “¿Jerusalémo jaiacadio, nainomo bie rafuena siadollena?”; ²¹ iadedi Pablo nainomo jaiacañede. Cai nanoca illaima ñine jaillena jìcanote. Nainomo ie rafuena siadollena jitaide. Ie jira naimie sedajana llotìcue, cai nanoca illaima ñine naimiena cue ñia oretañenia.

²² Agripadi Festomo llote:

—Naimie ñaiana cacacadicue.

Festo uai ote:

—Ico are naimie ñaiana cacareitio.

²³ Ie jira ie are Agripa, iaimaiai Berenice diga, gobernador ofiracomo bitiaimaiai. Finobillano ebire bitiaimaiai. Soldaduai imaci illaicomini jiai bitimaci. Naie nairaimo ite nanoca comini jiai bitimaci. Ofilla mei, Festo Pablona atillena llote. ²⁴ Festo llote:

—Agripa, nana beno itino, bimiena ciodomoi. Jerusalémo ailluena judíuái naimiena llogidotimaci. Bene cue ñine jiai bitimaci. Naimie meiniana eo jitaidimaci; ²⁵ iadedi naimiemo nicinodi iñenana jai uiñotìcue. Naimiena meinellena cue llollena, nicinodi naimiemo iñede. Augusto ñine naimie jaillena naimie jìcanua jira, naimiena oretaiticue. ²⁶ Nicinodi ñia iñede, cai illaimamo cue cuellena. Ie muidona omoi ñine naimiena jai atidicue. Agripa, naimie ñaiamo raise cacarei. Naimiemo cai jìcanua mei, ñibai nicino naimiemo illana uiñotìcaì. Iemona Augustomo cueiticaì. ²⁷ Augusto ñine llavecamiè cue oretaia, naimiemo nicino iñenia, cuemona marañede.

26

Pablo ie abina dane riidua rafue

¹ Naie facaise Agripa Pablomo llote:

—Mai llono. O abi riiduacinona cacaadicue.

Pablo: “Jh” raillanona, ie onolli a ñuitade. Raite:

² —Agripa, bene o illa jira, cuemona mare. Cue fue baillafuedo o uicomo cue abina riidoiticue. Judíuai cominidi diga rafuena cuena llogidotimaci. ³ Nana cai judíuai rafuena raise uiñotio. Nana cai einamací rafuena jiaí uiñotio. Cuemo raise cacarei. ⁴ Jerusalémo naimaci motomo cue illa jira, diga judíuai cue coniruenamona cuena uiñotimaci. ⁵ Cuena naimaci lloiacania, fariseo imiena cue illana are uiñotimaci. Jiaie comini baifemo fariseuaidi cai einamací llogacinuaina ñnotimaci. ⁶ Jusiñamuidi cai usumatiaí micoriaímo fiodaillamona comini ico jilloillena jaie llote. Ie suillemo jai ocuridicue. Ie jira llogidoracomo birui jai iticue. ⁷ Nagarui Jusiñamuina naimaci eo sedajamona, cai doce nairaídi naie llogacino suillemo jiaí nia ocuridimaci. Ore illaíma, bie ocurillacino muidona judíuai illaicomini cuena llogidotimaci.

⁸ ¿Bue ñellena Jusiñamuidi comini fiodaillamona jillotajana ñnoiacaíñedomoi? ⁹ Jaie ie isoidicue. Nazaret ie Jesúsna ñnotinona diga jearede rafuena jaie finoacadicue. ¹⁰ Jerusalémo iena finodicue. Cárcelmo ailluena Jesúsna ñnotinona joneticue. Jusiñamui diga nanoca ñairaini uaido iena finodicue. Naimacina meinelle cai illaicomini raia: “Jee” raisoidicue. ¹¹ Diga judíuai ofiracomo, diga icaiño, naimacina duere finodicue. Naimaci Jesúsna jeare ñaiana jitaidicue. Naimaci diga cue eo icirilla jira, jiaie eniruemo ite nairaímo jiaí jaidicue, naimacina duere finollena.

Pablodi Jesúsna ñnuana llua rafue

(Hch 9.1-19; 22.6-16)

¹² Ie jira Damascomo jaidicue. Jusiñamui diga nanoca ñairaini uaido jaidicue. ¹³ Ore illaíma, jitoma naidai ia, monamona quetiñotena ciodicue. Naidi jitoma baifemo quetiñote. Cue abina quetiñote. Cue diga itino abina jiaí quetiñote. ¹⁴ Eniruemo cue ana uaia, damie lluaana cacadicue. Judíuai uaido cuemo llote: “Saulo, Saulo, ¿bue ñellena cuena duere finodio? Cue diga icirillana eo sefuiruitio. Iemona o abina duere finodio, ricaiillamona raise maiga jurareta suiñoacana isoi. Ie isodio. Ricaiillamona, cuena duere finoacadio”. ¹⁵ Uai oticue: “¿Budiota?” Cai Nama cuemo llote: “Jesúdicue. Cuena duere finodio. ¹⁶ Mai a naidacai. Cue rafuena o llofuellena ona fetodicue. O birui ciua rafuena lloitio. Ona cue uiñotalle rafuena jiaí lloitio. ¹⁷ Naimaci ona duere finoia, omoi cominimona ona jillotaiticue. Judíuaiñedinomona ona jiaí jillotaiticue; iadedi judíuaiñedino dine ona oretaiticue, ¹⁸ naimaci comeciái tainomo ñnellena. Taife anamona Jusiñamui anamo naimacina itataitio. Jeacino anamo naimaci birui illa jira, jitiredinomo jai itimaci isoidimaci. Jusiñamuina uiñuamona, useredinomo iitimaci isoidimaci. Iemei Jusiñamui naimaci jeacinona dotajite. Cuena naimaci ñnuamona, nana cuena ñnotino diga cue illano ico jaca iitimaci”.

¹⁹ Ore Agripa, monamona cue cacaja rafuena ñnoticue. Jesúsdi Jusiñamui Jitona ñnoticue. ²⁰ Damascomo itinomo iena nano lloticue. Ie mei Jerusalémo itinomo iena jiaí lloticue. Diga Judeamo itinomo iena jiaí lloticue. Judíuaiñedinomo iena jiaí lloticue. Lloticue: “Omoi comeciáímo iticinona meido, Jusiñamui díbeímo omoi illena. Omoi comeciáímo iticinona omoi meidua mei, mare rafuena finocana jai”. ²¹ Ie jira judíuai illaicomini Jusiñamui jofomo cuena gaitadimaci. Cuena meineiacadimaci; ²² iadedi Jusiñamui cuena canode. Ie jira birui bene iticue. Illaicomini beno nia lloticue. Illaicominiñedinomo jiaí nia lloticue. Dama Jusiñamui facaina lloraini micoriaí ico suille ciegafuena birui lloticue. Dama Moisés micori ico suite ciegafuena jiaí birui lloticue. Jiaie rafuena lloñedicue. ²³ Jaie cuetimaci: “Cristo legí cacajite. Fiodaillamona jilloite.

Naimiedi nano dofoconi jilloitimie. Iemona cai judíuái comíni jeacinomona jilloillena uiñoitimaci. Iemona judíuáiñedino jeacinomona jilloillena uiñoitimaci”. Ie jira bie rafuena llocana jaidicue.

Creyentena Agripa jaillena Pablo jitailla rafue

²⁴ Iese Pablodi abí riiduano, Festo riire llote:

—Pablo, odi uairico isoidio, eo começina o facaja jira.

²⁵ Pablo uai ote:

—Uairicoñedicue. Festo, odi cue illaímadio. Cue lluacínodi uanaicino. Ebena ñai-ñaiacaiñedicue. ²⁶ Agripa cue lloga rafuena raise uiñote. Nana bie rafuena naimie jai uiñua jira, naimie diga marefodo ñaiticue. Bainino suiñede. ²⁷ Ore Agripa ¿Jusiñamui lloraini ciegafuina ñnotio? omo jicanoticue. Iena o ñnuana jai uiñoticue.

²⁸ Agripa ñinena uai ote:

—Dallu o ñaiamona, cuena creyentena ñibai itataiacadio.

²⁹ Pablo uai ote:

—Ñibai dallu ñaiticue. Ñibai are ñaiticue; iadedi cue isoi o jaillana jitaidicue. Ua nana cue ñaiana cacadino cue isoi jaillana jitaidicue; iadedi omoi bie lleo diga maiana jitañedicue.

³⁰ Iemona Agripa naidacaide, Festo diga, Berenice diga. Nana raidino jiai naidacaidimaci. ³¹ Jino jaillano, Pablo joreña siadotimaci:

—Bimie jaca buena finoñede, naimiena cai meiniana llollena. Buena finoñede, cárcelmo illena.

³² Agripa Festomo llote:

—Naimie cai nanoca illaíma ñine jaillana jicanoñedena, niadedi naimie jino marena oreca.

27

Romamo Pablo jailla rafue

¹ Italiomo Augusto ñine Pablo oretajana Festo llua mei, Pablona jiaie llavecana diga capitámo fecade. Naie capitádi Julio. Augustona mameçirede batallómo jainaiáide.

² Adramitiomona bite botemo jaidicai. Naie bote Asia railla enirue igobaiamo sijicana jaiacade. Aristarco cai diga jaide. Macedonia enirue imie. Naimie ñairaidi Tesalónica. Suiñodicai. ³ Ie areruido Sidón railla ñairaimo ridicai. Nainomo Julodi Pablona marena sedade. Ie nabaiñiai ñine Pablo arí jaillana rairuiñede. Ie jira naimacimona ie jitaillena rana ote. ⁴ Iemei nainomona suiñodicai. Aifidi abido caína ati-atina jira, aifi raise iñenanomo, Chipre railla uiasi cai jarifebeimo illa ecido jaidicai. ⁵ Cilicia railla enirue ecido monaillaido jaidicai. Panfilia railla enirue ecido jiai jaidicai. Mira railla ñairaimo ridicai. Naie provincia mameçi Licia. ⁶ Naie bote Roma ñine jaiñena jira, capitádi jiaie botena jenode. Capitádi Alejandriamona bite botena baite. Naie bote Italiomo jaiacade. Ie jira naie botemo cai jonecaida, caína uite. ⁷ Diga irui fecuise sefuire jaillano, Gnido railla ñairai iaireise ridicai. Aifidi abido caína ati-atina jira, Creta railla uiasimo jaidicai. Aifi raise iñenanodo Salmón railla ñairai ñine jaidicai. ⁸ Uiasi iaireise iese sefuicana jaillanona, Maregobe railla illanomo ridicai. Lasea railla ñairai jiai ianori ite.

⁹ Digarui cai faifilla jira, noci deisoilla facaise jai illa jira, jaillena eo jacirede. Ie jira botemo maíjidinomo Pablo llote:

¹⁰ —Nabaiñiai, cai jaillena eo jacirenana uiñoticue. Eo maraiño caímo sefuiticai. Cai raruiaina ñibai faifiticai. Botena jiai ñibai faifiticai. Cai ñibai jiai faifiticai —llote.

¹¹ Iese llote; iadedi naie bote piloto oni jaiacade. Naie bote nama jiai oni jaiacade. Capitán iaímaiai llua Pablo llua baífemo ñnote. ¹² Igobe maraiñena jira, rollime facaise illa jira, ailluena comíni nainomona jaiacadimaci. “Fenice railla ñairaimo ñiedi riiticaí” raillano jaiacadimaci. Nainomo rollime facaiseconi iacadimaci. Fenice Cretamo

ite. Naie igobedi jitoma billa beici dine eruaide. ¹³ Beici dinena aifidi bia, “cai jitailla aifidi bite” raillanona, suiñodicai. Creta iairei monaillai fuemo jaidicai. ¹⁴ Ie mei raire cai dine eo riire aifi bite. Naie aifi noci deisoilla dinena bite. ¹⁵ Botena oni uite. Botena atona eronenidicai. Ie muidona jamai ebena jaidicai. Aifidi caina iese uite. ¹⁶ Janorede uiasi fuemo aifi raise iñenanomo jaidicai. Nai uiasi mameci Clauda. Faiñnellena bote ie janorede nocae sefuire a aiñodicai. ¹⁷ A aiñua mei, rao diga botena ruica maiticai. Sirte railla conillie illanomo cai joodai raillano, velaiana duiñodicai. Iemei aifi jamai uigacai. ¹⁸ Ie areruido aifi riire illa jira, cargana oni dotadicai. ¹⁹ Dane ie are bote ie raruiasi, cai onolli diga, oni dotadicai. ²⁰ Diga irui jitoma bainide. Diga irui ucua jiai bainide. Aifi eo riire nia ite. Cai jillobiñellemo jai ocuiriñedicai.

²¹ Diga irui cai guiñena mei, Pablo naimacimo llote:

—Nabaiñiai, cue uaina navui ñnotiomoidena, niadedi bie isoi sefuiñedicai. Cretamo cai fiebidicaina, bie isoi sefuiñedicai. ²² Omoi comeciaina ocuiño. Bie botedi faifite; iadedi caimona jaca buna faifiñeite. ²³ Jaive naiona Jusiñamui jaienici cuemo bairede. Jusiñamuimo jainaiadicue. Naimiena sedadicue. ²⁴ Naie jaienici cuemo llote: “Pablo, jaciruiñeno. Romamo o nanoca illaima dine iitio. Jusiñamui ona duenalla jira, nana o diga jaidino jilloitimaci”. ²⁵ Ie jira omoi comeciaina ocuiño. Cuemo llua isoi, naimiedi bie rafuena suiteite. Jusiñamui iena finuana ñnoticue. ²⁶ Nibai uiasimo jutadaiticai.

²⁷ Catorce digarui naio illamona, Adria railla monaillaimo jamai cai jaia, naiona daferui facai marineruaidi: “Enirue iaire ite” raillanona comeciaina facadimaci. ²⁸ Ie jira ie aforedinona facadimaci. Veinte brazas aforede. Iemei nano nie dinori illamona, dane facadimaci. Quince brazas aforede. ²⁹ Nofici illanomo naimaci bai raillano, fairillaillena, ie jillacimona cuatro lloelluna faitimaci. Mona monaille sedadimaci. ³⁰ Naie facaise marineruai botemona aisiacadimaci. Ie jira botemo ite nocaena ana monaillaimo dotadimaci, bote jillacimona lloelluna faia isoi.

³¹ Iena ciuano, Pablo capitámo llote. Soldaduaimo jiai llote:

—Botemo bimaci fiebiñeniadedi, jilloñeitomoi.

³² Ie jira soldaduaidi nocae maia raona jaitadimaci. Jai dinomo nocaena fainonocaidimaci. ³³ Nia monaiñenia, Pablo nana caimo llote:

—Guiño. Catorce digarui illanona, jai guiñedomoi. ³⁴ Ie jira guiño, omoi mairillesa. Ua faifiñeitomoi.

³⁵ Iese naimie raillanona, Jusiñamuimo iobillacinona fecade, nana comini illa uicomo. Llomenicono tairuano, guite. ³⁶ Nana naimaci comeci ai ocuiñocaida, jiai guitimaci. ³⁷ Botemo doscientos setenta y seis diese iticai. ³⁸ Cai monillamona, fiebide trigona monaillaimo oni fadodicai, bote meenaiñellena.

³⁹ Ie oni monaidemo, erodatemo, naie eniruena uiñoñedicai. Igobemo conillici illana cidicai. Nainomo jamai ebena sijiacadicai. ⁴⁰ Ie jira lloelluna nainomo oni fainonocaidicai. Datarabe maiana suiñodicai. Vela aifimo sebiñotica. Monaillai fuemo enirue dine jai jaidicai. ⁴¹ Iemei jaiciridifomo ridicai. Eniruemo jodate. Bote muido eniruemo jaiare jodate. Eo baguamona jillaci taicosite. ⁴² Naimaci iamona jillobi raillano, soldaduai llavecana meineiacadimaci. ⁴³ Pablona jillotaiacana jira, capitán iena rairuide. Llote:

—Nano iana uiñotino diese monaillaimo ana daia. Eniruemo jai. ⁴⁴ Jiaino bote ie rabicido juicaida icana jai. Jiaino bote ie raruiaido juicaida icana jai. —Iese eniruemo nana marena ridicai.

28

Maltamo naimaci illa rafue

¹ Jai cai jillua mei, Malta railla uiasimo cai illana uiñotica. ² Nainomo ite comini caina marena feiñotimaci. Iraina bonotatimaci. Noci deilla jira, rosirena jira, irai ecimo gaillena caina uaidotimaci. ³ Pablo reiena ua mei, iraimo jonete. Joniamona, jao

usirenamona, reigaimona jino bite. Naimiena ainide. ⁴ Jaio naimie onollido lliillana Malta comini ciuano, coniniri ñaitimaci:

—Ñibai bime comena meinetimie. Monailaimona jillobide; iadedi jai bu naimiemo ibadi oga.

⁵ Jaiona ciuanona, Pablo iena iraimo dotade. Iemei naimiemo jaca bue isoide rafue suiñede. ⁶ Comeciaina facadimaci: “Naimie onolli raire sirite. Iemei raire fodaite”. Are sedaja mei, naimiedi jaca niese iñede. Ie jira dane comeciaina facajano raitimaci:

—Naimiedi ñibai Jusiñamui.

⁷ Naie illanomona uiasi illaima enirue iaie ite. Naimie mamecidi Publio. Caina marena feiñote. Darui amani ie jofomo caina marena itatate. ⁸ Publio moo duide biide. Abi cuaride. Jeraina feide. Ie jira naimie dine Pablo jaide. Jusiñamuimo jia mei, ie onolli naimiemo joniano, naimiena jillotate. ⁹ Bie rafue suilla jira, naimie dine nana uiasimo ite duidino bi-bidimaci. Naimacina jillotate. ¹⁰ Ie jira caimo iobillacinona eo fecadimaci. Cai oni jaiadedi, cai jitailla ra caimo fecadimaci.

Romamo Pablo rilla rafue

¹¹ Daje amani fivui illa mei, Alejandriamona bite botedo jaidicai. Naie uiasimo nana rollime facaiseconi naie bote ite. Mena jusiñamui iaiaiaia joreño bote muidomo ite. Damie Cástorna mameciredede. Jiaimie Póluxna mameciredede. ¹² Naie botedo oni cai jaillanona, Siracusamo sijidicai. Darui amani nainomo iticai. ¹³ Nainomona jaillano Regiomo sijidicai. Darui illa mei, aifi beici dinena billa jira, ie areruido Puteolimo ridicai. ¹⁴ Sijia mei, nainomo creyentiaina baiticai. Naimaci diga siete digarui cai illana jitaidimaci. Ie mei Roma dine jaidicai. ¹⁵ Romamo nia cai riñenia, nainomo ite creyentiaia cai billana fididimaci. Cai dine bitimaci. Foro de Apio railla nairaimo damierie bitimaci. Jiaino Tres Tabernas railla nairaimo bitimaci. Naimacina ciuano, Pablodi Jusiñamuimo iobillacino fecade. Ie comecina jiaia ocuiñote. Cai diga Romamo jaidimaci. ¹⁶ Romamo cai ria, capitán llavecana ie illaimamo fecade. Cárcelmo Pablona naie illaima oreñede; iadedi Pablo ie ibauiga jofomo eneno oni orede. Aisii raillano, daje soldado nainomo naimiena sedade.

Romamo Pablo llofuia rafue

¹⁷ Darui amani illa mei, Pablo Romamo ite nanoca judíuaina uaidote. Danomo ofilla mei, naimacimo llote:

—Caimaci, jaca buena cai cominimo finoñedicue. Cai einamací llogacinuaina jaca ñnoticue; ¹⁸ iadedi Jerusalémo cuena gaitajano, romanuai nairai cominimo cuena fecadimaci. Romanuai nairai comini cuemo jicanua mei, cuena marena oretaiacade, fodaillafue cuemo iñena jira; ¹⁹ iadedi judíuai: “Dama ite” railla jira, cai nanoca illaima dine jaillena jicanoticue; iadedi cue nairai diga jaca iciriñedicue. ²⁰ Omoi diga ñaillena, omoia cioacadicue. Fodaillamona ico comini jillollena cue llofuecabilla jira, bie lleo diga maigacue.

²¹ Uai otimaci:

—Judeamona jiaino ona cuega cartana jaca feiñoñedicai. Caimo o rafuena llollena, jaca buna biñede. Bene jaca bu ona jeare ñaiñede. ²² Ie jira omona naie rafuena cacaadicaia. Naga illanomo comini o llofuiana uaitajana uifoticaia. Creyentiaina jeare ñaitimaci. Iena fididicai. Ie jira caimo iena raise llono.

²³ Naimie dine dane billiruina llotimaci. Ie mei ailluena comini naimie jofomo bitimaci. Naimie anamo naimaci illana Jusiñamui jitailla jira, Jusiñamui dibeimo naimaci comeciia iuaina meiduana llofue. Moisés micori llogacinuaimona, Jusiñamui facaina lloraini micoriaia cuegafuaimona, Jesúsna llofue. ²⁴ Jiaino naimie llofuiana ñnotimaci. Jiaino ñnoñedimaci. ²⁵ Nana naimaci comeciaina daje isoi lloñedimaci. Iemona oni jaidimaci. Nia jaiñenia, naimacimo Pablo llote:

—Jusiñamui Joreñodi Isaías micorina cai usumatiamo raise llotatate. Omoi usumatiai micoriai illa isoi nia itomoi. Isaías micoridi omoina jai cueda rafue jai suide. Naimie micori cuete:

²⁶ Jusiñamui llote: “Bie comini dine mai jai.

Llono: ‘Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

²⁷ Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaiñedomoi.

Jai uisnidomoi isoidomoi. Siño rafuena jai cioiacaiñedomoi. Iena jai uiñoiacaiñedomoi.

Cue dibeimo iacaiñedomoi, omoina cue jilloitai raillanona’ ”.

²⁸ Jusiñamui rafuena omoi inoñena muidona, judíuaiñedinodi Jusiñamui naimacina jilloitaiacanana jai fididimaci. Naimaci iena cacareitimaci.

²⁹ Iese naimie llua mei, judíuaidi coniniri siadocana abido jaidimaci.

³⁰ Mena años Pablo ie jofomo ite. Ie illa dinori naie jofona ibauide. Nainomo nana naimie dine bite cominina feiñote. ³¹ Naimie anamo naimaci illana Jusiñamui jitaila jira, Jusiñamui dibeimo naimaci comeciai iuaina meiduana llofujete. Marefodo llofujete. Naimiedi cai Nama Jesucristo rafuena llofujete. Jaca budí naimie llofuiana rairuiñede. Teofilo, jaca digacino omo jai lloticue. Mai. Lucadicue.

ROMAMO ITE CRISTONA HNOTINOMO PABLO ORETAGA RABE

Romamo ite creyentiaimo Pablo cartana orede

¹ Romamo ite creyentiaí, omoi dine cartana oredicue. Pablodicue. ¿Nigacino? Jesucristo díbeimo maijídícue. Jusiñamui fetocamiedicue. Ie mare rafuena cue llollena, cuena orede.

² Jusiñamuidi naimie facaina lloraini micoriaido bie rafuena jaie llote. Naimaci micoriai iena jaie jiai cuega. Iemona birui facacabidicai. ³ Bie rafuedi Jusiñamui Jitona llote. Naimie jaie ite usumadi cai illaíma David micori. ⁴ Naimie Jusiñamui Jitonana uiñotícaí. Jusiñamui Joreñodi siño rafuedo caina iena uiñotade. Jusiñamui Jito fiodail-lamona, Jusiñamuidi ie Jitona jillotate. Jusiñamui Jitodi Jesucristo. Cai Nama. ⁵ Caina duenaillanona, caina oretate, naga nairaiaína naimiena hnotallena, naimiena naimaci iobitallena. ⁶ Naimacimona itomoi. Naimiemo omoi duillena, Jesucristo omoína jai fetode.

⁷ Romamo ite creyentiaí, Jusiñamui isiruiganodomoi. Naimie isoi mareuidinona omoi illena, fetocanodomoi. Cai Moo Jusiñamui, cai Nama Jesucristo diga, omoína duenaite. Iena uiñocana mai omoi jai. Iaimaiaí omoína uri jai itatatiiaímaiaí. Iena omoi uiñocana mai omoi jai.

Roma dine Pablo jaiacade

⁸ Diga comini, diga illanuaimo, Jesucristona omoi hnuana jai fididimaci. Ie jira nano dofoconi omoi facaina Jesucristomo iobillacinona feaacadicue, Jusiñamuimo iena naimie fecallena. ⁹ Jusiñamuimo cue jiaia, omoiri jidicue. Jusiñamui iena uiñote. Naimie Jito rafuena cue lluanona, cue comecimona naimiena sedadicue. ¹⁰ Jusiñamuimo cue jiaia, naimiemo jicadicue, cuena canollena. Naimie jitaia, omoi dine ja muidomo cue riitícue. Iena jicadicue. ¹¹ Omoína eo cioacadícue. Jusiñamui Joreño uai cuemo illamona, omoi comeciaina ocuiñotaiacadícue. ¹² Jesucristona omoi hnuamona, naimiena cue hnuamona, coninina cai comeciaina ocuiñotaiticai.

¹³ Cue amatiaí, diga icaiño omoi dine jaiacadícue. Iena omoi uiñuana jitaidicue. Jaiacadícue; iadedi nia jainidicue. Cuemona Jesucristo rafuena cacajamona, dajerie jiaie nairaiaí jai hnotimaci. Omoi dine Jesucristo rafuena lluaiacadícue, iena omoimona dajerie hnollena. ¹⁴ Nana comini dine Jusiñamui oretagacue. Ie jira griego uaido ñaitinomo Jesucristo rafuena lloiacadicue. Griego uaido ñaiñedinomo iena jiai lloiacadicue. Abina uiñotinomo iena lloiacadicue. Abina uiñoñedinomo iena jiai lloiacadicue. ¹⁵ Ie jira omoimo Jesucristo rafuena eo lloiacadicue.

Jesucristo rafue siño

¹⁶ Jesucristo rafueri iobidicue. Naie rafuedi siño. Jusiñamuidi naga iena hnotinona naimaci jeacinomona jillotate. Judíuaídino nano iena cacadimaci. Ie mei judíuaíñedinono iena jai cacadimaci. ¹⁷ Naie rafuemona Jusiñamui caina feiñuana uiñotícaí. Jusiñamui caina marebicaítajana uiñotícaí. Naimiena cai hnuamona iena uiñotícaí. Jusiñamui facaina lloraima micori jaie cuega: “Jusiñamuina hnuamona marebicaidimiedi Jusiñamui díbeimo íco jaca íite” cuega.

Comini jeacinona fnoiadedi, dani naimaci muidona

¹⁸ Nana Jusiñamuina jitaíñedinodi naimie duere finollifue anamo jai itimaci. Iena uiñotícaí. Jusiñamui caina iena uiñotade. Maraiñede rafue naimaci finuanona, Jusiñamui ie uanaicinona jamaidimaci. ¹⁹ Jusiñamui naimacina naimiena uiñotaja muidona, imaci comeciaimona Jusiñamui illana uiñotimaci. ²⁰ Enirue finua facaisemona

naimie finoca ramona naimie illana uiñotimaci. Naimiena cionidimaci; iadedi naimie finoca ramona naimiena uiñotimaci. “Naimiena uiñotimaci” omoi raia, naimiedi bu. Naimie uai jaca siñonana uiñotimaci. Ie jira: “Jusiñamuina uiñoñedicai” rainidimaci. ²¹ Jusiñamui uiñotimaci; iadedi naimie uaina iñoñedimaci. Naimiemo comeciaina facañedimaci. Naimiemo iobillacinona fecañedimaci; iadedi ebena comeciaina facacabidimaci. Naimaci comeciái jai tainomo ite isoide. Jai marebificañedimaci. ²² “Abina uiñoticaí” raitimaci; iadedi abina uiñoñedimaci. Jamai ebe isoidimaci. ²³ Jusiñamui jaca ite. Naimie uai siño. Naimiena sedaacañedimaci; iadedi jiaie rana sedaacadimaci. Fiodairuide imana eruaide jiraraina finodimaci. Ofomana eruaide jiraraina finodimaci. Ocainana eruaide jiraraina finodimaci. Jaiona eruaide jiraraina finodimaci. Naie isoide jiraraina sedauidimaci.

²⁴ Ie jira Jusiñamui naimacina fañonocaide, naimaci jitailla jearede rafuena imaci finollena. Ie mei conini diga eo meirede rafuena finouidimaci. ²⁵ Jusiñamui ie uanaicinona jitañedimaci. Uanañedicinodo jaidimaci. Jusiñamui finoca rari iobidimaci; iadedi naie rana finodimieri iobiñedimaci. Ero, daní Jusiñamuimo iobillacinona jaca caí fecacabillasa. Uanaicinona lloticue.

²⁶ Iese naimaci illa jira, naimaci jitailla meirede rafuena finollena, Jusiñamui naimacina fañonocaide. Coniñona aifuedotimaci. ²⁷ Naimaci jitailla jira, conimana aifuedotimaci. Naimaci marañede finoca rafuemonu duere sefuillemona ibana feñoitimaci.

²⁸ Jusiñamuina naimaci uiñoiacañena jira, marañede rafuemo naimaci comeciái facallena, Jusiñamui naimacina fañonocaide. Naimaci finorainiga rafuiaina finocana jaidimaci. ²⁹ Naga isoide marañedicinona finouidimaci. Naga isoide jearedicinona finouidimaci. Jiaie comini rana nicidouidimaci. Jiaie cominina duere finouidimaci. Jiaima raconi uradoisoidimaci. Cominina jaca meinetimaci. Fuiriruidimaci. Jifuerisoidimaci. Jiaie cominina jeare finouidimaci. Eo ñaillaredimaci. ³⁰ Jiaie comini joreñona ñaoidimaci. Jusiñamuina jaca gaiñedimaci. Cominina jeare ñaoidimaci. Abina iedouidimaci. Abina biriuidimaci. Diga jearede rafuemo comeciaina facauidimaci. Naimaci moo uaina ñnorainidimaci. Naimaci ei uaina ñnorainidimaci. ³¹ Ebena itimaci. Naimaci lloga uaina finorainidimaci. Jiaie cominina isiruirainidimaci. Naimacina jiaí dueruirainidimaci. Iese jaisoidimaci. Iese nia jaicabidimaci. ³² Jusiñamuidi jiaie llote: “Bie isoide rafuena finodino iraimo jaca duere sefuitimaci. Cue illanomo jaca iñeitimaci” llote. Jusiñamui llwana uiñotimaci; iadedi naie rafuena finocana jaidimaci. Iena jiaie comini finoiadedi, iobillanona, “Macai mare iese imaci finua” raitimaci.

2

Jusiñamuidi marañede rafuena finodinona duere finoite

¹ Ero, omoi judíuaimona damie comeciaina nibaí facade: “Bie isoide marañede rafuena finoñedicue. Iena finuamona, jiaie comini Jusiñamuimona duere sefuitimaci. Cue duere sefuiñeiticue” raillamo naimie comeciaina facade; iadedi naie isoide marañede rafuena naimie finua jira, Jusiñamui naimiena jiaí duere finoite. ² Jusiñamuidi uanaicinona uiñuamona, marañede rafuena finodimiena duere finoite. Iena uiñoticaí. ³ “Jusiñamui duere finollicino anamona jilloñeitimaci” comeciaina facadio. Naimacimo o comeciaina o facaja isoi, naimaci isoi o finua jira, Jusiñamui ona jiaí duere finoite. ⁴ Ona naimie duenaillamona, ona naimie duere finoacañellemona, o comecimo iticino marecinona meiduana naimie jitaide. Naimie díbeimo o illana naimie jitaide. Naiena jamañeno. ⁵ O comeci jiaíarena jira, o comeci Jusiñamui díbeimo meidoiacañedio. Ie jira ico eo duere sefuitio. Ie ricailifuemona Jusiñamuidi nana naimiena iñoñedinona duere finoite. Iena Jusiñamui finoia, Jusiñamuimona mare. ⁶ Nagamíai imaci finua ille dinori Jusiñamui naimacina duere finoite. ⁷ “Mare rafuena finocana jaidino cue illanomo jaca iitimaci” lloite. Naimaci naimie isoi ebire iacania, naimiemonu iobillacino naimaci jitaia, naimie

illanomo naimaci jaca iacania, iese Jusiñamui lloite. ⁸ Maraiñede rafuedo jaidino Jusiñamui duere finollicino anamo itimaci. Dani imaci abina isiruitimaci. Uanaicinona inoñedimaci. ⁹ Jusiñamui naga jeacinona finodimiena eo duere finoite. Judíuai comini ua duere finoite. Judíuaiñedino cominina jiai duere finoite; ¹⁰ iadedi Jusiñamuidi naga mare rafuedo jaidimiena ebire itataite. Iobitaite. Uri itataite. Judíuaimo iese ua finoite. Judíuaiñedinomo iese jiai finoite, ¹¹ naga nairaina daje isoi naimie finua jira.

¹² Judíuaiñedinodi Moisés micori llogacino anamo iñedimaci; iadedi jeacinona naimaci finua jira, Jusiñamui naimacina duere finoite. Judíuai Moisés micori llogacino anamo itimaci; iadedi iena naimaci inoñena jira, jiai jaca daje isoi duere sefuitimaci. ¹³ Moisés micori llogacina cacajamona, Jusiñamuimona jaca buna marebicaiñede; iadedi iena inuamona marebicaide. ¹⁴ Judíuaiñedinodi Moisés micori llogacino anamo iñedimaci; iadedi naimaci comeciai facajamona, marecinona finuana uiñotimaci. Marecinodo jaillana jiai uiñotimaci. ¹⁵ Moisés micori llogacino anamo naimaci illa isoi, naimaci comeciimona marecinona naimaci finoiadedi, iena uiñotimaci. Ie jira maraiñedinona naimaci finoiadedi, iena jiai uiñotimaci. ¹⁶ Biena llofuecabiticue. Ico Jusiñamui llua jira, Jesucristodi cominimo imaci comeciimomo iticinona juez isoi lloite. Maraiñedinona finuidinomo duere finollicinona lloite. Marecinona finuidinomo duere finollicinona lloñeite.

Moisés micori llogacino judíuai comini raise jaiñedimaci

¹⁷ Abina iedumona, omoimona damerie raitomoi: “Judíuai imacidicai. Moisés micori llogacino anamo cai illa jira, duere finollicinomona jilloitica. Jusiñamui cai diga ite” raitomoi. Iena omoi raillamona, abina iedotomoi. ¹⁸ Naimie jitailla rafuena uiñotomoi. Moisés micori llogacina omoi uiñuamona, marecinona finuana uiñotomoi. ¹⁹ Jusiñamuina uiñoñedinona llofueiacadomoi. Naimiena naimaci uiñoñena jira, jitiredinomo itimaci isoidimaci. Uanaicinona naimacimo omoi llumona, naimaci comeciaina lligaiñoiacadomoi. Naimacina uanaicinona uiñotaiacadomoi. ²⁰ Jusiñamuina raise uiñoñedinona llofueiacadomoi. Naimacina abina uiñotaiacadomoi. Naimie rafuena nia raise uiñoñedinona llofueiacadomoi. Moisés micori llogacino nana uiñuacino illa jira, naiemo uanaicino illa jira, iese iacadomoi. ²¹ Jiaie cominina llofueiacadomoi; iadedi ¿niese omoi comeciimomo fueoiacaiñedomoi? “Rana fiñeno” llotomoi; iadedi fiñdomoi. ²² Omoi aiñede riño diga iñenana llotomoi; iadedi ie isoi finodomoi. Jusiñamuina eruaide jiraraina gaiñedomoi; iadedi naie ra illanuaimona naie jiraraina fiñdomoi. ²³ Moisés micori llogacino abina iedotomoi; iadedi iena omoi inoñena jira, Jusiñamuina jeare finodomoi. ²⁴ Iena Isaías micori jaie cuete: “Omoi muidona judíuaiñedinodi Jusiñamuina jeare ñaitimaci” cuete.

²⁵ Jusiñamui dibeimo jai omoi illana jiaie comini uiñollena, omoi abina detatatomoi. Moisés micori llogacina omoi inoiadedi, omoi abina detatajadi mare; iadedi naicinona omoi inoñenia, abina detatañedino isoi jai itomoi. Jusiñamui dibeimo iñedomoi. ²⁶ Moisés micori llogacina judíuaiñedino inoiadedi, naimaci abina detatañenia, Jusiñamuimona naimie dibeimo ite judíuai isoidimaci; iadedi abina detatañedimaci. ²⁷ Moisés micori llogacina uaina uiñotomoi. Omoi abiaina detatatomoi; iadedi Moisés micori llogacina judíuaiñedinodi inua jira, Moisés micori llogacina uai omoi inoñena jira, Jusiñamuimona omoi baifemo uaidimaci. ²⁸ Omoi jeiciamona Jusiñamui ua cominiñedomoi. Omoi abiaina detatajamona, Jusiñamui ua cominiñedomoi; ²⁹ iadedi omoi comeciai marena illamona, Jusiñamui ua cominidomoi. Abi detataja jira, Jusiñamui cominiñedomoi; iadedi omoi comeciai marena illa jira, Jusiñamui cominidomoi. Raise naimiena inotinodi cominimona iobillacina feiñuana jitañedimaci; iadedi Jusiñamuimona iobillacina jitañedimaci.

3

¹ Bie cartana omoi feiñuanona, iena facallemona, damierie comecina facaite: “Judíuaidicai; ia naiemona, ¿niese jiaie comini baifemo faiticai? Cai abiaina detataticai; ia naiemona jaca buena oñedicaí”. ² Ie jira omoimo lloiacadicue: “Judíuaina cai illana eo mare”. Jusiñamuidi dani caimo ie rafuena llote. Jiaie cominimo lloñede. ³ Cai cominimona dajerie Jusiñamui rafuena ñnoñedimaci; iadedi Jusiñamuidi ie lloga rafuena jaca finode. ⁴ Comini tainona llotimaci; iadedi Jusiñamuidi uanaicinona jaca llote. David micori iena jaie llote:

O lloga uaimona uanaicinona o llouillana uiñoticaí.

O finoca rafuena jiaie comini uaitaia, o dinena jaca anafenodio.

Iena uiñoticaí.

⁵ Dane damierie comecina facaite: “Jusiñamuidi mareuidimie. Cai baifemo uaide. Cai marañedicinona cai finuamona caina Jusiñamui jitaia, jiaie cominidi Jusiñamui jaca mareuillana uiñoitimaci. Cai illa muidona Jusiñamuina iese uiñoitimaci. Ie muidona naimiedi cai jeacino facaina caina duere finoñena, jiaie cominina naimiena cai uiñotaja jira”. Omoimona iese dajerie comeciaina facadimaci; ⁶ iadedi iese iñede. Cai jeacino facaina caina duere finoñeniadedi, Jusiñamuidi jiaie cominina jiaí duere finonite.

⁷ Taino cue lloia, iena naimie oni dotaia, naimiedi mare rafuena finuana cominidi uiñoitimaci. Ie mei naimiemo iobillacinona fecadimaci. Ie muidona Jusiñamui cue jeacino facaina cuena duere finoñena. ⁸ Omoimona dajerie cuena ñaitimaci: “Bimie raite: ‘Jusiñamui marecinona finuana raise cai uiñollena, marañedicinona finocana cai jailla’”. Iese cue lloñena jira, Jusiñamui naimacina duere finoa, cuemona mare.

Jeacinona nana cai finodicaí

⁹ Judíuaidicai; iadedi jeacinona nana comini finua jira, jiaie nairai baifemo fañedicaí. Judíuaidicai; iadedi jeacinona finodicaí. Judíuainedínodi jeacinona jiaí finodimaci.

¹⁰ Jusiñamui facaina lloraini micoriai iena jaie cuete:

Marebicaidino jaca iñede. Nana comini marañedimaci.

¹¹ Jaca buna Jusiñamuina raise uiñoñedimaci. Naimiena raise uiñoiacañedimaci.

¹² Mare rafuedo nana jañedimaci. Marañedicinona finoidimaci.

Jaca buna marecinona finoñedimaci.

¹³ Jeare ñaicabitimaci. Tainona llocabitimaci.

Naimaci ñaiaimona diga jearede rafue comuicabide.

¹⁴ Naimaci fuiaí eo borede.

¹⁵ Icirillamona jiaie cominina raire meinetimaci.

¹⁶ Nine naimaci jaia, diga marañede rafuena comuitatimaci.

¹⁷ Uri illana uiñoñedimaci.

¹⁸ Jusiñamuina jaciruiñedimaci

jaie iese cuete. ¹⁹ Jusiñamui facaina lloraini micoriai lloga uaidi naie lloga uai anamo itinomo duide. Naie lloga uai naimaci uiñuamona, dani abi imaci riidolle uai iñede. Nana comini Jusiñamui duere finollicino anamo itimaci. Iena uiñoticaí. ²⁰ Moisés micori lloga uaina ñnuamona, Jusiñamui jitailla isoi, jaca buna marebicaiñeite; iadedi naie lloga uaina cai uiñuamona, jeacinona cai finuana uiñoticaí.

Jesucristona cai ñnuamona jillobidicaí

²¹ Jusiñamuidi birui caina marebitatajana jai uiñotade. Moisés micori lloga rafuedo iena birui uiñoñedicaí; iadedi Moisés micori iena jaie llote. Jusiñamui facaina lloraini micoriai iena jiaí llotimaci. ²² Jesucristona cai ñnuamona, Jusiñamuidi caina marebicaitate. Nana Jesucristona ñnotinona marebicaitate. Nie isoide cominina cai ia, caina marebicaitallena, caina daje isoi feiñoite. ²³ Nana caidi jeacinona finodicaí. Jusiñamui caina jitailla isoi, marena iñedicaí. ²⁴ Caina naimie duenailamona, naimie jitailla jira, Cristo Jesúsna cai ñnuamona, caina marebicaitate. ²⁵ Jesucristo nia biñena facaise ite cominimo

jeacino facaina Jusiñamuidi ibana oñede. Naimaci jeacino facaina Cristo Jesús fiodaillena, cai facaina naimie fiodaillena, Jusiñamui naimiena oretate. Naimiena birui cai ñinoia, caina duere finoñeite. Jusiñamuina mareuidimiena uiñoticaí. ²⁶ Naimiena iese oretajamona, Jesúsna ñnotimiena Jusiñamuidi marebicaitaja jira, Jusiñamuina mareuidimiena uiñoticaí.

²⁷ Cai jeacinomona marena cai illena, buena finoñedicaí. Ie jira cai finuamona abi iedoñedicaí. Buena finoñedicaí; iadedi Jesucristona cai ñnuamona, jillobidicaí. Ie jira cai finoca rafueri abina iedoñedicaí. ²⁸ Moisés micori lloga uaina cai ñnuamona, marebicaiñedicaí; iadedi Jesucristona cai ñnuamona marebicaidicaí.

²⁹ Jusiñamuidi dani judíuai imaci Mooñede; iadedi naimiedi nana comini imaci Moo. ³⁰ Cai Moodi jaca damiena jira, naimiena naimaci ñnua jira, judíuaina marebicaitate. Naimiena naimaci ñnua jira, judíuaiñedinona jiai marebicaitate. ³¹ Cai ñnuamona cai marebicaila jira, Jusiñamui facaina lloraini micoriai jai lloga uaina caitañedicaí; iadedi iena ua ñnocana jaidicaí.

4

Abraham micorimona fueoticaí

¹ Abraham micori rafuena ja ñaiacadícue. Naimie marebicailafuena omoimo lloiacadícue. ² Ie finoca rafuemona naimie micori marebicaidena, naimie micori abina iedote; iadedi ie finoca rafuemona naimie micori marebicaiñede. Ie jira Jusiñamuimona naimie micori abina iedoiacaiñede. ³ Iena Moisés micori jai euega: “Jusiñamuina Abraham micori ñnua jira, Jusiñamuidi naimie micorina jeacina jaca finoñedimiena isoitate. Naimie micorina marebicaitate” euega. ⁴ Maijillena buna damie ocuiadedi, ibajana jamai fecañeite; iadedi maijia facaina fecaite. ⁵ Ero, ie maijiamona jaca bu jeacina jaca finoñedimiena isoicaiñede. Jusiñamuina naimaci ñnua jira, Jusiñamuidi maraiñedinona marebicaitate. ⁶ Bie rafuena David micori jiai jai euega: Ie maijiamona bu marebicaiñena jira, Jusiñamui marebicaitagamiedi iocire iite.

⁷ Naimaci maraiñedinona Jusiñamui dotajamona, iocire iitimaci.

Jusiñamui naimaci jeacina dane abido ietañeite.

⁸ Naie jeacinomo Jusiñamuidi comecina dane facañeite.

Naimiedi jai feitaite.

Ie jira iocire iitimaci.

⁹ Dani abina detatino iocire illena lloñede; ia abina detatañedinomo iena jiai llote. Jusiñamuina Abraham micori ñnua jira, Jusiñamui naimiena marebicaitate. ¹⁰ Naimie micori abina nia detatañenia, naimie micori marebicaide. ¹¹ Naimie micori marebicaila mei, Jusiñamui dinena Abraham micorimo abi detatajana llote. Abraham micori ie abina detatajamona, Jusiñamuina naimie micori ñnuana uiñoticaí. Ie abina detatajamona, judío imiena jai jai; iadedi Jusiñamuina ñnuamona, naimie micori marebicaide. Ie jira Abraham micoridi nana Jusiñamuina ñnotino moo. Nana comini abiaina detatañedimaci; iadedi naimaci ñnua jira, Jusiñamui naimicina marebicaitate. ¹² Cai comini abiaina detatimaci; iadedi cai moo Abraham micori isoi naimaci ñnua jira, Abraham micori isoi marebicaidimaci. Ie jira Abraham micori nana naimaci moo.

Abraham micori ñnuamona, Jusiñamui lloga uaidi suide

¹³ Abraham micorimo Jusiñamuidi: “Nana enirue omo iiticue” llote. “O uruiaimo iena jiai iiticue” llote. Moisés micori llogacina Abraham micori ñnua jira, iese Jusiñamui lloñede; iadedi Jusiñamui lloga uaina Abraham micori ñnua jira, iese Jusiñamui llote. Abraham micori ñnua jira, Jusiñamuidi naimiena marebicaitate. ¹⁴ Moisés micori lloga uaina ñnotinomo: “Nana eniruena omoimo iiticue” Jusiñamuidi llotena, Jusiñamuina ñnotino tainona ñnotimaci. Jusiñamui lloga uai jiai jai saide; iadedi iese iñede. Dani naimiena ñnotinomo: “Nana eniruena omoimo iiticue” llote. ¹⁵ Moisés micori lloga

uaina naimaci raise inoñenia, Moisés micori lloga uaido jaidino Jusiñamui ricailifue anamo itimaci; iadedi Moisés micori lloga uai inedena, Jusiñamuimona buna duere sefuiñeite.

¹⁶ “Eniruena omoimo iticue” naimiena inotinomo Jusiñamuidi llote. Duenaillamona llote. Nana Abraham urui ai micoriaimo iena llote. Dani Moisés micori lloga uaido jaidinomo lloñede; iadedi Abraham isoi inotinomo jiai llote. Abraham micori isoi cai jailla jira, naimiedi cai moo. ¹⁷ Jusiñamui iena jaie llote: “Ona diga nairai imaci moona jai itataiticue” llote. Jusiñamui fiodaitinona jilloitarede. Nia inede rana ie uaido jiai comuitate. Ie jira Jusiñamui Abraham micorimo llua isoi, suide. Jai fiodaitino illa isoi Abraham micori abi illa jira, Jusiñamui naimie abina mairitate. Ie ai oiniñomo urue comuillena llote.

¹⁸ Jusiñamui Abraham micorimo jiai llote: “Ailluena urui ai omo iite. Diga nairai omona jebuite” llote. Abraham micoridi naie inorainiga rafuena inote. ¹⁹ Jaca inote; iadedi cien años naimie micorimo illamona, naimie jai eeiroma. Naimie micori aidi, Sara micoridi, oiniñona jira, naiñaiño uruedi comuñede. ²⁰ Abraham micoridi Jusiñamui llua inote. Inocana jaillano, iobillacinona Jusiñamuimo fecade. ²¹ Abraham micoridi Jusiñamui lloga uaina finuana eo inote. ²² Ie jira Jusiñamui naimiena marebicaitate.

²³ Naie rafue jaie cueda; iadedi dama Abraham micorimo duiñede; ²⁴⁻²⁵ iadedi caimo jiai duide. Jusiñamuina inotinona marebicaitate. Cai Nama Jesús fodaillamona, Jusiñamuidi naimiena jillotate. Cai jeacino facaina fodaite. Caina marebicaitallena, naimiena jai jillotate.

5

Jai cai marebicaidicai

¹ Jusiñamuina cai inuamona cai marebicaila jira, Jusiñamui diga uri iticai. Cai Nama Jesucristo finoca rafue muidona, Jusiñamui diga uri iticai. ² Jesucristo muidona Jusiñamui caina duenaillamona, caina marebicaitate. Naimie ebirena isoi cai illemo caimare ocuridicai; ³ iadedi duere cai sefuiadedi, jiai iobidicai. Duere sefuillamona, cai comeciai ocuiñocana cai jaillana uiñotici. ⁴ Cai comeciai ocuiñuamona facacifidicai. Facacifillamona, Jusiñamuimo ocuridicai. ⁵ Jusiñamui caina isiruilla jira, tainomo ocuriñeiticai. Ie Joreña caimo fecade. Ie Joreño cai comeciaimo illa jira, ie Joreño Jusiñamuidi caina naimie caina isiruillana uiñotate.

⁶ Cai jeacinomona dani jillonidicaimo, Cristo cairi fodaite. Marañedicai; iadedi naie facaiseconi cairi fodaite. ⁷ Marañedimie facaina caimona jaca buna fodaiaicaiñede. Caimona nabai damie maremie facaina fodaite; iadedi nana comini iese fodaiaicaiñedimaci. Marañedimie facaina jaca buna fodaiaicaiñede; ⁸ iadedi nia marañedicaimo, Jusiñamui caina isiruillamona, Cristo cairi fodaite. ⁹ Cristo cairi fodaillamona, jai marebicaidicai. Ie muidona Jusiñamui caina duere finuacinomona Cristodi caina jillotaite. ¹⁰ Cai dinena Jusiñamuina cai enoilla facaiseconi naimie Jito cairi fodailla muidona, ie Jito jillua muidona, Jusiñamui caina jai nabaide. Naimie caina nabailla jira, cai ico jilloillena raise uiñotici. ¹¹ Cai Nama Jesucristo muidona, Jusiñamui iobidicai. Cristo muidona Jusiñamui diga uri iticai.

Adán micori finoca rafue

¹² Bie rafue jai suide. Adán micori jeacinona finuamona, nana caimo jeaciodi jai comuide. Jeacino caimo illa muidona, cai jeacino ite diga nana fodaicana jaidicai. ¹³ Moisés micori llogacino nia inenia, jeacinona finodimaci; iadedi Moisés micori llogacino nia inenia, Jusiñamuidi jeacino facaina ibana oñede. ¹⁴ Moisés micori llogacino nia inenia, Adán micori facaisemona Moisés micori facaisemo naimaci jeacino ite diga nana comini fodaicana jaidimaci. Adán micori isoi jeacinona finoñedimaci; iadedi

fiodaicana jaidimaci. Adán micoridi Cristo isoiñede. Adán micori finoca rafuemona jeacino comuide. Cristo finoca rafuemona Jusiñamui cai jeacinona oni dotade.

¹⁵ Adán micori finoca rafuedi Jusiñamui finoca rafue isoiñede. Adán finoca rafuemona cai jeacino ite diga nana cai fiodaicana jaidicai; iadedi Jusiñamui finoca rafue Adán micori finoca rafue baifemo faite. Jusiñamui jitailla jira, caina naimie duenaillamona, cai dine Jesucristona orede, nana cai jilloillena. ¹⁶ Dama Adán micori jeacinona finuamona, Jusiñamuidi nana caina duere finollicino anamo itatate; iadedi Jesucristo fiodaillamona, Jusiñamui jitailla jira, caina marebicaitate. Ailluena jeacinona finodicai; iadedi marebicaidicai. ¹⁷ Dama Adán micori jeacinona finuamona, cai jeacino ite diga nana cai fiodaicana jaidicai. Jusiñamui caina eo duenaillamona, Jusiñamui caina marebicaillamona, dama Jesucristo muidona, Jusiñamui diga jaca iiticai.

¹⁸ Dama Adán micori muidona, nana comini duere finollicino anamo itimaci; iadedi dama Jesucristo finoca mare rafuemona Jusiñamui diga naimaci jaca illena, nana comini marebicairidimaci. ¹⁹ Adán micori Jusiñamuina inoñenamona, nana comini jeacinona finodimaci. Jesucristo Jusiñamuina inuamona, ailluena comini marebicaitimaci.

²⁰ Jusiñamui Moisés micorimo rafuena llote. Iena comini inoñenamona, diga jeacinona naimaci finuana uiñotimaci. Jeacinona finocana jaidimaci; iadedi Jusiñamuidi naimacina eo duenaite. ²¹ Jeacino anamo jaie nana cai illa jira, cai jeacino ite diga fiodaicana jaidicai; iadedi Jusiñamui duenaillacino anamo birui iticai. Ie jira cai marebicaillamona, cai Nama Jesucristo muidona, Jusiñamui diga jaca iiticai.

6

Jesucristomo cai duillamona, jeacino anamo jai iñedicai

¹ Jeacino anamo jai iñedicai; iadedi omoimona damierie comecina facaite: “Naga icaiño jeacino cai finoia, caina Jusiñamui duenaillamona, cai jeacinona oni dotade. Naimie caina duenaicabillana raise cai uiñollena, jeacino eo finocana jaiticai. Iemona cai jeacinona oni dotajamona, naimie caina duenaillana eo raise uiñoiticai”. ² Iese comecina facañeno. Jeacino anamo jai cai iñena jira, jeacinona finocana cai jaiñena. ³ Biena uiñotomoi. Cristo Jesús dibeimo cai illamona, nana caidi bautizagacai. Cristo fiodailla jira, cai comeciaino ite jearedicino anamo jai iñedicai. ⁴ Cristo fiodailla jira, raiafomo naimiena jonetimaci. Cristo fiodaillamona ie Moo uaido jillode. Naimie dibeimo cai illamona, cai jeacino anamona jillodicai. Cai comeciaino jaie rafue birui illa jira, jaie rafuedo jai jaidicai.

⁵ Cristo fiodaite; iadedi naiemona jillode. Naimie dibeimo cai illanona, cai comeciaino ite jearedicino anamona cai jillua jira, Cristo ie mare rafue anamo birui iticai. ⁶ Cristo fiodailla jira, cai comeciaino ite jearedicino anamo jai iñedicai. Caimo jai jainaiñena jira, jeacino finocana cai jaiñena. ⁷ Jeacino anamo jai cai iñena jira, jeacinona finocana cai jaiñena. ⁸ Cristo fiodaite; iadedi jillode. Naimie fiodailla jira, cai jearedicino anamo jai iñedicai. Naimie jillua jira, jaie rafuedo birui jaidicai. ⁹ Fiodaillamona Cristo jillua jira, naimiedi dane fiodaiñeite. Naimie fiodaitemo, cai jeacino facaina naimiedi jai fiodaite. Jai dane fiodaiñeite. ¹⁰ Jeacino facaina jeacinona oni dotallena, naimie dacaiño fiodaite; iadedi ie Moona jaca iobitajanona, naimie ie Moo dibeimo jaca iite. ¹¹ Ie jira jeacino anamo iñenanomo omoi comeciaina faca. Cristo Jesús dibeimo jai omoi illanona, Jusiñamui jitailla rafuena finollemo omoi comeciaina faca.

¹² Jeacinona finocana jaiñeno. Omoi comeciaino jeacinona finoacania, iena inoñeno. ¹³ Jeacinona omoi finoñellena, omoi comeciaina ocuiño. Mare naimie jitaillacinona omoi finollena, Jusiñamuina ino. Jeacino anamo jaie omoi illa jira, naimiemo omoi nia duiñena jira, Jusiñamuimona fiodaitino isoidomoi; iadedi jeacino anamo birui omoi iñena jira, naimiemo omoi jai duilla jira, Jusiñamuimona fiodaillamona jai jillodino isoidomoi. Jaie naimiemo duiñedomoi; ia birui naimiemo jai duidomoi. ¹⁴ Moisés llogacinuai anamo

omoi jai iñena jira, jeacino anamo jai iñedomoi. Jeacinona finocana omoi jaiñellena, Moisés micori llogacino jaiñedomoi; iadedi jeacino omoi finoñellena, omoiña Jusiñamui duenailamona, naimie omoiña birui canocabide.

Patrón anamo itinomona cai fueolle

¹⁵ Moisés micori llogacino anamo jai iñedica; iadedi omoi mona damierie comecina facade: “Moisés micori llogacino anamo cai iñenamona, jeacino cai finoia, Jusiñamui caina duere finoñeite”. Iese comecina facañeno. Jeacinona finocana cai jaiñena. ¹⁶ Biena uiñotica. Patrón anamo bu ia, ie patrón comeci jitailla rana finode. Ie ocuica rana ñnote. Ie isoide. Jeacino anamo omoi ia, jeacinona finocana jaidomoi. Jeacino omoi finuamona omoi jeacino ite diga fiodaicana jaidomoi. Ie jira Jusiñamui illanomo ico iñeitomoi. Jusiñamui anamo omoi ia, Jusiñamui jitailla rafuena finocana jaidomoi. Naimie illanomo ico iitomoi. ¹⁷ Jeacino anamo jaie itomoi. Iemei omoi mo jaie comini Jesucristo rafuena jai llotimaci. Iena cacajanona, iena raise ñnotomoi. Ie jira Jusiñamuimo iobillacinona fecadicue. ¹⁸ Jeacino anamona jai jillobillamona, marecinona finocana jai jaidomoi.

¹⁹ Cue llwana omoi raise cacaillena, bie isoide rafuena lloticue. Omoi comeciai railla jira, jeacinona navui finodomoi. Maraiñedicinona finocana navui jaidomoi. Cristo ñibeimo omoi jai illa muidona, marecinona omoi finocana birui mai omoi jai. Iese omoi jaillamona, omoi comeciai Jusiñamui jitailla isoi marena iitomoi.

²⁰ Jeacino anamo navui omoi ia, Jusiñamui jitailla isoi, marecinona finoñedomoi. ²¹ Jeacinona navui omoi finuamona mare rafuena oñedomoi. Ie jira iena birui meiruitomoi. Jeacinona finocabidino fiodaillamona, Jusiñamui illanomo ico iñeitimaci. ²² Jeacino anamona jai jillobidomoi. Jusiñamui anamo omoi jai illa jira, naimie ocuica rafuena finodomoi. Iena omoi finuamona, Jusiñamui jitailla isoi, marecinona finocana jaitomoi. Ja muidomo naimie diga iitomoi. ²³ Jeacinona finocana omoi jaia, omoi jeacino ite diga fiodaitomoi. Jusiñamui illanomo ico iñeitomoi; iadedi cai Nama Jesucristona omoi ñnuamona, Jusiñamuidi omoiña jaca itataite. Naimie illanomo ico iitomoi.

7

Inirede riñomona cai fueolle

¹ Cue amatiai, Moisés micori llogacinuaina uiñotomoi; iadedi iena nia raise cacaiñedomoi. Ie fiodailla mei, jaca buna Moisés micori llogacinuai anamo iñede. Ie fiodailla mei, jai iñena jira, nainomo duiñede. ² Ie isoide. Nana naimie ille ñnori, ñnrede riño ie ñnimo duide. Iese Moisés micori jaie llote. Ie ñni fiodailla mei, ie ñnimo jai duiñede. Naimie anamo naiñaiño jai iñena jira, jaiñmiena naiñaiño oia, ie ñnina illena, Jusiñamuimona mare. ³ Ie ñni nia fiodaiñenia, jaiñmie diga naiñaiño ia, ie ñni abimo jeacinona jai finode, Moisés micori lloga uai naiñaiño ñnoñena jira. Ie ñni fiodailla mei, naimie anamo naiñaiño jai iñena jira, jaiñmiena ie ñnino naiñaiño oia, jeacinona jai finoñede.

⁴ Ie isoide. Cristo fiodailla jira, Moisés micori llogacinuai anamo jai iñedica. Iemo jai duiñedica. Ie jira Cristomo jai duidica. Jusiñamui jitailla rafuena finocana cai jaillena, fiodaillamona Cristo jai jillode. ⁵ Jusiñamuina nia cai ñnoñenia, cai jitailla rafuena finocana jaidica. Moisés micori llogacina uiñotica; ia cai maraiñede jitailla rafuena finocana jaidica. Cai jeacino ite diga fiodaicana jaidica; ⁶ ia Moisés micori llogacino jai saide. Caimo jai duiñede. Navui ie anamo itica; iadedi birui ie anamo jai iñedica. Jusiñamuina cai sedajamona, Jusiñamui Joreño rafuedo jai jaidica. Moisés micori ciegafuiaido jai jaiñedica.

Cue comecimo ite maraiñedico

⁷ “Moisés micori llogacino maraiñede” lloñeitica; iadedi naie llogacino iñedena, jeacinona uiñoñedicue. Jaiñmimo ite rana cue ñiciduana maraiñenana jaie uiñoñedicue.

Moisés micorí jaie llote: “Jiaimíemo ite rana nicidoñeno” llote. Ie jira naiemona niciduanana maraiñenana uiñoticue. ⁸ Naie llogacino muidona cue comeci jeacinona finoacade. Ie muidona rana nicidotícue. Naie llogacino iñedena, jeacino finuana uiñoiacaiñedícaí. Naie llogacino iñedena, jeacino anamo iñedícaí. ⁹ Moisés micorí llogacinona nia cue uiñoñenia, caimare uri itícue. Naiena cue uiñuamona, jeacino cue finuana uiñoticue. Ico Jusiñamui diga cue iñenana uiñoticue. ¹⁰ Nano cue comecina facadícue: “Naiedo cue jaillamona, Jusiñamui diga ico jaca iitícue”. Iese cue comecina facadícue; iadedí naie llogacinona cue uiñuamona, Jusiñamui díbeimo cuena jaca itatañede. ¹¹ Naie llogacino muidona cue comeci jeacinona finoacana jira, cue jitailla rafuena oñedícue. Ico Jusiñamui diga jaca cue illena oñedícue; iadedí duere cue sefuillícinona otícue. Naimíe díbeimo Moisés micorí llogacino cuena itatañede; ia naimíe díbeimona cuena itatate.

¹² Iese ite; iadedí Moisés micorí llogacínodí mare. Jusiñamuimona ite. ¹³ Naie llogacino mare. Naie rafue muidona fiodaiñeitícue; ia jeacino muidona fiodaitícue. Jeacinona cue finua jira, Jusiñamui illanomo ico jaca iñeitícue. Naie mare llogacínomona jeacino cue finuana eo maraiñenana uiñoticue.

¹⁴ Jusiñamui Joreño Moisés micorína naie llogacinona cuetatate. Ie jira naicino mare; iadedí cue jitailla rafuena cue finua jira, cuemo jeacino illa jira, jeacino finoraímana itícue. ¹⁵ Cue finua rafuena raise uiñoñedícue, cue mare jitailla rafuena cue finoñena jira. Cue gaiñena maraiñede rafuena finocabidícue. ¹⁶ Cue maraiñede finoacaiñega rafuena cue finojade, Moisés micorí llogacino marenana uiñoticue. ¹⁷ Cue comeci iena dama finoñede; iadedí cue comecimo ite jeacino cuena finotate. ¹⁸ Cue comecimo marecino iñede. Mare rafuena finoacadícue; iadedí iena finonidícue. ¹⁹ Cue mare finoacaga rafuena finoñedícue; iadedí cue maraiñede finoacaiñega rafuena finodícue. ²⁰ Cue finoacaiñega rafue cue finojade, cue comeci iena dama finoñede; iadedí cue comecimo ite jeacino cuena iena finotate. ²¹ Biese cuemo suicabide. Mare rafuena cue finoacaniadedí, jeacinona finocabidícue. ²² Cue comeci Jusiñamui lloga uaina gaide; ²³ iadedí cue comecimo maraiñede rafuena illana uiñoticue. Cue comecina namataacade. Cuena jeacinona finotaiacade.

²⁴⁻²⁵ Eo dueredícue. Jusiñamui lloga uaina cue comecimona finoacadícue; iadedí cue comecimo ite maraiñede rafue cuena jeacinona finotaiacade. Jeacino finocana cue jaia, duere sefuitícue. Jusiñamui illanomo ico jaca iñeitícue. Naiemona jaca buna cuena jillobitañede. Dama Jusiñamui cuena jillotaite, caí Nama Jesucristo muidona. Ie jira Jusiñamuimo cue iobicabillasa.

8

Jusiñamui Joreño caí comeciaina namatacana caí jailla

¹ Cristo Jesúsimo duidínodícaí. Ie jira Jusiñamuidí caína duere finoñeite. ² Jeacino anamo jai caí iñena jira, caína duere finoñeite. Jeacinona caí finuamona, Jusiñamui illanomo ico jaca iñeitícaí. Duere sefuitícaí; iadedí naiemona Jusiñamui Joreño caína jai jillotate. Jesucirstomo caí duillanona, caína jaca itataite. ³ Moisés micorí llogacinona caí raise iñoñena jira, jeacínomona daní jillonidícaí. Ie jira Jusiñamuidí ie Jitona orede, ímana naimíe jaillena. Caí isoi naimíe jaide; iadedí naimíedí jeacinona finoñede. Jeacinona finoraínidícaí. Caí jeacino facaina fiodaillena, naimíena orede. Naimíe uaidí caí jeacinona anafefitate. Ie jira jeacino anamona jai caína jillotate. ⁴ Iese finode, caí marena illena, Moisés micorí llogacino llua isoi. Ie jira caí comecimo ite maraiñede jitailla rafuedo jai jaiñedícaí; iadedí Jusiñamui Joreño jitailla rafuedo jai jaidícaí.

⁵ Caí comecimo ite maraiñede jitaillacínodo caí jaiadedí, naiemo caí comeciaina facadícaí. Iena finodícaí; iadedí Jusiñamui Joreño jitailla rafuedo caí jaiadedí, iemo caí comeciaina facadícaí. Naimíe jitailla rafuena finodícaí. ⁶ Maraiñede jitaillícinomo

comeciaina facacabidino Jusiñamui diga ico jaca iñeitimaci; iadedi Jusiñamui Joreño jitailla rafuedo jaidino Jusiñamui diga jaca iitimaci. Jiai jaca uri iitimaci. ⁷ Jiaino Jusiñamuina enoidimaci. Jusiñamui lloga uaina jitaifñedimaci. Iena ñnonidimaci. ⁸ Iese itino Jusiñamuina iobitanidimaci.

⁹ Iese iñedomoi; iadedi Jusiñamui Joreño jai duidomoi. Naimie omoimo ite. Bumo Jusiñamui Joreño iñenia, Cristomo nia duiñede. ¹⁰ Jeacinona omoi finua jira, fiadaitomoi; iadedi Cristo omoimo illa jira, omoi joreñuai Jusiñamui illanomo jaca iitimaci, Jusiñamui omoina marebicaitaja jira. ¹¹ Cristo Jesús fiodaillamona, Jusiñamuidi naimiena jillotate. Omoimo ie Joreño illa jira, omoi fiadaide, Jusiñamuidi ie Joreño uaido omoi abiaina jiai jillotaite.

¹² Cue amatiai, iese caimo suite. Ie jira cai comeciamo ite marañedicinodo cai jaiñelli. ¹³ Naicinodo cai jiaia, Jusiñamui illanomo ico jaca iñeiticai; iadedi Jusiñamui Joreñodi caina canuamona, naicino anamona cai jilluanona, Jusiñamui illanomo ico jaca iiticai.

¹⁴ Nana Jusiñamui Joreño namatadinodi Jusiñamui uruijai. ¹⁵ Jusiñamui Joreño feiñoñedomoi, naimiena omoi jaciruillena; iadedi Jusiñamui uruiaina omoi jaillena, naimiena feiñotomoi. Duere sefuillacinona navui jaciruitomoi; iadedi birui: “Cai Moo” raillanona, Jusiñamuina uaidotomoi. Ie jira naimiena jai jaciruiñedomoi. ¹⁶ Cai comeciaina Jusiñamui Joreño uiñotajamona, cai comeciamona Jusiñamui uruiadicaia jai uiñoticai. ¹⁷ Naimie uruiadicaia jira, ie uruiamo fecaacalle ra caimo jai duide, Cristomo jai duilla isoi. Naimie dibeimo cai illanona, Cristo isoi cai duere sefuilla jira, naimie isoi ie Moo illanomo ico iiticai.

¹⁸ Biena uiñoticue. Bene birui duere sefuidicai; iadedi iemo cai comeciaina cai facañena, monamo ico eo marena jaca cai illena jira. ¹⁹ Iese cai illemo nana Jusiñamui finoca radi iocire birui ocuridimaci. ²⁰ Nana enruemo ite Jusiñamui finoca radi mare; iadedi Adán micori jeacino finua jira, Jusiñamui llua jira, naimaci faidobidimaci. Iese suide; iadedi ico dane marena naimaci illemo ocuridimaci, ²¹ naimaci rifaillamona ico naimaci jillua jira. Ie mei Jusiñamui uruiadicaia isoi marena iitimaci. Dane fiadaifñeitimaci. ²² Biena uiñoticai. Nana Jusiñamui finoca radi danomo eo duere sefuicana nia jaidimaci. Marena illemo nia ocuridimaci. ²³ Dani naimaci duere sefuicana jaidimaci; iadedi jiai duere sefuidicai. Jusiñamuidi ie Joreño caimo fecaja jira, ico cai marena illena uiñoticai. Monamo Jusiñamui uruiaina ico cai illemo ocuridicai. Cai fiadaia, fiodaillamona cai abiaina jillotaite. Jiaifo eruaite cai abiamo meidollemo ocuridicai. Ie mei cai abiai dane fiadaifñeitimaci. ²⁴ Naiemo cai ocurillamona, cai jeacinomona navui jillobidicai. Bumo ie jitailla ra ia, iemo naimie ocuriñede. Ie feiñoñega ramo ocuride. Ie isoidemo ocuridicai. ²⁵ Caimo suiñede rafuemo cai ocurilla jira, iemo fecuise ocuridicai.

²⁶ Birui duere cai sefuia, ico marena cai illemo ocuridicai. Jusiñamui Joreño caina jiai canode. Jusiñamuimo cai jiaia, naimiemo cai jicanua rafuena cai raise uiñoñenia, ie Joreño cai facaina ñaite. Naimiedi cai jino botanide uaina Jusiñamuimo llote. ²⁷ Jusiñamui cai comeciaina uiñote. Naimie jitaillacinona ie Joreño jia jira, iena uiñote. Jusiñamui cominidicai. Ie Joreño cai facaina ñaiana cacade.

Jusiñamui caina isiruite

²⁸ Jusiñamuina isiruitinodicai. Naimie jitailla jira, naimie caina fetode. Jusiñamuidi caimo suide rafuena marena suicana jaitate. Iena uiñoticai. ²⁹ Caina isiruillanona, caina fetode. Nano dofoconimona caina naimie jito isoi cai illena itatate. Naimie jitodi cai ama doforamiena. ³⁰ Caina iese jai itatajamona, birui caina uaidote. Caina uaiduanona, caina jeacinona jaca finoñedino jai isoitate. Caina jeacinona jaca finoñedino jai isoitamona, naimie illanomo ico cai ia, ebire iiticai.

³¹ Iese caina itataja jira, Jusiñamuidi cai facaina illa jira, bu cai facaina iñellena, damamai iesedicai. ³² Jusiñamuidi ie jitona duere sefuillamona jillotañede; iadedi namie

jitailla jira, cai facaina ie Jitona orede, cairi fiodaillena. Ie muidona naimie dibeimo marena cai ille rafuena caimo jiai iite. ³³ Jeacinona navui finodicai; iadedi Jusiñamuidi caina jeacinona jaca finoñedino jai isoitaja jira, Jusiñamui fetocanodicaina jira, jaca buna cai jeacino facaina naimiemo llogidoñeite. ³⁴ Ie jira cai jeacino facaina jaca buna caina duere finotañeite. Cristo Jesús jaie fiodaite; iadedi fiodaillamona naimie jillode. Jusiñamui beicimo naimiedi birui ite. Cai facaina naimie ñaite. ³⁵ Cristo caina isiruite. Jaca buna Cristo caina isiruillacinona baironide. Jiaie comini duere caina finoia, caina jeare finoia, aime cai guia, cai iniroinia, jacirede rafue caimo ia, jiaie comini caina meineia, Cristo caina nia isiruite. ³⁶ Iena Jusiñamui facaina lloraima micori jaie cuega: Jusiñamui muidona caina jaca meineticaci, mercadomo toica llaudaia fallena illa isoi cuega. ³⁷ Cristo caina isiruilla jira, caina naimie canuamona, naga bie isoide rafue caimo suia, cai comeciai ocuiñocana cai jailla. ³⁸ Jusiñamui caina isiruite. Naimiemonona jaca budi caina baironide. Cai fiodaia, cai nia ia, Jusiñamui caina nia isiruite. Jusiñamui jaienisaidi, Taifedi, Janabadi Jusiñamui isiruillacinomonona caina baironidimaci. Birui diga isoide rafue caimo suide; iadedi Jusiñamui caina nia isiruite. Ico diga isoide rafue caimo suia, Jusiñamui caina nia jaca isiruite. Jaca buna ie uaido Jusiñamui isiruillacinomonona caina baironide. ³⁹ Monamo ite radi Jusiñamui isiruillacinomonona caina baironide. Eniruemo ite radi Jusiñamui isiruillacinomonona caina baironide. Nana Jusiñamui finoca radi Jusiñamui isiruillacinomonona caina baironide. Cai Nama Cristo Jesúmo cai duilla jira, Jusiñamui caina isiruillana uiñoticaí.

9

Jusiñamuidi judíuai railla cominina fetode

¹⁻² Jiaie rafuena nia lloiticue. Cue comecidi eo sunaite. Cristomo cue duilla jira, tainona lloñedicue. Jusiñamui Joreño cue comecina uiñotajamona, iena uiñotice. Cue cominiri sunaitice. ³ Cue comini Cristo rafuena inoiacaiñedimaci. Ie muidona Jusiñamui ricallifue anamo birui itimaci. Naiemonona naimaci jilloillena, naimaci duere sefuillicino ifomo cue iticuedena, cuemonona mare. Naimacidi cue amatiai. ⁴ Israel railla cominidimaci. Jiaicidi judíuai railla cominidimaci. Jusiñamuidi naimacina fetode, ie uruiaina. Jusiñamui siño finoca rafuena ciodimaci. Iena naimaci inollena, Moisés micorimo Jusiñamuidi rafuena jiai llote. Naimiena sedallena jiai llote. Naimaci dine naimaci jilloitaraimana oretallena jiai llote. ⁵ Naimaci jaiagaidi Abraham micori, Isaac micori, Jacob micori. Naimacimona comuide nairaimona Cristodi comuide. Naimiedi Jusiñamui. Nana rana naimie anamo ite. Naimieri jaca cai iobicabillasa. Iena jitaidice.

⁶ Cai cominimo Jusiñamuidi ie uaina llote; iadedi nana cai comini iena inoñena jira: “Jusiñamui ie lloga uaina finoñede” raiñeticai. Jusiñamuina naimaci raise inoñena muidona, nana Israel micorimona comuide cominidi Jusiñamuimo duiñedimaci. ⁷ Nana Abraham micorimona comuidinodi naimiemo duiñedimaci. Jusiñamui iena jaie llote: “Dama Isaacmona comuidinodi ua Abraham uruiaí”. ⁸ Naie lluamona nana Abraham micorimona comuidinona ie uruiaíñenana uiñoticaí. Jusiñamui lloga uaina inotinodi naimie ua uruiaí. ⁹ Jusiñamuidi Abraham micorimo jaie llote: “Jiaie año bie facaiseconi o dine abido biiticue. Naie facaiseconi o ai Saradi jitona jocoite” llote. Ie mei iese suide.

¹⁰ Ie mei Isaac micoridi Rebeca micorina ote, naimie aina. Ie mei naiñaiño micoridi gorasana iaimaiai micorina jocode. Nano doforamiedi Esau micori. Jiamiedi Jacob micori. ¹¹⁻¹³ Naiñaiño micori nia jocoñenia, Jusiñamuidi naiñaiño micorimo llote: “Nano doforamie ie ama anamo jaca iite” llote. Jusiñamui facaina lloraima micori Jusiñamui lluana jiai cuete: “Jusiñamui llote: ‘Jacobna eo isiruitice; iadedi Esauña janore isiruitice’ llote”. Naie iaimaiai micori nia jeicñenia, iaimaiai micori marecinona nia finoñenia, iaimaiai micori marañedicinona nia finoñenia, Jusiñamuidi iaimaiai micorina

iese llote. Ie finoca rafuemona Jacob micorina fetoñede; iadedi Jusiñamui jitailla jira, Jacob micorina fetode.

¹⁴ “Jusiñamuidi dama Jacob micorina fetuana marañede” raiñeiticai. Jusiñamuidi marañedicinona jaca finoñede. ¹⁵ Jusiñamui bie isoide rafuena Moisés micorimo llote: “Cue dinena cue jitaillanona duenaiticue; ia cue dinena cue jitañenanona duenaiñeiticue” llote. ¹⁶ Comini naimiena jitaillamona, Jusiñamui naimacina duenaiñede. Naimaci rafue finuamona, naimacina duenaiñede; iadedi naimie jitailla jira, naimacina duenaite. ¹⁷ Jusiñamuidi bie isoide rafuena Faraón micorimo llote. Moisés micori illa facaise Egipto railla enirue illaimadi Faraón micori. Naimiemo llote: “Ona illaimana jai itataticue. O uicomo siño rafuena finodicue, cue uai siñonana jiaie comini uiñollena, nana cominido cue mameci sorillena”.

¹⁸ Jusiñamui iese ite. Naimie dinena ie jitaillanona duenaite. Naimie jitailla jira, jiaie cominina naimiena ñnotañede.

¹⁹ Nibai comeciaina facadomoi: “Cominina iese Jusiñamui itataia, ¿bue ñllena naimacina duere finoacade?” ²⁰⁻²¹ Iese comeciaina facañeno. ¿Ñiese nainona naimiemo ducaitomoi? Ero, jiñoramona nogona finodiñaiñodi ie jitailla dierise nogona finode. Dajerie ebirede nogona finode. Dajerie jamai nogona finode. ²² Ie isoide. Nana comini dajena eruaiñedicai. Ie jitailla isoi, jiaiforie Jusiñamui caina comuitate. Jusiñamui ie jitailla rafuena finode. Jeacinona comini finua jira, Jusiñamuidi naimacina duere finoacade. Naimacina ie uai siñonana jiaie uiñotaacade; iadedi naimacina nia duere finoñede. ²³ Cominina Jusiñamuidi jiaie duenailla jira, naimacina ie siño uai ebire-nana uiñotaacade. Naimie illanomo nanomona naimaci marena iitimaci. Iese naimie naimacina itatate. ²⁴ Jusiñamui caina iese itatate. Da judíuaina iese itatañede; ie iadedi judíuaiñedinona jiaie iese itatate. ²⁵ Jusiñamui iena jaie llwana Oseas micori jaie cuete: Cue cominiñedinodi cue cominina jaitimaci. Isiruiñeganona isiruiticue.

²⁶ Dane jiaie cuete:

Navui cue cominiñedomoi; iadedi jiaie comini omoina ico lloitimaci: “Naimacidi jaca cajede cai Jusiñamui ie uruiaidimaci” lloitimaci cuete. ²⁷ Isaías micori railla lloraíma jaie cuete: “Monailai fuemo conillie eo ite. Ie isoi Israel micori uruiái eo jebuitimaci; iadedi Jusiñamuidi nana naimacina jillobitañeite. Dajeriena jillotajanona, ²⁸ jiaínomo ie lloga uaina raire finoite. Naimacina duere finoite” cuete. ²⁹ Isaías micori jiaie cuete:

Jusiñamuidi anamo nana ra ite.

Jusiñamuidi Sodómamo ite comini micoriaina jaie cuenode.

Gomórramo ite comini micoriaina jiaie jaie cuenode.

Naimaci micoriai isoi iñedicai, nana cai cominina naimiedi duere finoñena jira.

Judíuidi Cristo rafuena jitañedinomaci

³⁰ Biemo comeciaina faca. Judíuaiñedinodi Jusiñamui jitailla isoi, marena illana navui uiñoiacaiñedinomaci; iadedi iena jai uiñotimaci. Jesucristona naimaci ñnuamona, marena illana jai uiñotimaci. ³¹ Jusiñamui jitailla isoi marena naimaci illena, judíuidi Moisés micori llogacinodo jaidimaci; iadedi Moisés micori llogacinona naimaci raise ñnoñena jira, marena illana jaca uiñoñedinomaci. ³² Naimaci finoca rafuemona marena iacadimaci. Marena naimaci illena, Jesucristona ñnoiacañedinomaci. Naimie muidona marena iñeitimaci. ³³ Isaías micori iena jaie cuete:

Jusiñamui llote: “Ero, Jerusalémo cue Jitona oretaiticue.

Naimie muidona cominidi jilloñeitimaci.

Naimiena naimaci ñnoñenia, faifitimaci;

iadedi naimiena ñnotinodi tainona ñnoñeitimaci.

Suubicañeitimaci” llote.

10

1 Cue amatiai, judíuai comini jilluana eo jitaidicue. Jusiñamui diga cue ñaia, iena jicadicue. 2 Jusiñamui jitaillacinona eo finoacadimaci. Iena uiñoticue. Iena finoacadimaci; iadedi iena finuana raise uiñoñedimaci. 3 Jusiñamui naimacina marena itatallena uiñoñedimaci. Naimaci finoca rafuemona marena iacadimaci. Jusiñamui llua isoi jaiacaiñedimaci. 4 Nana Cristona ñnotimiedi Moisés micori llogacinodo naimie marena illena jai jaiñede. Cristona ñnuamona, Jusiñamui jitailla isoi, naimie marena jai ite.

5 Moisés micori jaie cuete: “Naimie marena illena, cue lluardo jaidimiedi jaca iite, cue llua naimie raise ñnoia” cuete. 6 Iese jaie cuete; iadedi jaca buna iese ñnoñede. Cristona ñnuamona, marena Jusiñamui jitailla isoi, birui iticai. Jusiñamui uai llote: “Omoi comeciaina facañeno: ‘Cristona cai baillena, naimiena bene cai atillena, monamo jaiticai. 7 Fiodaitino dine jaiticai, Cristona cai jillotallena’. Iese comeciaina facañeno” llote. Cristodi eniruemo jaie bite. Fiodaite; ia naiemona jai jillode. 8 Jusiñamui uai llote: “Naie rafue cai dine jai ite. Iena jai uiñoticai”. Cai jilloillena Cristona cai ñnuana birui lloticai. 9 Jiaie cominimo: “Cristodi cai Nama” omoi lloia, Cristo fodaillamona Jusiñamui naimie jillotajana omoi ñnoia, jilloitomoí. 10 Cai comecimona cai ñnua jira, Jusiñamui caina marena illana itataite. “Cristodi cai Nama” cai lloia, Jusiñamui caina jillotaite.

11 Isaías micori iena jaie cuete: “Cristona ñnotinodi tainona ñnoñeitimaci. Su-ubicaiñeitimaci” cueda. 12 Naie rafuedi nana cominina ñaite. Judíuaina ñaite. Judíuaiñedinona jiai ñaite. Jusiñamui anamo nana cominidi itimaci. Nana naimiemo jicanotinona jaca duenaite. 13 Cristodi naga naimiemo jicanotimiena jillotaite; 14 iadedi Cristona naimaci nia ñnoñenia, naimiemo jicanonidimaci. Cristo naimaci facaina fiodailla rafuena naimaci nia cacaiñenia, naimiena ñnonidimaci. Naimacimo naie rafuena jiaie comini lloñenia, iena cacaiñeitimaci. 15 Jusiñamui ie rafue llorainina jai orede. Isaías micori iena jaie cuete: “Mare rafuena llotino cai dine billano, eo iobidicai” cuete.

16 Iese cuete; iadedi ailluena comini naie rafuena nia jitañedimaci. Isaías micori iena jiai jaie cuete: “Jusiñamui, ailluena comini cai llua ñnoiacaiñedimaci” cuete. 17 Cai llua marena Cristo rafuena cacadimaci. Cristo rafuena cacajamona, damierie naimiena ñnotimaci.

18 Judíuai comini naie rafuena jai cacadimaci. Jusiñamui facaina lloraíma micori iena jaie cuete:

Naga eniruemo ite cominimo Jusiñamui lloraini micoriaidi naie rafuena jai llotimaci cuete. 19 Judíuai comini naie rafuena cacadimaci; iadedi iena ñnoñedimaci. Moisés micori iena jaie cuete:

Jusiñamuidi llote: “Cue rafuena naimaci feiñua jira, judíuaiñedinno diga uradoitomoí.

‘Naimaci abina uiñoñedimaci’ raitomoí;

iadedi cue rafuena naimaci feiñua jira, naimaci diga iciritomoí” llote.

20 Isaías micori marefodo jiai cuete:

Jusiñamui llote: “Cuena jenoñedinno cuena jai baitimaci.

Naimacina cue jilloitallena cuena jicanoñedinomo jai bairedicue” llote.

21 Jusiñamui judíuai cominina jiai llote: “Naimacina cue dine jaca uaidoticue; iadedi ñnoiacaiñedimaci. Cuena jitañedimaci” llote.

11

Judíuai cominimona dajerie ñnoitimaci

1 Jusiñamuidi judíuaina fainonocaillamo omoi comeciaina facañeno. Judío imiedicue. Abraham uruai micoriaimona comuidicue. Benjamín railla nairai imiedicue.

2 Naimacina jaie naimie fetua jira, Jusiñamui judíuaina fainonocaiñede. Elíamo jaie ite rafuena uiñotomoí. Jusiñamuimo naimiedi judíuaina llote: 3 “Cue Nama, o facaina

lloraini micoriana meinetimaci. Ona cai sedajanona judaidimaci. Dama cue fiebidicue. Cuenai jiai meineiacadimaci”. ⁴ Jusiñamui dinena uai ote: “Dama iñedio. Siete mil iñiaia cue dibeimo nia eenoticue. Baal railla jiraraina jaca sedañedimaci. Cuenai nia sedadimaci” llote. ⁵ Birui ie isoide. Naimacina duenaillamona, naimacina Jusiñamui fetua jira, dajerie Jusiñamui dibeimo itimaci. ⁶ Naimacina duenaillamona, naimacina fetode. Naimaci finoca rafue muidona naimacina fetofede. Naimaci finoca rafue muidona naimacina fetodena, naimacina duenaillamona naimacina fetofede.

⁷ Ie jira iena iese lloiticue. Ailluena judúuai di marena Jusiñamui jitailla isoi illana ofedimaci; iadedi Jusiñamui fetocano iena otimaci. Ailluena comini iena inoiacaiñedimaci. ⁸ Jusiñamui facaina lloraini micoriana iena jai e cuega: “Jusiñamuidi naimacina abina uiñotañede. Jusiñamui finoca rana naimaci cioia, iena uiñoñedimaci. Jusiñamui rafuena naimaci cacajia, iena cacaiñedimaci. Birui iese nia itimaci” cuega. ⁹ David micori iena jiai llote:

Naimacimo aillue ra illamona, Jusiñamui naimacina duere finoite.

¹⁰ Naimaci comeciaia Jusiñamui rafuena uiñoñeitimaci.

Naimaci finoca rafue anamo duere sefuicana jaca jaitimaci.

Judúuaiñedinomona dajerie inoitimaci

¹¹ Naimie rafuena judúuai comini jitañena jira, Jusiñamui naimacina duere finode; iadedi naimacina sofeñede. Jusiñamuina judúuai inoñena jira, Jusiñamuidi judúuaiñedinona jai jillotate. Naimacina jai jillotate, judúuai dinena judúuaiñedinona uradoillena. Uradoillamona Jusiñamuidi naimaci naimiena inollena jitaide. ¹² Cristona judúuai jitañena jira, Jusiñamuimona judúuaiñedinodi diga marecinona birui feiñotimaci. Cristo dibeimo ico judúuai ia, Jusiñamuimona judúuaiñedino ailluena feiñoitimaci.

¹³ Judúuaiñedino, omoimo rafuena lloiacadicue. Omoi dine Jusiñamuidi cuena orede. Cue maijari eo marena ñaiticue, ¹⁴ cue comini cuena uradoillena, Cristona dajerie inotallena. ¹⁵ Cristona naimaci nia inoñena jira, judúuaiñedino jai inotimaci. Cristona ico judúuai inoia, Jusiñamui diga jaca itimaci. ¹⁶ Janore jisa juilliruñu marenia, nana juilliruaidi mare. Riara ie jainauai marenia, nana ie igailalai mare. Judúuai di ie isoidimaci. Naimaci jaiagai micoriana jainauai isoidimaci. Naimaci jaiagai marenia, naimacidi jiai mare. Birui ite judúuai di igailalai isoidimaci.

¹⁷ Taide igailalai di ie amenamo jai duiñede. Ie isoidimaci. Naimacimona Cristona jiaino inoñena jira, Cristomo jai duiñedimaci. Sotaca riara isoi, naimaci ifomo itomoi. Ie jira Jusiñamuimona rafuena jai feiñocabitomoi. ¹⁸ Naimaci ifomo omoi illa jira, abina uradoiñeno. Igailaimona jainao cajellena, ie ijina ofede; iadedi iemo duilla jira, jainaomona igailalai cajellena, ie ijina ote. Ie isoide. Naimie omoi duilla jira, Jusiñamuimona rafuena jai feiñocabitomoi.

¹⁹ Comeciaina facadomoi: “Taide igailalai ifomo iticai isoidicai. Jusiñamui judúuaina oni dotade, caina fetollena”. ²⁰ Uanaicinona comeciaina facadomoi. Naimaci inoñena jira, Jusiñamuidi naimacina oni dotade. Omoi inua jira, naimaci ifomo itomoi. Ie jira abina uradoiñeno; iadedi Jusiñamuina omoi jacirui. ²¹ Naimiena naimaci inoñena jira, judúuaina duere finode. Naimiena omoi inoñenia, daje isoi omoina duere finoite. ²² Biemo comeciaina faca. Naimiena inoñedinona jai duere finode; iadedi omoina duenaite. Naimiena inocana omoi jai, naimie omoina nia duenaite. Iese omoi jaiñenia, naimie omoina dotaite. ²³ Judúuai Cristona inoñeno navui jaidimaci: iadedi Cristona naimaci birui inoia, naimie dibeimo Jusiñamui naimacina itatarede, igai riaramo sotaja isoi. ²⁴ Ailli riarana cueticue. Naie amenamo nano duiñedomoi. Judúuai nainomo nano duidimaci. Jusiñamui jitailla jira, sotaca igai isoi, naimaci ifomo omoina jai itatate. Ie jira Jusiñamui jitaia, nainomo nano naimaci duilla jira, naimiedi judúuaina abido oite.

Eo ailluena judúuai jilloitimaci

²⁵ Bie rafuena omoi uiñuana jitaídícue. Iena navui uiñoñedícaí. “Judíuái baífemo faitícaí” omoi raiñellena, biena omoímo llotícue. Díga judíuái Cristona birui ñnoiacaíñedímací. Jusiñamui jitailla díese judíuáiñedíno jillua facaisena, íese íitímací.

²⁶ Íe meí eo ailluena judíuái jilloítímací. Jusiñamui facaina llorainí micoríaí íena cuetímací:

Jerusalémona caí Jilloítaraima bíite.

Jacob micorí uruíaímona jeacínona dotaíte.

²⁷ Naimací jeacínona oní dotajanona, Jusiñamui jaíe lloga uai suite.

²⁸ Cristona birui ñnoiacaíñedímací. Jusiñamuína enoídímací. Jusiñamuína naimací jitaíñena jira, naimíe omoína fetode. Íe jira jillodomoí; íadedí Jusiñamuidí judíuáína nano jaíe fetode. Naimací jaíagáí micoríaímo íe lloga uaina jira, naimacína nía ísiruite.

²⁹ Jusiñamui íe lloga uaina saíñede. Naimacína fetua jira, naimacína faínonocáiñeíte.

³⁰ Jusiñamuína navui ññoñedomoí; íadedí Jusiñamuína naimací ññoñena jira, Jusiñamui omoína jaí duenaíte. ³¹ Jusiñamuína jaí ññoñedímací; íadedí omoína naimíe duenailla ísoí, Jusiñamuidí naimacína íco jaí duenaíte. ³² Jusiñamui nana comínína naimíena ññoñenana uiñotade, naimacína naimíe duenaillena. ³³ Jusiñamui caína eo duenaíte. Eo abína uiñote. Naga rana uiñote; íe íadedí naimíe lloga uaina raise cacáiñedícaí. Naimíe finoca rafuena raise jaí uiñoñedícaí. ³⁴ Jusiñamui facaina lloraima micorí íena jaíe cuete: “Jaca buna caí Nama Jusiñamui comecí facajacínona uiñoñede. Jaca buna naimíemo íe finoca rafuena lloñede. ³⁵ Jaíruido íbana feiñollena, jaca buna naimíemo rana fecañede” cuete. ³⁶ Naga ra naimíemo illa jira, naga ra naimíemona bite. Naga rana finode. Naimíemo íobillacínona caí fecacabillasa. Iena jitaídícue.

12

Jusiñamui anamo raise omoi í

¹ Cue amatíaí, omoímo bie rafuena llotícue. Jusiñamui caína duenailla jira, omoi jeanide comecíaímona, naimíe jitaílle rafuena omoi finuamona naimíe anamo raise omoi í. Naimíe jitailla ísoí omoi í. Naimíedí omoi íese illana gaíde. Omoi comecíaímona naimíena raise omoi seda. ² Cristona uiñoñedíno ísoí omoi íñeno; íadedí omoi comecíaí íuaina meíduanona, jaíe rafuedo maí omoi jaí. Íe meí Jusiñamui jitailla rafuena finuana uiñoítomoí. Mare rafuena finuana uiñoítomoí. Naimíena íobítajacínona jaí uiñoítomoí. Eo mare rafuedo jaillana uiñoítomoí.

³ Jusiñamui cuena duenaillamona, bie rafuena omoímo cue llollena, naimíe uai cuemo íte. “Jaíe comíní baífemo faitícue” raillamo o comecína facaño; íadedí: “Níe ísoídímíedícue” o raillamo o comecína raise faca. Jusiñamuímona o feiñoğa díese ñnuacínomo o comecína faca. ⁴ Nagamíe íe abímo díga ra íte. Íe onollí íte. Íe uísí íte. Íe jebe íte. Díga jaíe ra íte. Rana caí finollena, naga ra caí abímo íte. Caí abímo jaínaíáide.

⁵ Íe ísoíde. Cristona jaí ñnotícaí. Aillosíedícaí; íadedí daajena naimíemo jaínaíáídícaí. Dani caímo jaí jaínaíáídícaí.

⁶ Jusiñamuidí daje ísoíde uaina naimíe díbeímo caí maíjillena, caímo fecañede. Íe jitailla díese caímo fecade. Íe jira omoi feiñoğa uáido naimíe facaina maíjí. Rafuena omoímo Jusiñamui lloía, íena raise llono. Roracomo omoi maíjillena Jusiñamui lloía, nainomo raise maíjí. Omoi llofuellena Jusiñamui lloía, naimíe rafuena raise llofue.

⁷ Roracomo maíjíacínona uiñoítímíedí nainomo raise maíjía. Llofuiacínona uiñoítímíedí raise llofua. ⁸ Comecí ocuíñoótajacínona uiñoítímíedí comíní comecíaína ocuíñoótacana jailla. Rana fecajacínona uiñoítímíedí rana caídíño fecaía. Comínína sedajacínona uiñoítímíedí comínína raise sedaja. Dueredínona canodímíedí dueredínona íocíre canua. Cristomo daajena caí jaínaíáíllamona, íese conínína canocana jaítícaí.

Cristo rafuedo caí jailla

⁹ Omoi comeciaimona nana cominina isirui. Maraiñedinona gaiñeno; iadedi mare rafuedo omoi jai. ¹⁰ Coninina isirui, omoi cominina omoi isiruilla isoi. Omoina jiaimie nia iobitañenia, naimiena raire omoi iobita.

¹¹ Cristo rafuena sefuiruiñeno finocana omoi jai. Cai Namana iocire seda.

¹² Naimie dine omoi illemo iocire omoi ocuiri. Duere omoi sefua, omoi comeciaina ocuiño. Jusiñamui diga ñaicabillanona omoi jai.

¹³ Jiaie creyentiaia rania, naimacina cano. Omoi jofuemo creyentiaia ria, naimacina nafue.

¹⁴ Jusiñamui dibeimo naimaci marena illena, omoina duere finodinona Jusiñamuimo jii. Naimaciri marena ñaino. Naimacina faidoñeno.

¹⁵ Iobidino diga omoi nabairillena, omoi iobi. Sunaitino diga omoi nabairillena jiai omoi sunai.

¹⁶ Daje isoi omoi comeciaia lloillamona uri omoi i. Abina birioicaiñeno. Jamai bue isoidino diga nabairi. “Jiaie comini baifemo uiñoticaia” raiñeno.

¹⁷ Jiaie comini omoina jeare finoia, naimacina daje isoi jeare finoñeno. Ibana oñeno. Omoi marena illana jiaie comini uiñollena, marena omoi i. ¹⁸ Omoimona rafuena suiñoñeno. Nana comini diga uri omoi i. ¹⁹ Cue isiruigano, bu omoina jeare finoia, ibana oñeno. Jusiñamui naimacina duere finoite. Moisés micori iena jaie cuete: “Cai Nama llote: ‘Cominina duere finodicue. Ibana oiticue’ ” cuete. ²⁰ Ibana oñeno. Jusiñamui facaina lloraia iena jaie jiai cueda: “Omoi enoigamie aimetaia, naimiena eca. Naimie jiroiacania, naimiena jirote”. Ie mei naimie meire omoimo eruaite. ²¹ Jiaie comini omoina jeare finoia, iciriñeno; iadedi naimacimo mare rafuena fino. Iese omoi finoia, naimacina omoi dibeimo itataitomoia.

13

¹ Nana illaicominina naimaci ifomo Jusiñamuidi itataja jira, illaicomini lloga uaina nana cai inua. ² Illaicomini uaina bu inoñenia, Jusiñamuina jiai inoñede. Ie mei Jusiñamui naimiena duere finoite. ³ Mare rafuena finodinodi illaicominina jaciruiñedimaci; iadedi maraiñede rafuena finodino naimacina jaciruitimaci. Omoina duere finoñellena, mare rafuena finocana omoi jai. Iese omoi jaiia, omoina marena ñaitimaci. ⁴ Jusiñamui facaina omoina canodimaci. Maraiñede rafuena omoi finoia, naimacina jacirui. Omoina duere finollena, naimacimo uai ite. Maraiñede rafuena finodimiena Jusiñamui facaina duere finoitimaci. ⁵ Ie jira naimaci uaina ino, Jusiñamuimona omoi duere sefuiñellena. Omoina: “Mare” jiai raitimaci. ⁶ Gobierno omoina ibataia, Jusiñamui facaina naimaci maijia jira, iena iba. Naimaci raise maijillena, iena iba.

⁷ Gobierno omoina ibataia, iena iba. Illaicominimo iobillacinona feca. ⁸ Ra omoi oia, ibaño jaiñeno; iadedi coninina omoi isirui. Jiaie cominina isiruitimiedi nana Jusiñamui lloga uaina jai finode. ⁹ Moisés micori diga lletarafuena jaie cuete: “O aiñede riño diga iño. O iniñede iima diga iño. Jiaimiena meineño. Rana fiñeno. Jiaimie ite rana nicidoño” cuete. Jiai lletarafue ite: “Dani omoi abiaia omoi isiruilla isoi, jiaie cominina omoi isiruilla”. Bie lletarafuena omoi inoia, nana lletarafuena jai inotomoi. ¹⁰ Jiaie cominina omoi isirua, naimacina jeare jai finoñedomoi. Jiaie cominina omoi isirua, nana Jusiñamui lloga uaina jai inotomoi.

¹¹ Iena birui cai finua. Jesucristo billiruidi iaiei jai ite. Naimiena cai nano inua facaiseconi, naimie billiruimo cai comeciaina facadicaia; iadedi nagarui naimie billirui iaiei iñoicaide. ¹² Jesucristo nia dane biñena jira, eniruemo cai illa jira, jitiredinomo iticaia isoidicaia. Naimie bia, naimie diga cai illemona, useredinomo raire ja iticaia isoiticaia. Ie jira jeacinona finocana cai jaillana mai cai faionocailli. Jesucristo rafue anamo raise cai illesa. ¹³ Cai marena illana nana comini uiñollena, mare rafuena finocana cai jailla. Jearede rafuena cai finoñena. Cai jifaiñena. Cai aiñede riño diga cai iñena. Cai fuiriñena. Cai abina uradoiñena. ¹⁴ Iese cai iñena; iadedi naimie caina namatallena, cai

Nama Jesucristona raise cai nabailli. Cai jearede navui jitaillacinona finoacanamo cai comeciaina facañena.

14

Jiaie creyentena jeare ñañeno

¹ Cristona ñnotimiena omoi ñine biade, naimiena raise feiño. Naimie Cristona nia raise ñnoñenia, naimiena nafue; iadedi omoi isoi naimie ñnoñenia, conima uina caitañeno. ² Dajerie naga rana guitimaci; iadedi jiaimie difai guiga rana guite. Naimie riñede. Ie comeciaina facade: “Cue riia, jeacinona jai finoiticue”. ³ Naga rana guiñedimiena miñeno. Naga rana guitimiena miñeno. Jusiñamuidi naimacina jai feiñote. Ie jira miñeno. ⁴ Omoi facaina maijiñedimaci. Jusiñamui facaina maijidimaci. Jeacinona naimaci finoia, Jusiñamui naimacina duere finoite. Jeacinona finoi raillanona, Jusiñamuidi naimacina canoite.

⁵ Dajerie creyentiai comeciaina facadimaci: “Judíuai rafue finuaruillaí Jesuñamuina sedajiticaí, nairuillaí jiairuillaí baifemo ualla jira”. Jiaino raitimaci: “Nagarui daje isoide” raitimaci. Nagamie ie comeciaina raise facajamona, ⁶ cai Namana iobitalena, nagamie ie jitaillarui mo cai Namana sedaite. Naga rana guitimie iobillacinona Jusiñamuimo fecajano, cai Namana iobitate. Naga rana guiñedimie iobillacinona Jusiñamuimo fecajano, cai Namana jiai iobitate.

⁷ Cristomo cai duilla jira, dani cai jitailla rafuena finonidicaí. Cai fiodailliruina jiai llonidicaí. ⁸ Naimiedi cai finolle rafuena ocuide. Cai fiodailliruina jiai lloite. Naimiemo cai duilla jira, iese iticaí. ⁹ Cristodi fiodaite. Ie mei jillode. Ie jira naimie anamo iticaí. Cai cajenia, naimie anamo iticaí. Cai fiodaia, naimie anamo jiai iiticaí.

¹⁰ Naimie baifemo omoi iñena jira, jiaie creyentena miñeno. Naimie uina caitañeno. Naimiedi Cristo ñibeimo ite. Jusiñamui uicomo nana ico iiticaí. Jusiñamuidi marañedina duere finoite. Maredinona duere finoñeite. ¹¹ Isaías micori jai ie iena cuete:

Jusiñamuidi llote:

“Cue jaca illa jira, nana comini cue uicomo cuena sedajanona, cuemo iobillacinona fecaitimaci” llote.

¹² Nainomo Jusiñamuimo nana cai finouiga rafuena lloiticaí. Ie jira jiaie creyentiai ñiga marena omoi i.

Jiaie creyentena jeacino finoi raillano, mare rafuedo cai jailla

¹³ Ie jira jiaie cominina cai miñena; iadedi mare rafuedo cai jailla. Jiaimiena jeacinona cai finotai raillano, mare rafuedo cai jailla. ¹⁴ Cai Nama Jesúmo cue duilla jira, naga riga radi cuemona mare. Iena raise uiñoticue. Iena cue riia, jeacinona finoñedicue. Iena uiñoticue; iadedi jiaimie comeciaina facade: “Biena cue riia, jeacinona jai finodicue”. Naimie comeciaina iese facajamona, iena naimie riia, naimiemona jeacinona jai finode. ¹⁵ O riga ra muidona jiaie creyente comeci marañeno jai, naimiena jai isiruiñedio. Cristo naimieri fiodaite. Ie jira naie isoide rana riñeno, naimiena Jusiñamuina fainonocaitañellena. ¹⁶ Ie jira o jitailla rana finoñeno. Jiaie comini ona miñellena, naie rana riñeno. ¹⁷ Jusiñamui cominina cai illamona, cai guille ramo cai comeciaina cai eo facañena; iadedi marena cai illamo cai comeciaina cai facaja. Uri cai illamo cai comeciaina jiai cai facaja. Iocire cai illamo cai comeciaina jiai cai facaja. Jusiñamui Joreño caimo illa jira, iese caina itataite. ¹⁸ Iese cai jaia, Cristona raise sedadicaí. Jusiñamuina iobitadicaí. Jiaie comini caina marena jiai ñaitimaci.

¹⁹ Ie jira uri icana cai jailla. Dani cai comeciaina ocuiñocana cai jailla. ²⁰ Omoi riicaga ra muidona, jiaie cominina Jusiñamuina fainonocaitañeno. Naga radi mare, rillena; iadedi bue isoide omoi ria muidona, jiaimie Jusiñamuina fainonocai, jeacinona jai finodomoi. ²¹ Bue isoide omoi ria muidona, jiaimie jeacino finoi raillanona, iena

riñeno. Bue isoide omoi jirua muidona, jiaimie jeacino finoi raillanona, iena jiroñeno. Bue isoide omoi finua muidona, jiaimie jeacino finoi raillanona, ie isoide omoi finoñeno. Naimiedi Cristomo jai duide. ²² Mare ra omoi finoia, omoi comeciainona iena uiñotomoi. Jusiñamuidi omoi comeciaina uiñua jira, iena marefodo lloñeno. Omoi comeciainona jeacinona omoi finoñenana uiñotomoi. Ie jira iocire itomoi. ²³ “Nie isoide ra cue rria, jeacinona finodicue” raillanomo bu iese comecina facaia, iena naimie riñena. Iena naimie rria, Cristona naimie raise ñnoñena jira, jeacinona jai finode. Jiaimiena jeacinona cai finotai raillano, mare rafuedo cai jailla.

15

Jiaie creyentena cai canua

¹ Cristo rafuedo raise jaidicai; iadedi jiaino Cristo rafuedo cai isoi nia jaiñedimaci. Naimacina cai canua. Ie jira dani cai jitaile rafuena finoñeticai; ² iadedi Cristo rafuedo naimaci raise jaillena, jiaie cominimo cai comeciaina cai facaja, naimacina cai canollena. ³ Eniruemo navui naimie ia, Cristo ie jitailla rafuena jiai finoñede; iadedi Jusiñamui jitailla rafuena finode. Naimiedi duere sefuide. Jusiñamui facaina lloraima micori Cristo ñaiana jiai cuete: “Jusiñamuina jeare ñaiacadimacimo, cuena jiai jeare ñaitimaci” cuete. ⁴ Naiemona cai fueollena, naiemona cai comeciai ocuiñotallena, Jusiñamuina jaie ciegafuiaidi caimo ite. Naiemona Jusiñamui illanomo cai illemo ocuridicai. ⁵ Jusiñamui cai comeciaina ocuiñotade. Naimie coniniri omoina uri itatajana jitaidicue. Cristo Jesús llua isoi, omoi uri illana jitaidicue, ⁶ daje isoi omoi comeciai lloillamona, Jusiñamuina omoi iobitallena. Cai Nama Jesucristo Moona Jusiñamui illamona, Jusiñamuina omoi iobitajana jitaidicue.

Judúuaiñedinodi Cristo rafuena jiai cacadimaci

⁷ Jiaie illanomona creyente omoi roracomo bia, Cristo caina feiñua isoi, Jusiñamuina iobitallena, naimiena raise omoi feiño. ⁸ Iena nia lloiticue. Judúuaina canollena, Jusiñamui lloga uaina fuidollena, Cristodi bite. Jusiñamui tainona lloñede. Jusiñamui naimaci jaiaagai micoriaimo ico suille rafuena jaie llote. Eniruemo billanona, Cristo iena fuiduaibite. ⁹ Judúuaiñedino Jusiñamuina iobitallena, Jusiñamui naimacina duenailla jira, Cristodi bite. David micori Cristo llua jaie cuete:

Judúuaiñedino motomo cue illamona ona iobitaitimaci.

Ruamona cue muidona ona jiai iobitaitimaci.

¹⁰ Moisés micori jiai cuete:

Judúuaiñedino, Jusiñamuimo duide comini diga iobi.

¹¹ David micori jiai cuete:

Nana judúuaiñedino, Jusiñamuimo iobillacinona fecu.

Nana comini naimiemo iobillacinona fecacabillasa.

¹² Isaías micori cuete:

Isai micori uruiaimona damie comuitajamona, naimiedi judúuaiñedinona sedaite.

Naimie naimacina jillobitallena, naimiemo ocuriritimaci.

¹³ Jusiñamui iemo omoina ocuritate. Naimiena omoi ñnuanona, naimie omoina caimare itatajana jitaidicue. Uri itatajana jiai jitaidicue. Iemei Jusiñamui Joreño naimie siño uai diga omoi jilluamo omoina ocuritaite.

¹⁴ Cue amatiai, omoina uiñoticue. Eo maredomoi. Cue lloga rafuena eo uiñotomoi. Coninina llofueredomoi. ¹⁵ Iena omoi comecillena, dafuerie rafuena omoimo marefodo cueticue. Jusiñamui cuena fetuanona, ie rafuena cue llollena, cuena orede.

¹⁶ Judúuaiñedinomo Jusiñamui ie mare rafuena cue llollena, Cristo Jesús facaina maijidicue. Jusiñamui dibeimo naimacina cue itatajanona, Jusiñamui naimacina feiñollena, naimacimo lloticue. Jusiñamui Joreñodi naimacina jiai maretaite.

¹⁷ Jusiñamui dibeimo cue maijia jira, Cristo Jesús muidona cue maijari iobidicue. ¹⁸ Cue maijiana marefodo lloticue. Judíuainedínona Jusiñamuina inotallena, Cristodi cuena canode. Cue llwana cacadimaci. Cue illana ciodimaci. ¹⁹ Cristodi cuena siño rafuena finotate. Jusiñamui Joreño uaido cuena finotate. Iemei Cristona jai inotimaci. Jerusalémona Ilírico railla enirue dinomo Cristo ie mare rafuena ailluena cominimo raise jai lloticue. ²⁰ Nainomo Cristona nia uiñoñedíno dine navui cue jaiacana jira, nainomo Cristo rafuena lluidicue. Jai cacadino illanomo cue jaiacaiñena jira, nainomo lluaiñedicue. ²¹ Isaías micorí buena jaie cuete: Cristo rafuena nia cacaiñedinodi iena cacaitimaci. Naimiena uiñoitimaci cuete.

Romamo Pablo jaiacade

²² Nainomo cue maijiaacana jira, Romamo omoi dine nia jaiñedicue. ²³ Diga nairaimo Cristo rafuena bene jai cue llua jira, cue maijille bene jai iñede. Diga años omoi dine cue jaiacana jira. ²⁴ Españamo cue jaia, omoi dine jaiticue. Omoi diga nano nigarui camare ñaiticue. Ie mei Españamo cue jaillena, cuena canoitomoi. ²⁵ Omoi dine jaiticue; iadedi Jerusalémo ite creyentiaina cue canollena, nainomo nano jaiticue. ²⁶ Macedoniamoi ite creyentiaidi ucubena ofitatimaci. Acayamo ite creyentiaidi ucubena jiai ofitatimaci. Jerusalémo ite duerede creyentiaina canoacadimaci. Jerusalémo ite creyentiaina canollena, iena birui uiticue. ²⁷ Iena feacaacadimaci. Judíuainedimaci; iadedi judíuaina canoacadimaci, naimacimo Cristo rafuena navui judíuai llua jira. Ie jira naimacina birui canodimaci. ²⁸ Naimacimo bie ucubena raise cue fecaja mei, Españamo cue jaillemona, omoi dine nano jaiticue. ²⁹ Omoi dine cue ria, naimie rafuena cue llollena, Cristo cuena raise canoite.

³⁰ Cue amatiai, cai Nama Jesucristomo omoi duilla muidona, Jusiñamui Joreño coniniña omoína isiruitaja muidona, Jusiñamuimo omoi jüia, cue facaina jiai omoi jüi. ³¹ Judeamo ite creyenteñedinomona cue jillobillena, Jerusalémo ite creyentiaimo cue feacaacalle ucubena naimaci raise feiñollena, cue facaina omoi jüi. ³² Jusiñamui jitailla isoi omoi dine iocire cue rillena, iese omoi jüi. Iemei omoi diga cue illemona, jafaicina oiticue. ³³ Jusiñamui omoína uri itatajana jitaidicue.

16

Romamo itinomo Pablodi ie uaina orede

¹ Febe raillañaiño omoi dine jaite. Naiñaiño omoi uiñuana jitaidicue. Naiñaiñodi creyente. Cencrea railla nairai iñaiño. Cristo dibeimo maijiano, nainomo ite creyentiaina canocabide. ² Cristomo omoi duilla muidona, jiaie creyentiaina cai feiñoiacacabilla isoi, naiñaiño raise feiño. Diga cominina naiñaiño canua jira, naiñaiño jitaillie diese cano. Curna jiai canode.

³ Priscila dine cue uaina oredicue. Naiñaiño ini Aquila dine cue uaina jiai oredicue. Cristo Jesús facaina cue diga maijidiaimaiai. ⁴ Cue facaina niadedi fiodaiaimaiai. Ie jira iaimaiairi iobidicue. Diga nairaimo judíuainede creyentiaititaci. Cuemona Cristo rafuena cacadimaci. Cue facaina iaimaiai niadedi fiodailla jira, iaimaiairi jiai iobidimaci. ⁵ Iaimaiai jofomo rollena bitino dine cue uaina oredicue. Epeneto dine cue uaina jiai oredicue. Cue isiruigamie. Asia railla eniruemo itinomona naimiedi Cristona nano inotimie.

⁶ María dine cue uaina oredicue. Omoína canollena, omoi motomo maijide. ⁷ Andrónico dine cue uaina oredicue. Junias dine cue uaina oredicue. Naie iaimaiaidi cue comini. Cárcelmo danomo navui iticai. Jesucristo oretaganodi iaimaiaina mareña ñaitimaci. Naimiena nia cue inoñena facaise Cristona inotiaimaiai.

⁸ Amplias dine cue uaina oredicue. Cristomo naimie duilla jira, naimiedi cue isiruigamie. ⁹ Urbano dine cue uaina oredicue. Cristo facaina cai diga maijicabide.

Estaquis dine cue uaina oredicue. Cue isiruigamie. ¹⁰ Apeles dine cue uaina oredicue. Cristomona naimiedi mare rafuedo jaicabide. Aristóbulo jofomo itino dine cue uaina oredicue. ¹¹ Herodión dine cue uaina oredicue. Naimiedi cue comini. Narciso cominimona dajerie ñnotimaci. Naimaci dine cue uaina oredicue. ¹² Trifena dine cue uaina oredicue. Trifosa dine cue uaina oredicue. Cai Nama facaina maijidiiañuai. Pérsida dine cue uaina oredicue. Cue isiruigañaiño. Cai Nama facaina eo maijide. ¹³ Rufo dine cue uaina oredicue. Cai Namana eo raise ñnote. Naimie ei dine cue uaina jiai oredicue. Naiñaiñodi cue ei isoide. ¹⁴ Asíncrito dine cue uaina oredicue. Flegonte dine cue uaina oredicue. Hermas dine cue uaina oredicue. Patrobas dine cue uaina oredicue. Hermes dine cue uaina oredicue. Naimaci illanomo ite creyentiai dine cue uaina oredicue. ¹⁵ Filólogo dine cue uaina oredicue. Julia dine cue uaina oredicue. Nereo dine cue uaina oredicue. Naimie miriño dine cue uaina oredicue. Olimpás dine cue uaina oredicue. Nana naimaci illanomo ite creyentiai dine cue uaina oredicue.

¹⁶ Conini caimare omoi uaido. Diga nairaimo creyentiai itimaci. Nana naimacidi omoi dine naimaci uaina oredimaci.

¹⁷ Cue amatiai, daje rafuena nia lloiticue. Omoi comeciai daje isoi lloitañedino diga nabairiño. Uai uaitacabidino diga nabairiño. Omoi jai cacaja rafuena lloñedimaci; iadedi jiaie rafuena llotimaci. Naimaci diga nabairiño. ¹⁸ Cai Nama Jesucristo facaina maijñedimaci; iadedi dani naimaci jitailla rana maijicabidimaci. Mare isoide llumona abina raise uiñoñedinona jifuetimaci. ¹⁹ Ailluena cominidi Cristona omoi ñnuana uiñotimaci. Ieri iobidicue. Marecinona finuana raise omoi uiñuana jitaicue. Marañedicinona omoi finuana jitañedicue. ²⁰ Jusiñamuidi omoina uri itatate. Naimie omoina canoite, Taifena anafetallena. Cai Nama Jesucristo omoina duenaillesa.

²¹ Omoi dine Timoteo ie uaina orede. Cue diga jiai maijicabide. Lucio ie uaina jiai orede. Jasón ie uaina jiai orede. Sosípater ie uaina jiai orede. Naimacidi cue comini.

²² Terciodicue. Pablo facaina bie cartana omoimo cueticue. Cai Namamo cue duilla jira, omoimo cue uaina oredicue.

²³ Gayodi ie uaina jiai orede. Naimie jofomo ricabidicue. Creyentiaidi naimie jofomo rocabitimaci.

²⁴ Erasto ie uaina orede. Naimiedi bie nairai ie ucube eenoraíma. Cuarto ie uaina orede. Naimiedi jiai creyente.

Jusiñamuimo iobillacinona jaca cai fecajasa

²⁵ Cue mare rafue llua isoi, Jusiñamui omoi comeciaina ocuiñotarede. Jesucristo rafuena llocabiticue. Jusiñamuidi cominimo naie rafuena jaie uiñotañede; ²⁶ iadedi Jusiñamui caina iena birui jai uiñotade. Nana comini iena uiñollena, Jusiñamui facaina lloraini micoriai iena jaie cuetimaci. Jusiñamui llua jira, Cristona comini ñnollena, nana cominido bie rafuena llocana birui jaide. Jusiñamuidi jaca ite.

²⁷ Jusiñamuidi naga rana uiñote. Naimiemo Jesucristo mamecido iobillacinona jaca cai fecajasa. Mai. Macaibaite. Pablodicue.

CORINTOMO ITE CRISTONA HNOTINOMO PABLO NANO ORETAGA RABE

Corintomo ite creyentiaimo Pablo cartana orede

1-2 Corinto railla nairaimo ite creyentiai, ¿nie isoidomoi? Pablodícue. Carta omoimo oredícue. Jusiñamui jitailla jira, Jesucristo rafuena cue lollena, cuena fetode. Sóstenes cue díga illa jira, omoi díne coco uaina oredícoco. Jesucristo díbeimona naimiedi cai ama. Jai Jusiñamui cominidomoi. Jesucristomo omoi duilla jira, Jusiñamui omoína jai marebicaitate. Jusiñamui omoína fetode, naimie iena. Ua nana cai Nama Jesucristona sedadínodicaídi Jusiñamui iena. ³ Cai Moo Jusiñamui, cai Nama Jesucristo díga, omoína jai duenaite. Iena uiñocana mai omoi jai. Iaimaiaí omoína uri jai itatatiamaiaí. Iena omoi uiñocana mai omoi jai.

Cristo muidona Jusiñamuimona ailluena feiñoticaí

⁴ Jusiñamui díga cue ñaia, omoi facaina iobillacinona jaca fecadícue. Jesucristomo omoi duillamona, Jusiñamui omoína jai duenaite. Ie jira naimiemo omoi facaina iobillacinona jaca fecadícue. ⁵ Jusiñamui omoína duenaillamona, ie rafuena omoi lollena, naimiemonona ailluena uaina feiñotomoi. Cristomo omoi duillamona, naga icaiño Cristo rafuena omoi jino lloia, omoína eo canode. Omoína naimiemo ite rafuena raise uiñotade. ⁶ Ie muidona Cristo rafuena raise hnotomoi. Cristo rafuena cai jino llumona, naimiemo raise hnofidomoi. ⁷ Ie muidona Jusiñamuimona omoimo jaca buena fiebiñede, naimie díbeimo omoi raise maijillena. Naimie díbeimo omoi raise maijiamona, naimie díbeimo jiaie creyentiaína raise itatacana jaidomoi. Cai Nama Jesucristo abído billemo iocire omoi ocurillanona, Jusiñamuimona ailluena rafuena feiñotomoi. ⁸ Jeacinona omoi finocabi raillano, naimie nia abído biñelle dínorí Jesucristo omoi comeciána raise sedaite. Cai Nama Jesucristo abído bia, nicino omoimo iñena muidona, omoína duere finoite. Naimie bia, naimacimo jeacino nia illa jira, naimiena hnoñedinona duere finoite. ⁹ Jusiñamui ie lloga uaina jaca finoite. Naimie hnogamie. Naimie Jitona omoi nabaillena omoína fetode. Naimie Jitodí cai Nama Jesucristo.

Naimaci comeciái daje isoi lloñedinací

¹⁰ Cue amatiaí, omoimo rafuena lloiticue. Cai Nama Jesucristomo omoi duilla jira, iena lloiticue. Omoi comeciái daje isoi lloillana jitaídícue. Daje isoi omoi comeciái facajana jitaídícue. ¹¹ Cloé raillamie cominimona bie rafuena cue fidia jira, iese omoimo llotícue. “Omoi comeciái daje isoi iñedomoi” naimie llote. ¹² Omoimona damierie raitomoi: “Daní Pablo llofuia díbecinodo jai jaidícai”. Damierie raitomoi: “Daní Apolos raillamie llofuia díbecinodo jai jaidícai”. Damierie raitomoi: “Daní Pedro llofuia díbecinodo jai jaidícai”. Damierie raitomoi: “Daní Cristo llofuia díbecinodo jai jaidícai” raitomoi. Nana iese itomoi. Iemona omoi comeciái daje isoi iñedomoi. Cloé cominimona iese fidídícue. ¹³ Ero, díga omoi Jilloitaraini iñede. Omoi jeacinomona omoi jillobillena, dama Cristo illa. Omoi facaina cruzmo cuedi fiódaiñedícue. Cue díbeimo omoi illena cue bautizañegaomoi. ¹⁴ Omoína cue bautizañena jira, omoimo ite rafue cuemona comuiñena jira, iobidícue. Dama Crispona bautizadícue. Gayona jiaí bautizadícue. ¹⁵⁻¹⁶ Estéfanas jofomo ite cominina bautizadícue. Jiaie cominina cue bautizajana comeciñedícue. Ie muidona: “Pablo facaina bautizadícai” llonidomoi. Daje isoi omoi comeciái lloñenia, cue muidonañede. ¹⁷ Ailluena cominina cue bautizallena, Cristodí cuena oretañede; iadedí naimie rafuena cue llofuellena, cuena oretate. Eo abina uiñoraíma isoi omoimo cue llofuetícuenedena, cue lloga rafuemo omoi comeciána facañedomoi. Ie jira eo abina

uiñoraima isoi omoimo llofueñedicue. Cristo fiodaillamona, omoi jeacinomona naimie omoina jillotate. Iena omoi feitañenana jitaidicue.

Cristo finoca rafuemona Jusiñamui uai siñonana uiñoticaí

¹⁸ Cristona ñnoñedinomona cruzmo Cristo fiodailla rafuedi jamaifue. Naimacidi faificana jai jaidimaci. Jusiñamuimona naie rafue illa jira, caimona naie rafuedi siño. Naie uaidi diga comini comeciai meidorede. Caídi naie rafuena ñnotinodicaí. ¹⁹ Ero, Jusiñamui facaina lloraima micori Cristona ñnoñedinona jaie cuete:

Jusiñamui lloste: “Abina uiñoraini imaci uiñuacinona saitaiticue.

Abina baitadino imaci baitajacinona saitaiticue” lloste.

Ie muidona naie isoide comini jilloñenana jai uiñoticaí.

²⁰ Naie isoide comini uiñuacinomona jaca jillonidicaí. Abi uiñoraima uiñuacinodi Cristo fiodailla rafue baifemo faiñede. Moisés micori cuezafuena uiñoraima uiñuacinodi Cristo fiodailla rafue baifemo faiñede. Uaina uaitatimie birui ite uiñuacinodi Cristo fiodailla rafue baifemo faiñede. Jusiñamuidi naimiena uiñoñedino imaci abi uiñuacinona jai jamaitate. Iena naimie jamaitajamona, naimaci uiñuacinodo naimaci jilloñenana jai uiñoticaí. ²¹ Ie jitaillacino diese Jusiñamui finua jira, naimaci abi uiñuacinomona naimiena ñnoñedimaci. Ie jira naimie mare jitaillacinomona, naimiena ñnotinona jai jillotate. Naimaci jeacinomona naimacina jai jillotate. Cristo rafuena cai lluamona ñnotimaci. Jusiñamuina ñnoñedinodi naie rafuena: “Jamaifue” raitimaci.

²² Siño rafuena naimaci cioacana jira, judúuai railla cominidi iese raitimaci: “Siño rafuena Jusiñamui finoa, omoi lloga rafuena ñnoiticaí” raitimaci. Grieguai railla comini dinena raitimaci: “Omoi lloga rafuena cai abina uiñuacino ie isoi itena, iena ñnoiticaí” raitimaci; ²³ iadedi Cristo rafuena llocana jaidicaí. Cruzmo naimie jai fiodaillana lloticaí. Ie jira judúuaidi cai lloga rafue muidona iciritimaci. Naiena oiacañenano iciritimaci. Damie naimaci illaimana jaillemo ocuridimaci. Naimaci ocurillamie fiodaillamo naimaci comeciaina facañedimaci. Cristo fiodailla jira, raitimaci: “Naimiedi cai ocuriñenamie” raitimaci. Judúuaiñedino dinena raitimaci: “Omoi lloga rafuedi jamaifue” raitimaci. Ailluena comini cai lloga rafuena jitañedimaci; ²⁴ iadedi Jusiñamui damerie judúuaina jai fetode. Dajerie judúuaiñedinona jiai jai fetode. Cruzmo Cristo fiodaillamona, jeacino anamona naimaci jillua jira, naie fetocano dinena Jusiñamui uai siñonana uiñotimaci. Cristo finoca rafuedo naimaci jilluamona, Jusiñamui abina uiñuana jiai uiñotimaci. ²⁵ Jusiñamui Cristona orede, cai jeacino facaina naimie fiodaillena. Jusiñamuina ñnoñedinomona Cristo finoca rafuedi jamaifue. Ebinidifue. Caimona Cristo finoca rafuedi Jusiñamui ñnoñedino uiñuacino baifemo faite. ²⁶ Cue amatiai, Jusiñamui omoina navui fetode; iadedi ¿nie isoidomoi? Jamai bue isoidomoi. Omoi comeciaina iemo faca. Jusiñamuina ñnoñedinomona abina uiñoñedomoi. Omoi creyentiai dibeimo eo abi uiñotino raise iñedimaci. Omoi creyentiai dibeimo illaicomini raise iñedimaci. Omoi creyentiai dibeimo ucuberedino raise iñedimaci. Jusiñamui ie isoidinona eo fetode; ²⁷ iadedi abina uiñoñedino raillanodomoina fetode, eo abina uiñotino dinena meidaillena. Illaicominiñedinona jiai fetode, illaicomini dinena meidaillena. ²⁸ Jamai bue isoidinona fetode, jamai bue isoñedino baifemo faillena. Jusiñamuimona jamai bue isoñedinodi jamai comini. ²⁹ Ie muidona jaca buna Jusiñamui uicomo abina iedoñena. ³⁰ Caina ie cominina Jusiñamui jaitaja jira, Jesucristomo duidicaí. Cristomona Jusiñamuina uiñoticaí. Cristo fiodailla jira, Jusiñamui cai jeacinona feitate. Iemona jeacino cai finoñellena, caina canocabide. Jusiñamuidi jeacino anamona caina jiai jai jillotate. ³¹ Jusiñamui facaina lloraima micori iena jaie cuete: “Bu abina iedoiacania, nana Cristo finoca rafue diga naimie abina iedua” cuete.

2

Pablodi cruzmo Cristo fiodailla rafuena llocabite

¹ Cue amatiai, omoi dine navui cue rillamona, Jusiñamuimona cue feiñoga rafuena llofueticue. Omoi baifemo eo abina uiñoticuedena, iese niade llofueñedicue. ² Daje rafuemo cue comecina facacabidicue. Ie jira omoimo dama Jesucristo rafuena llofueiacadidicue. Cruzmo naimie fiodailla rafuena llofueiacadidicue. ³ Omoi motomo navui cue ia, meiruioicaillamona jacinoididicue. Jusiñamui facaina cue raise jino lloñeni raillano jaciruididicue. ⁴ Comini abi uiñuacinodo omoimo llofueñedicue; iadedi omoi jeacinomona omoi jilluamona, Jusiñamui Joreñodi omoina cue lloga rafue siñonana uiñotade. ⁵ Jusiñamuidi cue iese llofuiana jitaide. Comini abina uiñuacinona omoi cacajamona, Cristona ñnoñedomoi; iadedi Jusiñamui omoina jillotaja jira, jai ñnotomoi.

Jusiñamui Joreñodo bie rafuena uiñoticaí

⁶ Comini abi uiñuacinodo llofuecabiñedicue; iadedi Jusiñamuimona ite abi uiñuacinodo llofueticue. Cristona raise ñnofidinomona abi uiñuacinodo llofueticue. Cristo facaina llorainidi cue isoi jiai llofuecabitimaci. Cominimo jai ite uiñuacinodo llofueñedicai. Illaicomini uiñogacinodo llofueñedicai. Ico faifitimaci. Ico jiai uainicaitimaci. Ie jira naimaci uiñogacinodo llofueñedicai; ⁷ iadedi Jusiñamuimona abi uiñuacinona cai feiñuamona, iedo llofueticaí. Nano dofoconi, enirue nia finoñenia, naimie comeci iena uiñote. Monamo naimie ebirede illanomo ico cai illena jitaide. Iena jaie cai uiñoñedicai. Jusiñamui jaca buna iena jaie uiñotañede. ⁸ Birui ite illaicominidi Jusiñamuimo ite rafuena nia uiñoñedimaci. Iena uiñotimaciden, cruzmo cai ebirede Namana meineñedimaci. Naimie uai ebirede. Nana ra naimie jai finua jira, naimie uai siño. Jusiñamui rafuena raise uiñoñedimaci; iadedi Jusiñamui caina iena uiñotade. ⁹ Jusiñamui facaina lloraima micori iena jaie cueda:

Jaca buna naimiena ñnotino facaina Jusiñamui finoca rafuena cioñede.

Jaca buna iena cacaiñede.

Jaca buna iemo comecina facañede

cueda. Jusiñamui rafuena uiñoñedino naie rafuena jaca uiñoñeitimaci; iadedi naimiena isiruitino naie rafuena uiñotimaci. ¹⁰ Birui Jusiñamui caina iena uiñotade. Ie Joreñodo caina uiñotade. Ie Joreño naga rafuena uiñote. Nana Jusiñamui comecimo iticinona jiai uiñote.

¹¹ Jaca budi jiaimie comecimo iticinona uiñoñede. Dama naimie iena uiñote. Ie isoide. Jaca budi Jusiñamui comecimo iticinona uiñoñede. Dama naimie Joreño iena uiñote.

¹² Jusiñamuimona ie Joreñona jai feiñoticaí. Jiaie cominimona naie Joreñona feiñoñedicai. Jusiñamui Joreñodi caina Jusiñamui caimo caidiñeno fecaca rafuena uiñotade. ¹³ Omoimo naie rafuena llofuecabiticaí. Cominimona fueoga uaido llofueñedicai; iadedi Jusiñamui Joreño caimo llofuia uaido llofueticaí. Ie jira Jusiñamui Joreño ite cominimo naie rafuena llofuecabiticaí. ¹⁴ Jusiñamuina ñnoñedinodi Jusiñamui Joreñomona iticinona feiñoñedimaci. Naimacimona naie rafue jamaifue. Iena cacaiñedimaci. Iena jiai uiñoñedimaci. Dani Jusiñamui Joreño illa cominidi naiemo cacarefidimaci. ¹⁵ Nana Jusiñamui jitailla rafue diese cacadimaci. Jusiñamuina ñnoñedinodi Jusiñamui Joreño illa comini illa rafuena jiai raise uiñoñedimaci. ¹⁶ Jusiñamui facaina lloraima micori iena jaie cueda: “Jaca buna Jusiñamui comecimo iticinona uiñoñede. Budi naimiena jiai llofuenide” cueda. Ero Cristo comecimo iticinona cai uiñua jira, Jusiñamuina ñnoñedinodi caina raise uiñoñedimaci. Caina jiai llofuenidimaci.

3

Danomo Jusiñamui dibeimo majidimaci

¹ Cue amatiai, Jusiñamui Joreño anamo itinona omoi raise itomoidena, omoina llofueñedicue. Omoi jitaillacinodo nia omoi jailla jira, omoina llofueticue. Cristo rafuedo janore jai jaidomoi. Jusiñamui uruiaina jai jaidomoi; iadedi monoi ijina jirode urue isoidomoi. Jusiñamuimona nia moonaiñedomoi isoidomoi. Creyentiaina omoi jailla mei,

Cristo rafuedo eo jaiñedomoi. ² Feinide rafuena navui llofueticue. Eo feirede rafuena omoimo llofueñedicue. Omoina iena nia llofueñedicue. Omoi uruia; janore moonaila mei, guitimaci. Ie isoide. Cristona cai inua mei, naimie rafuena inocana cai jailla; iadedi omoi raise jaiñena jira, Jusiñamuimona nia moonaiñedino isoidomoi. ³ Nia omoi jitaillacinodo jaidomoi. Jusiñamui Joreño anamo nia raise iñedomoi. Coninina abina uradoidomoi. Omoi comeciai daje isoi lloñedomoi. Jusiñamuina inoñedino isoi nia itomoi. Jamai ebe isoi nia itomoi. ⁴ Omoimona damierie: “Pablo llofua dibecinodo jaidicai” raitomoi. Jiaino: “Apolos raillamie llofua dibecinodo jaidicai” raitomoi. Iese omoi raia, Jusiñamuina inoñedino isoi itomoi. Ie jira iese raiñeno.

⁵ Jamai bue isoidicue. Apolos jiai jamai bue isoide; iadedi Jusiñamui dibeimo coco maijiamona, Cristo rafue coco llofuiamona, iena inotomoi. Jusiñamui cocomo llua isoi, ie rafuena lloticoco. ⁶ Naie rafuena cue llofuiamona nano inotomoi. Ie mei Apolos iena dane llofue. Iese llofueuidicoco; iadedi dama Jusiñamui omoina naie rafuena inotacana jaide. ⁷ Ie muidona naiemona cai fueua. Jamai bue isoidicoco. Jusiñamui coco baifemo faite. Ie jira naimie omoina inocana jaitate. ⁸ Daje uaina Apolos diga maijidicue. Coco maijia diese Jusiñamuimona coco ibana feiñoticoco. ⁹ Jusiñamui facaina maijidicoco; iadedi naimiedi omoina inocana jaitate. Naimiedi omoi comeciaina marena itatacana jaitate. ¹⁰ Jusiñamui cuemo llua isoi, naimie cuena canua diese, Cristo rafuena llofueticue. Cristo rafuena eo cue uiñuamona, Cristo rafuena omoimo navui llofueticue. Cue lluaamona Cristona inotomoi. Birui jiaimie omoina naie rafuena jai llofue. Omoi comeciaino naie rafue raise itabillena, omoina llofue. Bu omoina llofueia, omoi comeci marena illacinomo naimie comeciina facajanona, omoina naimie llofuecabilla. ¹¹ Omoi jeacinomona omoi jilloillena, jaca daje rafue ite. Jiaie rafuedi iñede. Iena omoimo jai llofueticue. Naie rafuedi Jesucristona ñaite. ¹² Iena raise atona bu llofueia, uanaicinona jaca llofuiamona, cominina Cristona inocana jaitate. Naie rafuedi naimiaci comeciaino raise itabide. Iena raise atona bu llofueñenia, uanaicinona jaca llofueñenia, cominina Cristona inocana jaitañede. Naie rafuedi naimiaci comeciaino raise itabiñede. ¹³ Jusiñamuidi nagamie ie llofuiacinona ico lloite. Jesucristo abido bia, Jusiñamui nie isoidicinodo naga naimie facaina maijidino llua lloite. Naimiaci llogacinona eo facacite. ¹⁴ Ie mei Cristo rafuena raise atona llotinodi Jusiñamuimona ibana feiñoitimaci. ¹⁵ Cristo rafuena raise atona lloñedinodi Jusiñamuimona ibana feiñeñeitimaci. Naimiaci niade jiai faifitimaci; iadedi faifiñeitimaci. Jusiñamui diga jaca iitimaci; iadedi tainomo maijidimaci.

¹⁶ Jusiñamui ie illano omoi comeciaino illana uiñotomoi. Naimie Joreño omoimo illa jira, Jusiñamui ie illanodi omoi creyentiai. ¹⁷ Cristo dibeimona omoi creyentiaina bu abido danomo itataia, Jusiñamui naimiena duere finoite. Jusiñamui omoimo jai illa jira, naimiemo jai duidomoi. Ie jira naimie dibeimona omoina itatatimiena duere finoite.

¹⁸ Bie rafuedo omoi raise jaillena, dani omoi abiaina jifueñeno. Creyenteñedino uiñuacinodo jaiñeno. Omoimona bu iedo jaiacania, naimiemo llono: “Naie isoide rafuedo o jaiñeno”. Iedo naimie jaia, creyenteñedinomona abina uiñoite; ia Jusiñamuimona abina uiñoñeite. Jusiñamuimona abina uiñotinona omoi jaillena, creyenteñedino uiñuacinodo omoi jaiñeno. ¹⁹ Jusiñamuimona naimiena inoñedino uiñuacinodi jamaifue. Jusiñamui facaina lloiraima micori jaie cueda: “Jusiñamuidi comini abi uiñuacinona uiñuanona, naimacina jai emodofide. Naimacina jai duere finode”. ²⁰ Jiai cueda: “Jusiñamuidi abi uiñotino railla comini imaci comeciai facajacino jamaifueña uiñote”. ²¹ Ie jira omoi llofuerainiri abi iedoñeno. Jusiñamuimona nana rafue omoimo jai illa jira, naimiaci abi uiñuacinodo abina iedoñeno. ²² Marena omoi comeciai illacino jitai raillano, Cristo omoi dine cana oretate. Cuena oretate. Apolona oretate. Pedrona oretate. Naiemona omoi ra ollena, omoi jitai raillano, eniruedi ite. Omoi jitai raillano, birui nana omoimo ite rafuedi suide. Omoi jitai raillano, jiairuido nana omoimo ite rafuedi

suite. Nia omoi fioidañenia, Cristo omoïna canoite. Omoi fioidaia, naimie dine jaitomoi. Naiemona marena omoi comeciai illacino jitaï raillano, ua nana rafue omoïmo jai ite. ²³ Cristomo omoi jainaiaila jira, naimie anamo itomoi. Jusiñamuimo Cristo jainaiaila jira, naimie Jusiñamui jitailla rafuena jaca finocabide. Ie jira naimie jitaillacinona finocana omoi jai.

4

Cristo fetocano naimie ðibeimo maijide

¹ Caïmo omoi comeciaina faca. Cristo ðibeimo maijïdïcai. Jusiñamui rafuena llocana jaidïcai. Iena jaie uiñoñedïcai; iadedi naimie caina uiñoñotaga rafuena birui llofuetïcai. ² Ero, naga patrïdi naimie ðibeimo maijïdïno naimie lloga uaina ðnuana jitaide. Ie isoide. Jusiñamuidi ie facaina lloraini naimiena naimaci ðnuamona naimie rafuena raise llua jitaide. ³ Cue uaina omoi uaitañenia, iena omoi uaitaia, jiaïno iena uaitaia, iemo comecina facañedïcue. ⁴ Cuemo nicino ia, iena uiñoñedïcue; iadedi Cristomona cue comecimo jeacino nibai ite. Ia, naimie cuemo lloite. Iemona cuena duere finoite. ⁵ Ie jira: “O llucino mare” cuemo lloño. “O llucino marañede” cuemo jiaï lloño. Cai Nama nia abido biñenia, iena cuemo omoi lloño. Naimie bia, nana comini comeciaino ite rafuena uiñoñotait. Naimaci comeciaino ite jitaillacinona uiñoñotait. Iemona naimaci maijia ðinori Jusiñamuimona iobillacinona feiñoitïmaci. Naie facaise cuemo ite rafuena lloite. Ie jira nia cuemo lloño.

⁶ Cue amatiai, naie rafuena omoi raise uiñoñollena, Apolona ja ñaitïcue. Cocomona omoi fueollena, cuena jiaï ja ñaitïcue. Omoi facaina ñaitïcue. Jusiñamuina ciegafue llua isoi, omoi illana jitaïdïcue. Omoi llorainiri tainomo iobiño. Omoi Cristo facaina llorainimona damie jiaïe lloraima baïfemo faïamo omoi comeciaina facañeno. ⁷ Nana omoi llofuerainidi daje isoidïmaci. Jusiñamuimona nana naimacimo ite uaina feiñoitïmaci. Dani naimaci comeciainona iena naimaci oña jira, ie ðiga abina iedoño.

⁸ “Nana Jusiñamuimona iticïnona jai feiñoitïcai. Jusiñamuimona nana cai jitaillacinona caïmo jai ite. Jusiñamui sedajanomo illainina isoi jai itïcai” omoi comeciaina facadomoi; iadedi nia iese iñoñedomoi. Nainomo itomoidena, nainomo coco jiaï illa jira, cuemona eo mare. Nainomo iticocodena, cuemona eo mare; iadedi jiaïe rafuemo cue comecina jai facadïcue. ⁹ Jusiñamuidi nana omoïna cue baïfemo faitatate raillanomo cue comecina facadïcue. Cristo rafuena llorainidïcai; iadedi cue baïfemo omoi faïamo cue comecina facadïcue. Omoïmona jamai bue isoidïcai. Nana comini duere cai illamo raise eruaidïmaci. Jusiñamui jaienisaïdi duere cai illamo jiaï eruaidïmaci. ¹⁰ Cristo rafuena cai llua muidona, omoïmona ebe isoidïcai. “Cristo rafuena raise ðnuanona, iedo raise jaidïcai” raillanomo omoi comeciaina facadomoi; iadedi Jusiñamuimona iese iñoñedomoi. Omoïmona cai uaidi raise baïñede. “Cai uaidi caïmo raise baite” raillanomo omoi comeciaina facadomoi; iadedi Jusiñamuimona iese iñoñedomoi. Omoïmona jamai bue cai isoilla jira, caïri jaisitomoi. “Jiaïe comini caïri iobidïmaci” raillanomo omoi comecina facadomoi; iadedi Jusiñamuimona iese iñoñedomoi. ¹¹ Cai guille buedi jaca iñede. Iniroinidïcai. Jiaïe comini caina duere finodïmaci. Jofonidïcai. ¹² Cai ra ollena, cai onollï ðiga duere maijïdïcai. Comini caina jeare ñaitïmaci; iadedi ibana oñedïcai. Naimaci ðiga marena ñaitïcai. Caina duere finodïmaci; iadedi uai oño ibana oñedïcai. ¹³ Cai joreña jeare ñaitïmaci; iadedi cai ðinena naimaci ðiga marena ñaitïcai. Naimacimona jamai bue isoidïcai. Iese caïmo naimaci comeciai nia facadïmaci; ia Cristo ðibeimo ie rafuena nia llocana jaiacadïcai.

¹⁴ Bie carta cue cuiamona, omoïna meiruitaiacaiñedïcue; ia omoïna nia llofueiacadïcue. Isiruiga uruaidomoi isoidomoi. Ie jira bie rafuena omoi raise uiñoñuana jitaïdïcue. ¹⁵ Omoïna Cristo rafuena llofuellena, ðiga lloraini omoïmo ite; iadedi cuemona

Cristo rafuena omoi nano cacaja jira, omoi moo isoidicue. Cue uruiaina jai jaidomoi isoidomoi. ¹⁶ Ie jira omoimo cue llogacinodo mai omoi jai.

¹⁷ Iedo omoi jaillena, omoina canollena, omoi dine Timoteona jai oredicue. Naimiena isiruiticue. Naimiedi Cristo ie inogamie. Cuemona Cristo rafuena naimie cacajanona, iena inote. Ie jira naimiedi cue jito isoide. Creyentiai illanomo cue ia, Cristo rafuena jaca llofueticue. Naie rafuedo cue jitailla isoi, iedo omoi raise jaillena, naimiedi omoina llofue. ¹⁸ “Pablo caina jaciruilla jira, naimie cai dine biñeite” raillanomo omoi comeciaina facajamona, omoimona damerie jai abina biridomoi. ¹⁹ Iese comeciaina facadomoi; iadedi Jusiñamui jitaia, omoi dine raire jaiticue. Ie mei nie isoide uai naie abina biridinomo illana uiñoiticue. Naimaci ñaiacinodo iena uiñoiteicue; iadedi naimaci finoca rafuemona iena uiñoiticue. ²⁰ Ero, jamai ñaiamona, Jusiñamui anamo naimie jitailla isoi iñedica; iadedi naimie finoca rafuedo cai jaillamona, naimie jitailla isoi iticai. ²¹ Omoi dine ico cue ria, ¿niese omoi diga ñaiticue? Cuemo llono. Cue lluna omoi inoñenia, omoimo raire lloiticue. Cue lluna omoi inoia, omoina cue isiruillamona, omoimo fecuise lloiticue. Ie jira cuemo llono.

5

Pablo eo jearede rafuena finodimiena raire lloite

¹ Jiaie rafuena omoimo lloiticue. Eo jearede rafue omoi motomo jai illana jai fididicue. Jusiñamuina inoñedino naie isoide rafuena finoñedimaci; iadedi omoimona damie ie eicañona ote, ie aina. ² Jearede rafue omoi motomo ite; iadedi nia abina iedotomoi. Naie isoide rafue omoi motomo navui suilla jira, ¿bue ñellena sunañedomoi? Omoi rocabillacomo naimie bia, naimie fo billana rairui. ³ Omoi dine iticuedena, bie rafue dani omoi siadollena, omoi danomo ofillena lloticue. Omoi dine cue iñena jira, cue comecidi omoi dine ite. Bie rafuemo cue comecina facaoidicue. Bie rafue omoi diga are siadoñeiticue; iadedi naie rafuena finodimiena cue ñaiana jai uiñoticue. ⁴ Cai Nama Jesús facaina cue ñaiamona, naimiena ñaiticue. Ofillanona bie rafue omoi siadollena, omoi diga cue iacanana omoi comeci. Omoina canollena, cai Nama Jesucristo omoi diga ite. ⁵ Taifemo jearede rafuena finodimiena sofe. Taife anamo naimie jai illa jira, duere sefuite; iadedi naiemona fueoite. Duere sefuillamona, Cristo dibeimo dane iite. Cristo ico abido bia, naimiedi Cristo dibeimo dane raise illa jira, Cristo naimiena duere finoñeite.

⁶ Jearede rafue omoi motomo illa jira, ¿buena abina iedotomoi? Janorede siritate ra juilliruaimo faiamona, nana naie juilliruai sircana jaitate. Iena uiñotomoi. Ie isoide. Janorede jearede rafuemona, eo ailluena jearede rafuena oni jaide. Omoimo ite jearede rafuemona oni omoi i, naiemona jearede rafuedo omoi jaisa. ⁷ Judíuai railla cominidi pascua railla rafuena finoacania, nana siritate ra naimaci jofuemona oni dotadimaci. Ie isoide. Cristo jitailla isoi omoi illena, omoi comeciaino ite jeacinona fainonocai. Jeacino anamo omoi jai illa jira, iena fainonocai. Pascua rafue facaiseconi judíuai cominidi toica llaudaiai fajamona, naimaci jeacino facaina Jusiñamui ibana oñede. Cai facaina Cristo jai fiodailla jira, cai jeacino facaina Jusiñamui ibana oñeite; iadedi iemona naimiena nabaidicai. Ie jira jeacinona finocana cai jaiñeno. ⁸ Cai facaina Cristo fiodailla jira, cai jeacinona fainonocaillanona, Jusiñamui jitailla isoi mai cai i. Jeacinona finocana cai jaiñelli. Uanaicinodo mai cai jailli.

⁹ Jiaie cartana omoimo navui oredicue. Imaci aiñede riñoniai diga itino diga nabairiñellena lloticue. Naiñaiñuai iniñede iñiaai diga itañaiñuai diga nabairiñellena lloticue. ¹⁰ Nibai iena raise cacaiñedomoi. Ie jira iena dane lloiticue. Cristona inoñedinona ñañedecue. Naimaci aiñede riñoniai diga ia, naiñaiñuai iniñede iñiaai diga ia, naimaci rana nicidoia, rana naimaci fiiia, jiraraina naimaci sedajia, naimaci diga omoi nabairiñenana ñañedecue. Iena rairuiñedecue. Iena cue rairuidicuedena, naganomo

Jusiñamuina uiñoñedino illa jira, ¿ninomo niadedi iticai? ¹¹ “Cristona ñnoticai” raitinona ñaiticue. Naimaci aiñede riñoniai diga naimaci ia, naiñaiñuai ñniñede iññiai diga naiñaiñuai ia, rana naimaci nicidoia, jiraraina naimaci sedajia, jiaie cominina naimaci jeare ñaia, naimaci jifaicabia, rana naimaci fñicabia, naimaci diga nabairiñeno. Naie isoidino omoi jofuemo feiñoñeno. ¹²⁻¹³ Cristona ñnoñedinona ñaiñedicue. Naimaci rafue cuemo duiñede; iadedi maraiñedicinona naimaci finoia, Jusiñamui naimacina duere finoite; iadedi Cristona ñnotino maraiñedicinona finoia, naimacimo riire llono. Omoi motomo ite jearede rafuena finodimiena omoi rocabillacomo bia, naimie fo billana rairui.

6

Cristona ñnoñede juezmo jiaie creyentena llogidoñeno

¹ Jiaie omoi finoca rafuena fididicue. Jiaie creyentedimie diga omoi nicino ia, ¿bue ñellena jiaie creyentiaie dine jaiñedomoi, naicinona siadollena? ¿Bue ñellena Cristona ñnoñede juez dine naimiena meiruiñeno llogidotomoi? ²⁻³ Jesucristo abido bille mei, Cristona ñnotinodicaidi Cristona ñnoñedinona duere sefuillena lloiticai. Taife comini duere sefuillicinona ico jiai lloiticai. Iena uiñotomoi. Naimacimo omoi ico llua jira, ¿bue ñellena birui omoimo ite rafuena dani omoi raise finonidomoi? ⁴ Nicino omoimo ia, ¿bue ñellena Cristona ñnoñedino dine jaidomoi? Omoimona naimaci jamai bue isoidimaci. Naie isoide jueces omoimo ite rafuena raise uiñoñedimaci. ⁵ Omoi meidaillena, iena omoimo jai lloticue. Naie nicinona raise omoi siadollena, iena raise finollena, omoimona nibai damie ite, iena raise finollena. ⁶ Iese finocabiñedomoi; iadedi nicino omoi creyentiaimo ia, Cristona ñnoñedimie mo jiaie creyentena llogidocabitomoi.

⁷ Jiaie creyentena omoi llogidoia, Cristo dibeimo raise iñedomoi. Naicino raise omoi finoñenia, uai oñeno anamo ee. Naimiemona omoi duere sefuia, dama ite. ⁸ Iese iñedomoi; iadedi dani conini jiaie creyentiaina duere finocabidomoi. Naimaci rana fñidomoi. Omoi amana duere finodomoi.

⁹ Jusiñamui sedajanomo naimiena ñnoñedino duiñeitimaci. Naimaci isoi nia iacadomoi; iadedi Cristo dibeimo omoi illa jira, naimaci isoi inidomoi. Ie jira naimaci illamo omoi abina rairui. Bie isoidino Jusiñamui ie cominina sedajanomo jaca duiñeitimaci: imaci aiñede riño diga itino, imaci ñniñede ñima diga itino, jiraraina sedacabidino, daje isoide ñima diga conima aifiedotino, daje isoide riño diga conioño aifiedotino, ¹⁰ rana bainino fñicabidino, rana nicidocabitino, jifaicabidino, jiaie cominina jeare ñaicabitino, cominimona rana bairodino. Nana naie isoidino Jusiñamui ie cominina sedajanomo duiñeitimaci. ¹¹ Omoimona dajerie iese jaie itomoi; iadedi jiaie rafuedo birui jaidomoi. Cai Nama Jesucristo fiodailla jira, Jusiñamuidi omoi jeacinona jai oni dotade. Iena jai feitate. Ie Joreño uaido omoina ie cominina jai jaitate. Ie muidona naimiemona jai marebicaidomoi.

Jearede rafuemona abina rairui

¹² Cristo dibeimo omoi illa jira, ¿ñiese dani omoi jitaillacinodo jaiacadomoi? Diga Jusiñamui rairuiñega rafue ite. Creyentiaie iena finorede; iadedi dajerie Jusiñamui rairuiñega rafuena cai finoñelli, naiemona bue cai oñena jira. Dajerie rafuena cai finocabiñelli, naie rafue anamo cai i raillano. Dani Cristo rafue anamo cai illi. ¹³ Raitomoi: “Ñie isoide guille cai guiacania, ñie isoide rafue cai finoacania, caimona mare” raitomoi. Ero, diga rafuena finoredicai. Naiemona jeacino cai oñena jira, aimetaia, guiredicai. Jusiñamuidi cai aimetaillafue ico saitaite. Dajerie rafuena cai finoñena, naiemona jeacino cai ua jira. Jearede rafuena cai finoñellena, Jusiñamui caina finode. Cai aiñede riño diga cai illena, caina finoñede. Cai ñniñede ñima diga cai illena, caina finoñede. Cristona cai iobitallena, caina finode. Naimie jitaillacinona cai finollena, Cristo caina canoite. ¹⁴ Cristo fiodaite; iadedi fiodaillamona, Jusiñamui na ie abi diga naimiena

jillotate. Cai fiodaia, ie uaido na cai abiai diga caina ico jillotaite. Cai abi jaca illa jira, jearede rafuena birui cai finoñena.

¹⁵ Cristomo jainaiaidicai. Iena uiñotomoi. Omoi ainiañede riño diga omoi ia, naiñaiñuaimo jai duidomoi. Cristo naie isoide riñomo jaca duiñena jira, naiñaiño diga iñeno. ¹⁶ Ie aiñede riño diga bu ia, ie ai illa isoi, jai dajena jaidiaimaiai. Ie jira Jusiñamui jaie llote: “Riño diga ima illa jira, jai dajena jaidiaimaiai” llote. ¹⁷ Cai Nama Cristomo bu duia, dajena jai jaidiaimaiai. Jusiñamui Joreño iaiaimaiaimo illa jira, iaiaimaiai comeci daje isoi jai lloide.

¹⁸ Ie jirari naie jearede rafuemona abina rairui. Iesede bu finoa, jearede rafue ie abimo jai finode. Caimanide rafue ie abi diga finode. Jiaie marañede rafue bu finoa, naimie abimo jearede rafue finoñede. ¹⁹ Naimiemo omoi duillanona, Jusiñamui Joreño omoimo illana uiñotomoi. Ie illanodi omoi creyentiai. Jusiñamuimo jai jainaiaidomoi. Ie muidona omoi jitaillacinodo jaiñeno. ²⁰ Omoi jeacino facaina Cristo fiodailla jira, Jusiñamui cominina jai jaidomoi. Ie jira omoi finoca rafuemona Jusiñamuina eo iobita.

7

Pablodi ima ie aina ua rafuena ñaite

¹ Dajerie rafue cuemo jicanollena, carta cuemo navui oredomoi. Iena ja ñaiticue. Ima ie aina uana jicanotomoi. Faidaima jaca dama iacania, cuemona mare. Faidaiño jaca daño iacania, cuemona jiai mare; ² iadedi jeacino omoi finoi raillano, nagamie ie aina otana, jiai mare. Nagañaiño ie inina otana, jiai mare. ³ Naga ini ie ai diga iniacania, naimiemona naiñaiño ie abina caidiñena. Naga ai ie ini diga iniacania, naiñaiñomona naimie ie abina caidiñena. ⁴ Naiñaiño abi dañeñede; iadedi daño ie ini abimo jiai duide. Naimie abi damañede; iadedi dama ie ai abimo jiai duide. ⁵ Ie jira: “Danomo iniñeiticoco” lloñeno. Jusiñamui diga o raise ñaillena, naimiemo o comecina raise o facallena, iemo omico comeci daje isoi lloillamona, diga irui illamona danomo omico iniacañenia, jiai mare. Naie facaise fuilla meinomo riño diga o iacanamona, dane danomo ini, Taife omicom como ramo fai raillano.

⁶ Dane lloiticue. Jeacinona omoi finoi raillano, nagamie ie aina otana, mare. Nagañaiño ie inina otana, jiai mare. Iese omoimo lloticue; iadedi iese ocuiñedicue. ⁷ Ainidicue. Cue illa isoi omoi illana jitaidicue; iadedi daje isoñedicai. Jusiñamui caina itataja diese iese iticai. Dajerie ainidimaci. Dajerie airedimaci. Dajerie inidimaci. Dajerie iniredimaci.

⁸ Nia ainidinomo lloiticue. Nia inidinomo lloiticue. Feciñuaimo jiai lloiticue. Ainidicue. Cue illa isoi omoi iacania, cuemona mare; ⁹ iadedi omoi ocuiñeniadedi, aina ono. Jiaie riño diga illemo o comecina facañellena, daje riñona ono, o aina. Jiaie imamo o comecina facañellena, daje imana ono, o inina.

¹⁰ Creyentiaimo nia lloiticue. Airedinomo lloiticue. Iniredinomo jiai lloiticue. Cue uaido lloñedicue; iadedi cai Nama jaie llote: “Riño ie inina sofeñeno. ¹¹ Ima ie aina sofeñeno” llote. Iese llote; iadedi nie riño ie inina sofeia, jiaie imana naiñaiño oñena. Imana naiñaiño oiacania, ie ini diga dane abido illasa.

¹² Nia lloiticue. Cai Nama buena jaie lloñede; iadedi iena birui cue lloiticue. Omoi nairaimona creyentena damie jaide; ia naimie ai creyentena nia jaiñede. Naimie creyentena illa jira, naimie diga naiñaiño nia iacania: “Naiñaiñoña dotaño” naimiemo llono. ¹³ Omoi nairaimona creyentena dañaiño jaide; ia naiñaiño ini creyentena nia jaiñede. Naiñaiño creyentena illa jira, naiñaiño diga naimie nia iacania: “Naimiena dotaño” naiñaiño llono. ¹⁴ Ie ini nia creyentena jaiñenia, ie ai creyentena illamona, naimie diga naiñaiño nia iacania, jeacinona finoñede. Ie ai nia creyentena jaiñenia, ie ini creyentena illamona, naiñaiño diga naimie nia iacania, jeacinona finoñede. Naie creyente muidona, naie iaiaimaiai uruiaina, jiaie creyente iaiaimaiai uruiaiai isoi, omoi roracomo feiño. ¹⁵ Ie

inina creyenteñede ai sofeiacania: “Naiñaiñoña dotaño” naimiemo llono. “Naiñaiño jaillena rairuiño” naimiemo llono. Ie aina creyenteñede ini sofeiacania: “Naimiena dotaño” naiñaiñoño llono. “Naimie jaillena rairuiño” naiñaiñoño llono. Sofeia mei, jai dajemo duiñediamaia. Jusiñamui naga creyente uri illana jitaide; ¹⁶ iadedi ie ini diga ie ai fiebia, ie ini creyentenamona, naiñaiño niba creyentena jaite. Ie ai diga ie ini fiebia, ie ai creyentenamona, naimie niba creyentena jaite.

¹⁷ Iena llotiue; iadedi Jusiñamuimona ie feiñoaga uaido nagamie jailla. Creyentiaina omoi jailla facaiseconi, omoi maijuilla ramo nia raise omoi maiji. Naga creyentia illanomo biena llofuecabiticue. ¹⁸ Nia creyentiaina omoi jaiñenia, judíuai isoi omoi mona dajerie omoi abiaina detatatomoi. Naie detatafuemo omoi comeciaina birui facaño. Omoi mona dajerie omoi abiaina nia detatañedomoi. Iemo omoi comeciaina birui facaño; ¹⁹ iadedi Jusiñamui uaina omoi inuamo omoi comeciaina birui faca. Jiaie rafue baifemo faite. ²⁰ Creyentiaina omoi jailla facaiseconi, omoi maijuilla ramo nia raise omoi maiji. ²¹ Creyentiaina omoi jailla facaise omoi mona dajerie patrón anamo itinodomo. Nia patrón anamo itino isoi omoi jai. Iemo omoi comeciaina jarire facaño. Jai ruidi omoi patrón: “Cue anamo iñedomoi” raia, naimie anamona oni omoi jai; iadedi Cristo rafuedo jaca omoi jai. ²² Cristona omoi inua facaise, patrón anamo omoi mona damerie navui itomoi; iadedi Jusiñamui omoi na fetode. Naimiena omoi inuamona, omoi jeacino anamo jai iñedomoi. Patrón anamo omoi mona damerie navui iñedomoi; iadedi Jusiñamui omoi na fetode. Ie jira naimie anamo jai itomoi. ²³ Omoi jeacino facaina Jesucristo fiodailla jira, Jusiñamui omoi jeacina oni dotade. Iena jai feitate. Naimie comina jai jaidomoi. Ie jira comini jitaillacino anamo iño; iadedi Jusiñamui jitaillacino anamo i. ²⁴ Cue amatai, creyentiaina omoi jailla facaiseconi omoi maijuilla ramo nia raise omoi maiji. Jusiñamui omoi na canuanona, jearede rana omoi maijiñenia, nie isoide rana omoi maijia, Jusiñamuimona mare.

²⁵ Navui cuemo cartana oredomoi. Faidaiñuai illa rafuena uiñoiacadomoi. Cai Nama naie rafuena jaie lloña jira, iena birui llotiue. Naimie cuena duenailla jira, naimie uaina inoticue. Ie muidona comini inogamedicue. ²⁶ Birui duere omoi sefuilla facaise illa jira, omoi illa isoi omoi i. ²⁷ Omoi mona bu airenna, naiñaiñoña dotaña. Bu ainea, dama ainide. Riñoña oña; ²⁸ iadedi o ainea illena ininide riñoña o otiodena, jeacina finoñedio. Omoi mona o inina illena ainide imana o otiodena, jeacina finoñedio; iadedi ainea bu ua mei, inina bu ua mei, eo duere maijite. Iese omoi duere sefuñellena, omoi iena llotiue.

²⁹ Cue amatai, biemo omoi comeciaina faca. Jesucristo abido dane billirui iaie ite. Naimie jitailla rafuena omoi raise finollena, omoi ainiamo ite rafuemo omoi comeciaina facaja; iadedi Cristo rafuemo omoi comeciaina eo facaja. ³⁰ Omoi mona damerie sunaia, damerie caimare ia, iemo omoi comeciaina eo facaño. Damerie raruaia inibaia, naieri eo iobiño. ³¹ Omoi mona damerie bene ite rana ebiruitimaci; iadedi iemo omoi comeciaina eo facaño. Iemo omoi comeciaina eo facaia, abi juanide, Cristo rafuena omoi finollena. Cristo rafue nano finuamo omoi comeciaina eo faca.

³² Omoi comeciaina jarire iñenana jitaidicue. Nia ainidimie abi juarede, dama Cristo rafuena maijillena. Naimiena iobitaiacade; ³³ iadedi aiedimie bene ite rafuemo ie comeciaina facade. Ie ainea iobitaiacade. Naiñaiñoño ite rafuemo naimie comeciaina facade. Cristo rafuemo ie comeciaina jia facade; ³⁴ iadedi mena rafuemo ie comeciaina eo facallemo abi juanide. Ininidiñaiño abi juarede, daño Cristo rafuena maijillena. Nana naiñaiño comeciaina naimiena iobitaiacade; iadedi inirediñaiño bene ite rafuemo comeciaina facade. Ie inina iobitaiacade. Naimiemo ite rafuemo naiñaiño comeciaina facade.

³⁵ Ainea uana rairuiñedicue. Inina uana jia rairuiñedicue; iadedi omoi raise illena, naie rafuena llotiue. Cristo rafuedo omoi raise marena jaillana jitaidicue. Dani Cristo rafuemo omoi comeciaina facajana jitaidicue.

³⁶ Ero, omoimona naiñaiño oiacaga ñimamo ie moo, ie jisa caidiñeno fecaca. Naiñaiño jai moonaila jira, naiñaiño jitailla jira, naiñaiño feca. Fecaia, ie moo jeacinona finoñede; ³⁷ iadedi inina naiñaiño oiacañenia, naimie comeci llumona, ie comecina eo facajamona, ie jisa fecaacaiñenia, jiai mare. ³⁸ Ie jisana fecaia, mare. Cristo rafuena naiñaiño eo maijillena, ie jisa fecañenia, jiai mare.

³⁹ Jiaie rafuena lloiticue. Riño ie ini nia fioidañenia, naiñaiño naimiemo jaca duide. Ie ini fioidaille mei, jiaie ñimana ie ini ifomo naiñaiño oiacania, mare; iadedi creyentedimiena naiñaiño ua. ⁴⁰ Naie feciñodi ñimana ie inina oñenia, naiñaiño abi juarenite, Cristo rafuena eo maijillena. Ie muidona inirediñaiño baifemo caimare iite.

8

Jusiñamuina eruaide jiraraimo llicisi fecaja rafue

¹ Cuemo cartana navui oredomoi. Jusiñamuina eruaide jiraraimo fecaca llicisina jicanotomoi. Naie isoide llicisidi omoi riana uiñoiacadomoi. Iena ja ñaiticue. Naie jiraraina naimaci navui sedaja jira, omoimona damerie naie isoide llicisi riana: “Maraiñede” raitimaci. Creyentiaimona Jusiñamuina eruaide jirarai jamai rana illa jira, damerie naie llicisi riana: “Mare” raitimaci. Bu iese uiñoia, mare; iadedi iena uiñuamona naimie abi iedoia, naimie comecina raise facañede. Iena naimie riia, jiaie creyentiaimo comecina facañede. Jiaie creyentiaina bu isiruia, naimacimo ie comecina facade. Cristo rafuedo jiaie creyentia raise jaillana jitaide. ² “Eo abina uiñoticue” ie comecina bu facaia, nia eo raise abina uiñoñede; ³ iadedi Jusiñamuina ua cai isiruillamona, jiaie creyentiaina cai isiruia, jai abina uiñotica. Jusiñamui dinena caina jiai uiñotaacade.

⁴ ¿Ñiese Jusiñamuina eruaide jiraraimo fecaca llicisina ñaitica? “Jusiñamuina eruaide jirarai jaca cajeñenana uiñotica” raitomoi. “Jusiñamui jaca dajede. Iena uiñotica” raitomoi; ⁵ iadedi “Monamo diga sedalle ra ite” dajerie comini raitimaci. Jitomana sedacabidimaci. Fivuina sedacabidimaci. “Eniruemo diga sedalle ra ite” dajerie comini raitimaci. Taifena sedacabidimaci. Janabana sedacabidimaci. ⁶ Iena sedacabidimaci; iadedi cai dani Jusiñamuina sedacabidica. Naimiedi cai Moo. Naimiedi nana rana finode. Nana cominina comuitate. Cai Nama Jesucristo uaido iena finode. Jesucristo caina jillotate. Naimiena cai sedallena, Jusiñamui caina finode.

⁷ Jusiñamuina eruaide jiraraidi jamai rana nana creyentia uiñoñedimaci. Jusiñamuina eruaide jirarai naimaci sedauilla jira, naie jiraraimo birui fecaca llicisi naimaci riia: “Naie jirarai sedadica” naimaci comeciaina facadimaci. Naie rafue naimaci raise uiñoñena jira: “Jeacinona finodica” raitimaci. ⁸ Ero, nie isoide llicisi cai riamona, llicisi cai riñenamona, Jusiñamui caina feiñoñede. Naimiena cai ñnuamona caina feiñote. Buena cai riñenia, buena cai riia, jeacinona finoñedica. Naiemona marecinona jiai finoñedica. ⁹ Naie llicisina riredomoi; iadedi omoi ama nibai Cristo dibeimo raise iñede. Naie llicisi omoi riia, naimiemona jeacinona jai finodomoi. “Jusiñamuina eruaide jiraraina omoi nia sedadomoi” raillanomo naimie comecina facaite. Iena naimie comecina facajanona, Cristo dibeimo raise jaiñeite. Abido danomo naimie dane jaite. ¹⁰ Nibai abina uiñotomoi; iadedi Jusiñamuina eruaide jirarai illanomo omoi guillena omoi jailla jira, omoina nia Cristo dibeimo raise iñedimie cioia, nainomo jiai guisaite, comecina facajano: “Cue ama Jusiñamuina eruaide jiraraina nia sedaja jira, naiena jiai nia sedaiticue”. ¹¹ Omoi ama abido danomo jaia, omoi muidona. Cristo naimie facaina fioidaite; iadedi omoi finoca rafue muidona, omoi ama abido danomo jaite. ¹² Iese omoi finoia, omoi amana jeacinona finotatomoi. Naimie comecina ocuiñoñañedomoi. Ie muidona Cristomo jeacinona jiai finodomoi. ¹³ Cristomo jeacino cue finoi raillano, Jusiñamuina eruaide jiraraimo fecaca llicisina riñeiticue. Cue ama abido danomo dane jai raillano, naie llicisina jaca riñeiticue.

9

Cristo facaina llorainidi naimaci jitailla rana jamai feiñua

¹ Cue jitaillacinona finoredicue; iadedi Jesucristo jai oretagamiena cue illa jira, naimie jitaillacinona finoacadicue. Cuen a jaie fetua facaise cai Nama Jesúna ciodicue. Creyentiaina omoi jailla jira, cai Nama facaina cue maijiana uiñotomoi. ² Jiaie comini Jesucristo oretagamiedicuen nibai uiñoneidimaci; iadedi omoi iena uiñotomoi. Cristona omoi inua jira, Jesucristo cuena oretajana uiñotomoi.

³ Cue llofuiaçinona bu uaitaia, iese cue llofuiaçinona riidotie. ⁴ Jesucristo rafue lloraimana cue illa jira, omoi dine cue macaria, cue jitailla rana cuemo jamai omoi illa. Jiaie rafuena cue maijiñena motomona cuemo jamai omoi illa. ⁵ Cue ai cuemo itena, omoi dine naiñaiño cue diga macaria, coco jitailla rana cocomo jamai omoi illa. Omoi dine jiaie Jesucristo oretagano naimaci ainiairi macaria, omoi dine Jesucristo amatiaia macaria, omoi dine Pedro macaria, naimaci jitailla rana naimacimo jamai fecauidomoi. Ie jira, ¿niese cue jitailla rana cuemo jamai fecañeitomoi? ⁶ Jiaie llorainimo naimaci jitailla rana jamai fecacabidomoi; iadedi cue onolli diga cue maijiana nibai nia jitaidomoi. Bernabé ie onolli diga naimie maijiana nibai nia jitaidomoi. ⁷ Ero, soldadodi ie guille ibañede. Iena jamai feiñote. Naga illimo maijuidimie ie illimo maijide, naiemona naimie guillena. Naga toiniaina sedauidimiedi naimacina sedade, naimacimona ucube ie ollena. Omoi motomo cue maijia jira, cuena omoi nafuia, omoi mo Cristo rafuena llocabiticue. ⁸ Jamai comini uaido naiena llofueñedicue; iadedi Moisés micori ciegafuiaimona iena fueoticue. ⁹ Naimie micori jaie cueda: “Jusiñamui llote: ‘Jurareta trigo oni juillena saisia, iemona ie guillesa, ie fuen a mañeno. Mañenia, ie maijia fueмона guite’ llote”. Ie isoide. Omoi motomo cue maijia fueмона cue jitailla rana cuemo jamai omoi illa. Iena Jusiñamui lloia, dama juraretamo ie comecina facañede; iadedi caimo ie comecina ua facade. ¹⁰ Cristo rafuena cue llofuecabilla jira, cue llua fueмона cue jitailla rana jamai cue feiñua. Iemo ocuiridicue. Ie isoide. Ie illimo bu maijia, naiemona riera ollena, nainomo maijide. Iemo ocuiride. ¹¹ Omoi motomo Cristo rafuedo omoi raise jaillena, navui llofueticue. Ie jira cue jitailla raruaia omoi mona jamai cue ua. ¹² Omoi mona raruaia jiaie lloraini feiñocabilla jira, cuemona Cristo rafuena nano omoi cacaja jira, cue jamai jiaie feiñua; iadedi omoi mona raruaia jicañedicue.

Cue jitailla raruaia cue ollena, cue onolli diga duere maijide. Ie jira nana cue jitailla raruaia oñedicue. Cristo rafuena omoi cacaiacaiñeni raillano, omoi mona raruaia jicañedicue. Raruaia cue jicaia, omoi comeciaina nibai facaitomoi: “Raruaia oiacanano Cristo rafuena naimie llocana uite”. Ie mei Cristo rafuena cacaiacaiñeitomoi. Ie jira omoi mona raruaia jicañedicue. ¹³ Ero, Jerusalémo judíuai comini Jusiñamuina sedauilla jofo ite. Nainomo naie comini toiniaina atiuidimaci, Jusiñamuimo fecallena. Moisés micori jaie llua isoi, naimaci jeacino facaina toiniaina fajanona fecadimaci. Nainomo maijuidino comini atica toiniaimona naimaci rillena, ibajanona ocabitimaci. Iena uiñotomoi. ¹⁴ Ie isoide. Cristo rafuena llorainidi naimaci rafuena inotinomona naimaci jitailla rana imaci ua. Cristo iena jai llote. ¹⁵ Omoi mona raruaia jaca jicañedicue. Raruaia birui cue ollena, bie cartana jiaie cuedicue. Dama cuemo ite ra diga iiticue. Omoi mona iena feiñoticedena, meiruoicaida feiñotie. Omoi mona cue feiñoñena jira, omoi facaina Cristo rafue cue llua mona, abina iedotie. Raruaia cuemo jamai omoi fecaia, ¿niese abina iedoiticue?

¹⁶ Jiaie lloraini rana feiñua isoi cue feiñoia, Cristo rafuena cue llua mona abina iedoñeitie. Jusiñamui cuena oretaja jira, naie rafuena llotie. Iena cue lloñenia, Jusiñamui cuena duere finoite. ¹⁷ Dama cue comeci jitaillamona Cristo rafuena cue lloiacania, Jusiñamuimona ibana feiñoiticue. Dama cue comeci jitaillamona lloñedicue; iadedi Jusiñamui cuena oretaja jira, iena llocana jaidie. ¹⁸ Ie jira, ¿niese ibana

feñoiticue? Ibana nıbaı feñoiticue; iadedı omoımo Cristo rafue cue lloia, cuemona mare. Omoımona cue jitailla rana cue oñenia, cuemona mare.

¹⁹ Omoımona raruiaina cue feñoñena jira, omoı anamo iñedicue; iadedı dama cue jitaillacınodo jaiñedicue. Creyenteñedıno diga cue nabairillena, Cristo rafuena naimacı raise cacaillena, nana naimacı mare finocana uiga rafuedo jaidıcue. Iese jaidıcue, ailluena comına Cristo dıbeımo cue itatallena. Iese jaiñedicuedena, eo janore comıni Cristo dıbeımo nıbaı jai itataticue. ²⁰ Judıuaı comıni diga cue ia, naimacı diga cue nabairillena, naimacı mare finocana uiga rafuedo jaidıcue. Cristo dıbeımo naimacına cue itatallena, naimacı diga nabairiacadıcue. Moısés mıcorı llogacıno anamo naimacı illa jira, naie llogacıno jaidıcue; iadedı naie llogacıno cue jilloitañena jira, naie llogacıno anamo iñedicue. ²¹ Judıuaıñedıno diga cue ia, naimacı diga cue nabairillena, Moısés mıcorı llogacıno naimacı jaiñena jira, naiedo jıaı jaiñedicue. Naimacı mare finocana uiga rafuedo jaidıcue; iadedı Jusiñamui lloga uaido jıaı jaidıcue. Cristo lloga uaido jıaı jaidıcue. Naimacına Cristo dıbeımo itataiacadıcue. ²² Naimacı diga cue nabairillena, Cristo rafuena nıa raise ınoñedıno diga cue ia: “Omoı baıfemo Cristo rafuena uiñoticue” raiñedicue. Naimacına icıacaiñedicue, naimacımo jeacınona cue fınoi raillano. Naimacına cue isiruillamona, naimacına canoacadıcue. Naimacına Cristo rafuena raise ınuana itataiacadıcue. Nana comına cue canoacana jira, naimacı mare finocana uiga rafuedo jaidıcue. Cue comecına facadıcue: “Cue muidona damıerie Cristona nıbaı ınoıtımacı”. ²³ Cristo rafuena ailluena comıni ınollena, ıese jaidıcue. İena llocana jaidıcue. Naimacı ınuua jira, iobıdıcue.

²⁴ Ero, danı caı jitaillacınodo caı jaiñena. İemona omoı fueollena, jıaıe uaido lloıtıcue. Rıire aısıa rafuena omoı comıni jıfanoıa, rıire uıcodı ridıme rana ote. Ailluena comıni aısıdımacımona, damıe naie rana ote. İe ısıide. Cristo rafuena ınocana maı caı jaıllı, ıco Jusiñamui illanomo monamo ıbana nana caı feñoıllena. ²⁵ Naga aısıdıme rıire aısıllena, ıe abına maııtallena, ıe abına eenote. Maırillena, ıe abına nagarui jıaı facatacabıte. İbana feñoıllena, ıese fınode. İbana bu oıa, dallu iobıde. Ero, jeacınona caı fınoi raillano, caı abıaına caı eenua. Naimıe jitailla ısıoı caı illena, Cristo rafuemo jıaı caı facacabılla. Monamo caı rıllanona, ıbana caı feñoılleımo, jaca iobıtıcaı. ²⁶ Rıire aısıacadıme ebena aısıñede. Onollı diga mena ıaımaıaı jamaı jıfanoıa, jafaıcına jamaı ducoıñediımaıaı; iadedı conımana ducoıdıaımaıaı. İe ısıide. Cristo rafuedo raise cue jıacania, jamaı ebena jaiñedicue; iadedı nana cue comecımona ıedo jaidıcue. ²⁷ Cue comecına raise sedadıcue. Dama Cristo rafue anamo ıacadıcue. Dama ıena ınoıacadıcue. Ja muidomo ıbana cue feñoıllena, ıese fınodıcue. Jıaıe comınoımo Cristo rafuena llofuecabıtıcue; iadedı monamo ıbana cue feñoıllena, cue comecına raise sedadıcue. İemona omoı fueua.

10

Jiraraına sedañena rafue

¹ Cue amatıaı, bıe rafuena feıtañeno. Caı jıaıagaı mıcorıaı fınoıa rafuemona fueoıtıcaı. Egipto raılla enıruemona naimacı bılla meı, jofue iñenanomo naimacı macarıa, naie diga naimacına fıollena, Jusiñamuidı monamo uıllıe itatate. Naie uıllıe anado nana jaisoidımacı. Jıaırede raılla monaıllai ruıca naimacı jıacania, Jusiñamuidı naie monaıllai onı ñaıjıtate, safefodo nana naimacı ruıca jaıllena. ² Naie ısıide rafue nana naimacımo suıllanona, Moısés mıcorı dıbeımo raise duıdımacı. Naimıe anamo itabıdımacı. ³ Jofue iñenanomo naimacı illa jira, Jusiñamui nana naimacına ecade. Nainomo guılle iñena jira, monamona bıte guılle rana nana guısoidımacı. ⁴ Nainomo jınuı jıaı iñena jira, Jusiñamui llua jira, Moısés mıcorı nofıcına butajamona, toıde jınuına nana jırodımacı. Naimacı nıne macarıa, Cristona cıoıñedımacı; iadedı naimacı diga naimıe jaca ıte. Naimacı diga naimıe illa jira, nana naimacı facaına, diga sıño rafuena fınocabıde; ⁵ iadedı Jusiñamuına naimacı ınoñena jira, naimıedi naimacı diga ıcırıte.

Naimaci diga naimie icirilla jira, jofue iñenanomo Jusiñamui ailluena naimaci micoriaina fiodaitade.

⁶ Cai jaiagai finoca rafuemona cai fueua. Maraiñede jearede rafuena naimaci finua isoi ebiruiño. Abimo omoi oño. ⁷ Jusiñamuiñedimiena sedaño. Cai jaiagaimona damerie juraretana eruaide rana jaie sedajano raitimaci: “Bie radi cai Jusiñamui”. Rafuena finodimaci, naie rana sedallena. Eo guitimaci. Ie mei iraisitimaci. Ie jira Jusiñamui naimacina duere finode. Naimaci finoca rafue isoi abimo omoi oño. Jusiñamuiñedimiena omoi sedaño. ⁸ Naimaci jearede rafuena finodimaci. Naimacimona damerie naimaci aiñede riñoniai diga itimaci. Ie jira naimacimona daruidemo veintitrés mil comini fiodaitimaci. Jusiñamui naimacina fiodaitade. Naimaci finoca rafue isoi abimo cai oño. ⁹ Cai jaiagaimona damerie Jusiñamui Joreña ñaitimaci. Naimaci guisoiga radi Jusiñamuimona bite. Naiena ñiamona, Egiptomo ite guillemo comeciaina facadimaci. Ie muidona naimiena ricaitadimaci. Ie jira Jusiñamuidi jaioniaina naimacina ainitate. Iemona ailluena fiodaitimaci. Naimaci finoca rafue isoi abimo cai oño. Jusiñamuina ricaitaño. Cristona cai nia iñoña facai finoca rafuemo cai comeciaina facaño. ¹⁰ Cai jaiagaimona damerie Jusiñamui facaina lloraini joreñuaina ñaitimaci. Ie jira Jusiñamuidi ie jaienicina oretate, naimacina meinetasillena. Naimaci finoca rafue isoi abimo cai oño. Jusiñamui facaina lloraini joreñuaina cai ñaiño.

¹¹ Nana naie rafue naimacimo suide. Cai facaina Moisés micori iena jaie cuete. Iemona birui cai fueua, naimaci isoi cai finoi raillanona. ¹² Naie isoide rafue omoimo suiñellena, omoi abiaina rairui. Omoi comeciaina nibai facadomoi: “Cristona cai eo raise iñua jira, iena finoñeiticai” comeciaina facadomoi; iadedi omoi abiaina omoi rairuiñenia, jeacinona finoitomoi. ¹³ Taife ramo omoimo faicabilla isoi, nana jiaie creyentiaimo ie isoi ramo faicabite. Iena feitaño. Jusiñamuidi iñogamie. Ie muidona omoi comeciaini ocuillacino baifemo Jusiñamuidi Taife omoimo ramo faiana rairuite. Naiemona omoi jilloillena, Taife uai omoi iñoñellena, Jusiñamuidi omoina canoite.

¹⁴ Cue amatai, Jusiñamui omoina canuamona, Jusiñamuiñedimie facaina finoca rafuemona oni i. ¹⁵ Abina uiñotomoi. Ie jira omoimo cue lluacinona omoi cacaja mei, iemo omoi comeciaina omoi faca. ¹⁶ Ero, Cristona cai sedallena, roracomo danomo oficabidicai. Naimie fiodailla rafuena cai comecillena, janore vino jiruamona, janore llomenicono guiticai. Jusiñamuimo iobillacinona nano fecadica. Ie mei janore vino jirodica. Iena cai jiruamona, Cristona cai nabaillana uiñotica. Cruzmo Cristo fiodailla jira, naimiena nabaidica. Naie facaise llomenicono cai taiñuamona, naimiena cai nabaillana uiñotica. Cristo fiodailla jira, iese itica. ¹⁷ Diga creyentiaidica; iadedi daje llomenicomona jaca guitica. Daje llomenicomona cai guilla jira, dajena Cristomo cai duillana uiñotica.

¹⁸ Ero, judíuai raila cominimona cai fueua. Naimaci jeacino facaina iba oñellena, toiniaina faja mei, Jusiñamuimo fecacabidimaci. Ie mei iena ritimaci. Iena naimaci riamona, Jusiñamuina nabaidimaci. Jusiñamuina iobitadimaci. ¹⁹ Omoi illanomo Jusiñamuina iñoñedinodi Jusiñamuina eruaide jiraraimo guillena fecacabidimaci. Cai creyentiaidicaimona naie guilledi jamai guille. Naie jiraraidi jamai ra. Cajeñede; ²⁰ iadedi Jusiñamuina iñoñedinomona jamai rañede. Naimacimona nanoca ra. “Iemo rille cai fecajia, cai moona sedadica” raitimaci; iadedi naie ramo naimaci comeciaina facañedimaci; iadedi imaci moomo comecina facadimaci. Ero, Jusiñamuiñedimie comecina fecadimaci. Taifemo naie guille fecacabidimaci. Taifena iobitadimaci. Jusiñamuimo fecañedimaci. Naimaci diga omoi jaia, Taife diga jai nabairitomoi. Taife diga omoi nabairillana jitaiñedicue. Taifemo omoi duillana jitaiñedicue. ²¹ Rollena omoi ofia, Cristo fiodaillana omoi comecillena, nainomo omoi jiruamona, nainomo omoi guillamona, Cristona nabaidomoi. Comini rafue dine omoi jaillamona, Taifena nabaidomoi. Cristo diga, Taife diga, daje facaina nabairinidomoi. Iese omoi finoa,

maraiñede. ²² Iese omoï finoia, Jusiñamuina jai iciritaitomoi. Naimiena omoï icia, ¿niese naimie riicaillafuemona jilloitomoi? Jaca jilloñeitomoi.

Jiaie creyentaina canocana cai jailla

²³ Ero, Jusiñamui dibeimo omoï illa jira, ¿niese dani omoï jitaillacinodo jaiacadomoi? Diga Jusiñamui rairuiñega rafue ite. Creyentiai iena finorede; iadedi dajerie Jusiñamui rairuiñega rafuena cai finoñelli, naiemona bue cai oñena jira. Iena cai finoia, cai amana Cristo dibeimo itatañedicaï. Iena cai finoia, cai amana Cristo rafuena ñnotacana jaiñeiticaï. Naimiena ramo faicana uitataticaï. ²⁴ Omoïmona nagamie dama naimiemo ite rafuemo comecina facañena; iadedi naga jiaie creyentemo ite rafuemo ie comecina jiai facaja.

²⁵ Ero, ninena o llicisina omoï ibaia, Jusiñamuiñedimie mo naie llicisina fecajana jicanoñeno; iadedi jicanoñeno iena jaricitaiñeno rino. ²⁶ Iena David micori jaie cuega: “Jusiñamui bie eniruena finode. Nana rana finode. Cai guillena, cai guille rana nana comuitaga” cuega. Ie jira ¿niese fimaiticaï? Naimie mare finoca rana cai rïia, jeacinona finoñedicaï.

²⁷ Ero, naimie diga o guillena Cristona ñnoñedimiedi ona uaidoia, naimie ñne o jaiacania, naimie ñne guisai. Nana omo ecaja guillena guiño. Jamai uainino guiño. “¿Ñinena ibadio bie llicisina?” jicanoñeno. O comeci jarire finoñeno; ²⁸ iadedi Cristona raise ñnoñedimie nainomo jiai guitemo, omo lloia: “Bie llicisidi Jusiñamuiñedimie mo jai fecaca llicisi”, iena o riñeno. Iena o rïia, Cristona raise ñnoñedimie comecina facaite: “Jecinona finodio. Taifemo fecaca llicisina ritio. Creyentedimie iena riñede” comecina facaite. O isoi naie llicisimo naimie comecina facañede. O raitio: “Naie llicisidi jamai llicisi” raitio; iadedi naimie raite: “Naie llicisi Taife ie” raite. Ie jira naie creyentena o canollena, naiena riñeno. ²⁹ Naimie comecina facajacinodo cai jaiñenamona, nana Jusiñamui comuitaga guillena guiredicaï; iadedi Cristona nia raise ñnoñedimie mona nana guinidicaï; iadedi naimie comecina facajacinodo jaiñedicaï. ³⁰ Cai guia, Jusiñamui mona naie guille comuitaja jira, Jusiñamui mo iobillacinona fecadicaï; iadedi cai guillamona damerie cai joreñona ñaiamona, iena guiñeiticaï. ³¹ Omoï mo iena nia lloiticue. Nie isoide rana omoï guia, nie isoide rana omoï rïia, nie isoide rana omoï jiroia, nie isoide rafuena omoï finoia, nairi Jusiñamuina iobita. ³² Jusiñamuina nia ñnoñedino canocabi, naimie uaina naimaci cacaillena. Jusiñamuina jai ñnotinona jiai canocabi, naimaci abido danomo uaiñellena. ³³ Buena cue finoia, nana cominimo cue comecina facadicue. Ie jira nagarui cue jitaillacinodo jaiñedicue; iadedi Cristo rafuena naimaci ñnollena, nana cominina canocana jaidicue.

11

¹ Cristo lloga rafuedo jai jaidicue. Cue isoi omoï jai.

Roracomo riñoniaï illa rafue

² Cuenia nia feitañedomoi. Cristo oretagano jaie llogacinona omoïna llofueticue. Cue llofueuillacinodo nia jaidomoi. Ie jira omoïri iobidicue; ³ iadedi jiaie rafuena nia lloiacadicue. Cristo ie Moo anamo ite. Naga ñma Cristo anamo jiai ite. Nagamie ai ie ñni anamo ite. Omoï afemo itino uaina omoï ñnoñenia, maraiñede. ⁴ Roracomo omoï comini oficabia, ie ñni anamo ie ai illa jira, omoï comini finocabilla isoi, naga riño ie ifogimo ñniroina bicuano jailla. Iese naiñaiño bicoñenia, ie ñni anamo naiñaiño ññede isoi eruaide. Jusiñamui diga nie ñma ñaia, Jusiñamui uaina nie ñma jino lloia, naimie ie ifogi icona jitañeno, Cristo anamo naimie illa jira. Naie facaiseconi ie ifogi icona jitajia, Cristo afemo itena eruaide. ⁵ Nie riño Jusiñamui diga ñaia, Jusiñamui uaina nie riño jino lloia, ie ifogimo ñniroina bicoñeno jaia, ñma isoi naiñaiño iacana jira, ie ñni afemo illana eruaide. Ie ñni anamo iacaiñena jira, ie ñnino meidaitade. ⁶ Nie riño ie ifogimo ñniroi bicoñeno jaiacania, ñma isoi eruaillena, ie ifogidi rijiruda gareca. Iemona naiñaiño meidaillamona, ie ñni

anamo illamona, ie ifogimo iniroina bicuano naiñaiño jaite. ⁷ Jusiñamui diga naimie ñaia, Jusiñamui anamo naimie illa jira, iima ie ifogi icona jitañena. Jusiñamui naga iimana comuitate. Iimana naimie finuamona, naimiena cai iobitajamona, Jusiñamui cai afemo illana uiñoticaí. Ie inina iobitajamona, naiñaiño afemo ie ini illa jira, riño ie ifogimo iniroina bicuana jailla. ⁸ Ero, Eva micorimona Adán micori comuiñede; iadedi ie ini micorimona ie ciraiofemona naiñaiño micori comuide. ⁹ Naiñaiño anamo illena naimie comuiñede; iadedi naimie anamo illena naiñaiño comuide. Naimie uai inollena, naimiena canollena, naiñaiño comuide. ¹⁰ Ie ini anamo naiñaiño illa jira, riño ie ifogimo iniroina bicuano jailla. Naiñaiño iese ia, naiñaiño naimaci cianona, Jusiñamui jaienisaímona jiaí mare. ¹¹ Naga riño ie ini anamo ite; iadedi Cristona cai inua jira, riño baífemo iimadi faíñede. Iima baífemo riño jiaí faíñede; iadedi daimaiaí conimana iaímaiaí canua. Cristo naga iimana, naga riño daje isoi feiñote. ¹² Naga comini Jusiñamui comuitaga. Nano facaiseconi Adán micorimona Eva micorina jaie comuitate; iadedi birui naga iima riñomona comuide.

¹³ Biemo omoi comeciaina omoi faca: Omoi roracomo Jusiñamui diga nie riño ñaia, omoi einamaci finocabilla isoi, ie ifogina bicoñeno jaia, ¿niese omoi comeciaidi raite? Cue comeci: “Maraiñede” raite. Ie ini anamo naiñaiño iñedena eruaide. ¹⁴ Nana omoi biesedena raicabitomoi: “Nie iima ie ifotirai eo areniadedi, cai cominimona maraiñeno cide; ¹⁵ iadedi nie riño ifotie eo arenia, mare” raicabitomoi. Naiñaiñuai ieri iobidimaci. Jusiñamui iena sicotajamona, naiñaiño ifotie ie ifogina raise ibaide. ¹⁶ Iena jaca llofuecabiticue. Jiaie creyentiaí illanomo cue isoi comeciaina lloidimaci. Omoimona bu cue llogacinona uaitaiacania, damamei ite.

Cristo fiodailla rafuena raise comeciñedimaci

¹⁷ Jiaie rafuena lloiticue. Omoi maraiñede finocabilla rafuena jai fididicue. Cristona sedallena omoi oficabia, Cristo rafuena inocana jaiñedomoi; iadedi naiemona maraiñede rafue comuide. ¹⁸ Rollena omoi oficabia, omoi comeciaina daje isoi lloiñenana jai fididicue. ¿Bue ñellena omoi comeciaina daje isoi lloiacaiñedomoi? Naie rafuena omoi diga ja ñaiacadicue. Omoi oficabia, nagamiaí guillena aticabidomoi. Mare; iadedi danomo guiñedomoi. Omoimona damierie ucuberena jira, duedino diga guiacaiñedomoi. Omoi guille caididomoi. ¹⁹ Omoi iese illana jitaíñedícue; iadedi daje isoi omoi comeciaina lloiñenamona, Jusiñamui díbeimo raise itinodi uiñoga. Omoimona damierie danomo omoi guillamona, Jusiñamuina omoi isiruillana uiñoticaí. ²⁰ Cristona sedallena omoi oficabia, guitomoi; iadedi vino jiruanona, llomeniconna guillanona, cai Nama fiodailla rafuena raise comeciñedomoi. Maraiñede rafuena omoi finua jira, iena nia lloiticue. ²¹ Nagamiaí guillena aticabidomoi. Dani coniniri raise guiñedomoi. Danirie omoi atica guillena guitomoi. Jiaínona guillena iñedomoi. Damierie omoimo ailluena guille ite. Damierie omoimo guille raise iñede. Jiaínona guillena omoi iñena jira, damierie jaca aimetaitimaci; iadedi jiaíno monidimaci. Damierie guilla motomo jiaí jifaidimaci. Conini nabaiñedomoi. Ie jirari Cristo fiodailla rafuena raise comecinidomoi. ²² Ero, omoi jofue ite, jamai guillena. Omoi oficabia, ¿bue ñe guillaredomoi? ¿Bue ñe jiaínono guille fecaacaiñedomoi? Jiaie creyentiaína omoi isiruiñenamona, Jusiñamuina jiaí isiruiñedomoi. Janore guille itinona duere finodomoi, naimacina omoi ecaacaiñena jira. Iese omoi illa jira, omoi iobiñedícue.

Cristo fiodailla rafuena llofuicino

²³ Navui omoína biena llofueitícue; iadedi omoi raise inoñena jira, iena dane llofueitícue. Cai Nama iena cuemo jaie llote. Cai Nama Jesús ie gaitatajarui facaiseconi, ie llofueoicaigano diga ia, naimaci guia, llomeniconna llinote. ²⁴ Iena llinuanona, Jusiñamuimo iobillacinona fecade. Ie mei iena tairuanona raite: “Mai, biena guiño. Bie llomenicodi omoi guillamona, cue fiodaillana omoi comeci. Cue fiodaillemona omoi jeacinomona jilloitomoi. Biena omoi guillamona cuena comeci. Bie llomenicodi cue abi

facai ie. Cue llua isoi iena omoi finocabi” raite. Ie mei iena guitimaci. ²⁵ Ie mei jirora-como jai totaca vino Jesús llinuanona, Jusiñamuimo iobillacinona fecade. Ie comecina facade: “Adán micori facaisemona cominina imaci jeacino facaina Jusiñamui duere finoñellena, toiniaina atuidimaci, naimiemo fecallena”. Iemo ie comecina facajano, raite: “Cue fiodaillemona, dama cue diaillemona, Jusiñamuidi omoimo jiaie rafuena birui llote. Omoi jeacinona oni dotajana llote. Bie vinodi naie rafue facai ie. Cue llua isoi, bie vinona omoi jiruamona, cuena comeci. Mai, iena jiro” raite. Ie mei jirodimaci. ²⁶ Naga icaiño Cristo facaina llomeniconona omoi guia, Cristo facaina vinona omoi jiroia, omoi jeacino facaina cai Nama fiodaillana uiñotomoi. Naimie nia abido dane bille dinori naiena comeci.

Cristo fiodailla rafuena raise comeci acadica

²⁷ Cristo fiodailla rafuena raise comeci. Naie llomeniconona Cristo rafuedo raise jaiacaiñedimie ebena guia, Cristo rafuedo raise jaiacaiñedimie naie vino ebena jiroia, iena jamaide. Naimie jeacinomona Cristo naimie jilluana naimie ñnoñena jira, Cristomo jeacinona finode. ²⁸ Jeacino omoi comeciaino illamo omoi comeciaina faca. Jeacino omoi comeciaino ia, iena guiñeno. Iena jiroñeno. Jeacino omoi comeciaino iñenia, iena guiño. Iena jiro. Jeacino ia, Jusiñamuimo iena llono. Jiaimie diga nicino ia, iena raise fino. Ie mei iena guiño. Iena jiro. ²⁹ Jeacino naimie comecimo nia illamona, iena guia, iena jiroia, marañede. Naimie jeacino facaina Cristo fiodailla jira, Cristo fiodaillana naimie jai jamaide. Ie muidona Jusiñamui naimiena duere finoite. ³⁰ Ie muidona omoimona ailluena irareside. Ie jira omoimona damierie fiodaite. ³¹ Cai comeciaina raise cai facajamona, jeacinona cai fañonocaia, Jusiñamui caina duere finoñeite. ³² Jusiñamui caina birui duere finoia, caina naimie dibeimo raise illena itataiacade. Jesucristo abido bia, naimiena ñnoñedinona duere finoite. Naimaci diga cai duere sefuiñellena, birui caina duere finode.

³³ Cue amatiai, Cristo fiodailla rafuena omoi comecillena omoi ofia, daacaiño omoi guillesa, jiaino riñedinona seda. ³⁴ Bu eo aimetaia, jofomo nano guilla. Guillanona omoi ofillinomo bi. Dani coniniri raise omoi guiacaiñenia, Jusiñamui omoina duere finoi raillano, jofomo guiño. Nana naie rafuena nia lloñedicue; iadedi omoi dine dane cue ia, iena lloiticue.

12

Cristo facaina raise maijillena, Jusiñamui Joreño naga creyentena canode

¹ Cue amatiai, jiaie rafuena cuemo jai jicanotomoi. Iena ja ñaiticue. Jusiñamuimona diga uaina feiñotica. Naimiemona naimie facaina maijia uaina feiñotica. Naimie facaina cai maijillena, jiaie creyentaina cai canollena, naimiemona cai oga uaina ñaiticue. Iena omoi raise uiñuana jitaidicue.

² Ero, Cristona nia omoi ñnoñenia, Jusiñamuiñedimiede jiraraina sedauidomoi. Iedo jaietainodo jai-jaisoidomoi. Taife iedo omoina jifute. ³ Ie jira biena omoi raise uiñuana jitaidicue. Jusiñamui Joreño uaido nie creyente ñaia, Jesús Joreñoña jeare ñaiñeite. “Jesúdi Jusiñamui Jitoñede” rañeite; iadedi Jusiñamui Joreño uaido nie creyente ñaia: “Jesúdi Jusiñamui Jito” raite. “Jesús cue Nama” raite. Naie isoide creyentedi Jusiñamui ie. Naimiemo cacarei; iadedi iese rañedinona cacareiñeno.

⁴ Jusiñamui Joreño caimo jai illa jira, Jusiñamui Joreñomona cai maijia uaina otica. Naga creyente daje isoi oñedica. ⁵ Naga creyente Cristo facaina daje isoide uai diga maijinedica; iadedi Cristo facaina nana maijidica. ⁶ Jusiñamuidi diga uai llua motomo naga creyentena maijitate, naimie jitailla rafuena naimaci finollena. ⁷ Jusiñamui Joreño naga creyentemo jai illanona, naga creyentemo ie uaina itatate. Conini naga creyentena naimaci canollena, ie uaina itatate. Iemona Jusiñamui Joreño caimo jai illana uiñotica. ⁸ Damierie creyentemo Cristo rafue jino lolle uaina itatate. Damierie

creyentemo Cristo rafue llofuelle uaina itatate. ⁹ Damierie creyentemo Jusiñamui siño rafue finuana ñnotaja uaina itatate. Damierie creyentemo duidinona jillotaja uaina itatate. ¹⁰ Damierie creyentemo siño rafuena finua uaina itatate. Damierie creyentemo jino lolle uaina itatate. Naimacimo Jusiñamuidi ie rafuena llocabite, jiañnomo jino llollena. Dajerie creyentemo uaina itatate, nie isoide uaido Cristo rafuena raila lloraïma lluaña uañollena. Jusiñamui Joreño uaido nie lloraïma lloia, iena uañote. Taife uaido nie lloraïma lloia, iena jiaï uañote. Damierie creyentemo naimaci uañonega uaido ññaia uaina itatate. Damierie creyentemo naie uañonega uai oni dobaiñolle uaina itatate, comini iena raise uañollena. Iena naimaci ñaï dobaiñoneña, iena jiaï raise uañoneñimaci. ¹¹ Naga creyentemo itatate uaina Jusiñamui Joreñomona bite. Naimie jitailla isoi, naga creyentena ie uaina itatate.

Cristomo dajena duidicai

¹² Cai abimo diga ra ite. Cai jefo ite. Cai uisi ite. Cai onolli ite. Cai eilli ite. Diga ra ite; iadedi cai abidi jaca dajede. Dajemo duide. Ie isoide. Diga creyentiaidicai; iadedi dajena Cristomo duidicai. ¹³ Dama Jusiñamui Joreñodi dajena Cristomo nana creyentiaidicaidi duidicai. Dajerie juduaidicai; dajerie juduaidicai; dajerie patrón anamo iticai; dajerie patrón anamo iñedicai. Diga nairaiaidicai; iadedi dajena Jusiñamui Joreñona nana feiñoticai.

¹⁴ Cai raise maijillena, cai raise illena, cai abimo diga ra ite. Naga ra dama oni eneno inide. Ie isoide. Cristomo dajena cai duillanona, diga creyentiaidicai; iadedi Cristo facaina dajena maijidicai. ¹⁵ Ero, cai abimona cai eilli ñibai facaite: “Onolli isoiñedicue. Onolli cue baiñfemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Onolli eilli baiñfemo fañede. Dafaconi ite. ¹⁶ Ero, cai jefo ñibai facaite: “Uisi isoiñedicue. Uisi cue baiñfemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Uisi jefo baiñfemo fañede. Ie isoide. Dajena Cristomo omoi duilla jira: “Jiaimie baiñfemo iticue” raiñeno. Jiaie creyentena abina uradoiñeno. ¹⁷ Ero, dama uisi cai abimo itena, cai jefo iñedena, jiaie ra cai abimo iñedena, ¿ñiese rana cacaiticai? ¿Ñiese niadedi ra sorillana cacadicaï? Ie isoide. Dajena Cristomo omoi duilla jira, naga creyentena jitaïdomoi, Cristomo dajena ñnocana omoi jaillena. Jiaie creyentena uaitañeno. ¹⁸ Jusiñamui cai abimo diga rana comuitate. Naimie jitailla isoi, cai abimo naga rana comuitate. ¹⁹ Cai abimo diga ra iñedena, ¿buedo cajeniticaï? ²⁰ Diga ra cai abimo ite; iadedi jaca dajede cai abi.

²¹ Rana cai cioillena, cai uisi ite; iadedi cai onolli iñedena, cai ciua rana llinonidicai. Ra feitañellena, cai comeci ite; iadedi cai eilli iñedena, macarinidicai. Ie isoide. Cristomo dajemo cai duilla jira, naga creyentena dajena ñnocana jaillana jitaïdicai. Jiaie creyentemona abina iedoñeno. ²² Naga cai abimo ite rana jitaïdicai, raise cai illena. Naga cai abimo ite ra jiaie ra baiñfemo iñede. Nana daje isoi itena, mare; ²³ iadedi dajerie ra ebire eruaillena, cai abi jifollena, ñniroina jitaïdicai. Meiruiñellena, cai abi bainillena, ñniroina jiaï jitaïdicai. ²⁴ Cai uiecomo meiredino iñena jira, iena jifoñedicai. Ero, Jusiñamui cai abina finode. Dajerie ra jiaie ra baiñfemo iñede. ²⁵ Jusiñamuidi naga cai abimo ite ra dajena maijiana itatate. Dajena maijicana jaide. ²⁶ Cai abimona daje ra isireniadedi, nana cai abi daacaiño isirede; iadedi cai abi caimare marena ia, nana iobidicai. Ie isoide. Cristomo dajena duidicai. Jiaie creyente duere sefua, naimiena cai canoia, Cristo ñibeimo caimare marena iticai. Naimiena cai canoñenia, caimare marena iñedicai.

²⁷ Ero, caidi naimie cominina jira, Cristomo dajena nagasaiaï duidicai. ²⁸ Ie jira Jusiñamuidi naimiena ñnotinomona damieriena nano fetuanona, Cristo naimacina oretate, ie rafuena llollena. Ie mei jiañnona fetode, naimacimo ie rafuena llua mei, jiañnomo ie rafuena jino llollena. Jiañnona fetode, ie rafuena llofuellena, cominina ie rafuena raise uañotallena. Jiaño ie uaina itatate, naimie facaina naimaci maijillena, jiaie creyentiana naimaci canollena. Damierie creyentemo siño rafuena finua uaina itatate.

Damieriemo duidinona jilloitaja uaina itatate. Damieriemo jiaie cominina canua uaina itatate. Damieriemo jiaie cominina sedaja uaina itatate. Ja muidomo damieriemo naimaci uiñoñega uaido ñaia uaina itatate. Iese omoina fetode, naimie facaina dajena nana omoi maijillena. ²⁹ Ero, Jusiñamui nana omoina fetode, ie rafuena jino lollena. Damieriena fetode. Nana omoina fetode, ie rafuena llofuellena. Damieriena fetode. Nana omoina fetode, siño rafuena finollena. Damieriena fetode. ³⁰ Nana omoina fetode, duidinona jilloitallena. Damieriena fetode. Nana omoina fetode, omoi uiñoñega uaido ñaillena. Damieriena fetode. Nana omoina fetode, naie uiñoñega uai jino dobaiñollena. Damieriena fetode. ³¹ Naga creyentemo Jusiñamuidi ie maijia uaina itatate; iadedi damierie uai jiaie uai baiñemo ite. Iena omoimo illena, Jusiñamuimo jica; iadedi jiaie rafuena omoi ollena, omoimo lloiticue. Nana jiaie rafue baiñemo ite. Jiaie cominina omoi isiruillena lloiticue.

13

Nana jiaie cominina cai isiruillafue

¹ Cai uiñoñega uaido ñaia uaina cai ñaia, Jusiñamui jaienisaí isoi cai ñaia, cominina cai isiruiñenia, jamai ñaiafuena ñaiticai. ² Jusiñamui rafue jino lolle uaina caimo ia, nana Jusiñamui caina uiñotaga rafuena cai uiñoia, nana Jusiñamuimo ite rafuena cai uiñoia, Jusiñamui siño rafuena finuana cai eo inoia, cominina cai isiruiñenia, Jusiñamuimona jamai bue isoidicai. ³ Jiaie cominina cai canollena nana caimo ite rana cai fecai, Cristo rafuena cai lollena cai niadi fiodaia cania, cominina cai isiruiñenia, jaca buena oñedicai. Jusiñamuina jaca iobitañedicai.

⁴ Cominina cai isiruia, naimaci diga raire iciriñedicai. Naimacina canocabidicai. Naimaciri abina uradoñedicai. Abina birioicaiñedicai. ⁵ Cominina cai isiruia, abina iedoñedicai. Naimacimo cai comecina facacabidicai. Cai rana caidicabiñedicai. Naimaci diga iciricabiñedicai. Naimaci caina jeare finoia, ibana ocabiñedicai. ⁶ Cominina cai isiruia, naimaci jeare finoca rari iobicabiñedicai. Naimaci uanai mare finoca rari iobicabidicai. ⁷ Cominina cai isiruia, naimaci caina duere finoia, ibana ocabiñedicai. Cai joreña bu ñaia, caina taino lloia, iena inocabiñedicai. Cai marena illamo ocuridicai. Cai comecina ocuridicai.

⁸ Jusiñamuidi cominina jaca cai isiruillana jitaide; iadedi caimo ie rafuena jino lolle uaina jaca itatañeite. Naie uaidi ico saite. Caimo cai uiñoñega uaido ñaia uaina jaca itatañeite; iadedi naie uai ico saite. Caimo ie llofuelle uaina jaca itatañeite; iadedi nai uai ico saite. ⁹ Nana Jusiñamui caina uiñotagacinona nia raise cacaiñedicai. Nana Jusiñamui rafuena nia raise jino lloñedicai; ¹⁰ iadedi Jesucristo dane abido bia, Jusiñamui Joreño caimo itataja uaidi saite. Naimie diga cai illemona naimiena raise uiñoiticai. Naimiemo ite rafuena jiai raise uiñoiticai.

¹¹ Jiaie rafuedo iena llofueticue. Jiaie nia cue uruenia, urue isoi ñaiticue. Urue isoi comecina facadicue; iadedi eimiena cue jaillamona, urue isoi jaiñedicue. Cue uruenamona ite rafuena fainonocaidicue. Eimie comecina facajacinodo birui jaidicue. Urue isoi Jusiñamui rafuena birui janore uiñoticaí; iadedi monamo cai ia, eimie isoi iena raise uiñoiticai. ¹² Ero, jaciae acaranimona cai joreñodi raise bainide. Ie isoide. Jusiñamuimo ite rafuena nia raise uiñoñedicai. Iena raise cacaiñedicai; iadedi Cristona ico cioiticaí. Naimiemo ite rafuena birui janore cacadicue; iadedi naimie dine cue ria, Jusiñamui cuena jai uiñua isoi, jiai raise uiñoiticue. ¹³ Ja muidomo lloiticue. Jesucristo billanona, Jusiñamui Joreñomona caimo ite uaidi saite; iadedi Jusiñamui llogacinodo jai abina inoticaí. Naimie llogacino suillemo jai ocuridicai. Jusiñamuina cai isiruillamona, jiaie cominina jiai isiruiticaí. Naie isiruillacino jiaicino baiñemo faite. Ie jira coninina isiruicana omoi jai.

14

Omoi uiñoñega uaido omoi ñaia rafue

¹ Nana cominina isiruicana mai omoi jai. Jusiñamui Joreñomona bite maijia uaina uana omoi nicido. Jusiñamui rafuena jino lolle uaina ua nicido. ² Ero, omoi uiñoñega uaido ñaia uaina omoi ñaicabia, jaca buna omoina cacaiñena jira, cominina canollena ñaiñedomoi; iadedi Jusiñamuina iobitallena ñaitomoi. Omoi uiñoñega rafuena omoi comeciamaona ñaitomoi. ³ Jusiñamui rafuena jino omoi lloia, cominina canodomoi. Naimacina Jusiñamuina inotadomoi. Naimie dibeimo raise itatatomoi. Naimaci comeciaina ocuiñotadomoi. ⁴ Nana creyentiaina canodomoi; iadedi naie uiñoñega uaido omoi ñaia, dani omoi comeciaina canodomoi.

⁵ Rollena omoi oficabia, naie uiñoñega uaido omoi ñaia, cuemona mare; iadedi Jusiñamui rafuena jino omoi lloia, cuemona ua eo mare. Naie jino llua uaidi naie uiñoñega uai baifemo faite. Naie uiñoñega uaido omoi ñaia, nana creyentiai iena raise cacareillena, iena omoi oni dobaiñoia, cuemona jiai mare. Ie mei naie ñaiamaona, Jusiñamui rafuena naimaci cacajamaona, creyentiaina canodomoi. ⁶ Cue amatiai omoi dine cue jaiacanana uiñotomoi. Omoi dine cue ria, cue uiñoñega uaido cue ñaiticuedena, omoina canoñedicue; iadedi Jusiñamui cuemo jai lloga rafuena omoimo cue lloticuedena, omoina canodicue. Jusiñamui rafuena raise cue jai uiñua jira, omoina cue llofueticuedena, omoina jiai canodicue.

⁷ Ero, quena jamai tainuaido bu fia, ie figana uiñoñedicai. Guitarra bu jamai tainuaido taia, ie taillana uiñoñedicai. ⁸ Ejércitomo trompetana jamai tainuaido fia, soldaduai maijillena raise uiñoñedimaci. ⁹ Ie isoide. Cai cacaiñena uaido omoi ñaia, omoi ñaiana uiñoñedicai. Iese omoi ñaia, jamai tainona ñaite isoi cacadicai. ¹⁰ Eo ailluena nairaii ite. Naga nairai ie uai ite dani naimaci ñaillena; ¹¹ iadedi nie nairai ie uaina cue uiñoñenia, naimacimona jiaie nairai imiëna eruaidicue. Cuemona naimaci jiaie nairaina eruaidimaci. Conini diga ñaiana cacaiñedicai. ¹² Ie isoide. Jusiñamui Joreñomona bite ñaia uaina omoi eo jitaillanona, diga uaina Jusiñamuimo jica, dani conini Cristo rafuena inocana omoi jaillena. Jusiñamui Joreñomona dani daje uaina nicidoño; iadedi nana nicido.

¹³ Ie jira ie uiñoñega uaido bu ñaia, ie oni dobaiñua uaina naimiemo illena, jiaie creyentiai iena cacaillena, Jusiñamuimo jicaja. ¹⁴ Jusiñamui diga cue uiñoñega uaido cue ñaia, Jusiñamui Joreño cuena ñaitatate; iadedi iena cacaiñedicue. Iena uiñoñedicue. ¹⁵ Ie jira, ¿niese cue nibaille? Jusiñamui diga cue ñaia, cue uiñoñega uaido ñaiticue; iadedi comini cue ñaiana raise uiñollena, Jusiñamui diga jamai cue uaido jiai ñaiticue. Jusiñamuimo cue roia, cue uiñoñega uaido roiticue; iadedi comini cue ruana raise uiñollena, Jusiñamuimo jamai cue uaido jiai roiticue. ¹⁶ Iobillacinona Jusiñamuimo omoi fecajano, omoi uiñoñega uaido omoi ñaianona, ¿niese omoina cacaiñedino: “Jee” raitimaci? ¹⁷ Iobillacinona Jusiñamuimo raise fecadomoi; iadedi omoina cacaiñedinona Jusiñamuina uiñotañedomoi. Ie jira omoi uiñoñega ñaia uaina oni dobaiñotimie omoi roracomo iñenia, naie uaido ñaiñeno. ¹⁸ Cue uiñoñega uaido cue ñaicabilla jira, Jusiñamuimo iobillacinona fecadicue. Omoi baifemo naie uaido cue ñaiana uiñoticue; ¹⁹ iadedi roracomo cue ia, cominina raise cue llofuellena, janore cue ñaiadi, mare; iadedi eo are cue uiñoñega uaido cue ñaia, cominina Jusiñamui rafuena cue llofueñenia, cuemona maraiñede.

²⁰ Cue amatiai, omoi uiñoñega ñaia uaido dani jai jaidomoi; iadedi jiaie Jusiñamui Joreño itataja uaimo omoi comeciaina facañedomoi. Omoi abina jai uiñuamaona, jiaie uaimo omoi comeciaina faca. ²¹ Jusiñamui facaina lloraima micori jaie cuega: “Jusiñamui llote: ‘Cue comini dine jiaie nairaina cue oretajamaona, cue cominina cuena inotallena, naie jiaie nairai uaido cue cominimo lloiticue; iadedi iena jitaiñeitimaci. Cuena jaca uiñoñeitimaci’ llote”. ²² Ie isoide. Uiñoñega uaido omoi ñaiamaona, Cristona inoñedino iena raise cacaiñedimaci; iadedi Cristona inotino iena cacadimaci. Iemona fueotimaci. Jusiñamui

rafuena omoi llofuiamona, Cristona #noñedino iena cacajamona, Cristona #noñedimaci; iadedi Cristona #notinona canodomo. ²³ Danomo nana omoi ofia, omoi uiñoñega uaido nana omoi ñaia, Cristona #noñedino iena cacajanona, omoia; “Uairico” raitimaci; ²⁴ iadedi omoi ofia, Jusiñamui rafuena omoi jino lloia, iena Cristona #noñedimie cacajamona, naimiedi jeacino naimie comecimo illana uiñoite. Naie rafue naimiemo riire baite. ²⁵ Naimie comecimo ite jearede rafue naimie uiñuamona, Jusiñamuimo ie jeacinona lluanona, Jusiñamuina #noite. Ie muidona raite: “Uanai, Jusiñamui omoi motomo ite”.

Roracomo omoi ia, raise marena omoi i

²⁶ Cue amatiai, rollena omoi oficabia, ¿niese omoi nibaille? Iena ja ñaiticue. Omoi ofia, omoimona damierie nibai roite. Jiaimie Cristo rafuena llofueite. Jiaimie naimiemo Jusiñamui como lloga rafuena jino lloite. Jiaimie ie uiñoñega uaido ñaite. Jiaimie naie uaina oni dobaiñoite. Cristo dibeimo creyentiaina raise itatallena, nana omoi finua rafuena raise fino. ²⁷ Uiñoñega uaido bu ñaia, damie amani naiedo ñaite. Damierie ñaite. Jiaimie ñaille ifomo jiaimie ñaite. Ie mei damie naie ñaiana oni dobaiñoite. ²⁸ Naie ñaiana oni dobaiñotimie iñenia, naie uiñoñega uaido ñaitimie roracomo ñaiñena; iadedi naimie ñaiacania, Jusiñamuimo dama ie jofomo ñaia. ²⁹ Jusiñamuimona ite rafuena bu jino lloiacania, damie amani iena lloite. Damierie lloite. Jiaino llorainidi Jusiñamuimona naie llucino billana uiñuanona llua. ³⁰ Jusiñamui rafuena bu nia lloia, naimie ecimo jiaimiena rafuena Jusiñamui Joreño llotataia, nano llotimie raire llicaila. Iemei jiaimie lloite. ³¹ Iese damierie nana lloitomoi, naie lluanona Jusiñamui rafuena raise omoi uiñollena, omoi comeciai jiai ocuiñollena. ³² Naga llotimiedi ie uiñua diese lluanona uiñote. Ie jira jiaimie nia lloia, iena cacarei. Iemei jiaimie llua. ³³ Iese iñenia, daacaiño omoi lloia, buna Jusiñamui rafuena raise cacaiñeite. Omoi raise illena Jusiñamui jitailla jira, omoi uri illena Jusiñamui jitailla jira, cue llucinodo omoi jai.

³⁴⁻³⁵ Jiaie creyentiai illanuaimo isoi omoi roracomo riñoniaidi uaina uaitañena. Nainomo lloga rafuena nainomo naiñaiñuai siadoñena; iadedi naiñaiñuai jofomo rillanona, naiena ie inimo jicanoitimaci. Roracomo naiñaiñuai ia, Moisés micori jaie llua isoi, naiñaiñuai ini anamo naiñaiñuai illa jira, nainomo ite lloraima uaina naiñaiñuai uaitañena. Roracomo naiñaiñuai uaina uaitaia, maraiñede, nainomo ite jino lloraima uaina naiñaiñuai raise cacaiñena jira.

³⁶ ¿Niese cue llucinodo jiacaiñedomoi? Jusiñamui rafue omoimona comuiñede. Dani omoimo naie rafue duiñede; iadedi nana creyentiaimo duide. Dani omoimo Jusiñamui ie rafuena lloñede. Nana creyentiaimo iena llote. ³⁷ “Rafuena Jusiñamui cuemo llote” omoimona ie comecina bu facaia, “Jusiñamui Joreño ie ñaia uaina cuemo itatate” ie comecina bu facaia, “Cai Namamona ite uaina omoimo cueticue” naimiedi uiñote; ³⁸ iadedi naimie iese uiñoñenia, Jusiñamui Joreñomona naimie uai iñenana uiñoiticaia.

³⁹ Cue amatiai, Jusiñamui omoimo ie rafuena llua uaina naimiemo jica; iadedi naimaci uiñoñega uaido jiaie creyentiai ñaia, iena rairuiñeno. ⁴⁰ Omoi ofia, cue llua isoi, Jusiñamuina raise marena seda.

15

Fiodaillamona Cristo jai jillode

¹ Cue amatiai, iena omoi feitañellena, bie rafuena dane lloiticue. Cristo ie mare rafuena omoina navui llofueticue. Fiodaillamona Cristo jilluana llofueticue. Cue llofuiacinona feiñotomoi. Iena #nocana jaidomoi. ² Naiena omoi #nuamona, Jusiñamui omoi jeacinomona omoina jillotate. Naiedo nia omoi jaia, iena raise omoi #noia, jai jillobidomoi.

³ Nanoca rafuena omoina llofueticue. Jiaie creyentiaimona buena jai cacadicue. Jusiñamui facaina lloraini micoriai jaie ciegafuia isoi cai jeacino facaina Cristodi

fiodaite. ⁴ Raiafomo naimiedi jonega. Darui amani illanona naimiona Jusiñamuidi naimiena jillotate, Jusiñamui facaina lloraini micoriai jaie llua isoi. ⁵ Ie mei Pedro naimiena ciode. Ie mei ie once llofueoicaigano naimiena ciodimaci. ⁶ Ie mei quinientos naimiena inotino naimiena daruido ciodimaci. Naimacimona damierie jai fiodaitimaci; iadedi ailluena nia fiodaiñedimaci. Cristo jilluana uiñotimaci. ⁷ Ie mei Jacobo naimiena ciode. Ie mei nana ie oretagano naimiena ciodimaci.

⁸ Ie mei naimiena jiai ciodicue. Ie jira fiodaillamona naimie jilluana uiñotica. Ie doce llofueoicaigano fetua mei, diga años illanona, naimiena nia cue uiñoña facaise cuena fetode. Ie mei ie rafuena cue lollena, cuena oretate. ⁹ Ailluena creyentiaina jaie cue duere finua jira, nana jiaie Cristo oretagano cue baifemo faitimaci. Jamai bue isodicue; iadedi Cristo cuena fetode. ¹⁰ Jusiñamui cuena duenaillamona, Cristo oretagamiena jaidicue. Jusiñamui cuena jamai tainomo duenaiñede. Nana jiaie Cristo oretagano baifemo Cristo rafuena llofuecabiticue. Dama cue comecimona llofuecabiñedicue; iadedi Jusiñamui cuena canuamona, iese llofuecabiticue. ¹¹ Jiaie oretagano Cristo rafuena llofueia, iena cue llofueia, daje isoide rafuena llocana jaidicai. Naie rafuena omoi cacajamona, iena inotomoi.

Fiodaillamona nana creyentiaico jilloitimaci

¹² Fiodaillamona Jusiñamui Cristona jillotajana llofuecabiticai; iadedi omoimona dajerie raitomoi: “Fiodaillamona, nana comini imaci abiai diga ico jilloñeitimaci”. ¹³ Ero, omoi llua isoi fiodaillamona comini ico jilloñedena, ie isoi Cristo jiai nia raiafomo ite. Niade jilloñede. ¹⁴ Cristo jilloñenia, Cristo rafuena jai tainona lloticai. Naie rafuena jiai tainona inotomoi. ¹⁵ Cristo fiodaillamona Jusiñamuidi naimiena jillotajana llofuecabiticai. Fiodaillamona creyentiaina ico Jusiñamui jillotañenia, Cristona jiai niade jillotañede. Jusiñamui rafuena tainona jai llofueticai. ¹⁶ Fiodaillamona nana creyentiaico jilloñenia, Cristo jiai jaie jilloñede. ¹⁷ Cristo nia jilloñenia, naimiena tainona inotomoi. Jusiñamui omoi jeacinona niadedi oni dotañede. ¹⁸ Cristona inuanona jai fiodaitinodi jiai jai faifidimaci. Jusiñamui illanomo jaca iñeitimaci; iadedi iraimo jaca iitimaci. ¹⁹ Nana cai ille dinori dani Cristo caina jilloitallemo cai ocuiria; iadedi naimie jilloñenia, jai duere iticai. Jai tainomo ocuiridicai.

²⁰ Ero, tainomo ocuiridicai; iadedi fiodaillamona Jusiñamui Cristona jai jillotate. Naimie jillua mei, naimiena ciodicai. Ailluena fiodaitino jai itimaci; iadedi Cristo jai jillode. Ie jira nana jai fiodaite creyentia jiai jilloitimaci. ²¹ Adán micori jeacinona finua jira, fiodaite. Fiodaillamona jilloñede. Jeacino naimie finua jira, fiodaicana jiai jaidicai; iadedi fiodaillamona Cristo jai jillua jira, fiodaillamona ico jiai jilloitica. ²² Adán micorimona cai comuilla jira, nana fiodaicana jaidicai; iadedi Cristomo cai duilla jira, jilloitica, naimie diga jaca cai illena. ²³ Cristo jai jillode. Cai fiodailla mei, naimiemo cai duilla jira, ico dane abido naimie bille facaise jilloitica. ²⁴⁻²⁵ Ie mei naimie dinena nana naimie dibeimo iñedinona anafefitaite. Nana naimie dibeimo iñede joreñuaina jiai anafefitaite. Illaimana Cristo illamona, nana naimie dibeimo iñedinona anafefitaite. “O uai cuemo o illamona, nana o jitailla rafuena jai fuidodicue” ie Moomo lloite. ²⁶ Nana naimie dibeimo iñedino naimie anamo jai illa mei, Cristo muidona naimie comini jai jilluamona dane fiodaiñeitimaci. ²⁷ Jusiñamuidi nana cominina Cristo anamo itataite. Ie muidona creyentiaidicai dane fiodaiñeiticai; iadedi Cristo anamo Jusiñamui iñeite. Cristona oretaja jira, Cristo anamo Jusiñamui iñede. ²⁸ Naga ra Cristo anamo illa mei, ie maijia fuilla mei, Jusiñamui ie Moona jira, Jusiñamui anamo Cristo jiai iite. Jusiñamui nanocamiena jira, nana naimie finoca ra naimie anamo iite. Nana comini naimie anamo iitimaci.

²⁹ Cristo jilloñedena, fiodaillamona jilloñeitomoidena, ¿niese bautizagaomoi? Fiodaillamona omoi jilloñenia, ¿bue ñellena bautizagaomoi? Tainomo jai bautizagaomoi; iadedi iese inoñedomoi. Dajerie creyentia marena illamona, omoimona dajerie creyentiaina

jaidomoi. Naimaci jai fioidaitimaci; iadedi fioidaillamona ico jilluana innotimaci. Iena omoi inuanona, bautizagaomoi. ³⁰ Cristo jilloñenia, cue jilloñedicuedena, ¿bue ñellena nagarui Cristo rafuena cue llofuiamona, eo jacirede ramona niadedi fioidaicabiticue? ³¹ Cue amatiai, cai Nama Jesucristomo omoi duilla jira, omoi iobidicue; iadedi nagarui niadedi fioidaicabiticue. Cristo rafuena omoi mo cue llocabilla jira, jiaie comini iciritimaci. Icirillamona, cuena meineiacadimaci. ³² Efeso railla nairaimo birui cue illamona, diga comini cue lloga uaina eo uaitaside. Duere sefuidicue. Cristo jilloñenia, cue llumona jaca buena oñeiticue. Ie muidona fioidaillamona cai jaca jilloñeiticaidena, Cristo rafuena faionocaida, ico raire jamai cai fioidailla jira, jamai ua jai jaicaillafuena cai jaiacaiticai. Ie ia iese inede. Cristo jai jillode.

³³ Ie jira omoi abiaina jifueñeno. “Jilloñeiticai” railla comini diga omoi nabairia, naimaci llogacinodo jiai jaitomoi. Ie muidona naimaci diga nabairiñeno. ³⁴ Ie jira raise abina uiñuanona, mai jai. Jeacinona finocana jaiñeno. Omoi mona dajerie Jusiñamuina raise uiñoñena jira: “Jusiñamuidi cominina jillotañeite” raitimaci. Omoi meidallena, omoi mo iese lloticue. Jusiñamui rafuedo raise mai omoi jai.

¿Ñiese creyentiai jilloitimaci?

³⁵ Omoi mona damie nibai jicanoite: “¿Ñiese fioidaillamona creyentiaidicai jilloiticai? Naimaci abiai nibai jai rifaidimaci. ¿Ñie isoide abiai diga dane iiticai?” ³⁶ Iese bu jicanoia, raise comecina facañede. O illimo buena o ria, janore sicua meinoconi, o riga radi jai abidi rifaide. ³⁷ Ñie isoide iconona o ria, ñie isoide ijina o ria, ñie isoide idona o ria, naie ra sicua mei, jai jiaifo eruaide. O riga rana eruañede. ³⁸ Naga rira daje isoi eruañede. Jusiñamui jitailla isoi, jiaiforie eruaide. Ie isoide. Naga fioidaitimie jillua mei, Jusiñamui jitailla isoi, ie abina jiaiforie itataite. ³⁹ Diga isoide cai abiaina Jusiñamui jai comuitate. Naga abi isoide ite. Cai maijillena, comini abi ite. Eniruedo macarillena, ocaina abi ite. Fellena, silli abi ite. Jinuimo illena, lliciai abi ite. Ua diga isoide abi ite. Jusiñamuidi cai jiaiforie eruaite abiaina finorede. ⁴⁰ Jusiñamui dine ico cai ia, cai abiai iite, nainomo cai illena. Bene cai abiai jiai ite, bene cai illena. Monamo cai ia, ebireniticai. Bene cai ia, jiai ebire iticai; iadedi daje isoi ebire inedicai. ⁴¹ Jusiñamuidi monamo ite rana finode; iadedi daje isoi lligaiñoñede. Jitoma fivui isoi lligaiñoñede. Fivui ucuai isoi lligaiñoñede. Naga ucuai daje isoi lligaiñoñede. Monamo cai ico illena, naimie jitailla ñiese cai abiai caimo iite. ⁴² Ie isoide. Fioidaillamona cai jillua mei, cai abiai jiaifo eruaite. Cai fioidaillamona cai abiai rifaide; iadedi cai jilluamona, cai abiai dane jai rifaiñeite. ⁴³ Cai fioidaillamona cai abiai jai ebinide; iadedi cai jilluamona, cai abiai ebirenite. Fioidaicana cai jailla jira, cai abiai birui raise mairiñede; iadedi ico cai jilluamona, cai abiai mairite. Nana Jusiñamui jitailla rafuena finoreniticai. ⁴⁴ Cai fioidaia, come abiai isoi caimo birui ite; iadedi cai jilluamona monamo ico caimo cai abiai jiai iite. Enirue iena cai abiai birui caimo ite. Ie jira monamo cai jiaifo eruaite abiai caimo iite.

⁴⁵ Adán micori comuilla rafuena Moisés micori jaiie cuega: “Jusiñamuidi nano comuidimie dofomo jafaicina firaiñuamona, naimie micori comena jaiide” cuega. Naimiemona cai comuilla jira, fioidaiticai. Fioidaillamona Cristo jillua jira, ico cai jiai jilloille jira, caina jiaifo eruaite abiaina ico itataite. ⁴⁶ Eniruemo birui cai illa jira, caimo birui ite abiai diga iticai. Fioidaillamona ico cai jillua mei, monamo cai ia, jiaifo eruaite abiai diga iiticai. ⁴⁷ Adán micoridi enirue ie. Imuicimona Jusiñamuidi naimiena finode. Cristodi eniruemo billanona, imana jaiide; iadedi Jusiñamui dinena monamona naimie bite. ⁴⁸ Imuicimona Adán micori finua jira, naimie fioidailla mei, dane imuicina jaiide. Naimiemona cai comuilla jira, cai fioidaia, jiai imuicina jaiticai; iadedi Cristomo jiai duidicai. Cai jillua mei, naimie isoi ico iiticai. ⁴⁹ Adán micorimona cai comuilla jira, naimiena eruaidicai. Eniruemo Cristo jaiie ia, naimie abi ite. Fioidaillamona naimie jillua mei, naimiemo jiaifo eruaite abi naimiemo ite. Cai jillua mei, Cristona eruaiticai.

⁵⁰ Cue amatiaí, buena lloticue. Caímo jai ite abiaí diga monamo Jusiñamui ie cominina sedajanomo iñeíticai. Cai abiaí rifailla jira, cai fiodailla facaise naie isoide abiaí diga nainomo jaca iñeíticai. ⁵¹ Ero, Jusiñamui cuena uiñotaga rafuena omoímo ja lloticue. Iena navui jaca uiñoñedicai. Nana creyentiaídicaí fiodaíñeíticai; iadedí Jusiñamui cai abiaína jiaífo meidotaite. ⁵² Omoí uisi jarire cuirorilla isoi, iena ua raire meidotaite. Ie trompeta fillanona, jai fiodaite creyentiaína Jusiñamuidí jillotajanona, naimaci abiaína meidotaite. Nia fiodaíñedinodicaí cai abiaína jiaí meidotaite. Dane fiodaíñeíticai. ⁵³ Cai abiaí birui rifaíacade. Ie jira birui fiodaicana jaidicaí. Jusiñamuidí cai abiaína ico meidoite. Ico monamo jiaífo abiaí caímo ia, cai abiaí rifaíñeite. Fiodaíñeíticai. ⁵⁴ Iese caímo sua, Jusiñamui facaina lloraima micorí jaie cuega uai jiaí suite. Cuega: “Nairuimona creyentiaí jaca fiodaíñeítimaci”. ⁵⁵ Cai jaca illa jira, fiodaicana jaiñeíticai. Fiodaillana jaciruiñeíticai, dane cai fiodaíñeíticaina jira. ⁵⁶ Jeacino illa jira, birui fiodaicana jaidicaí. Moisés micorí jaie llogacino illa jira, iena cai raise finonina jira, jeacino caímo illana uiñoticaí; ⁵⁷ iadedí cai jeacino facaina cai Nama Jesucristo fiodailla jira, jeacino anamo jai iñedicai. Cai fiodailla mei, dane fiodaíñeíticai. Jusiñamui caína iemona jai jillotate. Ie muidona naimieri cai iobillasa.

⁵⁸ Cue amatiaí, fiodaillamona nana creyentiaí ico jillua jira, Cristo rafuena ñnocana jai. Naganomo iñeno; iadedí Cristo rafuena llocana omoí jai. Naimie jitailla rafuena finocana omoí jai. Naimie facaina omoí maijia, tainona maijiñedomoí. Naiemona diga mare rafue comuite. Iena jai uiñotomoí.

16

Jerusalémo itinomo ucubena oredimaci

¹ Jiaíe rafuena cuemo jicanotomoí. Jerusalémo ite creyentiaímo ucubena oretaíacadomoí. Galaciamo ite creyentiaímo cue llua isoi, omoímo lloticue. ² Naga domingo omoí ucubemona daje diese eneno oni eeno. Omoí maijia bailla diese ucubemona cue bille ñnori iena eeno. Iese naga domingo omoí eenoñenia, ico cue bia, ¿ñiese dacaiño ofrendamo ailluena ucubena joneítomoí? ³ Omoí ñine cue rilla mei, omoí eenoga ucubena uillena, Jerusalémo ite creyentiaímo omoí fetocanona oretaiticue. Cartana jiaí oretaiticue, omoí fetocano mareuidinona Jerusalémo itino uiñollena. ⁴ Jerusalémo cue comeci jiaí jaiacania, cue diga jaitimaci.

Pablo jai macariacade

⁵ Macedonia railla eniruemo nano jaiticue. Creyentiaína cioillena, dajerie nairaimo jaiticue. Ie mei omoí ñine jaiticue. ⁶ Diga irui omoí diga ñibaí iiticue. Nana rollime facaise omoí diga ñibaí iiticue. Ñibaí daje amani fivui iiticue. Ie mei cuena omoí canollemona oni jaiticue. Omoí ñinomona cue jaia, cue jaillinona nia uiñoñedicue. ⁷ Omoí ñine birui nia jaiñeíticue. Omoí ñine birui cue jaia, dallu omoí diga iiticue; iadedí jiaíruido omoí ñine cue jaia, cai Nama jitaia, omoí diga are iiticue. ⁸ Beno Efesomo nia iiticue. ⁹ Beno diga comini Cristo rafuena cacaacadimaci. Naimacimo iena llofueiacadicue. Diga comini cue llua uaitatimaci. Cue llua jitaíñedimaci Ie jira bene nia lloiacadicue. Pentecostés railla rafue fuille mei, jaiticue.

¹⁰ Omoí ñine Timoteo ria, naimiena raise marena nafue. Cue isoi cai Nama facaina naimie maijicabide. ¹¹ Ie muidona naimie llucinona jamaiñeno. Omoimona naimie jaiacania, cue ñine abido naimie raise rillena, naimiena raise cano. Naimie jaiacania, naimie caímare caímaduano oreta. Jiaíe creyentiaí diga naimie billemo ocuridicue.

¹² Apolona jicanotomoí. Jiaíe creyentiaí diga omoí ñine naimie jaillana naimiemo lloticue; iadedí naimie comeci nia jaiacaiñede. Jiaíruido abi juarenia, omoí ñine jaite.

Fuiduacino

¹³ Jeac̄inomona abina rairui. Cristo rafuena ñnocana omōi jai. Eim̄ie isoi omōi comecīina ocuiño. ¹⁴ Jiāie com̄inina omōi isiruillamona, nana omōi finoacalle rafuena fino.

¹⁵ Cue amat̄iāi, Acaya railla en̄iruemo Estéf̄anadi, ie com̄ini diga, nano creyent̄iāid̄imaci. Iena uiñotom̄oi. Naimaci jitailla jira, jiāie creyent̄iāina canocabid̄imaci.

¹⁶ Naie isoid̄ino lloga uaina cacarei. Naga Cristo d̄ibeimo maij̄id̄ino uaina cacarei. Iedo omōi jai. ¹⁷ Omōimona cue dine Estéf̄anas bite. Fortunato diga, Acaico diga naim̄ie billa jira, iobid̄icue. Cue dine iñedom̄oi; iadedi naimaci billa jira, omōi isoi cuena canod̄imaci.

¹⁸ Naimaci billamona cue comecīi caimataide. Omōi comecīiāi jiāi caimataide. Naie isoid̄inomo: “Marena maij̄idom̄oi” omōi railla.

¹⁹ Diga creyent̄iāi Asia railla en̄iruemo it̄imaci. Imaci uaina ored̄imaci. Aquila, ie āi Priscila diga, ie uaina jiāi ored̄iāimaiāi. Iaimaiāi jofomo dajerie creyent̄iāi rocabit̄imaci. Cristomo naimaci duilla jira, omōina isiruillanona, nana naie creyent̄iāi imaci uaina jiāi ored̄imaci. ²⁰ Nana bene ite creyent̄iāi imaci uaina ored̄imaci. Nana creyent̄iāina eo caimare uaido.

²¹ Omōimo cue uaina jiāi ored̄icue. Cuena canollena, naim̄iemo cue llua isoi, jiāim̄ie bie carta cueba; iadedi cue mamecīi bene dama cuet̄icue. Nana iena ñno. Pablod̄icue.

²² Omōimona Cristona bu isiruiñenia, Jusif̄amui naim̄iena duere finollesa. Cai Nama ab̄ido dane billesa.

²³ Cai Nama Jesús omōina duenaillasa. ²⁴ Jesucristomo cai duilla jira, omōina cue isiruillana omōi uiñuana jitāid̄icue. Mai. Macāibaite.

CORINTOMO ITE CRISTONA HNOTINOMO IE EMODOMO PABLO ORETAGA RABE

Corintomo ite creyentiaimo Pablo cartana orede

¹ ¿Nigacino? ¿Nie isoidomoi? Pablodícue. Corintomo ite creyentiai, omoi dine bie carta oredícue. Nana Acaya railla eniruemo ite creyentiaimo bie carta jiai oredícue. Jusiñamui jitailla jira, ie rafuena cue jino lollena, Jesucristo oretagamiedícue. Cue diga Timoteo illa jira, naimie ie uaina omoi dine jiai orede. ² Cai Moo Jusiñamui, cai Nama Jesucristo diga, omoína duenaite. Iena uiñocana mai omoi jai. Iaimaiai omoína uri jai itatate. Iena omoi uiñocana mai omoi jai.

Pablo ie duere sefuilla rafuena cuete

³ Cai Moo Jusiñamuimo iobillacinona cai fecacabillasa, naimiedi cai Nama Jesucristo ie Moo illanona. Jusiñamui cai Moo illanona, caina jaca duenaite. Cai comeciaina jaca ocuiñotade. ⁴ Nie isoide rafuemonona cue duere sefuia, nie isoide ramo cue jiria, naimie cue comecina jaca ocuiñotade. Ie jira jiaínona canoredícue. Nie isoide rafuemonona naimaci duere sefuia, nie isoide ramo naimaci jiria, Jusiñamui caina ocuiñotaja isoi, naimaci comeciaina ocuiñotaredícue. ⁵ Cristomo jai cue duilla jira, naimie isoi cue duere sefuia, naimie cue comecina ocuiñotade. Iemonona jiaínona comecina ocuiñotajana raise uiñoticue. ⁶ Duere cue sefuillamona, omoína canoredícue. Jusiñamui jitaillacino omoi finocana jaillana jitaídícue. Cuenona naimie ocuiñotajamona, Cristona omoi faínonocaiñellena, cue isoi omoi duere sefuia, omoína ocuiñotaredícue. ⁷ Cue isoi omoi duere sefuia, cue isoi Cristo omoi comeciaina ocuiñotaite. Iena raise uiñoticue.

⁸ Cristomo cai duillamona, cue amatiaí isoi itomoi. Asia railla eniruemo jaie eo duere sefuídícue. Iena omoi raise uiñollena, ie rafuena dane omoímo lloiacadícue. Eo duere cue sefuilla jira, cue comeci niadedi ocuiñoñedícue. Niadedi fiódaitícue. ⁹ “Naie facaise fiódaitícue” raillanomo cue comecina facadícue. Cue finoca rafuemonona dama jillonidícue; ia Jusiñamui uai siñona jira, naimie cuena jillotate. Fiódaitinona naimie jillotarede. Niadedi fiódaitinona jiai jillotarede. Naimiedi naimie cuena jillotajana cue #nuana jitaide. ¹⁰ Naie facaise eo duere sefuillamona cuena jillotate. Ico cue duere sefuia, iemonona dane cue jilloillena #notícue. ¹¹ Iena cue facaina omoi j#cabi. Jusiñamui fairiua meinomo, ailluena comini cue facaina Jusiñamuimo iobillacinona fecaitimaci. Cuenona Jusiñamui canua jira, iobillacinona fecaitimaci.

Pablo Corintomo navui jaiñede

¹² Cuenona gaiñedino cuena nibai jeare ñaitimaci; ia daje rafueri abina iedotícue. Cue comecimona iena uiñoticue. Cristona #ñoñedinona marena finodícue. Omoína marena finodícue. Jusiñamui jitaillacino finocana jaidícue. Jusiñamuimona jeacinona fiñoñecana jaidícue. Cue comecina facajacinomona iese jaiñedícue; ia Jusiñamui cuena canuamona, iese jaidícue. ¹³ “Iese cuetio; iadedi o comecimo jiaie rafue ite diga caimo cuetio” rait-omoi. Omoína jifueiacaiñedícue. Cue cueda cartaíaina jai facadomoi. Cue cueda rafue omoi raise cacajana jitaídícue. ¹⁴ Cuenona nia eo raise uiñoñedomoi; ia cuena uiñocana omoi jaillanona, cueri omoi iobillana jitaídícue. Cai Nama Jesús abido bia, omoiri cue iobilla isoi, cueri omoi iobillana jitaídícue. ¹⁵ Omoímo iese cue comecina facajamona, omoi dine navui jaiacadícue. Macedoniamona cue jaiacadícuemo, raise omoína cue iobitallena, omoi dine nano navui jaiacadícue. ¹⁶ Macedoniamona cue abido bia, omoi dine navui dane jaiacadícue. Judeamo cue diga jaillena, omoimona damieriena omoi oretajana jitaídícue. Iese cue jaillemono navui comecina facadícue. ¹⁷ Omoi dine cue jaiñena jira, cue comeci naganomo illa isoi, comeciaina facadomoi. Damierie ie lloga uaina jaca fiñoñedimaci. Dani naimaci rafuemo comeciaina facadimaci. “J#i” raitimaci; ia: “Dama

ite” comeciaina facadimaci. ¹⁸ Iese iñedicue. Jusiñamui uanaicinona jaca llua isoi, cue comeci naganomo iñede. Omoimo cue lloga uai finodicue. ¹⁹ Jusiñamui Jito Jesucristo rafuena omoimo navui lloticue. Cristo ie llogacinona jaca meidoñede. Silvano iena jiai llofuede. Timoteo iena jiai llofuede. Nagarui daje isoide rafuena llofueticai. Jiairuido jiaie Cristo rafuena llofueñedicai. ²⁰ Nana Jusiñamui jai lloga uai Cristo finoca rafuemona suicabide. Jusiñamuina cai sedaia: “Cristo ie rafuena raise finode” cai lloia, Jusiñamuina iobitadicai. ²¹ Jusiñamui Cristo dibeimo caina jai itatate. Ie rafuena cai lloiena, caina jai fetode. ²² Ie cominina caina itatate. Iena cai uiñollena, ie Joreño caimo jai itatate. ²³ Jusiñamuidi cue uanaicinona llua uiñote. Uanaicinona cue lloñenia, Jusiñamui cuena duere finuana jitaidicue. Omoi finoca rafue jai cue uiñuamona, omoimo cue raire lloi raillano, omoi dne navui dane jaiñedicue. ²⁴ Cristona jai omoi ñnuana uiñoticue. Cristona ñnocana omoi jailla jira, omoi finolle rafuena lloñedicue; ia omoi iocire illana jitaidicue.

2

¹ Omoi dne nia cue jaiñellemo comecina facadicue. Omoi dne navui cue ia, iocire coniniri iñedicai. ² Omoina jai icidicue. Cueri omoi iobillana jitaidicue; ia omoina cue dane icia, coniniri iocire iñeticai. ³ Omoimo cartana navui oredicue. Omoi dne ite rafuena raise finollena, iena oredicue. Cuena iobitajana uiñotomoi. Omoi dne ite rafuena omoi raise finoia, coniniri iocire iitica. “Cuena iobitaitomoi” raillanomo cue comecina facadicue. ⁴ Cue comeci eo sunaillamona, cue comeci eo eiamona, carta navui oredicue. Omoina iciaicaiñedicue; ia omoina cue eo isiruillana omoi uiñuana jitaidicue. Ie jira omoi dne ite rafuena raise fino.

Maraiñede rafuena finodimie rafuena feita

⁵ Maraiñede rafue navui damie finua jira, sunaiticai. Naimie muidona cue comecido duere jaide; ia daje isoi omoi comeciai jiai duere jaide. ⁶ Omoi nabei dne ite cominimona naimie jai duere sefuilla jira, dama iesede. Naimiena dane duere finoño; ⁷ ia naimie finoca rafuena mai feita. Iena dane linoño. Naimie comecina ocuiñota. Naimiena iese omoi canoñenia, omoimona duere sefuillamona, abido danomo jaite. ⁸ Ie jira: “Ona nia isiruiticai” naimiemo llono. Iena eo jitaidicue. ⁹ Nana cue llua omoi ñnuana cue facacillena, carta omoi dne navui cueticue. ¹⁰ Naimie finoca rafuena omoi feitaia, iena cue jiai faitaiticue. Cristo rafuena omoi ñnocana jailla jira, naimie rafuena faitaiticue. Cristo cuena uiñuamona, iena faitaiticue. ¹¹ Taife ramo cai faiana uiñoticai. Cristo rafuedo cai raise jaiñellena, naimie jitaillana uiñoticai. Cristo dibeimona caina Taife itatañenia, omoi motomo itimie finoca rafuena faitaiticai.

Troamo navui Pablo ia, uri iñede

¹² Troamo navui jaidicue. Cristo rafuena cue lloiena jaidicue. Cai Nama comini comeciaina jetajamona, naimie dibeimo cue maijamona, ie rafuena lloticue. ¹³ Tito nainomo cue cioiñena jira, uri iñedicue. Naimiedi cue ama isoide. Ie jira nainomo ite creyentiaina facaduanona, Macedoniamoi jaidicue.

Jusiñamuidi Cristo dibeimo iñedinona anafetaitaite

¹⁴ Jusiñamui fue eo mare. Cristo dibeimo iñedinona naimie anafetitajanona, Cristo cominina cai illamona, naimie rafuena uicana jaidicai. Ie rafuena cai lloia, iena comini ñnoia, Jusiñamui naimacina jai caimare itatate. ¹⁵ Cristomo cai duillamona, ie rafuena cai lloia, Jusiñamuina iobitadicai. Cai llua, damierie jillodimaci. Iena jitañenamona, damierie faifidimaci. ¹⁶ Iena cacajamona, damierie faificana jaidimaci. Jusiñamui illanomo jaca iñetimaci. Iena cacajamona, jaiño Jusiñamui illanomo jaca iitimaci. Jamai bue isoidicue; ia bie rafue llocana jaidicue. ¹⁷ Damierie Jusiñamui rafuena llua, ucubena oiacadimaci. Omoimo comecina facañedicue; ia iese llofueñedicue. Omoimo cue comecina facajanona, bie rafue cue llua, buena oñedicue. Jusiñamuimona cue

llogacinona oticue. Jusiñamui cuena cïua jira, Cristomo cue duilla jira, uanaicinona jaca lloticue.

3

Cristo caïmo lloga rafuedo birui jaidicai

¹ Omoï dïne damïerie llofuerainï jaia, cartaiaina uicabitimaci. Naimaci cartaiaimo jiaïnodi: “Bie llofuerainï mare” raillanona cuetimaci. Omoïmona jiaïno cuega cartaiaina: “Bie comïni mare” raillana jitaiñedicue. Cuemonna jiaïno cuega cartaiaina: “Pablo mare” raillana jiaï jitaiñedomoï. ² Omoï marenana jai uïñoticue. Cue marenienana jai uïñotomoï. Carta isoidomoï. Jusiñamui dibeïmo omoï comeciï meïduamona, cue comecïmona omoïna raise uïñoticue. Omoï birui illamona, omoïna fidiamona, nana comïni omoïna raise uïñotimaci. Ie jira jiaïnodi: “Bie comïni mare” raillana omoïmona jitaiñedicue. ³ Cristo rafuena omoïmo lloticue; ia Cristo omoï comeciïna jai meïdotaja jira: “Omoï mare” raillanona naimïe jai cuegadana, nana comïni uïñotimaci. Tinta diga naimïe cueñede. Jusiñamui Moïseï mïcorïmo jaïe lloga rafue jamai noficïmo cuega. Cai cajede Jusiñamui birui ïese cueñede; ia naimïe Joreño uaido omoï comeciïna birui meïdote. ⁴ Cristomo cue jai duilla jira, Jusiñamuïna cue ïnuamona, omoïna ïese lloticue. ⁵ Cue finoca rafuemonna ïese lloñedicue; ia Jusiñamui uai cuemo illamona, ïese omoïmo lloticue. ⁶ Jiaïe rafuedo birui cue jaïllena, Jusiñamui cuena fetode. Ie uai cuemo illamona, cuemo lloga rafuena llocabiticue. Moïseï mïcorïmo lloga rafuena birui lloñedicue. Moïseï mïcorïmo lloga rafue ïnuamona, Jusiñamui illanomo jaca buna itatañede. Jusiñamui Joreño llotataga rafuena birui llocabiticue. Iena cai ïnuamona, Jusiñamui Joreño Jusiñamui illanomo caina jaca itatate.

⁷ Moïseï mïcorïmo lloga rafuedo jaïllamona, Jusiñamui dïne buna jaca ïñena. Noficïmo Jusiñamui cuega. Moïseï mïcorïmo Jusiñamui llua meï, Jusiñamui uai ebirena jira, Moïseï mïcorï uieco eo quenirecaïde. Jusiñamuïmona naimïe abïdo bia, Israel comïni Moïseï mïcorï uiecomo eruainidimaci. Nagarui Jusiñamui diga naimïe ñaïñena, naimïe mïcorï uieco ja muidomo queninide. ⁸ Jusiñamui Moïseï mïcorïmo jaïe lloga uai ebirede; ia Jusiñamui Joreño birui caïmo lloga uai baïfemo ebirede. ⁹ Moïseï mïcorï rafuedo bu jaïa, faïficana jaïde; ia naïe rafue ebirede. Birui ïte rafuedo bu jaïa, Jusiñamuïmona marebicaïde. Ie muidona birui ïte rafue jaïe ïte rafue baïfemo ua eo faïte. ¹⁰ Moïseï mïcorï rafue jaïe ebirede; ia jiaïe rafue birui ïlla jira, Moïseï mïcorï rafue jai birui ebinide. ¹¹ Birui ïte rafue jaca saïñena jira, ua eo ebirede.

¹² Iena cai uïñuamona, bie rafuena marefodo jacïruiñeno lloticue. ¹³ ïnïroi diga, Moïseï mïcorï isoï cue uiecona ïbaïñedicue. Naimïe mïcorï ïe uieco ïbaïde, ja muidomo ïe uieco quenirena feioïcaïllana comïni cioïñellena; ia cue lloga rafuena marefodo llocabiticue. ¹⁴ Moïseï mïcorï comïni Jusiñamui rafuena jaca ïnoñedimaci. Naimaci comeciïaï jitaiñena jira, ïnoñedimaci. Moïseï mïcorï rafuena birui judïuaï comïni facaïa, ïena ñia raise cacaiñedimaci. Dani Cristona ïnuamona, naimaci comeciïaï raise cacareïtimaci. ¹⁵ Cristo rafuena birui naimaci ïnoñena muidona, Moïseï mïcorï rafuedo ñia jaidimaci. ¹⁶ Cai Nama dibeïmo bu jaïa, naimïe comeciï raise cacade. Moïseï mïcorï rafuedo naimïedi cai jaïñenana raise uïñote. ¹⁷ Cai Nama Joreño lloiticue. Cristo dibeïmo cai jaïa, naimïe Joreño caïmo jiaï ïte. Cristona cai nabaiïllamona, jeacïno anamo jai ïñedicai. Moïseï mïcorï rafue anamo jai ïñedicai. ¹⁸ Cristomo jai cai duilla jira, naimïena cai comeciïmona raise uïñua jira, ïe ebirede uaina uïñotïcaï. Acaranïmo cai eruaiïllamona, cai abïna cïodïcaï. Ie isoïde. Cai illamona jiaïe comïni Cristona uïñotimaci. Cai Nama Joreño caina canuamona, naimïe ebirena isoï cai ïllena, ïcana jaidïcaï.

4

¹ Jusiñamui cuena duenailamona, cue comecina ocuiñocaida, Cristo rafuena llocana jaidicue. ² Meirede rafuena llofueñedicue. Iena bainino llofueñedicue. Jifuianona omoina llofueñedicue. Omoiri iobitallena, Jusiñamui rafuena meidoñedicue. Jusiñamui cuena ciuana cue uiñuamona, naimie rafuena uanaicinona llofuecabiticue. Cue llofuiana bu raise cacaia, uanaicino cue llofuecabilana uiñoite. ³ Faificana jaidinodi cue mare lloga rafuena raise cacaiñedimaci. ⁴ Taife anamo naimaci illamona, naimie naimacina cacarefitañede. Cristo uai ebirede. Jusiñamui isoi naimie ite. Taifedi Cristo rafuena naimaci raise uiñuana jitaiñede. ⁵ Cue finoca rafuena llofueñedicue; ia Jesucristodi cai Namanana llofuecabiticue. Naimie dibeimo cue maijiamona, omoina canollena, naimie rafuena llofuecabiticue. ⁶ Enirue finua facaise Jusiñamui llote: “Jitiredino nana eniruemo iñellena, useredino mai iite”. Naimiena cue nia uiñoñenia, jeacino anamo cue illamona, cue comeci jitiredinomo ite isoide. Naimiena cuena naimie jai uiñotaja jira, cue comeci useredinomo jai ite isoide. Jesucristo monamo illanona jaie cue ciuanona, Jusiñamui uai ebirede siñonana llofueticue.

Cai comeciai ocuiñocaida #nocana jaidicai

⁷ Enirue ie imuicimona comuidicue; ia Cristo ie mare ebirede rafue cuemo jai ite. Iemona cue lloga rafue cuemona iñenana uiñotomoi; ia ie uai siñonana illamona, Jusiñamui illana uiñotomoi. ⁸ Bie mare rafue cue llofuiamona, navui duere sefuidicue; ia nia llofuecana jaidicue. Iena sefuiruiñedicue. Naga cuemo suide rafuemo raise cacarefiñeno comecina ocuiñocana jaidicue. ⁹ Damierie cuena duere finodimaci; ia Jusiñamui cuena fainonocaiñeno cuena canode. ¹⁰ Eniruemo jaie Jesús ia, duere sefuillamona, ja muidomo fiodaite. Jesús isoi duere sefuicana cue jaia, naiemona niadedi nagarui fiodaiticue. Iemona cuena naimie jillotaja muidona, Jesús siño uaina uiñocana jaidicue. ¹¹ Jesús rafuena cue llua muidona, nagarui damierie cuena meineiacade. Iemona cue jillocabilla jira, Jesús siño uaina uiñotomoi. ¹² Naimie rafue cue llua muidona, cuena meineiacadimaci; ia bie rafuena omoi #nuamona, Jusiñamui illanomo jaca iitomoi. ¹³ Jusiñamui facaina lloraíma jaie cuela: “Cue #nua jira, iena llofueticue”. Naimie isoi cue #nua jira, bie rafuena jiai llofuecabiticue. ¹⁴ Jesús fiodaillamona Jusiñamui naimie jaie jillotate. Iena cue uiñuamona, cai fiodaille mei, caina jiai jillotaite. Jesúmo cai duilla jira, naimie illanomo danomo caina ico itataite. ¹⁵ Omoi facaina nana cue rafue finodicue. Cristo rafuena comini uiñollena, duere sefuidicue. Iemona Jusiñamui naimacina duenailana uiñoitimaci. Jusiñamui dibeimo naimaci illamona, naimiemo iobillacinona fecacabitimaci. Ieri naimiena iobitaitimaci. ¹⁶ Ie jira iena sefuiruiñedicue. Cue maírici fuicana nagarui jaide; ia cue comeci nagarui #nocana ocuiricana jaidicue. ¹⁷ Birui duere sefuidicue; ia iemo cue comecina eo facañedicue. Cristo rafue muidona birui duere cue sefuia, Jusiñamui illanomo ico cue ia, nainomo ebire marena iiticue. Iemo cue comecina eo facadicue. ¹⁸ Cuemo birui suide rafuemo comecina eo facañedicue. Jusiñamui illanomo cue nia cioiñena rafuemo comecina eo facadicue. Bene ite rafue fuite; ia monamo ite rafue jaca fuiñeite. Bene cue duere sefuillacino fuite; ia nainomo cue Nama diga iocire jaca iiticue.

5

¹ Caímo ite abi rifaillemona, Jusiñamui illanomo cai illemona, Jusiñamui jiaie isoide abi caímo itataite. Nainomo cai abi jaca rifaiñeite. ² Birui cue duere sefuillamona, Jusiñamui cuemo ico itatalle abina eo oiacadicue. ³ Cue fiodailla mei, Jusiñamui cue joreño mo jiaie isoide abina itataite. ⁴ Cue jiaie isoide abi cuemo illena, cue jamai fiodaicaiñedicue; ia iena eo oiacadicue. Jusiñamui cuemo jiaie isoide itataiacade abina eo oiacadicue. Cue fiodaille abi ifomo jaca ille abina cuemo iite. ⁵ Jusiñamuidi ie Joreño caímo itatajamona, cai abiaína iese jiai itatajana uiñoticaí. ⁶ Iena cue uiñuamona, nie isoide rafue ia, #nocana

jaca jaidicue. Nia cue fioidañenia, cai Nama illa ecimo nia iñedicue. ⁷ Naimiena birui cioiñedicue; ia naimiena ñnocana jaidicue. ⁸ Iese jaidicue. Cue Nama diga cue illena, fioidiacadicue; ⁹ iadedi nia cue fioidañenia, naimiena jaca iobitaiacaducue. Cue fioidaia, naimiena jiai jaca iobitaiacaducue. ¹⁰ Naimie llua jira, Cristo uicomo ico nana iiticaí. Cai bene finoca rafuena uiñotaite. Marañede rafuena cai bene finua diese, naimiemona ibana feiñoñeiticaí. Mare rafuena cai bene finua diese, naimiemona ibana feiñoiticaí. Ie muidona naimie jitaillacinona jaca finoacaducue.

Jusiñamui diga cai uri illafue

¹¹ Cue Nama uicomo ico cue illemona, iena cue jaciruillamona, naimie dibeimo cominina jai itatacana jaidicue. Jusiñamui cue illana raise uiñote. Cue illana raise omoi uiñuana jitaídicue. ¹² “Cuedi maremedicue” lloñedicue; ia cue abi facaina omoi ñidollena, bie rafuena lloticue. Omoi motomo damerie llofueraini naimaci llofuiacino diga abina iedotimaci; ia naimaci comeciaino iticino diga abina iedoñedimaci. ¹³ “Naimiedi uairico” cuena raitimaci. Iese cue iticuedena, Jusiñamui facaina iese iticue; ie iadedi uairicoñedicue. Omoína llofuellena, omoi facaina maijídicue. ¹⁴ Nie isoidicuenta, Cristo cuena isiruillana cue uiñuamona, jaca llofueiacadicue. Nana comini facaina damie fioidaillana jai ñnoticue. Naimaci jeacino ifomo naimie jai fioidaite. ¹⁵ Nana cai facaina naimie fioidaite. Fioidaillamona Jusiñamui naimiena jai jilloitate. Naimiena nia cai ñnoñenia, dani cai comeciaino ite rafue diga iobidicaí; ia naimiena jai cai ñnua mei, dani cai comeciainona naimiena cai iobitajana naimie jitaide. Ie jira cue illana jai uiñotomoi.

¹⁶ Damerie llofuerainidi jiaínomo eruailamona, naimaci comeciaina facajamona: “Naimaci mare” raitimaci. Jiaicaiño: “Naimaci marañede” raitimaci; iadedi Cristona cue ñnua facaisemona iese cominimo eruaiñedicue. Naimiena nia cue ñnoñenia, Cristona jaie raise uiñoñedicue. “Naimiedi jamai ñima” raillamo comecina facadicue; ia iese naimiemo birui comecina facañedicue. ¹⁷ Cristona cai ñnua mei, naimiemo jai cai duillamona, cai comeciai iuaina meidoticaí. Jai jiaie isoidicaí. Jiaie rafuedo jai jaidicaí. Jaie caino ite rafuedo jai jaiñedicai. ¹⁸ Jusiñamui cai comeciai iuaina meidotade. Cristo fioidaillamona, Jusiñamui dibeimo caina itatate. Iemona naimiena jai nabairedicaí. Naimacimo ie rafuena lollena, cuena fetode, jiaie cominina ie dibeimo itatallena. ¹⁹ Cristo finoca rafue muidona, Jusiñamui dinena cominina nabaiacade. Naimaci jeacino facaina ibana jai oiacañede. Bie rafuena lollena, cuena jai fetode. ²⁰ Cristo cuena oretajamona, naimie facaina llofuecabiticue. Cue llogacinomona Jusiñamui uiñotomoi. Omoimona naimiena bu nia ñnoñenia, Cristo facaina cue illa jira, Jusiñamuina omoi nabaillanona, naimie diga uri i. ²¹ Cristo jeacino jaca finoñede; ia cai jeacino facaina, Jusiñamui jitailla jira, jeacino finodimie isoi jaide. Naimiemo cai duillamona, Jusiñamui jitailla isoi, jai marebicaidicaí.

6

¹ Bie rafuena nia lliacaducue. Jusiñamui facaina cai maijiamona, naimie dibeimo cominina itataticaí. Naimie caina duenaillana uiñoticue. Iena omoi ñnocana jaillana jitaídicue. ² Jaie Jusiñamui cuetatate: Cue jitailla facaise omoi jitaillacinona jai cacadicue. Omoi jilloillena, omoína jai canodicue.

Ero, Jusiñamui birui omoína cacaacade. Birui omoína canuanona, omoína jillotiacade. Ie muidona naimiena ñnocana jai. ³ Bie rafuena omoi ñnoñellena, cue llofuiacinona omoi jamaiñellena, bu diga rafuena comuitaiacaiñedicue. ⁴ Jusiñamui dibeimo cue maijiamona, nie isoide rafuemona ramo cue jiria, cue illamona naimiedi: “Mare” cuena raillana jitaídicue. Eo duere sefuidicue. Diga icaiño damerie cuena duere finodimaci. Diga icaiño ramo jiridicue. ⁵ Damerie cuena fatimaci. Cárcelmo cuena

jonetimaci. Naimaci illanuaimonu cuena raire dotadimaci. Eo cue maijia jira, diga icaiño eo raise iniñedicue. Aime guisoidicue. ⁶ Jearede rafuena ebiruiñedicue. Cristo rafuena uiñocana jaidicue. Iciruiñedicue. Jiainona canocabidicue. Jusiñamui Joreño anamo iticue. Cominina raise isiruiticue. ⁷ Uanaicinona llocabiticue. Jusiñamui uai cuemo illamona, llofuecabiticue. Cue comequina ruidollena, Taifena emodofillena, Jusiñamui jitailla isoi, marecinona finocana jaidicue. ⁸ Damierie cuena marena jai ñaitimaci. Jiaino cuena jeare nia ñaitimaci. Damierie cueri jai iobidimaci. Jiaino cue joreñona jai ñaitimaci. Damierie: “Caina jifuetio” cuena raitimaci; ia nia uanaicinona llocabiticue. ⁹ Damierie: “Jamai bue isoidio” cuena raitimaci; ia jiaino cuena raise uiñuamona, naimaci dinena jamai bue isoiñedicue. Nagarui niadedi fiodaicabiticue; ia nia iticue. Duere sefuicana jaidicue; ia Jusiñamui cue comequina ocuiñotacana nia jaidicue. ¹⁰ Sunaiticue; ia iocire jaca iticue. Dueredicue; ia ailluena comini comequina eo caimaretadicue. Buenidicue; ia Jusiñamuimona ailluena marecinona feiñotitue. Iese jaca jaidicue. Cue illamona: “Naimiedi mare” cuena omoi raillana jitaidicue.

¹¹ Corintomo itino, cue nabaiñiai, cue comequimo ite rafuena marefodo jai llotitue. Cue comequimona omoi diga marena iacaditue. ¹² Cuemona omoina raise isiruiticue; ia omoi dinena nia cuena eo isiruiñedomoi. ¹³ Cue urui ai omoi isoilla jira, omoi diga ñaiticue. Omoina cue isiruilla isoi, cuena omoi isirui.

Jusiñamui cai comequimo illanodica

¹⁴ Creyentedimie mo jearede ramo faitatai raillano, daje isoide rafuedo iaiaiaia jaiñena jira, daje isoi rafuena iaiaiaia comequi lloñena jira, creyente creyenteñedimie diga daje rana namatañena. Aina illena, creyentena iñediñaiñona creyentedimie oñena. Inina illena, creyentena iñedimienena creyentediñaiño oñena. Marecinodo jaiacadimiedi maraiñedicinodo jaiacadimie daje isoi diga nabairinide. Jusiñamuina uanaicinona uiñotimiedi useredinomo jai ite isoide. Jeacino anamo nia itimie jitiredinomo nia ite isoide. Cristo rafuena naimie uiñoñede; ia Cristo rafuena omoi uiñuamona, useredinomo jai itomoi isoidomoi. ¹⁵ Cristodi Taife diga jaca nabairinide. Creyentemiedi creyenteñedimie diga daje isoi inide. Daje isoi comequina facañede. ¹⁶ Creyenteñedimiedi Jusiñamuina sedañede; ia jiraraina sedade. Creyente comequimo Jusiñamui illamona, Jusiñamuina sedade. Nana creyentiaia comequimo Jusiñamui ite. Iena jaiie Jusiñamui llote: Comini motomo iititue.

Naimacina nabaiticue.

Naimaci Jusiñamuiniticue. Cue comininitimaci.

¹⁷ Ie muidona cuena iñoñedino diga daje rana namatañeno.

Naimaci jearede jetaca rafuena abimo oñeno.

Iemona omoina raise feiñoititue.

¹⁸ Omoi Moona iititue. Cue uruiaina jaitomoi.

Siño jitudicue.

7

¹ Cue isiruiganodomoi. Bie llogacino Jusiñamui caimo jai llua jira, naga maraiñede rafuena faionocaida, cai jailla. Naga cai comequina jearetade rafuena faionocaida, mai cai jailla. Jusiñamuina cai jaciruillamona, nana naimie jitaillacinona finocana mai cai jailla.

Pablo cartamo ciegacino diese finodimaci

² Omoi comequimona cuena raise feiño. Buna jeare finoñedicue. Buna jifueñedicue.

³ Maraiñede rafuena jai omoi finuana lloñedicue. Omoimo cue comequina nagarui facaditue. Iena ailli llotitue. Nia cue ia, raire cue fiodaia, omoina jaca uibiñocabiticue.

⁴ Cue llucacinona omoi iñuana raise uiñotitue. Omoiri iobidicue. Omoi diga jai uri iticue. Duere sefuidicue; ia iocire iticue.

5 Macedoniamu navui cue jaidicue, cue comeci uri iñede. Cue dibeimo iñedinomona nagarui duere sefuillamona, cue comeci jarire ite. Cristo dibeimona creyentiaina naimaci itatallemo cue comeci jarire ite. 6 Comeciaina ocuiñedinona Jusiñamui ocuiñotacabilla isoi, Tito billamona, Jusiñamui cue comeci ocuiñotade. 7 Cue dine naimie ria, iocire iticue. Omoimo ite rafue cue cacajamona, jiai iocire iticue. Cuena omoi cioacanana llote. Cue comeci jarire illari sunaitomoi. Cuena ridoiacadomoi. Iena cue cacajanona, iocire iticue. 8 Carta omoi dine navui oredicue. Iena omoi feiñua mei, sunaitomoi; ia iena cue oretajari birui sunaiñedicue. Navui ieri sunaiticue; ia iena omoi feiñua mei, iemona dallu omoi sunailla jira, jai iocire iticue. 9 Omoi sunaillana jitañedicue; ia iemona Jusiñamui dibeimo omoi comeci iuai omoi meidua jira, iocire iticue. Cue cuega carta muidona iciriñedomoi; ia Jusiñamui jitailla isoi sunaitomoi. 10 Jusiñamui jitailla isoi, ie jeacino facaina bu sunaillamona ie comeci iuai Jusiñamui dibeimo meidoia, sunaiñede; ia bu jamai sunaillamona ie comeci iuai Jusiñamui dibeimo meidoñenia, faifite. Jusiñamui diga jaca iñeite. 11 Jusiñamui jitailla isoi omoi sunaillamona, omoi comeciaina raise finodomoi. Maraiñede rafue dibeimo iacaiñedomoi. Iena eo jitañedomoi. Jusiñamui duere sefuitallicino anamo iacaiñedomoi. Cuena dane cioacadomoi. Jusiñamui jitaillacinona eo finoacadomoi. Jusiñamui dibeimo naimie illena, maraiñede rafuena finodimiena duere finodomoi. Nana bie rafuena raise fuidodomoi. 12 Carta navui omoi dine cue oretaia, maraiñede rafuena finodimieno cue comeciaina eo facañedicue. Naimiemona duere sefuidimieno cue comeciaina eo facañedicue. Cuemo omoi comeciaina facajana omoi uiñollena, navui cueticue. Jusiñamui iena uiñote. 13 Ie jira cue comeciaina ocuiñoticue. Tito jiai iocire illa jira, dane iobidicue. Naimie comeciaina caimare omoi itataja jira, iobidicue. 14 Omoi dine Tito nia jaiñenia, naimiemona omoiina lloticue. “Naimaci ona feiñotimaci. Naimaciri iobidicue” naimiemona navui lloticue. Iese naimiena omoi feiñua jira, ieri meidaiñedicue. Omoimo uanaicinona jaca lloticue. Naimiemona cue llua isoi jiai suide. 15 Naimie llofuiacino omoi ñinoiacana jira, naimie omoiina birui raise isiruite. Meiruoicaida, comeciaina jarire illamona, naimiena feiñotomoi. 16 Omoiina raise uiñoticue. Cristo ñnocana omoi jaillana raise ñnoticue. Omoiri iocire iticue.

8

Creyentia Jusiñamuimo ucubena fecaja rafue

1 Cue amatiai, omoimo jiaie rafuena lloiacadicue. Jusiñamui naimacina canuamona Macedoniamu ite creyentiaina omoi uiñuana jitaidicue. 2 Eo duere sefuidimaci. Jiai eo dueredimaci; ia iocire illamona, jiaie creyentiamu ucubena caidiñeno fecacabidimaci. 3 Naimacimo ite ucube diese fecadimaci. Iena uiñoticue. Naimaci jitailla jira, naie baifemo fecadimaci. Naimacimo iese fecajana jaca lloñedicue. 4 Naimacimo iese lloñedicue; ia iena naimaci eo fecaacana jira, jiaie creyentiaina canollena, cuemo iena eo jicanotimaci. Ucube diga jiaino creyentiaina naimaci canuana cue llua eo jitaidimaci. 5 Cue comeciaina facaja isoi, fecañedicue. Ucubena fecadimaci; ia: “Cai Nama dibeimo maijiacadica” jiai llotimaci. Nie isoide rafuena naimaci finuana cue ocuillena, Jusiñamui jitailla isoi, jitaidimaci. 6 Omoi dine Tito dane jaillana jitaidicue. Omoi dine naimie navui ia, ucube omoi uana naimie canode. Iemona janore tainedomoi. Jiaie creyentiaina omoi canuana raise fuiduana jitaidicue. 7 Cristona ñnocana jaidomoi. Iena jiaino llocabitomoi. Cristo rafuena raise uiñotomoi. Cristo jitaillacinona eo finocana jaidomoi. Cuena jiai isiruitomoi. Ie muidona omoi ucube diga, jiaie creyentiaina omoi raise canuana jiai jitaidicue. 8 Omoiina iese raire lloñedicue. Macedoniamu ite creyentiaina eo canuana omoi uiñuamona, jiai creyentiaina omoi canoia, Cristona omoi isiruillana uiñoticaia. 9 Cai Nama Jesucristomona cai fueua. Naimie cana duenaillana uiñotomoi. Ie Moo ecimo naimie nano illamona, naga ra naimiemona ite; ia eniruemo ie billamona,

caína canollena, ñimana jaillanona, duere ite. Iemona Jusiñamui rafuena cai cacaja jira, duere iñedicaí. ¹⁰ Ie jira omoímo bie rafuena lloiacadicue. Navuidi año ucube eenuana tainedomoi. Iena finoacadomoi. Ie fuiduana jai jitaídícue. ¹¹ Omoí jitaillamona bie rafuena fuido. Omoímo ite ucube díese feca. ¹² Ailluena ucubena omoímo iñenia, dama iesede. Omoí jitailla jira, omoímo ite ucube díese omoí fecaia, Jusiñamuimona mare; ¹³ ia omoí jitailla rana omoí ollena, omoí ucube iñeni raillano, omoí jitailla baífemo omoí fecajana lloñedícue. ¹⁴ Jiaíe creyentiaímo ra birui raise iñena jira, naimacína omoí canuana jitaídícue. Omoí ra íco iñenia, naimaci dínenona omoína canuana jitaídícue, nana omoímo daje isoi omoí ra illena. ¹⁵ Moisés micori illa facaise ite cominimona cai fueua. Naimacína jaíe íese cueba: “Jusiñamui oretaga guiga ramona ailluena guillena, nagarui damierie iraiuidímaci. Jiaíno janore guillena, iraiuidímaci; ia coniniri fecajamona, imaci jitailla díese nagarui nana guitímaci”. Ie muidona omoímo ite ucubemona naimaci jitailla ra illena, jiaíe creyentiaímo omoí fecajana jitaídícue.

Pablo Titona ñaite

¹⁶ Omoí dine Tito dane oretaiacadícue. Cue isoi naimie omoímo comecína facade. Omoína canoacade. Naimie comecína Jusiñamui íese itataja jira, Jusiñamui iobidícue. ¹⁷ Omoí dine jaillena naimie mo lloticuemo, naimie dinena: “Jee” raite. Naimie mo nia íese cue lloñenia, omoína naimie eo canoiacana jira, naimie omoí dine jaille mo íe comecína facade. Omoí dine raíre jaite. ¹⁸ Naimie díga jiaímie oretaitícue. Naga nairaímo ite creyentiaídí: “Cristo rafuena eo raise llofuecabití” naimiena raitímaci. ¹⁹ Cue díga jaillena, naimiena fetodímaci. Dueredíno mo omoí ucubena cue uillena, cue díga naimie jaite. Iemona cai Namana iobitaitícaí. Iemona nana creyentiaídí naimacína cue canuana uíñoitímaci. ²⁰ Omoí ucubena raise cue sedajana jitaídícue. Iemona: “Pablo cai ucube fíide” omoí llua jitaíñedícue. “Iena Pablo raise fecañede” omoí llua jitaíñedícue. ²¹ Iena raise marena sedaacadícue. Jusiñamui iena uíñote. Nana creyentiaí iena uíñuana jiaí jitaídícue. ²² Iaímaiaí díga jiaímiena jiaí oretaitícue. Naimie Cristona eo ñnocana jaillana raise uíñotícue. Omoí rafuena naimie fidiano, jiaíe creyentiaína omoí canuana naimie ñnuanona, omoí dine naimie eo jaíacade. ²³ Omoímo Titona bu jicanoiá, naimacímo naimiena raise llono. Danomo Cristo díbeímo maíjídíco. Cue díga omoína canode. Jiaíe iaímaiaína bu jicanoiá: “Jiaíe creyentiaí iaímaiaína fetuamona bitiaímaiaí” llono. Cristona iobitaiacadíiaímaiaí. ²⁴ Cuena omoí isiruillamona: “Omoí mare” omoína cue llua mona, naimacína raise nafue. Nana cue jitailla rafuena omoí finuana naimaci uíñuana jitaídícue. Omoí ucubena eenuana raise fuiduana jitaídícue. Iena omoí finuamona, abído naimaci bia, naimacína oretaga creyentiaímo iena lloítímaci.

9

Jiaíe creyentiaína canollena, omoí ucube olle rafue

¹ Bie rafuena omoí jai uíñua jira, iena dane lloñeítícue. ² Ucubena omoí jai fecaacana uíñotícue. “Benomo Macedoniamoi ite creyentiaímo omoíri iobidícue” llocabitícue. “Navuidi añomona fecaacadomoi” llocabitícue. “Acaya railla provinciamoi ite creyentiaí fecaacadímaci” llocabitícue. Iese omoí illamona, bene ite creyentiaí jiaíno creyentiaína jiaí canoacadímaci. ³ Iese uíñotícue; ia omoína cue canollena Titona oretaitícue, cue jitaillacino omoí raise fuidollena. Ucubena dajena uana raíre jitaídícue. ⁴ Omoí díne Macedoniamoi ite creyentiaí díga cue rillanona, omoí ucube dajena nia iñenia, íese omoína cue lluaconi meidaitícue. Omoí dí jiaí meidaitomoi. ⁵ Ie muidona Tito idai jaillana jitaídícue. Ucube dajena uana omoí llua isoi, omoína canoite. Omoí ucube dajena uana lloiacaiñedícue; ia omoí comeciaímona jiaíno creyentiaína canuana omoí jitailla jira, iena jitaídícue. ⁶ Jiaíe rafuedo iena lloítícue. Janore iduaina bu ria, janore llisillana oite. Ailluena iduaina bu ria, ailluena llisillana oite. Cue llua

jira, omoï ucube dajena oia, eo caimare iñeitomoi; ia omoï comeciai jitaillamona omoï ucubena dajena oia, eo caimataitomoi. ⁷ Ucube dajena omoï oia, nagamie ie comecina facajamona fecaja. Naimie jitaiñenia fecañena. Naimie jitailla jira, naimie fecaja. Jiaimie omoïna ñai raillano, “Cai ucubena fecaiticai” raiñeno; ia o jitaillamona iena feca. Comeciai iocire illamona omoï fecaia, Jusiñamuina iobitadomoi. Iena Jusiñamui jitaide. ⁸ Jusiñamui omoï jitailla baifemo omoïmo fecarede. Nana omoï jitailla ra omoïmo naimie illamona, jiaïnomo omoï fecaia, naimacina canorenitomoi. ⁹ Jusiñamui facaina lloraima micori iena jaie cuega: “Jusiñamuina ñnotimie dueredinona canocabide. Mare rafuena finocana jaide”. Ie omoï finollemo, Jusiñamui omoïna canoite. ¹⁰⁻¹¹ Ero, illimo maijirainimo Jusiñamui iduaina itatate. Iena sicuamona, monaillamona, nainomo maijirainidi naiemona guicabite. Ie isoide. Omoïmo Jusiñamui nana omoï jitailla rana jaca itataite. Iemona jiaie creyentiaïna raise canorenitomoi. Omoï ucubena cai uia, iena jiaie creyentiaï feiñoia, Jusiñamuimo iobillacinona eo fecaitimaci. ¹² Ucubena omoï oretaia, duerede creyentiaïna canodomoi. Omoï muidona naimaci Jusiñamuimo iobillacinona jiaie fecadimaci. ¹³ Iemona Cristona omoï raise ñnuana uiñoitimaci. Ieri Jusiñamuimo iobillacinona fecaitimaci. Omoï iga ucube facaina iobillacinona Jusiñamuimo fecaitimaci. Naimacina canoitomoi. Iemona nana jiaie creyentiaïna canoitomoi. ¹⁴ Omoï facaina Jusiñamuimo jaitimaci. Omoïna naimaci isiruillamona, Jusiñamui omoïna eo canuana naimaci uiñuamona, omoï facaina jaitimaci. ¹⁵ Jusiñamui caina eo canua jira, iobillacinona naimiemo cai fecallena, cai uai raise iñede. Uainicaidicai. Naimie eo mare. Naimiena cai iobillasa.

10

Cai Nama Pablona fetua jira, ie uai Pablomo ite

¹ Jiaie rafuena lloiacadicue. Omoïmona damierie llotimaci: “Cai ñine Pablo ia, naimiedi caina jaciruite. Riire caimo naimie rafuena lloñede; ia cai ñine naimie iñenia, riire caimo naimie rafuena llote” llotimaci. Ero, Cristo iciricabiñena isoi iacadicue. Naimie isoi omoïmo lloiacadicue. ² Riire omoïmo lloiacaiñedicue. Omoïmona damierie cuena raitimaci: “Pablodi Cristona ñnoñedimie isoi icabite”. Naimaci iese ñia lloia, omoï ñine cue ria, naimacimo jaciruiñeno riire lloiticue. ³ Comena iticue; ia comini ñiga cue rafue iñede. ⁴ Taife ñibeimo itino ñiga cue rafue illa jira, jamai cue uai ñiga naimacina llïcaitañeiticue; ia Jusiñamui uai ñiga naimacina llïcaitaiticue. ⁵ Cristo uai ñiga Jusiñamui ñibeimo iñedino llucinoconi uainicaitaticue. Abina ñedotimaci; ia Jusiñamuina uiñoiacaiñedinona uainicaitaticue. Naimaci comeciaina facajacinona uainicaitaticue, naimacina Cristo rafuena cue ñnotallena. ⁶ Cristo anamo omoï raise ia, cue lloga uaina omoï raise ñnocana jaia, omoïmona raise ñnoñedinona duere finoiticue. ⁷ Cominimo jamai eruaillamona: “Naimaci mare” raitomoi. Jiaicaiño: “Naimaci maraiñedimaci” raitomoi; ia naimaci comeciaina uiñoñedomoi. Omoïmona damie ñibai comecina facade: “Cristomona cue uai illamona, Pablo baifemo faiticue”. Cue ñinena raiticue: “Cristomona cue uai illamona, daje isoidicoco. Cue baifemo naimie faiñede”. ⁸ Abina ñedoñedicue; ia cue abï ñedoia, ieri meidaiñedicue. Cristomona cue uai illa jira, cue uai ite, naimie ñibeimo omoï raise itatallena. Omoïna cue canollena cue uai ite. Cristo ñibeimona omoïna itataiacaiñedicue. ⁹ Omoïmo riire llollena cue uai ite; ia cue carta ñiga omoïna jacinaitaiacaiñedicue. Omoïna canoiacadicue. ¹⁰ Omoïmona damierie cuena raitimaci: “Cartana Pablo cueia, eo riire caimo llote; ia cai motomo naimie ia, ie uai riinide. Cristo rafue raise llwana raise uiñoñede”. ¹¹ Iese iñedicue. Omoï motomo cue ia, cartana cue cueia, daje isoi llofuecabiticue. ¹² Omoïmona damierie coniniri raitimaci: “Maredicai”. Iese coniniri naimaci comeciaina facaia, abina uiñoñedimaci. Naimaci isoi cue illemo cue comecina facañedicue. ¹³ Jusiñamui cue maijiana cuemo llote. Naimie llua baifemo jaiñeiticue. Omoï ñine ie rafue cue llofuellena, naimie jitaillanona, omoï ñine navui jaidicue. ¹⁴ Jusiñamui jitailla rafue baifemo jaiñedicue. Cristo rafuena omoï

motomo nano llofueraimadicue. ¹⁵ Jiaie llofueraini llofuiamona buena oiacañedicue. Cristo rafuena omoi ñinocana jaillamona, omoi motomo cue illamona, Jusiñamui jitailla diese omoina canoacadiecue. ¹⁶ Jiaie nairaia illanuaimo Cristo rafuena nia lloiacadiecue; ia nainomo jaie llofueraima llofuiamona buena oiacañedicue. ¹⁷ Bu abina iedoiacania, cai Nama finua rafueri naimie abina iedua. ¹⁸ Ie llofuia diga bu abina iedoia, Jusiñamui naimie llofuiaçinona: “Mare” raiñeite; ia Jusiñamui finoca rafueri bu abina iedoia, Jusiñamui naimiena: “Mare” raite.

11

Pablodi Cristo oretaganona abi caitadinona llote

¹ Abina cue raise uiñoñenia, cue diga iciriñeno. Cue llamo nia cacarei. ² Omoimo Jusiñamui comecina facaja isoi, omoimo comecina facadiecue. Cue muidona Cristo rafuena omoi cacaja jira, Cristona uiñotomoi. Ima diga nia iñediñaiño, ie inina illena, ie jitaillamiemo ie moo fecaja isoi, Cristomo omoina fecaacadiecue. Omoimo jeacino iñena isoilla jira, omoina Cristomo fecaacadiecue. ³ Jiaie rafuemo omoi comeciaina facacana omoi jaillamo jacinaitiecue. Jaie jaiona eruailamona, Taife Eva micorina jifute. Jiaie llofueraini Cristo rafuedo omoi raise jaiñenana itatajamo jacinaitiecue. ⁴ Diga llofueraìnina feiñotomoi. Jesús rafuena jiaiforiedo llofuecabitimaci. Cristo rafuena cue isoi llofuecabiñedimaci. Jusiñamui Joreño omoimo illana cue isoi llofuecabiñedimaci. Cue mare lloga rafue isoi llofuecabiñedimaci; ia naimacina jaca feiñotomoi. Ie jira Cristo ñibeimona omoi jaillemo jacinaitiecue. ⁵ “Cristo oretaganodicaie” raitimaci; ia naimaci cue baifemo faiamo cue comecina facañedicue. ⁶ Naimaci isoi rafuena jino llua na eo uiñoñedicue; ia Cristo rafuena eo raise uiñotiecue. Nana cue finoca rafuemonona omoina iena diga icaiño uiñotadiecue. Uanaicinona omoina jaca llofuecabitiecue. ⁷ Omoimo Jusiñamui rafuena navui cue lloia, omoina ibatañedicue. Omoimona ucubena jicañedicue. Cue ucube ollena, dama jiaie rana maijidiecue. Iese cue illa jira, damierimona marañede rafuena finodiecue; ia cuemona eo mare rafuena jai uiñotomoi. Iemona abina jai uiñotomoi. ⁸ Omoina cue canollena, jiaie creyentiamona ucubena feiñotiecue. Omoi facaina naimacimona feiñotiecue. ⁹ Rana cue jitailla facaise omoimona ucubena jicañedicue; ia Macedoniamona bite creyentiaie cuena canodimaci. Omoimona navui ucubena cue oñena jira, birui cue oñena jira, cuemona ibana oñeitomoi. ¹⁰ Cristo cue illana uiñuamona, naimie uanaicimodo cue jaillamona, nana Acaya railla provinciamona iena jaca lloitiecue. ¹¹ Omoina cue isiruilla jira, ucubena omoina jicañeitiecue. Jusiñamui cue comecina raise uiñote. ¹² Abina ieduumona omoi motomo damierie: “Pablo isoi llofueticaie” raitimaci. Ucubena omoimona feiñotimaci. Naimaci isoi iacañedicue. “Daje isoi maijidicaie” naimaci raiñellena, ucubena omoimo jaca jicañeitiecue. ¹³ Cristo oretaganona abi caitadinodimaci. Cristo ñibeimo raise maijiñedimaci. “Cristo caina oretate” raicabitimaci; ia Cristo naimacina oretañede. Jifuecana jaidimaci. Cristo oretajanona itimacina jaidimaci. ¹⁴ Ieri raijicañedicue. Comina jifuellena, Taife Jusiñamui jaienicina abi caitadimiena jaicabide. ¹⁵ Taife ñibeimo itinodi Jusiñamui ie mare rafuena llofueraìnina jaicabidimaci. “Cai lloga rafuedo omoi jiaia, Jusiñamuimona marebicaitomoi” llofuecabitimaci. Naimaci finolle rafue diese Jusiñamuimona duere sefuitimaci.

Cristo oretagamiena naimie illa jira, Pablo duere sefuide

¹⁶ “Pablo abina uiñoñedimie” raillamo omoi comeciaina facañeno; ia iese cuena omoi comeciaina facaia, cue llamo nia cacarei. Omoi motomo ite llofueraini abina iedua isoi, iacañedicue; ia janore cuemo iticino diga abina iedotiecue. ¹⁷ Abina ieduumona cue lloia, cai Nama Cristo isoi lloñeitiecue. Naimie cuemo llua jira, iena lloñeitiecue; ia abina uiñoñedimie isoi lloitiecue. ¹⁸ Omoi ñine damierie llofueraini naimaci illa diga abina iedua isoi lloitiecue. ¹⁹ Abina uiñoñedimaci; ia: “Abina eo raise uiñoticaie” omoi

lluamona, naimaci llofuiaçinona cacacabidomoi. ²⁰ Naimaci anamo omoïna itataia-cadimaci. Omoïmo ucubena jicacabidimaci. Omoïna ocuicabidimaci. Icirillamona, omoi uiecuaina bofedimaci. Iese omoïna finocabidimaci; iadedi buena naimacimo finoñedomoi. Ibana oñedomoi. ²¹ Iese omoïmo finoñedicue, omoïna cue jaciruilla jira.

Cue illana omoïmo ja lloiticue. Nibai abina raise uiñoñedicue; ia naie llofueraini isoi cue illa diga abina iedoiticue. ²² Omoi motomo ite damierie llofuerainina ja lloiticue. Judíuai uaido ñaitimaci. Iena jiai ñaiticue. Judíuai nairai imaci. Daje isoidicue. Judíuai nairai imiedicue. Abraham micori uruiaidimaci. Jiai naimie micori uruedicue. ²³ “Cristo dibeimo maijidicai” raitimaci. Abina uiñoñedimie isoi lloticue; ia naimaci baifemo Cristo dibeimo maijidicue. Naimaci baifemo duere sefuidicue. Diga icaiño cárcelmo iticue. Diga icaiño fajamona duere sefuidicue. Diga icaiño niadedi fiodaicabiticue. ²⁴ Judíuai comini cinco digacaiño cuena fatimaci. Naga icaiño treinta y nueve digacaiño rao diga cuena jicuidimaci. ²⁵ Dacaiño amani radosi diga cuena fatimaci. Nofici diga cuena dacaiño fairinotimaci. Dacaiño amani bote diga namo anabaiticue. Darui naio monaillaimo botedo jamai fuiri baiticue. ²⁶ Eo jacirede illedo jaicabidicue. Firiruidino eo illa jira, jaciruioicaida jaicabidicue. Cue judíuai cominimona duere sefuicabidicue. Judíuaiñedinomona duere sefuicabidicue. Naimaci illanuaimo cue ia, diga icaiño duere sefuidicue. Naisodo cue macaria, duere sefuicabidicue. Monailaido cue jaia, duere sefuicabidicue. Cristo rafuena llorainina abi caitadinomona jiai duere sefuicabidicue. ²⁷ Cue ucube ollena, duere maijicabidicue. Diga icaiño raise iniñedicue. Diga icaiño aime guiticue. Rollimemona duere sefuicabidicue. Iniroininamona jiai duere sefuidicue. ²⁸ Diga jiaie rafuemona duere sefuicabidicue. Duenaillamona naga creyentiai illanuaimo cue comecina nagarui eo facadicue. Iemo nagarui cue comecina cue facaia, duere sefuicabidicue. ²⁹ Nie creyente Cristo rafuedo nia raise inoñenia, naimiemo cue comecina eo facadicue. Nie creyentena jiaimie jeacino finotaia, naimiemo cue comecina facadicue. ³⁰ Cue abina iedoiacania, jamai bue isoidimiedicuena lloiacadicue. ³¹ Cai Nama Jesús Moona Jusiñamui illanona, Jusiñamuimo jaca cai iobillasa. Naimiedi uanaicinona cue llua uiñote. ³² Cue illana nia lloiacadicue. Damascomo jaie creyentena cue jailla facaise cuena gaitatallena, Aretas raila illaïma anamo ite gobernordí nairai llaïga nasena sedatate; ³³ iadedi llaïgafo ecimo ite jofo a ite ventanamona cirigai isoide diga ana jaillanona, naiemona jillodicue.

12

Pablo nicaïrilla isoide rafuena ciode

¹ Abina iedoiacaiñedicue; ia cue illana janore nia lloiticue. Iemona bue oñeiticue; ia cue illa abina riidoiacadicue. Cristo cuemo acataga rafuena lloiacadicue. Cristo cuemo jai llua rafuena jiai lloiacadicue. ²⁻³ Cristomo cue duillamona, catorce años jaie illanona, monamo naimie illamona, naimie dine Cristo cuena uite. Nicaïrilla isoi cue joreño, cue abi diga, uillana raise uiñoñedicue. Nibai dama cue joreña uite. Dama Jusiñamui iena uiñote. Naimie mare illanomo iticue. ⁴ Nainomo cue ñainina rafuena cacadicue. ⁵ Ie diga abina iedoñeiticue. Cue jamai bue isoidimie diga abina iedoiticue. ⁶ Uanaicinona cue lluamona cue abina iedoiacania, tainona abina iedoñeiticue. Omoi cuena ciuamona, cue lloga rafuena omoi cacajamona, cuena uiñotomoi. Ie baifemo cuena omoi comeciaina facajana jitaiñedicue. ⁷ Naimie rafuena cuemo acataja jira, bie rafuena cue cacaja jira, ie diga eo abina cue iedoñellena, tagairede ra cuemo illa isoi Jusiñamui cuemo illamona, duere sefuidicue. Taife jaienici cuena duere finua isoi, duere sefuicabidicue. ⁸ Cuemona iena naimie oni oretallena, cai Namamo dacaiño amani jiidicue; ⁹ ia cuemo llote: “Ona jillotañeiticue; ia cue ona duenaillacinodo jaca ocuiñoitio. O abi eo mairiñenia, ona cue canuana raise uiñoitio” llote. Cue abi eo mairiñenia, ieri iocire iobiticue. Naimie uaido cue jaillamona, cuena naimie canuana raise uiñoiticue. ¹⁰ Cristo muidona duere cue

sefuia, cue comecina ocuiñoiticue. Cue jamai bue isoia, cuena bu jeare ñaia, bumona duere cue sefuia, cuena bu duere finoia, cue comecina ocuiñoiticue. Cue duere sefuia, cue Nama cuena eo canode.

Pablo Corintomo ite creyentiaimo comecina eo facade

¹¹ Abina uiñoñedimie isoi iticue. Cue illana cue cuia jira, abina uiñoñedimie isoi iticue; ia iese cuena itatatomoi. Cuena riidoñedomoi; ia jiaino eo mare railla llofuerainina raise feiñotomoi. Jamai bue isoidicue; ia naimaci cue baifemo faiñedimaci. ¹² Omoi motomo siño rafuena cue finua jira, Jusiñamui cuena oretajana uiñotomoi. Cristo rafuena sefuiruiñoeno omoi motomo iticue. ¹³ Cuemona duere sefuiñedomoi. Jiaie creyentiaí omoi baifemo faiamo cue comecina facañedicue. Nibai iese omoi comeciaina facadomoi. Omoimo ucubena cue jicañena jira, jiaie creyentiaí isoiñedomoi. Iena omoi gaiñenia, iena feita. Cue diga iciriñoeno.

¹⁴ Menacaiño navui omoi dine jaidicue. Omoi dine dane jaiacadicue. Omoimo ucubena jicañeiticue. Omoi rana jitaiñedicue; ia Cristo dibeimo omoi illana, naimiena omoi raise ñnuana jitaidicue. Cue uruiaí isoidomoi. Rana eenoñedomoi, omoi mootiaí iena; ia omoi mootiaí rana eenotimaci, omoi iena. Ie isoide. Cue uruiaí isoi omoi illamona, omoimona rana jitaiñedicue; ia omoimo rafuena iacadicue. ¹⁵ Nana cuemo ite ra omoimo fecaacadicue. Nana cue comecimo iticinona omoimo jiaí iacadicue. Omoina eo isiruticue; ia cuena janore isirutomoi. ¹⁶ “Caimona ucubena jicañedio; ia jifuecana caimona otio” raicabitomoi. ¹⁷ Ero, omoi dine menamiena cue oretajamona, omoimona ¿nie isoide rana otiaímaiaí? ¿Niese omoina jifuetiaímaiaí? ¹⁸ Omoi dine Titona oretaticue. Jiaisie creyente imiena Tito diga oretaticue. ¿Niese Tito omoina jifuate? Omoimo coco comecina daje isoi facadicoco. Daje rafuedo jaca jaidicoco. Omoina jaca jifueñedicoco. ¿Niese omoi comeciaina raitomoi? ¹⁹ “Caimona ie abina riidote” cuemo nibai comecina facacabidomoi. Jusiñamui cuena uiñuamona, Cristomo cue duillamona, bie rafuena lloticue. Cue isiruiganodomoi. Cristo dibeimo omoi raise illana, naimiena raise omoi ñnollena, bie rafuena llocabiticue. ²⁰ Omoi dine cue ria, cue jitailla isoi omoi iñenamo jacinaiticue. Iese omoi ia, omoi diga cue illana jiaí nibai gaiñeitomoi. Ieri cue comeci jarire ite. Nibai nia uaina uaitatomoi. Nibai nia abina iedotomoi. Nibai nia iciricabitomoi. Nibai nia omoi rana caidicabidomoi. Nibai nia jiaínona jeare ñaicabitomoi. Nibai nia jiaíno joreñoña ñaicabitomoi. Nibai nia abina uradoidomoi. Nibai daje isoi comeciaina nia lloiñedomoi. Omoi iese illari cue comecidi jarire ite. ²¹ Omoi dine dane cue ria, omoi muidona Jusiñamui cuena meidaitajamo jacinaiticue. Cristo dibeimo omoi raise iñenia, sunaiticue. Jearede rafuena omoi nia faínonocaiñenia, omoi aiñede riño diga illana omoi faínonocaiñenia, omoi iniñede iima diga illana omoi faínonocaiñenia, sunaiticue.

13

Iraicaiño Pablo naimacina llofuate

¹ Menacaiño omoi dine navui jaidicue. Omoi dine dane jaiticue. Coninimo omoi rafue ia, iena raise fino. Moisés micori jaie llote: “Mena iaímaiaí daje isoi lloillamona, daje amani daje isoi lloillamona, maraiñedinona finodimiena duere finua”. ² Maraiñede rafue finodinomo navui riire lloticue. Nana omoimo riire lloticue. Omoi dine navui cue illa isoi, iena dane riire lloiacadicue. Omoi dine cue ria, naimaci comeciái iuai nia meidoñenia, naimacina duere finoiticue. ³ Iemona Cristo uai cuemo illana uiñoitomoi. Naimiena omoi ñnuamona, naimie uai siñonana uiñotomoi. Jamai uaido naimie omoina jillotañede; ia ie siño uaido omoina jai jillotate. ⁴ Jamai bue isoidimie isoi cruzmo naimie fiodaite; ia fiodaillamona Jusiñamui uaido jillode. Cristomo cue duillamona, jamai bue isoidimiena iticue; ia Jusiñamui uai cuemo illamona, omoimo ite rafuena raise finoiticue. ⁵ Cristona ñnocana omoi raise jaillemo omoi comeciaina faca. Cristo

jitaillacino omoi finollemo comeciaina faca. Cristomo omoi duillamona, Cristo omoi diga illana uinotomoi. Cristomo omoi duiñenia, naimie omoi diga nia inede. ⁶ Cristo omoi diga illana omoi uinuamona, Cristo uai cuemo illana jiai uinoitomoi. ⁷ Marañedicino omoi finocana jaillana jitañedicue. Jusiñamui iena jiiiticue. Omoi comeciiai iuai omoi meidoñenia, Cristo uai diga omoina duere finoacaiñedicue. Omoi comeciiai iuai meiduana jitaidicue; ia Cristo uai diga omoina cue duere finoñenia, Cristo uai cuemo illana nabai uinoñeitomoi. ⁸ Cristomona cue uai illana omoi uinollena, marañedicino omoi finuana jitañedicue. Mare rafuena omoi finocana jaillana jitaidicue. Iena finocana jiai jaiacadicue. ⁹ Cristo rafuena inocana omoi raise jaia, iobidicue. Omoimo cue riire lloñenia, iobidicue. Cristo jitaillacino eo raise finocana omoi jaillena jicabidicue. ¹⁰ Birui bie rafuena cueticue. Omoi dine inedicue; ia bie cartana omoi feiñua mei, omoi comeciaina raise finuana jitaidicue. Cai Namamona cue uaina feiñoticue. Iedo omoimo riire lloiacaiñedicue; iadedi iedo naimie dibeimo omoi raise itataiacadicue. ¹¹ Cue amatiai, bie carta cuiana jai fuidoacadicue. Marena omoi i. Omoi comeciaina raise fino. Cue lloga rafuemo raise cacarei. Nana omoi creyentiai comeciiai daje isoi lloicana jai. Coniniri uri omoi i. Iemona Jusiñamui omoina isiruillana uinoitomoi. Jusiñamui omoina uri itatajana uinoitomoi. ¹² Nana creyentiaina eo caimare uaido. ¹³ Nana cue diga ite creyentiai imaci uaina oredimaci. ¹⁴ Cai Nama Jesucristo omoina jaca duenaite. Jusiñamui omoina jaca isiruillamona, coninina omoi isirui. Naimie Joreño omoimo illamona, coninina omoi nabai. Iese jitaidicue. Mai. Macaibaite. Pablodice.

GALACIAMO ITE CRISTONA HNOTINOMO PABLO ORETAGA RABE

Uaiduacino

¹⁻² Galaciamo ite creyentiaí, omoí dine bie carta oredicue. Pablodícue. ¿Nigacino? ¿Nie isoidomoí? Omoímo cue uai oredicue. Nana cue diga ite creyentiaídi imaci uaina jiaí oredimaci. Jesucristo fetocamedicue. Cai Moo Jusiñamui jiaí fetocacue. Jesucristo fiodaillamona, Jusiñamuidi naimiena jillotate. Mare rafuena cue lollena, cuena orediaímaiaí. Comini cuena oreñedimaci. Cue lloga uaina cominimona jiaí oñedicue. ³ Cai Moo Jusiñamui, cai Nama Jesucristo diga, omoína jai duenaite. Iena uiñocana mai omoí jai. Omoína uri jai itatatiímaiaí. Iena omoí uiñocana mai omoí jai. ⁴ Cai Moo Jusiñamui jitailla isoi, birui ite marañedicinomona cai jilloillena, cai jeacino facaina Cristo fiodaite. ⁵ Cai Moona jaca cai iobillasa. Iena jitaídícue.

Pablo lloga rafuedi jaca dajede

⁶ Jusiñamuina raire omoí fañonocaillari rajicaídícue. Cristo díbeimo omoí illena, omoína Cristo duenaillamona, Jusiñamui omoína jai uaidote; iadedi omoí jeacinomona omoí jilloillena, jiaíe rafuedo jai jaidomoí. ⁷ Jiaíe mare rafue jaca iñede; iadedi Cristo rafuena jiaíforiedo llofuiamona dajerie omoí comeciána uri itatañedimaci. ⁸ Jesucristo rafuena omoímo jaie lloticaí. Jiaíe rafuena lloticaídena, Jusiñamui rícaillafue anamo nia cai illasa. Jusiñamui jaienici jiaíe rafuena llotena, Jusiñamui rícaillafue anamo jiaí naimie illasa. ⁹ Omoímo jaie iese llotícue. Dane ja lloitícue. Cai llua isoi Cristo rafuena omoímo bu lloñenia, Jusiñamui rícaillafue anamo naimie illasa. ¹⁰ Comini cueri iobillana jitaíñedicue; iadedi Jusiñamui cueri iobillana jitaídícue. Cominina iobitaiacadícue, Cristo díbeimo nia maijñedicue.

Ie oretagamiena jaillena, Cristo Pablona fetua rafue

¹¹ Cue amatiaí, cue lloga rafuena omoí raise uiñuana jitaídícue. Omoí jeacinomona omoí jilluana jaie llotícue. Bie rafuena comini comeciái facajacinomona oñedicue. ¹² Cominimona oñedicue. Bu jaca cuena iena llofueñede; iadedi Jesucristo cuena uiñotade. ¹³ Jesucristona nia cue ñnoñenia, cue judíuai einamaci lloga rafuedo cue jaillana jai fidídomoí. Cristona hnotinona jaie eo duere finodícue. Naimacina fuidoacadícue. ¹⁴ Cue einamaci jaie llua isoi, Jusiñamuina raise hnotícue. Naimaci llogacinuaido eo duere cue jailla jira, daje facai cue diga itino baífemo hnotícue; ¹⁵ iadedi nia cue jeiciñenia, Jusiñamui cuena fetode, naimie iena. Cuena duenaillanona, cuena uaidote. ¹⁶ Omoí judíuaiñedomoímo naie Jito rafuena cue lollena, cuemo ie Jitona jaie bairetate. Naie facaise cuemo jai suide rafuena bu diga ñañedicue; ¹⁷ ia Arabia railla eníruemo jaidícue. Nainomo comini iñena jira, cuemo jai suide rafuemo comeciána facadícue. Jerusalémo Jesucristo nano oretagano dine jaiñedicue. Cuena Jesucristo nia oretañenia, naimacina orede, ie uai lollena. Arabia railla eníruemo cue illa mei, Damasco railla nairaímo abído jaidícue. ¹⁸ Cristo cuemo bairia facaise tres años illamona, naimiena cue uiñollena, Jerusalémo Pedro dine jaidícue. Naimie dinomo quince digarui itícue. ¹⁹ Naie facaiseconi nana Jesucristo oretaganona cioíñedicue. Pedrona ciodícue. Jacobona jiaí ciodícue. Naimiedi cai Nama ie ama Jainona cioíñedicue. ²⁰ Omoímo nana cue ciegacínodi uanaicino. Tainona cueñedicue. Tainona cue cueia, Jusiñamui cuena duere finuana uiñotícue. ²¹ Jerusalémo cue illa mei, Siria railla eníruemo jaidícue. Cilicia railla eníruemo jiaí jaidícue. ²² Judeamo ite Cristona hnotinodi cuena nia cioíñedimaci. ²³ Cuena iese fidídimaci: “Navui caina duere finocabidímiedi Jesucristo rafuena jai llote.

Jesucristona cai ñnuana navui jitañede. Caina fuidoacade”. Jiaie cue finoca rafuena fidiñedimaci. ²⁴ Ie fidiamaona, cueri Jusiñamuimo iobillacinona jai fecadimaci.

2

Jerusalémo Pablo jailla rafue

¹ Catorce años illanona, Jerusalémo dane jaidicue. Bernabé cue diga jaide. Titona uiticue. ² Jusiñamui cuemo llua jira, nainomo ite creyentiaimo jaidicue. Judúuaiñedino Cristo rafuena jai ñnuana cue lollena, jaidicue. Cue llofuiana naimaci raise uiñollena, creyentiaí illaicomínimo anado nano lloticue. Cue llofuiana: “Mare” naimaci raillana uiñoiacadicue. Tainona Cristo rafuena cue lloi raillanona uiñoiacadicue. Naimaci diga cue ñaia mei, cue llofuiana: “Mare” raitimaci. ³ Tito cue diga ite. Naimiedi judío nairai imieñede; iadedi naimaci abina detacabilla isoi, creyentiaí illaicomíní dinena naimie abi detatajana lloñedimaci. ⁴ Creyentiaína abi caitadino billa jira, Tito abina detatajana siadoticaí. Naimacina cai uaidoñeno bitimaci. Moisés micorí llogacinuai anamo cai iñenana naimaci uiñollena, bitimaci. Cristo Jesús cai ñnua jira, Moisés micorí llogacinuaido jai jaiñedicaí. Moisés micorí llogacinuai anamo caina dane itatallena, iena uiñoiacadimaci. ⁵ Cai mare rafuena jiaiena jaca meidoñellena, naimaci ñaiana dallu cacareiñedicaí. Uanaicinona omoi uiñuana jitaídicaí. ⁶ Naie creyentiaí illaicomíní omoimo lollena, cuemo jiaie rafuena lloñedimaci. Illaicomínina raillanodimaci; iadedi cuemona jamai bue isoidimaci. Jusiñamui nana comíní daje isoi feiñua jira, naimaci uai cue uai baifemo faiñede. ⁷⁻⁹ Cue llofuiana rairuiñedimaci; iadedi creyentiaí illaicomíní cuena Bernabé diga marena feiñotimaci. “Daje isoi comeciaina facadicaí” raillamona, cue llofuiana: “Jai mare” raitimaci. Creyentiaí illaicomínídi Jacobo, Pedro, Juan digamie. Judúuai dine Pedrona Jusiñamui oretaja isoi, cue llumona judúuaiñedino dine Jusiñamui cuena oretajana uiñotimaci. Pedro llumona Jusiñamuidi ailluena judúuaina creyentiaína itatate. Cue llumona, Jusiñamuidi ailluena judúuaiñedinona creyentiaína jiaí itatate. Iemona Jusiñamui uai cuemo illana jai uiñotimaci. Judúuaiñedinomo Jesucristo rafuena llocana nia coco jaillana jitaídimaci; iadedi judúuaimo Jesucristo rafue llocana nia jaidimaci. ¹⁰ Daje rafue cocomo llotimaci. “Duerede creyentiaína canocabi” llotimaci. Iena iocire finoacadicue.

Antioquíamo suide rafue

¹¹ Antioquíamo cue jailla mei, Pedro nainomo jiaí jaide. Nainomo Pedro bia, marañedifue naimie finua jira, naimie uiecomo naimiemo riire lloticue. ¹² Nainomo Pedro nano rilla mei, nana creyentiaí diga nainomo naimie guisoide. Judúuai creyentiaí diga, judúuaiñede creyentiaí diga, danomo guisoide. Iemeí Jacobo dinena damerie bitimaci. Moisés micorí llogacinodo jaisoidimaci. Moisés micorí llogacinodo Pedro jai jaiñede; iadedi naimaci billa mei, naimacina naimie jaciruilla jira, judúuaiñede creyentiaí diga Pedro jai guiñede. Ie ñnoga rafuedo naimie jai jaiñede. ¹³ Naimie iese illamona, judúuai creyentiaídi judúuaiñede creyentiaí diga jai jiaí guiñedimaci. Pedro illa isoi, Bernabé iedo jiaí jaide. ¹⁴ Naimaci iese illa jira, Jesucristo rafuedo raise jaiñedimaci. Uanaicinodo jaiñedimaci. Iena cue uiñua jira, nana comíní uiecomo Pedromo lloticue: “Judío nairai imiedio; iadedi o jeacinomona o jilloillena, cai einamací llucínodo birui jaiñedio. Ie jira, ¿bue ñellena judúuaiñedino cai einamací llucínodo jaillana jai jitaídio?”

Judúuidi creyentiaína jailla mei, Moisés micorí llogacinuaido jai jaiñedimaci

¹⁵ Nia lloticue: Judúuaiñedinodí Moisés micorí lloga uaina jaie uiñoñedimaci. Caidi judúuaina jeicigacai. Ie muidona Moisés micorí llogacinuai anamo jaie jeicigacai. ¹⁶ Iese iticaí; iadedi Moisés micorí llogacinuaido jaillamona, Jusiñamui jitailla isoi, jaca bu marebicaiñede. Jusiñamui jitailla isoi, Jesucristona ñnuamona marebicaidicaí. Iena uiñoticaí. Ie jira Cristo Jesúsna ñnoticaí, cai marebicaillena. Cai marebicaillena, Moisés

mícori llogacínuaína ñnoñedicai. Moisés mícori llogacínuaína ñnuamona, jaca buna marebificainide. ¹⁷ Jusiñamuimona cai marebicaiacallena, Cristona cai ñnuamona jeacino finorainiñedicai. “Cuenta ñnuamona, marebicaitomoi” Cristo iese llofueuide. Naimie llua isoi cai marebicaifñenia, cai jeacinomona nia cai jilloñenia, Cristo muidona; iadedi iese iñedicai. ¹⁸ Moisés mícori llogacínuaí jai jamaiñocaidicue. Ie jira naicínuaí dane abido cue oia, iena birui cue ñnoñena jira, jai jeacino finoraimedicue. ¹⁹ Iemona cue marebicaifñena jira, Moisés mícori llogacínuaí cuemo jai duiñede. Ie anamo jai iñedicue. Ie muidona Jusiñamui llogacínuaído jai jaidicue. Cristo anamo jai iticue. ²⁰ Naimie díbeimo jai iticue. Cristo cuemo ite. Cristo cuenta namatade. Jusiñamui Jitona cue ñnocana jai jaidicue. Cuenta isiruillamona, naimie jitaillamona, cueri fiodaite. ²¹ Jusiñamui caína duenailana jamaiñedicue. Jusiñamui jitailla isoi, Moisés mícori llogacínuaína cai ñnuamona marebicaidicaína, Cristo tainomo niade fiodaite.

3

Jesucristona ñnuamona judíuaídi Jusiñamui Joreñona feiñotimaci

¹ Gálatas imaci, abina jai uiñoñedomoi. Jiaino omoína birui jifute. Omoimo Jesucristo cruzmo fiodailla rafuena jaie marefodo lloticue. Iena raise cacadomoi. ² Ie jira omoimo buena jicanoiacadicue: ¿Ñiese Jusiñamui Joreñona jaie feiñotomoi? Moisés mícori llogacínuaído jaillamona iena feiñoñedomoi. Jesucristo rafuena omoi cacajamona, ñnotomoi. Ie mei Jusiñamui Joreñona feiñotomoi. ¿Ñiese birui abina uiñoñedomoi? ³ Omoi marebicaillena, Jusiñamui Joreño omoimo jai ite; iadedi Moisés mícori rafuena dane omoi jaiacanamona, omoi jiaie finolle rafuemona jai marebicaiacadomoi. ⁴ Jusiñamui Joreñomona diga marecínuaína feiñotomoi; iadedi iena jai jitañedomoi. Iese omoi illana ñnoñedicue. ⁵ Dane jicanoiticue: ¿Ñiese Jusiñamuidi ie Joreño omoimo fecade? ¿Ñiese siño rafuena omoiri finode? Moisés mícori llogacínuaído omoi jaillamona ie Joreño omoimo fecañede. Moisés mícori llogacínodo omoi jaillamona, siño rafuena omoiri finoñede; iadedi Jesucristo rafue omoi cacajamona, iena omoi ñnua jira, ie Joreñona fecade. Iemona siño rafuena omoiri jiaí finode.

Abraham mícori Jusiñamuína ñnua muidona marebicaide

⁶ Abraham mícori ie rafuena lloiticue. Naimie mícorimona fueoiticai. Moisés mícori naimiena cuete: “Abraham mícori Jusiñamuína ñnua jira, Jusiñamuimona naimiedi marebicaide”. ⁷ Iena cai cacajamona, Abraham mícori isoi cai ñnuamona, naimie ua comínina cai illana uiñotícaí. ⁸ Jusiñamuidi judíuaíñedino íco marebicaillena jaie uiñote. Naimiena íco naimaci ñnollena jaie jiaí uiñote. Iena uiñuamona, Jusiñamuidi íco suille rafuena Abraham mícorimo jaie llote. Mare rafue naimiemo llote: “Nana cuenta o isoi ñnotinona marebicaítaiticue” llote. ⁹ Abraham mícorídi ñnote. Jusiñamui naimiena marebicaítate. Ie isoide. Nana Jusiñamuína ñnotinona marebicaítate; ¹⁰ iadedi nana Moisés mícori llogacínuaído jaidino jai faidobidimaci. Moisés mícori iena jaie cueba: “Nana cue lloga uaido jaiñedino jai faidobide”. Buna nana naie lloga uaido jaiñena jira, nana faidobidícaí. ¹¹ Buena uiñotícaí. Moisés mícori llogacínuaído jaillamona, Jusiñamuimona jaca buna marebicaifñede. Jusiñamui facaina lloaíma iena jaie cuete: “Jusiñamuína ñnuamona marebicaídímaci. Ie mei jaca iitímaci”. ¹² Moisés mícori llogacínuaí daje isoifñede. Nana Moisés mícori llogacínuaína finuamona comíní marebicaide. Moisés mícori iena jaie cueba: “Cue lloga uai finuamona, marebicaídímaci. Iemei jaca iitímaci”. Jusiñamuína ñnuana lloñede: ía íe lloga uai finollena comínímo llote. Nana íe lloga rafuena finuamona, comínídi marebicaídímaci.

¹³ Moisés mícori llogacínuaí anamo jaie cai illa jira, faidobidícaí; iadedi cai facaina naimie fiodailla jira, Cristodi íemona caína jillotate. Cruzmo Cristo cuinaja jira, cai facaina naimie jai faidobide. Moisés mícori iena jaie cueba: “Cruzmo cuinacame

Jusiñamuimona jai faidobide”. ¹⁴ Jusiñamuina naimie ñnua jira, Abraham micorí jaie marebicaide. Jesucristo fiodailla muidona, naimiena judíuainédino ñnuamona, Abraham micorí isoi marebicaidimaci. Jusiñamuidi ie Joreña caimo fecallena jaie llote. Ie muidona Jesucristona ñnuamona, Jusiñamui Joreña birui feiñoticaí.

Jusiñamui lloga rafue

¹⁵ Cue amatiaí, bie rafuemo comeciaina faca. Nie isoide rafuena menamie finoacania, naie rafuena feitañellena, rabemo cuetiiaimaiaí. Iaimaiaí mamecina nainomo cuia mei, jiairuido damie naie rafuena jiaífo dama meidonide. ¹⁶ Ie isoide. Jusiñamuidi Abraham micorímo ico suille rafuena jaie llote. Iena naimie llua jira, iena meidonide. Ie uruiaimo ico suille rafuena lloñede; ia daje uruemo ico suille rafuena llote. Cristona ñaite. ¹⁷ Biena lloiacadícue. Naimie jilloillena, Jusiñamuina naimie ñnuamona, Jusiñamui Abraham micorímo rafuena llote. Cuatrocientos treinta años illanona, Moisés micorímo Jusiñamuidi jaie rafuena llote; iadedi Abraham micorímo jaie lloga rafuena meidoñede. ¹⁸ Jusiñamui llua jira, Abraham micorí jillode; iadedi Moisés micorí llogacínuaído caí jaillamona, caí jilloiadedi, Abraham micorí isoi jilloñedicaí. ¹⁹ Iese itena, ¿bue ñellena Jusiñamui Moisés micorímo jaie rafuena llote? Naiemona jeacínona caí uiñollena, iena llote. Naie rafue ite, Cristo enruemo nia biñenia. Jusiñamuidi Abraham micorímo lloga rafue Cristomo duide. Naimie billamona Moisés micorímo lloga rafuena oñedicaí. Jusiñamuidi ie jaienisaímo naie rafuena llote, Moisés micorímo iena llollena. Ie mei Moisés naie rafuena comínimo llote; ²⁰ iadedi Jusiñamuidi Abraham micorímo ie rafuena atona llote. Jiaimiemo iese lloñede, Abraham micorímo iena llollena.

²¹ Moisés micorímo Jusiñamui rafuena llote; ia naiemona Abraham micorímo llogacínona saíñede. Caí jilloillena, caí jaca illena, Moisés micorímo Jusiñamuidi rafue finuana llotena, naie rafuena caí finuamona marebicaídicaí; ²² iadedi Moisés micorí cuegafuiaídí nana comíní jeacínona anamo illana llote. Moisés micorí llogacínuaído jaillamona, jeacínona anamona jilloñedicaí. Jesucristona caí ñnuamona Jusiñamui llua isoi, jeacínona anamona jillodicaí. ²³ Jesucristona ñnuana nia caí uiñoñenia, Moisés micorí llogacínuaí anamo iticaí. Jesucristo billamona, naimiena ñnuana uiñoticaí. ²⁴ Moisés micorí llogacínuaídí caí lletarafue. Cristo díbeimo caí illena caína lletade. Cristona caí uiñuamona, naimiena caí ñnuamona, marebicaídicaí. ²⁵ Naimiena ñnuana jai caí uiñuamona, naie lletarafuena jai oñedicaí.

Abraham micorí ua uruiaí

²⁶ Cristo Jesúsna ñnuamona, nana omoi Jusiñamui comínidomoi. ²⁷ Cristo díbeimo omoi illamona, bautizagaomoi. Iemona naimie Moodí jiaí omoi Moo. ²⁸ Jusiñamuimona dajena itomoi. Naimiedi nana comínina feiñote. Judíuaina omoi illamona, omoi na feiñote. Judíuainédinona omoi illamona, omoi na feiñote. Mullaiaína omoi illamona, omoi na feiñote. Mullaiaíñedinodomoidena, omoi na feiñote. Iiñiaína omoi illamona, omoi na feiñote. Riñoniaína omoi illamona, omoi na feiñote. Jesucristona omoi ñnua jira, jaca damacidomoi. ²⁹ Cristomo omoi jai duiadedi, Abraham micorí comínidomoi. Ie jira Jusiñamui Abraham micorímo lloga rafuemo jiaí jainaiaídomoi.

4

Jusiñamui uruiaína jaidicaí

¹ Moisés micorí llogacínona dane lloiticue. Jiaie rafuedo iena lloiticue. Riaí uruiaí moo fiodailla mei, ie moo raruaídí nano doforamiemo fiebide. Naie nano doforamie uruenia, naimie mamecido naimiemo jide. Naimiemo nia raise jiiñede. Naimiedi nia jamai ite isoide. Naimie ie jofomo mullaiaí isoi ite. ² Naimie moo llua dínorí jiaíno anamo naimie ite. Ie moo raruaí jiaíno anamo jiaí ite. Naimie jai eimiéna illemona naimie moo raruaídí naimiemo raise jai duite. ³ Jaie daje isoidicaí. Uruiaí isoidicaí.

Cai jaiagai llogacínuaí anamo iticai; ⁴⁻⁵ iadedi ie jitailliruimo Jusiñamuidi ie Jitona orede, naicínomona caína jilloitallena. Jusiñamui uruiaina cai jaillena, ie Jitodi naicínomo anamo riñomona jeiciga. ⁶ Naimie uruiaidicaina jira, Jusiñamuidi ie Jito Joreño cai comeciáimo orede. Naimiena cai feiñuanona, naimiedi caína Jusiñamuina: “Cai Moo” raitatate. ⁷ Ie jirari jiaíno anamo jai iñedomoi; iadedi Jusiñamui uruiaidomoi. Jusiñamui uruiaidomoina jira, nana naimie lloga rafue omoímo jai duide.

Moisés micorí llogacínuaí anamo omoí jaia, danomo abido jaidomoi

⁸ Jaie Jusiñamuina nia omoí uiñoñenia, ua jusiñamuillaiñede ra anamo itomoi. Naie isoide rana sedavidomoi. ⁹ Jusiñamuina jai uiñotomoi. Naimie omoína jai uiñote. ¿Bue ñellena omoína marebicaitañede rafuedo dane jaiacadomoi? Omoína jilloitañede rafue anamo dane iacadomoi. ¹⁰ Judíuaí comini rafuena finocabillaruimo jiaí finocabidomoi. Iemona: “Marebicaiticai” raillanona iese finocabidomoi. ¹¹ Cue lloga uai omoí finoñena jira, omoímo tainona jai lloticue. Nibai jai tainomo maijidicue.

Pablo naimaci diga illana uibiñote

¹² Cue amatiaí, omoí dine nano cue jaia, Moisés micorí llogacínomo anamo iñedomoi. Naie llogacínomo anamo jaie iticue; ia birui ie anamo iñedicue. Birui cue illa isoi omoí illana jiaí jitaídicue. Omoí dine cue nano ia, cuena raise feiñotomoi. ¹³ Cristo rafuena omoímo nano cue llua facaiseconi duidicue. Iena uiñotomoi. ¹⁴ Cue duico omoímona jacire eruaidé; iadedi cuena jearuiñedomoi. Jusiñamui jaienici omoí dine billa isoi, cuena feiñotomoi. Jesucristo omoí dine billa isoi, cuena jiaí feiñotomoi. ¹⁵ Jaie caimare iticai. ¿Niese birui cue diga caimare iñedomoi? Cuena omoí canoítana, cuemo fecallena, omoí uisi jaie jino juiconoiacadomoi. ¹⁶ Omoímo jicanoiacadicue: ¿Uanaicínuaí omoímo cue llua jira, omoí enoillamiéna jai jaidicue? ¹⁷ Moisés micorí llogacínuaído jaidino omoína eo nabairitimaci; iadedi mare rafuena finoacaiñedimaci. Naimaci diga omoí nabairillena, cue diga omoí nabairillana jai jitaíñedimaci. ¹⁸ Mare comeciáimona cuena omoí jaca jitaia, eo mare. Omoí dine cue ia, iese omoí jitaia, mare. Omoí dine cue iñenia, iese omoí jitaia, jiaí mare. ¹⁹ Cue uruiái, Cristo omoí comeciáina raise namataja dinori, omoíri cue comeci eo duere dane llicidaite. ²⁰ Omoí diga ja iacadicue, omoí diga atona raise ñaillena. Omoímona are cue illa jira, dane raise cai nabairillena, omoímo cue llua raise uiñoñedicue.

Jesucristo rafue Moisés micorí llogacínuaí baifemo faite

²¹ Moisés micorí llogacínuaí anamo iacadino, omoímo daje rafuena jicanoiacadicue: ¿Moisés micorí cufaguiaina raise cacadomoi? ²² Moisés micorí jaie cuela: “Abraham micorímo mena jito ite. Daje jito ie mullaíñomona comuide. Jiaie jito ie mullaíaiñediñaiñomona comuide. Naiñaiñodi ie nanoca ai. ²³ Abraham micorí jitailla jira, ie mullaíño jirona comuitate; iadedi ie mullaíaiñediñaiñomona jito comuide, Jusiñamui llua jira”. ²⁴⁻²⁵ Naie rafuemona cai fueolle. Ie iaíñuaídi mena jai lloga rafue isoidiaíñuaí. Abraham micorí mullaíño mameci Agar micorí. Naiñaiñodi Sinaí railla anedumona lloga rafue isoide. Arabia railla eniruemo Sinaímona Jusiñamuidi Moisés micorímo rafuena llote. Naiñaiñomona mullaíñona jira, ie urue mullaímana jeiciga. Ie nama anamo jaca ite. Ie isoide. Moisés micorímo llogacínuaído jaidinodi naie rafue anamo itimaci. Jerusalémo itino Moisés micorí llogacínuaí anamo jai nia illa jira, Agar micorí Jerusalén railla nairaí isoide. ²⁶ Jiaíñaiñodi jiaie lloga rafue isoide. Naiñaiñomona Abraham micorí ai. Naiñaiñodi Sara micorí. Naiñaiñodi monamo ite Jerusalén isoide, naiñaiñomona mullaíñoñena jira. Nainomo jainaiáidicai, Moisés micorí llogacínuaí anamo jai cai iñena jira. ²⁷ Isaías micorí iena jaie cuete:

Oíniño, mai iobi.

Urue nia jocoñediñaiño, ado iobi.

Ñirediñaiño baifemo eo uruiáirenitio.

Iemona Moisés micorí llogacino anamo iñedinomona Cristona inotinona ailluena jail-lana uiñotícaí.

²⁸ Cue amatíai, bie rafue omoimo duide. Jusiñamui llua jira, Abraham micorí jito Isaac micorí comuide. Ie isoide. Jusiñamui llua jira, caidi ie uruiaina jaidícaí. ²⁹ Ero, mullaiño jítodí mullaiñediñaiño jítóna jaie duere finouide. Daje isoi Moisés micorí llogacínuaí anamo itínodí Jusiñamui Joreño anamo itínona biruí duere finocabidímací. ³⁰ ¿Níese caí nibaílle? Moisés micorí Sara micorí lluaña jaie cuete: “ ‘Mullaiñoña, naiñaiño jito díga, oni dota. Ie moo fiodailla mei, mullaiño jito ie moo raruiaina feiñoñeite. Dama mullaiñaiñoñede jito ie moo raruiaina feiñoite’ llote”. ³¹ Ie jira mullaiño urue isoíñedícaí Moisés micorí llogacínuaí anamo jaí caí iñena jira, mullaiñediñaiño urue isoídícaí.

5

¿Níe isoide rafuedo jaitomoi?

¹ Moisés micorí llogacínuaí anamona Cristodí caína jaí jillótate. Ie jira omoí comeciána ocuiño. Jaie omoí illa isoí, dane jaiñeno. Omoí marebicaiñede rafue anamo jaie itomoi. Ie jira Moisés micorí llogacínuaí anamo iñeno. Iemona marebicaiñeitomoi. ² Jeacínomona omoí jillobillena, Moisés micorí llogacínodo omoí jaiacanamona, omoí abíaina omoí detataía, Cristo rafuena jaí jítaiñedomoi. ³ Dane lloítícue: Jeacínomona omoí jillobillena, naga abína detatagamíe nana Moisés micorí llogacínuaína inua. Nana iena inoñenia, naimíe jilloñeite. ⁴ Moisés micorí llogacínuaína inuamona omoí marebicaiacania, Cristo rafuena jaí duiñedomoi. Jusiñamui caína duenaillamona, Cristona jaie caí díne orede. Moisés micorí llogacínodo omoí jaiacania, Cristo rafuena jaí jítaiñedomoi. ⁵ Moisés llogacínuaína inuamona marebicaiñedícaí; iadedí Jesucristona caí inuamona, Jusiñamui Joreño caína canuamona, caí marebicaillemo íocíre ocuridícaí. ⁶ Abína detatajamona, caí jeacínomona jilloñedícaí. Abína caí detatañenamona, jaí jilloñedícaí. Dama Cristona caí inuamona jillobidícaí. Naimíena caí inua jira, nana comínina isiruicana jaidícaí. ⁷ Cristo rafuedo navuí mareña jaidomoi; ía damíerie uanaicínona omoí inuana jaí jítaiñedímací. ⁸ Jusiñamuimona naimací uaina oñedímací. Jusiñamui omoína navuí uaidote, naimíe díbeímo omoí illena.

⁹ Jíai rafuedo iena lloítícue: Janore jisa siritate ra ífecímo joneía, jaí nana siritate. Ie isoide. Damíe jíai rafuedo jaía, díga comínina jífuerede, naimíe jaílla díbeído jaíllena. ¹⁰ Jíai rafuedo omoí jaiñellemo cue comecína jaí facadícue. Caí Nama cue inua jira, cue lloga uaido omoí jaíllemo cue comecína jaí facadícue. Omoí comeciána naganomo ítatatímíena uiñoñedícue; iadedí Jusiñamui naimíena duere finoite.

¹¹ Cue amatíai: “Abína detataja” omoímo cue lloíadedí, cuena jaí duere finoñedomoi, omoí jilloillena Jesucristo fiodailla rafuena jaí cue lloñena jira. ¹² Omoí comeciána naganomo ítatatínodí raitímací: “Janore jisa abína detatajamona, caí jeacínomona jillobidícaí”. Iese itena, Jusiñamuína uiñoñedíno finua isoí, namíena naimací abíai díana jíai jítaídícue.

¹³ Moisés llogacínuaí anamona Jusiñamui omoína jaí jillobitade; iadedí maraiñede rafuena omoí finollena jillobiñedomoi. Omoí jillobilla jira, naimacína omoí isiruilla jira, jíai comínina cano. ¹⁴ Moisés micorí iena jaie llote: “O abí o isiruilla isoí, o ecímo itínona isiruí”. Iena omoí finoiá, nana Moisés micorí llogacínuaína jaí finodomoi. ¹⁵ Iese omoí finoñenia, coníma díga omoí ríire ícíría, jaca danomo íñeitomoi.

Jíai comínina omoí isiruilla rafue

¹⁶ Omoímo nía lloítícue. Jusiñamui Joreño omoí comeciáímo namatajano omoí í. Omoí comeciáímo íte maraiñedícinodo omoí jaiñeno. ¹⁷ Caí comeciáímo íte maraiñedícinodí Jusiñamui Joreño jítaíllacínodo daacínodo jaiñede. Coníma abído jaíde, caí jítaílla ra caí finoñellena; ¹⁸ iadedí Jusiñamui Joreño anamo omoí raise ía, naimíe lluaña omoí

raise ñnoia, Moisés micori llogacinona jai jitaiñedomoi. ¹⁹ Ero, maraiñede comeciaino iticinodo omoi jaia, bie isoidicinona finocabidomoi: aiñede riño diga illacina, iniñede ñima diga illacino, jeare ñaiacino, diga eo jearede rafuena finuacino, ²⁰ jiraraina sedajacino, aima ra finuacino, comena enoillacino, uaina uaitajacino, abina uradoillacino, icirillacino, dama ie abi ramo comecina facajacino, nana cominina uaitaillacino, damacina iñenacino, ²¹ dama abina uradoillano, rana bairuacino, comena meiniacino, jifaillacino, aifuerillacino, ie isoidicino. Omoimo jaiie lloticue. Dane lloiticue: Bie isoide rafuena bu finocabia, naimie cominina naimaci iñena jira, Jusiñamui ie cominina sedajanomo jainaiñeite. ²² Jusiñamui Joreño omoi comeciaino namataia, bie isoidicinona finocabidomoi: nana comini isiruillacino, comeci caimare illacino, uri illacino, raire iciriraininacino, duenaillacino, jiaie cominina canuacino, ie lloga uaina finuacino, ²³ uai oñenacino, abina eenuacino. Moisés micori llogacinuai bie isoidicinona ñaiñede. ²⁴ Cristo Jesúmo jainaiñidinodi naimaci maraiñede comeci jitaillacino anamo iñedimaci. ²⁵ Jusiñamui Joreño caimo illa jira, naimie cai comeciaina namatajacinodo cai jaillesa. ²⁶ Iemona abina cai biriñellesa. Abina jiai cai iedoñellesa.

6

Jiaie llofuiacino

¹ Cue amatiai, omoimona damie ebena jamai jeacinona finoia, dane Jusiñamui ñibeimo naimie raise illena, naimiemo fecuise iciñeno llono. Omoi cominimona Jusiñamui Joreño comeciaino raise namatadinodi iese naimiemo llofuellesa. Jeacino finoi raillano, nagamiai abi rairuillesa. ² Bu duere sefua, bu Taife ramo faia, coninina cano. Iese omoi canoia, Cristo llogacinuaina jai ñnotomoi. ³ “Cuemo iese suiñeite. Dama abina sedadicue. Jamai bue isoiñedicue” comecina facadimie dama abina jifueite. Naimie jamai bue isoide. ⁴ Maraiñeni raillano, ie finoca rafueconi iobillena, nagamiai ie finoca rafuena abido facaja. Dama ie majia rafueconi iobilla. Dama ie majia rafuedi naimiemo duide. Jiamieimo ite majia rafuedi naimiemo duiñede. ⁵ Naimie finoca rafuemono nagamie jeacinona finoia, dama naimie muidona. ⁶ Naga Jesucristo rafuena fueotimiedi ie llofuegamiemo mare ra fecalle. ⁷ Dama o abina jifueñeno. Budi Jusiñamuina jifuenide. Jeacinona bu finoia, Jusiñamui ibana jaca oite. Marecinona bu finoia, Jusiñamui mona iba feiñoite. ⁸ Ie comecimo ite maraiñede jitaillacino finodimiedi ie abina faifite. Fiodaite; iadedi Jusiñamui Joreño jitaillacinona finodimiedi monamo jaca iite. Faiñeite. ⁹ Jusiñamui Joreño jitaillacinona finuana sefuiruiñeno. Cai comeci cai ocuiñoia, Jusiñamui jitailla facaiseconi ibana feiñoitica. ¹⁰ Ie jira nana cominina canocabi. Nana creyentaina ua eo canocabi.

Facaduacino

¹¹ Ero, jerie cuiano omoimo bie facaimo cueticue. ¹² Jiaie cominimona iobillacinona omoi abiaina detatajana jitaicino feiñoiacana jira, omoi abiaina detatajana jitaicimaci. Cristo rafue lloticainadedi: “Cristo rafuena uiñoñedinodi niade duere caina finodimaci” raillanomo comeciaina facajamona, iese jitaicimaci. ¹³ Omoi abiaina detatajana jitaicimodi Moisés micori llogacinodo raise jaiñedimaci. Nana iena ñnoñedimaci. Omoiri abina iedoiacana jira, omoi abiaina detatajana jitaicimaci; ¹⁴ iadedi Jusiñamuidi jiaie rafueri abina cue ieduanana jitañede. Dama Cristo cueri fiodailla rafueri abina iedoticue. Ie jira Jusiñamuiñede rafuemo jainaiñedicue. Naie rafue anamo jai iñedicue. ¹⁵ Abina diamona cai jeacinomona jilloñedicai. Abina deñenanomona jaca jilloñedicai; iadedi Jusiñamui Joreño caina comonori comuitajamona jillobidicai. ¹⁶ Jusiñamuidi nana bie llucacinodo jaidino uri itatatesa. Naimie naimacina duenaillasa. Jusiñamui cominidi ua jaca iese illasa. ¹⁷ Bie isoide rafue illamona, cuena duere finoñeno. Jesucristo rafuena cue llua jira, diga icaiño cue abimo bofellañona jai oticue.

¹⁸ Cúe amatiaí, caí Nama Jesucristo omoina duenaillasa. Mai. Pablocúe.

EFESOMO ITE CRISTONA #NOT#NOMO PABLO ORETAGA RABE

Efesomo ite creyentiaimo Pablo cartana orede

¹ Efeso railla nairaimo ite creyentiai, Pablodice. Bie carta omoi dine oredice. Ie rafue lollena, Jusiñamui jitailla jira, Jesucristo oretagamiedice. Naimiemo omoi jai jainaiilla jira, Jesucristona #nocana jai jaidomoi. ² Cai Moo Jusiñamui, cai Nama Jesucristo diga, omoina duenaicabillana uiñocana mai omoi jai. Iaimai omoi comeciaina uri itatajacabillana uiñocana mai omoi jai.

Cristomo jai cai jainaiilla jira, Jusiñamui marena itatajacinona feiñotica

³ Cristomo cai jainaiilla jira, Jusiñamui caina eo marena itatate. Ie jira cai Moo Jusiñamuimo iobillacinona cai fecacabillasa, naimiedi Cai Nama Jesucristo ie Moo illanona. Cristomo cai jainaiilla jira, cai comeci marena itatajacinona Jusiñamuimona jai feiñotica. ⁴ Iena ja lloiticue. Enirue nia iñenia, Jusiñamui nana naimiena #notinona jaie fetode. Cai facaina Cristo ico fiodaillena naimie uiñuamona, caina jaie fetode. Naimiemono cai marebicaillena, jeacinona cai finoñellena, caina fetode. ⁵ Caina isiruillamona caina fetode. Naimie eo jitailla jira, naimie uruiaina cai jaillena, caina fetode. Jesucristo fiodaillamona Jusiñamui uruiaina jaidica. ⁶ Naimie caina fetuamona, naimie caina duenaillana jai uiñotica. Iemona naimiedi eo mareuidimiena jiai jai uiñotica. Ie isiruiga Jitomo cai jainaiillamona iena uiñotica. Naimiemo buena cai finoñenia, caina duenaite. Naimiena cai iobitallena, caina fetode. ⁷⁻⁸ Caina eo duenaillanona, ie Jito fiodailla jira, Jusiñamuidi jeacino anamona caina jai jillotate. Cai jeacino oni dotajamona, ibana jiai oñeite. ⁹ Naimiena cai raise #nollena, caina abina jai uiñotade. Jusiñamui caina naimie nana caina birui jilloitaiacanana jai uiñotade. Cai cominidi iena jaie uiñoñedimaci; iadedi Jusiñamui jitailla diese Cristo finoca rafuedo caina iena jai uiñotade. ¹⁰ Naimie jitailla facaiseconi, nana caimo ie finoacalle rafue fuiduanona, Cristo anamo naimie nagamiena raise itataite. “Cristo cai Nama” raitimaci.

¹¹ Ie jira naga suide rafue suicana jaide, Jusiñamui jitaillacinona fuidollena. Nana naimie jitailla diese, naimie comeci jitailla jira, nana iena finode. Nano facaiseconi naimie cominina cai jaillana naimie uiñuanona, caina jaie fetode. Ie muidona naimie cominina jai jaidica. ¹² Naimie caina fetuanona Cristona jaie #notica. Naimie diga ico jaca cai illemo birui ocuridica. Naimiena cai iobitallena caina fetode. “Naimie fue eo mare” cai raillena caina fetode. ¹³ Cristona jai birui #notomoi. Uanaicino rafue omoi jai cacajamona, naie mare rafue omoi cacajamona, omoi jeacinomona jai jillobidomoi. Jusiñamui Joreño omoimo illano, navui Cristo llua isoi, naimie dibeimo omoi illana uiñotomoi. ¹⁴ Jusiñamui Joreño caimo jaca illa jira, Jusiñamui diga ico cai jaca illena uiñotica. Jusiñamuidi caina ie cominina jai jaitate, naimiena cai iobitallena. “Naimie fue eo mare” cai raillamona, naimiena iobitaitica. Naimiemo cai jainaiilla jira, naimiemono nana cai comeci marena itatajacinona feiñotica.

Naimaci facaina Pablo j#de

¹⁵ Cai Nama Jesúsna omoi #nuana jai fididice. Nana jiaie creyentiaina omoi isiruillana jiai fididice. ¹⁶ Ie jirari Jusiñamuimo cue j#ia, omoina feitañedice. Omoi facaina naimiemo iobillacinona jaca fecadice. ¹⁷ Cai Nama Jesucristo Jusiñamuimo duilla jira, cai Moo Jusiñamui uai siñonana jira, naimiemo cue j#anona, omoi facaina j#canotice. Naimie Joreño uaido naimie rafue raise uiñocana omoi jaillena j#canotice. Naimiena raise uiñocana omoi jaillena j#canotice. Iese omoi facaina j#canocabitice. ¹⁸ Naimie dibeimo omoina naimie jai uaidua jira, naimie diga ico jaca omoi illemona, iena omoi

raise uiñuana jitaídícue. Naimíe comínina omoi jai jailla jira, naimíe illanomo íco eo marena iocíre ítomoi. Iena omoi raise uiñuana jitaídícue. ¹⁹ Naimíe uai ua eo siñonana omoi uiñuana jitaídícue. Naimíena cai ínua muidona, íe uaido naimíe caína canorede. Iena omoi raise uiñuana jitaídícue. ²⁰ Fiodaillamona Cristona íe uaido Jusiñamui jai jillotaja jira, naimíe uai siñonana uiñotomoi. Fiodaillamona Cristo jillua mei, monamo Cristo abído jailla mei, íe ecímo Jusiñamuidí Cristona illaímána dane ítatate. ²¹ Íe jira Cristo nana Jusiñamui jaiénisai afemo íte. Ua nana comíní afemo naimíe íte. Taife afemo naimíe íte. Janaba afemo naimíe íte. Naie íaímaíai ísoide joreñuái afemo naimíe íte. Biruí íese íte. Íco íese nía íite. ²² Jusiñamuidí naga ra Cristo anamo ua jai ítatate. Cristona nana creyentíai ímací illaímána jíai ua jai ítatate. ²³ Cristomo daajena nana cai creyentíaiídícaídí duidícaí. Naimíe anamo cai illanona, naimíe nana caína ocuicabide. Íe jira marena cai illena naimíe jitaílla ísoi, naimíe nana caína biruí canocabide.

2

Jusiñamui caína ísírúílla jira, cai jeacínomona jai jillobídícaí

¹ Jusiñamuína jaie omoi nía íñoñenia, naimíemo omoi dúíñena jira, naimíemona fíodaitíno ísoídomoi. Jeacíno anamo omoi ílla jira, naimíemona fíodaitíno ísoídomoi. Jeacíno fínocana jaídomoi. Maraiñedícinona fínocana jaídomoi. ² Jeacínona ebírúítomoi Jusiñamui díbeímo íñedíno rafuedo jaídomoi. Taife díbeído jai jaísoídomoi. Jusiñamuína oíacaiñedíno Taife jitaílla rafuedo jaísoídímací. ³ Naimací ísoi jaie nana ítícaí. Cai comecíaimo íte jearede jitaíllacínona fínodícaí. Íedo jai jaísoídícaí. Íe jira Jusiñamuí rícaíllafue anamo jaie ítícaí. Íese jaie nana ítícaí. ⁴⁻⁵ Jeacínona jaie cai fínua jira, jeacíno anamo ítícaí. Jusiñamuína íñoñedícaí; íadedí Jusiñamuí caína eo duenaíllanona, caína eo ísírúíllamona, naimíe díga íco jaca cai íllena, naimíe díbeímo caína ítatate. Fiodaillamona Cristona Jusiñamuí jillotaja jira, jeacíno anamona caína jai jillotate. Íe muidona monamo íco ítícaí. ⁶ Cristona jillotaja mei, Jusiñamuí íe ecímo naimíena dane ítatate. Cristomo cai jai jaínaíílla jira, Jusiñamuí nainomo caína jíai jaínaíítate. ⁷ Cristo fínoca rafuemona caína íese jai ítatate. Caína íese jai ítatajamona, nana comínídí Jusiñamuí caína eo duenaíllana uíñoítímací. ⁸ Naimíe caína duenaíllanona, caína jai jillotate. Jaca buena cai fínuamona jillobíñedícaí; íadedí naimíe jitaílla jira, naimíe caína jai jillotate. ⁹ Cai jilloíllena jaca buena cai fínóñena jira, abína íedoñedícaí. ¹⁰ Jesucrístomo cai jaínaííllamona, íe comínina cai jaíllamona, cai ílla ísoi naimíe caína ítatate. Íese cai íllamo Jusiñamuí comecí jaie facajano, mare rafuena fínocana cai jaíllena, naimíedí cai comecíína marena ítatate.

Crístomo jai cai dúílla jira, jíaíe náíraíai díga biruí urí ítícaí

¹¹ Omoi jaie ísoíllana uíñoítomoi. Iena comecítomoi. Jusiñamuína jaie uíñoñedomoi. Judíuáiñedínona omoi jeicíñena jira, cai judíuái comíní ísoi abíána detatañedomoi. Íe jira cai comínimona maraiñedomoi. ¹² Omoi jeacínomona Cristo omóina jilloítaíacanana naie facaíseconí uíñoñedomoi. Cai judíuái náíraímo jaínaííñedomoi. Íe muidona Jusiñamuí cai judíuái comínímo jaie lloga rafuena uíñoñedomoi. Jusiñamuína nabaíllana uíñoñedomoi. Jusiñamuí díga omoi íco jaca íllena uíñoñedomoi. Jusiñamuína omoi uíñoñena jira, naimíena sedañedomoi. ¹³ Naimíe díbeímo jaie jaíñedomoi; íadedí Jesucrístomo biruí duidomoi. Jusiñamuí jaie íñoñedomoi; íadedí Cristo jai fíodaílla jira, naimíena biruí ínotomoi. Naimíena omoi jai ínuamona, cai díga naimíe díbeímo jai ítomoi. ¹⁴ Naimíe omoi comecíai jai urí ítatate. Cai comecíai jíai jai urí ítatate. Cai judíuáímona omóina jaie jearuítícaí. Íese jaie ítícaí; íadedí Cristo muidona daní conínina nana biruí nabadícaí. ¹⁵ Cristo fíodaíllamona Moisés mícorí jaie llogacíno anamo jai íñedícaí. Naie llogacíno daní cai judíuáímo dúílla jira, Jusiñamuí díbeímo jaie íñedomoi; íadedí Cristo fínoca rafue muidona, biruí daajena jaídícaí. Omóina jaie cai gaíñena jira,

omoına jaie nabaiñedicaí; iadedí Cristomo daajena caí duilla jira, birui nabairedicaí. ¹⁶ Cruzmo Cristo fiodailla jira, Jusiñamui díbeimo caí illamona, mena nairaimona caina daje nairaina jai itatate. Ie jira daje nairaina uri iticaí. ¹⁷ Cristo jaie billanona, mare rafuena llote. Omoí judíuaíñedinomo, caí judíuaímo, comeciaí uri illana llote. Nana caina jilloitaiacanana llote. ¹⁸ Naimie muidona Jusiñamuina jai nabairedicaí. Jusiñamui Joreño caina canuamona, naimie díga birui nabairedicaí. ¹⁹ Jusiñamui comínina omoí jai illa jira, nana naimiena ñnotino díga Jusiñamuimo daajena duidomoi. Caimona birui jiaie comíñedomoi. ²⁰⁻²² Jofo isoidicaí. Jofona caí finoacania, naie ibírí nano finodicaí. Ie mei díga rana caí atíamona, iena niticaí. Ie isoide. Díga jiaie isoide comínina iticaí; iadedí Cristomo daajena jai duidicaí. Naimiedí birui nana caí Nama. Cristo facaina llorainimona naimie rafuena jai cacadicaí. Jusiñamui Joreño caina canuanona iena ñnoticaí. Iena caí ñnuamona, naimie jitailla isoi, mare rafuena finocana jaidicaí. Caí díga Cristomo omoí jai duillamona, Jusiñamui Joreño nana caí comeciaímo jai ite.

3

Judíuaíñedinomo Pablo Cristo rafuena llofue

¹ Jesucristo rafuena omoí judíuaíñedinomo cue llofueuilla jira, cárcelmo iticue. ² Omoína naimie duenailanona, omoína llofuellena, Jusiñamui cuena oretate. Iena jai uiñotomoi. ³ Jusiñamui cuemo jaie uiñoñega rafuena jai llote. Naie rafuena janore como jai cueticue. ⁴ Bie carta omoí facaía, Cristona jaie uiñoñega rafuena cue jai uiñuana uiñoitomoi. ⁵ Jusiñamuidí comínimo iena jaie raise uiñotañede; iadedí ie Joreñodo Cristo facaina llorainina iena birui jai uiñotade. ⁶ Iena lloiticue. Judíuaíñedomoi; iadedí Jusiñamui cuemo jaie llote: “Judíuaíñedíno Cristona ñnuanona, omoí judíuaí isoi jilloitímací” llote. Omoí facaina Cristodí fiodaite. Naimiena omoí ñnoia, omoína ie uruíaína caí isoi jai itatate. Naimiedí nana caí Moo. Jai daje nairaidicaí. Cristomo daajena duidicaí. Cristo rafuena omoí ñnuamona, naimie jai llua isoi, Jusiñamui díga íco jaca ítomoi. Jusiñamui cuena iena jaie uiñotade. ⁷ Jusiñamui jitailla jira, cuena naimie duenailanona, naimie uai cuemo illamona, naie mare rafuena llofuecabiticue. ⁸ Creyentena nia cue jaiñena facaiseconi, creyentiaína jaie cue duere finouilla jira, jamái bue isoidicue. Nana jiaie creyentiaí cue baífemo faitímací; iadedí Jusiñamui cuena duenailanona, ie rafuena cue lollena, cuena oretate. Cristo caina eo raise marena canocabillana llofuecabiticue. ⁹ Naie jaie uiñoñega rafuena nana comíní birui uiñollena, cuena oretate. Jusiñamui naga rana finode; iadedí naimie jitailla jira, naie jaie uiñoñega rafuena jaca buna jaie raise uiñotañede. Nana comíní iena birui raise uiñollena, cuena oretate. ¹⁰ Judíuaíñedíno judíuaí díga creyentiaína jaillamona, Jusiñamui jaienisai naimie uai siñonana uiñoitímací. “Naimie fue eo mare” raitímací. ¹¹ Jusiñamui jaca jitailla isoi, naie rafue suicana jaide. Caí Nama Jesucristona naimie oretajanona, caí facaina Cristo fiodaite. Iemona Jusiñamui jitailla rafuedí suide. ¹² Cristona caí ñnua jira, Jusiñamui díga jaciruiñeno birui jai ñairedicaí. Naimie caina cacajana jiaí uiñoticaí. ¹³ Cristo rafuena omoímo cue llua jira, birui duere sefuidicue. Cárcelmo cue duere sefuilla jira, Cristo rafuedo jaillena omoí comeciaí sefuiruisiñeno; iadedí Cristo rafue omoímo cue lluanona cue duere sefuia, iobicana omoí jai.

Cristo caina eo isiruite

¹⁴ Caí Moo Jusiñamui caina eo canocabillanomo cue comecina facaía, naimiemo jídicue. ¹⁵ Naimiedí nana creyentiaí ímací Moona jira, naimiemo jídicue. ¹⁶ Naimiemo cue jíanona, omoí facaina jídicue. Naimiemo eo ebirede siño itícino illamona, ie Joreñodo naimie omoí comeciaína raise ocuiñotallena jícanoticue. ¹⁷ Cristona omoí ñnuamona, naimie omoí comeciaína raise namatallena jícanoticue. Jusiñamuina omoí isiruicana jaillana jídicue. Jiaie comínina omoí isiruicana jaillana jiaí jídicue.

18-19 Cristo caina jaca eo isiruillana, nana jiaie creyentiaie diga jaca eo isiruillana, omoi eo raise uifnuana jidicue. Naimie caina eo isiruillacino cai comeciaie facajacino baifemo uailla jira, naimie caina eo isiruisoillacinona jaca raise uifnoñedicaie; iadedi iena janore cai uifnuamona, Jusiñamui omoi comeciaina namatallena jidicue. Iese omoi facaina jicabidicue.

²⁰ Ie jira Jusiñamuimo iobillacino cai fecajasa. Ie uaido cai comeciaie marena icana jai-tate. Naimiemo cai jicajacino baifemo naimie fecarede. Cai comeciaie facajacino baifemo naimie jiaie finorede. ²¹ Ie muidona naimiemo iobillacinona nana cai creyentiaidicaide fecacabillasa. Jesucristo finoca rafue muidona iobillacinona jiaie cai fecacabillasa. Mai.

4

Jusiñamui Joreño jai caimo illa jira, cai comeci daje isoi lloide

¹ Cárcelmo nia cue illamona, omoi rafuena nia lloiticue. Cristo rafuena cue llofuia jira, cárcelmo iticue. Creyentiaina omoi jai jailla jira, Cristo jitailla isoi omoi i. Jusiñamui omoina jai fetode naimie jitailla rafuena omoi finollena. ² Ie muidona abina jaca iedoño. Raie icirino. Jiaimie ona duere finoia, ibana oño; iadedi uai oño naimiena jaca isirui. ³ Jusiñamui Joreño omoi illamona, omoi comeciaie daje isoi lloicana jai. Daje isoi omoi comeciaie lloillamona, omoi jitaillamona dan uri omoi i. ⁴ Iena nia lloiticue. Cristona cai inuamona, daajena naimiemo jainaiidicaie. Jusiñamui Joreño nana caimo illamona, dan omoi comeciaie lloicana omoi jai. Jusiñamui caina jai fetode. Ie muidona naimie diga jaca cai illena, naimie isoi cai illemo ocuiridicaie. ⁵ Jaca dajede Nama sedacabidicaie. Caina jilloitallena, da naimiena inoticaie. Dama naimie facaina bautizaganodicaie. ⁶ Cai Moo Jusiñamui jaca dajede. Jaca dajede Jusiñamuina nana cai creyentiaidicaide sedadicaie. Naimie anamo nana iticaie. Naimie jitaillacinona cai finollena, caina canocabide. Caina canollena, naimie Joreño caimo jaca ite.

⁷ Naimie jitailla diese, caina fetuanona, naimie facaina cai maijillena, ie uai caimo fecade. Jiaie creyentiaina naimiemo inotacana jaillena, ie uai caimo fecade. ⁸ Iena cai raise uifollena, David micori jaiie ciegafuemonona fueoiticaie. Naimie cueba: “Monamo abido naimie jaillanona, illaimana naimie illamona, ie cominina naimie ifuanona, naimacimo rana fecade”. Cristona ñaite. Iemona Cristo cai maijiacino caimo illana uifnoticaie. ⁹ Biemo omoi comeciaina faca. Monamo abido naimie jailla jira, monamona eniruemo Cristo nano billana uifnoticaie. ¹⁰ Eniruemo bite; iadedi monamo abido jaide. Nana cominina birui sedade. Naimie baifemo jaca buna ifede. ¹¹ Ie jira caimo ie uai jai fecajanona, caimona ie llofueoicaiganona fetuanona, ie rafue raise llofuellena, naimacina oretate. Damieriemo ie facaina ie rafuena jino lollena, ie uaina fecade. Ie rafuena nia inoñedinomo lollena, damieriemo ie uaina fecade. Creyentiaina ie rafuena llofuellena, damieriemo ie uaina fecade. ¹² Iese ie uaina fecade, naimie facaina raise cai maijillena, nana jiaie creyentiaina cai canollena, Ie mei Cristo rafuena daajena inocana jaiticaie. ¹³ Iena cai inuamona, Jusiñamui Jitona raise uifnocana jaiticaie. Cai comecide daje isoi lloicana jaiticaie. Naimie jitaillacinodo raise jaiticaie. Naimie marena icana illa isoi jaiticaie. ¹⁴ Cai uruiaie facaise cai comeciaie naganomo ite. Naie facaise nie isoide rafuena cai cacajia, iena raie inoticaie. Cristo inocana cai jaillamona, uruiaie isoi cai iacaiñena. Damierie naga llofueraima uaido jaidimaci. Damierie llofuerainidi Cristo rafuena raise llofueñedimaci; iadedi jifuetimaci. Tainona llotimaci. Iedo cai jaiñena; ¹⁵ iadedi jiaie cominina cai isiruillamona, uanaicinodo cai jailla. Cristo isoi icana cai jaillamona, abina uifnoticaie. Cristodi cai illaimana jira, caina ocuide. ¹⁶ Naga creyente naimiemo jainaiide. Aillosiedicaie; iadedi daajena naimiemo jainaiidicaie. Daajena naimiemo cai jainaiiillamona, naimie jitaillacino cai finoia, naimiena inocana jaiticaie. Iemona dan cominina isiruicana jaiticaie. Daajena naimiemo cai jainaiilla jira, cai comeciaie daje isoi lloicana cai jailla.

Cristomo jai cai duilla jira, naimie rafuedo birui jaidicai

¹⁷ Omoimo nia lloiticue. Cai Namamo cue duilla jira, biena lloiticue. Jusiñamuina ññoñedino isoi dane omoï ñño. Jaie naimaci isoi itomoï. Naimaci comeciadi tainomo jai jaide isoide. Cacarefiacaiññedimaci. ¹⁸ Jusiñamui rafuena uiñoñedimaci. Iena cacaiññedimaci. Abina naimaci uiñoñena jira, Jusiñamui ñibeimo illana jaca uiñoñedimaci. Uanaicinona uiñoiacaiññedimaci. ¹⁹ Jearede rafuena naimaci finoia, meiruiññedimaci. Naimaci comeciái oiacana rafuedo jai jaidimaci. Naga jearede isoide rafuena eo finocana jaidimaci; ²⁰ iadedi Cristo rafuena omoï cacajamona, naimiena omoï raise uiñuamona, naimaci isoi omoï illena fueoñedomoï. Cristo rafuena omoï cacajamona, jiaiena illena jai fueotomoï. ²¹ Naimiena cacajanona iena ñnotomoï. Naimiena cue llofuiamona, naimiena Cristo facaina lloraini llofuiamona, danomo omoï roracomo omoï ofia, Cristo uanaicinona cacadomoï. ²² Biena omoïna llofuecabiticue. Cristona jaie nia omoï ññoñena isoi, omoï jaiñño. Omoï comeciáimo jaie iticinodo jaiñño. Naga jearede rafue omoï comeciái oiacanamona faificana jaie jaidomoï. Iedo birui jaiñño; ²³ iadedi Cristo ñibeimo omoï jai illanona, naimiemo omoï comeciái facajano, Jusiñamui omoïna canuamona, omoï comeciái iuaillaina meidocana jai. ²⁴ Cristo rafuena birui ñnotomoï. Naimie jitaillacinodo omoï mai jai. Jusiñamuidi jeacino finocana omoï jaiññenana jitaide. Naimie marena isoi, marena icana omoï jaillana jitaide. ²⁵ Ie jira tainona lloñño. Cristomo daajena jai jainaiaila jira, coninimo uanaicinona jaca omoï llono. Jiaïnona omoï jifueñño. ²⁶ Maraiññedicinona bu finoia, naimiemo riire llono; iadedi iese o lloia, naimiena jeare ñaiñño. Jiaimie ona icia, naimiena jeare ñaiñño. Naimie ñiga o rafue ia, naie rafue nairuido marena fino, ²⁷ Taife ramo o fai raillano. Bu ñiga o ñicino ia, iena raire marena o finoñña, ibana oiacanitio. Naie raire o feitañña jira, Taife ona jeacina finotaite. Iese suiññellena, naicino raire marena fino. Iena feita. Iena dane abido lloñño. ²⁸ Naimiemo ra illena, fiamona omoïmona navui bu ia, creyentena naimie jai jailla jira, naimie dane fiiñña; iadedi ra naimie jitaia, naimie maijite. Ie maijiamona ie ra ollena, ucubena feiñoite. Ie mei dueredinona naimie jiaï canoite. ²⁹ Jeare ñaiñño; iadedi ñie isoide rafue ia, marecinona ñaino. Ie mei naiemona jiaie cominina canoitomoï, Jusiñamui ñibeimo naimaci raise illena. ³⁰ Jusiñamuimo omoï jai jainaiaila jira, jeacina finoñño. Jeacino omoï finoia, Jusiñamui Joreñodi sunaite. Naimiena sunaitañño. Naimie caïmo illamona, caïna jillotajana uiñoticaï. Cristo dane abido billemona, naimie ñine cai jaca illena, caïna jai jillotate. ³¹ Jiaie cominina icinño. Icinñño. Uaina uaitañño. Jiaie cominina jeare ñaiñño. Naimacina duere jeare finoñño; ³² iadedi coninina canua. Jiaie cominina duenai. Jiaimie ñiga omoï ñicino ia, naimie finoca rafuena faitajanona, naimie ñiga marena ñaino. Naie rafuena dane abido lloñño. Cristo finoca rafue muidona, Jusiñamui omoï jeacina jai faitaja isoi, jiaimie ñiga omoï rafue ia, naifuena omoï feita.

5

Jusiñamui cominina jai cai illamona, naimie jitaillacinona fnoiticaï

¹ Jusiñamui isiruiga uruiadomoï. Naimie marecinona finua isoi, omoï fino. ² Cristo caïna isiruilla isoi, coninina isiruicana omoï jai. Naimie jitailla jira, caïna isiruillamona, cai facaina naimie fiodaite. Cai jeacino oni dotallena naimiedi fiodaite. Naimie iese fiodailla jira, Jusiñamuina eo iobitade. ³ Jusiñamui cominidomoï. Omoï aiññede riño ñiga ñño. Omoï iniññede ñima ñiga ñño. Rana ñicidoñño. Jearede rafue finuamo omoï comeciáina facañño. ⁴ Jearede rafuedo jaiñño. Jamai ebena ñaiñño. Meiredicinona ñaicana jaiñño. Naie isoide rafuedo creyentedi jaiñña; iadedi Jusiñamuimo iobil-lacinona fecacana omoï jai. ⁵ Ie aiññede riño ñiga icabitimiedi Jusiñamui illanomo ñiññede. Cristo ie cominina sedajanomo ñiññede. Ie iniññede ñima ñiga icabitñaiññodi Cristo ie cominina sedajanomo jiaï ñiññede. Ie rana Jusiñamui ifomo naimie sedaja jira, rana

nicidocabitimiedi Cristo ie cominina sedajanomo duiñede. Cue lloga rafuena jai raise ca-cadomo. ⁶ “Creyente naie isoide rafuena finorede” bu lloia, naimie omoina jifueiacade. Naimie iese lluaana inoñeno. Jusiñamui naie jeacinona finocana jaidinona duere finoite. ⁷ Ie jira naimaci jearede finoca rafuedo jaiñeno. Naimacina nabaiñeno. ⁸ Jusiñamuina jaie omoi uiñoñena jira, jitredeinomo itomoi isoidomoi; iadedi cai Namamo omoi duillamona, uanaicinona inocana omoi jai. ⁹ Jusiñamuina omoi jai uiñoia, jeacinona omoi fañonocaia, Jusiñamui jitaillacinona finocana jaitomoi. Uanaicinona llocana jaitomoi. ¹⁰ Buena o finoacania, Jusiñamui jitaillacinona o finuacinomo o comecina nano faca. Cai Nama jai lloga uaido omoi jaicabillamona, naimie jitaillacinodo jaca jai. ¹¹ Jitredeinomia itino finoca rafuedo omoi jaiñeno. Naimaci finoca rafuemona marecinodi jaca comuiñede. Naimacimo: “Maraiñede” lloño. ¹² Iena cue meidaila jira, naimaci jearede bainino finoca rafuena ñaiacaiñedicue. ¹³ Marecinona omoi jaca finuamona, jiaie comini naimaci finoca rafue eo maraiñenana raise uiñotimaci. ¹⁴ Cai ofia, naiena rocabiticai: Mai casi. Inñeno.

Jai fioidaitino isoidomoi;

iadedi omoi comeciaina Cristo jai lligaiñoite.

¹⁵ Ie jirari omoi marena illena, abina rairuicana omoi jai. Jusiñamuina inoñedino ebena jaicabidimaci. Naimaci isoi jaiñeno. ¹⁶ Diga maraiñede rafue birui comuicabilla jira, cominina Cristo dibeimo raise omoi itatajallena, nagarui Cristo jitaillacinona finocana omoi jai. ¹⁷ Ie jira ebe isoi jaiñeno; iadedi Cristo jitaillacinona uiñocana omoi jai. ¹⁸ Iocire omoi iacania, naiemona diga maraiñede rafue comuilla jira, jifaiñeno; iadedi omoi comeciaina naimie namatallena, Jusiñamui Joreño anamo raise omoi mai i. Iemei naiemona diga mare rafue comuite. Iocire jia iitomoi. ¹⁹ Danomo omoi ofia, nana omoi comeciainona diga isoide ruana iocire ro-rona. Omoi ruamona jiaie creyentiai comeciaina ocuiñota. Cai Namamo omoi ruamona, omoi fillamona, omoi taillamona, naimiena iobitaitomoi. ²⁰ Cai Nama Jesucristomo omoi duillamona, nie isoide rafue omoimo ia, cai Moo Jusiñamuimo iobillacinona jaca fecu.

Cristomo jai cai duilla jira, cai comini diga marena iacadica

²¹ Cristo anamo omoi illa jira, jiaie creyente baifemo omoi faiacinomo omoi comeciaina facañeno; iadedi coninina nagamiaina cano.

²²⁻²³ Inirediñaiñuai, omoimo rafuena lloiacadicue. Cai Nama Cristomo omoi jainaiñaiilla jira, naimie jitailla jira, omoi iniñiai anamo raise omoi i. Naimaci uaina raise ino. Cristo nana creyentiai afemo illamona, naimacina naimie sedaja isoi, naga ini ie ai afemo illamona naiñaiñona sedaja. Cristodi nana creyentiai imaci jeacinomona jillotajamona, naimie anamo itimaci. ²⁴ Cristo anamo nana creyentiai illa isoi, naiñaiñuai iniñiai uaina jaca inua. ²⁵ Airedino, omoimo jia lloiticue. Nana creyentiaina Cristo isiruilla isoi, omoi ainiaina isirui. Nana caina naimie isiruillamona, naimie jitailla jira, cai facaina naimie fiodaite. Ie isoi omoi ainiaina omoi isirui. ²⁶ Nana creyentiai marena illena naimie fiodaite. Jusiñamui jitailla isoi, caina marebicaitate. Cristo fiodailla jira, Cristo jai lloga rafuena cai inuamona, cai jeacinomona jai jillobidicai. ²⁷ Fiodaite, nana cai creyentiai comeciaina marena illena. Cai comeciaina jeaninana jitaide. Cristo abido bille facaisemo, Jusiñamui jitailla isoi cai marenana jitaide. ²⁸ Naimie abi naimie isiruilla isoi, naga ini ie aina isiruilla. Iaimaia daajena jira, ie aina isiruitimiedi ie abina jia isiruite. ²⁹ Jaca bu ie abina enoiñede; iadedi ie abina sedade. ³⁰ Naimiemo nana cai creyentiai duilla jira, Cristo caina isiruillamona, caina sedade. Ie isoi nagamie ie aina isiruilla. ³¹ Bie jaie lloga uaimona iena uiñoticai. Moisés micori Jusiñamui lluaana jaie cuela: “Ie aina ollena, ima ie moonu, ie ei diga fañonocaite. Iemei dajena iitaiamaia”. ³² Naie llofuiacinomona jia rafuena fueoiticai. Cristona ñaiticue. Creyentiaina ñaiticue. Naimiemo cai duillamona, daajena iticai. ³³ Dane lloticue: Ie abina isiruilla isoi nagamie ie aina isiruilla. Nagañaiño ie ini uai uaitañeno inua.

6

¹ Uruiai, omoimo rafuena lloiacadicue. Cai Nama jitailla jira, omoi eiñiai uaina ñno. Omoi mootiai uaina jiai ñno. Jusiñamuimona marena jira, iaiaiaia uaina ñno. ²⁻³ Moisés micori Jusiñamui lloga uaina jaie cueda: “O moo uai ñno. O ei uai ñno. Marena o illena, raire o fioidañellena, iaiaiaia o isiruillamona, iaiaiaia uaina ñno” cueda. Jusiñamui diga lletarafuena llote; iadedi bie nanoca rafuena llote. ⁴ Mootiai, omoimo lloiticue. Omoi uruiaina jamai icineno; iadedi naimacina cai Namana naimaci uinollena llofue. Naimaci ñnoiacañenia, abina naimaci uinollena, naimacina isiruillamona, naimacina duere fino.

⁵ Patrón anamo itino, omoimo lloiticue. Omoi patrones ocuica uaina ñno. Omoi maijiana naimaci ocuica, naimacina iobitallena, jaciruioicaida raise maiji. Omoi comeciainona naimaci jitailla rana maiji. Cristo iedena, naimaci ocuica uaina ñno. ⁶ Omoimo naimaci eruaia, naimacina iobitallena, marena maiji; iadedi omoimo naimaci eruañenia, naimacina iobitallena, nia marena maiji. Naimacina iobitallena maiji; iadedi Cristomo omoi duilla jira, Jusiñamui jitailla jira, omoi comeciai maiji raillamona, marena omoi maiji. ⁷ Patrón facaina maijiacino dani comecina facañeno; iadedi iocire maiji, cai Nama facaina omoi maijidoimodena. ⁸ Biena uinotica: Marena bu maijia, cai Nama Cristomona ibana ico feñnoite. Patrón anamo itino iena feñnoitimaci. Patrón anamo inedino iena jiai feñnoitimaci. ⁹ Patrones, omoimo lloiticue. Omoi Nama Cristo monamona omoimo eruailla jira, Cristo monamona naimacimo jiai eruailla jira, omoi anamo itinona marena fino. Naimacina riire ocuñeno. Naimacina jeare finoneno. Cristo nana naimie cominimo daje isoi comecina lloide. Ie jira omoi anamo itinona marena fino.

Cristomo jai cai duilla jira, naimie cai comeciaina ocuinotaite

¹⁰ Ie muidona nia lloiticue. Cai Namamo omoi duilla jira, naimiedi omoi canocabillamona, omoi comeciaina ocuinotacana omoi jai. ¹¹⁻¹² Ero, Taife caina ramo jifueoicaida faite. Caina anafetaiacade. Naimie isoidino caina jiai anafetaiacadimaci. Naimacidi aillosie. Naimaci anamo nana Jusiñamuina ñnoñedino jai itimaci. Jitiredinomo naimaci illanona, Jusiñamui dibeimo inedimaci. Beno enruemo itimaci. Jusiñamui illanomo duiñedimaci. Cominina ñañedie. Taifena, Janabana, Dofina, jananiaina, Dusisiñona ñaitie. Naimaci isoide joreñuaina ñaitie. Cai dibeimo inedimaci. Naimacimona abina omoi rairui. ¹³ Jobaime illa facaiseconi, soldaduai imaci ra diga imaci abiaia riidotimaci. Cinturón jitaadimaci. Lloemamona finoca ra jogobemo jitaadimaci. Zapatona jitaadimaci. Uico riidollena, naimaci uico riidua rana llinotimaci. Ifogi icona jitaadimaci. Llobina llinotimaci. Ie isoide. ¹⁴ Cristomo omoi comeciai facajanona, uanaicinona jaca llono. Jusiñamui jitailla isoi, marenona finocana omoi jai. ¹⁵ Cristo rafuemona omoi comeciai uri itatajamona, iena meiruñeno llocana uinno. ¹⁶ Taifemona nana jearede rafuedi comuide. Naimiedi ramo faiacana jai jaide. Cristona omoi ñnuamona, Taife ramo faiacinona jamai. ¹⁷ Jusiñamui caina jai jilloitajana jai uinotomoi. Iena omoi uinuumona, Taife ramo faiacinona ñnoñeno. Taifena anafenollena, Jusiñamui Joreñodo Jusiñamui uaimona fueo. ¹⁸ Jusiñamui Joreño omoina canuamona, Jusiñamui diga ñaicabi. Taife ramo omoimo faia, iena omoi ñnoñellena, Jusiñamui omoina canoite. Iese abina omoi rairuia, Taifena anafetaitomoi. Taife ramo faiacino naimaci ñnoñellena, nana jiaie creyentiai facaina jiai jicabi. ¹⁹ Cue facaina jiai omoi jii. Marefodo nana Cristo ie rafuena cue llua omoi jii. Cristo nana cominina jilloitaiacanana nia lloiacadicue. ²⁰ Naie rafue cue llollena, Cristo cuena oretate. Naie rafuena cue llua muidona, cárcelmo itie. Cue jitailla diese iena marefodo cue llua mai omoi jii.

²¹⁻²² Tiquico omoi dine oretaitie. Naimiedi cue isiruiga ama. Naimiedi ñnogamie. Cristo rafue facaina cuena canocabide. Omoimo cue illana lloite. Cue finoca rafuena lloite. Naimiemona cue rafuena fidiitomoi. Iena cacajamona omoi comeciai

ocuiñoitomoi. ²³ Cai Moo Jusiñamui, cai Nama Jesucristo diga, omoina uri itatajamona, Cristona jai omoi ñnuamona, coniniri uri icana jaillana jitaidicue. Iaimaia omoina isiruillamona, iaimaiaina omoi ñnuamona, nana jiaie creyentiaina isiruicana omoi jai. ²⁴ Cai Nama Jesucristona omoi eo isiruilla jira, Jusiñamuidi omoina duenailasa. Mai. Pablocue.

FILIPOMO ITE CRISTONA HNOTINOMO PABLO ORETAGA RABE

Uaiduacino

¹⁻² Filipomo ite creyentiaí, Jesucristomo jai omoí duillamona, bie carta omoí dine oredicue. Pablodícue. Timoteo cue diga ite. Naimie cominina coco illamona, Jesucristo díbeimo maijicabidícoco. Omoímo coco uaina oredicoco. Omoí creyentiaí illaicomínimo coco uaina ua oredicoco. ¿Nigacino? ¿Nie isoidomoí? Cai Moo Jusiñamui, cai Nama Jesucristo diga, omoína jai duenaite. Iena uiñocana mai omoí jai. Iaimaiaí omoína uri jai itatate. Iena omoí uiñocana mai omoí jai.

Jusiñamuimo iobillacino fecade

³ Naga icaiño omoína cue comecia, Cristo rafuedo omoí jailla jira, Jusiñamuimo iobillacinona fecadícue. ⁴ Naga icaiño Jusiñamui diga cue ñaia, omoí facaina caimare jidícue, ⁵ Jesucristo rafuena cue llwana cuena omoí canua jira. Nano bie rafuena omoí cacajamona, cuena canodomoí. Cuena nia canodomoí. ⁶ Jusiñamuidi omoí comeciaina jaie marena itataja facaiseconi mare rafuena tainede. Omoí comeciaino mare rafue illacinona tainede. Cristo Jesús dane billiruiamo Jusiñamui bie rafuena fuidoite. Iese fuidollemo ocuridícue. ⁷ Omoímo iese cue comecina cue facajia, omoína cue isiruilla jira, cuemona mare. Cárcelmo cue illamona, Jesucristo rafuena cue riiduano, Jesucristo rafuedi uanaicino cue llwano, Jusiñamui cuena canocabide. Iemona naimie cana duenaillana jai uiñotícaí. ⁸ Cuena omoína Cristo Jesús isiruitajamona, nana omoína isiruitícue. Jusiñamuidi uanaicínona cue llwana uiñote. ⁹ Jiaie cominina eo isi-isiruicana omoí jaillena, Jusiñamuina raise omoí uiñollena, nie isoide rafue omoímo ia, abina raise omoí uiñollena, Jusiñamuimo jicabidícue. ¹⁰ Iese omoína jitaídícue. Mare rafuedo omoí jaiacanana jitaídícue. Jairuido Cristo abido biite. Ie jira omoí comeciái jeanillena jitaídícue, Jusiñamui jitailla isoi omoí comeciái marena illena. ¹¹ Jusiñamui jitailla isoi omoí illamona, mare rafuena jaca omoí finuana jitaídícue. Jesucristona omoí inuamona, naimie omoína iena finotarede. Iese omoí finocana omoí jaia, Jusiñamuina eo iobitaitomoí.

Cárcelmo Pablo illamona, diga comini Jesucristo rafuena cacadimaci

¹² Cue amatiaí, bie rafuena omoí uiñuana jitaídícue. Cárcelmo cue illamona, diga comini Jesucristo rafuena cacadimaci. ¹³ Cai illaíma jofomo itino cacadimaci. Nana bene itino jiaí cacadimaci. Jesucristo rafuena cue llua jira, cárcelmo itícue. Iena jai uiñotimaci. ¹⁴ Cárcelmo itícue; ia jaciruiñeno Cristo rafuena nia llotícue. Iemona diga creyentiaí naimaci comeciaina ocuiñuanona, Jusiñamui uaina jaciruiñeno marefodo birui cue isoi llotimaci. Navui jaciruitimaci.

¹⁵ Cuena uradoillamona, cue afemo iacanamona, damierie Cristo rafuena llofuetimaci. Jiaie llofueraíni marecinona finuacanamona llofuetimaci. ¹⁶ Cuena naimaci isiruilla jira, llofuetimaci. Cristo rafuena cue riiduamona, cárcelmo cue illana uiñotimaci. ¹⁷ Cue afemo iacadino mare comeciaino llofueñedimaci. Iemona cuena duere finoacadimaci. ¹⁸ Iese itimaci; iadedi uradoillamona naimaci llofua, marecinona finuacanamona naimaci llofua, cuemona damamei iesede. Cristo rafuena llocana jaidimaci. Iena jai iobidícue. Nia iobitícue. ¹⁹ Cueri Jusiñamuimo omoí jiano, Jesucristo Joreño cuena canuano, nana cuemo ite rafuemono jilloitícue. Iena cue uiñuamona, nia iobitícue. Jesucristo Joreño ie Moo diga daje. ²⁰ Cue finolle rafuemono cue meiruiñellena eo jitaídícue. Jiaie cue finocabilla isoi, Cristona marefodo birui iobitaiacadícue. Cue nia fioidañenia, naimiēna iobitaiacadícue. Cue fioidallemona naimiēna jiaí iobitaiacadícue. Iemona jiaie creyentiaídi Jusiñamuimo iobillacinona fecaitimaci. ²¹ Nia cue fioidañenia,

Cristo rafuena nia lloiticue. Mare; iadedi cue fiodaia, naimie dine cue illena jiai eo mare. ²² Nia cue fiodaiñenia, diga cominimo Cristo rafuena nia lloiticue. Ie jira nie isoide cue illana cue comeci niese rainide. ²³ Nia raise uiñoñedicue. Jiaicaiño fiodaiacaiñedicue. Jiaicaiño fiodaiacadue. Cue comeci Cristo dine jaiacade. Nainomo cue illena cuemona eo mare; ²⁴ iadedi omoina cue canollena, nia fiodaiacaiñedicue. Cue nia fiodaiñenia, omoina nia canoacadue. ²⁵ Cue comecina jai facajano, raite: “Nia fiodaiñeiticue. Omoi diga nia cue illana uiñoticue”. Cristona omoi ñnotacana omoi jaillana jitaide. Omoi ñnuamona, caimare omoi illana jiai jitaide. ²⁶ Iemei omoi dine dane cue illa jira, cueri Cristomo iobillacinona eo fecaitomoi.

²⁷ Cue fiodaia, cue fiodaiñenia, Cristo ie mare rafuedo omoi jai. Omoina cue cioia, omoina cue cioiñenia, mare rafuena omoi finuana fidiacadue. Cristo rafuena ñnocana omoi jaillana, omoi comeciai daje isoi lloillana, Cristo rafuena omoi riiduana fidiacadue. ²⁸ Omoi dibeimo iñedinona omoi jaciruiñenana fidiacadue. Iese omoi ia, Jusiñamuidi omoi dibeimo iñedino faifillana uiñotaite; iadedi naimiedi omoina omoi jilluana uiñotaite. Naimie diga omoi jaca illena, omoina jai jillotate. ²⁹ Jusiñamui Cristona omoi ñnollena omoina fetode; iadedi Cristori omoi duere sefuillena omoina jiai fetode. ³⁰ Omoi nairaimo cue nano illa facaise Cristona ñnoñedinomona duere sefuidicue. Iena ciodomoi. Cárcelmo birui cue illamona, naimacimona iese nia birui duere sefuidicue. Iena birui fididomoi. Naimacimona cue isoi birui jiai duere sefuidomoi.

2

Jiaie creyentiai diga raise omoi illacino

¹ Jiaie creyentiai diga omoi marena illena, dajerie rafuena lloiacadue. Cristomo omoi duilla jira, coninina omoi comeciai ocuiñotajamona, Cristo omoina isiruillana omoi uiñuamona, Jusiñamui Joreño nana omoina nabaitajamona, coninina omoi comeciai eo duenaillacino illamona, ² cue comecina caimare itata. Omoi comeciai daje isoi lloillamona, coninina omoi isiruillamona, daje uaido omoi comeciai lloillamona, cue comecina caimare itata. ³ Jaca buena finoñoeno, jiaimie afemo jamai omoi illena. Abina ieduamona buena finoñoeno. Abina iedoñoeno jiaimacimo comeciaina faca: “Naimaci cue baifemo faite”. ⁴ Omoi abimo ite rafuemo omoi comeciaina faca; iadedi jiaimaci abimo ite rafuemo comeciaina jiai faca. ⁵ Cristo Jesús illa isoi omoi illa. Ie rafuemo comecina janore facade; iadedi naimacina canollena, jiaie cominimo ite rafuemo naimie comecina eo facade. ⁶ Naimiedi jaca Jusiñamui; iadedi naimiedi Jusiñamui diga danomo jaca illana jitañede. Naimie comecina iemo facañede; ⁷ iadedi iena faimonocaida, ie Moo ocuica rafuena finollena, imana naimie jaide. ⁸ Jamai bue isodimiena jaide; iadedi ie Moo uaina ñnote. Ie Moo jitailla jira, fiodaite. Marañede rafue finodimie isoi, cruzmo fiodaite. ⁹ Ie jira, naimiena iobitallena, Jusiñamui naimie ecimo naimiena abido ote. Nana jiaie mameci baifemo faite mamecina jitade. ¹⁰ Jesúna nana comini sedallena, naimiemo iobillacinona naimaci fecallena, Jusiñamui naimiena iese iobitate. Jusiñamui jaienisaí naimiemo iobillacinona fecaitimaci. Nana comini naimiemo iena fecaitimaci. Fiodaitino jillobillamona, naimiemo jiai fecaitimaci. ¹¹ Nana lloitimaci: “Jesucristodi cai Nama”. Iese naimaci llua jira, cai Moo Jusiñamuina iobitaitimaci.

Maraiñedino comeciaina lligaiñotomoi

¹² Cue isiruiga amatiaidomoi. Ie Moona Jesucristo ñnua jira, cue llua nia ñnocana omoi jai. Jai omoi diga cue ia, Cristo rafuena raise ñnotomoi. Birui omoi diga iñedicue; iadedi Jusiñamuina omoi ñnua jira, naimie jitailla rafuena jaciruiocaida, finocana omoi jai. ¹³ Ie jitailla rafuena omoi finollena, Jusiñamui omoi comeciaina birui marena itatate. Naimie omoina iena finotaiacade. Naimie mare jitaillacinomona, omoina iena finotaite. ¹⁴ Nana omoi finolle rafuemo abi jafueoicaiñoeno fino. Uai uaitañoeno fino, ¹⁵ jiaie comini omoiri ñai raillanona, Jusiñamui uruiaina omoi illa jira, omoi comeciai jeanidemon

marena omoi i. Maraiñede comini motomo itomoi. Naimaci comeciai jearede. Naimaci comeciaina lligaiñotomoi, naimacimo ite jeacinona uiñotallena. ¹⁶ Jesucristo rafuena llocana uitomoi. Iena naimaci inuamona, bie rafue Jusiñamui dine cominina jaca itatate. Cristo dane billirui omoi ri cue iobiacana jira, omoi dine: “Tainona jaie lloticue” cue railano, Jesucristo rafuena llocana nia omoi jai. ¹⁷ Jusiñamuina omoi inua jira, naimiemo ailluena ucubena caidiñeno fecadomoi. Ie baifemona cue fiodaillana Jusiñamui jiai jitaia, iobiticue. Omoi diga jiai caimataiticue. ¹⁸ Ie muidona caimare iitomoi. Cue diga caimataitomoi.

Pablo Timoteona orede

¹⁹ Cai Nama Jesús jitaia, omoi dine Timoteona raire oretaiacadice. Cue dine abido naimie bia, omoi rafuena cue fidiano jiai iobiticue. ²⁰ Cue dine jiaino naimie isoi iñede. Dama naimie omoi ite rafuemo comecina facade. ²¹ Jiaino dani naimacimo ite rafuemo comeciaina facadimaci. Jesucristo rafuemo comeciaina facañedimaci. ²² Timoteodi mareuidimiena uiñotomoi. Cue jito isoide diga, Cristo rafuena lloticoco. ²³ Cárcelmo cue illa rafuedi nia fuiñede. Iena cue uiñollemona, naimie omoi dine raire oretaiacadice. ²⁴ Cárcelmona cue jino jaillena cai Nama jitaia, omoi dine jiai raire jaiacadice.

Pablo Epafroditona abido orede

²⁵ Epafroditodi cue ama isoide. Danomo Cristo rafuena lloticoco. Danomo Cristo rafuena riidoticoco. Naimiena oredomoi, cuena canollena. Naimiena omoi dine abido oretaiacadice, ²⁶ omoi dine naimie illemo naimie comecina facaja jira. Naimie navui duillana omoi fidi jira, naimie uri iñede. ²⁷ Navui niadedi fiodaicanamona jillode, Jusiñamui naimiena duenalla jira. Naimie fiodaillamona, eo cue duere sefuiñellena, Jusiñamui cuena jiai duenaite. ²⁸ Ie jira Epafroditona eo raire oretaiacadice, naimiena omoi ciuanona omoi iobillena. Iemei jiai uri iiticue. ²⁹ Cai Nama mamecido naimiena eo caimare feiño. Jiaie naimie isodinona omoi dine ia, naimacina iobita. ³⁰ Cristo facaina navui naimie llofuiamona, omoi facaina cuena canollena, niadedi fiodaite. Omoi facaina naimie cuena canuano, cue dine omoi iñena jira, cue muidona niadedi naimie abina faifitate.

3

Moisés micori llogacinuaido jaidinomona abina rairui

¹ Cue amatiai, omoimo nia lloitice. Cai Namamo omoi duilla muidona, iobi. Omoi bie rafuena dane cue cueia, cuemona sefuinide. Iena dane omoi cacajamona, omoina canoite. ² Jearede rafue finode cominimona abina rairui. Jiconiai isoidimaci. Jillobillena abi diana llofuetimaci; iadedi cuemonadedi jamai ebena tuquica isoidimaci. Naimaci abiaina detatatimaci; iadedi naimaci comeciai nia raise finoñedimaci. ³ Cai abiaina detatajamona, cai comeciai raise finobiñede. Cai comeciai raise finuamona, Jusiñamui Joreñodi caina Jusiñamuina raise sedatate. Cristo Jesúri iobidicai. Cai jillobillena, cai abiaina detatañedicai. ⁴ Buena cai finuamona cai illamona jillobidicaidena, cue jilluana raise uiñoticue. Cue cominimona jamai bue isoñedicue. ⁵ Iena ja ñaitice. Cue jeiciamona ocho digarui illamona, cue abina degacue. Cue eirue jitodi Israel micori. Benjamín isie imiedice. Cue cominidi judiuaí imacina jira, cue uruenamona judiuaí uaido ñaitice. Fariseo cue imiena jira, Moisés micori llogacinuaido fañonocaiñeno iedo eo jaidice. ⁶ Iena eo cue jitailla jira, Cristona inotinona duere finodice. Nana Moisés micori llogacinuaido eo raise jaidice. Iena raise finodice. ⁷ Iese jaie itice. Cue comeci iena: “Mare” raite; iadedi Cristona jai cue inua jira, birui nana bie rafuedi cuemona ieñedicinuai. Naie isoide rafue cuemo illamona, cue jeacinomona jilloñedicue. ⁸ Dane llotice: Cue Nama Cristo Jesúsna cue uiñoiacana jira, jiaie rafue cuemona ieñedicino. Naimiena cue uiñuacnodi nana jiaie rafue baifemo faite. Jeacuai isoi jai maraiñena jira, naimie muidona cue jaie illacinona jai sofecaidice. Iena sofeticue, Cristo dibeimo

raise cue illena, ⁹ naimiemo raise cue duillena. Moisés micorí llogacinuaido cue jillamona marebicaiñedicue; iadedí Cristona cue ñnuamona marebicaidicue. Cristona cue ñnua muidona, Jusiñamui cuena jai marebicaitate. ¹⁰ Cristona raise uiñoiacadicue. Naimie fiodaite; ia iemona jillode. Naiemona cue comeci marena illena, naimiena jillotate uaina uiñoiacadicue. Naimie rafuena cue llamona, naimie isoi duere sefuiticue. Iemona ñibai fiodaiticue. ¹¹ Cue fiodaille mei, fiodaillamona naimie isoi cue jilloillemo ocuridicue. Ie jira naimiena uiñocana jaiacadicue.

Pablo jitaillacino

¹² Jusiñamui jitailla isoi, nia raise marebicaiñedicue. Nia fiebidicue; iadedí nia jai jaicaidicue, iena illena. Iena cue illena, Cristo Jesús cuena jaie uaidote. ¹³ Cue amatiai, iena nia iñedicue; iadedí jaie cue finoca rafuemo comecina facañedicue; iadedí cuemo nia suiñede rafuemo birui eo ocuridicue. ¹⁴ Cue risaillinomo iocire jaidicue, ibana cue feiñollena. Ieri Cristo Jesúdo Jusiñamui cuena uaidote, monamo cue illena. ¹⁵ Caimona Cristo rafuena raise abina uiñocaidino, bie rafue diga cai comeciai lloicana mai cai jailli. Dajerie jiaiforie comecina lloia, Jusiñamui naimacina uanaicinona raise uiñotaite; ¹⁶ iadedí caimo jai ite uiñuacínodo mai cai jailli.

Pablo illa isoi cai illa

¹⁷ Cue amatiai, Cristona cue ñnua isoi, naimie rafuedo cue jailla isoi, nana omoi jiai jai. Cai illa isoidinomo omoi eruai, naimaci isoi omoi illena. ¹⁸ Jaie omoimo lloidicue. Cue sunaillamona dane lloiticue. Ailluena comini Cristo fiodailla rafuena birui jitañedimaci. ¹⁹ Ja muidomo faifitimaci. Naimaci Jusiñamuidi imaci guille, dani guille ramo naimaci comeciai facaja jira. Jearede rafue finuamona, meiruiñeno naie rafueri iobidimaci. Naimaci ecimo ite ramo comeciaina facadimaci. Naimaci isoi cai iñena. ²⁰ Monamo ite Jusiñamuimo cai jainaiilla jira, monamona cai Jilloitaraima abido dane billemo ocuridicai. Cai Nama Jesucristodi cai Jilloitaraima. ²¹ Naimie bia, cai fiodaille abina meidoite, naimie ebirede abi isoi cai illena. Nana ra naimie anamo itatate uaido caina iese meidoite.

4

¹ Ie jira Cristo rafuena ñnocana nia omoi jai. Cue amatiai, omoina isiruiticue. Omoina cioacadicue. Omoiri iobidicue. Cue llamona Cristona jaie ñnotomoi. Ie rafuedo omoi jailla jira, iobidicue. ² Evodia raillañaiñomo rafuena lloiacadicue. Síntique raillañaiñomo jiai lloiacadicue. Cai Namamo iaññuai duilla jira, iaññuai comeci daje isoi lloillana jitaidicue. Coniño diga icirillana jitañedicue. ³ Cue mare nabai, omo jicanoticue, iaññuaina canollena, coniño diga iaññuai dane marena ñaillena. Cristo rafuena cue diga llotiaiaññuai. Clemente diga llotiaiaññuai. Cue diga llofueuidino diga llotiaiaññuai. Monamo ite rabenicomo nana naimaci mameciai jai cueda. Jusiñamui diga monamo jaca iite comini mameciai diese cueda.

Iobillacino, uri illacino diga

⁴ Cai Namamo omoi duilla jira, jaca iobi. Dane lloiticue: Iobi. ⁵ Omoi rininana nana comini uiñuana jitaidicue. Cai Nama dane abido billirui iairei ite. ⁶ Ie jira buemo omoi comeciaina facajanona, jaca llicidaiñeno. Naga omoi jitaillacino Jusiñamuimo llono. Naimiemo jica. Naimiemo omoi jiaia, naimiemo iobillacinona jiai feca. ⁷ Iemei Jusiñamui omoi comeciaina uri itataite. Omoi comeciai facajacino baifemo omoina uri itataite. Cristo Jesúna omoi ñnuano, omoi comeciaina eenoite. ⁸ Cue amatiai, ie muidomo daje rafuena nia lloiticue. Uanaicinomo comeciaina faca. ñnogafuemo comeciaina faca. Mare rafuemo comeciaina faca. Ebirede jeanide rafuemo comeciaina faca. Iobillafuemo comeciaina faca. Bie isoide mare rafue ia, iemo comeciaina faca. Nana bie isoide rafuemo comeciaina faca. ⁹ Nana cuemona omoi fueoga rafuedo omoi jai. Nana cuemona omoi feiñoga rafuedo omoi jai. Nana cuemona omoi cacaja rafuedo omoi

jai. Nana cue finoca rafuena omoï ciua rafuedo omoï jai. Iemei omoï comeciaina uri itatajanona, Jusiñamui omoï diga iite.

Filipomo ite comini Pablona eo canodimaci

¹⁰ Cai Namari iobidicue, diga irui illamona dane cuena omoï comecia jira. ¹¹ Cuemo comeciaina facadomoï; iadedi bu jaca binide, ucubena cue dine atillena. Bumo cue jitaillacinona lloñedicue. Janore ra cuemo ia, ailluena ra cuemo ia, caimare jai iticue. Cuemo ite ra diga caimare illana jai uiñoticue. ¹² Duere cue illana uiñoticue. Duenino cue illana jiai uiñoticue. Nie isoi cue ia, uri cue illana jai uiñoticue. Cue monia, cue aimetaia, janore ra cuemo ia, ailluena ra cuemo ia, jaca uri iticue. ¹³ Nie isoide rafue cuemo ia, Cristo cue comecina ocuiñotaja jira, naga rafuena finocana jaiticue. ¹⁴ Cue duere sefuillamo cuena omoï duenaillamona, cuena omoï canua jira, cuemona mare. ¹⁵ Omoïmo Cristo rafuena nano cue llamona, cuena canodomoï. Macedoniamona cue jailla mei, jiaie creyentiai cuena canoñedimaci. Dani omoï cuena canodomoï. Iena uiñotomoï. ¹⁶ Tesalónicamo nia cue ia, diga icaiño ucube cuemo oredomoï; ¹⁷ iadedi omoï ucubena nicidoñedicue; iadedi cuena omoï canuamona, Jusiñamuimona ibana omoï feiñuana jitaidicue. ¹⁸ Nana cue jitaille rana jai feiñoticue. Ailluena cuemo ite. Epafroditomona cuemo omoï oretaga rana feiñoticue. Jusiñamuimo fecadomoï isoide. Jusiñamui dibeimo cue maijia jira, mare rana finodomoï. Ie jira Jusiñamui iena gaide, caimare soride rana cai gaia isoi. Naimie iena jiai feiñote. ¹⁹ Naimiemo ailluena ite ramona cue Jusiñamui nana omoï jitaille rana fecaite, Cristo Jesúmo cai duilla jira. ²⁰ Cai Moo Jusiñamuimo iobillacino jaca cai fecacabillasa. Iena jitaidicue.

Fuiduacino

²¹ Cristo Jesús mamecido cue facaina nana creyentiaïmo cue uaina lloño. Cue diga amatiaï imaci uaina jiai oredimaci. ²² Nana benomo ite creyentiaï imaci uaina oredimaci. Cai illaïma César jofomo maijidino imaci uaina ua oredimaci. ²³ Cai Nama Jesucristo omoï comeciaina jaca caimare itatajana jitaidicue. Mai. Pablodicue.

COLOSAMO ITE CRISTONA HNOTINOMO PABLO ORETAGA RABE

Colosamo ite creyentiaimo Pablo carta orede

¹⁻² Colosas railla nairaimo ite creyentiai, Pablodicue. ¿Nie isoidomoi? Bie carta omoi dine oredicue. Timoteo cue diga ite. Coco uaina oredicoco. Cristomo naimie jiai duilla jira, naimiedi cai amana eruaide. Jusiñamui jitailla jira, ie rafue lollena, Jesucristo oretagamiedicue. Naimiemo jai duidomoi. Naimiena raise hnocana jaidomoi.

Naimaci facaina Pablo j#de

³ Cai Nama Jesucristo Moodi Jusiñamui. Omoi facaina Jusiñamuimo coco j#ia, naimiemo iobillacinona jaca fecadicoco. ⁴ Jesucristona nia omoi hnuana coco fidia jira, nana creyentiaina nia omoi isiruillana coco fidia jira, iobillacinona jaca fecadicoco. ⁵ Jusiñamui dine ico omoi illemo omoi ocuirilla jira, iese icana jaidomoi. Jesucristo rafuena nano omoi cacajamona, Jusiñamui dine illemo ocuiridomoi. Omoi jai cacaja rafuedi uanaicino. ⁶ Diga illanomo, diga comini iena jiai jai cacadimaci. Iena hnuamona Cristo dibeimo naimaci comeciai jai meidoga. Iena hnuamona marecinodo jai jaidimaci. Ie isoidomoi. Jusiñamui omoina duenaillana jai uifnotomoi. Uanaicinona omoi raise uifnuamona, iedo jaidomoi. Ie marecinona finocana jaidomoi. ⁷ Epafras lluamona naie rafuena cacadomoi. Naimiena isiruiticai. Jesucristo dibeimo coco isoi, naimie jiai llofuiana maijide. Omoi motomo cai inena jira, Cristo dibeimo cai facaina naimie raise maijuide. ⁸ Naimiemono omoimo ite rafuena fididicoco. Jusiñamui Joreño omoina canuamona, jiaie creyentiaina omoi isiruillana fididicoco.

⁹ Ie jirari omoi facaina jaca j#dicoco. Omoi rafuena coco fidiamona, Jusiñamuimo omoi finolle rafuena omoi eo raise uifnollena j#dicoco. Nana naimiemo ite abi uifnuacinona omoi eo raise uifnuana jitaidicoco. ¹⁰ Cai Nama: “Mare” omoina raillana jitaidicoco. Naga mare rafue omoi finocana jaillana jitaidicoco. Jusiñamuina raise omoi uifnocana jaillana jitaidicoco. ¹¹ Nie isoide ramo omoi jiria, nana naimie siño ebirede uaido naimiedi omoi comeciaina ocuifnotajana jitaidicoco. Iocire omoi illana jitaidicoco. ¹² Caina ie cominina naimie jai itataja jira, nana ie comini diga naimie illanomo ico jaca iiticai. Ie muidona naimiemo iobillacinona omoi fecacabillasa. ¹³ Jeacino anamo navui cai illa jira, jitiredinomo iticai isoidicai. Jeacino anamona caina Jusiñamui jai jillotajamona, caina ie isiruiga Jito cominina itatate. ¹⁴ Naimie Jito muidona cai jeacinomona jillobidicai. Naimiedi cai jeacinona oni dotajamona, naiena jai faitate. Naiena ico abido llinofite.

Cristo muidona Jusiñamui r#caillifue anamo inedicai

¹⁵ Jusiñamuina cionidicai; iadedi Cristomona naimiena uifnoticai. Jaca bue nia inenia, Crsito nano jaca ite. ¹⁶ Cristo uaido Jusiñamui nana rana finode. Monamo ite rana finode. Eniruemo ite rana finode. Cai ciua rana finode. Cai cioifena rana finode. Cominina finode. Ie jaienisaina finode. Janabana finode. Dofina finode. Taifena finode. Cristo uaido nana rana finode. Cristona iobitallena, nana rana finode. ¹⁷ Nano dofoconi Cristo jaca ite. Naimie uaido naga ra marena icana jaide. ¹⁸ Naimiedi nana creyentiai imaci illa#ma. Fiodaitinomona naimie nano jillodimiena jira, cai fiodaia, ico jiai jilloiticai. Naimiedi naga ra baifemo faite. Naimiedi nana comini baifemo jiai faite. ¹⁹ Jusiñamui isoi naimie ite. Jusiñamui jitailla jira, Cristomo nana Jusiñamuimo ite siño uaidi ite. ²⁰ Cristo finoca rafue muidona, Jusiñamuidi nana cominina naimie dibeimo itataiacade. Ua nana naimie dibeimo inedinona naimie dibeimo itataiacade. Cruzmo Cristo fiodailla jira, Cristo diaillamona, Cristona cai hnoia, Jusiñamui r#caillifue anamo jai inedicai. ²¹ Jusiñamui dibeimo navui inedomoi. Naimiena nabaillana jitaifedomoi.

Omoï comeciãimona naimiëna enoidomoi. Maraiñediciñona finouidomoi; ²² iadedi cruzmo naimië abi illanona, nainomo Cristo fiodailla jira, naimiedi naimië dibeimo omoïna itatate. Jusiñamuimona mareuidinona omoï illena, omoïmo nicino iñellena, Jusiñamui dine ico omoï ia, naimië dibeimo omoïna jai itatate. ²³ Naimiëna raise ñnocana omoï jaia, danomo abido omoï jaiñenia, iese iitomoi. Cristo rafuena navui cacadomoi. Ie jira Cristo dine omoï illemo ocuridomoi. Diga comini naie rafuena jai cacadimaci. Naie rafuena llocana jaidicue.

Pablo Cristo rafuena llofuecabite

²⁴ Omoïmo Cristo rafue cue llua muidona, duere sefuidicue; iadedi iocire nia iticue. Omoï creyentiaï facaina Cristo isoi duere sefuidicue. ²⁵ Jusiñamui cuena oretaja jira, naimië rafuena ailluena cominimo eo raise cue lollena, omoï creyentiaï facaina llofueticue. ²⁶ Cai jaiagai bie rafuena uiñoñedimaci; iadedi Jusiñamuina ñnotinodi iena birui uiñotimaci. ²⁷ Jusiñamui naimacina iena uiñotade. Naie rafuedi eo ebirede. Judúaiñedinodomoi; iadedi bie rafue omoïmo jai duide. Omoï comeciãimo Cristo illana jai uiñoticaï. Ie jira naimië ebirede illanomo ico omoï jaca illemo ocuridomoi. ²⁸ Cristo rafuena llofueticaï. Nana cominimo Cristo dibeimo naimaci iacanana lloticaï. Cristona naimaci eo raise ñnollena, Cristo isoi naimaci marebicaillena, naimaci abi uiñuana lloticaï. ²⁹ Ie jira bie rafuena llofuecabiticue. Nana Cristo cuemo iga uaido eo llofuecabiticue.

2

¹ Omoïmo eo comecina facadicue. Iena omoï uiñuana jitaidicue. Laodicea railla nairaimo jiaï eo comecina facadicue. Diga comini cuena nia cioiñedimaci. Naimacimo jiaï eo comecina facadicue. ² Omoï comeciãina ocuiñotallena, iese omoïmo comecina facadicue. Dani omoï isiruillamona, ni Jusiñamui rafuena omoï eo raise marena uiñollena, omoïmo comecina facadicue. Naie rafuedi Cristona llote. ³ Cristodi nana rafuena uiñote. Eo abina uiñote. Naimië rafue raise cai uiñollena, naimië caina canocabide. ⁴ Naimaci ñaiãmona omoïna bu jifuei raillanona, biena omoïmo lloticue. ⁵ Omoï dine iñedicue; iadedi cue comecidi omoï dine ite. Omoïmo cue comecina facadicue. Danomo omoï marena illa jira, Cristona omoï raise ñnocana omoï jailla jira, iobidicue. ⁶ Cai Nama Jesucristona omoï ñnuamona, naimië lloga rafue finocana omoï jai. ⁷ Naimië dibeimo raise icana omoï jai. Naimiëna ñnocana omoï jai. Omoï lloraini omoïna llofuia isoi, naimiëna ñnocana omoï jai. Jusiñamuimo iobillacino eo fecacana omoï jai.

Cristona cai ñnuano, cai illa rafue

⁸ Jiaie comini naimaci jamai comeciãia facajacinomona omoï jifuei raillanona, abina omoï rairui. Uanaiñedinomomo comeciãina jamai facadimaci. Naimaci einamacimona iena otimaci. Naie rafuedo omoï jaillana jitaidimaci. Cristo rafuedo omoï jaillana jitaiñedimaci.

⁹ Ero, Cristomo nana Jusiñamui uai ite. Eniruemo billanona, Cristo ñimana jaide. Naimiëmona Jusiñamuina uiñoticaï. ¹⁰ Cristomo omoï jainaiailla jira, naimiëmona nana omoï jitaillacinona oitomoi. Nana comini naimië anamo itimaci. Nana illaicomini naimië anamo itimaci. Taife naimië anamo ite. Janaba naimië anamo ite. ¹¹ Cristomo omoï duilla jira, omoï comeciãimo ite jeacino anamona omoïna naimië jillotate. Omoï abiaïna detatajamona naimië iena finoñede; iadedi omoï comeciãimo ite jearede iuai meidumona jillobidomoi. Naimië iena finode. ¹² Naimië dibeimo cai illamona, jai bautizagacai. Naimië dibeimo cai illamona, cai jeacino anamo jai iñedicaï. Cristo fiodaite; iadedi fiodaillamona Jusiñamui naimiëna jillotate. Jusiñamuina omoï ñnua jira, jeacino anamo jai iñedomoi. Naie anamona Jusiñamui omoïna jiaï jillotate. ¹³ Jeacino anamo jaie omoï illamona, naimiëmona fiodaitino isoidomoi. Omoï maraiñede jitaillacino anamo jaie itomoi. Cristomo omoï jai duillamona, omoï jeacinona oni dotajamona,

naie anamona Jusiñamui omoïna jai jillotate. Cristo ðibeimo omoïna itatate. ¹⁴ Moisés micorï jaie llogacïnona jaie caï ñnoñena jira, Jusiñamui riicaillïfue anamo iticaï; iadedi cruzmo Cristo fiodailla jira, naie llogacïno anamo jai iñedicaï. Ie muidona Jusiñamui caïmo ïbana oñeite. ¹⁵ Cruzmo Cristo fiodailla facaiseconi Taïfedi anafefide. Janabadi anafefide. Dofidi anafefide. Dusisiñodi anafefide. Naimie siño rafuena finuamona, Cristo uai naimaci uai baïfemo uaillana uiñoticaï.

Cristomo ite rafuedo omoï jai

¹⁶ Cristo rafuedo omoï jailla jira, omoï guiga rana bu fïmaia, naimaci ñaïamo cacarefiñeno. Judïuai einamacï rafue ðine omoï jaiñenia: “Omoï mareiñedomoï” bu raia, naimaci ñaïamo cacarefiñeno. ¹⁷ Naie isoide rafuedo jaie jaidicaï; iadedi iedo birui jaiñedicaï. Cristo rafuedo birui jaidicaï. ¹⁸ Dajerie llofueraini jiaie rafuedo jaidimaci. “Abïna ïedoñeno” raitimaci. “Jusiñamui jaienisaïna seda” raitimaci. Nicaïrillacïnodo jaidimaci. Naimaci isoi omoï jaiñenia: “Maraiñedomoï” omoïna naimaci raia, naimaci ñaïamo cacarefiñeno. Naimaci illa isoi iñeno. Naimaci llucacïno anamo iñeno. Naimaci llucacïnodo omoï jaia, omoï jitaillanomo Cristo ðine riñeitomoï. Naimaci comeciaï jearena jira, jamai buena uiñoñenano abïna ïedotimaci. ¹⁹ Cristo rafuedo jaiñedimaci. Cristomo caï duilla jira, naimie caïna ocuicabide. Naimiemona caï illena Jusiñamui jitailla isoi, fueoticaï. Jusiñamui jitailla isoi, naimie ðibeimo caï raise illena, naimiena caï raise ñnollena, naimiemona fueoticaï. Cristomo caï duilla jira, danï coninïna nabaidicaï. ²⁰ Cristo fiodaillamona, jiaie rafue anamo jai iñedicaï. Naimiena ñnoñedïno rafue anamo jai iñedicaï; iadedi naie rafuedo nia jaidomoï. Damierie llofuerainidi ðiga rana fïmaidimaci. ²¹ “Biena jetañeno. Biena guiñeno” raitimaci. ²² Ero, naie fïmaica guille ra ite, caï guillena. Iena caï guilla mei, jai buena iñede. Naimaci fïmaiduacïno cominïmona otimaci. Jusiñamuïmona oñedimaci. ²³ Naie fïmaiduacïnodi eo abï uiñuacïno isoide. Naïedo bu jaia: “Jusiñamuïna eo raise sedadicaï” raitimaci. “Abï ïedoñedicaï. Caï abïna isiruiñedicaï” raitimaci; iadedi naie isoide llucacïnodo bu jaia, naimie comecïmo ite jeacïnomona jilloñede. Naimiedi jeacïno finocana nia jaide.

3

¹ Jeacïno anamo jaie itomoï. Fiodaillamona Cristo jillua jira, jeacïno anamona jai jillobidomoï. Ie jira Cristomo ite rafuedo omoï jai. Monamo Jusiñamui ecïmo Cristo ite. Jusiñamui naimieri iobilla jira, naimie ecïmo ite. ² Cristomo ite rafuemo omoï comeciaïna facacana jai. Bene ite maraiñede rafuemo omoï comeciaïna facañeno. ³ Bene ite maraiñede rafue anamo jai iñedomoï; iadedi Jusiñamui ecïmo naimie jai illa jira, Cristomo omoï duilla jira, naimie fïnoacaga rafuena omoï finollena, omoïna naimie canoite. ⁴ Cristomo jai duidomoï. Naimie abïdo bia, naimie bairenia, naimie cominïna omoï illa jira, naimie ðiga jaca iitomoï.

Omoï comecïamo ite jeacïnona fainonocai

⁵ Cristomo omoï jai duilla jira, omoï comecïamo ite jeacïnona fainonocai. Omoï aiñede riño ðiga iñeno. Omoï ñniñede ïima ðiga iñeno. Jeare finoca rafuemo omoï comeciaïna facañeno. Omoï maraiñede jitaillacïnodo omoï jaiñeno. Rana nicidoñeno. Rana omoï nicidoïa, Jusiñamuïna raise sedañedomoï; iadedi naimie ifomo rana sedadomoï. ⁶ Naie isoidicïnona cominï finua jira, naimiena naimaci ñnoñena jira, Jusiñamuidi naimacïna duere fïnoite. ⁷ Naie isoide rafuedo jaie jaidomoï. ⁸ Nana bie isoide rafuedo jaiñeno. Iciriñeno. Omoï ecïmo itinona jeare fïnoñeno. Jiaie cominïna jeare ñaiñeno. Jearede rafuena ñaiñeno. ⁹ Taïnona lloñeno. Omoï comecïamo ite jeacïno anamo jaie itomoï. Naicïno anamo omoï jai iñena jira, naicïnodo jaiñeno; ¹⁰ iadedi jiaie rafuedo birui jaidomoï. Bie rafue omoï comeciaïna marena itatate. Omoï comecïamo bie rafue itatacana jaillamona, Jusiñamui rafuena uiñocana jaidomoï. Naimie isoi omoï illena, naimie omoï comeciaïna iese itatate. ¹¹ Cristo rafuedo birui omoï jailla jira,

Jusiñamuimona nana creyentiaidomoidi daje isoidomoi. Dajerie judíuai itinodomoí. Dajerie judíuaiñedinodomoí. Dajerie judíuai isoi abina detatatinodomoí. Dajerie abina detatañedinodomoí. Dajerie abina uiñotinodomoí. Dajerie abina uiñoñedinodomoí. Dajerie patrón anamo itinodomoí. Dajerie patrón anamo iñedinodomoí. Cominimona iese itomoi; iadedi Jusiñamuimona daje isoidomoi. Cristo díbeimo omoi illa jira, jai amatiaina eruaidomoi. Cristomo omoi duillacino jiaie rafue baifemo faite. ¹² Jusiñamui omoi na fetode. Omoi comeciaina maretate. Omoi na isiruite. Ie jira jiaie cominina duenai. Jiaie cominina cano. Abi iedoño. Abi biriño. Iciríño. ¹³ Dani omoi ibana oño; iadedi bu diga omoi icirillafue ia, naiena raise fino. Iena raise finuanona, abido ietaño. Iena feita. Ie mei naimie diga marena ñaino. Ero, cai Nama omoi jeacinona oni dotade. Ie muidona omoi ecimo itino diga icirillafue omoi finoia, iena feita. ¹⁴ Coninina omoi isiruicana jai. Isiruillacino nana jiaie llucino baifemo faite. Coninina omoi isiruia, danomo marena itomoi. ¹⁵ Jusiñamui omoi na fetua jira, Cristomo daajena jai duidomoi. Cristo omoi comeciaina uri itatajamona, nana comini diga uri i. Omoi comeciai uri illamona, Jusiñamuimo iobillacinona feca. ¹⁶ Cristo rafuena omoi eo ñnuana jitaídíue. Naie rafuena coninimo omoi llofue. Iena raise uiñollena, coninina omoi cano. Nie isoide Jusiñamui rafuena omoi roia, Jusiñamuimo iobillacinona fecajanona, nana omoi comeciaimona iocire rono. David micori cuega salmos omoi roia, Jusiñamui Joreño omoi na birui cuetataga ruana omoi roia, omoi comeciaimona iocire rono. ¹⁷ Buena omoi lloia, buena omoi maijia, cai Namamo omoi comeciaina facajano, iena fino. Cai Nama muidona, cai Moo Jusiñamuimo iobillacinona jiai feca.

Coniniri creyentia illa rafue

¹⁸ Ñirediñaiñuai, omoi mo rafuena lloiacadíue. Cai Namamo omoi jainaiñilla jira, naimie jitailla jira, omoi iniñiai anamo raise omoi i. Naimaci uaina raise ñno.

¹⁹ Airedino, omoi mo jiai lloiacadíue. Omoi ainiaina isirui. Naiñaiñuai diga iciricabiño. Naiñaiñuaimo riire lloño.

²⁰ Uruiai, omoi mo rafuena lloiacadíue. Nana omoi mootiai uaina ñno. Nana omoi eiñiai uaina ñno. Iena omoi ñnoia, cai Nama eo iobite.

²¹ Mootiai, omoi uruiaina jamai icíño. Naimacina omoi jamai icíia, comecina facaitimaci: “¿Ñiese cai mootiai uaina raise ñnoitícai? Iena eo sefuiruitícai”. Ie muidona omoi uaina raise ñnoñeitimaci.

²² Patrones anamo itino, nana omoi patrones ocuica uaina ñno. Omoi mo naimaci eruaiñenia, omoi patrones facaina raise maiji. Cai Namana omoi ñnuua jira, cai Namana raise omoi iobitaiacana jira, omoi patrones facaina raise maiji. ²³ Buena omoi maijia, omoi comeciaimona maiji. Dani comini facaina maijiñedomoi; iadedi cai Nama facaina maijidomoi. Ie jira raise maiji. ²⁴ Naimie jai llua isoi, cai Namamona ibana íco feiñoitomoi. Cai Nama Cristo facaina omoi maijidomoi; ²⁵ iadedi Jusiñamui raise maijiñedinona duere finoite. Jusiñamuimona naga maijidimie ie maijia díese feiñoite.

4

¹ Patrones, omoi mo lloitíue. Naimaci omoi anamo illa jira, omoi diga maijidinona raise iba. Naimacina jifueño. Omoi Nama monamo illamona, omoi mo eruaiide. Naimie anamo omoi illa jira, omoi anamo itinona marena raise fino.

² Jusiñamui diga ñaicana jai; iadedi omoi comeciaina facajanona omoi jii. Naimiemo iobillacinona feca. ³ Cristo rafuena llocana cue jailla jira, cárcelmo birui itíue; iadedi naie rafue ñia lloiacadíue. Jusiñamui nana comini Cristo díbeimo jai jitaillana lloiacadíue. Ie jira cai facaina omoi jii. Jusiñamuidi comini comeciaina jetajana omoi jii. Naimaci comeciaina Jusiñamui jetajamona, naimacimo naie rafuena lloiacadíue. ⁴ Naimaci iena raise cacaillena, naie rafuena raise lloiacadíue. ⁵ Creyentiañedinno motomo omoi ia,

marena omoi i. Naimacimo Cristo rafuena llono. ⁶ Bu diga omoi ñaia, caimare ñaino. Nie isoide Cristo rafuena omoimo bu jicanoia, raise marena fairio.

Damierie ie uaina orede

⁷ Tíquicodi nana cuemo ite rafuena omoimo lloite. Naimiena isiruiticai. Naimiedi Cristona eo ñnote. Cristo rafuena eo raise llocabite. Cai Nama facaina cue diga eo maijide. ⁸ Cai illana omoi uñollena, omoi dine naimiena oredicue. Omoi comeciaina ocuiñotaite. ⁹ Naimie diga Onésimo jiai oredicue. Naimiedi creyente. Cristo rafuedo raise jaide. Naimiena jiai isiruiticai. Naimiedi omoi comini imie. Nana bene jai suide rafuena omoimo lloitiiaimaiai. ¹⁰ Cárcelmo Aristarco cue diga ite. Omoimo ie uaina orede. Marcos ie uai jiai orede. Naimiedi Bernabé ama. Omoimo naimiena navui lloticue. Omoi dine naimie ria, naimiena feiño. ¹¹ Jesús ie uai jiai orede. Naimie mameci jiaicidi Justo. Judíuaimona dani naimaci cuena canode. “Naimaci jeacinona naimaci fañonocaillamona, Jusiñamui ie dibeimo comina jai jitaide” naimaci llamona, cue comeciaina ocuiñotadimaci. ¹² Epafras ie uaina jiai orede. Naimie omoi comini imie. Jesucristo dibeimo naimie maijide. Jusiñamui diga naimie ñaia, omoi facaina jaca duere jicabide. Jusiñamui rafuedo raise omoi jaillena, ie omoimo raise itabillena, Jusiñamui jitaillacinona omoi raise finollena, omoi facaina jicabide. ¹³ Omoi facaina naimie eo maijide. Laodiceamo itino facaina eo maijide. Hierápolismo itino facaina jiai eo maijide. ¹⁴ Cai médico Lucas ie uaina jiai orede. Naimiena isiruiticai. Demas ie uaina jiai orede. ¹⁵ Laodiceamo ite creyentiaimo cue uaina cue oretajana llono. Ninfasmo cue uaina cue oretajana llono. Naiñaiño jofomo oficabide creyentiaimo cue uaina cue oretajana llono. ¹⁶ Bie cartana omoi facaja mei, Laodiceamo ite creyentiaina bie cartana facata. Naimacimo jiaie cartana jiai oredicue. Iena omoi jiai faca. ¹⁷ Arquipomo llono: “Cai Nama fetocamedio. Naimie rafuena llocana raise o jai” llono. ¹⁸ Cue uaina omoimo oredicue. Dama bie uaina cueticue; iadedi nana bie carta cuemona illana uñotomoi. Cárcelmo cue illana cue facaina feitaño omoi jii. Jusiñamui omoina duenaioillasa. Mai. Cue cuega rafue jai fuite. Pablodicue.

TESALÓNICAMO ITE CRISTONA #NOT#NOMO PABLO NANO ORETAGA RABE

Uaiduacino

¹ Tesalónicamo ite creyentiaí, omoímo cartana cueticue. Pablodicue. ¿Nigacino? ¿Nie isoidomoi? Silvano cue diga ite. Timoteo cue diga jiaí ite. Iaimaiaí uaina orediaímaiaí. Cai Moo Jusiñamuimo, cai Nama Jesucristomo jai jainaiaídomoi. Ie jira iaimaiaí omoí duenaillana uiñocana omoí jaillana jitaídicaí. Iaimaiaí omoí uri itatajana omoí uiñocana jaillana jiaí jitaídicaí.

Tesalónicamo ite creyentiaí Jusiñamui uaina raise #notimaci

² Jusiñamuimo cai jiaí, naimiemo omoí facaina iobillana jaca fecacabidicaí. Omoí facaina jicabidicaí. ³ Cai Moo Jusiñamuimo cai jiaí, omoína comeciticaí. Jusiñamuina #notomoi. Naimiena isiruitomoi. Ie jira naimie facaina duere maijidomoi. Cai Nama Jesucristo billemo eo ocuridomoi. Iese omoína comeciticaí. ⁴ Omoína naimie isiruillamona, Jusiñamui omoína fetuana uiñoticaí. ⁵ Jamaí cai uaido Cristo rafuena omoína llofueñedicaí; ia siño uaido iena llofueticaí. Jusiñamui Joreño uaido iena llofueticaí. Naie rafuena #nuanona llofueticaí. Omoí diga cai jaie ia, nie isoi cai illana raise uiñotomoi. ⁶ Cai illa isoi ificaidomoi. Cai Nama illa isoi ificaidomoi. Iemona duere sefuidomoi; ia Jusiñamui Joreño omoína iocire itatajamona, Jusiñamui uaina iocire feiñotomoi. ⁷ Ie jira nana Macedoniamomo ite creyentiaí omoímona fueotimaci. Nana Acayamo ite creyentiaí omoímona jiaí fueotimaci. ⁸ Omoímona Macedoniamomo ite comini cai Nama uaina fididimaci. Acayamo ite comini jiaí fididimaci. Ailluena nairaiaí Jusiñamuina omoí #nuana jai fididimaci. Ie jira naimacimomo Cristo rafuena omoí #nuana jai lloñedicaí. ⁹⁻¹⁰ Omoí dine nano cai ria, caimare caina feiñotomoi. Cristo rafuena omoí cacajamona, jiraraina sedajana fañonocaida, cajede nanoca Jusiñamuina jai sedadomoi. Jusiñamui jito abido billemo birui jiaí ocuridomoi. Iese jiaie creyentiaí omoína birui ñaicabitimaci. Cristo fiodaillamona Jusiñamui naimiena jaie jillotate. Naimiena cai #nuamona, Cristo Jusiñamui ricaiñuamona caina jai jillobitade.

2

Pablo Tesalónicamo llofui rafue

¹ Cue nabaiñaí, omoí diga jaie cai ia, tainomomo jaiñedicaí. ² Omoí dine cai nia riñenia, Filipomomo iticaí. Nainomomo itinodi caina jeare finodimaci. Iena jai uiñotomoi. Caina jeare finodimaci; ia cai comecina Jusiñamui ocuiñotajamona, Jusiñamui rafuena omoína llofueticaí. Ailluena comini iena jitañedimaci; ia iena llofueticaí. ³ Unaiñedicinona jaca llofueñedicaí. Jearedicinona jaca llofueñedicaí. Jifuerillacinona jaca llofueñedicaí; ⁴ iadedi Jusiñamui uiñoganodicaí. Ie jira caina naimie oretajamona, ie rafuena llofueticaí. Cominina iobitallena llofueñedicaí; iadedi Jusiñamuina iobitallena llofueticaí, Jusiñamui cai comecina raise uiñua jira. ⁵ Cai llofuiacino diga omoína bifueñedicaí. Omoímona ucube ollena, iese llofueñedicaí. ⁶ Cominimona iobillacinona jitañedicaí. Omoímona jitañedicaí. Jainomona jiaí jitañedicaí; iadedi Cristo oretaganona cai illa jira, cai jitaia, omoímona iobillacinona jicaredicaí. ⁷ Uruiaína raise sedaraiño isoi, fecuise omoína llofueticaí. ⁸ Jusiñamui rafuena omoí raise uiñollena, omoína cai eo isiruillamona, niadedi omoí facaina fiodaicadicaí. ⁹ Omoí motomomo cai ucube ollena, jiaie rana maijuidicaí. Omoína cai duere finoñellena, nagarui iese maijuidicaí. Iena raise uiñotomoi. Iese Jusiñamui rafuena omoína llofueticaí.

¹⁰ Omoi motomo cai illana raise uiñotomoi. Jusiñamui jitailla isoi, nainomo iticai. Maraiñede rafuena finoñedicaí. Mare rafuedo jaca jaidicaí. Iena uiñotomoi. Jusiñamui iena jiai uiñote. ¹¹ Omoi uruiaí omoi llofua isoi, omoína llofueticaí. Omoimo diga icaíño Jusiñamui rafuena llofueticaí. ¹² Jusiñamui jitaillacinona omoi finollena, iena llofueuidicaí. Monamo ie cominina sedajanomo omoi jaca illena, naimie omoína jai fetode. Nainomo ie siño uai anamo jaca iitomoi.

¹³ Jusiñamuimo cai jüia, omoi facaina iobillacinona fecacabidicaí. Jusiñamui rafuena caimona omoi jaie cacajamona, iena raise feiñotomoi. Cominimona cai oga rafue isoi feiñoñedomoi; ia Jusiñamuimona cai oga rafuena feiñotomoi. Cai lloga rafue omoi comeciaí iuai meidocana jaide. Ie jira Jusiñamuimo iobillacinona fecacabidicaí. ¹⁴ Judeamo ite creyentiaí isoi duere sefuidomoi. Omoi cominimona duere sefuidomoi. Naimaci judíuaí cominimona duere sefuidimaci. ¹⁵ Judíuaí comini cai Nama Jesúna jaie meinetimaci. Jusiñamui facaina lloraini micoriaína jiai jaie meinetimaci. Caina jiai birui duere finodimaci. Jusiñamuina iobitañedimaci. Jusiñamui rafue dibeimo jiai iñedimaci. ¹⁶ Judíuaíñedinomo Cristo rafuena cai llwana jitaiñedimaci. Jusiñamui judíuaíñedinona jillotajana jitaiñedimaci. Iese jeacino finocana nia jaidimaci; ia ja muidomo Jusiñamui ricailífue anamo jai itimaci.

Tesalónica comini dine Pablo abido jaiacade

¹⁷ Omoimona cai billa mei, nigarui illanona, omoína dane cioacadicaí. Omoína cioiñedicaí; iadedi omoimo comecina facadicaí. Omoi dine eo jaiacadicaí. ¹⁸ Ua eo jaiacadicue. Diga icaíño jaiacadicaí; ia Taife cai jaillana jitaiñede. ¹⁹⁻²⁰ Caina omoi jaca iobitaja jira, omoína cioacadicaí. Jesús abido bia, naie facaise omoiri eo iobiticaí. Iemo ocuridicaí. Caina iocire itataitomoi. Omoi muidona iobiticaí.

3

¹ Cai comeci jarire illamona, Atenas railla nairaimo fiebidicoco; ² iadedi Timoteo omoi dine oredicoco. Naimiedi coco ama isoide. Cristo rafuena cai diga Jusiñamui facaina llofuecabite. Cristo rafuena omoi raise ñnotallena, omoi comeciaina ocuiñotallena, naimiena oretaticoco. ³ Duere sefuillamona bu bie uai sefuiruillana jitaiñedicaí. Creyentena cai illamona, jaca duere cai sefuillana uiñotomoi. ⁴ Omoi motomo jaie cai ia, iena llofueticaí. Omoi birui duere sefuillamona cai llwana raise uiñotomoi. ⁵ Cue comeci jarire illamona, Cristona omoi ñnuana raise uiñoiacadicue. Omoína Taife ramo faicabillamona, tainomo cai maijiana jacinaiticaí. Ie jira Timoteona oredicoco. ⁶ Omoimona Timoteo jai abido billamona, omoie mare rafuena cocomo llote. Cristona ñnocana jaidomoi naimie llote. Coninina isiruitomoi. Cocona caimare comecitomoi. Omoína coco cioacana isoi, cocona dane cioacadomoi naimie llote. ⁷ Birui duere sefuidicaí; iadedi omoie rafuena cai cacajano, cai comeci marena ite. ⁸ Cristo rafuena ñnocana omoi jaillana jai cai uiñuamona, cai comeci marena ite. ⁹ Omoiri eo caimare jai iticaí. Ie jira Jusiñamuimo iobillacinona eo feaacadicaí. ¹⁰ Omoína dane cai cioillena, naimiemo nagarui jüidicaí. Naimiena nia omoi raise ñnoñenia, omoína naimiena raise ñnotaacadicaí. Ie jira omoína cioacadicaí. ¹¹ Iese omoi facaina, cai Moo Jusiñamuimo, cai Nama Jesúmo jüicabidicaí. Omoi dine caina naimie oretajana jüidicaí. ¹² Cai Nama coninina isiruitacana omoi jaillana jitaídicaí. Caina omoi isiruilla isoi, nana jianona omoi isiruillana jüidicaí. ¹³ Omoi comeciaí ocuiñollena, omoi comeciaí Jusiñamui jitailla isoi, marena illena jüidicaí. Nana ie comini diga cai Nama Jesús abido bia, Jusiñamui dine omoi ia, omoi comeciaí marena illena jitaídicaí. Iese omoi facaina jüicabidicaí.

4

Naimaci marena illena llofue

1 Jiaie rafuena lloiacadicue. Cai Nama Jesúmo omoi jai duilla jira, Jusiñamui jitailla isoi omoi illana jitaídicaí. Iese birui itomoi; ia nagarui iese omoi illana jitaídicaí. Ie jira cai lua isoi, omoi jai. 2 Cai Nama Jesús jitailla jira, navui iena llofueticaí. 3 Jusiñamui jitailla isoi omoi marena illena, omoi aiñede riño diga iñeno. 4 Nagamíai riñona ie aina otena, mare; ia maraiñede rafuena finoñeno. Nagamíai dajena daje riño uana Jusiñamui jitaide. Dañaiño diga iaímaiaí jionaillena jiaí jitaide. 5 Naimíena ñnoñedino isoi, omoi ai uana jitaíñede. Naiñaiñuai abina jamai cioillena riñona otimaci. 6 Jiaie creyentemo jeacinona finoñeno. Naimie aina jamai aífiedoñeno. Naie isoide rafuena bu finoia, cai Nama naimíena duere finoite. Iena navui omoímo llotícue.

7 Jearede rafuena cai finollena, Jusiñamuidi caina fetofede; iadedi mare rafuena cai finollena caina fetode. 8 Bie llofuiacino nie creyente ñnoñenia, cue llofuiacinona jamaide; ia Jusiñamui Joreño naimíemo illamona, Jusiñamui llofuiacinona jiaí jamaide. 9 Jiaie creyentiaína omoi isiruillana omoímo eo lloñeíticue. Jusiñamui omoína coninina isiruillana jai uiñotade. 10 Nana Macedoniamó ite creyentiaína jai isiruitomoi; iade nia isiruicana omoi jai. 11 Uri omoi i. Dani omoímo ite rafuena omoi uiuicaí. Jiaínomona ucubena jicañeno; ia omoi ucube ollena, omoi onolli diga rairuioicaiñeno omoi maiji. 12 Ie mei omoi jitailla ra iite. Iemona Cristona ñnoñedino omoína jiaí mameriñeítimaci.

Jesucristo dane abido billena llote

13 Omoi raise uiñollena, daje rafuena llotícue. Omoi creyentiaímona dajerie jai fiódaitimaci. Jesúna ñnoñedinomona bu fiodaia, fiodaillamona jilluamo naimaci ocuiriñena jira, sunaitimaci; iadedi naimaci sunailla isoi, omoi illana jitaíñedicue. Fiodaillamona jilluamo jai ocuridomoi. 14 Jesús fiodaillamona naimie jilluana ñnoticaí. Ie jira Jesús abido billa facaise, jai fiodaite creyentiaína Jusiñamui jilloitajana jiaí jai ñnoticaí. 15 Cai Nama llofua isoi, bie rafuena llotícue. Jesús abido bia, jai fiodaite creyentiaí, nia fiodaíñede creyentiaí diga, daacaiño naimie dine a jaiticaí. 16 Cai Nama Jesús abido bia, Jusiñamui dinena naimie billanona, caina jidaite. Ie jaienicí caina uaidoite. Jusiñamui ie trompeta daacaiño jiaí fiite. Jai fiódaitino nano jilloitimaci. 17 Iemei nia fiodaíñedinodi como jillodino diga uillie motomo naimíemo dafaiñillena, Jesús caina uite. Iemei naimie diga jaca iiticaí. 18 Bie llofuiacino diga conini comeciána omoi ocuiño.

5

1 Bie rafue suilliruina uiñoñedicaí. Bie rafuena omoi jai uiñua jira, iena dane eo cueñeíticue. 2 Cai Nama abido billana jai uiñotomoi. Fñredimie naína ebena billa isoi, naimie abido biite. 3 “Uri iticaí. Marena iticaí” Cristona ñnoñedino raia, naie facaise naimacimo duere sefuillifue suite. Urue riño jigícomo casilla isoi, ebena suite. Naiemona jilloñeítimaci. 4 Naie facaise sua, Cristo billena omoi jai uiñuamona, fñredimie naína ebena billa isoi, jacinaíñeítomoi. Cristona ñnoñedino isoi, iñedomoi. 5 Uanaicinona omoi jai uiñuamona, Cristo ie cominina jai jaidomoi. Jeacino anamo omoi jai iñena jira, Cristona ñnoñedino díbeimo jai duiñedomoi. 6 Ie jira abina sedacana omoi jai. Abina rairuioicaída omoi jai. Jifaidino isoi ebena omoi jaiñeno. 7 Cristona ñnoñedino abina sedacana jaiñedimaci. Rairuioicaída ebena jaidimaci. 8 Cristo ie cominina jai cai illa jira, ebena cai jaiñena. Imaci abina riídollena, soldaduai jogobe icodi ite. Imaci ifogí icodi jiaí ite. Ie isoide. Cai comeciána eenollena, Cristona ñnocana mai cai jailli. Jiaíno isiruicana mai cai jailli. Jusiñamui dine ico cai illemo ocuricana mai cai jailli. 9 Caina duere finollena, Jusiñamui caina fetofede; iadedi cai Nama Jesucristo finoca rafue muidona, duere finollemona cai jilloillena, caina fetode. 10 Cristo cai facaina jai fiodaite. Ie jira birui cai fiodaia, naimie bille facaise nia fiodaíñedinona cai ie, naimie diga jaca iiticaí. 11 Ie jira coninina ocuiñotacana omoi jai. Cristo díbeimo coninina itatacana omoi jai. Iese birui jaidomoi; ia nia iese omoi jai.

Omoï creyentiaïna llofueraïni uaina ñno

¹² Cue amatiaï, jiaïe rafuena lloiticue. Omoï creyentiaïna llofueraïni uaina ñno. Cristo jitailla jira, omoï afemo itimaci. Cristo ðibeimo omoïna raise itatallena, omoï facaina llofuetimaci. ¹³ Omoïna naimaci canua jira, naimacina isiruillanona, naimaci uaina raise omoï ñno. Coninïri uri omoï i. ¹⁴ Omoï motomona maijïacaiñedinona imaci maijïllesa ocui. Duere sefuillamona jai comecina ocuiñonidinona comecina ocuiñota. Raise ñnollena, Cristona nia raise ñnoñedinona jiaï cano. Fecuisse naimacina ui-uillanona, naimacina cano. ¹⁵ Omoïna jiaïmie duere finoia, ibana oñeno; iadedi naimiemo mare rafuena fino. Nana cominimo mare rafuena fino. ¹⁶ Nie isoide rafue omoïmo ia, caïmare omoï i. ¹⁷ Jusiñamuimo nagarui jï-jï. ¹⁸ Nie isoide rafue omoïmo ia, Jsuiñemui jitailla jira, naimiemo iobillacinona feca. Jesucristomona Jusiñamui jitaillacinona jai uiñoticaï. ¹⁹ Jusiñamui Joreñoa jamaiñeno. ²⁰ Jusiñamui Joreño uaido lloraini llofuiana jamaiñeno; ²¹ iadedi Jusiñamui Joreño uaido naimaci llofuiana facaci. Mare rafuedo jaca omoï jai. ²² Nana maraiñede rafuemona eneno oni omoï i. Naïe isoide rafuena omoï abïmo omoï oñeno. ²³ Ie jira Jusiñamuimo omoï facaina jïitïcue. Naimïe omoïna jai uri itatate. Naimïe omoïna nagarui marena itatacana jaillana jitaïdicue. Iese omoï jaïa, caï Nama Jesucristo dane abïdo bille facaise, naimïe jitailla isoi, omoï comeciaï marena iite. ²⁴ Jusiñamuidi ñnogamiëna jira, iese omoïna finoite.

²⁵ Cue amatiaï, Jusiñamuimo caï facaina omoï jïcabi. ²⁶ Cue facaido nana creyentiaïna caïmare uaido. ²⁷ Caï Namamo caï duilla jira, naimïe jitailla jira, bie cartana nana creyentiaï uicomo faca. ²⁸ Caï Nama Jesucristo omoïna duenaïllasa. Mai. Pablodïcue.

TESALÓNICAMO ITE CRISTONA #NOT#NOMO PABLO IE EMODOMO ORETAGA RABE

Uaiduacino

¹⁻² Tesalónicamo ite creyentiai, omoimo cartana cueticue. Pablodicue. ¿Nigacino? ¿Nie isoidomo? Silvano cue diga ite. Timoteo cue diga jiai ite. Iaimaia uaina orediaimaia. Cai Moo Jusiñamuimo, cai Nama Jesucristomo jai jainaiaidomo. Ie jira iaimaia omoi duenaillana uiñocana omoi jaillana jitaidica. Iaimaia omoi uri itatajana omoi uiñocana jaillana jiai jitaidica.

Cristo dane abido bia, naimiena #noñedinona duere finoite

³ Jusiñamuimo cai jia, omoi facaina naimiemo iobillacinona fecacabidica. Cristona #nocana raise jaidomo. Coniniri isiruicana raise jaidomo. ⁴ Ie jira marena omoi illana jiae creyentiai illanomo llocana uitica. Duere sefuidomo; iadedi danomo abido jaiñedomo. Cristona #nocana jaidomo. Iena llocana uitica. ⁵ Jiainomona birui duere sefuidomo; ia #nocana jaidomo. Iemona Jusiñamui omoi facaina illana uiñotica. Omoi duere sefuillamona, fueocana jaidomo. Iemona naimie jitailla isoi, ja muidomo monamo ie cominina sedajanomo iitomo.

⁶ Jusiñamui omoina duere finodinona ico duere finoite. Omoi facaina ibana oite. Iese naimie finoia, naimiemonare. ⁷ Cai Nama Jesús abido bia, duere sefuillamona jilloitica. Monamona ie siño jaienisa diga biite. Irai boua isoi ana biitimaci. ⁸ Jusiñamuina #noñedinona diese duere finoitimaci. Cai Nama Jesús rafuena naimaci #noñena jira, naimacina duere finoitimaci. ⁹ #noñena jira, jaca faifitimaci. Jaca legi cacaitimaci. Jusiñamui illanomo jaca iñeitimaci. Ie ebirede uaina uiñoñeitimaci. ¹⁰ Cristo bille facaise naimiemo iobillacinona fecaitica. Naimieri nana naimiena #notino rajicaitimaci. Omoimo cai lloga rafuena omoi jai #nua jira, iese iitomo.

¹¹ Ie jira omoi facaina jicabidica. Naimie jitailla isoi, omoina naimie marena itatajana jidica. Omoina naimie fetuamona, ie uaido mare rafuena finocana omoi jaillana jidica. Ie uaido naimiena #nocana omoi jaillana jidica. ¹² Iese omoi jaillemona, naimie abido bille facaise naimiena iobitaitomo. Omoiri naimie jiai iobite. Jusiñamui, cai Nama Jesucristo diga, caina duenaillamona iese iitica.

2

Jesucristo abido bille rafue

¹ Cai Nama Jesucristo abido billena lloiacadicue. Naimiemo ico cai dafaifillena jiai lloiacadicue. ² “Cai Nama jai abido bite” raillana omoi cacaia, raire jarire iñeno. Rucaicueriñeno. “Jusiñamui Joreño iena cuemo jai llote” damie raia, iena #noñeno. Nie lloraima iena lloia, iena #noñeno. “Pablomona cue feiñoga carta iena llote” damie raia, iena #noñeno. ³ Naie isoide rafue diga omoina jaino jifueiacania, iena #noñeno. Cai Nama nia biñena facaise, eo ailluena comini naimiena enoitimaci. Iemei Taife dinena damie biite. Ja muidomo naimie faifite; ⁴ iadedi nano jiae rafuena finoite. Taife dinena naimie billanona, jirarai baifemo iacanite. Jerusalémo Jusiñamui jofomo illanona, “Jusiñamuidicue” raite. ⁵ Omoi dine navui cue ia, bie rafuena omoimo lloticue. ⁶ Jusiñamui Joreño naimie nia billena rairuillana jai uiñotomo. Jusiñamui jitaillirui facaise naimie biite. ⁷ Taife marañede rafuena birui bainino finotate. Jusiñamui Joreño naimiena marañede rafuena birui marefodo finuana rairuide. Jusiñamui Joreño naimie rairuiñena mei, ⁸ Taife dinena marañedimie biite; ia cai Nama Jesús abido ebire bia, firaiñuamona naimiena meineite. ⁹ Cai Nama Jesús nia abido biñenia, comini

jifuellena, Taife uaido bie maraiñedimiedi diga siño rafuena finoite. ¹⁰ Cominina eo maraiñedinodo jifueite. Naie comini ico faifitimaci. Jusiñamui ie uanaicinona naimaci ñnoñena jira, jilloiacaiñeitimaci. ¹¹ Ie jira Jusiñamui naimacina tainocinona ñnotaite. ¹² Jusiñamui ie uanaicinona naimaci ñnoñena jira, maraiñede rafuena naimaci ebiruilla jira, Jusiñamui naimacina duere finoite.

Jusiñamui omoina jai fetode

¹³ Jusiñamuina ñnoñedino isoi Jusiñamui omoina duere finoñeite. Naimie omoina jai fetua jira, naimiemo iobillacinona jaca fecacabidicai. Omoi jilloillena, nano dofoconi omoina fetode. Ie Joreño uaido naimie jitaillacinona omoi finollena, naimie uanaicinona omoi ñnuamona, omoina fetode. ¹⁴ Ie rafuena cai llumona, Jusiñamui omoina jai jillotate. Iemona cai Nama Jesucristo ebirede illanomo jaca iitomoi. ¹⁵ Ie jira, Cristona ñnocana omoi jai. Cai llogacinodo omoi jai. Iena caimona jai cacadomoi. Cai cartamona iena jiai cacadomoi. ¹⁶ Omoi facaina cai Nama Jesucristomo, cai Moo Jusiñamuimo, jicabidicai. Naimie caina isiruite. Cai comeciaina jaca ocuiñotade. Caina duenailamona naimie lloga rafue suillemo raise ocuridicai. ¹⁷ Naimie omoi comeciaina nia ocuiñotallena jidicai. Nie isoide rafuena omoi finoa, naie rafue omoi marena finollena jidicai. Buena omoi ññaia, omoi marena ññaillena jiai jidicai.

3

Cai facaina omoi jiana jitaidicai

¹ Daje rafue nia lloiacadicue. Cai facaina omoi jiana jitaidicai. Cai Nama rafue llocana jaillana jitaidicai. Omoi ñnua isoi, jaino ñnuana jiai jitaidicai. ² Maraiñedinomona cai jillobillena, omoi jiana jitaidicai. Ailluena comini Cristona ñnoñedimaci; ³ ia cai Nama jaca ñnogamie. Omoi comeciaina ocuiñotaite. Maraiñedinomona omoina eenoite. ⁴ Cristomo cai duilla jira, cai llogacinona omoi jai ñnuana jai uiñotacai. Iena nia ñnoitomoi. ⁵ Cai Nama Jesús omoina Jusiñamui omoina isiruillana uiñotajana jitaidicue. Cristo duere sefuide; iadedi ie Moo jitailla rafuena sefuiruiñeno finocana jaide. Iese Jusiñamuimo omoi facaina jaiticue.

Maijuillasa

⁶ Cai Nama Jesucristo jitailla jira, jiaie rafuena nia lloiticue. Jiaie creyente maijiacaiñenia, naimie diga eo nabairiñeno. Iena navui omoimo lloticue; ia damerie iese ia, naimaci diga eo nabairiñeno. ⁷ Caimona fueo. Navui omoi motomo iticai; ia cai ucube ollena, jaca maijidicai. ⁸ Guillena ibaño guñedicai; ia nagarui eo maijidicai, omoina duere cai finoñellena. ⁹ Cristo facaina cai maijia jira, omoimona ra jamai cai jicallena, caimo uai ite; iadedi caimona omoi fueollena iese jicañedicai. Omoi ra ollena, omoi maijiana jitaidicai. ¹⁰ Navui omoi motomo cai illa facaise lloticai: “Bu maijiacaiñenia, guñena”. ¹¹ Omoi motomo damerie jai maijiñenana jai fididicai. Maijiñeno jai itimaci. ¹² Cai Nama Jesucristomo cai duilla jira, naie isoidinomo maijillena lloticai. Uainino maijiamona ucube naimaci uana jitaidicai. ¹³ Cue amatiai, nie isoide mare rafuena finollena sefuiruiñeno. ¹⁴ Cue jai cueda cartamo ite rafuena bu ñnoñenia, nana creyentaina naimiena uiñota. Naimie meidaillena, naimie diga nabairiñeno. ¹⁵ Naimiena enoñeno; ia creyentena naimie nia illamona, naimiena fecuise llofue.

Fuiduacino

¹⁶ Cai Nama omoi jaca uri itatajana jitaidicai. Naimie omoi diga jaca iite. ¹⁷ Cuena canollena, naimiemo cue llua isoi, jiamie bie carta cueda; iadedi cue mameci buene dama cueticue. Nana cartamo iese cue mamecina cueticue. Pablodicue. ¹⁸ Cai Nama Jesucristo nana omoina duenailasa. Mai. Macaibaite.

TIMOTEO MO PABLO NANO ORETAGA RABE

Pablo Timoteona uaiduacino

1-2 Timoteo, bie carta omo cueticue. ¿Nigacino? ¿Nie isoidio? Pablodicue. Cristo Jesús oretagamiedicue. Ie rafue lollena, naimie cuena orede Naimiena cue cioillena, naimie isoi cue illena, naimie abido billemo ocuridicue. Jusiñamui cuena jiai orede. Naimiedi cai Jilloitarama. Cue llofuiacinomona Cristona o raise #nua jira, cue jito isoi cue mamecao. Cai Moo Jusiñamui, cai Nama Jesucristo diga, ona jai duenaite. Iena uiñocana mai o jai. Ona jai uri itatatiamaiaia. Iena uiñocana mai o jai.

Cristo rafuena tainona llofueraini llofuiacinodo jaiñeno

3-4 Macedoniamos jaie jaidicue, Efesomos o fiebicaillena omo lloticue. Nainomos dajerie Cristo rafuena raise llofueñedimaci; iadedi jiaiforie llofuetimaci. Diga #gaiaina faca-facadimaci. Imaci usumatiai mamecido siadocabitimaci. Iemona conini uaina uaitaside. Jusiñamui jitailla isoi comini marena illana llofueñedimaci. Jusiñamuina cai #nuamona, marena iticai. Iena llofueñedimaci. Ie jira naimaci uaina llicaita. 5 Jusiñamuina comini isiruillena, jiaie cominina jiai naimaci isiruillena, Jusiñamui uaina llofueticai. Naimaci comeciai jeaninana jitaidicai. Jusiñamuina raise naimaci #nuana jiai jitaidicai. Ie jira Jusiñamui rafuena llofuecabiticai. 6 Dajerie llofueraini iese llofueñedimaci; iadedi jamai ñaitimaci. 7 Moisés micori jaie llogacinuaido llofueiacadimaci; iadedi iena llofuiana uiñoñedimaci. Naie llogacinuaina ua uiñoñedimaci.

8 Iena raise llofuegana, Jusiñamuina uiñoñedinona naimiena uiñotallena, mare. Iena uiñoticaia. 9-10 Moisés micori llogacinuaidi mareuidinomo jainaiñede. Jainomo jainaiaide: Jusiñamui uaina #noñedinomo lloga uaina #norainidinomo, Jusiñamuina jitañedinomo, jeacino #norainimo, jeare ñaicabitinomo, Jusiñamuina enoidinomo, eina meinetinomo, moona meinetinomo, jiaie cominina meinetinomo, aiñede riño diga itinomo, iniñede ima diga itiañuaimo, daje isoide ima diga conini aifuedotinomo, comena #idinomo, taino llorainimo, taino lluaana jifueridinomo, uanai rafue facaisena iñedinomo. Nana Cristo rafue facaina iñedinomo Moisés micori llogacinuai ua jainaiaide; 11 ia naie rafue cuemo jai jainaiñede. Ie mare rafuena cue lollena, Jusiñamui cuena jai orede. Maremiena Jusiñamui illamona, naimie rafue jiai eo ebirede.

Jusiñamui caina duenaila jira, Pabloti iobide

12 Cuena fetua jira, cai Nama Cristo Jesús iobidicue. Naimiena cue #nollena, naimie cuena uiñuamona, cuena fetode, naimie rafue cue lollena. Iena lollena, cue comecina jiai ocuiñotade. 13 Jaie naimiena jeare ñaiticue. Naimiena #notinona jiai duere #nodicue. Abina cue uiñoñena jira, naie facaiseconi naimiena nia cue #noñena jira cuena duenailamona, naimie cuena fetode. 14 Cuena eo duenaite. Iemona naimiena #noticue. Naimiena jiai isiruiticue.

15 Bie lluadi mare cue uiñuamona, nana comini buena #nuana jitaidicue. Marañedinona naimaci jeacinomona jilloitallena, eniruemo Jesucristo bite. Ero, nanoca jeacina #noraimadicue; 16 iadedi Jesucristo cuena duenaite. Naimiena cue #nuamo jaie fecuise ocuride. Nana jeacina #norainimo fecuise ocuride, naimiena #nollena. Naimiena cai #nuamona, Jusiñamui diga jaca iiticai. Cuena duenaila jira, biruimona naimiena #noitinodi naimie naimacina duenailana uiñoitimaci. 17 Jusiñamuidi nanocamie. Jaca fioidañeite. Naimiena cionidicai. Naimie damiede. Jaiena iñede. Naimiena jaca iobicabillasa. Iena jitaidicue.

18 Ero, Timoteo, cue jito, omo rafue lloiacadicue. Nano o llofueraimana jaiacana facaise ailluena Cristo rafuena llofueraididi ona jaie llotimaci: “Naimie raise marena llofueite” llotimaci. Iena comecianona, o comeci ocuiñocana o jai, Cristo rafuena riidocana

o jaillena. ¹⁹ Cristona ñnocana o jai. O comecina marena finocana o jai. Dajerie naimaci comeciai iuaimo comeciaina facañedimaci. Ie jira Cristona jai ñnoñedimaci. ²⁰ Iese ite Himeneo. Alejandro jiai jai daje isoide. Jai ñnoñediaimaiai. Ie mei iaimaiaina Taife anamo jai itabicaítaticue, duere sefuillena. Iaimaiai fueollena, Jusiñamuina jeare ñaiñellena, iese itabicaítaticue.

2

Nana comini facaina jiiiticaí

¹ Diga rafue omo lloiticue; iadedi daje rafue motomo ite. Nanoca rafue. Iena omo lloiticue. Jusiñamui diga omoi ñaia, nana comini facaina jii. Naimaciri iobillacinona Jusiñamuimo feca. ² Uri cai illena, Jusiñamuina raise cai sedallena, Jusiñamui jitailla rafuena cai finollena, illaicomini facaina cai jii. ³ Iese cai jiiia, Jusiñamuimona mare. Naimiedi cai Jilloitaraíma. ⁴ Naimiedi nana comini naimaci jeacinomona jilluana jitaide. Uanaicinona naimaci uiñuana jiai jitaide. ⁵ Nana nairaiaí imaci Jusiñamuidi jaca dajede. Comini diga Jusiñamui facaisena ñairaíma jaca dajede. Naimiedi Cristo Jesús. Comini Jusiñamui facaisena naimie ñaicabite. Comini facaisena ñairaíma jaca dajede. Naimiedi Cristo Jesús. Naimie imanana, comini facaisena ñairede. Ie muidona comini diga Jusiñamui jai nabairede. Jusiñamui diga comini jiai jai nabairedimaci. ⁶ Cai jeacinomona cai eneno illena, Jesucristo nana cai facaina jai fiodaite. Naimie jitailla facaiseconi Jusiñamuidi cominina bie rafuena jai uiñotade. ⁷ Bie rafue cue llollena, Jusiñamui cuena fetode. Judíuainedíno cue llollena, bie rafue naimaci ñnollena, uanaicinona naimaci uiñollena, cuena orede. Tainona lloñedicue.

⁸ Ie jira naga roracomo ite iñiaí, cai comini onolliaí a ñuitacabilla isoi, comeciámo jeacino iñenanomona, Jusiñamuimo jiiana jitaídícue. Naimaci comeciámo icirillacino iñedemo, Jusiñamuimo jii. Naimaci comeciámo uaitajacino iñedemo, Jusiñamuimo jii. ⁹⁻¹⁰ Riñoniaímo jiai lloiticue. Roracomo omoi jaia, abi ieduoamo comeciaina facañenamona, omoi ifotiena fino. Jamai ebinai raillano, abi ieduoamona abina finora jitañeno. Jamai ebinai raillano, abi ieduoamona eo raifide iniroina jitañeno; iadedi mare rafuena omoi finuamona, ebinaitomoi. “Jusiñamuina ñnoticaí” omoi raillanona, naimie jitailla isoi, marena omoi finolle. ¹¹ Rollena comini ofia, ñaiñenanomona, uaitañenamona omoi fueo. ¹² Omoi ofia, omoi iñiaína llofuiana jitaíñedicue. Nainomo omoi ñaiñena. Iñiaí omoi anamo illana jitaíñedicue. Iese omoi riñoniaímo lloiacadicue. ¹³ Jusiñamui Adán micorína nano finua jira, iese llotícue. Adán micorí finua mei, Eva micorína jiai finode. ¹⁴ Taifedi Adán micorína jifueñede; iadedi Eva micorína jifuefe. Ie mei naie riño jeacina finode. ¹⁵ Iemona jilloite; iadedi uruiaí jococana jaite. Riñoniaídi Jusiñamuina ñnoia, jiaie cominina isirua, Jusiñamui jitailla rafuena finoia, ie abina eenoia, jilloitímaci.

3

Creyentiaína sedaraíni illa rafue

¹ Bicinodi uanaicino. Creyentiaína llofueraímana bu jaiacania, naimie comecimo mare jitaillacino ite. ² Bie isoide llofueraímana jaiacadimíena jitaídícue. Naga comini naimie mare raillamie. Dañaiñona airedimie. Abi eenotimie. Ebena iñedimie. Inogamie. Jiaie comini naimie jofomo riadedi, raise nafuecabitimie. Jusiñamui uaina raise llofuecabitimie. ³ Jifairuiñedimie. Fuirirainidimie. Raire icirirainidimie. Ucubena nicidoñedimie. ⁴ Naimie cominina raise sedadimie. Naimie anamo naimaci illanona, naimie uruiaí ie uaina raise ñnotadimie. Ie isoidimie llofueraímana jaillana jitaídícue. ⁵ Iese naimie iñenia, ie anamo itinona naimie raise sedañenia, ¿niese jiaie creyentiaína raise sedaite? ⁶ Como creyentena jaidimíena creyentiaína llofueraímana fetoñeno, naie diga naimie abi iedoi raillano. Abi ieduoamona, Taife isoi jeacino finoite. ⁷ Llofueraímana jaiacadimíena creyenteñedíno: “Mare” raiñenia, naimíena fetoñeno. Iese naimíena

rañenia, naimie joreña jeare ñaitimaci. Iemei Taife ramo jiai faite, naimie abido danomo uaillena. Ie muidona naimie uaina jaca cacarefiñeitimaci.

Diáconuai illa rafue

⁸ Diáconuai creyentiai llofueraini isoi marena illa. Inouiganona illa. Jifairaiñena. Ucubena nicidoñena. ⁹ Naimacidi Cristona cai inua rafuena jeanide comeciainona inua. ¹⁰ Bu omoi fetoacania, naimacina nano facaci. Roracomo jiaie rana nano maijita. Iena raise finoia, diáconuaina jaite. ¹¹ Diáconuai ainiai jiai inogañaiñuaina illa. Jiaie comini joreña ñañena. Jirorainina. Naga rafuena marena raise finua. ¹² Nana diáconuai aidi dañaiñoriede. Diáconuai uruijai naimaci uaina raise inua. Diáconuai imaci anamo itinona raise sedajana uiñua. ¹³ Diáconuai marena maijia, comini naimacimo iobillacinona fecaitimaci. Cristo Jesúsna inuano, naimiena marefodo jiai lloitimaci.

Jusiñamuina inotino

¹⁴ Timoteo, raire o dine jaiacaducue; iadedi uicodo bie rafuena omo cueticue. ¹⁵ Are cue riñenia, dani omoi creyentiai diese ofia, Jusiñamui ie cominina marena omoi illana omoi uiñollena, omo cueticue. Cajede Jusiñamuina jai sedadica. Uanaicinona rídotica. ¹⁶ Jusiñamui caina Cristona jai uiñotagafuedi jiaie rafue baifemo faite. Iena cai uiñuanona, raitica: Eniruemo Cristodi imana jai bairede. Jusiñamui Joreñodi caina naimie uai siñonana uiñotade. Jusiñamui jaienisai naimiena jiai ciodimaci. Jiaie nairaaimo naimiena llotica. Iena cacajamona, ailluena cominidi diga nairaaimona naimiena birui inotimaci. Monamo naimie abido jai jaide.

4

Jaiinodi jiaiforie rafuena lloitimaci

¹ Jusiñamui Joreño caimo raise llote: “Jesucristo nia abido biñena facaiseconi damerie creyentiai Cristona fañonocaitimaci. Taife dibeimo ite lloraini llua cacarefillamona, Janabamona ite llucacino jaitimaci. Taifemona ite llucacino jaitimaci”. ² Naie llorainidi: “Uanaicinona llotica” raitimaci; iadedi taino llocabiitimaci. Naimaci comeci jai tainomo ite. ³ Ima riño ie aina ollena rairuitimaci. Riño ima ie inina ollena rairuitimaci. Dajerie guille rana fimaidoitimaci. Jusiñamui iena fimaidoñede; ia creyentiai uanaicinona uiñuanona, iobillanona guillena, naimiedi naga rana finode. ⁴ Nana Jusiñamui comuitaga guille radi mare. Iobillano iena cai feiñuanona, guitica. ⁵ Jusiñamui llua jira, Jusiñamuimo cai jia, nana guille radi jai mare. Iemona marañede rafue jaca caimo comuiñeite.

Jesucristo rafuedo raise inocana jai

⁶ Timoteo, cue llua creyentiaimo o lloia, Jesucristo dibeimo raise maijidio. Cristo uaina inocana o jailla jira, mare llogacino o jailla jira, raise maijidio. ⁷ Jamai rafuemo, jamai igaiaimo o comecina facañeno; iadedi Jusiñamui jitailla rafuena finocana o jai. ⁸ Mairillena o abi llarocaiadedi, mare; iadedi Jusiñamui rafuena o facajia, eo mare. Abi llarocaja baifemo Jusiñamui uaidi eo faite. Jusiñamui rafuedi o comecina birui ocuiñotaite. Jusiñamui dine jairuido o jaillena, o comecina marena jiai raise finotaite. ⁹ Bie llucacino uanaicino. Ie jira iena cai inua. ¹⁰ Cai jillobillena, cajede Jusiñamuimo ocuridica. Ie jira duere sefuillano maijidica. Jeacinomona Jusiñamuidi nana cominina jillobitaacad. Naimiena inotinona jai jillotate.

¹¹ Nana creyentiaimo cue llua raise llofue. ¹² Naimacina o llofueia, coniruena nia o illamona: “O afemo itica” naimaci raiadedi, damamai iese raitimaci. Mare illacino o jai. Ie mei iese rañeitimaci. Marena o ñaiamona, marena o illamona, jiaie cominina o

isiruillamona, Jusiñamuina o ñnuamona, o jeanide rafuena o finoñenamona, naimacidi fueoitimaci. ¹³ O dine nia cue riñenia, creyentiaí ofia, Jusiñamuina ciegafuiaína ado faca. Iena lloño. Iena llofue. ¹⁴ Creyentiaína llofueraini navui ofidemo, Jusiñamuimona o baitajacinona o feiñollena, naimaci onolliaí o ifogimo jonetimaci onolliaí o ifogimo jonetimaci. Naie facaiseconi Jusiñamui naimacina naicinona ona llotatate. Naicinona birui fañonocaiño. ¹⁵ Iena eo uuiwai, nana comini Cristona ñnocana o jaillana uñollena. ¹⁶ O comecina raise eeno. Marena raise llofue. Cristo uaina ñnocana o jai. Iese o jaia, jeacino ñnuamona jilloitio. Iese ona cacadino jiaí jilloitimaci.

5

Timoteo afemo itino diga ie illa rafue

¹⁻² Eimiiaina illamona, o afemo itinona riire llofueño; iadedi o moomo o llua isoi, naimacina fecuise llofue. O anafemo itinona o amataimo o llua isoi, llofue. O afemo itinañuaina o eimo o llua isoi, llofue. O anafemo itinañuaina o mirinañuaina o llua isoi, llofue. Naiñuainimo jeare comecina facaño. ³ Naiñuaina canollena, feciñuái comini iñenia, naiñuaina cano. ⁴ Feciñomo uruiaí ia, naimaci naiñuaina canua, naiñuaino naimacimo duilla jira. Einamacina illamona, iemona naiñuainodi ñbana oite. Iese itena, Jusiñamuimona mare. ⁵ Feciñomo uruiaí iñenia, da Jusiñamuimo naiñuaino ocuiride, naimie naiñuaina canollena. Jusiñamuimo nagarui jicabite. Bie isoide feciñuaina cano; ⁶ iadedi Jusiñamuimo duiñede rana ebiruiga feciñona canoño. Jusiñamui anamo naiñuaino jai raise iñenamona, Jusiñamuimona naiñuainodi jai fioidaiteñuaino isoide. Fioidaite cominina jaca canoñedicaí. ⁷ Ie jira creyentiaimo buena lloño, feciñuaina jeare bu ñai raillanona.

⁸ Ie cominina canoñedimie Cristo uaina jai fañonocaide. Naimiedi Cristona ñnoñedimie baifemo eo jearedimie. ⁹ Creyentiaína sedarainina canolle feciñuái mameciaína o joneia, iese jone: Jai jionaidinañuái diese mameci jone. Dajede ñnredinañuái mamecina jone. ¹⁰ Mare rafue naiñuaino finocabilla jira, jiaie cominidi naiñuainodi mareñuaino raillañuaino. Ie uruiaí raise sedadinañuaino. Cominina nafuecabitinañuaino. Jiaí creyentiaína abina iedoño canocabidinañuaino. Duidinona canocabidinañuaino. Diese mare rafuena finocabidinañuaino mameci jone. ¹¹ Feciñuái diese mameci o joneia, nia jionaiñede feciñuái mameciaína joneño. Naiñuaino nano llotimaci: “Inina dane oñeicaí. Da Cristona sedaiticaí” llotimaci. Ie mei uri iñenanomona, ñmana niciduamona, inina jitaitimaci. Ie jira naiñuaino mameci joneño. ¹² Naiñuaino navui llucina jai fañonocalla jira, jiaie comini naiñuaino joreñuaina ñaitimaci. ¹³ Naiñuaino diga jofomo macariruillamona, rairaidimaci. Eo ñaillaredimaci. Naiñuaino ñaiñenacinuaido ñaitimaci. ¹⁴ Nia jionaiñede itinañuaino iese iñellena, naiñuaino inina dane uana jitaídicae. Ie mei uruairenitimaci. Naiñuaino jofona sedaitimaci. Ie mei budi naiñuaino jeare ñaiñeite. ¹⁵ Cristona dajerie fañonocaida, Taife díbeimo jai jaidimaci. ¹⁶ Creyente cominimona feciño iade, da naimie naiñuaina canua. Jiaie creyentiaimo naiñuaina canolle rana jicañena. Ie muidona cominide feciñuaina canorenitimaci.

¹⁷ Creyentiaína llofueraini marena maijia, raise ñbauiga. Naimaci lloia, naimaci jiaí llofueia, eo raise ñbauiga. ¹⁸ Moisés micori jaie ciegafuiaí iena lloite: “Trigo oni juillena jurareta saisia, ie fuena maiño, ie guillena”. Guillamona ñbana jai ote. Cristo jaie lloite: “Maijidimiedi ñbauiga”. ¹⁹ Creyentiaí llofuerainimona damie llogidoia, iena cacareñeno. Mena comini, ñbai daje amani comini iese naimiena llogidoia, iemo cacarei. ²⁰ Creyentiaí llofuerainimona bu jeacina finocabia, nana creyentiaí uicomo naimiemo riire lloño, jiaie creyentiaí daje isoi iñellena. ²¹ Dacinodo naga jeacino finoraimamo lloño. Nagamiemo ridoño lloño. Fecuise damiemo lloño, naimiedi o nabaina jira. Jusiñamui cana cide. Jesucristo cana cide. Jusiñamui fetoca jaienisai cana jiaí cidimaci. Ie jira dacinodo lloño. ²² Jeacino naimiemo ia, naimie jeacino

facaisena o iñellena, creyentia i llofuera i mana jaillena, buna raire fetoñeno. Jeacino mona oni eneno o i. ²³ Eo o duia, da jinuina jiroñeno. O duicabilla jira, janore vino jiro, o jebe manollena. ²⁴ Jeacino dajerie finoia, iena uiñotica i, juez isoi Jusiñamui iena nia lloñenia. Jeacino jia i no finoia, iena uiñoñedica i; iadedi jia i ruído Jusiñamui lloia, iena uiñoitica i. ²⁵ Ie isoide. Mare rafue bu finoia, iena uiñotica i; iadedi birui iena ca i uiñoñenia, jicarena finoñena jira, jia i ruído iena uiñoitica i.

6

¹ Jusiñamuina iñnote mai jira i nidi naimaci patrones eo iñnua. Ie mei Jusiñamuina iñnoñedino Jusiñamuina jeare ña iñneit i maci. Cai llofuiacino na jamaiñe it i maci. ² Jesucristona naimaci patrones iñnoia, mai jira i nidi naimaci uaina jia i iñnua. Naimaci comeci a i facañena: “Patrón creyentena illa jira, dan i conima ca i isiruilla jira, raise mai jira iñneit i ca i”; ia: “Raise mai jira iñneit i ca i” comeci a i na facaja.

Uana iñnedica i no na llua cino

³⁻⁴ Cai llogacino di uanaicino. Cai Nama Jesucristona llotica i. Bie llogacino mona naimie jita i lle isoi ca i illanona, raise uiñotica i. Jia i cinodo bu llofueia, abi i edote. Abi uiñoñede. Uai eo uaita i acadé. Ie meinoconi comini abina uradoid i maci. Daajena comeci a i na llo iñned i maci. Jia i e comini joreña na ña iñneit i maci. Cai fña i na bit i maci. ⁵ Uai uaita i maci, naimaci comeci a i mara i ñeno illa jira. Uanaicino na jia i uiñoñed i maci. “Cristo uai llua mona, ailluena ucubena oitica i” raillanomo comeci a i na faca di maci. “Iemona ca i mare i itica i” raillanomo comeci a i na faca di maci. ⁶ Ie iadedi iese iñede. Cristona eo raise ca i iñnuamona, ca i mo di ese ite ra di ga ca i mare itica i.

⁷ Cai jeic i a, jaca buenidica i. Cai fioda i lla mei, ca i rana uiñe itica i. Cai radi benomo fiebica i te. ⁸ Ie jira i, ca i guille ia, ca i iñro i ia, ca i mare bene ca i illa. ⁹ Eo ucuberedino na jia i acadino na Taife eo ramo fa i te. Taife uaina iñnuanona ucube ollena, ucuberedino na jia i acadino di di ga mara i ñede rafuena fiñod i maci. Ja muidomo imaci abi fa i fit i maci. ¹⁰ Ucubena ebi ruilla nona, ucuberedino na jia i acadino naga jeacino na fiñocabid i maci. Ucube ollena, dajerie Cristona jia i fa i nonocaid i maci. Ie muidona eo duere sefu id i maci.

Jusiñamui uaina iñnocana jai

¹¹ Ero, Timoteo, odi Jusiñamui fetocam i edio. Nana cue como lloga rafuemona oni eneno o i. Mare rafuedo o jai. Jusiñamui jita i lla rafuena fiñocana o jai. Jesucristona iñnocana o jai. Jia i e comini na isiru i. Mare rafue di beimo o comeci a i jone. Ri i cinodo comini na llofueñeno. ¹² Jeacino di beimo o iñellena, Jesucristona iñnuanona, llocana o jai. Jaca itatajacinona marena raise iñno. Jusiñamui ona fetode, o jaca illena. Navui di ga comini mo Jesucristona o iñnuana marefodo llotio. ¹³ Ie isoide Jesucristo. Poncio Pilato di ne ja i e naimie itemo, marefodo: “Im i edicue” llote. Jusiñamuidi nana rana cajetade. Naimie ca i na jaca ciode. Jesucristo ca i na jia i jaca ciode. Ie jira uanaicino na omo lloticue. ¹⁴ Cai Nama Jesucristo nia abido biñenia, nana omo cue llogacino uai iñno. Jearede rafuena finoñeno, jia i e comini na i e llogacino uaina uaita iñellena. ¹⁵ Naimie jita i lli ru i Jusiñamuidi en i ruemo Jesucristona dane oreta i te. Jusiñamuidi maremie. Nanocamie. Cai nanoca ca i moto illa i ma. Cai nanoca Nama. ¹⁶ Da jaca naimie fioda i ñeite. Eo isire lli ga iñnote ra dinomo naimie ite. Nainomo jaca bu ia i rei rinide. Bu naimie na jaca cionide. Naimie di jaca siñonasa. Naimie mo iobilla cino na jaca ca i fecacabilla sa. Iena jita i di cue.

¹⁷ Eo ucuberedino mo llono: “Abina i edoñeno. Ucubedi fuirede. Ie jira ucubena uamo ocuiriñeno; iadedi Jusiñamuimo ocuiri”. Cai comeci a i ja i sillena, naimie di ca i mo rana eo raise fecacabide. ¹⁸ Ucuberedino mo jia i llono: “Omo i ucube di ga mare rafuena fino. Jia i e comini mo ucubena caidiñeno fecajana cano”. ¹⁹ Ie muidona iese naimaci finoia, monamo naimaci isiruiga rana iite, jia i ruído iena. Iese naimaci jaia, jaca itatajacinona marena raise ua uiñoit i maci.

Fuiduacino

²⁰ Timoteo, cue omo llogacinona faiñoeno raise uiuicai. Jamai rafuemo cacarefiñoeno. “Uanaicinona eo uiñoñedimaci” dajerie raitimaci; iadedi uiñoñedimaci. Naimaci ñaiana cacarefiñoeno. ²¹ Dajerie iena cacajano, Cristona nia uiñoñedimaci. Jusiñamui ona duenaillasa. Jaca ñinori omo rafuena lloticue. Mai. Pablocicue.

TIMOTEOMO PABLO IE EMODOMO ORETAGA RABE

Uaiduacino

¹⁻² Timoteo, carta omo dane cueticue. ¿Nigacino? ¿Nie isoidio? Pablodícue. Jusiñamui cuena jitailla jira, Cristo Jesús oretagamiedícue. Cominimo jaca itatajacinona lollena, cuena oretate. Cristo Jesús cai ñnuamona, naimie diga jaca iiticaí. Cue isiruiga jito isoidio. Cai Moo Jusiñamui, cai Nama Jesucristo diga, ona jai duenaite. Iena uiñocana mai o jai. Ona jai uri itatatiiaimaiaí. Iena uiñocana mai o jai.

Jusiñamuimo iobillacinona fecade

³ Mare cue comecimona cue usumatiaí micoriaí isoi, Jusiñamuina sedadícue. Timoteo, nagarui Jusiñamuimo cue jüia, o facaisena iobillacinona fecadícue. ⁴ Cue comeci caimareficaillena, ona eo cioacadícue. Navui cue o facadoia, o eiana comecitícue. ⁵ Cristo Jesús o ñnuana dane jiaí comecitícue. O usuño Loidadi ñnote. O ei Eunicedi jiaí ñnote. Ie mei ñnotio. Naimiena o ñnuana jai uiñotícue.

⁶ Ie jira o comecina dane ocuiño, Jusiñamui uai o llofuellena. Cue onolli o ifogimo navui joneticue, ona fetollena, naimie uaina o lollena. Jusiñamuimona o baitajacinona naie facaiseconi feiñotio. ⁷ Jusiñamuidi cominina o jaciruillana jitaíñede. Cai comeciaina ocuiñotajanona, caina jiaie cominina isiruitallena, cai comeciaina eenotallena, ie Joreño caimo fecade. ⁸ Ie jira cai Nama rafuena o lluaña meiruiñeno. Cárcelmo cue illa jira, cuena jiaí meiruiñeno. Cristo Jesús rafue muidona duere sefuidícue. Naie rafue muidona duere o jiaí sefuia, rairuioicaiñeno i. Jusiñamui o comecina ocuiñotaite. ⁹ Naimie isoi cai marena illena, caina fetuano, jeacinomona caina jillotate. Cai finoca rafue muidona caina jillotañede; iadedi naimie jitailla jira, caina jillotate. Enirue nia finoñena facaiseconi caina jaie duenaite. Cristo Jesús caina iena jai uiñotade. ¹⁰ Cai Jilloitaramadi Cristo Jesús. Caimo Jesús jai bairia jira, Jusiñamui caina duenaillana jai uiñoticaí. Fiodaillamona naimie jai jillode. Iemona jiaí jilloiticaí. Naimie mare rafuemona naimie caina Jusiñamui díbeimo jaca illacinona jai uiñotade. ¹¹ Bie rafuena lollena, cuena fetode. Cuena oretaja jira, biena llofuetícue. ¹² Ie jira duere sefuidícue; iadedi cue illana meiruiñedícue. Cue ñnogamiena cue uiñua jira, naimie bille dinori naimiedi nana cuemo naimie jai iga rafuena cue llofuellena, cuena raise eenoite. ¹³ Cue llua isoi o i. Uanaicinona llotícue. Cristo Jesús ñnocana o jai. Jiaie cominina isiruicana o jai, Cristo Jesús mo o jainaiaila jira. ¹⁴ Jusiñamui Joreño caimo illa jira, omo naimie lloga uanaicinona fañonocaiñeno uiuicai. Uanaicinona o fañonocaiñellena, naimie ona canoite.

¹⁵ Diga Asiamo ite cominidi cuena fañonocaidimaci. Naimacimona Figelo cuena fañonocaide. Hermógenes cuena jiaí fañonocaide. ¹⁶ Onesíforo daje isoíñede. Diga icaiño naimie cue comecina ocuiñotade. Cuena meiruiñede. Cai Namadi Onesíforo jofomo itino duenaillasa. ¹⁷ Romamo Onesíforo navui ria, cuena isire jenuano, cuena baite. ¹⁸ Efesomo jaie cue ia, naimie cuena jiaí canode. Iena raise uiñotio. Cai Nama ico abidobía, cai Namamona naimie iba feiñuana jitaídícue.

2

O maijia rafuena raise fuido

¹ Cuena fañonocaidino isoi iñeno; iadedi cue jito, Cristo Jesús ona canuano, Cristo díbeimo o comecina ocuiñocana jai. ² Diga cominimo cue lluaña navui cacadio. O uaina ñnotinomo cue lluaña llono, iena jiaie cominina naimaci llofuellena. ³ Cristo Jesús rafue muidona duere o sefuia, rairuioicaiñeno i. Cai Nama rafuena o riidnamona, naimie soldado isoidio. ⁴ Ie illaíma uai naimie ñnoiacania, soldadodi soldadoñede rafuena maijiacaiñena. Ie illaíma iobitallena, ie illaíma ocuica rafuena finoacanite. Ie isoide. Da

Cristo Jesús rafuena o fino, naimiena iobitallena. ⁵ Reglamientos llua isoi naimie raise jifanoñenia, jifanoraimadi bue isoide rana cioñede. Ie isoide. Ibana o feiñollena monamo o jaia, Cristo Jesús lluado raise o jai. ⁶ Illimo duere maijiraimadi maijia jira, naiemona naie guiledi oga. Ie isoide. Duere o maiji, ibana feiñollena. ⁷ Cue lluomo o comecina facacabi. Cai Nama ona canoite, iena uiñollena.

⁸ Jesucristo fiodaillamona jillode. Iena comeci. Naimie usumadi David micori. Jesucristona cue llua jira, ⁹ maraiñedimie isoi cárcolmo duere jai sefuidicue; iadedi Jesucristo rafue nia llocana jaide. ¹⁰ Ie jira Jusiñamui fetocano facaina duere sefuidicue, Cristo Jesúsna naimaci ñnuamona naimaci jilloillena, monamo naimaci jaca illena. ¹¹ Bie lluacínodi uanaicino:

Naimie díbeimo cai jaillamona, naimie díga jaca iitícaí.

¹² Naimie muidona cai duere sefua, naimie díga iitícaí, ie comínina naimie sedalle facaiseconi.

Naimiena cai janoia, naimie caina jiaí janoite.

¹³ Naimie raise cai ñnoñenia, naimie uai meidoñena muidona, naimiedi nia ñnogamie.

Timoteo illa rafue

¹⁴ O comínimo buena dane llono, iena comecillena. Jusiñamui facaina naimacimo llono: Uaina jamai uaitaño, mare rafuena naicinomona comuiñena jira, naicinona cacadino comeciaina maretañena jira. ¹⁵ Marena maiji, Jusiñamui ori iobillena. O meiruiñellena, naimie o maijia jibuia, marena maiji. Uanaicino o uiñuamona, naimie uaina marena raise llofue. ¹⁶ Jamai ñaiana cacarefiño. Comini jamai ñainoicaia, Jusiñamui jitailla rafuena finocana jaiñedimaci. ¹⁷ Díga rafue naiemona comuide. Mocollonaitate duico cai abimo illa isoi, naie rafue llocana jaide. Himeneo naie rafuedo jaide. Fileto dajedo jiaí jaide. ¹⁸ Uanaicinona fañonocaidiaímaiaí. Coco ñnua isoi, llofueñediaímaiaí. “Cai fodaia, cai abi íco jilloñeite” llofuetiaímaiaí. “Cristona cai ñnua facaise jai jillodícaí. Cai fodaia, cai joreño jaca iite” llofuetiaímaiaí; iadedi cai abi íco jillollena ñnoñediaímaiaí. ¹⁹ Ie ia Jusiñamui comini jaca ñnocana jaidimaci. Ie comínimo Moisés micori jaie lluamona, iaímaiaí finoca rafuena jiaí ñaite: “Jusiñamuidi ie comínina uiñote. ‘Jusiñamuina ñnoticue’ raitimiedi maraiñede rafuemona eneno illasa” llote. Ie jira iaímaiaímona eneno o i.

²⁰ Ero, ucuberedimie jofomo díga guillirue joneuilla ra jai ite. Eo jitairede rana jai ite. Janore jitairede rana jiaí jai ite. ²¹ Ie isoide. Jusiñamui díbeimo itinomona naga isoide comini ite; iadedi jeacinomona eneno bu ia, Jusiñamui naimiena fetoite, ie eo jitaile rafuena finollena. Jusiñamui díbeimo raise maijíte. ²² Ie jira conirueni comeciái jitailla maraiñede rafuemona eneno o i. Marena i, Jusiñamui jitailla isoi. Jesucristona ñnocana jai. Nana comínina isirui. Uri i. Mare comeciáimona nana cai Namana sedadino díga iese i. ²³ Jamai ebena rafuemo iño. Naiemona icirillacínodi comuide. Iena uiñotio. ²⁴ Jusiñamui facaina llofueraimadi raire iciriñena. Nana comínina nabairilla. Marena fecuise llofuega. Riicaiñena. ²⁵ Naimie uaina jitaíñedinona fecuise llofuega. Ie mei Jusiñamui naimaci comeciái iuaina nibai meidotaite, uanaicino díbeina uiñollena. ²⁶ Ie mei abi uiñuanona, Taife anamona jilloitímaci. Taifedi naimacina ie anamo jai itatate.

3

Jusiñamui díbeimo iñedinomona abina rairui

¹ Bie lluacínomo comecina raise faca. Jesucristo abido bille facaise iaírei ia, creyentena illena eo sefuirenite. ² Naie facaiseconi comini daní imaci abina isiruitímaci. Ucubena ollena eo nicidoitímaci. Abina iedoitímaci. Abina biriitímaci. Jusiñamuina eo jeare ñaitímaci. Naimaci moo uaina, naimaci ei uaina ñnoñeitímaci. Jiaíe comínimo iobillacínona jaca fecañeitímaci. Jusiñamuina jaca jitaíñeitímaci. ³ Jiaíe comínina duenaiñeitímaci. Comeciaina jaiárenitímaci. Jiaíe comini joreñoena eo jeare ñaitímaci.

Naimaci comeciaina eenoñeitimaci. Ebe isoi naga rana duere finoitimaci. Mare rafuena jitañeitimaci. ⁴ Naimaci nabaiñiaina janoñeitimaci. Jiaie cominimo comeciaina facañeitimaci. Eo abina iedoitimaci. Naimaci comeciai jitailla rafuena finoacanitimaci. Jusiñamui rafuena isiruiñeitimaci. ⁵ “Jusiñamuina sedadicaí” raitimaci; iadedi Jusiñamui uaina jamaitimaci. Bie isoide comini diga nabairiñeno. ⁶ Naimacimona dajerie jiaie jofuemo macaritimaci, naie jofuemo ite riñoniaina jifuianona llofuellena. Diga jearede rafuena finuano, naie riñoniai ebena itimaci. Naimaci comeciai iuailai raire meido-cana uitimaci. ⁷ Naga lloraima llamo naiñaiñuai cacareidimaci; iadedi uanaicinona jaca uiñoñedimaci. ⁸ Naimaci comeciai eo marañede. Jusiñamui uaina ñnoñedimaci. Jannes, Mambres diga, Moisés micori lloga uai jaie uaitatiamai. Ie isoi bie comini uanaicinona birui jiai jitañedimaci. ⁹ Nana comini naimaci rafue jamai ebe isoi finoca rafue uiñuamona, Jannes iaímaiai Mambres rafue jaie fuilla isoi, naimaci rafue raire fuite.

Timoteo uanaicinona ñnuanona jailla

¹⁰ Timoteo, cuena uiñotio. Cue llofuiana uiñotio. Cue illana uiñotio. Cue jitailla rafuena uiñotio. Cristona cue ñnuana uiñotio. Iciríñeno fecuise lloticue. Cominina isiruiticue. Duere cue sefuia, cue comecina ocuiñoticue. Iena uiñotio. ¹¹ Antioquíamo, Iconiomo, Listramo cuena duere finodimaci. Duere sefuidicue; iadedi nana naiemona cue Nama cuena jillobitade. ¹² Jusiñamui jitailla rafuena finuano, Cristo Jesús uaido jaidinodi duere sefuitimaci. ¹³ Ie facaiseconi marañedinodi marañede rafuena finocana jaitimaci. Jifueraini daje isoi jifuericana jaitimaci. Naimacidi abido naimacina jiai jifueitimaci. Iese jaitimaci; ¹⁴ iadedi cue llofuia uaido ñnocana odi jai. Cuemona jai fueotio. O usuñomona jai fueotio. O eimona jai fueotio. Ie jira uanaicinona jaie ñnotio. ¹⁵ O uruenamona Jusiñamuina mare ciegafuiaina cacadio. Naie ciegafuiaí cai jilluana caimo llote. Cristo Jesúsna cai ñnuamona, jillobidicaí. Iena caimo jai llote. ¹⁶ Comini nana naie ciegafuiaina cuetimaci; iadedi Jusiñamui jitailla isoi, naga cuetimie cuete. Ie jira nana naie ciegafuiaí Jusiñamui mona ite. Cominimona ññede. Ie jira naie ciegafuiaímona uanaicinona uiñoticaí. Cai marañedicinona caimo llote. Cai comeciai marena illena, Jusiñamui jitailla isoi, caimo llote. ¹⁷ Iese llote, naimiemo cai duillamona, nana Jusiñamui rafuena cai raise uiñollena. Raise uiñuamona, Jusiñamui rafuena raise llofuereniticaí. Naga Jusiñamui jitailla rafuena jiai raise finoreniticaí.

4

¹ Jiairuido Cristo Jesúsdi illaimana eniruemo abido biite. Illaima isoi ie cominina sedajite. Naimiena ñnoñenamona nia cajedinona duere finoite. Jai fioiditina jil-lotajanona, naimiena ñnoñenamona, naimacina duere finoite. Jusiñamuidi birui caina jaca cide. Cristo Jesús birui caina jaca cide. Iena cue uiñuamona, bie uai omo lloiticue. ² Naimiena ñnoñedinona Cristo duere finoñellena, naimie rafuena naimacimo jaca llono. Comini o dafaíña, comini ofia, comini o dine ria, naimacimo iena lloitiosa. Naimaci jitaia, llono. Jitañenia, jiai llono. Jeacinona bu finoa, naimacimo llono. Marena naimaci illena, naimacimo llono. Fecuise jaca llofue. ³ Jiairuido dajerie uanaicinona jitañeitimaci. Jiaifuena jitaítimaci. Naimacimo dani naimaci cacaacana rafuena lollena, diga llofuerainina jenoitimaci. ⁴ Uanaicinona fainonocaida, ñgaíai icinuaido facajitimaci. ⁵ Timoteo, o comecina eeno. Duere o sefuia, rairuioicaiñeno i. Jesucristo rafuena llocana o jai. O llofuiacinona marena fuido.

⁶ Jai iaírei ite cue meinellirui. ⁷ Cai Nama rafuena llocana cue jaillano, iena marena jai riidoticue. Cue illa dinori jai fuiacade. Cai Namana fainonocaiñedicue. ⁸ Cai Namamona marena cue illa jira, monamo íbana feiñoiticue. Iemo jai ocuridicue. Iena cai Nama cuejena eenote. Naimie abido billiruimo iena feiñoiticue. Caina raise uiñuamona, dama cuemo fecañeite; iadedi nana naimie abido billena jitaídinomo íbana jiai fecate.

Pablo damieriena ñaia rafue

⁹ Timoteo, raire cue dine bi. ¹⁰ Biniemo ite rafuena Demasdi eo ebiruilla jira, Tesalónicamo naimie jaillano, cuena fañonocaide. Galaciamo Crescentedi jai jaide. Dalmaciamo Tito jai jaide. ¹¹ Dama Lucas cue diga ite. Marcos o diga ati. Cuena canollena, naimiena jitaidicue. ¹² Efesomo Tíquicono oredicue. ¹³ O bia, cue fiebide iniroina ati. Troasmo Carpio jofomo fiebide. Cue libros ati, cue rabiaia diga. ¹⁴ Alejandro raillamie navui cuena jeare finode. Naimiedi lloeomona rana finoraima. Cai Nama naimiemo iba oite. ¹⁵ Naimiemono o abi rairui. Naimie cue lluana eo jitañede. Iena uaitate. ¹⁶ Illaicomini dine cue rafue nano cue riidoia, jaca buna cue facaina riidoñede. Nana cuena fañonocaidimaci. Jusiñamuidi naimacimo iba uana jitañedicue. ¹⁷ Cai Nama cue facaina ite. Cue comecina ocuiñotade, nana judíuainedonomo naimie uai raise cue lollena. Naimie muidona cue fiodaisaillanomonon jillobidicue. ¹⁸ Cai Nama naga marañede rafuemono cuena eenoite, monamo ie cominina sedajanomo cue raise rillena. Iobillacino naimiemo jaca fecacabillasa. Iena jitaidicue.

Fuiduacino

¹⁹ Diga cominimo cue uai oredicue: Priscamo, Aquilamo, Onesíforo jofomo itinomo. ²⁰ Corintomo Erasto fiebide. Miletomo Trófimo duide fañonocaidicue. ²¹ Rollime nia iñenia, cue dine bi. Diga comini omo naimaci uai oredimaci: Eubulo, Pudente, Lino, Claudia, ua nana creyentia.

²² Cai Nama o comeci ocuiñotajasa. Naimie nana omoina duenaillasa. Mai. Pablocue.

TITOMO PABLO ORETAGA RABE

Uaiduacino

¹ Tito, omo cartana oretaiacadice. ¿Nigacino? ¿Nie isoidio? Pablodice. Naimie cominina cue illamona, naimie jitailla rafuena cue finuamona, Jusiñamui anamo llofuecabitice. Ie rafuena llofuellena, Jesucristo ie oretagamiedice. Jusiñamui fetocanona ñnotallena, naimacina uanaicinona uiñotallena, Jusiñamuina naimaci raise sedallena, cuena oretate. ² Naimie diga jaca cai illemo cai ocurilla jira, Jusiñamuina sedadica. Enirue nia iñena facaiseconi, Jusiñamuidi cai jaca illena jaie llote. Naimie taino jaca lloñede. ³ Iemei naimie jitaillarui caina ie rafuena jai uiñotade. Naie rafuena cue lollena, naimie cuena oretate. Naimiedi cai Jilloitaraima. ⁴ Tito, bie carta omo cueticue. Cue isoi o ñnua jira, cue jitona cue mamecao. Coco Moodi Jusiñamui. Coco Jilloitaraimadi Jesucristo. Iaimaiaia ona jai duenaitiaiaiaia. Iena uiñocana mai o jai. Ona uri jai itatatiaiaiaia. Iena uiñocana mai o jai.

Creyentiaina sedaraini illacinuai

⁵ Nainomo ite rafue o fuidollena, Creta railla uiasimo ona fañnonocaidice. Creyentiaina sedallena, naga nairai illanomo llofuerañina o fetuana navui omo llotice. ⁶ Creyentiaina llofuerañina o fetoa, nagamie bie isoidimiena feto: Nana comini naimie mare raillamie. Dañaiñona airedimie. Nana naimie uruia creyentiaina itimie. Nana comini naimie uruia mare raillamie. Naimie uruia ie uaina ñnotimie. ⁷ Jusiñamui facaina naimie maijia jira, creyentia sedaraimadi maremiena illa. Abina iedoñena. Raire iciriñena. Jifairuiñena. Fuiriruiñena. Ucubena nicidoñena. ⁸ Ie jofomo cominina raise feiñua. Mare rafue icinona isiruilla. Ie comecina eenua. Marena illa. Jusiñamui jitailla rafuena finua. Ie abina eenua. ⁹ Naie uai raise llofuiamona comini comeciaina ocuiñotallena, naimie uaina uaitatinona llicaitallena, cai llofua isoi uanaicinona ñnocana naimie jailla.

¹⁰ Ie isoidinona feto, ailluena comini Cristo rafuena raise ñnoñena jira. Tainocinuaina ñaicabitimaci. Cominina jifuecabitimaci. Judíuai creyentiaimona diga comini iese itimaci. ¹¹ Ie jira naimacina llicaita. Naimacidi diga cominina uri itatañedimaci. Unañnedicinona llofuetimaci, ucube bifuiano ollena. ¹² Naimacimona comini rafuena lloaraima navui raite: “Cai Creta cominidi jaca tainona llouidimaci. Naimaci comeciadi jico comeci isoide. Jearedimaci. Guillaredimaci. Rairai edimaci” raite. ¹³ Naimiedi uanaicinona llote. Ie jira creyentiamon raire llono, naimaci Jusiñamui uaina raise ñnollesa. ¹⁴ Judíuai ñgaiaina naimaci ñnoñellena, comini lletarafuena naimaci ñnoñellena, naimacimo raire llono. Damierie uanaicinona jitañnedimaci. ¹⁵ Ero, mareuidinomona naga ra mare. Jusiñamuina ñnoñedinomona naga ra jearede. Naimaci comeciadi jai jearena jira, jearerie comeciaina facacabidimaci. ¹⁶ “Jusiñamuina uiñoticaia” raitimaci; iadedi Jusiñamuina uiñoñedimaci. Naimaci finoca rafuemona iena uiñoticaia. Jusiñamui naimacina eo gaiñede. Buena ñnoñedimaci. Ie jira mare rafuena finuana uiñoñedimaci.

2

Creyentia marena illena, uanaicinona llofue

¹ Tito, Jusiñamuina ñnoñedino isoi iñeno. Odi uanaicino llofue, naimaci marena raise illana uiñollena. ² Uaicimaiaina llofue. Canamacina jia llofue: Jifaiñeno. ñnogamiena jai. Uairico isoi iñeno. Jusiñamui uaina raise ñno. Omoi ecimo itinona isirui. Duere omoi sefua, omoi comeciaina ocuiño. ³ Uaicinuaina llofue. Cañaiñuaina iese jia llofue: Marena omoi i, Jusiñamui jitailla isoi. Jiaie comini joreñuaina ñaiñeno. Jifaiñeno. Mare rafuedo omoi jaillamona, omoi anafeñaiñuiai mare rafuedo jaitimaci. ⁴ Naiñaiñuiai ñnina

isiruillena, naiñaiñuai uruiaina jiai isiruillena, ⁵ uairico isoi iñellena, jearede rafuena finoñellena, jofomo raise maijillena, cominina duenaillena, naiñaiñuai iniñiai uaina ñnollena, jiaie comini Jusiñamui uaina jamaiñellena, naie cañaiñuaimona fueoitimaci. ⁶ Einamacimo lloño. Coniruenimo jiai lloño: Ieñede ramo omoi comeciaina facañeno. Uairico isoi iñeno. ⁷ Tito, naga rafue o finua diese, mare rafuedo o jai. O llofua, uanaicinona lloño. Jamai ebe isoi llofueñeno. ⁸ Marena llofue. Marena o llofua, ¿niese comini o uai uaitaitimaci? Uaitañeitimaci. Iemei o dibeimo iñedino meidaitimaci, caimo jearede rafue iñenia. Ie jira cairi ñañeitimaci. ⁹ Patrón anamo itinomo iese lloño: Omoi patrón uaina ñno. Naimie jitailla rafuena raise fino. Naimie uaina oñeno. ¹⁰ Rana fiñeno. Naimie raruiai raise seda. Iese naimaci ia, naimaci raise maijia, naimaci patrón: “Jusiñamui uai mare” raite. Jusiñamuidi cai jilloitaraima.

¹¹ Jusiñamui caina duenaillana jai cai uñua jira, naicinona llofue. Naimiedi nana cominina jillotaiacade. ¹² Naimie uai caimo llote: “Cue dibeimo iñede rafuena eneno fañonocai. Marañede rafuena jitañeno. Uairico isoi iñeno. Omoi ecimo itinomo, jiaie cominimo taino lloñeno. Naimaci rana fiñeno. Jusiñamui uaina ñnocana jai”. Iese cai illana Jusiñamui birui jitaide. ¹³ Jiai caimo llote: “Jesucristo abido billemo caimare ocuiri. Naimiedi ebire biite. Ie uai siño. Naimiedi cai Jusiñamui. Jiai cai jilloitaraima”. ¹⁴ Cairi naimiedi fiodaite, cai jearedicinomona cai jilloillena. Naimie cominina cai illena, mare rafuena iocire cai finollena, cai comeciaina marena dote. ¹⁵ Naie rafuena llofue. Marañede rafue comini finoia, naimacimo lloño. Illaima uai isoi lloño. Cominidi o uaina jamaiñellena, raise llofue.

3

Creventia illacinuai

¹ “Omoi illaicomini uai anamo i” creventiaimo dane lloño. Omoi illaicomini llucinona ñno. Mare maijille ia, iena raise fino. ² Jiaie cominina jeare ñañeno. Fuirñeno. Fecuisse uiuicai. Nana comini diga marena ñaino. ³ Jaie cai jiai ebe isoidicai. Jusiñamuina ñnoñedicai. Taife caina jifuate. Dani cai comeciiai jitaillacino railla isoi finouidicai. Diga ie jearede rafuena finouidicai. Jiaie cominina jeare finouidicai. Marairainidicai. Abina uradoisoidicai. Cominidi caina enoisoidimaci. Coninina jiai enoisoidicai. ⁴ Ie ia Jusiñamuidi mareñenana jai fididicai. Naimie caina isiruillana jiai fididicai. ⁵ Ie mei Jusiñamui caina jillotate. Mare rafuena cai finoñedicai; iadedi caina duenaillamona, caina jillotate. Cai jeacinona oni dotajanona, cai comeciaina dote. Ie jira naimie dibeimo cai comeciaina dobañotica. Jusiñamui Joreño cai comeciaina marena finode. ⁶ Ie Joreño caimo raise fecade, Jesucristo finua muidona. Jesucristo cai jilloitaraima. ⁷ Ie jira naimiemona marebicaidicai. Caina duenaillamona, marebicaidicai. Caina ie cominina itatate. Iemona naimie diga jaca illemo ocuridicai.

⁸ Tito, cue llucinodi uanaicino. Jusiñamuina ñnotino marena maijillena, cue llucinona llo-llocai. Cue llucino mare. Ie jira nana cominidi iena cacacabillasa. ⁹ Ebena ñañeno. Omoi usumatiai mameciaina jamai sia-siadoñeno. Moisés micori llogacinuaina uaitañeno. Naicino diga buena oñedicai, Jusiñamui jitaillacinona cai finollena. ¹⁰ Roracomo comini comeciiaifocaitaimie ia, naimiemo lloño: “Iena finoñeno”. Dacaiño o llamona naimie ñnoñenia, dane lloño. Ie mei ñnoñenia, naimie diga omoi ñañeno. Naimie diga omoi nabairiñeno. ¹¹ Uanaicnodo naimie jai jaiacañede. Jeacinona jai finode. Naimie iena jai uñnote.

Fuiduacino

¹² Artemas o dine cue oretaia, Tíquico o dine cue oretaia, Nicópolis railla nairaimo are sedaño raire bi. Nainomo rollime facaiseconi cue comeci illana jitaide. ¹³ Zenas railla abogado Apolos iaimaiai diga cano, iaimaiai oni jaiacana jira. Iaimaiai jitaillena rana feca.

¹⁴ Dueredino ia, naimacina canollena, creyentiaimo: “Marena maiji” jia lono. Naimaci jamai iñellena, iese lono.

¹⁵ Cue diga itino naimaci uaina omo oredimaci. Jesucristona cai inua jira, caina isiruitinomo cue uaina lono. Jusiñamui nana omoina duenailana uiñocana omo jaillana jitaidicue. Mai. Pablodice.

FILEMÓMO PABLO ORETAGA RABE

Filemómo Pablodi carta orede

¹ Filemón, bie carta o dine oredicue. ¿Nie isoidio? Pablodicue. Jesucristo rafue cue llumona, cárcelmo iticue. O dine cue uai oredicue. Timoteo cue diga ite. Ie uai jiaí orede. Cai Moo Jusiñamuimo jai cai jainaiáilla jira, naimiedi coco ama. Coco diga Cristo facaina o maijia jira, ona isiruiticoco. ² Coco uaina Apiamo jiaí oredicoco. Cristo díbeimo naiñaiño illamona, naiñaiñodi coco miriño. Coco uaina Arquipomo jiaí oredicoco. Naimiedi coco isoi Cristo rafuena llocana jaide. O jofomo rollena oficabidinomo coco uaina jiaí oredicoco. ³ Cai Moo Jusiñamui, cai Nama Jesucristo diga, omoína jai duenaite. Iena mai uiñocana omoí jai. Iaimaiaí omoína uri jai itatate. Iena omoí uiñocana mai omoí jai.

Filemón Cristona ñnocana jaide

⁴ Jusiñamui diga cue ñaia, o facaina cue jiaí, naimiemo iobillacinona fecadicue. Mare rafuena o finuana cue fidia jira, naimiemo iobillacinona fecadicue. ⁵ Cai Nama Jesúsna ñnocana o jaillana fididicue. Nana creyentiaína o isiruillana jiaí fididicue. ⁶ Cristo díbeimo cai illa muidona, naimiemonona diga marecinona feiñoticaí. Cristona o ñnuamona, jiaíe creyentiaína o nabaia, omona naie marecinona uiñoitimaci. Naga mare ra uiñocana naimaci jaillana jitaídicue. ⁷ Cue ama, creyentiaína o isiruilla jira, iobidicue. O muidona creyentiaí comeciaí caimare uri illa jira, cue comeci iocire ite.

Onésimo facaina Pablo ñaite

⁸ Cue comeci iocire ite; iadedi daje rafuena o diga ñaiacadicue. Cristo uai cuemo illamona ñaiñeiticue; ⁹ iadedi conima coco isiruilla jira, o diga ñaiticue. Jai uaicimadicue. Jesucristo rafuena cue llua muidona, cárcelmona jai ñaiticue. ¹⁰ Onésimo facaina ñaiacadicue. Cárcelmo cue illa facaiseconi, cue muidona Cristona naimie ñnua jira, naimie cue jitona jaide. ¹¹ Omo naimiedi marañede rafue navui finode. O mullaíma naimie illanona, raise maijñede. Bene aisiamona, Cristona naimie ñnote. Cuena birui eo canode; iadedi birui o diga raise iacade. ¹² O dine naimiena abido oretaiticue. Dama naimiena oretañeiticue; iadedi naimiena cue eo isiruillamona cue comecina jiaí oretaiticue. ¹³ O facaina naimie cuena birui canode. Cue diga naimie fiebillana jitaídicue; ¹⁴ iadedi: “Jee” o nia raiñena jira, iese finoñeiticue. Iena omo jicañeiticue. Omo cue jicanuamona buena o finuana jitaíñedicue; iadedi dama o comeci jitailla jira, mare rafuena o finuana jitaídicue. ¹⁵⁻¹⁶ O anamo naimie nia ite; iadedi Cristona naimie jai ñnua jira, naimie o isiruiga amana feiño. Naimiena isiruiticue. O dine naimie jaca abido illena, o dinena janorena facaise cue dine navui bite. Naimiedi o mullaíma; ia naimiedi jiaí birui o ama. Naimiena isiruillanona feiño. ¹⁷ O nabaina iticuena cuena o feiñua isoi, naimiena feiño. ¹⁸ Naimie marañede rafuena omo navui finode. Omo naimie nia debia, cue facaina jone. ¹⁹ Iena ibaiticue. Bie carta dama cue cuiamona, naimie debiana cue ibajana uiñotio. Omo eo lloñeiticue; iadedi cue muidona Cristona o ñnua jira, ailluena cuemo debedio. ²⁰ Cue ama, coco Nama Cristomo coco jainaiáilla jira, cue jitaílle rafuena fino. Ie mei cue comeci uri iite. ²¹ Cue jitailla rafue o finollena uiñoticue. Cue jitailla rafue baifemo o finollena uiñoticue. ²² Jiaíe rafuena lloiacadicue. O jofomo daje cuarto cuejena fino. Cue facaina o jiaí, Jusiñamui jitaia, o dine jaiticue.

Damierie imaci uaina jiaí orede

²³ Omo Epafraas ie uaina orede. Jesucristo rafue llua muidona, cárcelmo cue diga naimie ite. ²⁴ Marcos ie uaina orede. Aristarco ie uaina orede. Demas ie uaina orede. Lucas ie uaina orede. Cristo rafue naimaci lluanona, naimaci cue diga maijide. ²⁵ Cai

Nama Jesucristo nana omoi creyentiaí começiaína ocuiñotajamona omoi na duenaillasa.
Mai. Macaibaite. Pablodicue.

HEBREOS COMINIMO ORETAGA RABE

Jesucristo rafuena jai cai cacajamona, Jusiñamuiña jai uiñoticaí

¹ Jusiñamuidi caina ie rafuena jai uiñotade. Iena omoimo ja lloiticue. Cai jaiagai micoriaimo Jusiñamuidi ie rafuena llote. Naimacimo ie rafuena llollena, jiaicaiño ie jaienisaína orede. Jiaicaiño nicai anado Jusiñamui ie rafuena llote. Iena llollena, jiaicaiño ie facaina lloraini micoriaína orede; ² iadedi eniruemo ie Jito billamona, Jusiñamui rafuena jai cai cacajamona, Jusiñamuina birui jai uiñoticaí. Ie Jito uaido, mona diga, eniruena jaie finode. Ie Jito uaido nana rana jaie finode. Na comini diga jiai finode. Jusiñamuidi nana ra, nana comini diga ie Jito anamo ico illena jai llote. ³ Ie Jito uaido nana naie rana finocana uite. Naimie muidona Jusiñamui marena ebirenana uiñoticaí. Jusiñamui marena naimie illa isoi, naimiemona Jusiñamuina uiñoticaí. Eniruemo billanona, cai comecimo ite jeacino facaina naimie fiodaite. Monamo abido jaillanona, illaimana naimie illamona, Jusiñamui abimo naimie jaide. Naimieri Jusiñamui iobillamona, Jusiñamui abimo naimie jaide. Illaimana naimie dane illa jira, Jusiñamui abimo naimie jaide.

Jusiñamui Jito Jusiñamui jaienisaí baífemo faíte

⁴ Jusiñamui Jitona naimie illamona, naimie illano Jusiñamui jaienisaí illano baífemo faíte. Ie illanomona naimie Jusiñamui jaienisaí baífemo faiana uiñoticaí. ⁵ Jusiñamuidi: “Cue Jitodio” Cristomo llote; iadedi ie jaienisaímo iese lloñede. Jiaicaiño llote: “Naimie Moodicue. Naimie cue Jito” llote. Ie jaienisaí ie Jito baífemo faíñena jira, ie jaienisaímo iena jaca lloñede. ⁶ Ie dajede Jito eniruemo oretaja facaiseconi Jusiñamui llote:

Nana cue jaienisaí naimiemo iobillacinona fecaja;

⁷ iadedi jiaie rafuedo ie jaienisaína ñaíte:

Cue ocuilla rafuena naimaci finollena, cue ocuilla diese naimacina oretacabiticue.

⁸ Ie Jitona ñaianona raite:

Cue isoi o illa jira, cominina o sedajafue jaca iite.

Eo marecinodo cominina jaca sedadio.

⁹ Mare rafue finuana jitaidio.

Maraiñedicinona finuana jitaiñedio.

Ie jira ona caimare jai itataticue.

Monamo o abido billanona, cue jaienisaí baífemo ona caimare itataticue

raite. ¹⁰ Jiaicaiño Jusiñamui ie Jitona raite:

Cue isoi o illa jira, o uai diga nanodofoconi eniruena jaie finodio.

Mona jiai finodio.

¹¹ Bie eniruedi mona diga ico fuite.

Eniroi fuilla isoi, iñeite;

iadedi odi jaca iitio.

¹² Eniruena mona diga meidotaitio;

iadedi odi jaca daje isoitio.

Jaca iitio

raite. ¹³ Ie Jitomo buena llote; ia ie jaienisaímona damiemo iese lloñede. Ie Jitomo llote:

Illaimana o illamona, cue nabei dine ana rai.

Nana o díbeimo iñedinona o anamo itataticue.

¹⁴ Ie jaienisaímo iena lloñede; iadedi naimacina oretacabite, ie Jitona ñnotinona canollena. Ie jira nana naiemona, ie Jito ie jaienisaí baífemo faiana uiñoticaí.

2

Jusiñamui caina jillotaja rafuena cai jamaiñena

¹ Jusiñamui Jito siño jitonana jira, naimie birui lloga rafuena eo raise cai cacajasa. Naiemona abido cai jaiñellena, naiena cai feitañellena, naiena eo raise cai ñnuasa. ²⁻³ Ero, Jusiñamui ie jaienisaina jaie oretajanona, Moisés micorimo diga rafuena jaie llote. Naie lloga rafuena bu raise finoñenia, iena bu raise ñnoñenia, Jusiñamui naimiena eo duere finode. Jusiñamui jaienisai lloga rafue mare; iadedi Cristo birui lloga rafue jaienisai jaie lloga rafue baifemo faia jira, Cristo rafuena cai ñnoñenia, Jusiñamui caina duere finollemona ua jilloñeiticaí. Ero, naimie cai jeacinomona caina jillotaiacade. Naie rafuena cai jamaia, iena cai ñnoñenia, naimie caina duere finollemona ua jilloñeiticaí. Cai Nama Cristo naie rafuena jaie llote. Naimiena cacadinodi caimo iena jai llotimaci. Cristo rafuedi uanaicinona llotimaci. ⁴ Jusiñamui uai diga jiaiforiede siño rafuena naimaci finuamona, Cristo rafuedi uanaicinona uiñoticaí. Naimie jitailla diese naga creyentemo Jusiñamuidi ie uaina itatate. Naga creyente naimie dibeimo raise maijillena, ie uaina itatate. Naga creyentemo naie uai illamona, Cristo rafuedi uanaicinona uiñoticaí. Ie jira naie rafuena cai ñnuasa.

Cai isoi illena, Jesucristo ñmana jaide

⁵ Jusiñamuidi ie jaienisaina oretauide, ie jitailla rafuena naimaci finollena; iadedi naimaci anamo comini ico illena jaca lloñede. Cristo anamo comini ico illena llote.

⁶ Jusiñamuimo David micori iena jaie llote:

Cai jamai bue isoidicaí; iadedi caimo comecina facadio.

Jamai cominidicaí; iadedi caina canodio.

⁷ Caina cominina o finua jira, o jaienisai isoi iñedicaí.

Fiodaiñedimaci; iadedi nana enirue rana o finuanona, Adán micori anamo iena jaie o itataja jira, caina eo iobitadio.

⁸ Nana rana naimie anamo o itatajana jaie llotio.

Iese llote; iadedi nana naie lloga rafue nia suiñede, jeacinona Adán micori jaie finua jira. ⁹ Jesúna dane lloiticue. Naimiena uiñoticaí. Eniruemo naimie jaie billamona, Jusiñamui ecimona naimie billa jira, Jusiñamui jaienisai illa isoi, dallu naimie iñede. Comena jaide. Cai facaina duere sefuillanona, naimie fodaite. Caina Jusiñamui dueruillanona, nana cai facaina Jesús fodaite. Naimie fodailla jira, ie abimo naimiena Jusiñamui abido itatajamona, Jusiñamui naimiena iobitade. ¹⁰ Jusiñamui nana rana finode. Nana cominina comuitate. Naimiena iobitallena, nana finode. Naimie jitailla jira, naimiemona marena jira, Jusiñamui ie Jitona orede. Cai facaina fodaillena, ie Jitona orede. Cai jeacino facaina fodaite. Ie Jito fodaillamona, ailluena Jusiñamui cominina jaidicaí. Naimie illanomo ico iiticaí. Naimie jitailla jira, ie Jito duere sefuillanona fodaite. Duere sefuillana ie Jito jai uiñuamona, naimiena ñnotinodicaina jai raise canorede. ¹¹ Naimie fodaillamona marebicaidicaí. Naimie dibeimo jai cai illa jira, daajena mooredicaí. Ie jira naimiedi: “Cue cominidomoi” caina meiruiñeno llote.

¹² Jusiñamui facaina lloraini micoriai llogacinomona naie rafue uanaicinona uiñoticaí. Jesús ie ico finolle rafuena jaie llotimaci:

Ie cominimo ie Moo rafuena lloite.

Ie comini diga naimie ofia, daajena Jusiñamuimo roitimaci

jaie llotimaci. ¹³ Jesúna dane ñaitimaci:

Ie comini diga naimiedi Jusiñamuina ñnocana jaite.

Jusiñamui cominina damierie jailla jira, naimacidi jiai naimie comini

ñaitimaci. Naimaci ñaia isoi, Jusiñamui cominina birui jaidicaí. ¹⁴ Jusiñamuina ñnotinodi

cominina jira, cai isoi naimie illena, Jesúsdi comena jaide. Cai fodailla isoi, naimie jiai

fodaite. Taife uaina cai ñnoia, jeacino finodicaí. Iemona fodaicana jaidicaí. Jeacino

anamona caina Jesús jai jillotaja jira, Jusiñamuimona Taife uai jai saide. Jusiñamui dibeimo iñenanomona jai jillodicai. ¹⁵ Jesús nia fiodaiñenia, nana cai illa dinori fiodaillana jaciruicana jaidicai. Jesús jai fiodailla jira, caina jaciruillacino anamona jillobitade. ¹⁶ Jeacino anamo naimaci iñena jira, Jusiñamui jaienisaimo ie comecina facañede; iadedi Abraham micori isoi inotinomo naimie comecina facade. Naimacina naimie jilloital-lena, naimiedi comena jaide. ¹⁷ Comena naimie illena, Jusiñamui naimiena orede. Cai isoi naimie duere sefuillena, naimiena orede. Cai isoi ramo naimie Taife faiamona, naimie fueollena, naimiena orede. Cai illana raise uiñote. Iemona caina dueruite. Jusiñamui jitaillacino finuana raise uiñote. Ie jira Jusiñamui diga cai facaina nanoca ñairaimana naimie raise jaide. Ie jira cai jeacinona oni dotajana Jusiñamuimo jicanote. ¹⁸ Naimie duere sefuilla jira, naimie ramo Taife faia jira, cai ramo Taife faia isoi, naimie caina canorede. Taife uai naimie inoñena jira, caina canorede. Taife uaina cai finoñellena, cai comeciaina ocuiñotade.

3

Jesús Moisés micori baifemo faite

¹ Cue amatiai, jeacino anamo omoi jai iñena jira, ie dibeimo omoina Jesús jai fetua jira, naimie siño jitona jira, naimiemo omoi comeciaina faca. Naimiena ja ñaiticue. Ie rafuena lollena, Jusiñamui naimiena orede. Naimie lloga rafuena jai cai inuamona, naimiedi Jusiñamui diga cai facaina nanoca ñairaima. ² Ie Moo cominina naimie raise sedajanona, naimiedi ie Moo uaina inuanona, iena finode. Nana Israel cominina naimie sedajanona, Moisés micori Jusiñamui uaina inuanona, iena finode. ³ Jusiñamuimona Jesúdi Moisés micori baifemo faite. Moisés micori mare; iadedi naimie caina jillotañede. Jesús caina jillotaja jira, Moisés micori baifemo Jesúri Jusiñamui iobide. Cai jillua jira, Jusiñamui cominina jaidicai. ⁴ Buena cai finuamona, naimie cominina jaiñedicai; iadedi naimie caina ie cominina dama itatarede. ⁵ Naimie facaina maijiano, Jusiñamui llua isoi, Moisés micoridi nana hebreos cominina raise sedade. Ie cominimo Moisés micori Jusiñamui naimiemo lloga uaina raise lloote. Naimiemona Jusiñamui ico lolle uaidi uanaicinona uiñoticaí. ⁶ Jusiñamui facaina maijjanona, Moisés micori ie cominina sedade; iadedi Cristodi Jusiñamui Jitona jira, naimie ie cominina sedade. Naimiena cai inocana jaia, naimiemo caimare cai ocuiria, Jusiñamui ua cominidicai.

Jusiñamuimona abido cai jaiñellena, bie rafuemona cai fueua

⁷ Jusiñamui Joreño caimo birui lloia, iena cacarei. Ero, Jusiñamui jaie llua cuetatate:

⁸ Omoi jaiagai isoi iñeno.

Jofue iñenanomo omoi jaiagai ia, cue uaina inoñedimaci.

⁹ “Naimie uaina raise uiñoticaí” raillanona, cuena facacabitimaci.

Cuarenta años cue siño finoca rana ciodimaci; iadedi jaca inoñedimaci.

¹⁰ Naimacimo lloticue: “Omoi diga iciriticue.

Cue dibeimo omoi illamo omoi comeciaina facañedomoi.

Cue lloga uaido jaiacaiñedomoi”.

¹¹ Omoi diga cue icirilla jira, nainomo uri illena, omoimo cue lloga eniruemo jaca jaiñeitomoi.

¹² Cue amatiai, cai jaiagai rafuena cai uiñuamona, cai fueua. Uanai Jusiñamuimona abido omoi jaiñellena, naimie jai lloga rafuena omoi inocana jai. Omoimona bu raise inoiacaiñenia, naimiemo llono. ¹³ Jusiñamui rafuena omoi raise inollena, nagarui conini omoi comeciaina ocuiñota. Omoimona jeacinona ebiruiñellemona, jeacino anamo omoi inellesa, birui Jusiñamui rafuena raise ino. Jeacino anamo omoi dane jaia, Jusiñamui rafuena inoñeitomoi. Iemona naimie ricaiillafue anamo dane iitomoi. ¹⁴ Cristomo cai duilla jira, naimie caina jaca canuanona, cai comeciaina marena caimare jaca itataite.

Nana cai ille dinori naimiena cai nano inua isoi, cai inocana jaiia, marena caimare iticai.
¹⁵ Ie jira naimiena ino. Bie jaie cuega:

Jusiñamui lloga uaina birui cacarei.

Jofue iñenanomo cai jaiagai ia, Jusiñamui uaina inoñedimaci
 cuega. Naimaci isoi iñeno.

¹⁶ Egiptomona Moisés micori anado jaidimaci. Diga icaiño Jusiñamui uaina cacadimaci; iadedi iena raise inoñedimaci. ¹⁷⁻¹⁸ Cuarenta años jofue iñenanomo itimaci; iadedi naimiena naimaci inoñena jira, Jusiñamui naimaci diga icirite. Naimiena inoñena jira, naimacimo Jusiñamui llote: “Omoimo cue lloga eniruemo jaca jaiñeitomoi” llote. Ie jira jofue iñenanomo naimacimo Jusiñamui jai lloga eniruemo jaiñeno fiodaitimaci. ¹⁹ Jusiñamui uaina naimaci inoñena jira, naie Canaán railla eniruemo jaca jaiñedimaci. Naimaci comeciai jaca uri illana uiñoñedimaci.

4

¹ Jusiñamui dibeimo raise cai illamona, Jusiñamui cai comeciai birui uri illana jitaide. Naimie lloga uai nia saiñede. Caimona damerie iese iñellesa, cai jaiagai isoi cai iñellena, abina rairuicana mai cai jailla. ² Jusiñamuidi comini comeciai uri illana jitaide. Cai jaiagaimo iena llote. Diga icaiño naie mare rafuena cacadimaci; iadedi iena naimaci inoñena jira, iemona buena oñedimaci. ³ Jusiñamuidi cai comeciai uri illana birui caimo jai llote. Cristo ie mare rafuena jai cacadicaí. Naimie uaina cai inua jira, cai comeciai jai uri ite. Cai jaiagai comeciai uri iñede. Moisés micori cuiamona iena uiñoticaí. Cuega:

Naimaci diga Jusiñamui icirilla jira, naimacimo lloga eniruemo jaiñedimaci

Comeciai uri illana jaca uiñoñedimaci

cuega. Jusiñamuidi nana comini comeciai uri illana jitaide. Eniruena naimie finocamo, comini comeciai uri illana jitaide. ⁴⁻⁹ Iena Moisés micori jaie cuega:

Seis digarui raifi illanona, Jusiñamui nana rana finode.

Naimiemona nana naimie finoca ra mare.

Naimie comeci caimare uri illamona, siete iruimo jafaici ote

cuega. Jusiñamuidi nana comini comeciai uri illana nia jitaide. Moisés micori facaise cai jaiagai comeciai uri illana jitaide; iadedi naimiena naimaci inoñena jira, naimaci comeciai jaca uri iñede. Moisés micori fiodailla mei, bie eniruemo Josué micori cai jaiagaina ifode; iadedi naimaci rilla mei, Jusiñamuina naimaci inoñena jira, naimaci comeciai jaca uri iñede. Josué micori illa facaisemona diga años illanona, David micori comeciai uri illana jiai llote:

Naimie uaina birui omoi cacaia, iena ino

llote. Naiemona Jusiñamui cai comeciai uri illana jitaillana uiñoticaí. Naimiena inotinodicaimo naie rafue jai duide. ¹⁰ Jusiñamuina cai inuamona, cai comeciai jai uri ite. Cai comeciai uri illena, jiaie rafuedo jaiñedicaí. Naimiena cai inuamona, naimie illanomo ico iticai. Nana naimie finoca rafuena naimie fuidua mei, nainomo uri iticai.

¹¹ Cai jaiagai inoñedimaci. Cai faifiñellena, naimaci isoi cai jaiñena; iadedi Jusiñamui uaina inocana mai cai jailli. Jusiñamuina cai inuamona, naimiedi cai comeciai uri itatate.

¹² Naimiena cai inoñenia, naimie iena uiñote. Naimie jaca ite. Naimie siño. Ie jira naimie lloga uai jaca saiñede. Jaca siño. Cai comeciaino riire baite. Eo jairede lloebi bue isoide jaitaia, iena oni econuanona, nana nainomo fo ite rana bairetate. Ie isoide Jusiñamui lloga uai. Nana cai comeciaino iticinona riire bairetate. Nana cai comeciaina facajacinuaina riire bairetate. ¹³ Jusiñamuimona buna reirinide. Jusiñamui nana cana cide. Nana cai finoca rafuena uiñote. Nana cai comeciaino iticinona uiñote. Ie jira naimie uaina inocana mai cai jailli

Jesúdi cai facaina Jusiñamui diga nanoca ñairaima

¹⁴ Jesúsdi naie uaina cai #nuamo canoite, naimiedi cai facaina Jusiñamui diga nanoca ñairaimana jira. Ie Jito illamona, monamo Jusiñamui abimo birui naimie illamona, cai facaina Jusiñamui diga naimie ñaicabite. Ie jira naimiena #nocana jaiticai. ¹⁵ Taife cai ramo faia, cai comeciai raise cai ocuiñoñenia, Jesús caina canorede. Cai ramo faia isoi, Taife naimie naga isoide ramo faite; iadedi Taife uaina naimie #noñede. Iemona Taife ramo faiacinona #noñenana naimie uiñua jira, jeacinona oñede. Caina canorede. “Naimacina cano” ie Moomo llocabite. ¹⁶ Cai facaina ie Moo abimo naimie illa jira, cai comeciaina naimie ocuiñotaiacana jira, Jusiñamuina jaciruiño naimiemo cai jia. Naimie caina duenailamona, cai jeacinona feitaite. Cai comeciaina jiai ocuiñotaite.

5

¹ Naga Jusiñamui diga ñairaima comini facaina ñaia jira, caina naimie jai feiñua jira, Jusiñamui diga jaciruiño jai ñaiticai. Moisés micorimo Jusiñamui jaie llua isoi, Aarón micorina Jusiñamui fetuanona, jeacino facaina comini Jusiñamuimo faga toiniaina fecauidimaci. Cominina Jusiñamui feiñollena, imaci ñairaima Jusiñamui diga ñaite. ² Nana comini isoi naimiedi jeacino finuamona, comini facaina Jusiñamui diga ñairaima ñaiana raise uiñote. Jusiñamui dibeimo raise jaiñedinona fecuise canorede. ³ Comini facaina toiniaina fecauide; iadedi naimiemo jeacino illa jira, naimie facaina toiniaina jiai fecauide.

⁴ Naimie jitailla jira, Jusiñamui diga ñairaimana buna jaiñede; iadedi naimiena Jusiñamui fetua jira, iena jaide. Jusiñamui Aarón micorina fetuana uiñotica. ⁵ Cristo jitailla jira, cai facaina Jusiñamui diga ñairaimana naimie jaiñede; iadedi naimiena Jusiñamui fetua jira, cai facaina ñairaimana jaide. Ie Jitona naimie illamona, Jusiñamui naimiena fetode. David micori jaie cuegafuaimona iena uiñotica. David micori Jusiñamui llua jaie cueda:

Cue Jitodio. Jai o Moodicue

cueda. ⁶ Ie Jitona jiaicaiño Jusiñamui ñaite:

Melquisedec micori isoi ona comini facaina cue diga ñairaimana jaca itataticue.

⁷ Eniruemo Cristo ia, imana naimie jailla jira, duere sefuide. Naimie fiadaiana caia iareia ia, Jusiñamuimo eo jide. Naimie fiadaiana Jusiñamui jillotarede; iadedi Jusiñamuimo ado llote: “Cueda legi cacaitaño; iadedi cue comeci jitailla isoi finoño. O comeci jitailla isoi fino” llote. Jusiñamui uaina naimie raise #nua jira, Jusiñamui naimie jiana cacajano fairiote. ⁸ Naimiedi Jusiñamui Jito; iadedi Jusiñamui naimiena legi cacatate. Iemona Jusiñamuina #nocana jaca jaillana naimie uiñote. ⁹ Naimiena ie Moo oretajanona, ie jitailla rafuena naimie raise marena fuidua jira, Jusiñamui ecimo naimaci jaca illena, nana naimiena #notinona jillotaite. ¹⁰ Melquisedec micori isoi comini facaina ñairaimana jaca illena, Jusiñamuidi naimiena fetode. Melquisedec micori uai jaca sañena jira, naimie ifomo illena, jaimiena jaca fetofede. Ie isoi Jesús uai jaca sañede.

Cristo dibeimona abido danomo jaiño

¹¹ Bie isoide rafuena omoimo lloiacadicue. Bie rafue irirede; iadedi Cristo rafuena omoi raise cacañena jira, omoi comeciai iena raise jitañena jira, omoimo iena raise llonidicue. ¹² Cristo rafuena are omoi cacaja jira, iedo omoi raise jaidomoidena, llofuerañina jaidomoi; iadedi iedo nia raise omoi jaiñena jira, jaimie omoina llofuiana nia jitaídomoi. Cristo dibeimo omoina itatate rafuena nia jitaídomoi. Cristona nano omoi cacaja rafuena nia jitaídomoi. Cristo rafuena #nocana nia raise jaiñedomoi. Eo janorede janosa monoí ijina jitaicabide. Einamací isoi guillena nia jitañede. Janosa isoidomoi. Creyentena bu como jia, Cristo rafuedo nia eo jaiñede. Iena eo uiñoñede. Monoí ijina jitaide isoide. Janosa monoí iji jirua mei, jiaie guille guillamona moonaita. Cristo rafuena are cacadomoi; iadedi janosa isoi nia itomoi. Nia moonaiñedomoi isoidomoi.

¹³ Janosa monoi ijina nia jitailla jira, naimie nia moonaiñenana uiñoticaí. Naimie nia abina uiñoñede. Jusiñamui jitailla isoi marecinona finuana nia uiñoñede. ¹⁴ Guilledí moonaitimie ie. Ie isoide. Cristo rafuedo raise jaidimiedi Cristo rafuena uiñocana jaide. Iemona marecinona finollena, llofuiana uiñote. Maraiñedicinona finoñellena, llofuiana jiaí uiñote.

6

¹ Diga icaiño bie rafuena jai cacadomoi. Cristona nano cai cacaja rafuena raise cai ñnuamona, jiaie Cristo rafuena raise uiñocana mai cai jailla. Cai nano cacaja rafuena cai fueoiacana siadocabiñelli. Cristo ðibeimo caina itatañede rafuedo navui jaidicaí; iadedí cai comeciaí iuai birui jai meidoticaí. Cristo ðibeimo itatate rafuedo birui jaidicaí. Jusiñamuina ñnuamona, naimie ðibeimo jaidicaí. ² Cristo ðibeimo bautizajana jai uiñoticaí. Llofueraimana jaillena fetuana jai uiñoticaí. Creyentiaína naimaci sedallena, naimacimo cai onolli jonianona, Jusiñamuimo cai jianona, naimaci fetuana jai uiñoticaí. Nana creyentiaí fiodaillamona jilluana jai ñnoticaí. Jusiñamuidí naimiena ñnoñedinona íco jaca duere finollena jai ñnoticaí. ³ Naie isoide rafue mare; iadedí iena cai raise ñnuamona, Jusiñamui jitailla jira, naimie caina canuamona, jiaie Cristo rafuena fueocana mai cai jailli. ⁴ Uanaicinona omoi comeciaí uiñuamona, Cristona omoi ñnuamona, Jusiñamui Joreño omoimo illamona, ⁵ Jusiñamui uaina mare omoi uiñuamona, Cristo uai siñonana omoi uiñuamona, abido danomo omoi jaiñellena, abina rairuicana omoi jai. ⁶ Cristo ðibeimona omoimona bu sofetena, jiaimie naimiena jillotanide. Jeacinona finocana naimie jaia, Jusiñamui ie jeacino oni dotañeite. Cristona naimie jitaiñena jira, Cristo fiodaillana jai jitaiñede. Cristona jeare jai finode. Cristo finoca rafuena jamaide. Cristona naimie jitaiñenia, ¿niese naimie jillobite? Jillobiñeite. Ie jira abido danomo omoi jaiñellena, abi rairuicana omoi jai. ⁷ Ero, iena jiaie rafuedo lloiticue. Jusiñamui noci deitacabilla jira, enirue naimie raitacabilla jira, iemo riará sicuanona, iena ie nama raitia, naiemona ie llisillana naimie uamona, Jusiñamui iobide; ⁸ iadedí naie eniruemona riará sicoñenia, maraiñede. Monaigi cuiraió diga naiemona dama sicoia, maraiñede. Jusiñamui nainomo noci deitate; iadedí naiemona llisillana onide. Naie enirue caimanide. Maraiñede. Ie nama iobiñena jira, iena fañnonocaide. Naie enirue isoidomoi. Jusiñamuimona mare rafuena cacadomoi. Iena ñnocana omoi jaia, naimie omoína iobitaite. Iena omoi jitaiñenia, naimiemona duere sefuitomoi.

Jusiñamui llua jira, cai comeciaí ocuiñocana jaidicaí

⁹ Cue isiruigaomoi, abi rairuillicinona omoimo lloticaí; iadedí cai llofuiacono omoimo duiñenamo cai comeciaína facañedicaí. Cristona ñnocana omoi jaillamo cai comecina facadicaí. ¹⁰ Jusiñamui omoína raise uiñote. Naimiena omoi isiruillamona, jiaie creyentiaína omoi isiruillamona, naimacina navui canodomoi. Naimacina nia canodomoi. Ie jira naimiemona duere sefuiñeitomoi. ¹¹ Omoi comeciaimona jiaie creyentiaína omoi canua isoi, Cristo rafuedo nana omoi ille ðinori ñnocana omoi iocire jaillana jitaídicaí. Naimie diga íco jaca omoi ille jira, iese omoi jaillana jitaídicaí. ¹² Cristo rafuedo omoi jaillamona omoi sefuiruiñenana jitaiñedicaí. Jusiñamui lloga uaina ñnocana jaidino isoi, omoi jaillana jitaídicaí. Naimiena naimaci ñnuamona, naimie lloga uai fecuise naimaci ocuirillanona, naimie lloga uaina oitimaci. Naimaci isoi omoi jaia, naimie lloga uaina jiaí oitomoi.

¹³ Ero, Jusiñamuidí Abraham micorimo lloga uaina uiñotomoi. Naimiedi Jusiñamuina jira, uanaicinona llote. Tainona lloñede. ¹⁴ Abraham micorimo llote: “Ona jaca canoiticue. O diga jaca iiticue. Cue llua jira, o jito comuite. O uruiaína eo jebuitaiticue” llote. ¹⁵ Abraham micori naimie lloga uaina ñnote. Iena suillemo fecuise ocuiride. Ie jito Isaac micori, Jusiñamui llua isoi, comuide. ¹⁶ Uanaicino cai llocabillana jiaie

comini uinollena, Jusiñamui mamecina llinoticaí. “Jusiñamui caina ciode” lloticaí. “Ua-naicinona cai lloñenia, Jusiñamui caina duere finoite” lloticaí. Ie jira cai lloga uaina buna uaitañede. ¹⁷ Ie isoide. Jusiñamuidi ie finolle rafuena caimo jai lote. Naimie lloga uai meidonillana cai uinuana naimie jitaide. ¹⁸ Naimiedi Jusiñamuina jira, ie uai naimie jai llua jira, naimie tainona llonillana uinoticaí. Ie jira naimie lloga uai naimie finuana uinoticaí. Naimiena cai inuamona, naimie anamo cai illa jira, caina naimie eenua jira, cai comeciaí ocuiñocana jaidicaí. Naimie illanomo ico cai jaca illemo ocuridicaí. ¹⁹ Naie rafuena Jusiñamui llua jira, cai comeciaí ocuiñocana jaidicaí. Ie lloga uaina naimie finollemo inoticaí. Monamo Jusiñamui illanomo ico cai illena eo raise uinoticaí. Nainomo fiebillena, barco ie lloelluna illemo dotaja isoi, cai comeciaí naganomo inellena, Jesús caina eenote. ²⁰ Jesús nainomo jai illa jira, naimie muidona nainomo jiaí iiticaí. Cai facaina nainomo ie Moo diga ñaicabite. Cai facaina nanoca ñairaimana jaca ite. Melquisedec micori ñaia uai saiñena isoi, Jesús cai facaina ñaia uai jaca saiñeite.

7

Melquisedec micori illa isoi, Jusiñamui diga ñairaimana Jesús jaide

¹ Iena omoi raise uibiñollena, Melquisedec micori rafuena omoimo lloiticue. Naimie micoridi Salem railla nairai ie illaíma. Naimiedi comini facaina cai Moo Jusiñamui diga ñairaima. Cinco illaímana Abraham micori anafetitaja mei, ie jofomo Abraham micori abido billano, naisomo naimie dine Melquisedec micori bite. Abraham micorimo marecinona Melquisedec lote: “Birui Jusiñamui ona canode. Naimie ona jaca canollena uinotique” lote. ² Jusiñamui diga ñairaimana Melquisedec illa jira, naimiemo Abraham micori dajerie rana fecade. Naie cinco illaímana anafetitajanona, naimaci rana bairuanona, nana naie ramona, riai uaimona ie décima facaina rana Melquisedecmo fecade. Melquisedec micoridi Salem railla nairai illaíma. Melquisedec mameci oni dobaiñuamona, “Cominina raise marena sedadimie” railla. Ie cominina raise sedajamona, ie comini uri illa jira, comini illano Salem railla mamecina jonega. ³ Naimie moonona, naimie eina, naimie cominina uinoñedicaí. Naimie jeiciaruína uinoñedicaí. Naimie fiodaillaruína uinoñedicaí; iadedi Jusiñamui Jito isoi Jusiñamuimona naimie feiñoga uai saiñena jira, comini facaina Jusiñamui diga ñairaimana jaca jaide. Naimie ifomo jiaimie inena jira, naimie ñairaimana nia ite isoide.

⁴ Ero, cai cominimona Abraham micori cai jaiagai baifemo faite; iadedi Melquisedec micori Abraham micori baifemo faite. Ie jira naimiemo ie décima facaina rana fecade. ⁵ Moisés micorimona Abraham micori uruína Jusiñamui lloga uaina cacadimaci. Naimacimo Jusiñamui ie sedaja jofo finuana lote. Nainomo maijidinomo nainomo maijiana lote. Abraham micori uruímona Leví railla nairaina fetode. Nainomo maijidino comini facaina Jusiñamui diga ñauidimaci. Jusiñamui ocuica rafue naimaci maijia jira, naimaci comini ramona décima facaina rana feiñoudimaci. ⁶ Melquisedec micorimo Abraham micoridi ie rana fecade; iadedi Melquisedec micori Abraham micori cominiñede. Leví railla nairai imieñede. Naisomo Abraham micori dine Melquisedec micori billanona, Abraham micorimo marecinona lote: “Jusiñamui ona jaca canoite. O diga jaca iite” lote. ⁷ Melquisedec micori Abraham micori baifemo faia jira, naie marecinona naimiemo lote. ⁸ Ero, Melquisedec micorimo Abraham micori rana fecade; iadedi Melquisedec micori fiodaillaruína uinoñedicaí. Naimie uai saiñena jira, jiaimie naimie ifomo jaca inede. Comini facaina Jusiñamui diga ñairainimo naimaci ramona décima facaina cai judíuai cominidi fecauidimaci; ia naie ñairaini fiodaicana jaillana uinoticaí. Naimaci uai sailla jira, jiaíno naimaci ifomo meidouidimaci. ⁹⁻¹⁰ Leví micoridi Abraham jito. Leví micorimona Leví railla nairai comuide. Naimacidi Jusiñamui diga ñairainina jaidimaci. Cominimona décima facaina rana feiñoudimaci. Leví micori nia comuñenia, Melquisedec micorimo Abraham micori décima facaina rana fecajamona,

Abraham micorí Leví ie usumana jira, Melquisedec micorídi Leví nairai baifemo faiana uiñotícaí. Melquisedec micorídi Jusiñamui diga ñairaini baifemo faiana uiñotícaí. Melquisedec isoi Cristo illa jira, Cristodí Leví baifemo faiana uiñotícaí. Cristodí nana naie ñairaini baifemo faiana jiai uiñotícaí.

¹¹ Jusiñamui diga ñairaini finouilla rafuedo Jusiñamui jitailla isoi marebicaiñedícaí. Naimaci finouilla rafuedo cai jillobidícaídēna, jiaie rafuena jitaíñedícaí. Naie rafuedo cai jillobiñēna jira, Jusiñamuidí Cristona orede. Cai facaina Cristo ñairaimana jaillena, naimiēna orede. Caina jillobitallena, naimiēna orede, jiaie rafuedo cai jillobiñēna jira. Jusiñamui Moisés micorímo jaie llua isoi, comíni facaina nano ñairaimadí Aarón micorí. Naimíedi Leví railla nairai imíe. Naimíe jitoníaimona comíni facaina ñairainina itimaci. Iena uiñotomoi. Aarón jitoníaimona Cristo íñede. Aarón maijia rafuemo Cristo duiñede; iadedí Melquisedec rafuemo duide. ¹² Comíni facaina ñairainina jaillana jai meidua jira, Jusiñamuidí naimaci rafuena jiai meidote. ¹³ Iena lloiticue. Aaróndí Leví railla nairaimo duide. Daní Leví nairaidí comíni facaina ñairainidímací. Daní naimacidí comíni facaina Jusiñamuimo rana fecauídímací. Cristo naie nairaimo duiñede. ¹⁴ Cristo jiaie nairaimo duide. Judá nairaimo duide. Judá nairaimona Jusiñamui Jito comuillana uiñotícaí. Naie nairaimona comíni facaina ñairaimana bu jaillana Moisés micorí jaie jaca lloñede.

¹⁵ Cristo billa jira, Moisés micorí lloga rafue meiduana uiñotícaí. Melquisedec micorí illa isoi, comíni facaina ñairaimana Cristo jaca íite. ¹⁶ Moisés micorí lloga rafue isoi, Cristodí ñairaimana jaiñede; iadedí Jusiñamui uaido ñairaimana naimíe jaide. ¹⁷ Jusiñamui lloga uaimona iena uiñotícaí. David micorí naimiēna jaie cuega:

Melquisedec micorí illa isoi, odí comíni facaina ñairaimana jaca íitío cuega. ¹⁸ Comíni facaina ñairaimana jaillena Moisés micorí jaie cuega. Naiemona jilluana comíni oñēna jira, naie uai jai saide. Naiedo jaillamona, naimaci jeacínomona jilloñedímací. Naiedo jaillamona, naimaci comeciaina ocuiñotañedímací. Naiedo jaillamona, naimaci Jusiñamuina nabaiñedímací. ¹⁹ Naiedo jaillamona, Jusiñamui jitailla isoi marebicaiñedícaí. Iedo birui jaiñedícaí. Jiaie rafuemo birui ocuiridícaí. Cristo finoca rafue muidona, Jusiñamuina cai nabaillamona, Jusiñamui diga birui ñairedícaí.

²⁰ Jusiñamui llua jira, Cristo cai facaina ñairaimana jaide. ²¹ Leví micorí jitoníaidí imaci jeiciamona, comíni facaina ñairainina jaidímací. Naga icaiño Jusiñamuidí naimacina ñairainina jaillana fetoñede; iadedí ie lloga uaina jira, Cristo cai facaina ñairaimana jaide. David micorí Jusiñamui llua jaie cuega:

Cue jai llua jira, cue llua finoitícaí.

Cristomo llotícaí: “Comíni facaina ñairaimana jaca íitío”

cuega. ²² Jesús ñairaimana jaca illa jira, naimíe jailla rafue Moisés micorí lloga rafue baifemo uaide. ²³ Moisés micorí lloga rafue anamo ailluena ñairainidí itimaci. Naimaci fiodaicana jailla jira, ailluena ñairaini jitaide, fiodaitíno ifomo meidollena. ²⁴ Naimíe jaca illa jira, Cristo ñairaimana jaca íite. Naimíe ifomo jaca buna meidoñeite. ²⁵ Naimíe jaca illa jira, comíni facaina Jusiñamui diga jaca ñaicabite. Ie jira Cristodí nana Jusiñamui díbeimo iacadínona, naimaci jeacínomona, ua jaca jillotarede. ²⁶ Caina canollena, naimíe isoide nanoca ñairaimana jitaídícaí. Ie Moo isoi naimíedi mareuidímiē. Naimíemo jeacino jaca íñede. Jeacino finouídíno díbeimo naimíe íñede. Jusiñamuidí ie ecimo naimiēna itatate. Ie jira naimíe caina canorede. ²⁷ Jusiñamuimo fecallena, naimaci jeacino facaina naimíe íba oñellena, Moisés micorí llua isoi, nanoca ñairainidí nagarui toiniaina fatímací. Daní naimaci jeacino facaina nagarui íese finodímací. Iemei comíni facaina nagarui íese jiai finodímací. Cristo naimaci isoíñede. Naimíe jitailla jira, comíni jeacino facaina naimíe fiodailla jira, comíni facaina dacaiño fiodaite. Naimaci jeacino facaina naimíe dane fiodaiñeite. ²⁸ Moisés micorí facai ñairainidí jeacínona finocana jaidímací. Fiodaicana jiai jaidímací; iadedí jiaie rafue birui illa jira, ie uaido

Jusiñamuidi ie Jitona ñairaimana jaillana jai fetode. Naimiedi jaca mareuidimie. Jeacino jaca finoñede.

8

Cristo muidona jiaie rafue birui ite

¹ Cristomo ite rafuena lloiticue. Cai facaina ñairaimana birui naimie ite. Illaimana naimie illa jira, monamo Jusiñamui ecimo ite. ² Jusiñamui illanomo naimie illanona, nainomo cai facaina birui ñaicabite. Moisés micori facaise comini finoca jofomo Jusiñamui diga ñauidimaci; ia birui Jusiñamui finoca illanomo Cristo illamona, cai facaina ñaicabite. ³ Moisés micori naga ñairaima jeacino facaina Jusiñamui faga toiniaina fecauillena llote. Cristodi comini jeacino facaina toiniaina fecañede; iadedi naimie jitailla jira, cai jeacino facaina naimie dama fiodaite. ⁴ Moisés micori jaie llua isoi, benomo ite ñairaini faga toiniaina fecauilla jira, eniruemo Cristo nia ia, ñairaimana naimie jainide. ⁵ Comini facaina Jusiñamui diga ñaillena, Moisés micori facaise naie ñairaini Jusiñamui jofomo jaisoidimaci. Iemona Cristo monamo finocabilla rafuena uiñoticaí. Monamo cai facaina Jusiñamui diga Cristo birui ñaicabite. Iemo naimie comecina facajanona, Jusiñamui jofona Moisés micori jaie niacania, Jusiñamui naimiena llofuede: “Monamo iticue; ia cue jofo eniruemo jiaí finoitomoi. Sinai railla anedu navui o ia, ona llofueticue. Ona cue llofua isoi, cue jofona fino” llofuede. ⁶ Eniruemo Cristo birui iñenamona, monamo cai facaina Jusiñamui diga birui ñaicabite. Cristomona cai cacaja rafuedi Moisés micori facaise ñairainimona cai cacaja rafue baifemo faia jira, Cristodi Moisés micori facaise ñairaini baifemo faite. Cristomona cai cacaja rafuedi cai comeciaí marena itatate. Ie jira, bie rafue jiaie rafue baifemo faite. ⁷ Moisés micori facaina rafuedo jaillamona, Jusiñamui jitailla isoi buna marebicaiñede. Ie jira Jusiñamui jiaie rafue illena llote.

⁸ Moisés micori lloga uaina cai jaiagai ñinoñena jira, Jusiñamui jai llote: Naie cominimo jiaie rafuena ico jiairuido lloiticue.

⁹ Naimaci jaiagaimo cue lloga rafuena jaie lloticue.

Naie facaiseconi Egiptomona naimacina canuanona, naimacina atidicue; iadedi Moisés micorimo cue lloga rafuedo jaiñedimaci.

Ie jira naimacina fainonocaidicue.

¹⁰ Naimacimo jiaie rafuena ico jiairuido lloiticue.

Iena naimaci uiñuamona, cuena raise ñnoitimaci.

Naimaci Jusiñamuidicuenta jira, naimaci cuena sedaitimaci.

Cue anamo raise naimaci illa jira, cue comininitimaci.

¹¹ Nana naimaci cuena uiñoitimaci.

Ie jira naimacimo: “Cai Namana omoi ñino” buna niese lloñeite.

Jamai bue isoidinomona cuena ñnoitimaci.

Jamai bue isoiñedynomona cuena jiaí ñnoitimaci.

¹² Naimacina cue duenaillamona, naimaci jeacinona jaca feítaiticue

llote. ¹³ Jiaie rafuena Jusiñamui jai llua, Moisés micorimo lloga rafue jai saillana uiñoticaí. Moisés micori lloga rafue caimo jai duiñede. Cristomona jiaie rafuena birui jai cacadicaí.

9

Hebreos comini Jusiñamui jofona eniruemo jaie nitimaci. Monamo Cristo birui illanona, Jusiñamui ecimo naimie ite

¹ Jusiñamuidi Moisés micorimo diga rafuena jaie llote. Naie rafuemona cai fueollena, iena lloiticue. Naimiena sedajana llote. Naimie sedalle jofo finuana jiaí llote. ² Jusiñamui llua isoi, hebreos comini naie jofona nitimaci. Jedaciede iniroimona finoca jofona

nitimaci. Naie jofu jeraimo mena cuartos ite. Nano fo jailla cuartomo Jusiñamuina nagarui sedadimaci. Nainomo lamparín isoide ra ite. Siete diga naie boadi ite. Mesa jiai ite. Nainomo doce llomenoico joide. ³ Mena cuartos illena iniroina sebiñoga. Naie bai femo iticuartodi Jusiñamui illano. ⁴ Naie iniroi facai oromona finoca mesa ite. Nainomo caimare soride rana jobaisoidimaci. Bai femo iticuartomo cajón ite. Ie emodo oro iena jonega. Cajón jeraimo oromona finoca nogo ite. Nainomo ite maná railla fariñana eruaide guille. Aarón micorí jiguida nainomo jiai ite. Jusiñamui uaido naie jiguida dacaiño llisilla jira, nainomo ite. Jusiñamui cuega nofici ibici jiai ite. ⁵ Cajón emodo ibailabicidi ite. Ie emodomo nagafebei dine oromona finoca mena Jusiñamui jaienici joreño ite. Conimamo fo eruaide. Naie motomo Jusiñamui quenirena baireuide. Naie rafuena raise omoi jai uiñua jira, iena omoimo are lloñeiticue.

⁶ Naie isoide rana finodimaci. Iemei Jusiñamui diga ñairainimona damierie nano fo jailla cuartomo nagarui jaidimaci. Moisés micorí llua isoi, nainomo ite rafuena finollena, iedo jaidimaci. ⁷ Bai femo iticuartomo jaca jainidimaci. Nanoca ñairaima naga año nainomo darui dama jaide. Jurareta faja mei, fo jaillanona, diruena naie cajón ibailabicimo llerede. Dama naimie jeacino facaina diruena nano llerede. Chivo fajanona, dane fo jaide, ie comini jeacino facaina diruena llerellena. Iena finuamona, cominina duenaillamona, Jusiñamui naimaci jeacino facaina ibana oñede. ⁸ Jusiñamui Joreño caina llofuiamona, buena birui uiñoticaí. Naie jofu nia ia, jamai comini fo jainina jira, Jusiñamui diga, cominidi atona nabairinidimaci. ⁹ Bie rafuena birui nia finodimaci. Moisés micorí lloga uaido bu jaia, ie jeacino facaina faga toiniaina Jusiñamuimo fecallena jobaide. Iena finocabidimaci; iadedi Jusiñamui jitailla isoi, naiemona naimaci comeciaina raise finonidimaci. ¹⁰ Jusiñamuina naimaci raise sedallena, Moisés micorí diga guille fimaide. Jiruana jiai fimaide. Naimaci abiaina finollena jiai llote. Nie isoide guille, nie isoide jirulle, niese naimaci abiaí finollena, nana naie isoide rafuedo jaidimaci. Cristo nia biñena facaiseconi iese jaidimaci, naimaci comeciaina raise finobitallena; iadedi Cristo billamona, jiaie rafue birui ite.

¹¹ Moisés micorí finoca jofomo Jusiñamui dine Cristo jaiñede; iadedi Jusiñamui abimo monamo Cristo jai jaide. Nainomo cai facaina Cristodi ñairaimana jai jaide. Ie jira Jusiñamuina jai nabaidicaí. Cai comeciái raise jai finobide. ¹² Naimie fiodailla mei, dane jilluanona, Jusiñamui dine monamo naimie abide jaide. Toiniái diruena Moisés facaise ñairaini fecaja isoi, cai jeacino facaina Jusiñamuimo Cristo naga año fecañede; iadedi dacaiño naimie fiodaillamona, naimie diruedo cai jeacino facaina caina jillotate. ¹³ Maraiñede rafuena finoia, Moisés micorí llogacino anamo itino Jusiñamuina sedallena, naimie jofomo jainidimaci. Moisés micorí jaie llua isoi, toiniái diailla mei, jobaide toiniái ie jusefo oni faianona, Jusiñamui jofomo jairedimaci. Nainomo naimiena sedallena, fo jairedimaci. Iemona Jusiñamui naimacina duere finoñede. ¹⁴ Toiniaina fañeno Jusiñamuina birui sedadicaí. Cristo fiodaicana jira, naimie diaillamona, cai jeacino facaina Jusiñamui caina duere finoñeite. Cristo comeci jitailla jira, Jusiñamui Joreño naimiena oretaja jira, naimie fiodaite. Cristodi Jusiñamui Jitona jira, naimiemo jeacino iñena jira, cai jeacino facaina naimie fiodaillamona, cai comeciaina raise finobitade. ¹⁵ Cristo jai finoca rafue muidona, Cristo monamo jailla jira, jiaie rafue birui ite. Bie rafuedi comini Jusiñamui diga jaca illena llote. Nana Jusiñamuina inotino ie. Moisés micorí lloga uai anamo itinodi jeacina finocana jaidimaci. Naimaci jeacino facaina faga toiniaina Jusiñamuimo jaie fecauidimaci; iadedi Cristo jai fiodailla jira, naimiena bu inoia, naimie jeacino facaina Jusiñamui birui ibana oñeite. Nana Jusiñamuina inotinodi naimie jai llua isoi, naimie diga jaca iitimaci.

¹⁶⁻¹⁸ Jusiñamui jofu jaie finua mei, Moisés micorímo Jusiñamui llote: “Cue lloga rafuena raise finodomoí. Bie jofomo cuena sedallena, faga toiniái dirue diga bie jofona llereca. Nana naiemo ite rana jiai llereca. Iena o finuamona iobiticue. Cue lloga uai finocana

mai o jai” llote. Iese naie rafue jaie tainede. Cristo fiodailla jira, Jusiñamuimona birui jiaie rafue caimo ite. Cristo diailla jira, Cristo fiodaillamona, bie rafue jai tainede. Bie rafuedo cai jaillamona, cai jeacinomona jai jillobidicai. ¹⁹ Ie cominimo nana naimiemo Jusiñamui lloga rafuena Moisés micorì llua mei, faga jurareta dirue diga, faga chivo dirue diga, nana naie lloga rafue cuegabiaina llerede. Cominina jiaie llerede. Naie dirue jinui diga nano faite. Febecode ra jiairede iniroi diga maiga. Iemei naie ra diga naie diruena llerede. ²⁰⁻²¹ Jusiñamui jofona dirue diga llerede. Nana nainomo ite rana jiaie llerede. Llote: “Jusiñamui llua isoi, biena finodicue. Naimie llua jira, bie dirue illa jira, naimie caina duere finoñeite”. ²² Moisés micorìmo Jusiñamui llua isoi, raise finobillena, nana rana dirue diga llerede. Toiniaie fajamona, dirue illa jira, Jusiñamuidi jeacino facaina ibana oñede; iadedi jeacino facaina iba oñellena, jiaie rafuena Moisés micorìmo lloñede.

Cristo fiodailla jira, Jusiñamui cai jeacino oni dotade

²³ Jusiñamuidi Moisés micorìmo toiniaina fajana jaie llote. Naie llua finuamona, Jusiñamui iba oñede. Birui cai jeacino oni dotallena, Jusiñamuidi Cristo fiodaillana jitaide. Cristo fiodaillafue faga toiniaie baifemo faia jira, monamo cai jaca illena, jeacino oni dotallena, Cristo fiodaite. ²⁴ Naimie fiodaillamona, cai facaina ñairaimana Cristo jaide. Cai facaina Jusiñamui diga ñaillena, enirue ite Jusiñamui jofomo jaiñede; iadedi monamo Jusiñamui abimo naimie jaillanona, Jusiñamui diga cai facaina ñaicabite. ²⁵ Dacaiño cai facaina monamo Jusiñamui dine naimie jaide. Moisés micorì facaise nanoca ñairaima Cristo isoñede. Naimie naga año Jusiñamui jofomo fo iticuartomo darui jaide. Naimie dirue uiñede; iadedi toiniaina fajanona, ie diruena uite. ²⁶ Cristo iese itena, nano facaisemona diga icaiño comini jeacino facaina naimie fiodaite. Iese iñena jira, eniruemo birui dacaiño naimie billanona, naimie jitailla jira, naimie dacaiño fiodaite. Jeacino anamo cai iñellena fiodaite. ²⁷ Nana dacaiño fiodaiticai. Iena uiñoticai. Fiodailla mei, Jusiñamui uicomo iiticai. Naimiena cai ñnoia, caina feiñoite. Naimiena ñnoñedinona duere finoite. ²⁸ Dacaiño Cristo jai fiodaillana uiñoticai. Comini jeacino facaina dacaiño jai fiodaite. Naimie dane bia, fiodaillena biñeite; iadedi dane bia, naimiedi ie billemo iocire ocuiritina monamo Jusiñamui illanomo uite.

10

¹ Moisés micorì facaise naie ñairainidi Jusiñamuimo fecallena, toiniaina fajanona uisoidimaci; iadedi Jusiñamui jitailla isoi, naiemona marebicaiñedimaci; iadedi Moisés micorì lloga uaimona jeacino cai finuana uiñoticai. Jusiñamui cai jeacino oni dotajana uiñoticai. Jusiñamui jaca mareuidimiena uiñoticai. Jusiñamuina nabaillena janore uiñoticai. Cristo jiaie rafue caimo jai iga. Naimie fiodailla jira, cai jeacino jai feide. Jusiñamuina raise nabairedicai. ² Naie faga toiniaie Jusiñamuimo fecajamona comini marebicaidena, naiena fecarainidimaci. Naimaci jeacino dacaiño dotaiadedi, faga toiniaina dane fecañedimaci; iadedi naimacimo jeacino jaca illa jira, faga toiniaina fecauidimaci. ³ Naiena fecauillamona, jeacino finocana naimaci nia jaillana uiñotimaci. ⁴ Toiniaie dirue illa jira, Jusiñamuidi comini jeacino jaca feitañede. Dama Jesús dirue illamona, Jusiñamuidi comini jeacino feita. ⁵ Eniruemo jaie billanona, Jusiñamuimo iena Cristo llote: Jeacino facaina toiniaie fajana jai jitañedio.

Ie jira eniruemo comena jaillena, comini jeacino facaina cue fiodaillena, cuena oredio.

⁶ Jeacino facaina ailluena faga toiniaina jai jitañedio.

⁷ Iena cue uiñuamona, eniruemo cue billanona, o jitailla rafuena finoiticue.

O facaina lloraini micoriaie iena jaie cuetimaci

llote. ⁸ Cristo llua dane ñaiticue. Cristodi Jusiñamui Moisés micorìmo llogacino ñaite. Jusiñamui jaie llua isoi, naimiemo cominidi jeacino facaina faga toiniaina jaie fecauidimaci. Iena Jusiñamui birui jai jitañede. ⁹ Cristodi: “Jusiñamui jitailla rafuena

finuaibitícue” lluamona, Moisés micorimo llogacino jai saillana uiñotícaí. Jiaie rafue birui illana jiaí uiñotícaí. ¹⁰ Jusiñamui jitailla jira, Jesucristona orede. Cai facaina naimie fiodaillena naimiena orede Jesucristo ie Moo jitaillacinona finuamona, cai jeacinomona jai jaca jillobidícaí. Jai marebicaidícaí.

¹¹ Nana Moisés micorí llogacínodo jaide ñairainídi nagarui cominí jeacino facaina faga toiniaina Jusiñamuimo fecauidímaci; iadedí naie rafue naimaci finuamona, Jusiñamui naimaci jeacinona feitañede; ¹² iadedí dacaiño Cristo fiodaillamona, Jusiñamuidí nana cai jeacinona feitate. Bene naimie finoacaga rafue fuilla jira, illaímana jira, Jesús Jusiñamui ecímo abído jaide. ¹³ Nana naimie díbeimo íñedinona naimie emodofillemo naimie birui ocuiride. ¹⁴ Dacaiño Cristo fiodaillamona, naimiena cai ñnuamona, Jusiñamuimona jaca marebicaidícaí. ¹⁵ Jusiñamui facaina lloraíma micorí ciegafuemona Jusiñamui Joreño caina iena uiñotade. Naimie facaina lloraíma micorí Jusiñamui lluaña jaie iese cuela:

¹⁶ Hebreos comínimo jiaie rafue íco jiaíruido lloítícue.

Cue rafuena naimaci uiñuamona, cuena raise ñnoítimaci.

¹⁷ Jiaí cuela:

Naimaci jeacino jaca feítaitícue.

¹⁸ Cristo jai fiodailla jira, jeacínona Jusiñamui jai feítaja jira, faga toiniaina naimiemo fecajana dane jai jitaíñede.

Jusiñamuina cai nabailli

¹⁹ Cue amatíai, Jesús fiodailla jira, Jusiñamuina jacíruiñeno birui nabairedícaí. Naimie cai Moo jai illanona, naimie díga meíruiñeno jacíruiñeno birui jiaí ñairedícaí. ²⁰ Moisés micorí facaise nanoca ñairáíma fo itícuartomo jaillena, sebiñoga ñiroi oni díbeimo jaidímaci. Iese Jusiñamui illanomo ridímaci. Jamai cominí nainomo jainidímaci; iadedí Cristo jai fiodailla jira, Jusiñamuina atona birui nana nabairedícaí. Naimie díga birui atona nana ñairedícaí. ²¹ Cristona jai cai ñnua jira, cai facaina nanoca ñairáímana naimie illa jira, ²² cai mare comeciáimona Jusiñamui díga birui cai ñailli. Naimiena eo cai ñnuamona, cai comeciáí jeanillamona, naimie díbeimo cai bautizajamona, naimiena mai cai nabailli. ²³ Cristo caina jilluana ñnotícaí Monamo naimie díga cai illemo ocuiridícaí. Jusiñamui ñnogamiena jira, naie rafuena ñnocana mai cai jailli. ²⁴ Jiaie creyentíímo cai comeciáína cai facaja. Coniní cai isiruitacana cai jailli. Conínimo cai mare rafue finocana cai jailli. ²⁵ Rollena omoímona damíerie oficabíñedímaci. Naimaci isoí omoí íñeno; iadedí Jusiñamuina sedallena oficabí. Abído omoí danomo jaiñellena, coniní comeciáína ocuiñotallena, oficabí. Jesucristo abído billírui íaireí illa jira, naimiena raise ñnollena, coniní omoí comeciáí ocuiñocana mai omoí jai.

²⁶ Cristo finoca rafuena bu uiñua mei, iena naimie ñnoñenia, jeacínona naimie finocana jailla jira, Jusiñamui naimie jeacínona feitañeite. Cristo fiodaillana bu jamaia, Jusiñamui ie jeacínona feitañeite; ²⁷ iadedí Jusiñamuidí naimiena duere finoite. Eo jacírede rafue anamo íite. Iraímo Jusiñamui nana naimie díbeimo íñedinona duere finoite. ²⁸ Moisés micorí jaie cuela: “Jusiñamui llote: ‘Menamie naimiena daje isoí lloillamona, Moisés micorí llogacínona jamaidímiéna dueruíñeno meínega’ ”. ²⁹ Iese duere sefuillana jaie llote; iadedí birui íte lloga rafue bu jitaíñenia, baí duere sefuite. Jusiñamui Jitona bu jitaíñenia, Jusiñamui birui lloga uaina bu jitaíñenia, Cristo fiodaillana bu jamaia, Jusiñamui Joreñoña jeare bu ñaía, Jusiñamuimona naimie eo duere sefuite. Cristo fiodaillamona, Jusiñamui naimiena ñnotímiéna marebicaitarede. Jusiñamui Joreño naimiena duenaite; iadedí iena naimie jai jamaitaia, iena naimie jai jitaíñenia, Jusiñamui naimiena baí duere finoite. ³⁰ Ero, Jusiñamui jaie llote: “Maraiñedícinona bu finoa, íbana oítícue. Cuena ñnoñedinona duere finoitícue” llote. ³¹ Jusiñamui duere finollícino anamo bu ía, eo jacírede rafue anamo jai íte. Naie duere finollícino anamo omoí íñellena, Jusiñamui lloga rafuena jamaiñeno.

³² Creyentiaina nano omoi jaillamo dane comeciaina faca. Creyentiañedinomona eo duere sefuidomoi; iadedi Cristona ñnocana jaidomoi. ³³ Omoimona damierie marefomo navui duere sefuidomoi. Omoiri jaisitimaci. Omoina jifanododimaci. Omoina jeare finodimaci. Damieriena meinetimaci. ³⁴ Cárcelmo jonetinona duenailamona, naimacina canocabidomoi. Cristomo omoi duilla jira, creyentiañedino omoi rana bairodimaci; iadedi omoi comeciai nia iocire itomoi. Omoi ramo omoi comeciaina eo facañedomoi; iadedi Cristomo jai omoi duilla jira, naimie omoi comeciaina jaca marebicaitaja jira, iemo omoi comeciaina facajamona, iocire itomoi. ³⁵ Jusiñamuimona iba ico omoi feiñua jira, Cristona nia ñnocana omoi jai. ³⁶ Jusiñamui jitaillacino omoi finollena, monamo jaca omoi illena, nie isoide ramo omoi jiria, Jusiñamuina nia ñnocana omoi jai. ³⁷ Jusiñamui buena llua jira, iese suite:

Cristo abido billirui iairei illa jira, naimiena ñnocana omoi jai.

³⁸ Naimie nia abido biñenia, omoina cue jai marebicaitaja jira, cuena ñnocana mai omoi jailli;

iadedi cuena jitañedinori iobiñedicue.

³⁹ Naie isoidino jillobiñeitimaci. Naimaci isoi iñedicaí. Jusiñamuina ñnocana cai jaillamona, jaca jillobidicaí. Ie jira naimiena ñnocana mai cai jailli.

11

Jusiñamuina ñnocana jaidicaí

¹ Jusiñamuina cioñedicaí; iadedi naimie illana ñnoticaí. Naimie lloga uaina ñnocana jaidicaí. Naimie lloga uai suillena ñnoticaí. Ie lloga uai suillemo ocuridicaí.

² Cai jaiagaimona damierie iese ñnocana jailla jira, Jusiñamuimona marebicaidimaci.

³ Jusiñamui finoca rana birui ciodicaí; iadedi jaie nano dofoconi jaca buena iñede. Naie facaiseconi dama ie uaido Jusiñamuidi eniruena finode. Mona finode. Nana rana finode. Nana rana comuitate. Iena ñnoticaí.

⁴ Cai jaiagai rafuena ja lloiticue, naiemona cai fueollena. Abel micori Jusiñamuina jaie ñnuamona, naimiemo faga toica llaudana fecade. Ie feiñuamona, Jusiñamui naimieri iobide. Jusiñamuina ie ama Caín raise ñnoñena jira, naimie fecaca rari iobiñede. Iena feiñoñede. Abel micori Jusiñamuina ñnua jira, Jusiñamuimona naimie marebicaide. Abel micori jaie fodaite; iadedi Jusiñamuina cai raise ñnollena, naimiemonia fueoiticaí.

⁵ Enoc Jusiñamuina jaie ñnote. Naimiedi Jusiñamuina eo iobitate. Moisés micori cuegafuiaimona iena uiñoticaí. Jusiñamuina ñnuamona, Jusiñamuina eo iobitaja jira, naimie fioidañede; iadedi fioidañeno monamo Jusiñamui naimiena namiena uite. ⁶ Jusiñamuina cai ñnoñenia, naimiena iobitañedicaí. Jusiñamuina cai nabaiacania, naimiena cai raise sedaacania, naimie illana ñnoticaí. Naimiena cai nabaiacania, cai jitaí raillano, caína canollena ñnoiticaí.

⁷ Noé micori Jusiñamuina jaie jiai ñnote. Jusiñamui ico sülle rafuena naimiemo llote. Enirue buillena llote. Iena ñnuanona, Noé micori aillue balsa emodomo jofona finode. Enirue buillamona ie comini diga jilloiacana jira, Jusiñamui llua isoi, balsana finode. Jusiñamui llua Noé micori ñnua jira, jillode. Noé micori Jusiñamui llua ñnote; iadedi naimie facaise ite comini ñnoñena jira, Jusiñamui riicaillafue anamo itimaci. Jusiñamuina naimie ñnua jira, Jusiñamui uruena naimie jailla jira, Jusiñamuimona Noé micori marebicaide.

⁸ Abraham micori Jusiñamuina jaie jiai ñnote. Ie moo eniruemona naimie jaianillena Jusiñamui naimiemo llote. Are ite eniruemo naimie jaianillena llote. “Jiaie enirue omo iiticaí” Jusiñamui llote. Abraham micori ñnote; iadedi ie jaillinona uiñoñede. ⁹ Jusiñamui lloga eniruemo Jusiñamuina ñnocana jaide. Naie eniruemo ride; iadedi naie enirue naimiemo nia raise duiñede. Chivo itiraimona niga iniroimona sebiñoga jofomo naimie jaca ite. Ie jito, Isaac micori, naie isoide jofomo jiai ite. Isaac micori jito, Jacob micori,

naie isoide jofomo jiaí ite. Jusiñamuidi nana naimacimo daje isoide rafuena llote: “Bie enirue omoímo iitícue” llote. ¹⁰ Abraham micorí mare jofona finoñede, naie eniruemo naimie jaca iacaiñena jira; iadedi Jusiñamui diga monamo jaca illemo naimie ocuiride. Monamo Jusiñamui mare finolle illanomo ocuiride.

¹¹ Abraham micorí aidi Sara micorí. Jusiñamuina Sara micorí ñnua jira, Jusiñamui naiñaiño abina maíritate. Naiñaiño eo jionaide; iadedi uruesite. Naiñaiño Jusiñamui llua isoi, naiñaiño uruesillana ñnote. ¹² Abraham micorí jiaí eo jionaide; iadedi jitona comuitate. Naimie jitomona naimie nairai eo jebuide. Facadonide ucuaí isoi jebuidimaci. Facadonide conillie isoi jebuidimaci. Ailluena ucuaí illa jira, naimaci facadonidicaí. Ailluena conillie illa jira, iena facadonidicaí. Ie isoide. Eo ailluena Abraham micorí uruaí illa jira, naimacina facadonidicaí.

¹³ Abraham micorí, Isaac micorí, Jacob micorí Jusiñamuina ñnocana jaidimaci. Nana naimacimo Jusiñamui lloga uaina suiñedemo fiódaitimaci. Nia fiódaiñenia, Jusiñamui llogacina cacadimaci. Iena ñnotimaci. Ie jira bie eniruemo naimaci jaca illemo comecina facañedimaci; ¹⁴ iadedi monamo jaca illemo comeciaina facadimaci. ¹⁵ Naimaci jaie billa eniruemo comeciaina naimaci facadena, nainomo abido jaidimaci; ¹⁶ iadedi jiaie illanomo comeciaina facadimaci. Jusiñamuina nabaillemo, monamo Jusiñamui diga jaca illemo comeciaina facadimaci. Naimiena naimaci ñnua jira: “Jusiñamuidi caí Moo” naimaci raia, Jusiñamui naimaciri meidaiñede. Ie jira monamo Jusiñamui naimaci illinona jai finode.

¹⁷⁻¹⁸ Jusiñamuina Abraham micorí ñnua jira, ie jitona comuitate. Jusiñamui Abraham micorímo llote: “O jito Isaacmona o nairai eo jebuite” llote. Iemei Jusiñamui Abraham micorína facacite. Abraham micorí naimiena ñnuana raise uiñollena, facacite. “O jitona fano” Abraham micorímo llote. Abraham micorí Jusiñamuina ñnuanona, ie jito faiacade. ¹⁹ Ie jito fiódaillemona, Abraham micorídi Jusiñamui naimiena jilloitallena ñnote. Isaac micorí fiódaiñede; iadedi fajamona jillode.

²⁰ Isaac micorí Jusiñamuina jiaí ñnote. Naimie fiódaiacania, Jusiñamui ie llogacino finollena ñnuamona, mena ie urue iaímaiamo ie uaina fecade. Llote: “Jusiñamui llua isoi, jebuicana jaitomíco”. ²¹ Jacob micorí Jusiñamuina jiaí ñnote. Naimie fiódaiacania, Jusiñamuimo jianona, ie jiguidamo juita naidaidemo, José micorí ie mena urue iaímaiamo marecinona llote. Jusiñamui ie llogacino finollena ñnuanona, llote: “Jusiñamui llua isoi, jebuicana jaitomíco. Naimie omícona canoite” llote. ²² José micorí fiódaiacania, ie comínimo llote: “Jusiñamui omoína canuano, Egiptomona íco jiaíruido omoí jaillena ñnotícue. Omoí jaia, cue illaiciaína omoí diga uiño. Canaán railla eniruemo omoí ria, nainomo cue illaiciaína raino”.

²³ Moisés micorí moo, ie ei diga Jusiñamuina jiaí ñnotiaímaiaí. Hebreos comíni jebuiñellena, naie facaiseconi Egipto illaíma nana hebreos ísaiaína meiniana llote. Iaímaiaí jito jeiciaí mei, iaímaiaí uruena daje amani fívui reidiaímaiaí. Jusiñamuina ñnuanona, naimie maresana eruaila jira, jacíruiño naimiena jofomo fo reide. Illaíma llamona Jusiñamui naimiena jillotajana ñnotiaímaiaí. Ie jira Faraón jisa anamo comuide. Faraónídi Egipto nairai illaíma. ²⁴ Moisés micorí Jusiñamuina ñnote. Naimie eimienamona, naimiedi Faraón jisa ie jitona mamecíreacaiñede; ²⁵ iadedi naimiedi Jusiñamui naimiena ie comínina Egiptomona jillotajana ñnote. Jusiñamui naimie fetua jira, ie comíni díbeimo naimie iacade. Ie comíni diga duere sefuiacade. Jusiñamuina ñnoñedíno diga ie comeci jamai íobitaiacaiñede. ²⁶ Faraón jisa anamo naimie comuilla jira, naimiemo eo aillue rana ite; iadedi Egiptomo ite ebirede ramo ie comecina eo facañede. Jusiñamuimona íba naimie íco feiñoiacana jira, Jusiñamui Jito billemo ie comecina facajano, duere sefuide. ²⁷ Ie jira Egiptomona Moisés micorí Faraóna jacíruiño oni jaide. Jusiñamui naimiena eenuana ñnote. Jusiñamuina cioíñede; iadedi Jusiñamui illana naimie ñnua jira, ñnocana jaide.

²⁸ Jusiñamui ie cominina jillotajana Moisés micori ñnua jira, Jusiñamui llua isoi, pascua railla rafuena finode. Ie cominimo toica llaua fallena llote. Ie dirue nase fuemo jidellena llote. Naie naio Jusiñamui jaienici nana nano doforanina meinesiñellena, Jusiñamui llua finodimaci. ²⁹ Egiptomona naimaci billa mei, jiairede railla monaillai ruica dine jaillena, Jusiñamuina ñnotimaci. Jusiñamui Moisés micorimo llua naimaci ñnuamona, jinui metodo saferedifodo ruica jaidimaci; iadedi Egipto soldaduai daje isoi ruica jaiacadimacimo, nana corobaitimaci.

³⁰ Canaán railla eniruemo hebreos comini rilla mei, Jericó railla nairai dine ridimaci. Jusiñamuina ñnuanona, Jusiñamui llua isoi finodimaci. Siete digarui Jericó ecimo naimaci macarilla mei, Jusiñamui llua isoi, naie llaigafu ana bijide. Naie nairaina emodofidimaci. ³¹ Naie facaiseconi Jericómo Rahab micori fiodaiñede. Naiñaiñodi callirediñaiño. Nana Jericó comini Jusiñamuina ñnoñena jira, fiodaitimaci; iadedi jofue iñenanomo, nia Canaámo hebreos comini riñena facaise, Jusiñamui finoca rafuena naiñaiño fidiano, naiñaiño Jusiñamuina ñnote. Mena hebreos comini iaímaiana naiñaiño feiñua jira, Jericó nairaina emodofilla facaise naiñaiño meineñedimaci.

³² Diga jiaie comini Jusiñamuina ñnocana jaidimaci; iadedi nana naimaci finoca rafuena cue cuellena, abi juanide. Naimacimona damierie mameciaina jamai cueiticue: Gedeón micori, Barac micori, Sansón micori, Jefe micori, David micori, Samuel micori Jusiñamui facaina jaie llorainina jiaie eo cueñeiticue. ³³ Jusiñamui naimacina canuamona, ñnotimaci. Ie jira damierie naimaci bacauaina emodofidimaci. Illaíma isoi jiaíno naimaci cominina raise marena sedadimaci. Jusiñamui llogacino suillana cioidimaci. Leones naimacina riíacanamona damierie jillode. ³⁴ Iraimo usillamona damierie jillodimaci. Lloebi diga meiniamona damierie jillodimaci. Jiaíno jamai bue isoidino; iadedi jamai bue isoiñedinona jaidimaci. Jobaíme raise finuamona, jiaíno imaci bacauai soldaduaína judaisitade. ³⁵ Dañaiñorie riñoniaimona uruai fiodailla mei, fiodaillamona Jusiñamui damieriena jillotate. Illaícominimona jiaíno duere fiodaitimaci. Jusiñamuina fainonocaiacaiñena jira, naimacina meinetimaci. Naimaci fiodaiacania, monamo Jusiñamui diga íco jaca illena naimaci ñnua jira, Jusiñamuina fainonocaiñeno fiodaitimaci. ³⁶ Jiaíno duere sefuidimaci. Naimaciri jaisitimaci. Naimacina jeare ñaitimaci. Rao diga naimacina duere fatimaci. Damieriena maianona, cárcelmo jonetimaci. ³⁷ Damierie nofici diga fairinuamona, meinetimaci. Damierie ramo faitimaci. Meinelena, naimacina serrucho diga denaisite. Damierie lloebi diga meinetimaci. Jiaíno buenidimaci. Naimaci ñniroi jamai igoí ie. Dueredimaci. Naimaci ñniroi raise iñede. Aime guisoidimaci. Jiaie cominimona duere sefuisoidimaci. ³⁸ Jiaie cominimona jamai bue isoidimaci; iadedi Jusiñamuimona jamai bue isoiñedinomaci. Damierie jofonidimaci. Ie jira jamai jai jaicaisoidimaci. Jofue iñenanomo jaidimaci. Eniruemo jamai bita ñnuaidimaci. ³⁹ Jusiñamuina ñnocana jaidimaci. Naimaci finoca rafuemonona Jusiñamui comini naimaci illana uiñoticaí. Jusiñamuina ñnotimaci; iadedi nana naimacimo Jusiñamui lloga rafue naimaci illa facaise suiñede. ⁴⁰ Jusiñamui jitailla jira, naimaci illa facaise nana naimacimo lloga rafue suiñede; iadedi naimie jitailla jira, fiodaillena Cristona jai orede. Ie cominina birui cai jiaí jaillena, Cristona jai orede. Ie jira cai diga danomo monamo Jusiñamuina nabaitimaci. Nana naimie lloga rafue jaca suite.

12

Jesús finoca rafuemo cai comeciaina cai facalli

¹ Cai jaiagai Jusiñamuina ñnocana jaillana uiñoticaí. Ie jira caidi naimaci isoi, Jusiñamuina ñnocana birui mai cai jailli. Marena riire cai aisiacania, ailluena rana abiñedicaí. Ie isoide. Jeacinona cai finoñellena, naimiena raise cai ñnollena, jeacino finuacina mai cai fainonocaiilli. Nie isoide rafue caimo ia, Jusiñamui jitaillacina finocana mai duere cai jailli. ² Jesús finoca rafuemo cai comeciaina cai facalli. Cai jeacino

facaina naimie fiodailla jira, cai comeciaina naimie ocuiñotajanona, Jesúna ñnoticai. Cruzmo marañedimie isoi fiodaite. Fiodaillamona jilluana naimie uiñuamona, naimie fiodaite. Ie Moo ecimo dane illena naimie uiñuamona, iocire fiodaite. Illaimana naimie illamona, ie Moo ecimo birui ite. Jesúmo cai comeciaina facajamona, caimare mai cai jailli. ³ Jusiñamui ðibeimo iñedinomona Jesús eo duere sefuide. Ie isoi cai duere sefuia, Jesúmo cai comeciaina facajamona, cai comeciaina ocuiñotacana mai cai jailli. ⁴ Jusiñamui ðibeimo iñedinomona duere sefuillamona, Jesús isoi duere nia sefuiñedomoi. Omoína nia meineñedimaci. ⁵ Duere omoi sefuia, bie jaie ciegafuiaina feitaño. Naimie cominina omoi illamona, Jusiñamui llote: Cue uruiaí, omoína cue duere finoia, cuena nia ñno. Duere sefuillamona, cuena fañonocaiño. ⁶ Omoína cue isiruillamona, omoína duere finodicue. Cue ðibeimo omoína raise itatallena, omoína duere finodicue. Nana cue cominina cue llofuecabillamona, naimacina duere finodicue llote. ⁷ Naimie jitaillacinona cai finollena, caina duere finode. Ie uruiaína cai illamona, caina duere finode. Ero, nana ie uruiaína isiruillamona, naimaci ie jitaillacinona finollena, naga eniruemo ite moo ie uruiaína duere finocabide. Ie isoide Jusiñamui. Ie jitaillacinona cai finollena, caina duere finocabide. ⁸ Caina ñnotallena, Jusiñamui caina duere finoñenia, naimie comiñedicai. Naimiedi nana ie cominina duere finocabide. ⁹ Cai eniruemo ite cai mootiaí caina duere finoia, naimaci uaina ñnoticai. Ie isoide. Cai Moo Jusiñamui caina isiruillamona, caina duere finoia, naimie uaina cai ñnuua. Naimiena cai ñnuamona, monamo naimie diga ico jaca iiticaí. ¹⁰ Naimaci comeciái llua isoi, cai eniruemo ite mootiaí dallu caina duere finode. Cai Moo Jusiñamui caina llofuellena, caina duere finode. Naimie illa isoi, mare rafue ðibeimo caina itataiacade. ¹¹ Jusiñamuimona duere cai sefuia, iena gaiñedicai. Iena jitañedicai; iadedi naiemona cai fueoia, jecinona dane cai finoñellena, naimie jitailla isoi marecinona finocana jaiticaí.

Jusiñamui rafuena cai cacaiá, iena cai aruiruiñena

¹² Nie isoide ramo caimo jiria: “Jusiñamui caina ñbaí canoñede” raiticaí. Iemona naimiena fañonocaiacadicai; ia iemo cai comeciaina cai facañena. Jusiñamui rafuena cai sefuirua, duere cai sefuia, nie isoide rafue caimo ia, cai comeciaina ocuiñocana mai cai jailli. Jusiñamui caina canuamona, naimiena cai raise ñnuamona, cai comeciái ocuiñocana mai cai jailli. ¹³ Jiaie rafuedo cai jaiñena; iadedi Cristo rafuedo raise ñnocana mai cai jailli. Iese cai jaia, Cristo rafuedo naimaci jiaí raise jaillena, jiaie creyentiaína canoiticaí. ¹⁴ Nana comini diga uri omoi i. Jusiñamui jitailla isoi, marecinona fino. Iese bu iñenia, Jusiñamui jitailla isoi bu marebicaiñenia, Jusiñamui illanomo jaca iñeite. ¹⁵ Jusiñamui caina duenaillamona, nana cominina jillotaiacade. Omoimona buna Jusiñamui duenaillacinona fañonocailana jitañedicue. Omoimo iese suia, iemona conini gaiñenacino comuirede. Iena jitañedicue. Omoi comeciái daje isoi lloillana jitaidicue. ¹⁶ Jearede rafuena jaca finoño. Esaú micori jaie finoca rafuena uiñotomoi. Jusiñamui ie moo Isaac micorimo mare rafuena suillena llote. Esaú nano doforamiena illamona, ie moo fiodaille mei, Jusiñamui jai lloga rafue ie moo uai diga, ie moo ra diga, naimie feiñoiacade. Naimie moo nai fiodaiñena facaise dacaiño Esaú aimetailla jira, ie amamona guillena jicade. Iemei naie guille ifomo ie moomona feiñolle uaina ie amamo fecade. Naie facaise dama ie jitailla ramo comecina facade. ¹⁷ Ie amamo ie uaina fecaja mei, ie comeci iuai meidote. Naie uai naimiemo dane illana abido jitaide; iadedi ie moo ie amamo jai fecade. Esaú eo eede; iadedi ie moo ie uai naimiemo jai fecanide. Jusiñamui lloga rafuemo Esaú comecina facañede. Naimie isoi Jusiñamui rafuena omoi jamaiño.

¹⁸ Moisés micori facaise cai hebreos cominimo Jusiñamui ie rafuena jaie llote. Sinaí railla anedumona llote. Iena cacajanona, naie comini eo jaciruitimaci. Jusiñamui naie anedumo billanona, anedumona irai boode. Jiaí jitibicaide. Nainomo aifi eo

ite. Eo boriuide. Eo gurude. ¹⁹⁻²⁰ Trompeta ficirenana cacadimaci. Iena ciuanona, iena cacajanona, eo jaciruitimaci. Jusiñamui naimacimo jai llote: “Bene cue illa jira, jaca buna bie anedumo biñena. Nainomo bu bia, nie toñiaí nainomo macaria, nofici diga fairinuamona, naimiena omoí meine” llote. Jusiñamui lluaana cacajamona, eo jaciruitimaci. Moisés micorimo: “Jusiñamui caimo nia lluaana jai jitaiñedicai” llotimaci. ²¹ Eo jacirede ra illa jira, nana comini diga Moisés jiai jaciruite. ²² Sinaí anedumona lloga rafuedo birui jaiñedicai; iadedi jiaie rafuedo birui jaidicai. Birui Jusiñamuina atona nabaidicai. Cai hebreos comini isoi, Sión railla anedumo Jerusalémo Jusiñamui jofomo naimiena nabaillena jaiñedicai. Monamo Jusiñamui ite; iadedi birui naimiena atona nabairedicai. Cai fiodaia, naimie dine jaiticai, naimie diga jaca cai illena. Nainomo ie jaienisaí naimiemo iobillacinona fecacabidimaci. ²³ Ailluena comini diga, Cristona birui ñnoticai. Nana caina Jusiñamui fetuanona, cai mameciaí monamo ite rabenicomo jai cueda. Jusiñamui nana comini comeciaina uñnote. Naimiena ñnotinomona ailluena jai fiodaitimaci; ia naimie ecimo naimaci joreñuaí jiai jai itimaci. ²⁴ Jesús fiodailla jira, Jusiñamuina nabairedicai. Naimie fiodailla jira, caimo jiaie rafue birui ite. Naie rafuena cai ñnuamona, cai comeciái jai mareña iticai. Jiai cai jeacinona oni dotade. Iena jiai jai feitate. Abel micorí jaie fiodaia, naiemona Jusiñamui buna ie jeacinona feitañede; iadedi Jusiñamui Abel micorí meinetimiemo ibana ote.

²⁵ Ero, Jusiñamui rafuena omoí cacaia, iena jamaiñeno. Iena aruiruiñeno. Moisés micorí facaiseconi naie comini Jusiñamui lloga rafuena cacadimaci. Jiaíno iena jitaiñedimaci. Iena ñnoñedimaci. Ie jira Jusiñamui naimacina duere finode. Cristomona jiaie rafue birui cacadicaí. Bie rafuedi Moisés lloga rafue baífemo faíte. Jusiñamui duere finollicinomona buna jillobinide. Cai duere sefuiñellena, Cristo rafuena cai ñnua. ²⁶ Moisés micorimo ie rafue llua facaise, Jusiñamui naie eniruena niraídotade. Jusiñamui jiaíruido jiai llote: “Eniruena dane niraídotaiticue. Ucuaina, fívuina, jitoma diga, jiai niraídotaiticue” llote. ²⁷ Naimie lloga uaimona enirue fuillena uñnoticai. Monamo ite ra fuillena jiai uñnoticai. Nana naie rana naimie fuidoite; iadedi naimiena cai ñnua jira, naimie caina fuidoñeite. Ico cai illinona jai finode. Iena naimie fuidoñeite. ²⁸ Illaimana naimie illamona, naimie caina sedaite. Ie jira naimiemo iobillacinona cai fecaja. Naimiena cai ñnuamona, naimiena cai raise sedajamona, naimiena cai iobitaja. ²⁹ Naimiena ñnoñedinona Jusiñamui eo duere finolle jira, naimiena jaciruillanona naimiena cai ñnua.

13

Jusiñamuina cai iobitaja

¹ Dani conini jiaie creyentiaína isiruicana omoí jai. ² Abraham micorí Jusiñamui jaienisaína uññoño jaie nafuete. Jiaie illanomona jiaie creyentiaí bia, naimaci ñillino iñena jira, naimacina nafue. Jusiñamuimona ibana feiñoitomoí. ³ Cristo rafue muidona damerie creyentiaí cárcelmo itimaci. Nainomo omoí jiai itomoidena, naimacina feitañeno. Naimacina isiruillamona cano. Damerie creyentiaí duere sefua, naimacina jiai cano. Jiaíruido naimaci isoi ñibaí duere sefuitomoí. ⁴ Airedimie jiaie riño diga illemo ie comecina facañena. Inirediñaiño jiaie ñima diga illemo ie comecina facañena. Ie aiñede riño diga bu ia, ie ñiñede ñima diga bu ia, maraiñede. Iena finoñoño. Iena bu finoia, ie jeacino Jusiñamuimo lloñenia, Jusiñamui naimiena duere finoite. Naiñaiñoña jiai duere finoite. ⁵ Ailluena ucube ollena, iemo naciñoño. Omoímo ite ra diga caimare i. Iena Jusiñamui facaina lloraíma jaie cueda: “Jusiñamui llote: ‘Omoína jaca canoíticue. Omoína jaca fainonocaiñeíticue’ llote”. ⁶ Naiena cai uñnuamona, cai comeciaina ocuiñoiticaí. Jaie cuedafue isoi lloíticaí:

Cai Nama caina canoite.

Ie jira cai comeciái jarire finoñeíticaí.

Buena jaciruiñeiticai.

Jiaimie buena caina jaciruitanide.

⁷ Cristo rafuena omoimo navui lloganomo omoi comeciaina faca. Naimacimona Cristo rafuena nano cacadomoi. Cristo dibeimo naimaci illamo omoi comeciaina facajanona, naimaci isoi Jesucristona inocana mai omoi jai. ⁸ Naimie jaca inogamiena uiñoticaí. Naimie ie lloga uaina jai jaca finode. Iena birui finode. Ico iena jaca finoite. Ie jira naimiema cai inua. ⁹ Cristo ieñede rafuedo jaiñeno. Diga jiaie llofuiacino ite; iadedi iedo jaiñeno. Jusiñamui caina canuamona, cai comeciaina birui ocuiñocana jaiticaí. Moisés micorimo lloga rafuedo navui jaidicaí. Diga ra fimaide; iadedi naiedo cai jaillamona, cai comeciái raise illena, buena oñedicaí. ¹⁰ Cruzmo Cristo fiodaillamona, cai jeacino facaina fiodaite. Moisés micori lloga rafuedo nia jaidino Cristo rafuemo duiñedimaci. Naie comini facaina ñairaini Cristo rafuemo duiñedimaci. ¹¹ Moisés rafue llua isoi, nanoca ñairaima toiniaina faja mei, naie dirue dacaiño naga año fo iticuartomo uite; iadedi naie toi abi naimaci comini illanomona jino uite. Iena jai jitaiñena jira, nainomo iena jobaide. ¹² Ie isoide. Cristona comini jitaiñena jira, ie comini nairaimona jino uillanona, naimiema meinetimaci. Nainomo jeacino facaina fiodaite, comini comeciaina raise finollena. ¹³ Ie jira Moisés micori lloga rafuena cai faionocaida, dani Jesucristo rafuedo cai jailli. Naimiema jeare finodimaci. Caina jeare finoia, naimiema jaca inocana cai jailli. ¹⁴ Beno jaca cai illemo ocuirinédicaí; iadedi monamo Jusiñamui diga cai jaca illemo ocuiridicaí. ¹⁵ Jesús finoca rafue muidona, Jusiñamuimo iobillacinona jaca cai fecaja. Jusiñamuina cai uiñuamona, naimiemo iobillacinona jaca cai fecaja. ¹⁶ Marecinona finocana mai cai jailli. Jiaie creyente jitai raillano, omoi raruiaimona naimiema omoi cano. Iena omoi finoia, Jusiñamui omoi iobite.

¹⁷ Omoi llofueraini uaina ino. Naimaci anamo raise omoi i. Cristo dibeimo omoina raise itataiacadimaci. Iese naimaci finoacaiñenia, Jusiñamui naimacina duere finoite. Naimaci uaina omoi inoia, Cristo dibeimo caimare maijitimaci. Naimaci uaina omoi inoñenia, sunaitimaci. Sunailla jira, naimaci llofuiacinomona buena oñeitomoi.

¹⁸ Jusiñamui diga omoi ñaia, cai facaina omoi jii. Jusiñamuimona cai comeciái marena illana uiñoticaí. Naimie jitailla isoi, mare rafuena finocana jaiacadicaí. ¹⁹ Omoi dine cue raire illena cue facaina Jusiñamuimo eo omoi jii.

Naimaci marena jaca illana jitaide

²⁰ Jusiñamui conini omoi comeciaina uri itatajana jitaide. Cai Nama Jesús fiodailla mei, Jusiñamui naimiema jai jillotate. Jusiñamui llua isoi, Jesús fiodaite. Naimie fiodailla jira, Jusiñamui cai jeacina feitate. Naimie fiodailla jira, naimie anamo cai illamona, caina raise sedarede. ²¹ Jusiñamui ie jitaillacino omoi finuana canoite. Cristona omoi inuana canoite. Mare rafuena omoi finuana canoite. Jesucristo uaido omoina canoite, naimie jitaillacinona omoi finollena, Jesucristomo iobillacinona cai jaca fecajasa. Iena jitaide.

²² Cue amatiai, bie cartana caimare feiño. Eo are rafuena cueñedicue. Janore cueticue. ²³ Cai ama Timoteo cárcelmona jai jino bite. Cue dine naimie raire bia, omoi dine naimiema atiteticue. ²⁴ Nana omoi llofuerainimo cue uaina oredicue. Ua nana creyentaimo cue uaina oredicue. Itaiamona bitino imaci uaina jiai oredimaci. ²⁵ Jusiñamui omoina jaca duenaillana omoi uiñuana jitaide. Mai. Macaibaite.

SANTIAGO ORETAGA RABE

Uaiduacino

¹ Caĩmaci, omoĩmo cartana oredicue. Santiagodicue. Cue mameci jiaicidi Jacobo. ¿Nĩgacino? ¿Nĩe isoidomoi? Jusiñamui jitailla rafuena cue finuamona, bie rafuena llofuecabiticue. Cai Nama Jesucristo facaina jiai llofuecabiticue. Cai doce nairaiaimo omoi duillamona, omoi jai judaisilla jira, omoĩmo cue uaina oredicue.

Ramo omoi jiriadedi, omoi comeciaina mairita

² Amatiai, diga ie ramo omoi jiriadedi, eo iobilla. ³ Ramo omoi jiriadedi, Jusiñamui uaina raise omoi ĩnuana uĩnoĩtomoi. Iemona omoi comeciai mairillemona, ĩnocana omoi jaitomoi. Biena omoi uĩnua jira, iobilla. ⁴ Mairicana omoi comeciai jaiia, omoi comeciadi marebicaite. Marebicaillamona, omoi comeciaino buena fiebicaiĩeite. Nana Jusiñamui llogacinuaina ja muidomo ĩnoĩtomoi; ⁵ iadedi omoĩmo rafue ia, niese nibaiana omoi uĩnoĩnenia, Jusiñamuimo jica. Ie mei omoĩmo naimiedi abi uĩnoracinona iite. Jusiñamuidi nana naimiemo llotinomo iena caidiĩeno icabilla jira, omoĩmo iena jiai iite; ⁶ iadedi omoi jicaia, uai ĩnuanona jica. Omoi comeciai ĩnoĩnenia, jicaĩeno. Comecina ĩnoĩnedimiedi aifi betaja jorai isoide. Naimie comeci naganomo ite. ⁷ Naimiedi Jusiñamuimona ra feĩnollemo tainona sedaite. ⁸ Naie isoidimiedi nana naimie illa dinori ie comeci naganomo iite.

⁹ Naimie ramo jiriadedi, Jusiñamuimona naimie jamai bue isoĩnenia jira, duerede creyente iobilla; ¹⁰ iadedi ramo jirillamona ie ucubena naimie faifia, Jusiñamuimona naimie ucubedi ieĩnenia jira, ucuberede creyente iobilla. Safia isoi, naimie ico safenaite. ¹¹ Jitoma a ia, eo ecasillamona, safia safenaite. Llriride. Ie mei jai ebinide. Jai iĩede. Ie isoi ucuberedimie safenaite, naimie maijianona. Ie mei naimie ucube bene jamai fiebite; ia Jusiñamui diga naimie jaca illamona, naimie jaca iobite.

Nana mare rafue Jusiñamuimona feĩnoticai

¹² Ramo jiritimiedi ie comeci mairia, caĩmare iite. Jai naimie facacifilla mei, naimie comeci mairilla mei, Jusiñamuidi naimiena caĩmare itataite. Jusiñamui jai llote: “Cuenta isiruitinona cue illanomo jaca itataiticue”. ¹³ O ramo bu faia, lloĩeno: “Jusiñamuidi cuenta ramo faite”. Maraiĩede rafue dibeimo naimie iĩnenia jira, naimiedi buna ramo jaca faĩede. ¹⁴ Cai comecimo naie jitaillacino illa jira, ramo faia uai ĩnoticai. Naie facaiseconi caĩmona ebirena jirari, iena finoacadicai. ¹⁵ Cai jitailla jira, jeacinona finodicai. Jeacinona finocabillanona jaillano, faifiticai. ¹⁶ Ero, cue isiruiga amatiai, Jusiñamui omoĩna ramo faitataĩnenia jira, naimiemono da mare rafue billa jira, dani omoi abina jifueĩeno. ¹⁷ Nana mare rafue cai Moomona feĩnoticai. Naimiedi monamo ite lligaiĩnoraniaina jaie finode. Naie radi nagarui daje isoi lligaiĩnoĩede; iadedi naimie daje isoĩede. Naimie comeci jacanano danoconi nagarui ite. ¹⁸ Naimie jitailla jira, ie uai lluno, naimie caĩna ie uruiaina itatate. Ie uruiaimona nano doforanidicai.

¿Nĩe isoide rafuena finoacadicai?

¹⁹ Cue isiruiga amatiai, Jusiñamui rafuemo raise cacarei. Ie mei naie uaina uaitaĩeno. Jiai raire icirĩeno. ²⁰ Icirillamona, Jusiñamuidi cai marena jitailla isoi, buna jaca marebicaiĩede. ²¹ Ie jira nana maraiĩedicinona oni faĩnonocai. Jusiñamui uai omoi comecimo fecuise abi ĩedoĩeno nagarui feĩnocana omoi jai. Naimie ie uai omoi comecimo jai itatate, iduai enĩruemo cai rilla isoi. Iduai sicuamona, llisilladi ite. Jusiñamui uai cai comeciaino itabillamona, caĩna jillotarede. ²² Cacajamona iena ĩnocana jai. Cacajanona iena omoi ĩnoĩnenia, dani abina jifuetomoi. ²³ Bu naie uaina cacajamona ĩnoĩnenia, naimiedi acaranimo eruaĩdimie isoide. ²⁴ Ie uiecona eruaide. Naimie jailla

meinoconi, ie eruailla ie uiecona jai raire feitade. ²⁵ Jusiñamui llogacinona bu eo facajia, iena feitañede. Iena ñnote. Naie uaidi jearedicino ie finuamona naimiena marena itatate. Jusiñamui uaina naimie feitañena jira, iena ñnua jira, naimie comeci caimare ite.

²⁶ “Jusiñamuina sedadicue” raillanona ie comecina facadimiedi jeare ñaia, maraiño ñaia, dama naimie abina jifuate. Jusiñamuina taino sedade. ²⁷ Cai Moo Jusiñamuina bu marena raise sedaacania, diga rafuena finoite: Naimiedi moonidinona canoite. Feciñuaina canoite, imaci sure illa facaiseconi. Jeacinona jiai finoacaiñeite. Jusiñamui ðibeimo ñnedino isoi iacaiñeite. Jusiñamui naimie iese sedajia, Jusiñamuimona eo mare.

2

Nana cominimo comeciaina lloitaicadicai

¹ Amatiai, cai Nama Jesucristo uai eo ebirede. Naimiena omoi ñnua jira, naimacimo daje isoi comeciai lloillamona, nana cominina daje isoi nafue. ² Ero, omoi roracomo mena ñima bia, ¿nie ñimana nafueitomo? Damie ucuberedimie. Naimiemo oro ie anillos ite. Eo mare ñiroina jitate. ³ Ucuberedimie llotomoi: “Bai bene bancomo rai”. Dueredimie llotomoi: “Bai bene naidai. Raiacania, eniruemo rai”. ⁴ Iese omoi lloia, damiena jai raise nafuetomoi; ia damiena jai raise nafueñedomoi. Iaimaia ñiroimo omoi eruaillamona, nafuetomoi. Mare rafuemo comeciaina facañedomoi.

⁵ Cue isiruiiga amatiai, cacarei. Jusiñamuidi dueredinona fetode. Cominimona dueredimaci; ia Jusiñamuimona duenidimaci, naimiena naimaci eo ñnua illa jira. Naimiena naimaci isiruilla jira, naimie cominina jai jaidimaci. Naie isoidinomo jai llote: “Omoimo cue illanona iiticue”. ⁶ Ero, Jusiñamui dueredinona nafuete; iadedi dueredimiena jai nafueñedomoi. Dueredinomona duere sefuiñedomoi; ia dueredimiena jai duere finodomo. Ucuberedinomona duere sefuicabidomoi; ia ucuberedimiena raise nafuetomoi. Maijitalena, juez ðine ucuberedino omoina uitatimaci, omoina llogidollena. Dueredino iese omoina finoñedimaci; ia ucuberedinodi iena finocabidimaci. ⁷ Cristomo omoi jainaiamona, ucuberedino naimiena jeare jiai ñaitimaci.

⁸ “Cristo llogacino finodicai” raillanomo comeciaina facajamona ucuberedimiena omoi nafueia, cuemona mare. Cristo naiena iese caimo llote: “O jofocimo itinona isirui, dama o abina o isiruilla isoi”. Iese omoi ia, cuemona mare; ⁹ iadedi nana cominina daje isoi omoi nafueñenia, jeacinona jai finodomo. Jai Jusiñamui llogacinona ñnoñedomoi. Jusiñamui llogacinomona jai maraiño itomoi. ¹⁰ Nana Jusiñamui llogacinuaimona daje llogacinona omoi ñnoñenia, Jusiñamuimona nana naie llogacinuaina jai ñnoñedomoi. ¹¹ Jusiñamui caimo jai llote: “O aiñede riño diga ñeno. O ñiñede ñima diga ñeno”. Jiai llote: “Jiaimiena meineño”. O aiñede riño diga ñedio; iadedi jiaimiena o meineia, nana Jusiñamui llogacinuai jai ñnoñedio. ¹² Jiaruido Jusiñamuidi juez isoi omoimo lloite. Omoi comeciaino iticino ðiese omoimo lloite. Ie jira marena ñaino. Marena i. ¹³ Ero, omoimo naimie lloia, jiaie cominina omoi birui duenaiñenia, Jusiñamui naie facaise omoina duenaiñeite. Omoimo riire lloite. Omoina duere finoite; iadedi jiaie cominina birui omoi duenaia, Jusiñamui naie facaise omoina jiai duenaite. Duere sefuillena omoimo lloñeite.

Jusiñamuina cai ñnuamona, diga rafuena cai ñnua

¹⁴ Amatiai, “Jusiñamuina ñnoticue” raitimiedi mare rafuena jaca finoñenia, ¿niese naie ñnoracindi naimiena jillotaite? Jillotañeite. ¹⁵ Jiaie rafuedo iena lloiticue. Omoimona daje creyente ñiroinia, guille ñenia, ¹⁶ naie creyente omoi ðine bia, naimiemo omoi lloia: “Mai jai. Rosiruiño. Marena ailluena guiño”; ia naimiemo jaca buena omoi fecañenia, ¿bue ñellena iese naimiemo raitomoi? ¹⁷ Ero, Jusiñamui omoi ñnuamona mare rafuena omoi finoñenia, omoi ñnoracino ieñede. ¹⁸ Omoimona damie cuemo ñibai lloite: “Jusiñamuina raise ñnoticue”. Jiaimie cuemo ñibai lloite: “Mare rafuena finocabidicue”. Iaimaiaimo lloiticue: “Jusiñamuina cai raise ñnoia, mare rafuena finocabiticai. Mare

rafuena cai finuamona, Jusiñamuina cai raise ñnuana uiñoiticaí”. ¹⁹ Dajede Jusiñamuidi illana ñnotio. Iena o ñnuano, mare; iadedi jananiai iena jiai ñnotimaci. Ie jira Jusiñamuina jaciruitimaci. ²⁰ “Jusiñamuina raise ñnoticue” ñbai nia raitio. Abina raise nia uiñoñedio. Mare rafue o jiai finoñenia, dama abi o ñnoracinodi ieñede. ²¹ ¿Ñiese Jusiñamuimona cai usuma Abraham micoridi marebicaide? Naimiedi mare rafuena finuamona marebicaide. Jusiñamui jitailla rafuena naimie finuamona, faga ocaina isoi, naimiedi Jusiñamuimo ie jitona fecade. Naimie jitodi Isaac micori. ²² Abraham micori ñnote. Mare rafuena jiai finode. Mare rafue naimie finuamona, naimie jai raise ñnote. ²³ Iemona Jusiñamui ie llogacino suide. Iena Moisés micori cuete: “Abraham micori Jusiñamuina ñnote. Ie jira Jusiñamuimona naimie marebicaide”. Jiai cuete: “Naimiedi Jusiñamui nabai”. ²⁴ Abraham micori rafuemona daje rafuena uiñoiticaí. Dama ie ñnoracino diga jaca bu marebicaiñede; iadedi Jusiñamuina ñnuano, mare rafuena finuano, marebicaide. ²⁵ Jiaie rafuedo iena lloiticue. Jai Rahab raillañaiño ite. Naiñaiño callirediñaiño. Mare rafuena finuano, naiñaiñodi Jusiñamuimona marebicaide. Naiñaiñodi ie jofomo Josué ie rafuena uiraimaiaina feiñote. Naiñaiño nairaidi iaimaiaina meinellena jenodimaci. Meineñellena, naiñaiño iaimaiaina reide. Ie mei iaimaiaina bainino oretate. Mare rafuena naiñaiño finuamona, Jusiñamuimona naiñaiño marebicaide. ²⁶ Ero, bumo ie joreño jai iñenia, cajeñede. Ie isoide. Mare rafue bu finoñenia, ie ñnoracinodi ieñede.

3

Cai fuiaimona jeacinodi comuide

¹ Amatiai, omoimona diga comini creyentiaina llofuerainina jaiñeno. Jusiñamuidi juez isoi ico lloite. Llofueraini jiaie comini baifemo uiñuamona, Jusiñamui rafuena naimaci eo raise ñnoñenia, Jusiñamui naimacina jiaino baifemo duere finoite. Iese riire naimacimo llua jaciruillano, llofuerainina ailluena jaiñeno. ² Nana caidi diga maraiñede rafuena finocabidicaí. Maraiñedicinona bu ñaiñenia, jai marebicaide. Naimie nana ie comeci namarede. ³ Jiaie rafuedo iena lloiticue. Caballos cai jitailla rana finollena, imaci fuemo lloemamona finoca janorede rana joneticai. Ie mei nana caballo ie abina namatadicaí. ⁴ Riire aifi aillue botena ñine uiacade; iadedi eo janorede quilla diga, ie jailla ñine piloto botena dataoicaide. ⁵ Ie isoide cai fuiiai. Eo janorede; iadedi cai fuiaimona diga rafuena comuide. Ero, eo janorede iraimona nana rasillaia bootate. ⁶ Cai fuiaidi irai isoide. Caimo jeacinona eo finotate. Nana cai comeciaina jearetatate. Taifemona ie uai ote. Nana cai ille dinori caina jearedicinona finotaicade.

⁷ Nana rana toiredicaí: ocainai, sillini, ofomai, eniruemo biicaidino, lliciai. Nana toiredicaí; ⁸ iadedi jaca bu ie fuena namatanide. Cai fuiiai jaca eo maraiñede. Iemona eo maraiñede rafue icabite. ⁹ Cai fuiiai diga cai Namamo, ua cai Moomo, marecinona lloticaí. Caina naimie finuamona Jusiñamuina eruaidicaí; iadedi cai fuiiai diga naimiena jeare jiai ñaiticaí. ¹⁰ Cai fuedi dajede; iade marecinona ñaiticaí. Maraiñedicinona jiai ñaiticaí. Amatiai, iese cai ñaiñena. ¹¹ Ero, daje pozomona mare jinui, erirede jinui diga, oñedicaí. ¹² Amatiai, higuera railla riaromona aceitunadi comuiñede. Uvas railla riaromona higo railla riaradi jiai comuiñede. Cuerede jinuiomona mare jinui oñedicaí. Cai fuiaimona jeacino comuiñellena, cai fuiaina cai namataja.

Ua abi uiñoracino

¹³ Omoimona, ¿bu ua abi uiñote? Naimie ua abi uiñoia, naimie marena illamona, iena uiñoitomoí. Abi iedoñeno mare rafuena naimie finoia, naimiemo ua abi uiñoracino illana uiñoitomoí; ¹⁴ iadedi naimie abi eo uradoia, dama naimiemo ite ramo comeciaina facaia, naimie abi uiñoracino diga naimie abina iedoñena. Jai tainona llote. Naimie llua isoi iñede. ¹⁵ Naie isoide uiñoracinodi Jusiñamuimona iñede. Bie enirue ie. Comini ie. Taife ie. ¹⁶ Comini abina uradoia, dani naimacimo ite ramo comeciaina naimaci facaia, comini uri iñedimaci. Diga maraiñede rafue naimacimo ite. ¹⁷ Jusiñamuimona ite ua abi uiñoracinodi

mare. Bumo ia, uri ite. Riinide. Comeci jinide. Jiaie cominina duenaite. Mare rafuena finocabide. Cominina raise nafuete. Abi tainona jifueñede. ¹⁸ Bu uri ia, jiaie cominina uri itatate. Ie jira naimie marena iite, Jusiñamui jitailla isoi.

4

¿Bue ñellena uri iñedicaí?

¹ ¿Bue ñellena fuiriruidomoi? ¿Bue ñellena iciriruidomoi? Omoi comeciaino maraiñedicino illa muidona. Omoi comeciaino maraiñeno jitaillacino illa muidona. Naie jitaillacino omoi comeciaino namataacana muidona. ² Rana jitaídomoi. Iena omoi feiñoñena jira, naimaci rana fiñllena, comena meinetomoi. Eo uradoidomoi. Omoi jitaílle rana feiñoñena jira, fuiridomoi. Omoi jitaílle rana Jusiñamuimo omoi jicañena jira, iena feiñoñedomoi. ³ Jiaicaiño Jusiñamuimo jicadomoi; iadedi raise jicañedomoi. Ie jira iena feiñoñedomoi. Dani omoi jitaílla ra feiñollena, omoi comeci jaisillena, jicadomoi. ⁴ Jusiñamuina birui raise jitaíñedomoi; ia naimie dibeimo iñedinona jai jitaídomoi. Bie eniruemo ite rafuena omoi isiruillamona, Jusiñamuina jai raise nabaiñedomoi. ¿Ñiese iena uiñoñedomoi? Bu naie rafuena isiruiacania, Jusiñamui dibeimo jai iacaiñede. ⁵ Jusiñamui cuetatagafuiaina raise facañedomoi. Naiedi caimo llote: “Jusiñamui omoimo jai fecaca Joreñodi omoi comeciina eo raise namataacade”. ⁶ Caina eo duenailla jira, naimie dibeimo cai raise illena, Jusiñamuidi caina eo canoacade. Jusiñamui cuetatagafuiái iena llote: “Jusiñamuidi abi iedotimiena canoñede; iadedi abi iedoñedimiena canode”. Naimie dibeimo iacaiñedimiena ñaite. Naimie dibeimo iacadimiena canuana jai ñaite.

⁷ Ie jira Jusiñamui anamo omoi i. Naimiena raise omoi ñno. Taife uaina jitaíñenanona, naimie uaina oni caiño. Ie mei omoimona naimie oni jaite. ⁸ Jusiñamuina nabaillena, naimie dine iaire omoi i. Ie mei naimie omoi dine iaireno iite. Jeacinona finoraini, omoi comeciái iuaillaina meido. Naganomo omoi comeciaina facañeno. Omoi comeciaina marena fino. ⁹ Maraiñede rafue omoi jai finuamona, omoi sunai. Jaisiñeno, ie ia omoi jeacino facaina omoi mai ee. Caimare iñeno; ia omoi jeacino facaina omoi mai sunai. ¹⁰ Jusiñamui dibeimo abina iedoñeno omoi i. Ie mei naimie omoi comeciaina iobitaite.

Jiaíno jinafomo jeare ñaiñeno

¹¹ Amatiai, maraiñede rafuena naimaci finoiadedi, jiaíno jinafomo jeare ñaiñeno. Creyente jinafomo bu jeare ñaia, creyentena bu jicoia, creyentena naimie isiruiñena jira, Jusiñamui uaina raise ñnoñede. Jusiñamui uaina naimie ñnoñenamona, Jusiñamui uaina jiai jamaiñoacade. ¹² Jusiñamuidi maraiñede rafuena finodimiena duere finoite. Cai jeacinomona caina jillotarede. Cai jeacino facaina caina duere finorede. Ie jira jiaie creyentena jicoñeno.

Ico are caimo suite rafuena uiñoñedicaí

¹³ Jiaie rafuena lloiacadicue. Nibaí llotomoi: “Birui jiaie nairaimo jaiticaí. Birui cai jaiñenia, ico are jaiticaí. Rana fecajamona ucube cai ollena, nainomo daje año iiticaí”. ¹⁴ Iese llotomoi; iadedi ñie isoide rafue ico are illena uiñoñedomoi. Cai ille dinori uillie illa isoi iticaí. Dallu bene iticaí. Ie mei jai iñedicaí. ¹⁵ Ie muidona omoi llua: “Cai Nama jitaia, nia iiticaí. Cai Nama jitaia, ñie isoide rafuena finoiticaí”. ¹⁶ Iena lloñedomoi; iadedi dani omoi comeciaina facajano llotomoi. Iemona eo abina iedotomoi. Abina ieduadi maraiñede. ¹⁷ Mare rafuena finuana uiñotimiedi mare rafuena finoñenia, jeacino jai finode.

5

Ucuberedinomo llucacino

¹ Ucuberedino, daje rafuena omoimo jiaí lloiacadicue. Omoimo ramo jirite. Ja eo duere sefuitomoi. Ie jira cuiiri-cuiiri ee. ² Omoí raruiaí ja sabite. Omoí mare iniroi ja sabite, ibuisaí guilla jira. ³ Omoí ucube ja ieñeite. Ieñena jira, comini omoí faifillana uiñoitimaci. Abina faifitomoi, iraimo ra boa isoi. ⁴ Ero, ailluena ucube irairuillaí iena jai eenotomoi. Naie facaisedí jai ride. Omoí maijiraini maijiamona ucubedi omoimo nia ite. Omoí eniruemo maijidimaci; ia naimacina raise ibañedomoi. Jai eedimaci. Cai nanoca Nama iena cacade. ⁵ Omoí illa dinori ailluena raruiaí omoimo ite. Nana omoí comeciaí jitailla rafuena finodomoi. Omoí comeci jitailla isoi itomoi. Naie iba ollirui jai ride. ⁶ Maredinona duere finodomoi. Nie isoide rafuena omoimo finoñedimaci. Abina riidoñedimaci; iadedí naimacina meinetomoi. Ie jira Jusiñamuimona ja duere sefuitomoi.

Cai Nama billemo fecuise omoí ocuiri

⁷ Amatiai, cai Nama billemo fecuise omoí ocuiri. Cominidi imaci illimona riará feiñuana sedadimaci. Noci deillemo fecuise ocuridimaci. Ie mei riará llisillana otimaci. ⁸ Ie isoi cai Nama billemo fecuise ocuiri. Omoí comeciaí rucaicueriñeno, cai Nama bille iaíre illa jira. ⁹ Duere omoí sefua, Jusiñamui juez isoi omoimo lloi raillano, “Jiaíe creyente muidona duere sefuidicue” raiñeno. Jusiñamui omoí illana raise uiñote. ¹⁰ Amatiai, Jusiñamuina lloraini micoriaimona cai fueua. Cai Nama dibeimo ñaitimaci. Duere sefuidimaci; iadedí eecuiñedimaci. ¹¹ Naimaci Jusiñamuina fainonocaiñena jira: “Naimaci comeciáidi caimare itimaci” raiticai. Job micorina jiaí comeciticai. Naimie jaie ite. Naimie eeñeno duere sefuide. Duere sefuide; ia Jusiñamuina fainonocaiñede. Ie mei ja muidomo nie isoide cai Nama naimiena finuana uiñoticaí. Cai Namadi naimiena duenailla jira, naimiena raise canode. Caina jiaí duenaite. Ie jira caina jiaí canoite.

¹² Cue amatiai, nanoca rafuena nia lloiacadicue. Omoí lloga uai omoí finollena jiaíe comini uiñollena, Jusiñamui mamecina llinotomoi. “Tena cai llinoia, cai lloga uaina cai finoñenia, Jusiñamui caina duere finoite” raitomoi. Omoí lloga uai omoí finollena, Jusiñamui mamecina jamai ebena llinoñeno. Monamo ite ra mamecina jamai ebena llinoñeno. Eniruemo ite ra mamecina jamai ebena llinoñeno; iadedí nie isoide rafuena omoí lluamona, uanaicinona jaca llono. Iese llono, Jusiñamui omoína duere finoí raillano.

¹³ Omoimona duere sefuidimie ia, naimie Jusiñamuimo jicaja. Comeci caimare itimie ia, Jusiñamuimo iobillacinona rua. ¹⁴ Duidimie ia, naimaci naimieri Jusiñamuimo jillena, creyentiaína sedarainína uaidua. Naimacidi farena naimie abimo gía, cai Namamo jianona, naimie ie duicomona jilloillena. ¹⁵ Inuano jüia, jilloite. Cai Nama naimiena jillotaite. Naimie finoca jeacinona oni jiaí dotajite. ¹⁶ Ie jira coninimo omoí marañedicinona llono. Ie mei Jusiñamuimo coninaína omoí jii, omoí duicomona omoí jilloillena. Jusiñamuimo marebicaidimie jüia, diga rafuena finorede. ¹⁷ Elíana comecitomoi. Jaie ite; ia naimiedi cai isoide. Jusiñamuimo jüde, noci deiñellena. Ie mei daje amani fiemona abimo atomonado jaca deiñede. ¹⁸ Ie mei dane jüde, noci deillena. Ie jira noci deide. Ie mei riará dane sícode.

¹⁹ Amatiai, omoimona damiedi Jusiñamui ie uanaicino dibeimona jaia, dane Jusiñamui dibeimo naimiena bu itataia, eo mare. ²⁰ Iena bu finoia, naimiena ie uaiñedicinomona itatate. Faifillemona jai jillotate. Jusiñamuidí naimie jeacinuaina oni dotajamona, iemona jiaí jillotate. Mai. Santiagodicue.

PEDRO NANO ORETAGA RABE

Tuude cominimo Pedrodi cartana cuete

¹ ¿Nigacino? ¿Nie isoidomoi? Bie carta omoimo oredicue. Pedrodicue. Jiaie comini motomo birui itomoi. Ponto railla eniruemo itomoi. Galacia railla eniruemo itomoi. Capadocia railla eniruemo itomoi. Asia railla eniruemo itomoi. Bitinia railla eniruemo itomoi. Diga eniruemo omoi tuua jira, bie rafuena omoimo lloiacadicue. ² Naimie jitaillamona, cai Moo Jusiñamui omoina fetode. Naimie Joreñodi omoimo illamona, omoi comeciaina marebicaitate. Jesucristona omoi inollena, omoi jeacinomona omoi jilloillena, Jusiñamui omoina fetode. Jesucristo fiodailla jira, naimie diailla jira, naimie cominina jaidomoi. Jusiñamui omoina duenaillana uiñocana mai omoi jai. Jusiñamui omoina uri itatajana uiñocana mai omoi jai.

Jesucristo diga jaca cai illemo ocuridicai

³ Naimiedi cai Nama Jesucristo ie Moo illanona, cai Moo Jusiñamuimo iobillacinona cai fecacabillesa. Naimie caina eo dueruillamona, naimiedi cai comeciaina raise finode. Fiodaillamona Jesucristo jillua jira, naimie diga jaca cai illena, inocana cai jaillemo jiai ocuridicai. ⁴ Omoi ocurillafuedi monamo ite. Faiñeitomoi; ia nainomo caimare marena jaca itomoi. Jusiñamui iese omoina itataite. ⁵ Jusiñamuina omoi inua jira, naimie illanomo ico omoi illena, ie uaido naimiedi omoina birui sedade. Ico Cristo bia, iena raise uiñoitomoi. ⁶ Ieri iobidomoi; iadedi dallu diga rafuemonu duere sefuidomoi.

⁷ Jiaie rafuedo iena lloiticue. Ero, ua oro raise omoi uiñollena, orona facacitomoi. Irai emodomo rainajamona, cocuillamona, gajamona, difai oro jai fiebide. Iena “Mare” llotomoi. Oro eo raifide; iadedi jaca inede. Ie isoide. Cristona omoi ua inuana facacillena, diga rafuemonu duere sefuidomoi. Inocana omoi jaillamona, Jesucristo abido bille facaiseconi Jusiñamuidi omoina: “Mare” lloite. Omoi ri eo iobite. ⁸ Jesucristona jaca cioñedomoi; iadedi naimiena jai isiruitomoi. Naimiena jaca cioñedomoi; iadedi naimiena jai inotomoi. Ie jira eo iocire itomoi. ⁹ Cristona omoi inuamona, jeacinomona jai jillobidomoi. ¹⁰ Jusiñamui facaina lloraini micoriaidi Jusiñamui omoina jai duenaillana jaie llotimaci. Jusiñamui omoina jilluana jaie llotimaci. Iena naimiaci raise cacaiñenia, naiemo comeciaina facauidimaci. ¹¹ Cristo Joreño naimacina uiñotajamona, Cristona llotimaci. Cristo duere sefuillena llotimaci. Fiodaillamona naimie jilloillena jiai llotimaci. Monamo naimie abido jaillena llotimaci. Bumo iese ico suillena uiñoiacaidimaci. Naie facaise illemo comeciaina jiai facaidimaci. ¹² Jusiñamuidi naie rafue naimacimo duiñenana uiñotade. Naimacina naie rafue caimo duillana jiai uiñotade. Jusiñamui ie Joreñona monamona naimacimo oretajanona, ie uaido naimiaci llumona, naimie facaina llorainimona bie mare rafuena birui jai cacadomoi. Jusiñamui jaienisaie bie rafuena jiai raise uiñoiacaidimaci; ia cai isoi iena uiñoñedimaci.

Naimie jitaillacinona cai inollena, Jusiñamui caina fetode

¹³ Ie jira omoi comeciaini raise marena fino. Ebena jaiñeno. Jesucristo abido bia, Jusiñamui omoina jai jilloitajana ua raise uiñoitomoi. Iemo iocire ocuri. ¹⁴ Jusiñamuina omoi nia uiñoñena facaise dani omoi comeciaini jitaillu rafuedo jaisoidomoi. Naimiena omoi jai inua jira, naimiena omoi nia uiñoñega facaise finoca rafuedo birui omoi jaiñeno. Mare uruiaini imaci moo uaina inotimaci. Jusiñamui uruiaina omoi jai illa jira, naimie uaina ino. ¹⁵ Jusiñamui ie uruiaina omoi illena, jai omoina fetode. Naimie mareuilla jira, marena omoi i. ¹⁶ Iena naimiedi jaie cuetatate: “Cue mareuidimiena isoi, marena omoi i”.

¹⁷ Cai Moona Jusiñamui illamona, naimiemo birui jidomoi; iadedi juez isoi nagamiemo ico Jusiñamui llua jira, nana omoi ille dinori jaciruicana omoi jai. Nagamiena ie

maraiñede finoca rafue diese duere finoite; ia maraiñede rafuena finoñedimiena duere finoite. ¹⁸ Omoï einamacï rafuedo jaie jaisoidomoï. Naie rafue jamaifue. Naifuemona Jusiñamui omoïna jai jillotate. Ibatajamona omoï jeacinomona jillotañede. Ucubedi raire cueruide. Raire cueruide ra diga omoïna jillotañede; ¹⁹ iadedi Cristo diruedo naimie dacaiño fiodaillamona, omoïna jaca jillotate. Cai comini imaci jeacino facaina mare toica llaudana fauidimaci; ia Cristomo jeacino iñena jira, cai jeacino facaina birui dacaiño fiodaite. ²⁰ Caina jilloitallena, enirue nia iñena facaiseconi Jusiñamui Cristona jaie fetode. Naimiena omoï uiñollena, birui bene eniruemo Jusiñamui naimiena oretate. ²¹ Cristo muidona Jusiñamuina ñnotomoï. Cristo fiodaite; ia iemona Jusiñamui naimiena jillotate. Ie mei monamo ie ecimo naimiena dane itatate. Ie jira Jusiñamuina ñnotomoï. Omoï fiodaia, dane jilloillemo jiai jai ocuiridomoï. ²² Uanaicïnona omoï ñnuamona, omoï comeciï jai jeanidimaci. Ie muidona jiaie creyentiaïna isiruicana omoï jai. Omoï comeciïmona conini omoï isirui. ²³ Jusiñamui cominina jai jaidomoï. Naimie uaido iese jaidomoï. Comini uaido iese jaiñedomoï. Naimie uai jaca fuiñeite. Jaca iite. Naie uaido naimie cominina jaca iiticaï. ²⁴ Jusiñamui facaina lloraima micori iena jaie cuete: Nana cominidi raiticiaï isoidimaci. Safia dallu ebirede; iadedi raiticiaï ie safia diga are iñede. Ie isoide. Diga rafuena finuanona, dallu iticaï. Are iñedicaï; ²⁵ iadedi Jusiñamui uai jaca ite cuete. Naie uaidi mare rafue. Naie rafuena birui jai cacadomoï.

2

¹ Jusiñamui cominina cai illa jira, jiaie cominina gaiñenacinona faïnonocai. Nana jifuiacinona faïnonocai. Abina caitajacinona feita. Nana abi uradoillacinona feita. Jiaie comini joreña ñaiñeno. ² Ero, raise moonaillena, raise ecairellena, janosa monoï ijina jitaide. Ie isoide. Omoï comeciï raise marena illena, Jusiñamui rafuena jitaïdomoï. ³ Cai Nama omoïna duenaillana jai omoï uiñuamona, naimie uaina ñnocana jai.

Cristodi jofomo ite nanoca nofici isoide

⁴ Ie cominina raise omoï illena, Jusiñamui rafuena finocana jai. Naimie omoïna jai fetode. Naimiemo omoï raise duillana jitaide. Iena omoï raise uiñollena, jiaie rafuedo iena lloiticue. Naimiedi jofona niacade isoide. Noficimona niacade. Diga noficina jitaide. Naimie naie noficiïna jai fetode. Nanoca nofici diga naie jofo nillana tainede. Cristodi naie nanoca nofici isoide. Cai nairai Cristona jaie jitaïñedimaci; iadedi Jusiñamuimona naimie maredimiena jira, Jusiñamui naimiena fetode. Caidi jiaie noficiï isoidicaï. Ie jofona nillena isoillena, Jusiñamui caina fetode. ⁵ Naimiena cai jai ñnua jira, naimie cominina jai jaidicaï. Naimie diga jai atona ñairedicaï. Naimie diga jiaie comini facaina jiai ñaicabiticaï. Naimiena cai raise sedallena, Jesucristo caina canuamona, Jusiñamui jitaillacinona finocana jaidicaï. ⁶ Jusiñamui facaina lloraima iena jaie cueda: Ero, Jerusalémo cue jofona nillena, daje noficina fetoiticue. Eo mare noficina fetoiticue. Cue Jitona ñaiticue. Naimiena jai fetodicue. Naimiedi eo mare. Naimiena ñnuamona, comini iobitimaci cueda. ⁷ Naimiena omoï ñnoia, Jusiñamui omoïna iobitaite. Naimiena omoï ñnoñenia, faïfitomoï. Jusiñamui facaina lloraima micori iena jaie cueda: Jofona finoraini jitaïñena noficidi nana naie jofomo ite noficiï baïfemo jai faiga cueda. Ie isoide. Cai nairai Cristona jitaïñede; iadedi Jusiñamui naimieri eo iobide. ⁸ Dane cueda: Naine naimaci macaria, naie noficimona eicaïtaillamona, uaitimaci cueda. Cristona cuete. Cristo uaina naimaci ñnoñena jira, Jusiñamui llua isoi faïfitimaci.

Pedro Jusiñamui fetocanona llofuede

⁹ Jusiñamui jai fetocanodomoí. Naimiemo omoi jai duillamona, naimie diga atona ñairedomoí. Jusiñamui ua cominidomoí. Naimiena omoi nia ñnoñenia, jeacino anamo omoi illa jira, jitiredinomo itomoí isoidomoí. Naiemona omoína jai jillobitade. Naimie anamo jai omoi illamona, useredinomo jai itomoí isoidomoí. Eo mare rafue omoi mo naimie finua jira, iena llocana omoi jai. ¹⁰ Jaie Jusiñamui cominiñedomoí; iadedi birui Jusiñamui cominidomoí. Naimie omoína duenaillana jaie uiñoñedomoí. Birui iena uiñotomoí.

Pedro Jusiñamui jitaillacinona finocana cai jaillana llofute

¹¹ Cue isiruganodomoí. Jusiñamui illanomo omoi birui jainaiailla jira, eniruemo jaca iñeitomoí. Eniruemo jaca omoi iñena jira, jeacinona finocana jaiñeno. Jeacino omoi comeciaina namataacana jira, iena ebiruiñeno, naie anamo omoi i raillano. ¹² Jusiñamuina ñnoñedino motomo omoi illamona, mare rafuena finocana jai. Omoína birui jeare ñaitimaci; iadedi omoi marena illana naimaci uiñuamona, Jusiñamuina ico naimaci ñnoia, naimiemo iobillacinona fecaitimaci. ¹³ Cai Namamo omoi duilla jira, illaicomini anamo raise i. Riaí diga omoi nanoca illaíma uaina ñno. ¹⁴ Naimacina omoi illaicomini fetua jira, omoi gobernadores uaina ñno. Maraiñede rafue omoi finoia, omoína duere finoitimaci; iadedi mare rafuena omoi finoia, omoiri iobitimaci. ¹⁵ Jusiñamuidi mare rafuena omoi finuana jitaide. Iena omoi finua jira, omoína ebena ñaitino uaina llicaitaitomoí. ¹⁶ Jusiñamui anamo cai illamona: “Jaie illaíma uaina ñnoñeiticaí” raiñeiticaí. Cai enirue illaíma uaina cai ñnoñenia, jeacinona finodicaí. Jusiñamui ñibeimo cai illa jira, naimie jitaillacinona finocana cai jailli. ¹⁷ Nana cominimo marena fino. Nana creyentiaina isirui. Jusiñamuina jaciruiocaída ñno. Riaí diga omoi illaíma uaina ñno.

Cristo duere sefuilla rafuemona fueoiticaí

¹⁸ Patrón anamo damierie itomoí. Omoi patrón ocuica uaina ñnocana omoi jai. Omoi patrón marena fecuise ocuica, naimie uaina ñno. Naimie raire iciria, naimie ocuica uaina jiaí ñno. ¹⁹ Maraiñede rafuena omoi finoñenia, omoi patrón omoína duere finoia, Jusiñamuimo omoi comeciaina facajanona, ibana oñeno. Ibana omoi oñenia, Jusiñamuimona mare. ²⁰ Maraiñede rafuena omoi finoia, omoi patrónona duere sefuitomoí; iadedi maraiñede rafuena omoi finoñenia, omoi patrón omoína duere finoia, ibana omoi oñenia, Jusiñamuimona mare. ²¹ Duere omoi sefuia, ibana oñeno. Iese omoi illena, Jusiñamui omoína fetode. Cristo cai facaina ibana oñeno duere sefuide. Naimie isoi cai illena, naimie isoi rafuena finocana cai jailli. ²² Naimiedi maraiñede rafuena jaca finoñede. Tainona jaca lloñede. ²³ Comini naimiena jeare ñaitimaci; iadedi naimiedi uai oñede. Naimie duere sefuide; iadedi: “Omoína ico duere finoiticue” raiñede. Naimiedi Jusiñamui naimacina ico raise duere finollena uiñote. ²⁴ Cruzmo naimie fiodaillamona jeacino anamo cai iñellena, cai jeacino facaina naimie fiodaite. Jusiñamui jitailla isoi naimie fiodaite. Naimie jai duere sefuilla jira, cai jeacinomona jai jillodicaí. ²⁵ Sedañega toica llaudaíai isoi jaie ebena jaisoidicaí. Cai sedaraíma anamo jai iticaí. Naimiedi cai comeciaina jai eenote.

3

Pedroí ñirediñaiñuaina, airedino diga llofute

¹⁻² Ñirediñaiñuái, omoi mo jai lloiacadicue. Omoi iniñiaí uaina ñno. Nibaí birui Cristo rafuena ñnoñedimaci; iadedi omoi marena illamona, Cristo ñibeimo naimacina itataitomoí. Jusiñamui uaina omoi ñnuamona, omoi marena illamona, damierie Cristona ñnoitimaci. ³ Dañaiñorie abina eo finocabidimaci, naiñaiñuaina jiaie comini ebinaillena. Naiñaiñuái ifotiena eo finocabidimaci. Eo raifide rana jítacabidimaci. Eo ebirede raifide ñiroina jítacabidimaci. Naie isoide ra comecina marena itatañede; ia Jusiñamui

jitaillacínodo jaillamona, comeci marena ite. Jiaie comini omoína ebinai raillano, iese omoi iñeno; ⁴ iadedi jiaie comini omoína ebinallena, omoi comeciai marena fino. Omoi iniñiai uaina oñeno. Naimaci jitailla rafuena fino. Omoi comeciai iese ia, Jusiñamuimona eo mare. ⁵ Cai jaiagai facaise Jusiñamuina ñnotiñaiñuai iese itimaci. Cue birui llofua isoi, naiñaiñuai abina jaie finodimaci. Naiñaiñuai iniñiai uaina ñnotimaci. ⁶ Iese Sara micori ie ini Abraham micori uaina ñnote. Ie anamo naiñaiño illa jira, ie ocuica uaina jaca ñnote. Mare rafuena finocana omoi jaia, buena omoi jaciruiñenia, naiñaiño isoi iitomoi. Iemona naiñaiño uruiaina jaitomoi isoitomoi.

⁷ Airedino, omoimo jai lloiacadicue. Omoi ainiaimo comeciaina faca. Cai isoi naiñaiñuai mairiñena jira, naiñaiñuaina isiruillamona, naiñaiñuaina marena raise seda. Jusiñamui omoína duenailamona, naimie cominina jai jaidomoi. Omoína jai jillotate. Omoi ainiaina omoi raise sedañenia, Jusiñamuimo daajena raise jñnidomoi.

Cristo ñibeimo cai illa rafue

⁸ Daje isoi comeciai lloicana jai. Coninina duenai. Naga creyentena isirui. Jiaínona cano. Abina iedoñeno. ⁹ Omoína jiaie comini duere finoia, ibana oñeno. Omoína naimaci jeare ñaia, ibana oñeno; iadedi naimaciri marena ñaíno. Mare rafuena cai finollena, Jusiñamui caina fetode. Iese cai jaia, Jusiñamui ñnena: “Mare” caina raite. ¹⁰ Jusiñamui facaina lloaíma micori iena jaie cuega:

Marena uri jaca bu iacania, jeare ñaiñeno.

Tainona lloñeno.

¹¹ Jearede rafue finuana faínonocai. Mare rafuedo jai.

Omoi ecimo itino ñiga, uri icana omoi jai.

¹² Naimie jitailla rafue omoi finoia, Jusiñamui iena uiñuamona, omoína raise sedade.

Naimie ñiga omoi ñaia, iena cacade;

iadedi marañede rafue bu finoia, Jusiñamui naimie ñiga icirite.

¹³ Mare rafuena omoi finocana jaia: “Marañede rafuena naimaci finua jira, naimacina duere finoiticaí” rainidimaci; ¹⁴ ia mare rafuena omoi finuamona omoi duere sefua, Jusiñamui omoína canoite. Omoína duere finodínona jaciruiñeno. Jarire iñeno; ¹⁵ ia omoi comeciai jitaillamona Cristona seda. Naimiedi cai Nama. “¿Bue ñellena Cristona ñnotomoi?” omoimo bu jicanoia, uaina raise ono. Fecuisse iciriñeno, uaina ono. ¹⁶ Mare rafuena finocana jai. Omoína jiaíno jeare ñaia, mare rafuena omoi finocabillamona meidaitimaci. Omoi marena illamona, tainona naimaci lluaña bairenite. ¹⁷ Mare rafuena omoi finuamona, Jusiñamui jitaillamona omoi duere sefua, dama iese duere sefuitomoi; ia marañede rafuena omoi finuamona omoi duere sefua, omoi muidona. ¹⁸ Cristomo omoi comeciaina faca. Dacaiño cai jecino facaina naimie fiodaite. Naimie mareuidimie; iadedi marañedino facaina fiodaite. Jusiñamui ñibeimo caina itataiacade. Naimiena meinetimaci; iadedi naimie Joreño jaca íte. ¹⁹ Ie Joreñodo naimie jaillanona, jaie fiodaitino imaci joreñuai eenoranomo ie finoca rafuena lluaide. Naimaci ñia fiodañenia, Jusiñamuina jaca ñnoñedimaci; ia Cristo ie finoca rafuena naimaci joreñuaimo lluaide. ²⁰ Jusiñamui rafuena jaie ñnoñedimaci. Noé micori facaise Jusiñamuidi naimaci naimiena ñnuamo fecuisse ocuride. Jñnuimona jillobillena, Noé micori ie balsana finode. Ocho ñigamie jillobidimaci. ²¹ Ie isoide. Omoi bautizaia: “Jusiñamui ñibeimo jai iticaí” llotomoi. “Jecinomona jai jillobidicaí” llotomoi. Omoi abimo ite jearenamona jillobiñedomoi; iadedi omoi comeciai jai marena ite. Fiodaillamona Jesucristo jillua muidona, jillobidicaí. ²² Naimie jillua mei, monamo abido jai jaide. Jusiñamui ecimo naimie illamona, Jusiñamui uai naimiemo ite. Nana Jusiñamui jaienisai naimie anamo jai itimaci. Taifena Jesucristo anafefilla jira, Jesucristo anamo naimie ite; ia naimiena ñia janafefitañede.

4

Jusiñamuimona cai feiñoğa uai diga, naga jiaie creyentena cai canua

¹ Cai isoi naimie illamona, Cristo duere sefuide. Naimie duere sefuide; ia jeacina finoñede. Duere omoi sefuia, naimie illamo omoi comeciaina faca. ² Nana omoi ille dinori comini jitaillacinodo jaiño; iadedi Jusiñamui jitaillacinodo omoi jai. ³ Jusiñamuina uiñoñedinno isoi jaiie bie isoide rafuena finouidomoi: Omoi aiñede riñoñiaia diga isoidomoi. Omoi iniñede iñiaia diga isoidomoi. Jearede rafuena ebiruitomoi. Jifairuidomoi. Jiruana ebiruitomoi. Jusiñamui rairuica jiraraina sedaidomoi. ⁴ Naie isoide rafuena omoi jai finoñenia, Jusiñamuina uiñoñedinodi omoi ri rajicaidimaci. Omoina jeare ñaitimaci. ⁵ Iese itimaci; iadedi Jusiñamui uicomo ico iitimaci. Naimacina duere finoite. Nia fioidañedinona duere finoite. Jai fioidaitinona jiaie duere finoite. ⁶ Naimaci nia fioidañena facaise, Jesucristo rafuena cacadimaci. Jeacino muidona nana fioidaitimaci; iadedi naimaci navui iñoia, naimaci joreñuaia, Jusiñamui isoi, jaca iitimaci. ⁷ Bie enirue raire fuite. Ie jira ebena jaiño. Comeciaina raise faca. Jusiñamuimo raise jillena, iese omoi jai. ⁸ Coninina isiruicana omoi jai. Omoi isiruillacino jiaie rafue baifemo faite. Jiaimie diga nicino ia, naimiena omoi isiruillemona, naicinona raire faitaitomoi. ⁹ Jiaie cominina jafueoicaida feiñoño; ia caimare feiño. ¹⁰ Creyentiaina omoi jailla facaise Jusiñamuimona omoi uaina feiñotomoi. Naimie dibesimo omoi maijillena feiñotomoi. Nagamiemo daje isoide uai iñede. Omoi uai diga, naga jiaie creyentena cano. ¹¹ Cristo rafuena bu llofueia, Jusiñamui naimiemo llua isoi, naimie llofuia. Jiaie creyentena bu canoia, naimiena Jusiñamui canuamona, naimie canua. Jusiñamuina cai iobitallena, nana cai finua rafuemona Jesucristo mamecido iese cai jailla. Illaimana naimie illamona, caina jaca sedade. Naimiemo iobillacinona jaca cai fecacabillasa. Iena jitaidicue.

Cristo dibesimo cai illamona, duere sefuiticai

¹² Cue isiruiganodomoi. Eo duere omoi sefuia, rajicañeno. Creyentiaina omoi jailla jira, duere sefuitomoi. Jusiñamuidi Cristona raise omoi iñuana facacite. ¹³ Cristo jai duere sefuide. Naimie isoi omoi duere sefuia, ieri iobi. Naimie dane bene bia, naimie bairiari eo iobitomoi. ¹⁴ Creyentiaina omoi illamona, omoina bu jeare ñaia, caimare omoi i. Iemona Jusiñamui Joreño omoimo illana uiñoitomoi. Naimie: “Mare” omoina raite. ¹⁵ Jiaiodi cominina meinetimaci. Rana fiidimaci. Marañede rafuena finodimaci. Naimacimo duide rafuena abimo oñeno. Naie isoide rafuena bu finoia, duere sefuite. Iena omoi finoño. Naie isoide rafuena omoi finuamona omoi duere sefuillana jitañedicue. ¹⁶ Creyentiaina omoi illamona omoi duere sefuia, ieri meiruiño; iadedi creyentiaina omoi illamona, iobillacinona Jusiñamuimo feca.

¹⁷ Jeacino facaina Jusiñamuidi comini birui duere finocabide. Jeacino facaina ie cominina nano duere finode. Ie mei naimie cominiñedinona duere finode. Naimie cominina cai illamona, caina janore duere finoite; iadedi naimie cominiñedinona cai baifemo eo duere finoite. ¹⁸ Jusiñamui facaina lloraime micori iena jaiie cueda: “Mareuidinodi niadedi jillobiñeditimacimo, ¿niese comeciaina jearedinodi jillobitimaci? ¿Niese marañedinodi jillobitimaci? Nibaia jaca jillobiñeitimaci” cueda. ¹⁹ Iena omoi uiñuamona, mare rafuedo jai. Jusiñamui jitaillamona duere omoi sefuia, mare rafuedo jai. Jusiñamui caimo finuana omoi uiñuamona, naimie anamo raise i. Naimie omoina raise eenoite. Ie lloga uaina jaca finoite.

5

Pedro creyentiaina nia llofuate

¹ Creyentiaina llofueraini, omoimo rafuena lloiacadicue. Cuedi jiaie llofueraimadicue. Cristo fiodalana ciodicue. Naimie ebire abido bia, jiaie creyentiaia diga iena cioiticue.

Iese cue illamona, omoimo lloiacadicue. ² Omoï anamo ite creyentiaïna raise seda. Naimacina raise llofue. Jiaïmie railla jira, llofueño; iadedi omoï jitailla jira, llofue. Rana ollena llofueño; iadedi iocire llofue. ³ Omoï anamo itinona riire llofueño; iadedi mare rafuedo omoï jaillamona, naimacina llofue. ⁴ Cai creyentiaï nanoca sedaraimadi Cristo. Naimie abido bia, naimiemona ibana feiñoitomoï. Naimie diga jaca iitomoï.

⁵ Conirueni, omoï llofueraini uaina raise ñino. Coninimona abina iedoño. Jusiñamui facaina lloraima micori iese jaie cuega:

Bu abina iedoia, Jusiñamuimona marañede;
iadedi bu abi iedoña, Jusiñamuimona mare.

Jusiñamui naimiena duenaite

cuega. ⁶ Iese illa jira, cai Jusiñamui siñona jira, naimie anamo abina iedoño mai raise omoï i. Iemona naimie jitailliruido omoïna iobitaite. ⁷ Nie isoide rafue ia, Jusiñamui omoïna canocabillana omoï uiñuamona, omoï comeciaï jarire finoño. Naimie omoïna eenoite.

⁸ Ebena jaiño. Jeacino finuamo abina rairui. Taife caina ramo faicabite. Janallari ie rille jenua isoi, Taife omoïna jenocabide. Jeacino omoï finuana jitaide. ⁹ Naimie ra faia uaina ñinoño; ia Cristona ñinocana jai. Omoï duere sefuilla isoi, nana jaie creyentiaï duere sefuidimaci. Iena omoï uiñuamona, omoï comeciaï ocuiñocana jai. ¹⁰ Cai Jusiñamui caina eo duenaite. Cristomo jai cai duilla jira, Jusiñamui illanomo ico jaca iiticaï. Dallu birui duere cai sefuia, Jusiñamui cai comeciaïna raise finoite. Cai comeciaïna raise ocuiñotaite. ¹¹ Illaïmana naimie illamona, caina jaca sedade. Naimie mo iobillacino cai fecacabillasa. Iena jitaidicue.

Naga creyentiaïmo carta oria rafue

¹² Silvanona uiñotomoï. Naimiena bie cartana cuetataticue. Cristomo naimie duilla jira, cue ama isoi naimie ite. Cuemona naimiedi raise ñinogamie. Omoï dine oretallena, janorede cartana cuetataticue. Bie rafuena dane lloiacadicue: Bie rafuedi Jusiñamui ie. Naimie caina duenaillana omoï uiñuamona, bie rafuena ñinocana jai.

¹³ Babiloniamo ite creyentiaï omoï dine imaci uaina oredimaci. Naimacina Jusiñamui jai fetuamona, creyentiaïna jaidimaci. Marcos ie uaina jiaï orede. Cristomo naimie jai duilla jira, naimie cue jitona eruaide. ¹⁴ Conini omoï isiruillamona, nana creyentiaïna eo caimare uaido. Cristomo jai omoï duilla jira, naimie omoï comeciaïna uri itatajana uiñocana mai jai. Macaïbaite. Pedrodicue.

IE EMODOMO PEDRO ORETAGA RABE

Pedro creyentiaimo carta orede

¹ ¿Nigacino? ¿Nie isoidomoi? Bie carta omoimo oredicue. Simón Pedrodicue. Jesucristo díbeimo maijiamona, ie rafuena lloticue. Cuená oretajamona, ie lloga uaina finodicue. Cai isoi jai ñnotomoi. Cai Jusiñamui marena illa jira, Jesucristo marena illa jira, Jesucristo omoína jillotaja jira, jai ñnotomoi. Jusiñamuimona cai isoi omoi illa jira, bie carta omoi díne oredicue. ² Jusiñamuina omoi uiñuamona, cai Nama Jesús omoi uiñuamona, iaímaiaí omoína duenaillana uiñocana jai. Iaímaiaí omoi uri itatajana uiñocana jai.

Creyentiaí marena illa rafue

³ Jesús siñona illamona, bene cai marena illena, naimiedi nana rafue caímo jai iga. Naimiena cai uiñocana jaillamona, caímo ite. Naimie uai ebirede. Naimie jaca mareuidimie. Naimie isoi cai illena, caina jai fetode. ⁴ Naimie iese illamona, eo mare rafuena caímo jai llote. Jiaíe rafue baífemo faíte. Bie rafue muidona jeacinomona jillobidicai. Cai comeciaí jaie jitailla jira, faíficana jaidicai; iadedi naimie rafuena cai ñnuamona, naimie illa isoi, icana jaidicai. ⁵ Jesucristona jai ñnotomoi. Naimiemo omoi duillamona, mare rafuena finocana jai. Jusiñamui jitaillacinona finocana jai. Iemona abina uiñocana jai. ⁶ Jearede rafue finocana jaiñeno; iadedi omoi comeciaina eeno. Iena ocuiñocana jai. Jusiñamuina sedacana jai. ⁷ Jiaíe creyentiaína isiruicana jai. Nana cominina isiruicana jai. ⁸ Naie isoidicinona jitaídomoi. Iedo omoi raise jaia, cai Nama Jesucristona eo raise uiñocana jaitomoi; ⁹ iadedi iedo omoi jaiñenia, abina nia raise uiñoñedomoi. Omoi jeacinomona jai jilluana jiaí jai feítatomoi. Mare rafuena finocana jaillena, omoi jeacinomona jillobidomoi. Iena feitañeno. ¹⁰ Cue amatiaí, naie isoidicinona finocana jai. Iemona Jusiñamui omoína fetuana raise uiñoítomoi. Abido danomo jiaí jaiñeítomoi. ¹¹ Iese omoi jaia, cai Jilloitaraímana naimie illamona, cai Nama Jesucristo ie illanomo omoína eo marena feiñoite. Nainomo naimie anamo jaca íitomoi.

¹² Ie jira bie isoide rafuena díga icaiño omoímo lloticue. Bie rafuena uiñotomoi. Bie rafue uanaicinona jai raise uiñocaidomoi. ¹³⁻¹⁴ Cai Nama Jesucristo cuemo jai llua jira, raíre cue fiódailleña uiñoticue. Nia cue fiódaiñenia, bie rafuena omoímo díga icaiño lloticue. Iese omoímo cue lloia, cuemona mare. ¹⁵ Bie rafue omoi raise nagarui uiñollena, omoína birui canoíticue. Cue fiódaille mei, nagarui bie rafuena omoi feitañenana jitaídicue. Ie muidona bie rafuena jai cueticue.

Pedro Cristona ebirenana jaie ciode

¹⁶ Jamai rafue omoímo lloñedicai. Omoína jifueiacaiñedicai. Cai Nama Jesucristo siñonana lloticai. Naimie abido billena jiaí lloticai. Naimiena ebirenana jaie ciodicai. ¹⁷⁻¹⁸ Eníruemo naimie jaie ia, anedu muidomo naimie díga jaidicai. Jusiñamui nainomo jiaí illa jira, naie illano mare. Naie facaise Jusiñamui llua cacadicaí. Jusiñamui naimiena íobitaíacade. Ebire llote: “Bimie cue isiruiga Jito. Naimieri íobidicue”. Iena jaie cai ciuanona, birui naimie siñonana lloticai. ¹⁹ Naiemona Jusiñamui facaina jaie lloraíni micoriaí lloga rafue suillena jai raise uiñoticai. Naimaci lloga rafuemo omoi comeciaina faca. Lamparín jítiredinomo llígaíñua isoi, naie rafue cai comeciaina uanaicinona uiñotade. Monairaí cuduna cai cioia, íaireí monaílle ua illana uiñoticai. Ie isoide. Cristo dane baíreia, iena raise uiñoíticai. Jusiñamui facaina lloraíni micoriaí rafuena cai uiñuamona, uanaicinona ua uiñoticai. ²⁰ Biena uiñoticai. Dani comeciáimona Jusiñamui facaina lloraíni micoriaídi naimaci lloga uaina llofueñedimaci. ²¹ Dani naimaci comeciaí jamai facajamona naie rafuena oñedimaci; iadedi Jusiñamui Joreño naimacímo illamona, naimacina iena uiñotajamona, Jusiñamui rafuena jino llotimaci.

2

Pedro tainona llofuerañina lloste

¹ Cai jaiagai facaise tainona llofuerañini itimaci. Birui ie isoide. Omoi motomo tainona llofuerañini iitimaci. Jusiñamui rafuena raise llofueñeitimaci; iadedi naie rafuemono omoina itataiacanitimaci. Naimaci facaina Jesucristo fiodaite; iadedi: “Jesucristo cai Nama” raiñeitimaci. Naimaci finolle rafue muidona, raie ebena faifitimaci. ² Naimaci jearede rafuedo ailluena comini jaitimaci. Naimaci muidona, ailluena comini Cristo rafuena jearuitimaci. Cristo rafue uanaicino; ia iese lloñeitimaci. ³ Ucube ollena, naimaci tainona llofuiacinodo omoina jifueiacanitimaci; iadedi Jusiñamui riicaillafue anamo jai itimaci. Jusiñamui naimacina ico duere finoite.

⁴ Naimie ecimo ite jaienisaimona damerie jeacino jaie finua jira, Jusiñamui naimacina jai oni dotade. Naimie riicaillafue anamo naimaci jai illamona, naimacimo ite uai jai iñede. Jitiredinomo jai itimaci. Naimacina duere finoite, nana comini Jusiñamui dine illirui ia. ⁵ Jusiñamui Noé micori facaise ite cominina jaie duere finode. Noé micori Jusiñamui ie mare rafuena naimacimo lloste; iadedi Jusiñamuina ñnoiacaiñeditimaci. Eo noci deitajamona, enirue buillamona, Jusiñamui naimacina duere finode. Naiemona Noé micorina, ie siete comini diga, jillotate. ⁶ Sodoma railla nairai, Gomorra railla nairai diga, Jusiñamuidi bootate. Naimiena naimaci ñnoñena jira, naimacina fuidode. Naiemona naimiena ñnoñedinodi fueua. ⁷ Sodomamona Jusiñamui Lot micorina jillotate. Lot micori maremie. Eo jearede rafuena naie nairai finua jira, Lot micori comeci jarire ite. ⁸ Naimaci motomo naimie illamona, nagarui naimaci maraiñede rafue naimie ciuamona, naimie comeci uri iñede. ⁹ Naimiena jaie ñnoñedinona Jusiñamui jai duere finode; iadedi Jusiñamui naimiena ñnotino ramo faiamona jilloitajana uiñote. Jusiñamui naimiena ñnoñedinon naimie riicaillafue anamo illana jiai uiñote. Ico naimacina duere finoite.

¹⁰ Jearede jitaillacino finocabidinona ua duere finoite. Jusiñamui uaina jamaidinona ua duere finoite. Bie tainona llofuerañini marefodo llofuecabitimaci. Naimaci jitaillacinona llofuecabitimaci. Jusiñamui jaienisaina jaciruiñeno jeare ñaitimaci. ¹¹ Jusiñamui jaienisai uai naimaci bai femo faite; iadedi Jusiñamui illanomo naimaci illamona, bie tainona llofuerañina jeare ñaiñeditimaci. ¹² Ocainaijai abina raise uiñoñena muidona, cai rillena naimacina faticai. Bie tainona llofuerañini ocainaijai isoidimaci. Naimaci raise uiñoñega rafuena jeare ñaitimaci. Ocainaijai faifilla isoi, faifitimaci. ¹³ Jiaie cominina naimaci duere finua dinori duere sefuitimaci. Birui ite rafuena nagarui ebiruitimaci. Danomo omoi guicabia, naimaci illa jira, raise nabairinidomoi. Jearedimaci. Jearede rafuena naimaci ebiruilla jira, raise conini diga nabairinidomoi. ¹⁴ Riñona naimaci cioia, naiñaiño diga eo iacadimaci. Jeacinona finocana jaicabidimaci. Cristona nia raise ñnoñedinona jeacinona finotaiacadimaci. Rana eo nicidotimaci. Jusiñamui naimacina duere finoite. Jaca faifitimaci. ¹⁵ Cristo rafuena faionocaillanona, jiaie rafuedo birui jaidimaci. Balaam micori rafuedo jai jaidimaci. Balaam micori Beor micori jito. Ucube ollena, Balaam micori uanaicinona jaie lloiacaiñede; iadedi jiaie rafuena lollena, jiaie nairai dine jaide. ¹⁶ Naisona naimie jaidemo, ie burra naimie diga ñaite. Jeacino naimie finoñellena, ie burra naimie diga ñaite. Uairico isoi Balaam micori jaiñellena, naimie diga ñaite. Birui bie tainona llofuerañini, Balaam isoi, jiaie rafuedo jaidimaci.

¹⁷ Omoina canoñeditimaci. Jinui iñena pozo isoidimaci. Naiemona buena oñedomoi. Monamo ite uillie isoidimaci. Riire aifi bia, naie uillie oni ñaitade. Bie tainona llofuerañinimona buena oñedomoi. Naimaci comeciai daje isoi lloñeditimaci. Jusiñamui naimacina ico duere finoite. Jusiñamui illanomo naimaci iñenano, jitiredinomo jaca iitimaci. ¹⁸ Jamai ñaia diga abina iedotimaci. Uanañede rafuemono, como Cristomo ñnotinona ramo faitimaci. “Jearede rafue finuana mare” raitimaci. ¹⁹ “Cai jitailla rafuena finoredicai” raitimaci. Iese raitimaci; iadedi jeacino anamo jai itimaci. Jeacino

finocana naimaci jailla jira, ie anamo jai itimaci. ²⁰ Cai Nama Jesucristo. Naimiedi cai Jilloitaraima. Naimiena naimaci jaie inuamona, marañedicino anamona jai jillodimaci; iadedi marañedicinona dane finocana jaidimacina, naie marañedicino anamo dane itimaci. Eo fodo jai jaidimaci. ²¹ Cristo rafuena jaie uiñoñedimaci. Birui iena uiñotimaci; iadedi naie mare rafuedo raise jaiñedimaci. Iena fañonocaillamona, eo jai fodo jaidimaci. ²² Cai comini iena iese llocabitimaci; “Jico cicuia mei, ie cicuiana dane abido guite. Chanchona cai jocua mei, ie jearede illanomo raire abido jaicabide”. Cristo rafuemono danomo abido jaidinodi daje isoidimaci.

3

Pedro cai Nama Cristo dane billena llofuate

¹ Cue isiruiganodomo. Navui jiaie carta omoimo oredicue. Birui dane cueticue. Bie rafuena jai uiñotomoi; iadedi iena omoi ua raise uiñollena, iena dane cueticue. Iemo omoi comeciai raise facajana jitaidicue. ² Jusiñamui facaina jaie lloraini micoriai lloga rafuena jai uiñotomoi. Cai Nama caina oretajanona, ie lloga rafuena omoimo jai lloticai. Naimie muidona jillobidomoi. Bie rafuemo omoi comeciai facajana jitaidicue. ³ Biemo nano omoi comeciaina faca. Cristo nia abido biñenia, Cristo rafuena uaitatino iitimaci. Naimaci jitailla rafuedo jaitimaci. ⁴ Jicanoitimaci: “¿Ñiese Cristo nia abido biñede? Enirue finua facaise mona nana ra daje isoi comucana jaide. Cai mootiai jai fiodaicana jaidimaci. Cristo jaca biñeite”. ⁵ Iese raitimaci; iadedi iese iñede. Jaie suide rafuemo comeciaina facacaiñedimaci. Jusiñamui jaie llumona, ie uaido mona finode. Enirue jiaie finode. Jinuimona iena finuamona, jinuimona eniruedi bairede. ⁶ Jinui diga Jusiñamuidi Noé micori facaise cominina jaie fuidode. ⁷ Jusiñamui mona, enirue diga, ico fuidollena jai llote. Mona, enirue diga, bootaite. Ie jitaillirui Jusiñamui naimiena inoñedinona iese duere finoite. Ie uai jai llote; ia nia suiñede.

⁸ Cue isiruiganodomo. Biena feitaño. Ie lloga uai jaca suite. Cai Namamona daruidi mil años isoide. Naimiemona mil añodi daruibicaide isoide. ⁹ Damierie comeciai facadimaci: “Are suiñena jira, cai Nama ie lloga uaina nibai finoñeite”. Iese cai Nama iñede; iadedi comini naimiena inuana fecuise sedade. Comini imaci uai meidollena sedade. Naimaci faifillana jitañede. Ie muidona nia abido biñede. Ie lloga uai nia suiñede. ¹⁰ Firiraima billa isoi, cai Nama ebena abido biite. Naimie bia, mona eo ficirenamona fuite. Jitoma, fivui diga, ucuai diga, bootajamona, fuite. Enirue, nana benomo ite ra diga, bootaite. ¹¹ Bie rafue suillena uiñotica. Naie cai uiñuamona, Jusiñamui jitailla rafue finocana cai jailla. Naimiena raise cai sedajasa. ¹² Naie facaise billemo iocire cai sedaja. Raire suillena, naimie jitailla rafuena raise fino. Naie facaise Jusiñamui mona bootajamona, iena fuidoite. Jitoma, fivui diga, ucuai diga bootajamona iena fuidoite. ¹³ Naimie jai llua isoi, jiaie mona, jiaie enirue diga illena sedadica. Nainomo Jusiñamui jitailla isoi marena jaca iitica. Nainomo mare rafue finocana jaitica.

¹⁴ Cue isiruiganodomo. Bie rafue nia suiñena jira, naimie abido nia biñena jira, jeacino finoñoeno i. Uri icana omoi i. Iese omoi ia, naimie abido bia, omoina: “Mare” raite. Omoiri iobite. ¹⁵ Raire abido cai Nama biñenia, naimiedi comini naimiena inuamo ocuiride. Iena uiñotica. Cai isiruiga ama Pablo, bie isoide rafue omoimo navui cuete. Cristo naimiena uiñotaga rafue diese cuete. ¹⁶ Nana naimie cartaiamo bie isoide rafuena cuete. Naimie cartaiamo diga rafue ite. Dajerie rafue irirede. Cristo rafuena raise uiñoñedino, Cristona raise inoñedino iena tainonana llofuecabitimaci; iadedi iemona faificana jaidimaci. Jiaie Cristona ciegafuiana tainonana llofuecabitimaci.

¹⁷ Bie rafue birui uiñotomoi. Iena omoi uiñuamona, jearede rafue finocabidino rafuedo jaiño. Abido danomo omoi jaiñellena, iemona abina rairui. ¹⁸ Cai Nama cai duenaillana uiñocana jai. Naimiedi cai Jilloitaraima. Naimiena omoi uiñocana jaillamona, naimiena

nabai. Naimiena birui cai iobitajasa. Naimiena ua jaca cai iobitajasa. Mai. Macaibaite. Pedrodicue.

JUAN NANO FUEÑE ORETAGA RABE

Jusiñamui diga cai jaca illena, Juan cuete

¹ Cue uruiaina omoi isoilla jira, omoimo cartana oredicue. ¿Nie isidomoi? Nano dofoconi itimiena lloiacadicue. Naimiedi Jesucristo. Jiaie llofueoicaigano diga, jaie cai motomo naimie illamona, naimie llofuiana cacadicaí. Naimiena ciodicai. Naimiena jiaí jetadicaí. Caina Jusiñamuina uiñotade. Jusiñamui diga cai jaca illena, jiaí caina llofuate. ² Jusiñamui dinena billanona, iimana jaide. Naimiena jaie raise cai ciua jira, naimie rafuena birui omoimo lloiacadicue. Ie Moo diga nano jaca ite; ia cai dine naimie billamona, naimiena jai ciodicai. ³ Cai ciua rafuena, cai cacaja rafuena, omoimo lloiticue. Jusiñamuina cai diga omoi nabaillena jitaidicue. Jusiñamui Jito Jesucristona, cai diga omoi nabaillena jiaí jitaidicue. ⁴ Omoi comeciaí camareficaillena, omoimo bie rafuena cueticue.

Jusiñamuidi jaca mareuidimiena jira, useredínomo ite isoide

⁵ Jesucristomona cai cacaja rafuena omoimo ja lloiticue. Jusiñamuidi jaca mareuidimiena jira, useredínomo ite isoide. Naimie comecidi jaca jeanina jira, jitiredínomo iñede isoide. ⁶ “Jusiñamuina nabaidicaí” cai raia, iadedi jeacinona finocana cai jaia, tainona lloticaí. Uanaicinodo nia jaiñedicai. ⁷ Jusiñamui jeacino jaca finoñede. Naimie isoi jeacino finoñeno cai jaia, coninina nabaidicaí. Jesucristo fiodaillamona, naimie diaillamona, Jusiñamui cai jeacinona oni dotade. Iena feitate. ⁸ “Caimo jeacino jaca iñede” cai raia, dani cai abina jifueticaí. Uanaicinodo nia jaiñedicai. ⁹ Naimiemo cai finoca jeacino cai lloia, Jusiñamui cai jeacinona dotaite. Nana cai maraiñedicinona dotaite. Naimie ñnogamiena jira, naimie maremiena jira, iese finoite. ¹⁰ “Omoimo ite jeacino” Jusiñamui llote; iadedi: “Jeacino finocabiñedicai” cai raia, “Jusiñamui tainona llote” raiticaí. Iemona naimie uaina jai uaitaticaí.

2

Cai facaina riidotimiedi Cristo

¹ Cue uruiaí isoi cue mamecaomoi. Jeacino finocana omoi jaiñellena, omoimo birui cueticue. Jeacinona omoi finuana jitaiñedicue; ia jeacino bu finoia, Jusiñamuimona naimie facaina riidotimie jai ite. Jesucristo maremiena jira, cai facaina caina riidoite. ² Cai jeacino facaina naimie fiodaite. Iemona Jusiñamui rícaillifue anamona jillobidicaí. Jesucristo cai facaina fiodaite; ia nana comini facaina jiaí fiodaite. ³ Jusiñamui llogacinona cai ñnuamona, naimiena cai uiñuana jai uiñoticaí. ⁴ “Naimiena uiñoticue” raitimiedi ie llogacinuai ñnoñenia, naimiedi tainona lloraima. Uanaicinona uiñoñede; ⁵ ia Jusiñamui llogacinuaina ñnotimiedi Jusiñamuina eo isiruicana jaite. Naimiena cai isiruillamona, naimiena cai nabaillena jai uiñoticaí. ⁶ “Cristona nabaidicue” raitimiedi, Cristo isoi, mare rafuena finoite.

Cristo rafuedo jaidomoi

⁷ Cue isiruiganodomoi. Creyentiaina omoi jailla facaise bie rafuena cacadomoi. Ie jira jiaie rafuena birui omoimo cueñeiticue; ⁸ ia naicinona abido dane lloiticue. Cristo iedo jaide. Iedo jiaí jai jaidomoi. Jeacino anamo omoi jaie illamona, jitiredínomo itomoi isidomoi; ia Cristo rafuena omoi jai uiñuamona, useredínomo jai itomoi isidomoi. ⁹ “Cristo rafuedo jaidicue” raitimiedi jiaie creyentena enoia, Cristo rafuedo nia jaiñede. Jitiredínomo naimie nia ite isoide. ¹⁰ Jiaie creyentena bu isiruia, Cristo rafuedo raise jaide. Iedo naimie jaia, jiamiena jeacinona finotañeite; ¹¹ iadedi jiaie creyentena bu

enoia, jiti redinomo nia ite isoide. Jeacino anamo nia ite. Uisidimie ie jaillinona raise uiñoñena isoi, Jusiñamui dine rillena raise uiñoñede. Ie isoi abina uiñoñede.

¹² Cue uruiaí isoi cue mamecaomoi. Cristo muidona omoi jeacino Jusiñamui jai dotajamona, nana omoimo bie cartana cueticue.

¹³⁻¹⁴ Einamaci, Jusiñamuina are omoi jai ñnuamona, omoimo bie cartana cueticue. Naimie nano dofoconi jaca ite. Conirueni, jeacinona finoñellena omoi comeciaina ocuiñuamona, Jusiñamui uai omoi comeciaino raise itabillamona, marañedimiena omoi jai anafetitaja jira, omoimo bie cartana cueticue. Naimiedi Taife. Uruiaí, Jusiñamui uaina omoi como ñnuamona, omoimo bie cartana cueticue. ¹⁵ Omoi ecimo marañede rafuena ebiruiño. Iena bu eburuia, cai Moo Jusiñamuina isiruiñede. ¹⁶ Cai comeciaino ite marañede jitaillacinodi Jusiñamui ieñede. Cai uisido ebire jaide rafuedi Jusiñamui ieñede. Raruiaí diga, abi ieducinodi Jusiñamui ieñede. ¹⁷ Jusiñamui ieñede rafue jaca fuite. Naie isoide rafuedo jaidinodi jiaí faifitimaci; iadedi Jusiñamui jitaillacinona finodimie Jusiñamui illanomo jaca iite.

Cristona abi caitadino rafue

¹⁸ Cue uruiaí isoidomoi. Jesucristo abido billirui iaírei jai ite. Nanoca Cristona abi caitadimie billena jai fididomoi. Ailluena Cristona abi caitadino birui jai bairedimaci. Iemona Jesucristo abido billirui iaírei illana jai uiñotomoi. ¹⁹ Cai creyentiaí motomo nano itimaci; ia Cristo dibeimo naimaci iñena jira, naimaci llofuiana cai nafueñena jira, cai motomo birui fiebiñedimaci. Caimona naimaci jailla jira, Cristomo naimaci duiñenana jai uiñoticaí. ²⁰ Jesucristomona Jusiñamui Joreño jai omoi feiñua jira, nana omoi Jusiñamui dibeimo ite rafuena jai uiñotomoi. ²¹ Ie jira uanaicinona bu llofueia, iena uiñotomoi. Uanañedicinona bu llofueia, iena jiaí uiñotomoi.

²² Tainona llofuerainina ja cueticue. “Cristo cai jilloitaraimañede” llotinodi taino llofueraini. “Jusiñamuidi cai Mooñede” llotinodi taino llofueraini. “Jesúdi Jusiñamui Jitoñede” llotinodi taino llofueraini. ²³ Cristona ñnoñedinodi Jusiñamuina jiaí ñnoñedimaci. Cristona ñnotino Jusiñamuina jiaí ñnotimaci. Jusiñamui Joreño omoimo illamona, iena jai uiñotomoi. ²⁴ Ie jira creyentiaína omoi jailla facaise omoi cacaja rafuedo ñnocana nia omoi jai. Iedo omoi ñnocana jaia, Jusiñamui Jitona raise nabaitomoi. Jusiñamuina jiaí raise nabaitomoi. ²⁵ Jusiñamui caimo jai llua isoi, naimie diga jaca iiticaí. ²⁶ Omoína damierie jifueiacana jira, bie rafuena jai cueticue. ²⁷ Jusiñamui Joreño jai feiñotomoi. Omoína Jusiñamui rafuena naimie uiñotaja jira, jiaíe rafuena llofuerainina jai jitañedomoi. Jusiñamui Joreño uanaicinona omoína uiñotacabide. Naimie omoína uiñotaja isoi, Cristona nabaicana omoi jai. ²⁸ Cristo ico abido biite. Omoi jacinaiñellena, naimiena omoi meiruiñellena, naimiena birui raise omoi nabai. ²⁹ Jusiñamui mareñiena cai uiñuamona, nana mare rafuena finocabidino naimiemo duillana jiaí uiñoticaí.

3

Juandi Jusiñamui cominina llua rafue

¹ Jusiñamui caina isiruillamona, naimie cominina jai jaidicaí. Iemo omoi comeciaina facajana jitaídicue. Naimiena naimaci uiñoñena jira, Jusiñamuina ñnoñedino cai uiñoga rafuena jiaí raise uiñoñedimaci. ² Ero, birui Jusiñamui cominidicaí. Cristo dane bia, cai illena nia raise uiñoñedicaí; ia naimie illa isoi cai ico illena jai uiñoticaí. Ico naimiena cai cioillemona, iena raise uiñoiticaí. ³ Iemo cai ocuirillamona, naimie marena illa isoi, cai comeciaino marena itataja. ⁴ Jeacinona finocana bu jaia, Jusiñamui llogacinuaina ñnoñede. Jusiñamui llogacinuaina bu ñnoñenia, jeacinona jai finode. ⁵ Jusiñamui dinena Cristo billanona, imana jai jaide. Cai jeacinona oni dotallena, eniruemo naimiedi bite. Naimiemo jeacino jaca iñena jira, jeacino dibeimo naimie jaca iñede. ⁶ Naimiena nabaidimiedi jeacino finocana jaiñede. Jeacinona finocana jaidimiedi Cristona nia raise

cacaiñede. Naimiena nia raise uiñoñede. ⁷ Cue uruiaí isoidomoi. Cristo llua isoi tainona llofueraini birui itimaci. Jeacino finuana rairuiñedimaci. Naimaci omoína jifueñellena, abina rairui. Jesucristo jaca maremie. Mare rafuena finocana cai jaia, naimie isoi mareniticaí; ⁸ ia jeacino finocana bu jaia, Taifemo duide. Nano dofomona Taifedi jeacino finocana jaide. Ie jira Jusiñamui Jito bite, Taife rafuena anafefitallena. ⁹ Naimiemo Jusiñamui uai illamona, Jusiñamui cominina jaidimiedi jai jeacino finocana jaiñede. Jusiñamui cominina jaillamona, jeacino finocana naimie jainide. ¹⁰ Iemona Jusiñamui dibeimo itinona raise uiñoticaí. Taife dibeimo itinona jiaí raise uiñoticaí. Mare rafuena finocana jaiñedimie Jusiñamuimo duiñede. Jiaie creyentena isiruiñedimie Jusiñamuimo jiaí duiñede.

Coninina cai isiruilla rafue

¹¹ Creyentiaína omoi jailla facaise: “Coninina isirui” raillana cacadomoi. Jiaie creyentiaína nia omoi isiruiñenia, Jusiñamuimo nia duiñedomoi. ¹² Caín micorimona cai fueua. Naimie ie amana isiruiñena jira, Taife naimiena ramo faiamona, ie amana meinete. Ie ama Jusiñamui jitailla rafuena finouide; ia Caín micori Jusiñamui jitailla rafuena finoñede. Uradoillamona ie amana meinete. ¹³ Ie isoide. Jusiñamui jitailla rafuena birui cai finuamona, Jusiñamui dibeimo iñedinodi caina enoidimaci. Ieri jacinaiñeno. ¹⁴ Cristona nia cai ñnoñena facaise jeacino anamo cai illa jira, Jusiñamuimona fioidaitino isoidicaí. Jiaie creyentena cai isiruia, Cristomo jai cai duillana jai uiñoticaí; ia jiaie creyentena bu isiruiñenia, jeacino anamo naimie nia ite. ¹⁵ Jiaie creyentena bu enoia, naimiemo ie meinelle uai jai ite. Naie isoidimie Jusiñamuimo nia duiñede. ¹⁶ Cristomona cai fueua. Naimie jitailla jira, cai facaina fiodaite. Iemona jiaie creyentiaína cai isiruillana uiñoticaí. Ie jira naimaci facaina naimaci ramo jiriñellena fioidaiacaniticaí. ¹⁷ Jiaie creyentiaína cai isiruillamona, naimacina canoiticaí. Omoimo ra ia, jiaie creyentemo ra iñenia, naimiena omoi canoñenia, Jusiñamuina raise isiruiñedomoi. ¹⁸ Cue uruiaí isoidomoi. “Jamai uaido jiaie creyentiaína isiruiticaí” cai raiñena; iadedi cai finoca rafuemona naimacina cai canua.

Jusiñamuimo jaciruiñeno jñredicaí

¹⁹ Jiaie creyentiaína isiruicana cai jaia, Jusiñamui cominina cai illana raise uiñoticaí. Jusiñamui muidona cai comeci uri ite. ²⁰ Cai comecimo iticinona uiñoticaí. Siñonamiena jira, Jusiñamui iena jiaí uiñote. ²¹ Cai comecimo jeacino iñenia, Jusiñamuimo jaciruiñeno jñredicaí. ²² Naimie llogacinona cai ñnoia, naimie jitaillacinona cai finoia, naimiemo cai jcaca rafuena birui feiñoticaí. ²³ Naimie Jito Jesucristo cai ñnuana jitaide. Cristo llua isoi, coninina cai isiruillana jiaí jitaide. ²⁴ Naimie llogacinuaina cai ñnoia, naimiena nabaidicaí. Caina jiaí nabaide. Naimie Joreño caimo illamona, naimie caina nabaillana jai uiñoticaí.

4

Juan tainona llofuerainina llua rafue

¹ Omoína isiruiticue. Naga llofueraima uaina ñnoñeno. Ailluena tainona llofueraini birui illa jira, Jusiñamuimona naimaci feiñoga uaina ñica naimacina facaci: ² “Jusiñamui dinena Jesucristo billanona, imana jaide” naimaci lloia, Jusiñamuimona naimaci uaina otimaci; ³ ia “Jusiñamui dinena Jesucristo biñede” naimaci lloia, Jusiñamuimona naimaci uaina oñedimaci. Cristona abina caitadimiemona naimaci uaina otimaci. Naimie billena jai fididomoi. Comini comeciaina feidocana birui jaidimaci. ⁴ Ero, Jusiñamuimo jai cai duillamona, Jusiñamui caimo ite. Taino llofueraini dibeimo omoi jaiñena jira, naimaci llofuiana oñedomoi. Naie taino llofuerainimo Taife ite; ia Jusiñamui Taife baifemo faite. ⁵ Naie tainona llofueraini Jusiñamuina ñnoñedinomo duidimaci. Naimaci ecimo ite rafuena llofuecabitimaci. Jusiñamuina ñnoñedinomo naimaci llofuiana

ebiruitimaci. ⁶ Jusiñamuimo jai duidicai. Jusiñamuina ñnotino cai llofuiana cacaa-cadimaci; ia Jusiñamuina ñnoñedino cai llofuiana cacacaiñedimaci. Iemona Jusiñamui uaina llofuerañina uiñoticaí. Iemona tainona llofuerañina jiaí uiñoticaí.

Jusiñamui caina isiruilla rafue

⁷ Omoína isiruiticue. Coninina cai isiruilla. Jusiñamui caina isiruillamona, caina jiañona isiruitade. Ie isoi isiruitinodi Jusiñamui comini. Jusiñamui rafuena uiñocana jaidimaci. ⁸ Jusiñamuimo cai duillamona, caina jiañona naimie isiruitaja jira, jiañona isiruiñedimiedi Jusiñamui rafuena nia uiñoñede. ⁹ Jusiñamui caina isiruillamona, ie dajede Jito eniruemo orede. Naimie fiodaillamona, Jusiñamui dne jaca iiticaí. Ie finoca rafuemona Jusiñamui caina isiruillana jai uiñoticaí. ¹⁰ Jusiñamuina cai isiruillana ñaiñedicue; ia Jusiñamui caina isiruillana ñaiticue. Cai jeacino facaina fiodaillena, ie Jito eniruemo orede. Iemona cai jeacina feitate. Iemona isiruillana raise uiñoticaí. ¹¹ Caina Jusiñamui isiruilla isoi, coninina cai isiruilla. ¹² Buna Jusiñamuina jaca cioñede; iadedi coninina cai isiruillamona, Jusiñamui caimo illana jai uiñoticaí. Naimiena isiruicana jiaí jaidicai. ¹³ Naimie Joreño caimo itatajamona, naimiena cai nabaillana uiñoticaí. Caina naimie nabaillana jiaí uiñoticaí. ¹⁴ Bie rafuena jiaí uiñoticaí. Jusiñamui ie Jitona eniruemo jaie oretate. Naimiena ñnoñedinona jilloitallena, naimiena oretate. Naimie Jitona cidicai. Ie jira iena birui lloticaí. ¹⁵ “Jusiñamui Jitodi Jesús” llotimiedi Jusiñamuina nabaide. Jusiñamui naimiena jiaí nabaide. ¹⁶ Ie jira Jusiñamui caina isiruillana uiñoticaí. Caina jiañona naimie isiruitade. Iedo cai jaillamona, caina nabaide. Naimiena jiaí nabaidicai. ¹⁷ Iemona Jusiñamuina isiruicana jaiticaí. Naimie uicomo ico nana cai ille facaise naimiena jaciruiñeiticai. Jusiñamui Jitona Cristo illanona, Jusiñamui cominina cai jiaí illanona, naimiena birui jaciruiñedicai. ¹⁸ Jusiñamuina cai isiruia, naimiena jaciruiñedicai. Eo raise naimiena cai isiruia, ¿niese naimiena jaciruiticaí? Naimiena cai jacirua, naimie caina duere finuana jaciruiticaí. Jusiñamuina jaciruitimiedi Jusiñamuina nia raise isiruiñede. ¹⁹ Nano Jusiñamui caina isiruilla jira, caidi naimiena isiruiticaí. ²⁰ “Jusiñamuina isiruiticue” raitimiedi jiaie creyentena enoia, jai taino llote. Creyentena cide; ia naimiena isiruiñede. Jusiñamuina cioñede. ¿Niese ie cioñenamiena isiruite? ²¹ Jusiñamui iena caimo jai llote: “Cuenta isiruitimie jiaie creyentena jiaí isiruite”. Ie jira coninina isirui.

5

Taife ie rafuena anafefitaticai

¹ Jusiñamuimona Jesús billana cai ñnoia, Jesús cai Jilloitarañmana cai ñnoia, Jusiñamui cominina jaidicai. Jusiñamuina cai isiruia, nana naimie cominina jiaí isiruiticaí. ² Jusiñamuina cai raise isiruia, naimie llogacinuaina cai ñnoia, naimie cominina jiaí isiruiticaí. ³ Jusiñamuina cai isiruia, naimie llogacinuaina jiaí jai ñnoticaí. Naimie uai raise ñnuamona, iena finollena sefuiruiñedicai. ⁴ Jusiñamui dibeimo itinodi Taife ie rafuena anafefitaticai. Cristona cai ñnuamona, Taife ie rafuena anafefitaticai. ⁵ Jesúsdi Jusiñamui Jitonana cai ñnuamona, Taife rafuena anafefitaticai.

Jesucristodi Jusiñamui Jito

⁶ Jesucristona dane ñaiticue. Naimiedi Jusiñamui Jitona ñnoticaí. Naimie bautizamona, naimie fiodaillamona naimiedi Jusiñamui Jitonana uiñoticaí. ⁷ Uanaicinona naimie uiñuamona, Jesucristo bautizaja facaise Jusiñamui Joreño caina iena jiaí uiñotade. ⁸ Jusiñamui Joreñomona, Jesús bautizamona, Jesús fiodaillamona, Jesúsdi Jusiñamui Jitonana raise uiñoticaí. ⁹ Jesús bautizaja facaise “Jesúdi cue Jito” Jusiñamui caimo llote. Jesúsna comini lloia, iena feiñoticaí. Comini llua baifemo Jusiñamui llua faia jira, Jusiñamui llua jiaí ua feiñoticaí. ¹⁰ Jesúsdi Jusiñamui Jitonana cai ñnuamona, cai comeciaí daje isoi lloide; ia Jusiñamui ie Jitona llua ñnoñedinodi: “Jusiñamui taino llote” raitimaci.

11 Biena ñaiticue. Jusiñamui naimie diga caina jaca itataiacade. Naimie Jitona cai ñinuamona, iese caina jai itatate. 12 Jusiñamui Jitona ñnotino Jusiñamui diga jaca iitimaci; ia naimiena ñnoñedino Jusiñamui diga jaca iñeitimaci.

Jusiñamui caina raise uiñote

13 Jusiñamui diga ico omoi jaca illena omoi raise uiñollena, bie cartana jai cueticue. 14 Jusiñamuina cai ñinuamona, naimiena jai jaciruiñedicaí. Naimiemo cai jñia, naimie jitailla isoide rafuena cai jicaia, naimie caina cacajana raise uiñoticaí. 15 Iese cai jñia, naimie jaca fairiuana jiaí uiñoticaí. 16 Jiaie creyente jeacino finuana omoi cioia, naimie facaina Jusiñamuimo jñi. Iemona Jusiñamui ñibeimo naimiena dane itataitomoi. Jusiñamui rafuena jamaidimie facaina omoi jñiana lloñedicue. Naimie faificana jaiacade. 17 Jusiñamui llogacinona bu ñnoñenia, jeacino jai finode; ia naimie facaina omoi jñia, Jusiñamui iena feitaitaite. Faificana jaiacadimie facaina omoi jñiana lloñedicue. 18 Jusiñamui comini jeacinona finocana jaiñedimaci. Naiemona Cristo caina eenote. Ie jira Taife caina duere finonide. 19 Jusiñamuimo jai duidicaí. Naimie anamo jai iticaí; ia naimiena ñnoñedino Taife anamo jai itimaci. 20 Jusiñamui Jito jaie eniruemo billana uiñoticaí. Iemona caina nanoca Jusiñamuina uiñotade. Naimiena cai ñinuamona, nanoca Jusiñamuimo jai duidicaí. Jesucristomo jiaí jai duidicaí. Ie jira Jusiñamui diga ico jaca iiticaí. 21 Cue uruiaí isoidomoi. Daje rafuena nia lloiticue. Jiraraímona abina rairui. Jusiñamui ieñede rafuedo omoi jaiñeno. Mai. Juandicue.

JUAN IE EMODOMO ORETAGA RABE

Uanaicinona coninina cai isiruilla

¹ Juandicue. Creyentiaina sedaraimadicue. Ñoo, ¿nie isoidio? Cue uaina o dine oredicue. O uruiaimo cue uaina jiai oredicue. Jusiñamui ona jai fetuamona, Cristo ie uanaicinona cue uiñua jira, omoina isiruiticue. Nana naie uanaicinona uiñotinodi omoina isiruitimaci. ² Naie uanaicinona cai uiñua jira, omoina isiruiticai. Iena uiñocana jaca jaiticai. ³ Cai Moo Jusiñamui ie Jito Jesucristo diga, caina jaca duenaite. Iaimaiaia caina jaca uri itataite. Uanaicinona cai uiñuamona, iaimaiaiaina cai isiruillamona, iese iiticai.

⁴ Caïmo cai Moo llua isoi, uanaicinodo o uruiaimona dajerie jailla jira, iobidicue. ⁵ Ñoo, daje rafue omo lloiacadicue. Bie rafuena navui uiñotio. Cristo rafuena nano cai ñinoia, bie rafuena uiñoticai. Coninina cai isiruillana ñaiticue. ⁶ Iena ñaiacadicue. Coninina cai isiruillanona, Jusiñamui llogacinona ñinocana jaidicai. Cristona nano omoi ñinoia, Jusiñamui lluacinona cacadomoi. Coninina cai isiruillana cacadomoi.

Diga taino lloraini ite

⁷ Diga taino lloraini illa jira, iena ñaiticue. Jesucristo monamona jai billanona, ñimana jaiñenana llofuecabitimaci. Bu iese llofueia, cominina jifuate. Naimiedi Cristona abi caitadimie. ⁸ Cristo rafuedo omoi jailla jira, Jusiñamuimona buena omoi faifiñellena, omoi abina rairui. Jusiñamuimona ibana feiñoitomoi. ⁹ Cristo llogacinona bu faionocaia, Cristo rafuedo bu jaiñenia, Jusiñamuina ua uiñoñede; iadedi Cristo rafuedo bu jaia, cai Moo Jusiñamuina uiñote. Ie Jitona jiai uiñote. ¹⁰ O jofomo Cristo rafuedo jaiñedimie bia, Cristo rafuena cue llofuia isoi naimie llofueñenia, naimiena nafueño. “Jusiñamui ona canuamona, marena o jai” lloño. ¹¹ “Marena jai” o lloia, naimie marañede rafue facaina jai itio.

Rafuena nia lloiacade

¹² Diga rafue ite omoimo cuellena; iadedi aillue cartana cueñeiticue. Omoi dine raire cue illemo ocuridicue. Danomo cai rillamona ñaiticai, cai comeciaia caimarecaillena. ¹³ O dine o euiño uruiaidi imaci uaina oredimaci. Naiñaiñodi Jusiñamui fetocañaiño. Mai. Juandicue.

JUAN IE EMO DOMO JIAIE ORETAGA RABE

Gayo mare rafue finocana jaide

¹ Juandicue. Creyentiaina sedaraimadicue. Gayo, bie carta o dine oredicue. ¿Nie isoidio? Cristo ie uanaicinona coco uñua jira, ona isiruiticue. ² Cue isiruigamiedio. Nana o finua rafue marena jaillana jitaidicue. O ecairenana jiai jitaidicue. O começi marena illana jai uñotícue. ³ Cue dine dajerie creyentiai bite. Uanaicínodo omoi jaillana llote. Cristo rafuedo omoi jaillana llote. Ie jira iobidicue. ⁴ Uanaicínodo omoi jailla jira, eo iobidicue. Cue muidona Cristona omoi ñnua jira, cue uruiaidomoi isoidomoi. Uanaicínodo omoi jailla jira, eo iobidicue. ⁵ Cue isiruigamiedio. Naga icaiño jiaie creyentiaina o canoia, eo mare. Nia o uññoñega creyentiai o illanomo ria, naimacina o canoia, ua eo mare. ⁶ Naie isoide creyentiaina o isiruillana jiai fididicue. Rollena creyentiai ofia, ona marena ñaitimaci. Naimaci jaillinomo naimaci jaia, naimacina o canoia, Jusiñamui jitailla isoi, ua eo mare. ⁷ Naimie rafue llua muidona, jai macaritimaci. Jusiñamuina uññoñedinomona jaca buena feññoñedinomona. ⁸ Creyentiaina cai illa jira, naimacina cai canua. Naimacina cai canua jira, uanaicinona llocana jaidicai.

Diótfes marañede

⁹ O dine ite creyentiaimo cartana jai oredicue. Diótfesna janore ñaiacadicue. Naimiedi eo uicoidimie. Naimiedi cue uaina uññoiacañede. ¹⁰ O dine cue ria, naimie finoca rafuena omoi lloiticue. Cuenajeare ñaite. Jiaie illanomona bite creyentiaina feññoiacañede. Naimaci feñnuana rairuide. Roracomo naimaci bia, naimacina jino dotade.

¹¹ Jeacino finoraini isoi omoi iñeno; iadedi marecinona finoraini isoi omoi i. Marecino finocabidimiedi Jusiñamui ie. Jeacino finocabidimiedi Jusiñamuina ua uññoñede.

Demetrio marena ite

¹² Nana creyentiaidi Demetriona marena ñaitimaci. Uanaicínodo naimie jaide. Iese naimiena jiai ñaiticai. Cai llucínodi uanaicinona uññoño.

Rafuena nia lloiacade

¹³ Diga rafuena cueiacadicue; iadedi cueñeiticue. ¹⁴ Raie ona cue cioillemo ocuiridicue. Ie mei ñaiticoco. ¹⁵ Uri o i. Cue dine ite o nabaiñiaidi uaina omo oredimaci. O dine ite cue nabaiñiaimo cue uaina oredicue. Mai. Juandicue.

JUDAS ORETAGA RABE

Judadi Jusiñamui fetocanomo cartana orede

¹ Cue nabaiñiaí, bie carta omoi dine oredicue. ¿Ñie isoidomoi? Judadícue. Ie rafuena lollena, Jesucristo díbeimo jai maijidícue. Jacobo cue ama. Jusiñamui omoína jai fetuana cue uiñuamona, bie cartana oredicue. Cai Moo Jusiñamui omoína isiruite. Jeacinona omoi finoí raillano, Jesucristo omoína jai sedade. ² Jusiñamui omoína eo duenailana omoi uiñocana omoi jaillana jitaídícue. Naimie omoi comeciaina raise uri itatajana omoi uiñocana omoi jaillana jitaídícue. Naimie omoína eo isiruillana omoi uiñocana omoi jaillana jitaídícue.

Tainocinona llofueraini ite

³ Cue isiruigano, omoímo Jusiñamui caina jai jillotaja rafuena iocire cueiacadícue; iadedí jiaíe rafue birui illa jira, omoímo cueticue. Jusiñamuimona cai feiñoga rafuena omoi eo riiduana jitaídícue. Naie rafuena Cristo oretaganomona cacadicaí. Naie rafuena meidonidicaí. Ieconi duide. Jusiñamui jiaíe rafuena lloñeite. ⁴ Caimo ite rafuena omoi eo riiduana jitaídícue. Cai creyentiaí motomo dajerie tainocinona llofueraini illa jira, iena jitaídícue. Uanaicínona llofuecana naimaci illamo cai comeciaina facadicaí; iadedí Jusiñamui jitaillacínona finoñedimaci. “Jusiñamui caina duenailamona, jeacino finocana cai jaia, cai jeacínona oni dotaite” llofuecabitimaci. “Cai jeacino facaina caina duere finoñeite” llofuecabitimaci. “Jeacino finocana cai jaiacania, caimona mare” llofuecabitimaci. “Jesucristo cai Namana” llofueñedimaci. Naimie lloga rafuedo jaiacaiñedimaci.

“Naimaci isoidínona duere finoíticue” Jusiñamui jaie llote. Naimie duere sefuillacino anamo jai itimaci.

⁵ Iemona omoi raise fueollena, bie rafuemo omoi comeciaina faca. Bie rafuena navui llofueticaí. Iena raise cacadomoi; iadedí iena dane uibiño. Iena lloíticue. Ero, bie eníruemo naimaci billena, Egiptomona Jusiñamui cai jaiagaina bitatate. Naimiena naimaci ñnoñena jira, bie eníruemo riñedimaci; iadedí Jusiñamuidí jofue iñenanomo naimaci fiodaillena llote. Iemona naimaci fiodaitimaci. Ie isoide. Naimiena birui omoi ñnoñenia, omoína duere finoite. ⁶ Ero, bie rafuemona omoi fueua. Jusiñamui ecímo ite jaienisaimona dajerie imaci illanona jaie jitaíñedimaci. Naimie isoi iacadimaci. Naimaci illano naimie ecímo jaie itimaci. Naimaci jitailla rafuena naimaci finollena, naimie ecímo illana faínonocaidimaci. Iemona naimie naimacina jai oni dotade. Naimie illanomo dane iñeitimaci. Naimacimo ite uai jai iñede. Naimie riícaillafue anamo jai itimaci. Naimie dine nana comíni illírui ia, naimacina duere finoite. Naimacimona omoi fueua. Jeacínona Jusiñamui díbeimo itíno finoía, Jusiñamui naimacina duere finoite. ⁷ Ero, bie rafuemona omoi fueua. Sodoma railla nairai micoriaí maraiñedicínona jaie eo finouidimaci. Gomorra railla nairai micoriaí daje isoidimaci. Nainomo ianorí ite nairai daje isoidimaci. Naimaci aiñede riñoniaí díga itimaci. Naiñaiñuái iniñede iñiaí díga itimaci. Coninina aífiedotimaci. Iemona Jusiñamui naimacina jaie duere finode. Nana naimaci illanona raise jaie jobaitate. Naimacimona omoi fueua. Jusiñamui nana jeacínona finodínona duere finoite.

⁸ Naie tainocinona llofueraini daje isoidimaci. Nicaírillaufuedo jaillamona, ebena jaidimaci. Naimaci abímo jearede rafuena finodimaci. Jusiñamui uaina jamaidimaci. Jusiñamui jaienisaina jeare ñaitimaci. ⁹ Miguelna mamecírede jaienicí isoi iñedimaci. Miguel Jusiñamui nanoca jaienicí. Moisés micorí fiodailla mei, Miguel Moisés micorí abina raíacade. Taife díga Moisés micorí abina uaitate. Taife Moisés micorí abina bairoacade. Miguel iena jiaí jitaide. Miguel Taife díga riire ñaite; iadedí Taifena jeare

ñaiñede. Miguel ie comecina facañede: “Cuemo ite uai Taifena oni oretallena”; iadedi naimiemo llote: “Jusiñamui ona duere finoite”. ¹⁰ Naie taino llofueraini iese iñedimaci. Jusiñamui jaienisaia jeare ñaitimaci. Ocainaiaia imaci comeciaia uiñuacinodo jailla isoi, naie taino llofueraini imaci uiñoga rafuedo jaidimaci. Iemona ja muidomo faifitimaci. ¹¹ Caín micori isoi naimaci illa jira, Jusiñamui naimacina duere finoite. Jusiñamui jitailla rafuena Caín micori finoacaiñena jira, ie ama micori diga icirite. Icirillamona Caín micori ie ama micorina jaie meinete. Caín micori rafuedo naie taino llofueraini jaidimaci. Naimaci jitailla rafuena naimaci finua jira, Jusiñamui naimacina duere finoite. Balaam micori isoi naimaci illa jira, naimacina duere finoite. Ucube ollena, Balaam micori uanaicinona jaie lloñede; iadedi cai judiaua cominina jeacinona finotate. Ucube ollena, naie taino llofueraini Balaam micori rafuedo jaidimaci. Uanaicinona jaca llofueñedimaci. Coré micori isoi naimaci illa jira, Jusiñamui naimacina duere finoite. Moisés micori uaina Coré micori ñnoñena jira, Jusiñamui naimie micorina meinete. Jusiñamui uaina naie taino llofueraini ñnoiacaiñena jira, jiaia faifitimaci. ¹² Dani omoi nabairillamona danomo omoi guia, naie taino llofueraini jiaia bitimaci. Naimaci illa jira, raise nabairinidomoi. Meiruiñeno eo guitimaci. Dani naimaci comecimo ite jitaillacinona finodimaci. Omoina canoacaiñedimaci. Maraiñedimaci. Monamo jamai ite uillie isoidimaci. Aifi naie isoide uillie oni ñaitade. Ie mei noci deide. Noci deiñenia, enirue saferena jira, buena sicoñede. Maraiñede. Naie taino llofueraini maraiñedimaci. Naimacimo marecino iñena jira, llisiñede riara isoidimaci. Llisilla facaise riara llisiñenia, maraiñede. Riara llisiñenia, iena oni aiñodicaia. Maraiñena jira, safenaite. Naimaci maraiñena jira, naie taino llofueraini jiaia safenaitimaci. ¹³ Naie taino llofueraini jearede rana finocabidimaci. Eo bagode monaillai isoidimaci. Monailai eo bagoia, monaillai fuemo jearede rana oni ñaicosite. Ucuaina eruailamona naiona cai macarillana uiñoticaia; iadedi ucudu ana feia, cai macarillana raise uiñoñedicaia. Naie taino llofueraini ana fede ucudu isoidimaci. Comini uanaicinona uiñotañedimaci. Naimaci llofuiaicinomona Jusiñamui jitailla rafuedo cai raise jaillana uiñoñedicaia. Jusiñamui naimacina duere finoite. Naimie illanomo jaca iñeitimaci. Jitiredinomo jaca iitimaci.

¹⁴ Naimacina Enoc jaie llote. Adán micori facaisemona Enoc facaisemo Adán cominimona siete moodi comuide. Enoc llote: “Ero, cai Namadi ie ailluena jaienisaia diga biite, ¹⁵ nana naimiena ñnoñedinona duere finollena. Naimie jitailla rafuena naimaci finoñena jira, maraiñedinona naimaci finua jira, naimiena naimaci jeare riire ñaia jira, naimacina duere finoite” llote. ¹⁶ Naie taino llofuerainidi creyentiaina sedarainina uaitaside. Jusiñamuina jeare ñaoidimaci. Dani naimaci jitailla rafuena finoidimaci. Eo abina biruidimaci. Jiaie cominimona rana jamai feiñollena, nano naimacina iobitadimaci. Iobitajano, rana jamai jicadimaci. Naimaci isoi omoi iñeno.

Cristona ñnotinomo llucino

¹⁷ Cue isiruiga amatiaia, cai Nama Jesucristo oretagano jai llogacinona omoi comeci. ¹⁸ Raitimaci: “Jesucristo nia abido biñena facaiseconi naimie uaina ñnoñedino jaca iitimaci. Naimaci jearede jitaillacinodo jaitimaci” raitimaci. ¹⁹ Naie taino llofueraini comini comeciaia daje isoi lloillana itatañedimaci. Jusiñamui dibeimo iñede rafuena gaidimaci. Jusiñamui Joreño naimacimo iñede.

²⁰ Cue isiruigano, naimaci isoi omoi iñeno; iadedi Jusiñamui rafue ñnocana mai omoi jai. Naie rafuedi mare. Jusiñamui Joreño omoina canuacinodo Jusiñamuimo omoi jii. ²¹ Jusiñamui omoina isiruillacinona uiñocana omoi jai. Jusiñamui ecimo cai jaca illemo fecuise ocuiri. Caina cai Nama Jesucristo duenaila jira, naimie ecimo jaca iiticaia. ²² Diga comini naie taino llofueraini rafuedo jaidimaci. Iemona dajerie Jusiñamui uaina raise nia ñnoñedimaci. Naimacimo llono: “Mai ñno. ²³ Dajerie cominina Jusiñamui duere sefuillacinomona jillote”. Taino llofueraini rafuedo naimaci jailla jira, niadi faifitimaci.

Naie rafuedo naimaci jailla jira, damierie jeacinona eo finodimaci. Jeacinona naimaci finua isoi omoi finoi raillanona, naimacina jaciruiocaida duenai.

Jusiñamuimo iobillacinona cai fecacabillasa

²⁴ Jusiñamuidi omoina jeacinona finoñenana itatarede. Naimie uicomomo omoina ico itataite. Omoina jeacinona omoi jaca finoñedena nainomomo itataite. Nainomomo iocire iitomoi. ²⁵ Jusiñamuidi jaca dajede. Cai facaina cai Nama Jesucristo fiodaillamona, caina cai jeacinomona jai jillotate. Jusiñamuimo iobillacinona cai fecacabillasa. Naimiedi siño. Naimie uai ebirede. Nana radi naimie anamo ite. Naga rana naimie ocuillena, naimiemo siño uaidi ite. Jaie jaca iese naimiedi ite. Birui jaca iese naimie ite. Ico jaca iese naimie iite. Mai. Macaibaite. Judadícue.

JUAN ICO SUILLE RAFUENA CUIAFUE

Jesucristo ico suille rafue lluana cueticue

¹ Jesucristona cueticue. Juandicue. Jesucristo facaina maijicabidicue. Ie dibeimo itinomo iena Jesucristo llollena, Jusiñamui naimiena bie rafuena uiñotade. Jiairuido ico ebena suille rafuena uiñotade. Cuena iena uiñotallena, iena cuemo llollena, ie jaienici cue dine oretate. ² Jusiñamui cuena birui uiñotaga rafuena jai cueticue. Jesucristo cuemo birui lloga rafuena jai cueticue. Nana birui cue cúa rafuena jai jai cueticue. ³ Bie ico suille rafuena ado facacabidinodi caimare iitimaci. Biena cacacabidino iena inuamona, caimare iitimaci. Bie rafue suillirui iaiei illa jira, iemo raise cacarei.

Siete creyentiaí illanuaimo bie carta oredicue

⁴ Asia railla eniruemo ite creyentiaí, omoi dine cue uai oredicue. Siete illanomo omoi illamona, bie rafue omoi uiñuana jitaídicue. Iena omoi uiñollena, biena cueticue. Jusiñamui ie Joreño diga, Jesucristo diga, omoína duenaicabide. Omoína uri itatacabite. Iena omoi uiñocana mai omoi jai. Jusiñamui jaie jaca ite. Birui naimie jaca ite. Ico jaca iite. Ie Joreño naimie abimo illamona, omoína bie rafuena raise cacataite. Iena inotaite. ⁵ Ie Moo uaina raise inuamona, eniruemo naimie illa facaise Jesucristo ie Moo rafuena raise atona llouide. Naimie fiodaite; iadedi naiemona jillode. Naimie dane fiodaíñena jira, nana illaicomini naimie anamo jai itimaci. Caina jaca isiruite. Naimie fiodaillamona caina cai jeacinomona jai jillobitade. ⁶ Naimie fiodaillamona naimie cominina jaidicai. Naimie anamo illaíma isoi caina sedallena, caina itatate. Naimie cominina cai illa jira, naimie Moo Jusiñamui diga atona birui ñairedicai. Ie muidona naimiemo iobillacinona jaca cai fecacabillasa. Naimie caina sedajasa. Iena jitaídicue.

⁷ Ero, eniruemo uillie motodo Jesucristo biite. Naimie bia, nana comini naimiena cioitimaci. Naimiena jaie meinete nairaidi naimiena cioitimaci. Duere sefuillana jacinuamona nana comini eecuitimaci. Iese jaca suite.

⁸ Cai Nama Jusiñamui cuemo llote: “Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Birui iticue. Nana ra fuilla mei, jaca iticue. Siño jitodicue”.

Juan Cristona cide

⁹ Daajena Cristomo cai duilla jira, omoi amadicue isoidicue. Cristomo cai duillamona, birui duere sefuidicai. Cominina ico naimie sedaia, nainomo iticai. Naimie cai comeciaina ocuiñotajamona iemo birui ocuiridicai. Jusiñamui uaina cue llua jira, Cristo rafuena cue llua jira, duere cue sefuillena, Patmos railla uiasimo birui iticue. Cárcelmo illa isoi duere sefuillena, illaicomini bene cuena birui oredimaci. ¹⁰ Jusiñamuina cue sedajamona, naimie Joreño cuena namatajamona, iníñenamona nicairilla isoi cue jinafo dine damie ado lluana cacadicue. Trompeta isoi ie uaidi ficirede. ¹¹ Cuemo llote:

—O cioacalle rafuena cueno. O cacaacalle rafuena cueno. Ie mei bie siete illanuaimo iena oreta: Efesomo, Esmirnamo, Pérgamomo, Tiatiramo, Sardimo, Filadelfi-amo, Laodiceamo. Diese illanuaimo oreta —llote.

¹² Cuemo llotimiena cue cioillena, jinafo dine erodaticue. Siete oromona finoca lamparíniaí ciodicue. Naga lamparín ie oromona finoca rairacomo raide. ¹³ Naie lamparíniaí motomo imana eruaidimiena ciodicue. Naimiedi Cristo. Areroina jitade. Oromona finoca cinturóna jitade. ¹⁴ Naimie ifotirai userede iniroi isoi eo userede. Naimie uisi irai boa isoi eruaide. ¹⁵ Naimie eillidi bronce eo dua isoi quenirede. Naimie uai aillue ille tua isoi eo ficirede. ¹⁶ Ie nabeillimo siete ucuduna lliide. Naimie fuemo nagafebei eo jairede lloebi ite. Naimie uieco eo quenirede, jitoma eo lligaiña isoi.

¹⁷ Naimiena cue ciuamona, naimie uicomo fiodaitimie isoi ana uaidicue; iadedi ie nabeilli diga cuena jetajamona raite:

—Cuena jaciruiñeno. Siño jitona cue illamona, jaie jaca iticue. Ico jaca iiticue. ¹⁸ Jaie fiodaiticue; iadedi naiemona jaie jillodicue. Jaca iiticue. Dane fiodaiñeiticue. Cue uai siñona jira, comini fiodailliruina lloticue. Cuena ñnoñedino fiodailla mei, naimaci joreñuai illinona jiai lloticue. ¹⁹ O como ciua rafuena cueno. Omo cue ja llole rafuena cueno. O ciolle rafuena jiai cueno. ²⁰ Ailluena rafue omo lloiticue. Ona iena uiñotaiticue. Cue nabeillimo siete ucuduaina ciodio. Bie siete ucuduaidi bie siete creyentiai llofueraini isoide. Bie siete lamparíaiidi bie siete illanomo ite creyentiai isoide. Bie creyentiaina ja ñaiacadicue —raite.

2

Cristo Efesomo ite creyentiaimo lloga rafue

¹ Cristo cuemo llote:

—Efesomo ite creyentiaimo llollena, nainomo ite llofueraimamo cue llwana cueno: “Cue nabeillimo siete ucuduai ite. Siete oromona finoca lamaríai motomo iticue. Omoína ñaiticue. Omoi llofueraima cue anamo ite. Omoi motomo cue illamona, cuena nabaidomoi. ² Omoi motomo cue illa jira, omoi illana raise uiñoticue. Omoi comeciai ocuiñocana iciriñeno itomoi. Maraiñedinona finoraini diga nabairiñedomoi. Omoi motomo damierie ‘Cristo oretagacai’ raitinona facciamona, naimaci tainona llorainina uiñotomoi. ³ Omoi comeciai ocuiñocana jaicabidomoi. Cue muidona duere sefuidomoi; iadedi iena sefuiruiñedomoi. Cuena ñnocana nia jaidomoi. ⁴ Iese itomoi; iadedi omoi abi rafue cuemona birui janore ite. Creyentiaina omoi nano jailla facaise cuena eo isiruitomoi; iadedi birui iese cuena isiruiñedomoi. ⁵ Iemo omoi comeciaina faca. Cue ñibeimo dane raise i. Cuena omoi nano isiruilla facaiseconi omoi illa isoi, cue jitaillacinona birui omoi fino. Cue ñibeimo omoi comeciai dane raise iñenia, omoína duere finoiticue. Iemona omoi lamparín oni uiticue. Omoi creyentiaina ñaiticue. Cue ñibeimo raise omoi iñenia, jiairuido omoi illanomo creyentiai iñeitimaci. ⁶ Omoína marenona jiai lloiticue. Nicolaitas railla comini finoca rafuena gaiñedomoi. Iena jiai gaiñedicue. Eo maraiñede rafuena finocana jaidimaci. ⁷ Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai ñnua. Cuena raise ñnotinomo Jusiñamui illanomo ite riarana iiticue. Ie lllilemona jaca iitimaci” cueno.

Cristo Esmirnamo ite creyentiaimo lloga rafue

⁸ Cristo cuemo llote:

—Esmirnamo ite creyentiaimo llollena, nainomo ite llofueraimamo cue llwana cueno: “Jaie jaca iticue. Eniruemo jaie cue ia, fiodaiticue; iadedi naiemona jai jillodicue. Jaca iiticue. ⁹ Cue cominina omoi illa jira, duere sefuidomoi. Omoi duerenana uiñoticue. Benomo dueredomoi; iadedi Jusiñamui mona duenidomoi. Naimie ñine ico omoi ia, buerenitomoi. Damierie omoína jeare ñaiana uiñoticue. Naimacidi judíuai comini; iadedi cue ñibeimo iñedimaci. Taife anamo itimaci. ¹⁰ Ico omoi duere sefuaia, jaciruiñeno. Taife cárcelmo omoimona damieriena itataite. Abido danomo omoi jaillena, iese omoína duere finoiticue. Diez digarui duere sefuitomoi. Omoi ille ñinori cuena ñnocana omoi jai. Duere sefuillamona bu fiodaia, cue diga jaca iite. ¹¹ Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai ñnua. Jusiñamuidi cuena raise ñnotinona naimaci jecino facaina ibana oñeite. Iraimo faifiñeitimaci; ia Jusiñamui ñine jaca iitimaci” cueno.

Cristo Pérgamomo ite creyentiaimo lloga rafue

¹² Cristo cuemo llote:

—Pérgamomo ite creyentiaimo llollena, nainomo ite llofueraimamo cue llwana cueno: “Nagafebei eo jairede lloebi cuemo ite. ¹³ Omoi illana uiñoticue. Taife anamo itino

motomo itomoi; iadedi cuena #nocana nia jaidomoi. Omoimona Antipas micorina navui meinetimaci. Naimie micoridi cue rafuena raise llofueuide. Naie facaise cuena fainonocaiñedomoi; ¹⁴ iadedi cuemona janore rafue omoi diga birui ite. Omoimona damieredi Balaam micori llofuiacinodo jaidimaci. Balaam micori Balac micorimo jaie llua jira, omoi jaiagai jeacino finodimaci. Balac cominimo omoi jaiagai diga nabairillena llote. Ie jira omoi jaiagai jiraraimo fecaca guillena naimaci diga guitimaci. Iemei naimacimona ainiaina otimaci. Jusiñamuina #noñedinomona ainiaina otimaci. Naiemona jearede rafue comuide. Omoimona birui damierie iese isoidimaci. Cuena #noñedinomona ainiaina otimaci. ¹⁵ Omoimona damierie nicolaítas railla llofuiacinodo jiai jaidimaci. Naimaci llofuiacinodi uanaiñedicino. ¹⁶ Naie llofuiacinomona eneno mai omoi i. Iedo jaiño. Naie llofuiacinodo jaidinomo: ‘Omoi comeciai iuai dane meido’ llono. Iena naimaci finoñenia, cue dibeimo naimaci raise iacaiñenia, cuemo ite lloebi diga cuena #noñedinona duere finoiticue. ¹⁷ Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai #nua. Judíuai jaiagaimo maná railla guille cue illa isoi, cuena raise #notinomo monamo jai ite maná isoi iiticue. Biena ñaiticue. Imaci comeciaina ocuiñotajacinona iiticue. Cue cominina naimaci illamona, naimacimo userede noficina jiai iiticue. Nainomo mameci ite. Dani naiena feiñotino naie mamecina uiñoitimaci” cueno.

Cristo Tiatiramo ite creyentiaimo lloga rafue

¹⁸ Cristo cuemo llote:

—Tiatiramo ite creyentiaimo llollena, nainomo ite llofueraimamo cue llua cueno: “Jusiñamui Jitona cue illanona, bie rafue omoimo lloiacadicue. Cue uisi irai isoi boode. Cue eilli bronze eo dua isoi quenirede. ¹⁹ Omoi finoca rafuena uiñoticue. Jusiñamuina omoi isiruillana uiñoticue. Jiaie cominina omoi isiruillana uiñoticue. Cuena omoi #nuana uiñoticue. Jiaie creyentiaina omoi canocabillana uiñoticue. Duere sefuidomoi; iadedi omoi comeciai ocuiñuana uiñoticue. Navui iese icana jaidomoi. Birui bai lliai jaidomoi; ²⁰ iadedi cuemo omoi diga rafue ite. Omoi motomo maraiñede riño ite. Jezabelna ñaiticue. Naiñaiño omoi oni dotañena jira, cuemo omoi diga rafue ite. ‘Jusiñamui rafuena jino llua uai cuemo ite’ naiñaiño llote. Uanaiñedicinona llofuecabilla jira, omoimona damieriena jifuate. Jearede rafuena llofuecabite. Omoi aiñede riño diga illana llofuate. Omoi iniñede iima diga illana llofuate. Jiraraimo fecaca guille guillena llofuate. Iena guilla jira, omoimona damierie naie jiraraina sedade. Iese naiñaiño llofuecabite. ²¹ Naiñaiño comeci iuai meidollena are sedadicue; iadedi naiñaiño naie jearede rafuena fainonocaiacaiñede. ²² Naiñaiño duere sefuillena, naiñaiño duitaiticue. Naimaci comeciai iuai naimaci meidoñenia, naiñaiño llofuiacinodo jaidinona jiai eo duere finoiticue. ²³ Naiñaiño dibeimo itinona meineiticue. Nana creyentiaidi nana comini comeciai iuailaina cue uiñuana jiai uiñoitimaci. Nana comini comeciai facajacinona cue uiñuana jiai uiñoitimaci. Ie jira omoi finolle rafue diese cuemona duere sefuitomoi. ²⁴ Jezabel llofuiacinodo jaiñedinomo ja lloiticue. Taife come uiñoñega rafuena uiñote. Iena nia uiñoñedomoi. Omoimo jiaie rafuena lloñeiticue; ²⁵ iadedi cue nia abido biñenia, cuemona omoi uiñoga rafuena #nocana mai jai. ²⁶ Cue Moomona cue uaina feiñoticue. Cuena raise #nuamona, abido cue bia, cue jitaillacinona finocabidinomo cue uaina iiticue. Naie facaise cue uai diga cue anamo ite nairaiaina raise sedaitimaci. ²⁷ Naimacina riire raise sedaitimaci, cue jitailla rafue naimaci finollena. Iena naimaci finoñenia, naimacina duere finoitimaci, lloedosi diga, nogo eo llaila isoi. ²⁸ Cuena #notinomo monairacuduna jiai iiticue. ²⁹ Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai #nua” cueno.

3

Cristo Sardimo ite creyentiaimo lloga rafue

¹ Cristo cuemo llote:

—Sardimo ite creyentiaimo llollena, nainomo ite llofueraimamo cue llwana cueno: “Jusiñamui Joreño cuemo ite. Naimie Joreño omoïna canocabide. Omoïna sedacabide. Siete ucuduai cuemo jiai ite. Omoï llofueraimana ñaiticue. Omoï finoca rafuena uiñoticue. ‘Cristona raise ñnoticai’ raitomoi; iadedi omoï comeciamona raise ñnedomoi. ² Cua dibeimo raise dane i. Cuena dane raise ñnocana jai. Cuena jai fainonocaiacadomoi. Jusiñamui omoï finoca rafueri iobiñede. ³ Cua rafuena jai cacajamona, iena ñnotomoi. Iedo dane jai. Omoï comeciai iuaina dane meido. Cua dibeimo dane raise omoï iacaiñenia, firiraima bainino billa isoi, omoïna duere finollena, ebena biiticue. Omoï dine cue billiruina uiñoñeitomoi. ⁴ Omoïmona damerie jearede rafuena finocana jaiñedimaci. Jusiñamuimona naimaci comeciai marena jira, cue dine naimaci illena, userede iniroina jitaitimaci. ⁵ Cuena ñnocana jaidinodi userede iniroina jitaitimaci. Cuemo ite rabenicomona naimaci mameciaïna doñeiticue. Cua illanomo jaca iitimaci. ‘Naimacidi cue comini’ cue Moomo lloiticue. Naimie jaienisaïmo iena jiai lloiticue. ⁶ Jusiñamui Joreñomona cue lloga rafue ite, omoï creyentiai iena. Bie rafue bu cacajia, iena jiai ñnua” cueno.

Cristo Filadelfiamo ite creyentiaïmo lloga rafue

⁷ Cristo cuemo llote:

—Filadelfiamo ite creyentiaïma llollena, nainomo ite llofueraimamo cue llwana cueno: “Mareuidimiedicue. Uanaicinona jaca lloticue. David micori jitona cue illamona, illaïmana cue illa jira, siño uai cuemo ite. Ie muidona cue jitailla diese cominina feiñoticue. Jusiñamui illanomo naimaci illena, naimacina feiñoticue. Cua jitailla diese cominina feiñoñedicue. ⁸ Omoï finoca rafuena uiñoticue. Omoïna cue canua jira, jaca buna cue rafuena omoï llwana itatanide. Jamai bue isoidomoi; iadedi cue rafuena ñnocana jaidomoi. Cuena janoñedomoi. ⁹ Omoï dine damerie Taife anamo itimaci. Naimacidi judïuai; iadedi cue dibeimo ñnedimaci. Tainona llocabitimaci. Ero, omoï dine naimacina cue bitatajamona, omoïna cue isiruillana uiñoitimaci. Cua dibeimo naimaci jailla mei, cuemo iobillacinona fecaitimaci. ¹⁰ Nana cuena ñnoñedinona ico eo duere finoiticue. Iemona cuena naimaci ñnoñenana uiñoiticue. Omoï duere sefuiñellena, naie facaisemona omoïna jillotaiticue. ¹¹ Eniruemo ebena abido biiticue. Cuemona ñbana omoï feiñoñeni raillano, cue dibeimo ñnocana omoï jai. Cua dibeimo raise omoï jaiñenia, cuemona jaiïmie omoï facaina ñbana feiñoite. ¹² Cuena raise ñnotino comeciaïna ocuiñotaiticue. Cua illanomo jaca iitimaci. Cuemo naimaci duilla jira, cue jaiïe mamecina naimaci abïmo cueiticue. Jusiñamui mamecina naimaci abïmo cueiticue. Jusiñamui illano mamecina naimaci abïmo cueiticue. Naimie illanodi comue Jerusaléna mamecïrede. Naimiemona, monamona ico ana biite. ¹³ Jusiñamui Joreñomona cue lloga rafue ite, omoï creyentiai iena. Bie rafue bu cacajia, iena jiai ñnua” cueno.

Cristo Laodiceamo ite creyentiaïmo lloga rafue

¹⁴ Cristo cuemo llote:

—Laodiceamo ite creyentiaïmo llollena, nainomo ite llofueraimamo cue llwana cueno: “Siño Jitodicue. Cua lloga uaina jaca finocabidicue. Uanaicinona jaca llocabiticue. Cua uaido Jusiñamui nana finode. Nana comuitate. ¹⁵ Omoï finoca rafuena uiñoticue. Cua rafuedo jaillana nia fainonocaiñedomoi; ia cue rafuedo eo raise jaiñedomoi. Janore ñnocana jaidomoi. ¹⁶ Omoï finoca rafuena cue gaiñena jira, cuemona omoïna oni dotaiticue. ¹⁷ ‘Ucuberedicai’ raitomoi. ‘Raruaïredicai. Nana cai jitailla ra caïmo ite’ raitomoi. Cuemona iese ñnedomoi. Cuemona dueredomoi; ia iena uiñoñedomoi. Cuemona caïmare ñnedomoi. Cuena omoï raise ñnoñena jira, uisïnidinno isoidomoi. Taimiedomoi isoidomoi. ¹⁸ Ie jira omoïna dajerie rafuena llofueiticue. Cuemona omoï eo duerena jira, omoï comeciai raise ññena jira, omoïmo fiebidicinona cuemo jica. Cuemona ono. Omoï duenillena, cuemona eo mare oro isoide rana ono. Omoï taimieñelle

isoiñellena, cuemona omoi meiruiñellena, userede iniroi isoide ra cuemona ono. Omoi uisina cioille isoillena, cuemona manue ono. Omoi comeciaina ñaiticue. Cuena raise omoi inoia, buena omoi comeciaino fiebiñeite. ¹⁹ Cue isiruigano cue dibeimo raise illena, naimacimo riire llocabiticue. Cue uaina naimaci inollena, naimacina jiai duere finocabidicue. Ie jira cue dibeimo raise omoi i. Jeacino omoimo ia, iena faimonocai. ²⁰ Ero, nase tuticue isoidicue. Bu cuena cacajia, cue fo billena cuena uaidoia, nasena bu econoia, fo jaiticue. Naimiena nabaillanona, naimie diga guiticue. Omoi comeciaina ñaiticue. Cue rafuena omoi cacaja mei, iena omoi inoia, cuena feiñoitomoí. Iemona conin nabaiticai. ²¹ Eniruemo cue Moo jitailla rafuena jai e cue fuidua mei, naimie ecimo abido jai iticue. Cueri naimie iobillamana, illamana cue illamona, naimie ecimo jai iticue. Ie isoide. Cuena raise inotino monamo cue ecimo itataiticue. Cue cominina naimaci illa jira, naimacina iobitallena, cue ecimo naimacina nabaiticue. ²² Jusiñamui Joreño mona cue lloga rafue ite, omoi creyentiai iena. Bie rafuena bu cacajia, iena jiai inua” cueno.

4

Juan Jusiñamui illanomo ciua rafue

¹ Dallu illanona monamo cue eruaia, jiaie rafuena cidicue. Nainomo Jusiñamui illanomo econoga nasena cidicue. Ailli cue diga ñaitimiedi cuena uaidote. Naimie uai trompeta isoi ficirede. Llote:

—Monamo bi. Jiairuido suille rafuena omo acataiticue.

² Jusiñamui Joreño anamo cue illamona, nicairilla isoi Jusiñamui illanona cidicue. Nainomo naimie ana raillana cidicue. ³ Naimie eo quenirede. Eo raifide ebirede noficina eruaide. Jaspe railla noficina eruaide. Jaspe enefebecodo cide. Cornalina railla noficina eruaide. Cornalina jiairede. Naie illano ecimo ameona cidicue. Aneo mocorena jira, esmeralde railla noficina eruaide. ⁴ Naie illano ecimo veinticuatro rarabici jiai ite. Nainomo userede iniroina jitajanona veinticuatro einamací ana raidimaci. Naimaci ifogimo oromona finoca nuicirai ite. ⁵ Jusiñamui illanomona boricabide. Jiai gurucabide. Bue isoi eo ficirede. Naie illano uicomo siete reitirai boode. Naie reitiraidi Jusiñamui Joreño mamecido nainomo boode. ⁶ Jusiñamui illano uicomo vidriona eruaide joraina cidicue. Eo quenirede. Naimie illano ecimo cuatro cajedino ite. Diga uisi naimaci uiecomo ite. Diga uisi naimaci emodomo ite. ⁷ Damie leónna eruaide. Jiaimie jurareta jirona eruaide. Jiaimie ie uieco come uiecona eruaide. Jiaimie feede majaiñona eruaide. ⁸ Nagamiamo seis iaico ite. Ailluena uisi naimaci iaicuaímo ite. Naimaci abimo uisi jiai eo ite. Nagarui iniño jaca llotimaci:

Mare, mare, mare.

Cai siño Nama Jusiñamuidi eo mareuidimie.

Jai e jaca ite. Birui ite. Ico jaca iite.

⁹ Naimaci iese llua jira, Jusiñamuina iobitadimaci. Naimiemo iobillacinona naimaci iese fecaia, ¹⁰ naie veinticuatro einamací Jusiñamui uicomo ana bitadajanona, naimiemo iobillacinona jiai fecadimaci. Naimieri iobillanona, naimaci nuiciraina naimie dine faianona, ¹¹ rotimaci:

Cai Nama Jusiñamui, ona eo iobitaiacadicaí.

Odi mareuidio.

Nana rana comuitatio.

Nana cominina comuitatio.

O jitailla jira, naimaci itimaci.

Ie jira iobillacinona omo fecacabidicaí.

5

Juan Jusiñamui illanomo ferinoga rabe illana cide

¹ Jusiñamui illanomo cue nia eruaia, naimie nabellimo ferinoga rabe illana ciodicue. Nagafebeimo cuega rafue jai ite. Siete nitaca ra illamona, naie rabe raise ibaibide.

² Jusiñamui ie nanoca jaienici ado llwana cacadicue. Naimie jicanote:

—¿Bumo ite uaidi nitaca rabe econollena, naie rabena facallena?

³ Monamo itinomona, enirue itinomona, jai fioidaitinomona, bummo ie uai iñede, naie rabe oni econollena. Naie rabe facanidimaci. ⁴ Jaca bummo naie uai iñena jira, eo eedicue.

⁵ Naie facaise naie veinticuatro einamacimona damie cuemo llote:

—Mai eeñeno. Judá nairai ie Leónna mameciredimiedi iena econorede. Naimiedi David micorí comini imie. Ie dibeimo iñedinona jai emodofilla jira, naimiemo uai ite, naie siete nitaca rana oni suiñollena, naie rabena econollena.

⁶ Naie facaiseconi Toica Llaudana ciodicue. Jusiñamui illano uicomo naimie ite. Naie cuatro cajedino naimie ecimo ite. Naie veinticuatro einamací naimie ecimo jiai itimaci. Faga llaudana eruaide; iadedi jai jilluamona naidaide. Naie Toica Llaudadi Cristo. Naie Llaudamo siete sigai ite. Siete uisi naimiemo jiai ite. Naie uisidi Jusiñamui Joreño mamecido ite. Nana cominina canollena, naimacimmo Cristodi Jusiñamui Joreña jai orede. ⁷ Naie facaise Jusiñamui ie nabellimona naie rabena ote. ⁸ Iena naimie ua mei, naie cuatro cajedino, naie veinticuatro einamací diga, naimiena sedallena, naimie uicomo ana bitadatimaci. Nagamiemo guitarrana eruaide arpa ite. Nagamiemo oromona finoca copa ite. Naga copamo caimare soride ra boode. Naie radi Jusiñamuimo comini jiacino mamecido ite. ⁹ Llaudana sedallena, naimaci arpas taillanona, comue ruana rotimaci:

O marena jira, o uai ite, naie rabe econollena.

Ie nitaca rana oni suiñoitio.

Jiaino jaie ona meinetimaci.

O fioidailla jira, o diaillamona, Jusiñamui dibeimo naga nairaimona cominina itatatio.

Naimaci jeacinomona jillotatio.

¹⁰ Naimacina jai fetodio.

O comini naimaci illamona, Jusiñamui diga atona ñaicabitimaci.

Naimie anamo jiairuido eniruemo ite cominina sedaitimaci.

Ie jira naie rabena oni suiñoredio.

¹¹ Iemei dane eruaillamona, naimie ecimo eo ailluena Jusiñamui jaienisaia ciodicue. Naie cuatro cajedino ecimo, naie veinticuatro einamací ecimo itimaci. Diga illa jira, facanide. ¹² Ado llotimaci:

Bie Toica Llauda isoidimie jaie fioidaite; ia jai jillode.

Naimie eo mareuidimiena jira, Jusiñamui ie uai naimiemo jai illamona, Jusiñamui nana naimiemo jai illamona, Jusiñamui naimiena eo abina uiñotajamona, naimiena jiai iobitaiacadicaí.

Naimiena cai ñnuanona, naimiemo iobillacinona feaacadicaí.

¹³ Ie facaise nana comini, nana Jusiñamui comuitaga ra diga, llwana cacadicue. Monamo itino, enirue itino, jai fioidaitino, monaillaimo itino llwana cacadicue. Llotimaci: Jusiñamuina jaca cai iobicabillasa. Toica Llauda isoidimiena jaca cai iobicabillasa.

Iobillacinona jaca feaacadicaí. Caina jaca sedallesa.

¹⁴ Naie cuatro cajedino raitimaci:

—Ie isoi jiai lloiacadicaí.

Ie facaise naie Llauda isoidimiena sedallena, naie veinticuatro einamací ana bitadatimaci.

6

Juan siete nitaca ra oni suiñuana ciodicue

¹ Toica Llauda isoidimie iobillacinona naimaci fecaja mei, Llauda isoidimie daje nitaca ra oni suiñuana ciodicue. Naie cuatro cagedinomona damiedi gurua uai isoi llua cacadicue. Naimie llote:

—Mai bi.

² Naimie llua mei, userede caballo billana ciodicue. Caballo emodo itimie sicuirate. Illaimana jira, naimie ifogimo nuicirai jide. Ie bacauai anafefitallena, oni jaide.

³ Iemei Llauda isoidimie jiaie nitaca ra oni suiñode. Suiñua mei, naie cuatro cagedinomona jiaimie llote:

—Mai bi.

⁴ Naimie llua mei, jiairede caballo billana ciodicue. Caballo emodo itimie are lloebi illamona, Jusiñamui jitailla jira, caballo emodo itimie eniruemo itinona uri itatañede. Naimaci uri iñena jira, conini icirilla jira, conini meinetimaci.

⁵ Iemei Llauda isoidimie jiaie nitaca ra oni suiñode. Suiñua mei, naie cuatro cagedinomona jiaimie llote:

—Mai bi.

Naimie llua mei, jitrede caballo billana ciodicue. Aime guille facaise illa jira, caballo emodo itimie onollimo ra facaradi ite. ⁶ Naie cuatro cagedino motomona damie llote:

—Guille raise iñena jira, comini aime guitimaci. Daje kilo trigo ie core darui maijia ua ucube diese raifide. Iemona llomenicono finoa, dacaiño guille raifi ite. Tres kilos cebada ie core darui maijia ua ucube diese raifide. Iena damie oia, iemona llomenicono finoa, dacaiño amani guille raifi ite. Illimo riana nia ite; ia iena iballena ucube baiñede. Ie muidona aime guitimaci —llote.

⁷ Iemei Llauda isoidimie jiaie nitaca ra oni suiñode. Suiñua mei, naie cuatro cagedinomona jiaimie llote:

—Mai bi.

⁸ Naimie llua mei, liai usereide caballona ciodicue. Ie emodo itimie mamecidi fiodaitimie. Jusiñamui uai naimie illa jira, naimie jailla mei, ailluena fiodaitino itimaci. Jobairillemona, aime guillemona, duicomona, riirede ocainaiamona fiodaitimaci. Atuedo meinetasiñeite; iadedi eo ailluena meinetasiite. Ria uaimona ie cuarta facaina comini fiodaitimaci.

⁹ Iemei Llauda isoidimie jiaie nitaca ra oni suiñode. Suiñua mei, Jusiñamuimo caimare soride boode rana jobaisoillanona ciodicue. Naie illano anamo comini joreñuana ciodicue. Jusiñamui rafuena naimaci llua jira, “Jusiñamui cominidica” naimaci llua jira, Jusiñamuina inoñedino naimacina meinetimaci. Jai fodaillamona naimaci joreñuai Jusiñamui illanomo jai itimaci. ¹⁰ Jusiñamuimo ado llotimaci:

—Cai Nama, siño jitodio. Mareuidimiedio. O uaina jaca finodio. ¿Niruido caina meinetinona duere finotio? ¿Niruido ibana oitio?

¹¹ Jusiñamui cominina illamona, naimacimo Jusiñamuidi userede areroina jitallena fecade. Llote:

—Janore jisa seda. Ibana nia oñeiticue. Cue dibeimo omo maijia isoi, cue cominina nia meinetimaci. Naimacina meinia mei, ibana oiticue.

¹² Iemei Llauda isoidimie jiaie nitaca ra oni suiñuana ciodicue. Suiñuanona, aillue ñuisaño suide. Jitoma eo jitrede. Fivuidi diruena eruaide. Jiairede. ¹³ Riirede aifi riana ana llutaja isoi, monamona eniruemo ucua llude. ¹⁴ Ferinoga rabe oni uilla isoi, mona iñebicaide. Naga anedu, naga uiasi diga jia oni jaide. ¹⁵ Ie jira illacomini, jamai bue isoñedino, ucuberedino, patrón anamo itino, patrón anamo iñedino, ua nana comini jaciruillamona reiritimaci. Damerie nofici moto ifomo reiritimaci. Damerie anedu motomo reiritimaci. ¹⁶ Anedumo llotimaci. Noficimo llotimaci:

—Caina ibaillena, cai emodomo ana uai. Jusiñamui ricaillafuemona caina reirita. Llauda isoidimie ricaillafuemona caina reirita. ¹⁷ Iaimaia ricaillarui jai ite. Naiemona buna jillobinide —llotimaci.

7

Juan ailluena Israel comini Jusiñamui sello diga nitajana cide

¹⁻² Naie facaise jiaie ico suille rafuena ciodicue. Cuatro Jusiñamui jaienicina ciodicue. Damie jitoma billanomo ite. Jiaimie jitoma jaillanomo ite. Jiaie iaiaiaia beicimo itiaiaiaia. Aifi biñellena itimaci. Ie muidona monaillai dine aifi iñede. Aifi iñena jira, amenaiaia nirairiñede. Eniruena monaillai diga maraiñeno finollena naimacimo uai ite. Naie facaise jiaie jaienici jitoma billanomona billana ciodicue. Naimiedi cai cajede Jusiñamui ie sellona uite. Jiaie jaienisaimo ado lloste:

³ —Eniruena aifi diga maraiñeno nia finoñeno. Monaillaina maraiñeno nia finoñeno. Amenaiaina maraiñeno nia finoñeno. Jusiñamui dibeimo itino uiecua itofiaia sello diga nia cai nitañena, eniruena maraiñeno finoñeno.

⁴ Ailluena comini sello diga nitade. Ciento cuarenta y cuatro mil diese nitajana cacadicue. Nana naimaci Israel cominimona itimaci. ⁵ Judá micori cominimona doce mil ite. Rubén micori cominimona doce mil ite. Gad micori cominimona doce mil ite. ⁶ Aser micori cominimona doce mil ite. Neftalí micori cominimona doce mil ite. Manasés micori cominimona doce mil ite. ⁷ Simeón micori cominimona doce mil ite. Leví micori cominimona doce mil ite. Isacar micori cominimona doce mil ite. ⁸ Zabulón micori cominimona doce mil ite. José micori cominimona doce mil ite. Benjamín micori cominimona doce mil ite. Diese nitade.

Juan ailluena comini userede iniroina jitajana cide

⁹ Naie facaise ailluena comina ciodicue. Ailluena jira, naimacina facadonicue. Naga nairaiaimona itimaci. Naga jiaie ñaia uaido ñaitino itimaci. Jusiñamui uicomo itimaci. Toica Llauda isoidimie uicomo itimaci. Userede iniroina jitadimaci. Naimaci onollimo raforuai ite. ¹⁰ Ado llotimaci:

Bie Llauda isoidimie jaie fiodaillamona, cai jeacinomona Jusiñamui caia jai jillotate.

¹¹ Naie facaise nana Jusiñamui jaienisaia naimie ecimo naidaillana ciodicue. Naie veinticuatro einamacie ecimo, naie cuatro cajedino ecimo jiaia naidaidimaci. Naie facaise Jusiñamui uicomo ana bitadajanona, naimiena sedadimaci. ¹² Raitimaci:

Bie comini isoi omo iobillacinona jiaia feaacadicaia.

Odi mareuidimedio. Abina eo uiñotio. Odi jaca siño jitodio.

Ie jira iese lloticaia.

Ona jaca cai iobitajasa.

¹³ Naie facaise naie veinticuatro einamacimona damie cuemo jicanote:

—¿Userede iniroina jitadinodi nimaci? ¿Ninena bitimaci?

¹⁴ Uai oticue:

—Uiñoñedicue. Cuemo llono.

Naimie uai ote:

—Bimacidi eo duere sefuilla facaise Jusiñamuina inoñedino meinegano. Naimaci iniroina jai jocoritimaci. Llauda isoidimie jaie fiodailla jira, naimie diruedo jocuamona, naimaci iniroi jai userede. Naimaci iniroina lloticue; ia naimaci comeciaina jiaia ñaiticue. Llauda isoidimie fiodailla jira, naimaci comeciia jai jeanide. ¹⁵ Ie jira Jusiñamui uicomo itimaci. Nainomo naimiena jaca sedaitimaci. Naimiena jaca iobitaitimaci. Naimie ocuilla rafue jaca finoitimaci. Naimacina naimie raise nabaillamona, naimacina raise eenoite. ¹⁶ Dane duere sefuiñeitimaci. Nana naimaci jitailla ra naimacimo iite. Aime dane guiñeitimaci. Naimaci jiroacalle ra jaca iite. Eo ecasillamona dane duere sefuiñeitimaci. Iemona dane usitañeitimaci. ¹⁷ Jusiñamui illanomona Llauda isoidimie naimacina raise sedaja jira, raise marena iitimaci. Naimacina naimie raise sedajamona, jaca iitimaci. Jusiñamui naimacina raise duenaillamona, duere sefuillamona dane eñeitimaci. Dane sunañeitimaci.

8

Juan Llauda isoidimie iraié nitaca ra oni suiñuana ciode

¹ Toica Llauda isoidimie iraié nitaca ra oni suiñuana, media hora monamo tii raiñoicaide. ² Iemei siete Jusiñamui jaienici naimie uicomo illana ciodicue. Nagamiemo daje trompetana fecade. ³ Naie facaise jiaie jaienici billanona, Jusiñamuimo caimare soride ra jobaisoillano ecimo naidaide. Naie jobaisoillanodi oromona finoca. Ie onollimo oromona finoca cucharón eruaide ra ite. Ailluena caimare soride ra naimie feiñua mei, iena jobaide. Ie facaise nana Jusiñamuina #notino jiiacino Jusiñamuimo jaide. ⁴ Jobaillamona Jusiñamui uicomo a jaide. Nana Jusiñamuimo jiiacino diga a jaide. ⁵ Naie facaise Jusiñamuimo jobaisoillanomona boode reici jaienici uanona, cucharóna eruaide ramo iena jonianona, eniruemo iena ana dotade. Ie jira gurucabide. Bue isoi eo ficirede. Naganomo boricabide. Ñuisaño suide.

Juan trompetas fillana cacade

⁶ Iemei naie siete jaienici naimaci trompetas fillena llinote. ⁷ Damie ie trompetana fite. Filla jira, monamona janorede hielu, boode ra diga, dirue diga, eniruemo uaide. Atuedo enirue booñede; ia ailluena boode. Riai uaimona ie tercera facaina boode. Nainomo nana amenaiai boode. Nainomo nana raiticiño boode.

⁸ Jiaie jaienici ie trompeta fite. Filla jira, Jusiñamui anedu isoide boode ra monaillaimo faite. ⁹ Iemona monaillai diruena jaide. Atuedo iese jaiñede; ia ailluena iese jaide. Riai uaimona ie tercera facaina diruena jaide. Ie muidona ie tercera facaina lliciai fiodaite. Nainomo ite botemona ie tercera facaina jiai anabaite.

¹⁰ Jiaie jaienici ie trompetana fite. Filla jira, monamona aillue boode ucudu eniruemo uaide. Iemona ie tercera facaina illeniai, ie tercera facaina jorainiai diga erireficaide. ¹¹ Ie muidona naie ucudu Ajenjona mameciredede. Riai uai oni dobaiñuamona “Eriredimie”. Iemona jinui erireficaide. Iena jiruamona, ailluena comini fiodaitimaci.

¹² Jiaie jaienici ie trompetana fite. Filla jira, jitoma, fivui diga, ucuai diga, fuiride. Iemona aremona cuatro horas raise usenide. Naiona cuatro horas eo jitirede.

¹³ Iemei jaienici ado cuirioillana cacadicue. Monamo feianona llote:

—Eniruemo itino ua eo duere ja sefuitimaci. Daje amani jaienici imaci trompetana nia fiñede. Iena naimaci fia, comini eo duere sefuitimaci.

9

¹ Jiaie jaienici ie trompeta fite. Filla jira, naie facaise monamona eniruemo damie ucudu mamecido jai uaillana ciodicue. Naimiemo Jusiñamui daje llavena fecade. Enirue eo ana ite ifo nase ie. Nainomo Taife comini, Janaba comini diga itimaci. ² Llave diga naie ifo ie nasena econote. Ie facaise ifomona eo ailluena uillie jino bite. Ie muidona jitoma raise bainide. Mona jitireficaide. ³ Uilliemona fioduaina eruaillanona, Taife comini, Janaba comini diga jino billanona, nana eniruemo bitimaci. Jusiñamui llua jira, acaido isoi fioduai eruaidinodi maitimaci. ⁴ Raiticiño naimaci guillena, ibena naimaci guillena Jusiñamui rairuide. Naimie jitailla jira, naimie sello diga nitañeganona duere finodimaci. ⁵ Jusiñamui jitailla jira, cinco fivui naimacina duere finoitimaci; ia cominina meineñeitimaci. Acaido isoi isire maitimaci. Eo isirenite. ⁶ Iese ico sua, eo duere comini sefuilla jira, fiodaillana jitaitimaci. Naimaci abina meineacanitimaci. Fiodaiacanitimaci; ia fiodainitimaci.

⁷ Fioduaidi jobaime dine jaide caballuaina eruaidimaci. Naimaci ifogimo oromona finoca nuicirai eruaide radi ite. Naimaci uiecuai cominina eruaidimaci. ⁸ Naimaci ifotie arena illanona, riño ifotiena eruaide. Naimaci isiduai leones isiduaina eruaide. ⁹ Naimaci abiamo ico isoi ra ite. Lloeomona finoca rana eruaide. Naimaci feiamona, ailluena caballuaina jobairillanomo jaillena riire sonode carretas isoi ficiredimaci. ¹⁰ Naimaci omacai acaido isoide. Naie diga maillanona, cinco fivui cominina duere

finoitimaci. ¹¹ Naimaci illaimadi naie ana ifona sedadime. Judíuai uaimona naimie mamecidi Abadón. Griego uaimona naimie mamecidi Apolión. Oni dobaiñuamona naimie mamecidi Cominina Fuidodime. ¹² Daje duere sefuilla rafue jai fuite. Mena nia suiñede.

¹³⁻¹⁴ Naie facaise jiaie jaienici ie trompeta fite. Jusiñamui uicomo ite caimare soride ra jobaisoillano ite. Oromona finoca. Nainomo cuatro sigai ite. Nainomona jaienicimo damie llote:

—Eufrates railla ille fue do cuatro maiga jaienicina suiño —llote. ¹⁵⁻¹⁶ Iena finode. Naimaci anamo eo ailluena soldaduai ite. Doscientos millones soldaduai illana fididicue. Bie facaise, bie hora, birui, bie fivui, bie año, Jusiñamui jitailla facaise ailluena cominina meinetimaci. Atuedo meineñedimaci. Riai uaimona ie tercera facaina meinetimaci. ¹⁷ Soldaduai caballos emodo itimaci. Soldaduai jogobemo ra ite. Daje facaise eo jiairede. Daje facaise mocorede. Daje facaise borarede. Caballos ifogiai leones ifogiaina eruaide. Naimaci fue mona boode radi, uillie diga, azufre boa isoi jino bite. ¹⁸⁻¹⁹ Naimaci fue mona bite rado ailluena cominina meinetimaci. Ie tercera facaina meinetimaci. Caballos omacai jaiona eruaidimaci. Naimaci omacaimo jaiona eruaide ifogi itimaci. Ailluena cominina jiai duere finodimaci.

²⁰ Iese ie tercera facaina meinetimaci; ia fiebidino naimaci jeacinomona naimaci comeciai iuaina jaca meidoñedimaci. Taifena nia sedaacadimaci. Janabana nia sedaacadimaci. Oromona, platamona, bronce mona, noficimona, amenamona finoca jiraraiana nia sedaacadimaci. Naie isoide radi cajeñena jira, jaca cioiñede. Naie isoide radi jamaí rana jira, jiai jaca buena cacaiñede. Jaca macariñede. Cajeñede; ia iena sedacabidimaci. ²¹ Conini meinecabitimaci. Aimaniai dine jaicabidimaci. Naimaci aiñede riño, naimaci iniñede ima diga icabitimaci. Rana ficabidimaci. Jeacinona finocana nia jaidimaci.

10

Juan Jusiñamui jaienici, econoga rabenico diga, billana cide

¹ Ie facaise Jusiñamui illanomona eniruemo jiaie jaienici billana cidicue. Naimiemo Jusiñamui uai eo ite. Uillie motomo naimie ite. Naimie ifogi afemo ameo ite. Naimie uieco jitoma isoi quenirede. Naimie idai eo boode amena isoi eruaide. ² Naimie onollimo econoga rabenico ite. Eniruemo naimie ria, naimie nabei eilli monaillai emodomo naidaide. Ie jarifebei eilli eniruemo naidaide. ³ León eo irilla isoi, ado llote. Naie facaise siete gurua ñaia isoidino uai cacadicue. ⁴ Naimaci llwana cacaja mei, iena cueiacadicue; iadedi monamona damie cuemo llote:

—Naie llwana lloño. Iena cueño.

⁵ Naie jaienici ie nabei onolli mona dine ñuitajanona, ⁶ Jusiñamuimo llote:

—Jaca itio. Monana nainomo ite ra diga finodio. Eniruena nainomo ite ra diga jiai finodio. Monaillai nainomo ite ra diga jiai finodio. Cue baifemo o faia jira, uanaicinona cue llwana uiñotio. O lloga uaina jaca suite. ⁷ Iraie jaienici ie trompeta ja fite. Filla mei, bie facaise Jusiñamui ie facaina lloraini micoriaimo jaie lloga rafue suite. Comini naie rafue jaie raise cacaiñedimaci; ia iena ja raise cacaitimaci —llote.

⁸ Monamona cuemo ailli llotime dane llote:

—Jaienici onollimo econoga ite rabenicono llinuai.

⁹ Ie jira jaienici dine cue jaillanona:

—Iena cuemo ine —lloticue.

Uai ote:

—Iena ono. Iena mai guiño. Cifo isoi o fuemo iena cacaitio; iadedi o jebemo erirede ra isoi iena cacaitio.

¹⁰ Llinua mei, iena guiticue. Cifo isoi naimerede rana cacadicue; ia guilla mei, erirede ra isoi cue jebemo ite. ¹¹ Cuemo dane llote:

—Omo cue llole rafuena lloitio. Ailluena cominimo ico suille rafuena lloitio. Illaicominimo ico suille rafuena lloitio.

11

Juan menamie Jusiñamui rafuena llua cacade

¹ Cuemo Jusiñamui radosina fecade. Jerusalémo ie jofona facallena, cuemo fecade. Llote:

—Mai jai. Cue jofomo niga metros ite facajai. Atona ruica jiaí faca. Nainomo cuemo jobaisoillanona jiaí faca. Niga comini naie jofomo ite jiaí faca. ² Cue jofo ecimo ite taibirina facañeno. Naie illano judíuainedonomo jainaiáide. Cue jitailla jira, Jerusaléna naimaci emodofillamona, daje amani años abimo atomonado iena duere finoitimaci. ³ Naie facaise menamie mo cue uaina iitícue. Iaimaiaí cue llole rafuena daje amani años abimo atomonado lloitiaímaiaí. Comini comeci iuai meiduana iaimaiaí jitailla jira, sunaillamona, ebinide iniroina jítaitiaímaiaí —llote.

⁴ Iaimaiaí mena olivos railla riará mamecido itiaímaiaí. Enirue Namana Jusiñamui illanona, naimie uicomo mena ite lamparín ie rairaco mamecido itiaímaiaí. ⁵ Iaimaiaína duere bu finoacania, naimiena meinetiaímaiaí. Iaimaiaí fuemona boode ra billanona, naimiena meinetiaímaiaí. Iaimaiaína duere finodino iese fiodaitimaci. ⁶ Iaimaiaí Jusiñamui rafue llole facaiseconi noci deitañellena, iaimaiaímo Jusiñamui uai iite. Jinui diruena jaitallena iaimaiaímo uai iite. Iaimaiaí jitaicabilla facaise, diga isoide rafue finuamona cominina duere finoitiaímaiaí; ⁷ iadedi Jusiñamui rafue iaimaiaí llua mei, eo ana ite ifomona ocainana eruáillanona, Taife jino biite. Jino billanona, iaimaiaí diga fuirite. Iaimaiaína anafetitaja mei, iaimaiaína meineite. ⁸ Raiafomo joneñeitimaci; iadedi iaimaiaí abí Jerusalén naisomo jamai fiebite. Jerusalén comini jearede rafue finua jira, Jusiñamui rafuena naimaci jitañena jira, Sodoma jaie ite nairai isoidimaci. Egipto jaie ite nairai jiaí isoidimaci. Jerusalémo Jesúna jaie jiaí meinetimaci. ⁹ Raiafomo iaimaiaí joniana rairuitimaci. Darui amani abí atomonado ailluena comini, naga nairaiaímona iaimaiaína jibuisaibitimaci. ¹⁰ Nana eniruemo ite comini iaimaiaí fiodaillari iobitimaci. Iaimaiaímona comini duere sefuilla jira, iaimaiaí jai fiodailla jira, iobitimaci. Rafuena finuanona, daní coninina rana fecaitimaci. ¹¹ Darui amani abí atomonado illanona, fiodaillamona iaimaiaína Jusiñamui dane jillotaite. Ie muidona naidaitiaímaiaí. Nana iaimaiaína ciodino eo jacinaitimaci. ¹² Naie facaise monamona damie iaimaiaína uaiduana cacadiaímaiaí. Llote:

—Bene mai bí.

Ieconí iaimaiaína enoidimacidi uillie motomo monamo iaimaiaí jaillana ciodimaci. ¹³ Naie facaise aillue ñuisaño suide. Ie jira janore facai Jerusalén goide. Riaí uaimona ie décima facai goide. Naiemona siete mil comini fiodaitimaci. Fiodañedino jacinailamona:

—Jusiñamuidí ua siño jito —lloitimaci. ¹⁴ Mena duere sefuilla facaise jai fuite. Nia daje suiñede; ia raire suite.

Juan irai trompeta fillana cacade

¹⁵ Naie facaise jiaíe jaenici ie trompetana fite. Monamo itino ado llotimaci: Jusiñamui, Cristo diga, illaíma isoi, eniruemo ite cominina biruimona jaca sedaite. Naie comini naimie anamo raise iitimaci.

¹⁶ Naie veinticuatro einamaci Jusiñamui ecimo illanona, naimie uicomo ana bitadajanona naimiena sedadimaci. ¹⁷ Llotimaci:

Jusiñamui, cai Nama, omo iobillacinona fecacadícai.

Siño jitodio. O jitailla rafuena jaca finodio.

O uaido bie cominina jai sedadio.

¹⁸ Ona naimaci inoñenamona, o diga iciritimaci; iadedi naimacina emodofidio.

Bie facaise jai fiódaitino jillotajamona, ona naimaci ñnoñena jira, naimacimona ja ibana oitio.

Jearede rafuena naimaci finua jira, naie facaise ona ñnoñedinona duere finoitio.

O díbeimo maijidino, o facaina lloraini, nana ona ñnotino omona ibana feiñoitimaci.

Níbai jamai bue isoidimaci.

Níbai jamai bue isoiñedimaci; iadedi omona ibana feiñoitimaci.

¹⁹ Naie facaise monamo ite Jusiñamui sedajano nase econuana ciódicue. Naie fo ite cajóna ciódicue. Ieconi boricabide. Bue isoi eo ficirede. Gurucabide. Ñuisaño suide. Monamona noci deilla isoi, ailluena hielu ana llude.

12

Juan daje riñona, eo aillue jaio diga, cide

¹ Naie facaise monamo daje riñona ciódicue. Naiñaiñona cue ciuamona, Jusiñamuidi eniruemo itinomo ico suille rafuena cue uiñuana jitaide. Naiñaiño ñniroidi jítoma isoi bairede. Naiñaiño eilli anamo fivui ite. Naiñaiño ifogimo nuicirai isoi doce ucuduai ite.

² Jai uruesite. Jocoacana jira, como isirede. ³ Ie facaise monamo jiaimiena ciódicue. Naimiedi Taife. Naimie illamona jiaie rafue suillena uiñotícue. Naimiedi eo aillue jaiona eruaide. Jiairede. Siete ifogi naimiemo ite. Diez sigai naimiemo ite. Naga ifogimo nuicirai ite. Riaí uaimona naimiedi dragón. ⁴ Naimie omacai diga ailluena ucuaina eniruemo ana butade. Riaí uaimona ie tercera facaina butade. Ie uruena gutallena, riño uicomo naidaita naiñaiño jocollena sedade. ⁵ Naiñaiño ñimana jocode; ia jaio naimiena gutañede. Nana nairaiaí naimie anamo ico illanona, naimacina ie jitaillacinona finotajamona, naimacina eo riire sedaite. Naimacina naimie nia sedañenia, monamo Jusiñamui ie illanomo naimiena uite. Ie ecimo Jusiñamui naimiena itatate. ⁶ Iemei naie riño jofue iñenanomo raire jaide. Nainomo Jusiñamuidi ie illinona jai finode, naiñaiño ie. Daje amani años abimo atomonado naiñaiñona sedaite.

⁷ Naie facaise monamo Jusiñamui jaienisaídi jaiona eruaídímie diga fuiridímaci. Jaiona eruaídímie jaienisaí diga jiaí fuiridímaci. Jusiñamui jaienisaí illaíma mamecídi Miguel. ⁸ Naimaci dinena emodofidímaci. Jaio ie jaienisaí anafefilla jira, Jusiñamui illanomo naimaci illano jai iñede. ⁹ Eniruemo jaiona eruaídímie ie jaienisaí diga dotadímaci. Naie jaiodi Taife. Satanás. Jaiona Taife jaie jaillanona, eo ailluena comínina jai jífuate. ¹⁰ Monamo damie ado lluana jai cacadícue:

—Jusiñamui lloga uai jai suide. Ie comínina raise jillotate. Naimie uai eo siño. Ie uai Cristomo illanona, Cristodi comínina raise sedaite. Eniruemo Taífena jai dotaja jira, Jusiñamuina bu raise ñnoñenia, jeacinona bu finoia, Jusiñamui uicomo birui naimie finocabilla isoi, Taife caina llogidoñeite. ¹¹ Toica Llauda isoidímie naimaciri fiódaila jira, naimie rafuena naimaci lluamona, Taífena emodofidímaci. Fiódaitímacina, naie rafuena llocana jaiacadímaci. ¹² Ie muidona iobi. Monamo omoi illanona, iobi; iadedi eniruemo bu ia, monaillaimo bu ia, eo duere sefuite. Eniruemo Taife jai illa jira, naimiemona duere sefuitímaci. Naimie eo icirite. Nainomo naimie are iñellena uiñote. Naimie icirillamona eniruemo itino eo duere sefuitímaci —llote.

¹³ Eniruemo jaiona eruaídímie dotajamona, naiñaiñona duere finollena, naimiedi ñimana jai jococa riñona racade. ¹⁴ Naimiemona jilloillena, Jusiñamui mena iaico, majaiño iaico isoi, naiñaiñoite. Feianona, jofue iñenanomo daje amani años abimo atomonado illena nainomo jaide. Naiñaiñona Jusiñamui eenollena, nainomo jaide. ¹⁵ Ie facaise jaiona eruaídímie fuemona eo ailluena jinui bite. Ille isoi tote, naiñaiñona corobaitallena; ¹⁶ ia enirue bojuamona, nana jinui nainomo ana jaide. Enirue naiñaiñona canua jira, naiñaiño corobaiñede. ¹⁷⁻¹⁸ Naie facaise jaiona eruaídímie riño diga icirillamona, naiñaiño comíni diga jobairiacade. Nana Jusiñamui llogacino ñnotino diga, nana “Jesúmo duidicai” raitino diga, jobairiacade.

13

Juan mena riirede ocainana ciode

¹ Naie facaise monaillai fuemo cue naidaillanona, daje riirede ocaina monaillaimona billana ciodicue. Naimiemo diez sigai ite. Naga sigaimo nuicirai raide. Naimiemo siete ifogiai ite. Ie ifogiaimo Jusiñamuina jeare ñaia mameci ite. ² Naie ocaina abi janallarina eruaide. Ie eilli oso eillina eruaide. Ie fue león fuena eruaide. Eniruemo itinona sedallena, naimiemo aillue jaiona eruaidimiedi ie siño uaina fecade. ³ Naimiemo ite ifogimona daje jai bofede. Fiodaitena eruaide; ia naiemona jai jillode. Naimieri rajjicaillamona, nana eniruemo ite comini naimie dibeimo jaidimaci. ⁴ Ocainamo ie uaina aillue jaiona eruaidimie fecaja jira, jaiona sedajanona, iobillacinona naimiemo fecadimaci. Ocainana jiai sedajanona, iobillacinona fecadimaci. Raitimaci:

—Naimie siño jito. Naimiena buna emodofnide.

⁵ Naimiemo Taife uai illa jira, abina uradoillamona, Jusiñamuina eo jeare ñaite. Taife jitailla jira, cuarenta y dos fivui iese nana cominina sedade. ⁶ Jusiñamuina eo jeare ñaicabite. Naimie illanona eo jeare ñaicabite. Nana Jusiñamui ecimo itinona eo jeare ñaicabite. ⁷ Taife uai naimiemo illa jira, Cristona eniruemo ite inotino diga jobairite. Naimacina emodofide. Iemona nana comini naga nairaiaimona naimie anamo itimaci. ⁸ Nana Jusiñamui rabenicomo cueñega mameciai diese ocainana sedaitimaci. Jusiñamuidi naimaci mameciaina naimiemo ite rabenicomo eniruena nia finoñena facaise jaca cueñede; ia Toica Llauda isoidimie fiodailla jira, Jusiñamui naimiena inotino mameciaina naie rabenicomo jai cuete. Naimie illanomo jaca illena, naimaci mameciaina cuete.

⁹ Omoi jeforena jira, raise fueollena, bie rafuemo cacarei. ¹⁰ Duere sefuillena, naie facaise cárcelmo Cristona inotinona joneitimaci. Naimacina meinia mei, naimacina meinetino Jusiñamuimona daje isoi ibana feiñoitimaci. Ie muidona Cristona inotino comeciai ocuiñocaida inocana jailla.

¹¹ Naie facaise jiaie riirede ocaina eniruemona billana ciodicue. Toica Llauda isoi naimiemo mena sigai ite. Aillue jaio isoi ñaite. ¹² Monaillaimona bite ocaina uai eniruemona bite ocainamo jiai ite. Ie uai diga, nana cominina monaillaimona bite ocainana sedatate. ¹³ Eo siño rafuena finocabite. Comini cioillena, monamona eniruemo boode ra ana bitatate. ¹⁴ Siño rafuena finuamona, Taife jitailla jira, eniruemo itinona jifute. Iena naimaci sedallena, cominina monaillaimona bite ocaina joreño finuana ocuide. Monaillaimona bite ocaina lloebi diga navui bofiamona jai jillode. ¹⁵ Joreño finua mei, eniruemona bite ocaina iena ñaitatate. Iena bu sedañenia, ocaina naimiena meiniana ocuide. ¹⁶ Nana cominimo naimie número na cuetatate. Número cuetatañenia, naimie mamecina cuetatate. Ie nabeillimo cuetatañenia, ie uiecomo cuetatate. Jamai bue isoidinomo cuetatate. Jamai bue isoiñedinomo cuetatate. Ucuberedinomo cuetatate. Ucubenedinomo cuetatate. Patrón anamo itinomo cuetatate. Patrón anamo iñedinomo cuetatate. ¹⁷ Iese bumo iñenia, rana ibanide. Rana fecanide. Bie mamecidi bie ocaina ie mameci. Mamecina cuetatañenia, naimie ie número na cuetatate. ¹⁸ Iena raise cacaillena, iemo omoi comeciaina faca. Abina uiñotimie bie número na uiñoite. Come mamecido iite. Bie número di seiscientos sesenta y seis.

14

Juan 144,000 comini ruana cacade

¹ Naie facaise Jerusalémo Sion railla anedu muidomo Toica Llauda isoidimie naidailana ciodicue. Naimie diga ciento cuarenta y cuatro mil comini itimaci. Naimaci uiecuai itofiaimo naimie mameci, ie Moo mameci diga, jai cuega. ² Monamona damie ñaiana cacadicue. Aillue ille surua isoi, eo ficirede. Eo gurua isoi jiai ficirede. Ailluena comini arpas tailla isoi, naimie ñaiana cacadicue. ³ Jusiñamui illanomo bie ciento cuarenta y cuatro mil comini comue ruana rotimaci. Naie cuatro cajedino nainomo ite. Naie

veinticuatro einamaci nainomo itimaci. Dani bie ciento cuarenta y cuatro mil comini bie comue ruana rotimaci. Jiaïno iena fueonidimaci. Bie ciento cuarenta y cuatro mil comini eniruemonai naimaci dibeimo iñedinomona jai jillodimaci. ⁴ Bie ciento cuarenta y cuatro mil comini jearede rafuena ebiruiñedinimaci. Llauda isoidimie rafuena ñinocana jaidimaci. Llauda isoidimie fiodailla jira, eniruemo itinomona naimacidi nano jillodino Jusiñamui iena, Llauda isoidimie iena. ⁵ Cristo rafuedo jeacinona finocabiñeno raise jaidimaci.

Juan daje amani jaienias rafue lluaana cacade

⁶ Naie facaise mona motomo jaienici feiana ciodicue. Naga nairaimo, nana eniruemo itinomo mare rafuena lluaide. ⁷ Ado llote:

—Jusiñamuina ñinuanona naimiena seda. Naimiemo iobillacinona feca. Naimiemo ñinoñedinona ja duere finoite. Monana, enirue diga, monailai diga, ille diga, naimie finua jira, naimiena seda.

⁸ Jiaie jaienici billanona llote:

—Babilonia raila nairai illano eo aillue; iadedi ja iñeite. Nainomo itino ja fuitimaci. Jeacinona nainomo itino eo finua jira, jiaie nairaiaina jeacinona jiai eo finotatimaci. Babiloniamoi jaie itino isoi, Jusiñamuimona duere sefuitimaci.

⁹ Naie facaise jiaie jaienici billanona, ado llote:

—Monailaimona bite ocainana bu sedaia, ie joreña bu sedaia, ie uieco itofemo, ie onollimo ocaina cuetataga ra bumoi ia, ¹⁰ Jusiñamui riicaillafuemonai, naimacina duenaiñenamona, jaca eo duere sefuitimaci. Irai motomo jaca duere sefuitimaci. Azufre boa isoi irai boode. Jusiñamui jaienisaïdi Llauda isoidimie diga, iena ciotimaci. ¹¹ Naie irai illano jaca bouamona, ie uillie jaca baireite. Nainomona naie duere sefuidino jaca jilloñeitimaci. Iese naimaci fiodaïñeno jaca duere sefuitimaci —llote.

¹² Bie rafue suille facaise Jusiñamui lloga uaina raise ñinuanona, Jesús dibeimo raise illanona, comeciai ocuiñocana naimaci jaille.

¹³ Iemei monamona Jusiñamui Joreño llote:

—Biena cueno: “Biruimona Jesúna ñnuamona, meineganodi caimare iitimaci. Jesús dibeimo naimaci illamona, navui duere sefuidimaci. Iemona uri iitimaci. Ieri Jusiñamuimona ñbana feiñoitimaci”.

Juan Jusiñamui eniruemo itinona duere finua rafuena cacade

¹⁴ Naie facaise monamo cue eruaia, userede uilliena ciodicue. Uillie emodo Cristo raide. Himana eruaide. Naimie ifogimo oromona finoca nuicirai ite. Ie onollimo jairede lloebi ite. ¹⁵ Jusiñamuina sedajanomona jiaie jaienici billanona, Cristomo ado llote:

—O lloebi diga eniruemo ite riarana cota, iena ollena. Jai einaite —llote.

Iese llote; ia cominina duere finollena ñaite. Naimaci duere finua facaisena ñaite.

¹⁶ Jaienici llua isoi, ie lloebi diga Cristo cotade. Nana iena finode. Cominina duere finode.

¹⁷ Jusiñamuina sedajanomona naie facaise jiaie jaienici bite. Naimie onollimo jairede lloebi jiai ite. ¹⁸ Ieconoi Jusiñamuimo jobaisoillanomona jiaie jaienici bite. Eniruemo boode ra dotaja uaidi naimiemo ite. Lloebiredimie mo ado llote:

—Jai einaila jira, naimacina o ollena, o lloebi diga illimo ite uvaiaïna tino.

Iese llote; iadedi cominina duere finollena ñaite. ¹⁹⁻²⁰ Jaienici llua isoi, ie lloebi diga tinode. Uvas ua mei, Jerusalén ecimo iji ollena ifomo dotade. Naie iji jino eo tote. Cominina ñaiticue. Jusiñamui riicaillafue anamo eo duere sefuitimaci. Eo diaitimaci. Trescientos kilómetros dirue enirue emododo toite. Caballo ifogi facaise a llerite.

15

Juan siete jaienisaï cominina duere fñoacana cide

¹ Naie facaise monamo jiaie rafuena ciodicue. Ieri eo rajicaidicue. Iena cue ciuamona, Jusiñamuidi eniruemo itinomo suille rafuena cue uiñuana jitaide. Siete jaienisaína ciodicue. Nagamie cominina duere finoacade. Naimaci finoacalle rafue diga, Jusiñamuidi cominina duere finuana fuite. Iemona ie ricailifue saite.

² Aillue joraina eruaide rana jiaí ciodicue. Quenirede. Uifinide. Boode ra diga tamiana eruaide. Jorai fuemo monaillaimona bite ocainana emodofidinona ciodicue. Ocaina joreño anamo jai iñedimaci. Ie cuetataga número anamo jai iñedimaci. Naimaci onollimo Jusiñamui arpas illanona, naimacina taillanona, ³ jai emodofilla jira, Moisés micori ie ruana rotimaci. Moisés micori Jusiñamui facaina jaie maijuide. Jeacinomona naimaci jiaí jai jillua jira, Toica Llauda isoidimie ie ruana jiaí rotimaci:

Eo siño ebirede rafuena finodio.

Jusiñamuina o illanona, jaca siño jitodio.

Mare rafuena jaca finocabidio. O lloga uai jaca finodio.

Naga nairai o anamo jai itimaci.

⁴ Cai Nama, nana comini ona jaciruillamona, ona ñnoitimaci.

O marena jira, omo iobillacinona fecaitimaci.

O duere finoca rafue muidona nana comini ona sedaitimaci.

⁵ Jusiñamuina sedajanomo dane eruaidicue. Ie fo iticuartomo ciodicue. ⁶ Naiemona siete jaienisaí billana ciodicue. Nagamie cominina duere finoacade. Eo userede linomona finoca iniroina jitade. Oromona finoca cinturones naimaci jogobemo jitade.

⁷ Naie cuatro cajedinomona damie naga jaienicimo oromona finoca copana fecade. Copamo Jusiñamui eniruemo itinona eo duere finollicino ite isoide. Jusiñamui jaca illa jira, ie lloga uai suicana jaite. ⁸ Jusiñamui ebirede siño uai illamona, ie sedajanomo uillie eo illana ciodicue. Bie siete jaienisaímo ite rafue nia suiñena jira, Jusiñamuina sedajanomo buna fo jainide.

16

Juan eniruemo copas oni totajanona cide

¹ Ie sedajanomona Jusiñamui naie siete jaienisaímo ado llote:

—Cue ricailafue omoi copamo illa jira, eniruemo itinona duere finollena, omoi copas oni tota.

² Daje jaienici iena finode. Eniruemo ite cominina duere finode. Monaillaimona bite ocaina cuetataganona jiaí duere finode. Ocaina joreñona sedadinona duere finode. Naimaci abiaímo jodollaiaína comuitate. Iemona duere sefuidimaci.

³ Iemei jiaie jaienici ie copa oni totajamona, monaillaina duere finode. Nana monaillaidi fiodaitino dirue isoi jaide. Eo jearedena eruaide. Nana nainomo ite cajedino fiodaitimaci.

⁴ Iemei jiaie jaienici ie copa oni totajamona, nana illiaí, nana jorainiaí diga, duere finode. Diruena jaide.

⁵⁻⁶ Naie facaise nana jinuina sedacabide jaienici llote:

—Jusiñamui, o jaca mareuidimedio. Ona ñnotinona eniruemo itino meinia jira, o facaina llorainina naimaci meinia jira, naimacina o raise uiñuamona, naimacina duere finodio. O cominina naimaci meiniamona, naimaci finua isoi, ibana oitio. O cominina naimaci meinia jira, diruena ja jiroitimaci.

⁷ Jusiñamuimo caimare soride ra jobaisoillanomona jiaie jaienici llote:

—Cai Nama Jusiñamui, ua siño jitodio. Naimaci finocabilla isoi naimacina jai duere finodio.

⁸ Naie facaise jiaie jaienici ie copa oni totajamona, jitomana duere finode. Eo lligaiñotajamona, eniruemo itino eo usidimaci. ⁹ Eo usidimaci; iadedi Jusiñamuina jeare nia ñaitimaci. Naimacina duere finollena, naimaemo uai illana uiñotimaci;

ia naimie dibeimo naimaci comeci*a*i iuaina meidoiacaiñedimaci. Jeacinona finuana fainonocaiacaiñedimaci. Naimiemo iobillacinona feacaacaiñedimaci.

¹⁰ Naie facaise jiaie jaienici ie copamona ie duere sefuillacinona monaillaimona bite ocaina sedajano dine totade. Ie muidona nana enirue jitireficaide. Eo duere sefuillamona, comini imaci iifena ainitimaci. ¹¹ Duere sefuillamona, Jusiñamuina jeare ñaitimaci. Naimaci abiaimo ite jodollai*a*i isirede; iadedi naimaci comeci*a*i iuaina meidoñedimaci. Jeacinona finuana fainonocaiñedimaci.

¹² Naie facaise jiaie jaienici ie copamona ie duere sefuillacinona Eufrates railla ille dine totade. Ie muidona naie aillue ille safenaite. Safenaillamona, jitoma billanomo ite nairai*a*i illaicomini, imaci soldaduai diga, ruica dine raise birenitimaci.

¹³ Naie facaise aillue jaio fueмона, monaillaimona bite ocaina fueмона, naimie facaina lloraima fueмона, daje amani janania*a*i billana ciodicue. Nagamiemona daje janaba bite. Nai janania*a*i jerocina eruai*e*. ¹⁴ Taifemona bite. Siño rafuena finocabite. Nana illaicomini, imaci soldaduai diga uaidollena, naimacina oreite. Danomo ofillena illaicomini uaidoite. Jusiñamui diga jobairillena, danomo ofitimaci. Naimie diga jobairillamona, Jusiñamui ua siño jitona nana comini uiñoitimaci. ¹⁵⁻¹⁶ Armagedón railla illanomo ofitimaci. Naie illano mamecidi judi*u*ai uai mameci. Iecon*i* cai Nama cuemo llote:

—F*ir*iraima isoi ebena biit*ic*ue. Cue billemo ocuiridimie iocire iite. Cue billemo naimie ocuiria, cue bia, naimie cue jitaillacinona finuamona, naimie meiruiñeite.

¹⁷ Naie facaise jiaie jaienici jafaici dine ie copamona ie duere sefuillacinona totade. Iecon*i* ie sedajanomona Jusiñamui llote:

—Bie duere sefuillacino diga, comini cue duere finoacanacino ja fuite.

¹⁸ Iecon*i* boricabide. Bue isoi eo ficirede. Gurucabide. Eo aillue ñuisaño suide. Comini comuilla facaisemona iese ñuisaño jaca suiñede. ¹⁹ Iemona nanoca nairai illano daje amani facaina goide. Nana jiaie illanuai jia*i* goidimaci. Jusiñamuidi Babilonia railla nairaina raise uiñuamona, nana ie riicaillafuemona iena eo duere finode. ²⁰ Naie ñuisañomona naga uiasi jai cioiñena. Naga anedu jia*i* cioiñena. ²¹ Monamona noci deilla isoi, hiel*o* jia*i* ana jurude. Naga hiel*o* cuarenta kilos n*ib*ai merede. Cominimo bailanona, eo duere sefuidimaci. Eo duere sefuillamona, Jusiñamuina nia jeare ñaitimaci.

17

Juan eo maraiñede riño duere sefuillana ciode

¹ Naie facaise naie siete copas diga ite jaienisaimona cue dine damie billanona cuemo llote:

—Cue diga bi. Eo maraiñede riño duere sefuillana omo acatait*ic*ue. Monail*l*ai emodomo naiñaiño jai raide isoide. Naiñaiñodi nanoca nairai illano mamecido ite. Nana illaicomini naie nairai anamo itimaci. ² Naiñaiño*n*a sedajamona, naiñaiño diga, illaicomini*d*i jearede rafuena finocabidimaci. Naiñaiño*n*a nabaillamona, eniruem*o* ite comini jearede rafuena eo ebiruitimaci —llote.

³ Nica*r*illa isoi, jaienici cue joreña uillanona, jofue iñenanomo cue joreña uite. Eo jiairede riirede ocaina emodomo naie riño raillana ciodicue. Jusiñamuina eo jearede ñaiacino ocaina abimo eo ite. Ocainamo siete ifog*a*i ite. Diez sigai jia*i* ite. ⁴ Naie riño jiduirede inroi, jiairede inroi diga jitade. Eo raifide quenirede ra diga, naiñaiño abi eo finobide. Dajerie ra oromona finoca. Dajerie perlas railla ramona finoca. Ie diga ie abi eo finobide. Naiñaiño onollimo oromona finoca copana uite. Nainomo eo maraiñede jearede rafuena finocana uite isoide. ⁵ Jusiñamui naiñaiño finoca rafuena uiñotaiacana jira, naiñaiño uiecomo mameci jai cuetataga: “Nanoca Babilonia raillañaiñod*ic*ue. Cuemona eo jearede rafue comucana jaicabide. Cue muidona comini jearede rafuena finocabide”. ⁶ Naiñaiñodi ailluena Jusiñamui*m*o duidinona, ailluena ua Jesú*n*a inotinona meinetajana eo ebiruite. Naiñaiño*n*a cue cioia, eo rajicaid*ic*ue. ⁷ Jaienici cuemo jicanote:

—¿Bue ñe raijcaidío? Naiñaiño mo ite rafuena omo lloiticue. Naiñaiñodi ocaina emodomo raide. Naie ocaina rafuena jiai lloiticue. ⁸ Naie ocaina navui ite; ia birui jai iñede. Ico eniruemona, eo ana ite ifomona, dane biite; iadedi faifite. Ieri Jesucristona ñnoñedino raijcaitimaci. Jesucristona naimaci ñnoñena jira, monamo Jusiñamuidi ie rabenicomo enirue nia finoñena facaise naimaci mameciaina jaca cueñede. Naimie illanomo jaca iñeitimaci. ⁹ Ocaina rafuena omo ja lloiticue. Jusiñamui ona uiñotajanona iena cacaitío. Bie siete ifogidi siete anedu mamecido ite. Riño nainomo raide. ¹⁰ Ie siete ifogidi siete illaicomini mamecido ite. Naimacimona cinco illaicomini jai iñede. Damie cominina birui sedade. Jiamie cominina nia sedañede. Cominina naimie sedaia, are naimacina sedañeite. Dallu sedaite.

¹¹ Ifomona bite ocainana dane lloiticue. Cominina jiai sedaite; ia bie siete illaicomini sedajacimomo duite. Cominina naimie sedaja mei, naimie faifite. ¹² Ie diez sigaidi diez illaicomini mamecido ite. Diez nairaina sedaitimaci; iadedi nia sedañedimaci. Cominina dallu sedallena, ocainamona naimaci uaina feiñoitimaci. ¹³ Daje isoi comecina lloitimaci. Ocainana nabaitimaci. Naimie jitailla rafuena finuanona, naimie anamo iitimaci. ¹⁴ Toica Llauda isoidimie diga jobairitimaci; ia Llauda isoidimie ie comini diga emodofite. Llauda isoidimie nana illaicomini baifemo faia jira, nanoca imiena jira, naimacina emodofite. Ie cominina naimie fetode. Naimiena ñnotimaci. Jai emodofitimaci —llote.

¹⁵ Jaienicini nia llote:

—Riño monaillai emodomo raillana ailli ciodío. Monaillaidi nana comini mamecido ite. Naga nairai mamecido ite. ¹⁶⁻¹⁷ Naie diez illaicomini, ocaina diga riñona enoitimaci. Naiñaiño na duere finoitimaci. Jusiñamui jitailla jira, naimie jitailla rafue fuidollena, naimie lloga uai suillena, naimaci comecina daje isoi lloitaite. Ocaina anamo naimacina itataite. Riñona iese fuidoitimaci. Naiñaiño iniroina oni dotatajanona, naiñaiño taiñaiño na iite. Naiñaiño na meineitimaci. Ie llicisina rritimaci. Ja muidomo iraimo naiñaiño na dotaitimaci. Iese naiñaiño na duere finuanona, naiñaiño na fuidoitimaci. ¹⁸ Bie riñodi nanoca nairai illano mamecido ite. Naie nairai anamo nana eniruemo ite illaicomini iitimaci —llote.

18

Juan Babilonia railla nairai illano goilla rafuena ciodo

¹ Ie facaise monamona jiaie jaienicini ana billana ciodicue. Naimie uai siño. Naimie uai siñona jira, eniruena lligaiñote. ² Ado llote:

—Iena Jusiñamui duere finuamona, Babilonia nairai illano jai nana goide. Comini nainomo jai iñedimaci. Nainomo Taife jaienisai birui itimaci. Jananiai nainomo birui itimaci. ³ Nia goiñenia, bie nairai jeacinona eo finuamona, nana nairai iena ebiruitimaci. Bie nairaina nabaillamona, nana illaicomini jearede rafuena jiai finocabidimaci. Jearede rafuemona nana rana fecaraini bie nairaimona ailluena ucubena ganacabidimaci —llote.

⁴ Naie facaise monamona damie llote:

—Cue comini, bie nairaimona birui mai eneno oni i. Jeacinona omoi finoi raillano, naie facaise omoi duere sefui raillano, birui eneno mai oni i. ⁵ Bie nairai jeacino eo finocana jaidimaci; iadedi iena Jusiñamui uiñuamona, naimacina jai duere finoacade. ⁶ Jusiñamui, naimaci finua diese ibana ono. Naimacina ua eo duere fino. ⁷ Jeacino finuamona iobidimaci. Iemona abi iedotimaci. Jeacino finuana eo ebiruitimaci. “Illaicomini dicitai. Nana cai jitailla ra caimo ite. Feciño isoi duere jaca sefuiñeiticai” comeciaina facadimaci; ⁸ iadedi cai Nama Jusiñamui naimacina ebena eo duere finoite. Duicomona, sure illamona, aime guillamona fiodaitimaci. Naimaci jofue boote. Jusiñamui siño jitona jira, naimacina raire fuidoite —llote.

⁹ Bouamona uillie naimaci cioia, sunaillamona, naie nairai diga nabairite illaicomini eo eetimaci. ¹⁰ Duere sefuillena naimaci jaciruilla jira, aremona lloitimaci:

—Ero, Babilonia eo aillue nairai illano; iadedi duere finuamona ua raire fuite — lloitimaci.

¹¹ Naimaci rana naie nairai jai oñena jira, rana fecaraini eo sunaillamona eo eetimaci.

¹² Iese fecacabidimaci: oro, plata, abi finollena raifide ra, diga eo mare raifide iniroi, diga caimare soride rabiciai, elefante sigainiai, jofona nille ra, bronce, lloeona, mare nofici, ¹³ guille caimaretade ra, caimare soride ra, vino, guille ie aceite, mare harina, core, juraretaiai, toica llaudaiai, caballos, carretas, comini. Vendellena, cominina aticabidimaci. ¹⁴ Sure illamona lloitimaci:

—Caimona omoi comeciai jitailla rana ja oñeitomoi. Omoi ebiruiga rana ja oñeitomoi.

¹⁵ Duere sefuillena naimaci jaciruilla jira, nainomona ucubena jai oñenamona, rana fecaraini aremona ado eo eetimaci. Sunaitimaci. ¹⁶ Lloitimaci:

—Naie nairai eo duere sefuidimaci. Nia duere sefuiñenia, eo mare rana, mare iniroi diga ebiruitimaci. Eo raifide abina finolle rana eo ebiruitimaci. Oromona finoca ra, perlamona finoca rana eo ebiruitimaci; ¹⁷ iadedi nana naie nairai, ie raifide ra diga, jai raire fuite —lloitimaci.

Nana botes imaci capitanes, nana botemo maijuidino diga, nainomo jaidino diga, botedo rana fecaraini diga, ¹⁸ aaremona uilliena ciuamona, naie nairai bouana fidiano, lloitimaci:

—Naie nairai nana jiai nairai bai femo navui faite. Jiaie nairai ie isoi ebinide.

¹⁹ Sure illamona, naimaci ifogimo imuicina faianona, eetimaci. Lloitimaci:

—Bie nairai eo duere sefuide. Bie nairaimona boteredinodica navui ailluena ganadica. Bie nairai jai raire fuite.

²⁰ Naie facaise monamona damie llote:

—Monamo itino, naie nairai fuillari mai iobi. Jusiñamui cominina jai jaidomoi. Naimie facaina navui maijidomoi. Naimie rafuena navui llofueuidomoi. Naie nairaimona duere sefuidomoi; iadedi omoi facaina Jusiñamui ibana jai ote.

²¹ Naie facaise jiaie jaienicismo siño uai illanona, eo aillue nofici llinuanona, monailaimo iena faite. Llote:

—Bie nofici dane cai cioiñena isoi, Babilonia railla nairai dane iñeite. Jusiñamui iena eo riire fuidoite. ²² Nainomo buna dane roñeite. Buna guitarrana eruaide arpas jaca taiñeite. Buna firacaina jaca fiñeite. Buna trompetana jaca fiñeite. Nainomo buna rana jaca niñeite. Rana jaca finoñeite. Buna jaca doberiñeite. Llomeniconona finollena, buna dane maijiñeite. ²³ Nainomo naiona lamparinai dane booñeite. Rafue dane iñeite. Eo caimare iobitaja rafue dane iñeite. Iraisñeitimaci. Saiñeitimaci. Naie nairai rana fecarainidi navui nanoca fecaraini. Naimacina Taife canua jira, ailluena nairaiaina navui jifuecabidimaci. ²⁴ Naie nairai ailluena Jusiñamuina inotinona meinetimaci. Ailluena Jusiñamui facaina llorainina meinetimaci; iadedi naimacina Jusiñamui duere finua jira, ua eo mare —llote.

19

¹ Ie facaise monamo eo ailluena comini ado lluaana cacadicue. Jusiñamuimo llotimaci: Ona cai iobitajasa. Caina jai jillotatio.

O uai ebirede. Odi siño jitodio.

² O anamo itinona raise uiñuamona, uanaicinona o uiñuamona, naimacina duere jai finodio.

Naie jearede rafuena finode riñona jai duere finodio.

Naie riño ailluena cominina jearede rafuena finotate.

Ailluena o facaina maijidinona jai meinetade;

iadedi iba jai otio.

³ Iemei dane llotimaci:

—Ona cai iobitajasa. Duere sefuillena, naie nairai jaca boode. Naimaci jaca duere sefuitimaci —llotimaci.

⁴ Naie veinticuatro einamaci, naie cuatro cajedino diga, Jusiñamui ecimo ana bitadajanona, naimiena sedadimaci. Llotimaci:

—Omoi llucino mare. Ie isoi jiai lloiacadicaí. Jusiñamuina cai iobitajasa.

⁵ Jusiñamui illanomona damie llote:

Nana cai Jusiñamuina facaina maijidino iobitajasa.

Nana naimiena inotino naimiena iobitajasa.

Jamai bue isoidino naimiena iobitajasa.

Jamai bue isoiñedino naimiena iobitajasa.

Juan Toica Llauda isoidimie aina ua rafuena cacade

⁶ Naie facaise monamo eo ailluena comini llwana cacadicue. Ailluena jinui surua isoi ficirede. Eo gurucabilla isoi ficirede. Llotimaci:

Cai Nama Jusiñamuina cai iobitajasa.

Naimie siño jito. Nana cominina birui jai sedade.

⁷ Eo iobidicaí. Naimiemo iobillacinona eo cai fecajasa.

Llauda isoidimie ie aina ua rafue facaise jai suide.

Naiñaiño jai finobide.

⁸ Mare iniroi naiñaiño mo jai ite. Eo userede. Quenirede. Jeanide

llotimaci. Iese iniroina llotimaci; ia Cristo, ie comini diga, jaca illena ñaitimaci. Ie ai diga, ini ie riño jaca caimare illa isoi, nana naimie comini diga, naimie caimare jaca iite. Naie mare iniroidi, Jusiñamui jitaillacinona finuamona, naimie inotino imaci mare finoca rafue isoide.

⁹ Jaienicí cuemo llote:

—Biena cueno: “Llauda isoidimie aina ua rafue dine uaidoganodi caimare iitimaci”.

—Iemei llote:

—Jusiñamui iena llua jira, uanaicinona omo lloticue.

¹⁰ Jaienicí uicomo eillimo ana bitadaticue, naimiena sedallena; ia cuemo llote:

—Dama ite. Cuena sedaño; ia dama Jusiñamuina seda. Jesús ie dibeimo itinona uanaicinona jai uiñotade. Ie jira naga o diga naimiena inotino isoi, Jusiñamui facaina jiai maijidicue. Naga Jusiñamui facaina maijidimie Jusúna llocabite. Ie muidona dama Jusiñamuina seda.

Juan userede caballo emodomo itimiena ciod

¹¹ Naie facaise mona ecorillana ciodicue. Nainomo userede caballona ciodicue. Naie emodomo itimie mo mena mameci ite. Inogamiena mameciredede. Uanaicinona llocabitimiena jiai mameciredede. Naimacina raise uiñuamona, naimie dibeimo inedinona duere finollena, naimaci diga jobairite. ¹² Naimie uisidi irai isoide. Illaimana jira, naimie ifogimo ailluena nuicirai ite. Naimiemo cuega mamecina buna uiñoñede.

Dama naimie iena uiñote. ¹³ Naimie jitaca iniroi ie dibeimo inedino diruemo mutaca. Jusiñamuina naimie uiñotaja jira, Jusiñamui Uairedimiena mameciredede. Naimiedi Jesucristo. ¹⁴ Naimie jinafona soldaduai isoi Jusiñamui facaina itino monamona billana jiai ciodicue. Eo mare userede jeanide iniroina jidadimaci. Userede caballuai emodomo itimaci. ¹⁵ Eniruemo ite nairaiaina emodofillena, naimie fuemo jairede lloebi ite. Naimacina emodofilla mei, naimacina naimie jitaillacinona finotallena, naimacina eo riire sedaite. Jusiñamui siño jitona jira, naimie ricailifue anamo itinona eo duere finoite.

¹⁶ Naimie iniroimo, naimie idaimo jai cuega: “Nanoca Illaíma. Nanoca Nama”.

¹⁷ Naie facaise jaienicí jitoma lligaiñuanomo ciodicue. Nana inoniaina uaidote:

—Llicisina mai riabi. Jusiñamuidi ailluena cominina ja meiniamona rille eo iite.

¹⁸ Naimacina emodofillamona, ailluena llicisi ja iite. Ailluena cominina ja meineite. Illaicomini itimaci. Soldaduai illaicomini itimaci. Caballuai itimaci. Caballuai emodomo

jaicabidino itimaci. Diga comini ite. Jamai bue isoidino itimaci. Jamai bue isoinedino itimaci. Patrones anamo itino itimaci. Patrones anamo inedino itimaci. Naimaci llicisi mai riabi —llote.

¹⁹ Naie facaise monaillaimona bite riirede ocainadi enirue illaicomini diga ofide. Naimaci soldaduai jiai ofidimaci. Userede caballo emodomo itimie diga, naimie dibeimo itino diga jobairiacadimaci. ²⁰ Userede caballo emodomo itimie ie dibeimo itino diga naimacina emodofide. Ocainana gaitadimaci. Naimie facaina tainona lloraimana jiai gaitadimaci. Naie lloraima ocaina uai diga cominina jifuecabite. Siño rafuena finuamona, ocaina cuetataga ra itinona, ie joreñaona sedadinona jifuecabite. Naie iaiaiaia gaitaja mei, eo boode iraimo iaiaiaia cajena dotadimaci. Azufre boa isoi irai boode. ²¹ Caballo emodomo itimiedi ie fuemo ite lloebi diga iaiaiaia soldaduaia meinete. Jaienic luua isoi, inoniai naimaci llicisina ritimaci. Iemona eo monidimaci.

20

Juan mil años Taife maiana cide

¹ Naie facaise monamona jaienic billana cidicue. Eniruemo eo ana ite ifo llave naimiemo ite. Aillue lloeo ie onollimo ite. ² Aillue jaiona eruidimiena gaitade. Naimiedi Taife. Riia uaimona Satanás. Jiaici dragón. Mil años iese illena lloeo diga naimiena maite. ³ Ana ite ifomo naimiena dotade. Llave diga ifona ibaide. Cominina ramo faiñellena, naimacina jeacinona finotañellena, naimie uaina itatañede. Mil años cominina jifuenide. Mil años fuilla mei, dallu naimiena jino oretaite, cominina ramo faillena.

⁴ Ie mei monamo diga jueces illanuaina cidicue. Jusiñamui uai diga nainomo itinodi marañede rafue finodinomo jamai duere sefuillicinona lloitimaci. Ie facaise jai meineganona jiai cidicue. Eo duere sefuilla facaise “Jesús cominidica” naimaci llua jira, Jusiñamui uaina naimaci llua jira, naimaci ifogiaia jaitajanona, naimacina meineganodimaci. Monaillaimona bite ocainana sedañedimaci. Ie joreñaona sedañedimaci. Ie cuetataga ra naimaci uiecomo, naimaci onollimo ined. Navui fiodaitimaci; ia iemona bie facaise jai jillobitimaci. Imaci abia diga Jusiñamui naimacina jillotaite. Cristo diga mil años eniruemo itinona sedaitimaci. ⁵ Naimacidi nano jillodino. Naie mil años nia fuiñenia, jiaie jai fiodaitino nia jilloñeitimaci; ia mil años fuilla mei, jilloitimaci. ⁶ ¡Nano jillodino caimare marena iitimaci! Dane fiodaiñenamona Jusiñamui illanomo jaca iitimaci. Faiñeitimaci. Cominina sedajanona, comini Jusiñamuina raise uifñollena, comini Cristona raise uifñollena, naimacina canoitimaci. Cristo diga mil años naimacina sedaitimaci.

⁷ Bie mil años fuilla mei, Jusiñamuidi ana ite ifomona Taife jino oretaite. ⁸ Nana eniruemo ite nairaiaia jifuaibite. Gog railla illaicominina, Magog railla nairaiaia diga, jifueite. Naimaci nairaiaia ofitaite. Eo ailluena naimaci illa jira, conilliena cai facadonina isoi, naimacina facadonidicue. Jusiñamuina inotino diga jobairillena, ofitimaci. ⁹ Danomo ofillanona, Jusiñamuina inotinona ciribitaitimaci. Jerusaléna, Jusiñamui isiruiiga nairaina, ciribitaitimaci. Naie facaise monamona boode ra billanona, jobairiacadinona fuidoite. ¹⁰ Cominina eo jifuecabite; ia ie facaise Jusiñamuidi Taifena eo boode iraimo dotaite. Azufre boa isoi irai boode. Nainomo monaillaimona bite ocainana jaie dotade. Naimie facaina tainona lloraima jaie dotade. Nainomo ua jaca duere sefuitimaci

Juan aillue rairabicina cide. Nainomona Jusiñamui duere fnollicinona llua cacade

¹¹ Naie facaise aillue userede rairabicina cidicue. Illaimana naimie illamona, nainomo Jusiñamuina jiai cidicue. Naimie siño illamona, mona enirue diga jai ined. ¹² Naie facaise Jusiñamui uiecomo nana fiodaitino naidaillana cidicue. Jamai bue isoinedino itimaci. Jamai bue isoidino itimaci. Naimacimo juez isoi Jusiñamui lllollena, itimaci. Ie rabenicuaimo naimaci jai finoca rafuena jibuide. Naimaci finoca rafue nainomo

jai cuega. Iemei Jusiñamui jiaie rabenicona jibuide. Naimie diga jaca ille comini mameciai nainomo jai cuega. Naimaci mameciai nainomo iñenia, naimaci finoca rafue diese Jusiñamui naimacimo duere sefullena lote. ¹³ Monailaimo ite corobaitino abiai, joreñuai diga, jilloitimaci. Raigano abiai joreñuai diga jilloitimaci. Naimaci finoca rafue diese Jusiñamui naimacimo duere finollena lloite. ¹⁴ Naimaci abiai naimaci joreñuai diga iraimo dotaite. Jaca faifitimaci. Naiemona jaca jilloñeitimaci. Jusiñamuimona eneno jaca itimaci. ¹⁵ Monamo ite rabenicomo cueñega comini mameciai diese itinona iraimo dotaite.

21

Juan comue monana, comue enirue diga ciodie

¹ Birui ite mona, birui ite enirue diga jai iñede. Monailai jiai jai iñede. Iemei comue mona ciodicue. Comue eniruena jiai ciodicue. ² Comue nairai illanona ciodicue. Comue Jerusaléna ciodicue. Jusiñamui illanomona, Jusiñamuimona bite. Naimiemona billa jira, naie nairai eo mare. Eo ebirede finobide riño ie inina ua facaise isoi, eo ebirede. ³ Jusiñamui illanomona damie ado lote:

—Comini motomo Jusiñamui illano jai ite. Naimaci diga naimie iite. Naimie comininitimaci. ⁴ Naimaci illanomo naimie iite. Naimacina naimie nabaillamona, naimie jitailla jira, naimacina caimadoite. Dane eeñeitimaci. Fiodaiñeitimaci. Sunaiñeitimaci. Duere sefuiñeitimaci. Birui ite rafuemo comeciaina naimaci nainomo facañena jira, ie facaise sunaiñeitimaci —lote.

⁵ Jusiñamui lote:

—Ero, nana ra comuena birui finoiticue. Cue llucacino uanaicinona jira, cue llucacina cue finua jira, bie rafuena cueno.

⁶ Iemei cuemo lote:

—Bie rafue jai fuite. Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitodicue. Naimaci illena comini jinuina eo jiroacana isoi, cuena inotino comeciiai eo caimare itataiticue. Ibatañeno cue diga illena, naimacina jaca itataiticue. ⁷ Cuen a raise inotinona iese itataiticue. Jaca naimaci Jusiñamuniticue. Naimaci jaca cue comininitimaci. ⁸ Jiaino jaca eo boode iraimo jaca iitimaci. Azufre boa isoi irai boote. Naiemona jaca jilloñeitimaci. Cuemona eneno jaca iitimaci. Diese nainomo iitimaci: abido danomo jaidino, cuena raise inoñedino, jearede rafue finocabidino, cominina meinetino, aiñede riño diga icabitino, iniñede ima diga icabitino, aiñinai, jiraraina sedacabidino, tainona llocabitino —lote.

Juan comue Jerusaléna lote

⁹ Naie facaise naie siete jaienisaïmona damie cue dine bite. Naie jaienisaï imaci copamo cominina duere finollicinona navui ite isoide. Naimie cuemo lote:

—Cue diga mai bi. Hima ie aina jai ua isoi, Toica Llauda isoidimie ie cominina jai ote. Ie ai isoidimaci. Llauda isoidimie jai oga comini illanona omo acataiticue.

¹⁰ Nicaïrilla isoi, Jusiñamui Joreño cue joreñona eo a ite aillue anedumo uite. Nainomona, Jusiñamuimona, monamona Jerusalén billana ciodicue. Jusiñamui iena jira, eo mare. ¹¹ Nainomo Jusiñamui illa jira, naie illano eo quenirede. Eo mare raifide nofici isoi quenirede. Jaspe railla noficina eruailla jira, enefebecodo ciodie. ¹² Ie llaigafu eo a ite. Eo jedaciede. Doce nasiai ite. Naga nasemo daje jaienici ite. Israel micori uruai mameciai naie nasiamo cuega. Doce uruai illa jira, naga naserie daje mameci cuega. ¹³ Jitoma bicabillano dine eruaide llaigafomo daje amani nase ite. Jitoma jaicabillano dine eruaide llaigafomo daje amani nase ite. Naga beici dine eruaide llaigafomo daje amani nase ite. ¹⁴ Naie llaigafu anamo doce nofici ite. Nainomo Toica Llauda isoidimie ie doce llofueoicaigano mameciai cuega.

¹⁵ Cue diga ñaite jaenícimo oromona ra facara ite. Naie nairai facallena ite. Ie nase, ie llaigafoga diga, facallena ite. ¹⁶ Naie nairaina naimie facajamona, nagafebei daje isoi illana uiñoticue. Dos mil doscientos kilómetros nagafebei are ite. Dos mil doscientos kilómetros nagafebei a ite. ¹⁷ Ie llaigafona jiai facade. Sesenta y cuatro metros a ite. Comini facaja isoi, jaenici iena facade.

¹⁸ Ie llaigafoga jaspe railla noficimona finoca. Bie nairai difai oromona finoca. Enefebecodo ciode. ¹⁹ Diga eo quenirede noficina eruaide ra llaigafomo ite noficimo jai nitade. Nano jaspe. Enefebecodo ciode. Iemei zafiro. Mocorede. Jiaie ágata. Mocorede. Jiaie esmeralda. Mocorede. ²⁰ Jiaie ónice. Jiairede userede diga faiga. Jiaie cornalina. Jiairede. Jiaie crisólito. Orona eruaide. Jiaie berilo. Mocorede. Jiaie topacio. Borarede. Jiaie crisoprasa. Mocorede. Jiaie jacinto. Jiduirede. Jiaie amatista. Jiduirede. Naie llaigafoga anamo ite noficiái doce diga ite. ²¹ Ie doce nasiaidi perlas. Userede. Naga nase daje perlamona finoca. Bie nairai naisuaidi difai oro. Enefebecodo ciode.

²² Bie illanomo Jusiñamuina sedajanona cioiñedicue. Nana bie illanodi naimie sedajano. Cai Nama Jusiñamui, Toica Llauda isoidimie diga, nainomo illa jira, iaímaiaí uicomo sedaiticái. ²³ Jusiñamui siñona jira, nainomo comini jitomana jitaíñeitimaci. Fívuina jitaíñeitimaci. Jusiñamui, Llauda isoidimie diga, iena lligaiñoite. ²⁴ Nana comini iaímaiaína nabaicana jaitimaci. Nana illaicomini iaímaiaí ñine billanona, iaímaiaímo iobillacino jaca fecaitimaci. ²⁵ Bie nairai nasiaí jaca íbaiñeite. Nainomo naionadi jaca íñeite. ²⁶ Iaímaiaímo iobillacinona fecallena, nana comini nainomo biitimaci. ²⁷ Nainomo jeacino jaca íñeite. Jearede rafue finodino nainomo biñeitimaci. Tainona lloraini biñeitimaci. Dani Llauda isoidimie ite rabenicomo cuega mameciaí itinodi nainomo biitimaci. Bie rabenicomo Jusiñamui illanomo jaca iitino mameciaí jai cuega.

22

¹ Naie facaise jaenici cuena daje ille acatate. Nainomo ite jinui jiruamona cominina jaca itataite. Uifinide. Jusiñamui, Llauda isoidimie diga, illanomona tote. ² Nanoca naiso motodo tote. Nagafebelle ñine jaca itataite amenaiaí ite. Naga fívuí llisillamona, naga fívuí llisilla ite. Ie íbiaí illamona, comini caimare mareña itimaci. ³ Jeacino nainomo íñena jira, Jusiñamui jaca buna duere finoñeite. Jusiñamui, Llauda isoidimie diga illamona, naimie comini naimiena jaca sedaitimaci. ⁴ Naimiena marefodo cioitimaci. Naimie mo naimaci duillamona, naimaci uiecuai itofiaímo naimie mameci cueite. ⁵ Nainomo naionadi íñeite. Lamparína jitaíñeitimaci. Jitomana jitaíñeitimaci. Cai Nama Jusiñamui naimacina lligaiñoite. Illaicomini isoi jaca iitimaci.

Juan Jesucristo billirui iaírei illana cacade

⁶ Jaenici cuemo llote:

—Bie lluacinodi uanaicino. Naimie facaina llorainimo ie rafuena llollena, ie uaina itatate. Naimiena ñnotinona íco suille rafuena ja uiñotaiacade. ⁷ “Raire biitícue” Cristo llote.

Bie rabenicomo ite íco suille rafuena ñnotinodi caimare iitimaci.

⁸ Juandícue. Bie rafuena cacadícue. Iena ciodicue. Iena cue cacaja mei, iena cue cúa mei, iena cuemo acataga jaenici uicomo ana bitadatícue. Naimiena sedaacadícue; ⁹ iadedí cuemo llote:

—Dama ite. Cuena sedaño. O diga, naimie facaina lloraini isoi, bie rabenicomo ite llogacinona ñnotino isoi, naimie díbeimo jiai maijídícue. Dama Jusiñamuina seda. ¹⁰ Bie rafue suillirui iaírei illa jira, iena jino lloño. Iena uiñota. ¹¹ Bie rafuena bu ñnoñenia, naimie jitailla jira, marañede rafue naimie finoacania, iena nia finoite. Jearede rafue bu finoacania, iena nia finoite; ia bie rafuena naimie ñnoia, naimie jitailla jira, mare rafue naimie finoacania, mare rafuena finocana jailla. Jusiñamui jitaillacinona bu finoacania, naimie jitaillacinona nia finocana jailla.

¹² Jesucristo cuemo llote:

—Ero, raire biitícue. Naimie finoca rafue diese nagamiemo ibana fecaitícue. ¹³ Jaca bue nia iñenia, jaie jaca itícue. Nana rana finodícue. Nana ra cue uaido icana jaide. Nana rana fuilla mei, jaca iitícue. Jaca siño jitodícue. ¹⁴ Naimaci ñiroina naimaci jocoia, caimare iitimaci. Naimaci comecina ñaitícue. Ie jeacinona oni dotacamie jaca itataite amena llisillamona lliite. Cue cominina naimie illamona, Jusiñamui illanomo ie nasedo jaicabite; ¹⁵ ia naimacina jeacinona naimaci fainonocaiñenia, Jusiñamui illanomo marañede rafuena finocabidino, aima dne jaicabidino, añede riño diga icabitino, iniñede ñima diga icabitino, cominina meinetino, jiraraina sedacabidino, tainona llocabitino duiñeitímaci. ¹⁶ Creyentiaina bie rafuena uiñotallena, cue jaienici o dne jai oretaticue. David micori ie jitodícue. Monairacudu bairia isoi, Jusiñamui jitaillacinona cue finollena, baireitícue —llote.

¹⁷ Bie facaise Jusiñamui Joreñodi, Cristo jai oga ai railla comini diga, naimiena nia ñinoñedinona uaidote:

—Bie rafuena mai cacarei. Iena mai ñno. Iena bu ñnoia, jiaimieemo iena lluai: Iena mai cacarei. Iena mai ñno.

Jiroacadimiemo llotícue:

—Mai jiruaibi. Bie jinua raifiñede. Biena o jiroacania, jaca iitio. Iese llotícue; ia ie comecina ñaitícue. Bie rafue ñnuana ñaitícue. ¹⁸ Bie ico suille rafue ite rabenicono bu facajia, naimieemo rafuena lloiacadícue. Bie rafue baifemo bu lloia, bie rafuena bu meidoia, bie rabenicomio ite duere finuacino isoi, Jusiñamui naimiena duere finoite. ¹⁹ Bie rafuena bu jamaia, Jusiñamui naimiena duere finoite. Jaca illena Jusiñamui ie mamecina ie rabenicono jaca cueñeite. Comue Jerusalémo jaca duiñeite. Naiena jai llotícue.

²⁰ Cristo raite:

—Bie rafue jaca suite. Ua raire biitícue.

Iena raire suillena jiai jitaídícue. Cai Nama Jesús raire billena eo jitaídícue. ²¹ Naimie duenillacinona nana Jesucristona ñnotino uiñocana jaillana jitaídícue. Macaibaite. Juandícue.